



# Uwumbor aagbaŋ

Konkomba

## Contents

Tibonyaan ti Matiu ɣmee ti na	1
Tibonyaan ti Mak ɣmee ti na	50
Tibonyaan ti Luk ɣmee ti na	80
Tibonyaan ti Jønn ɣmee ti na	130
Yesu Aakpambalb aah tun Lituln pu na	165
Kigbaŋ ki Pœol ɣmee ki tii Rom Yaab na	213
Njan aagbaŋ ki Pœol ɣmee ki tii Korint Yaab na	233
Lelee aagbaŋ ki Pœol ɣmee ki tii Korint Yaab na	252
Kigbaŋ ki Pœol ɣmee ki tii Galasia Yaab na	264
Kigbaŋ ki Pœol ɣmee ki tii Efesus Yaab na	271
Kigbaŋ ki Pœol ɣmee ki tii Filipi Yaab na	278
Kigbaŋ ki Pœol ɣmee ki tii Kolose Yaab na	283
Njan aagbaŋ ki Pœol ɣmee ki tii Tesalonika Yaab na	288
Lelee aagbaŋ ki Pœol ɣmee ki tii Tesalonika Yaab na	292
Njan aagbaŋ ki Pœol ɣmee ki tii Timoti na	295
Lelee aagbaŋ ki Pœol ɣmee ki tii Timoti na	301
Kigbaŋ ki Pœol ɣmee ki tii Taitus na	305
Kigbaŋ ki Pœol ɣmee ki tii Filemonn na	308
Kigbaŋ ki bi ɣmee ki tii Hiibru Yaab na	309
Kigbaŋ ki Jems ɣmee ki na	325
Njan aagbaŋ ki Piita ɣmee ki na	330
Lelee aagbaŋ ki Piita ɣmee ki na	336
Njan aagbaŋ ki Jønn ɣmee ki na	340
Lelee aagbaŋ ki Jønn ɣmee ki na	345
Taataa aagbaŋ ki Jønn ɣmee ki na	346
Kigbaŋ ki Juud ɣmee ki na	347
Tibokpiirkaan (Refeleesionn)	349



**Uwumbor aagbaŋ**

**Bible without Deuterocanon in Konkomba**

Language: Konkomba

Provided by: Wycliffe Bible Translators

Contributor: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

**Copyright and Permission to Copy**

Copyright © 2014 Wycliffe Bible Translators, Inc.

Copyright © 2014 Wycliffe Bible Translators, Inc. Scripture text used by permission.

© 2014, Wycliffe Bible Translators, Inc. All rights reserved.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.

c7765cba-ce13-51c8-80b3-68facb5fdf4a

ISBN: 978-1-5313-0712-7

*Tibɔnyaan ti*

## MATIU

*ymee ti na*

**Yesu Kristo aayaajatiib  
ponn ni aayimbil**

(Luk 3.23-38)

**1** Yesu Kristo aamaal ponn ni aayimbil le bi kigbañ kee ponn ni. U nan ye Ubɔr David aayaabil la. David mu nan ye Abraham aayaabil.

**2** Abraham le nan ma Aisak, Aisak mu ma Jakob,

Jakob mu ma Juda ni unaabitiib.

**3** Juda mu ma Peres ni Sera. Bina aayimbiil le nan ye Tamar.

Peres mu ma Hesronn, Hesronn mu ma Ram,

**4** Ram mu ma Aminadab, Aminadab mu ma Nasonn,

Nasonn mu ma Salmonn,

**5** Salmonn mu ma Boas. Una aayimbil nan ye Rahab la.

Boas mu ma Obed. Una aayimbil nan ye Ruf la.

Obed mu ma Jese, **6** Jese mu ma Ubɔr David.

David mu ma Solomonn. Una nan ye Yuraya aapuu la, le David kpan u.

**7** Solomonn mu ma Rehoboam, Rehoboam mu ma Abija,

Abija mu ma Asa,

**8** Asa mu ma Jehosafat, Jehosafat mu ma Joram,

Joram mu ma Usia,

**9** Usia mu ma Jotam, Jotam mu ma Ahas, Ahas mu ma Hesekia,

**10** Hesekia mu ma Manase, Manase mu ma Amonn,

Amonn mu ma Josia,

**11** Josia mu ma Jekonia ni unaabitiib buyoonn baadim nan faa bi butɔb ki chuu bi buen Babiloñ na.

**12** Baah chuu bi ki di buen Babiloñ ni na, nee aapuwɔb le

Jekonia ma Sealtiel, Sealtiel mu ma Serubabel,

**13** Serubabel mu ma Abiud, Abiud mu ma Eliakim,

Eliakim mu ma Asor,

**14** Asor mu ma Sadok, Sadok mu ma Akim,

Akim mu ma Eliud,

**15** Eliud mu ma Eleasar, Eleasar mu ma Matann,

Matann mu ma Jakob,

**16** Jakob mu ma Josef, u ye Mari aachal na.

Mari mu ma Yesu u bi yin u ke Kristo u ga gaa binib lii na.

**17** Abraham yoonn ki yoor kina ki ti saa Ubɔr David yoonn na nan ye yaajatiib kipiik ni binaa la. David yoonn ki yoor ki ti saa buyoonn baadim chuu bi ki di buen Babiloñ aatiñ ni na nan ye yaajatiib kipiik ni binaa la. Buyoonn baadim chuu bi ki di buen Babiloñ ni na ki yoor ki ti saa Kristo yoonn na nan ye yaajatiib kipiik ni binaa la.

**Baah ma Yesu Kristo pu na**

(Luk 2.1-7)

**18** Baah ga nan ma Yesu Kristo na, le bi nan puu ke bi ga di una Mari ki di tii Josef. Baa nan kee kunn u, le bi kan ke u kpa lipuul Uwumbɔr Aafuur Nyaan pu.

**19** Uchal Josef aah ye uninyaan na, le waa ban ke u jinn u inimɔɔn. U ja nlandak ke u loon ki yii u. **20** Waah dakl tibɔr ngbaan kina na, le u kan Uwumbɔr aatuun ubaa tidañ ponn ni. Le Uwumbɔr aatuun ngbaan bui u, “Josef, Ubɔr David aayaabil, taa yii ke saan joo Mari u li ye aapuu; ba pu? Uwumbɔr Aafuur Nyaan le tii u lipuul ngbaan.” **21** U ga maa ubi-

jabo, le aa ga yin u ke Yesu;\* ba pu? uma le ga nyan waanib baatunwanbir ni.”

<sup>22</sup> Nimina momok nan ja ke ni gbiin Uwumbor aah nan cha waabonabr len pu na ke, <sup>23</sup> “Usapcon u kaa nyi uja na ga nan dek lipuul ki maa ubijabo, bi ga li yin u ke Imanuel.”† (Immanuel aatataa le ye ke “Uwumbor bi ti chee”.)

<sup>24</sup> Le Josef finn ki fii le ki nan ja Uwumbor aatuun aah tuk u ke u ja pu na, le ki yoor Mari di ja upuu. <sup>25</sup> Waa nan doon u chee le u nin ma waajan aabijabo. Le Josef yin u ke Yesu.

### Bilankpalb bi nyan ni liwipuul wob na

**2** Bi nan ma Yesu, Betlehem aatiij ponn ni la, ki bi Judea aatiij ni na, n-yoonn mu Herod ye ubor na. Baah ma Yesu na, le bilankpalb bibaa nyan ni liwipuul wob ki dan Jerusalem, <sup>2</sup>ki nan baa ke, “Baah ma ubo u ye Juu yaab‡ aabor na, u bi la chee? Ti kan waajmabil liwipuul wob, le ti dan ke ti nan doon u.”

<sup>3</sup> Ubør Herod, ni Jerusalem aatiij aanib momok aah jun tibor ngbaan na, le ti muk bi. <sup>4</sup> Le u yin Uwumbor aatotoorninkpiib ni Uwumbor aakaal aamomokb momok, le ki nan baa bi, “Bi ga maa Kristo u ga gaa binib lii na la chee?”

<sup>5</sup> Le bi tuk u, “Betlehem aatiij, ki bi Judea aatiij ni na; ba pu? Uwumbor aabonabr aah nan jmee pu na so:

<sup>6</sup> ‘Sin Betlehem aatiij, ki bi Judea aatiij ni na,  
saa ye kitwaatiir Judea aatim ponn ni;  
ba pu? uyidaan ga nyan aa ponn ni,  
ki ga li ye Uwumbor aanib Israel yaab aayidaan.’”¶

<sup>7</sup> Le Herod yin bilankpalb ngbaan liboel ni, le ki baa bi, “Lijmabil ngbaan nan nyan ni bayoon?” Le bi tuk u. <sup>8</sup> Le u tun bi ke bi buen Betlehem, ki tuk bi, “Li cha man ki ti bee ubo ngbaan aabor mbamom. Ni yaa ti kan u kan, ni gir ni man ki nan tuk mi, aan m mu buen ti doon u.”

<sup>9</sup> Waah len kina doo na, le bi siir ki cha. Baah siir ki cha na, le bi kan lijmabil li bi nan kan liwipuul wob na loln bi pu nsan, ki ti fuu ubo ngbaan aah bi nin chee na, le ki sil nima chee paacham.

<sup>10</sup> Baah kan lijmabil ngbaan na, le bi kpa mpopiin sakpen ki mooni. <sup>11</sup> Le bi koo lidichal ngbaan ni, ki ti kan ubo ngbaan ni una Mari. Bi nan gbaan kitij ki doon ubo ngbaan, le ki chuu piir baataakor ki tii u ipiin. Bi nan tii u salmaa, ni tulalee u bi yin u ke frankinsense, ni tulalee u bi yin u ke mir na.

<sup>12</sup> Le Uwumbor nan tuk bi tidañ ponn ni ke bi taa ki gir buen ubor Herod chee. Nima pu na, bi nan dii nsan yayan le ki kun.

### Josef aah yoor Yesu ki di san buen Ijipt aatiij ni pu na

<sup>13</sup> Baah nan chaa kun na, Josef nan kan Uwumbor aatuun tidañ ponn ni. Le Uwumbor aatuun ngbaan bui u, “Fiin ki yoor ubo ngbaan ni una ki san buen Ijipt aatiij ni, ki ti li bi nima ki kiir bundaln m ga nan tuk si ke aa nya nima na. Ubør Herod ga li ban ubo ngbaan ke u ku u.”

<sup>14</sup> N-yaayoonn ngbaan le Josef fii le ki yoor ubo ngbaan ni una kinyeek, ki nyan nima ki buen Ijipt, <sup>15</sup> ki ti bi nima le Herod ti kpo.

Nimina nan ja kina ke ni gbiin Uwumbor aah nan cha waabonabr len pu na,

\***1:21** : Yesu aatataa le ye ke “Uwumbor gaa timi lii”.

†**1:23** : Lik Aisaya 7.14.

‡**2:2** : Bi nan ki yin Israel yaab ke Juu yaab la.

¶**2:6** : Lik Maika 5.2.

ke Uwumbor bui ke, “M yin Maabo ke u nyan ni Ijipt aatiŋ ni.”<sup>§</sup>

### Ubɔr Herod aah ku mbim pu na

<sup>16</sup> Le Herod bee ke bilankpalb ngbaan ḥmann u la. Le u gee lijuul sakpen, ki cha waajab ku mbijabim bi mɔmɔk ye ḥibin ḥilee aabim, ni bi mu kaa fuu kina na, ki bi Betlehem, ni Betlehem aatingbaan ni na. U nan baa bilankpalb ngbaan ke bi kan lijmabil ngbaan bayoonn. Nima le cha u bee Yesu aabin aah saa pu na.

<sup>17</sup> Waah ku mbim ngbaan pu na, le ni gbiin Uwumbor aabɔnabr Jeremia aah nan len pu na ke,

<sup>18</sup> “Bi yun kifuuk Rama aatiŋ ni, ki ye ikpowiil aafuuuk la.  
Rachel le wii waabim pu, bi mɔmɔk kpo a,  
le ubaa aan ḥmaa sɔŋ usui.”<sup>\*\*</sup>

### Josef aah di Yesu nyan ni Ijipt aatiŋ ni pu na

<sup>19</sup> Ni bi cha le Herod ti kpo. Waah kpo na, le Josef, u nan bi Ijipt aatiŋ ni na, kan Uwumbor aatuun tidaŋ ni. <sup>20</sup> Le Uwumbor aatuun ngbaan bui u, “Fii ki yoor ubo ngbaan ni una ki gir buen Juu yaab aatiŋ ni. Binib bi nan ban bi ku ubo ngbaan na kpo a.”

<sup>21</sup> Le u fii ki yoor ubo ngbaan ni una, ki ti fuu Juu yaab aatiŋ ni.

<sup>22</sup> Le u yun ke Ubɔr Herod aabo Akelaus jin ute aanaan Judea aatiŋ ni. Nima pu na, Josef nan san ijawaan, kaa ban u buen nima. Le Uwumbor tuk u tidaŋ ni waah ga li cha nin chee na. <sup>23</sup> Le u buen kitij kibaa ni, bi yin ki ke Nasaref, ki bi Galilee aatiŋ ni na. Waah ḥa kina na, le

ni gbiin Uwumbor aabɔnabr aah nan len pu na, ke bi ga yin Yesu ke Nasaref aatiŋ aani la.

### Jɔnn u muini binib nnyun ni na aah moon Uwumbor aabɔr pu na

(Mak 1.1-8; Luk 3.1-18; Jɔnn 1.19-28)

**3** N-yoonn ngbaan le Jɔnn u muini binib nnyun ni na bi nteersakpiin ni, Judea aatiŋ ni, <sup>2</sup> le ki mooni, “Kpelni nimi aabimbin man. Uwumbor aanaan peen ni a.” <sup>3</sup> Uwumbor aabɔnabr Aisaya nan len Jɔnn aabɔr ke,

“Unii ubaa bi nteersakpiin ni ki tar ke:  
‘Toor Uwumbor aasan man,  
ki ḥa waasan mu li tok ki tii u.’”<sup>††</sup>

<sup>4</sup> Jɔnn nan pee kikpalk ki bi nan di laakumii aakor luu ki na, ki di libgapaln buu uchaj ni. Waajikaar nan ye itoon ni tisiir la. <sup>5</sup> Le binib nyan ni Jerusalem, ni Judea aatim mɔmɔk ni, ni Jɔoddann aamɔɔl aatingbaan ni, ki dan u chee, <sup>6</sup> le ki nan kpiir baatunwanbir tuk Uwumbor. Le Jɔnn muin bi nnyun ni, Jɔoddann aamɔɔl ni.

<sup>7</sup> Le Jɔnn kan Farisii yaab ni Sajusii yaab<sup>‡‡</sup> pam dan u chee ke u muin bi nnyun ni. Le u baa bi, “Nimi ijagen aabim, ḥma sur nimi ke ni nya ntafadaan mu choo na ni?” <sup>8</sup> Ni li tun lituln li ga mɔk ke ni sil kpeln nimi aabimbin na, <sup>9</sup> ki taa bui ke niyaaja aah ye Abraham na, nima le ga cha ni nyan ntafadaan ni. M tuk nimi la, Uwumbor ga ḥmaa di njitakpal ḥimina kpalm Abraham aayaabitib, <sup>10</sup> hali dandana wee Uwumbor toor kichɔk ke u ti gaa isui. Isui imɔk kaa lu ḥisubil ḥi ḥan na, u ga gaa i, ki di ḥa mmii ni. <sup>11</sup> Mma muini nimi nnyun ni la, ki mɔk ke ni kpeln nimi aabimbin.

<sup>§2:15</sup> : Lik Hosea 11.1.

<sup>\*\*2:18</sup> : Lik Jeremia 31.15.

<sup>††3:3</sup> : Lik Aisaya 40.3.

<sup>‡‡3:7</sup> : Farisii yaab ni Sajusii yaab nan ye Juu yaab bibaa bi aanimbil man ke binib li dii Moses aakaal na. Bi mu aa nan dii nkaal ngbaan mbamɔm. Bi nan kpa kigaak la, kaa nan kpa linimbaasaln.

Unii u paa ni m pu na jer mi. Maa neer m chuu takl waanaataak tii u. Uma le ga nan muin nimi Uwumbor Aafuur Nyaan, ni mmii ni.<sup>12</sup> U joo waayikpimbik ujaal ni, u ti chaar waajikaar, ki ga di njikaabim ja lipil ni, ki di tigbengbir see mmii mu kaan junn na ni.”

### **Waah muin Yesu nnyun ni pu na**

(Mak 1.9-11; Luk 3.21-22)

<sup>13</sup> N-yoonn ngbaan le Yesu nyan ni Galilee, ki dan Jɔnn chee, Jɔoddann aamɔɔl ni, ki ban ke Jɔnn muin u nnyun ni.<sup>14</sup> Le Jɔnn aa kii, le ki len ke, “Ni ḥjan si le muin mi nnyun ni, le aa ban ke m muin si.”

<sup>15</sup> Le Yesu bui u ke, “Kii kina n-yoonn mue. Ni ḥjan ke ti ja Uwumbor aah ban pu na mɔmɔk.”

Le Jɔnn kii ki muin u nnyun ni.<sup>16</sup> Waah muin u doo na, libuul ngbaan ni le Yesu nyan ni nnyun ni. Le kitaappaak chuu piir. Le u kan Uwumbor Aafuur Nyaan sunn ni ki naahn linanjel, ki nan tɔŋ u pu.<sup>17</sup> Le u ḥjun nneel len paacham ke, “Njapɔɔn u m gee u na sɔ. Nnimbil gbiin u.”<sup>¶</sup>

### **Kinimbɔŋ aah tɔŋ Yesu pu na**

(Mak 1.12-13; Luk 4.1-13)

**4** N-yoonn ngbaan le Uwumbor Aafuur Nyaan cha Yesu buen nteersakpiin ni ke kinimbɔŋ ti tɔŋ u.<sup>2</sup> Yesu nan lul bumɔb nwiin pu ni kinyeek iwiin imonko ilee. Iwiin imonko ilee ngbaan aah jer na, le nkon chuu u.<sup>3</sup> Le kinimbɔŋ u tɔŋni binib na dan u chee, le ki nan bui u, “Aa yaa ye Uwumbor Aajapɔɔn kan, bui ḥitakpal ḥimina aan ḥi kpalm tijikaar.”

<sup>¶3:17</sup> : Lik Aisaya 42.1.

<sup>§§4:4</sup> : Lik Ikaal 8.3.

<sup>\*4:6</sup> : Lik Ilahn 91.11-12.

<sup>†4:7</sup> : Lik Ikaal 6.16.

<sup>‡4:10</sup> : Lik Ikaal 6.13.

<sup>4</sup> Le Yesu bui ki ke, “Ni ḥmee Uwumbor Aagbaŋ ni ke, ‘Tijikaar baanja aan ḥmee tii unii limɔfal. Limɔboln limɔk nyan ni Uwumbor aamɔb ni na le ga tii unii limɔfal.’”<sup>§§</sup>

<sup>5</sup> Le kinimbɔŋ di Yesu buen Jerusalem, le ki ti di u tɔŋ Uwumbor Aadichal paab,<sup>6</sup> le ki bui u, “Aa yaa ye Uwumbor Aajapɔɔn kan, lir ni kitij. Ni ḥmee Uwumbor Aagbaŋ ni ke, ‘U ga tuk waatuuntiib ke bi li lik si, le bi ga li joo si bijaal ni, aataal taa gbeer litakpal.’”<sup>\*</sup>

<sup>7</sup> Le Yesu bui ki ke, “Ni ki ḥmee Uwumbor Aagbaŋ ni ke, ‘Taa tɔŋ Aadindaan Uwumbor.’”<sup>†</sup>

<sup>8</sup> Le kinimbɔŋ ki yoor u buen lijool li fɔk sakpen na paab, le ki ti mɔk u dulnyaa aanaan mɔmɔk, ni mu aanyaan,<sup>9</sup> le ki bui u, “Aa yaa gbaan kitij ki pak mi kan, m ga di nimina mɔmɔk di tii si.”

<sup>10</sup> Le Yesu bui ki ke, “Kinimbɔŋ, li cha. Ni ḥmee Uwumbor Aagbaŋ ni ke, ‘Li pak Aadindaan Uwumbor ki dii uma baanja.’”<sup>‡</sup>

<sup>11</sup> Le kinimbɔŋ siir cha u. Le Uwumbor aatuuntiib dan nan ter u.

### **Yesu aah piin waatuln Galilee aatiŋ ni pu na**

(Mak 1.14-15; Luk 4.14-15)

<sup>12</sup> Yesu nan ḥjun ke bi chuu Jɔnn ki di ja kiyondiik ni. Nima le u nan nyan nima ki gir buen Galilee.<sup>13</sup> U nan cha Nasaref le ki buen ti kal Kapenaum, kitij ki bi nnyusakpem chee na ni. Ki ye Sebulunn aanib ni Naftali aanib aatiŋ la.

<sup>14</sup> Waah kal nima na, le ni gbiin Uwumbor aabɔnabr Aisaya aah nan len pu na ke,

<sup>15</sup> “Sebulunn aanib ni Naftali aanib aatiŋ ki bi Jœdann aamœdapuul, nnyusakpem wɔb, aan bi yin ki ke Galilee aatiŋ, ḥinibol mœmœk aabɔj aah ḥimal tɔb ponn ni nin chee na,

<sup>16</sup> nima aanib bi bi mbɔmbɔon ni na kan nwiihn sakpiin. Binib bi bi mbɔmbɔon ni, ki san nkun ijawaan na, nwiihn woln bi pu.”<sup>17</sup>

<sup>17</sup> N-yoonn ngbaan ki joo cha le Yesu piin ki mooni binib ke, “Kpeln nimi aabimbin man. Uwumbɔr aanaan peen ni a.”

### Yesu aah yin bijanbam binaa pu na

(Mak 1.16-20; Luk 5.1-11)

<sup>18</sup> Yesu nan chuun kpak Galilee Aanyusakpem aagbaan le ki ti kan naabitib bilee, bi yin ubaa ke Simonn ki dulni u ke Piita, le ki yin unaal ke Andru. Bi nan bi mae kipɔɔk nnyun ni. Bi nan ye bijanbam la. <sup>19</sup> Le Yesu bui bi, “Dii mi man, aan m cha ni ban binib ki nan tii Uwumbɔr.” <sup>20</sup> Waah len kina na, libuul ngbaan ni le bi siir cha baapɔr le ki dii u.

<sup>21</sup> Le u foor siib kpee, le ki ki kan naabitib bilee, Jems ni unaal Jønn, bi ye Sebedee aajapɔtiib na. Bi ni bite Sebedee nan bi bunjob ni, ki bi lejni baapɔr. Le Yesu yin bi. <sup>22</sup> Libuul ngbaan ni le bi siir cha bunjob ngbaan ni bite le ki dii u.

### Yesu aah mooni Uwumbɔr aabɔr ki cha bibum pɔɔk pu na

(Luk 6.17-19)

<sup>23</sup> Le Yesu bɔ dii Galilee aatim mœmœk ni, ki koo mmeen aadir ni, ki tuk binib Uwumbɔr aabɔr ki mooni Uwumbɔr aanaan aabɔnyaan tee, le ki cha bibum bi kpa iween aabɔj mœmœk na, ni binib bimœk kaa pɔɔk na pɔɔk. <sup>24</sup> Le

waayimbil moon Siria aatim mœmœk ni. Le bi joo ni bibum mœmœk u chee, binib bi iween aabɔj joo bi na, ni binib bi tiyayaar joo bi na, ni binib bi ḥibimbik joo bi na, ni binib bi aawon faan na. Le u cha bi mœmœk pɔɔk. <sup>25</sup> Le kinipaak nyan ni Galilee aatingbaan ni, ni kitij ki bi yin ki ke Ntim Kipiik na ni, ni Jerusalem aatiŋ ni, ni Judea aatingbaan ni, ni Jœdann aamœdapuul, ki dii u.

### Binib aah ga ḥa pu ki kan Uwumbɔr aanyoor na

(Luk 6.20-23)

**5** Yesu aah kan kinipaak ngbaan na, **5** le u jon ligongoln paab, le ki kal. Le waadidiliib kuun u chee. <sup>2</sup> Le u waar umœb ki bui bi ke:

<sup>3</sup> Binib bi nyi ke bi ye bigiim Uwumbɔr wɔb na, waanyoor bi bi pu. Bima le yeh Uwumbɔr aanaan.

<sup>4</sup> Binib bi kpa mpombiin baatunwanbir pu na, Uwumbɔr aanyoor bi bi pu; u ga sɔŋ bisui.

<sup>5</sup> Binib bi sunn bibaa taab na, Uwumbɔr aanyoor bi bi pu.

Bima le ga li yeh dulnyaa wee.

<sup>6</sup> Binib bi aanimbil man ke bi li ye bininyaam na, Uwumbɔr aanyoor bi bi pu. Binimbil ga gbiin.

<sup>7</sup> Binib bi kpa linimbaasaln na, Uwumbɔr aanyoor bi bi pu.

U mu ga san bi kinimbaak.

<sup>8</sup> Binib bi dii Uwumbɔr ni bisui mœmœk na, waanyoor bi bi pu.

Bima le ga kan uma Uwumbɔr.

<sup>9</sup> Binib bi par kijaak na, Uwumbɔr aanyoor bi bi pu.

U ga len ke bi ye waabim.

<sup>10</sup> Binib bi ji falaa Uwumbɔr aasan aadiim pu na,

waanyoor bi bi pu.

Bima le yeh uma Uwumbor aanaan.

<sup>11</sup> “Binib yaa sii nimi ki ja nimi falaa ki mɔln inyamɔn mɔmɔk aabɔŋ ki paan nimi, ki bii nimi, min Yesu pu kan, Uwumbor aanyoor bi ni pu. <sup>12</sup> Ni li kpa mpopiin sakpen, ba pu? ni ga nan kan tinyoor sakpen paacham. Kina le bi nan ja Uwumbor aabɔnabtiib bi nan bi n-yaayoon na falaa.”

### **Uwumbor aanib aah naahn n-yaan ni nwiihn pu na**

(Mak 9.50; Luk 14.34-35)

<sup>13</sup> “Nimi maadidiliib le ye dulnyaa wee ni aayaan. N-yaan yaa bii, ki yaa kaa ki mɔ kan, nibaa aa bi ki ga ki njmaa ja mu aan mu mɔɔk. Mu aa ki bi tibɔr tibaa ni. Bi ga di mu kpir la. Le binib ga taa mu pu ki jer.

<sup>14</sup> “Nimi le ye dulnyaa wee ni aawiihn, ni woln binib aanimbil. Kitisakpej ki bi ligongoln paab na aan njmaa bɔr. <sup>15</sup> Unii yaa see karyaa kan, waan di lisambil chiŋ u pu. U ga di u tɔŋ tiwan paab la, le u woln kidiik mɔmɔk ponn ni nwiihn.

<sup>16</sup> Ni li bi kina man. Cha binib mɔmɔk kan nimi aawiihn aah wiin pu na, aan bi kan nimi aatunyaan aan ki pak Nite Uwumbor u bi paacham na.”

### **Uwumbor aakaal aamɔkm**

<sup>17</sup> “Ni taa dak ke m dan m nan kuln Uwumbor aakaal ni Waabɔnbr aabɔr. Maa dan ke m nan kuln ti. M dan ke m nan ja taah len pu na mɔmɔk chub la. <sup>18</sup> M tuk nimi mbamɔn la, nkaal ngbaan mubaa aan jer, see mu aah len pu na mɔmɔk ja. Buyoonn paacham ni dulnyaa ga li bi na, nkaal ngbaan mɔmɔk ga li beenin bi. <sup>19</sup> Nima pu na, unii umɔk

yii nkaal ngbaan ponn ni siib na, ki mɔk binib kina na, u ga li ye uwaatiir Uwumbor aanaan ni. Unii umɔk kii nkaal ngbaan, ki mɔk binib kina na, u ga li ye unikpaan Uwumbor aanaan ni. <sup>20</sup> M tuk nimi la, nimi aabimbin yaa kaa ḥjan ki jer Uwumbor aakaal aamɔmɔkb ni Farisii yaab<sup>8</sup> aabimbin kan, naan koo ni Uwumbor aanaan ni.”

### **Binib taa li gee lijuul**

<sup>21</sup> “Ni ḥjun ke bi nan tuk n-yaayoon na aanib, ‘Taa ku unii, ke unii ubaa yaa ku uken kan, bi ga ji u tibɔr.’\*\* <sup>22</sup> Min le tuk nimi ke unii umɔk gee lijuul una aabo pu na, bi gaji u tibɔr. Unii umɔk tuk una aabo, ‘Saa bi tibɔr tibaa ni,’ bibojirb aaninkpiib ga ji u tibɔr. Unii umɔk tuk una aabo ke, ‘Si ujɔr’ na, u neer u koo mmii mu kaan junn na ni. <sup>23</sup> Aa yaa bi Uwumbor Aadichal ni ki ban aa tii Uwumbor ipiin, ki teer ke aa koo aana aabo ubaa aataani ni kan, <sup>24</sup> di saapiin di bil nima, ki buen ti chuu uteal waahr, aan ki nin gir ni ki nan tii Uwumbor ipiin ngbaan.

<sup>25</sup> “Aa ni unii yaa kpa tibɔr, u ban u di ti buen kooti ni kan, chuu uteal mala aan ni taa kee fuu nima, u taa di si ja ubɔjir aajaal ni, ubɔjir mu taa di si ja kiyondiik aaninkpel aajaal ni, ke u di si ja kiyondiik ni. <sup>26</sup> M tuk si mbamɔn la, saan nyan nima ki nan saa buyoonn aa ga pa kooti ni aamombil mɔmɔk doo na.”

### **Kidagook aabɔr**

<sup>27</sup> “Ni ḥjun ke bi nan tuk n-yaayoon na aanib, ‘Taa gɔr kidagook.’†† <sup>28</sup> Min le tuk nimi ke unii umɔk kan upii aan usui koo u ni kan, u kpaan gɔr kidagook usui ni la. <sup>29</sup> Aa yaa gee tiwan ke saah gee

<sup>§5:20</sup> : Farisii yaab nan ye Juu yaab bibaa bi aanimbil man ke binib li dii Moses aakaal na. Bi mu aa nan dii nkaal ngbaan mbamɔm. Bi nan kpa kigaak la, kaa nan kpa linimbaasaln.

<sup>\*\*5:21</sup> : Lik Nnyam 20.13; Ikaal 5.17.

<sup>††5:27</sup> : Lik Nnyam 20.14; Ikaal 5.18.

aanimbigiil pu na kan, tiwan ngebaan yaa tɔŋ si ke aa tun titunwanbir kan, di ni lii. Saawan nibaa yaa bee yɔli kan, ni soor ni tiwon mɔmɔk koo mmii mu kaan junn na ni.<sup>30</sup> Aa yaa gee tiwan ke saah gee aajangii pu na kan, tiwan ngebaan yaa tɔŋ si ke aa tun titunwanbir kan, di ni lii. Saawan nibaa yaa bee yɔli kan, ni soor ni tiwon mɔmɔk koo mmii mu kaan junn na ni.”

### **Uja taa jenn upuu**

(*Matiu 19.9; Mak 10.11-12; Luk 16.18*)

<sup>31</sup> “N-yaayoonn na aanib nan ki len ke ‘Uja yaa jenn upuu lii kan, u ŋmee kigbanj, ki di tii u ki mɔk ke u jenn u.’<sup>\*\*</sup> <sup>32</sup> Min le tuk nimi ke upii yaa kaa gor kidagook kan, uchal yaa jenn u lii kan, u ŋa u upiidagoor le na. Uja u yoor baah jenn upii u lii na mu ye udagoor la.”

### **Naah ga puu tipuur pu na**

<sup>33</sup> “Ni ŋjun ke bi nan tuk n-yaayoonn na aanib ke, ‘Taa puu Uwumbɔr nnyamɔn pu, ke aa yaa puu Uwumbɔr kan, ŋa saah len pu na.’ <sup>34</sup> Min le tuk nimi: ni taa puu Uwumbɔr. Ni taa puu paacham mu; ba pu? paacham ye Uwumbɔr aaborjal la. <sup>35</sup> Ni taa puu kitij mu; ba pu? kitij ye Uwumbɔr aataa aajal la. Ni taa puu Jerusalem mu; ba pu? Jerusalem ye Uwumbɔr ye Ubɔrkpaan na aatiŋ la. <sup>36</sup> Taa puu aayil; ba pu? saan ŋmaa kpeln kiyikpirk kibaa, ki li ye kiyikpiin, kaan ŋmaa kpeln kibaa ki li ye kiyikpibɔŋ. <sup>37</sup> Ni po len ke ‘Een’, bee ‘Aayii’. Ni yaa ki kpee nibaa kan, naa ŋjan.”

### **Naah ga ŋa binib bi ŋa nimi bakaa na pu na**

(*Luk 6.29-30*)

<sup>38</sup> “Ni ŋjun ke bi nan tuk n-yaayoonn na aanib, ‘Unii yaa chuu lokr aanimbil kan, bi chuu lokr u mu yaal. Unii yaa gbaa fenn aanyin kan, bi chuu fenn u mu yaan.’<sup>¶</sup> <sup>39</sup> Min le tuk nimi: unii yaa ŋa si bakaa kan, taa giin u waah ŋa si pu na. Unii yaa faa si aajangii aataapak kan, aa cha u faa aajangan aataapak mu. <sup>40</sup> Unii yaa ban u di si buen bibɔjirb chee ke u ti gaa saabɔkul kan, tiin u saakekeln mu. <sup>41</sup> Uja yaa muk si ke aa cheen u mal ubaa kan, cheen u mal bilee. <sup>42</sup> Unii yaa mee si tiwan kan, tiin u. Unii yaa ban ke aa pinn u tiwan kan, taa yii.”

### **Naah ga ŋa nimi aadim pu na**

(*Luk 6.27-28, 32-36*)

<sup>43</sup> “Ni ŋjun ke bi nan tuk n-yaayoonn na aanib, ‘Li gee aana aabo ki nan saadin.’<sup>§§</sup> <sup>44</sup> Min le tuk nimi: ni li gee nimi aadim man, [ki bui binib bi seei nimi na ke, ‘Uwumbɔr ŋa tinyoor ŋa ni pu,’ ki ŋa binib bi nan nimi na tiŋann,] ki mee Uwumbɔr ki tii binib bi ŋani nimi falaa ki muk nimi na. <sup>45</sup> Ni yaa ŋani kina kan, ni ga li ye Nite Uwumbɔr u bi paacham na aabim; uma le cha waawiin puur ki woln tiniwanbir ni bininyaam pu, ki cha uteal nu ki tii binib bi ŋan na, ni binib bi kaa ŋan na. <sup>46</sup> Ni yaa gee binib bi gee nimi na baanja kan, ni kpa tinyoor Uwumbɔr chee ee? Bilam-poogaab mu gee binib bi gee bi na la. <sup>47</sup> Ni yaa dooni ninaabitiiib baanja kan, ni ŋan ki jer biken aa? Aayii. Binib bi kaa dii Uwumbɔr aasan na mu ŋani kina la. <sup>48</sup> Nima pu na, ni li bi mbamɔm, ke

<sup>\*\*5:31</sup> : Lik Ikaal 24.1-4.

<sup>¶5:38</sup> : Lik Nnyam 21.24; Liifai Yaab 24.20; Ikaal 19.21.

<sup>§§5:43</sup> : Lik Liifai Yaab 19.18.

Nite Uwumbor u bi paacham na aah bi pu na.”

### **Naah ga tii bigiim ipiin pu na**

**6** “Ni li nyi man, ki taa tun nimi aatun-yaan binib aanimbil ni, ke bi kan aan ki pak nimi. Ni yaa ḥjani kina kan, naan kan tinyoor Nite Uwumbor u bi paacham na chee.

<sup>2</sup> “Aa yaa tii ugiin tiwan kan, taa joo kiloŋ gbaa ke bijmaŋmannim aah ḥjani pu mmeen aadir ni, ni kitij ponn ni, ke binib pak bi na. M tuk nimi mbamɔn la, bi kan baapal le na. <sup>3</sup> Aa yaa tii ugiin tiwan kan, taa cha aajangan li nyi aajangii aah ḥja pu na. <sup>4</sup> Tii u libɔɔl ni. Le Aate Uwumbor u kan saah ḥja pu libɔɔl ni na ga pa si binib aanimbil ni.”

### **Naah ga mee Uwumbor pu na**

(Luk 11.2-4)

<sup>5</sup> “Ni yaa mee Uwumbor kan, ni taa mee u ke bijmaŋmannim na aah mee u pu na. Bi gee ke bi sil mmeen aadir ni, ni kitij ponn ni ki mee Uwumbor, aan binib kan bi. M tuk nimi mbamɔn la, bi kan baapal le na. <sup>6</sup> Sin ma kan, aa yaa mee Uwumbor kan, koo saadiik ni, ki di jaaleŋ piin, ki mee Aate Uwumbor u bi libɔɔl ni na. Le Aate Uwumbor u kan saah ḥjani pu libɔɔl ni na ga tii si tinyoor.

<sup>7</sup> “Ni yaa mee Uwumbor kan, ni taa len yol yol aabor ke binib bi kaa dii Uwumbor aasan na aah len pu na. Bi dak ke bi yaa len sakpen kan, nima le ga cha Uwumbor ḥjun. <sup>8</sup> Ni taa ḥjani ke baah ḥjani pu na; Nite Uwumbor nyi naah ban tiwan ni na, naa kee mee u. <sup>9</sup> Ni yaa mee Uwumbor kan, bui ke, ‘Tite Uwumbor u bi paacham na, cha binib li san saayimbil.

<sup>10</sup> Saanaan dan.

Bi li ḥjani saageehn dulnyaa wee ni ke baah ḥjani paacham pu na.

<sup>11</sup> Tiin timi din aawuin aajikaar.

<sup>12</sup> Cha timi aataani ki pinn timi,

ke ti mu aah di cha pinn binib bi koo timi aataani ni pu na.

<sup>13</sup> Taa cha ti kan ntɔŋ.

Nyan timi kinimbɔŋ aanjaal ni.

[Si le yeh nnaan, ni mpɔɔn, ni mpakm n-yoonn mu kaa kpa ndoon na.]

<sup>14</sup> “Ni yaa di cha pinn binib baataani kan, Nite Uwumbor u bi paacham na mu ga di cha pinn nimi. <sup>15</sup> Ni yaa kaa di cha pinn binib baataani kan, Nite Uwumbor mu aan di cha pinn nimi aatunwanbir.”

### **Naah ga lul bumɔb pu na**

<sup>16</sup> “Ni yaa lul bumɔb kan, ni taa bii ninimbil wɔb ke bijmaŋmannim aah ḥjani pu na; bi bii binimbil wɔb ke binib bee ke bi lul bumɔb. M tuk nimi mbamɔn la, bi kan baapal la. <sup>17</sup> Sin ma kan, aa yaa lul bumɔb kan, finn aanimbil wɔb, ki di nkpan ḥjimir aayil, <sup>18</sup> aan binib taa bee ke aa lul bumɔb. Aate Uwumbor u bi libɔɔl ni na le ga bee. Le Aate Uwumbor u kan saah ḥja pu libɔɔl ni na ga tii si tinyoor.”

### **Paacham aawankpal**

(Luk 12.33-34)

<sup>19</sup> “Ni taa kuun liwankpal bil dulnyaa wee ni. Idundur ni ḥjipulaaleen ga bii ni. Binaayukb mu ga loon koo ni ki nan sun ni. <sup>20</sup> Ni di liwankpal bil Uwumbor do. Idundur ni ḥjipulaaleen aan bii li nima. Binaayukb mu aan koo ni nima ki nan sun li. <sup>21</sup> Saawankpal aah bi nin chee na, aasui mu bi nima la.”

### **Tiwon aawiihn**

(Luk 11.34-36)

<sup>22</sup> “Linimbil ye tiwon aakaryaa la. Aanimbil yaa wiin kan, saabimbin mɔmɔk ga li gbii nwiihn la. <sup>23</sup> Aanimbil yaa jɔb kan, saabimbin mɔmɔk ga li gbii mbɔmbɔɔn la. Aanimbil li tii si nwiihn na yaa bɔɔn kan, aa bi mbɔmbɔɔn sakpiin ni la.”

## **Uwumbor ni liwangol**

(Luk 16.13; 12.22-31)

<sup>24</sup> “Unii ubaa aan ḥmaa li ye dindatiib bilee aanaagbija; u ga li nan ubaa, le ki gee uken; u ga li si ubaa aachaj ni, le ki lik uken fam. Naan ḥmaa dii Uwumbor ni liwankpal mu.

<sup>25</sup> “Nima le m tuk nimi ke ni taa cha nimi aalandak muk nimi tiwon aawan pu, ki taa li dak: ‘Ti ga ji ba? Ti ga nyu ba? Ti ga peen ba?’ Limofal bi tijikaar baanja pu la aa? Tiwon bi tiwan-peenkaan baanja pu la aa? <sup>26</sup> Lik inyoon i laani paacham na aah bi pu na. Yaa ko tijikaar ki mu aa chee, ki mu aa faa njikaabim fuu ḥipil ni. Nite Uwumbor u bi paacham na le kpiini i. Naa jer i ii? <sup>27</sup> Ni ponn ni ubaa ga ḥmaa muk waalandak aan ki yunn jer Uwumbor aah siin pu na aa?”

<sup>28</sup> “Ba pu ni cha ilandak muk nimi tiwanpeenkaan pu? Dakl lik mmopuu aah bi pu na man. Mu aa tun lituln, ki mu aa fik tikokonn. <sup>29</sup> M tuk nimi la, Ubɔr Solomonn u nan peeni tiwanpeenkaan nyaan na aawanpeenkaan aa nan ḥjan ke mmopuu aah ḥjan pu na. <sup>30</sup> Timoor bi din ki ga fe wu mmii fen, le Uwumbor ḥja ti mmopuu mu ḥjan na. Waan tii nimi tiwanpeenkaan aa? Naa gaa Uwumbor ki kii mbamɔm la. U ga tii nimi.

<sup>31</sup> “Nima pu na, ni taa cha ilandak muk nimi, ki taa li dak: ‘Ti ga ji ba? Ti ga nyu ba? Ti ga peen ba?’ <sup>32</sup> Tiwan ngbaan mɔmɔk pu le binib bi kaa dii Uwumbor aasan na aanimbil man. Nite Uwumbor u bi paacham na nyi ke ni ban tiwan ngbaan mɔmɔk. <sup>33</sup> Ni li ban Uwumbor aanaan, ni waasanyaan le waahr; le u ga di tiwan ngbaan mɔmɔk kpee nimi. <sup>34</sup> Nima pu na, ni taa cha fen u choo na aabɔr muk nimi. Fen le ni ga fe dak fen

aabɔr. Ni yaa dakl din aabɔr din kan, ni ḥneer kina la.”

## **Ni taa galni binib**

(Luk 6.37-38, 41-42)

**7** “Ni taa galn binib, aan Uwumbor mu taa galn nimi. <sup>2</sup> Naah galni binib pu na, Uwumbor mu ga galn nimi kina la. Naah tii binib pu na, Uwumbor mu ga giin kina le ki tii nimi. <sup>3</sup> Ba ḥja aa lik ki waa lidɔchɔl li bi aana aabo aanimbil ni na, kaa tee waa jaatɔlk u bi aayaan ni na? <sup>4</sup> Aa tee ḥja kinye ki bui aana aabo, ‘Cha m nyan lidɔchɔl li bi aanimbil ni na,’ ka jaatɔlk bi aayaan ni? <sup>5</sup> Sin ujmaŋmann umina, chuu nyan jaatɔlk ngbaan aanimbil ni waahr, aan ki li waa mbamɔm, aan ki nan nyan aana aabo yaan ni lidɔchɔl.

<sup>6</sup> “Ni taa di tiwan ni bi chain na di tii ibɔ. I ga gir nan junn nimi. Ni taa di nleenyaaan di tii igbeer. I ga taa taa mu pu.”

## **Naah ga li mee Uwumbor pu na**

(Luk 11.9-13)

<sup>7</sup> “Ni li mee Uwumbor man, le u ga tii nimi. Ni li ban Uwumbor chee man, le ni ga kan. Ni li kpaar jaalej man, le u ga piir tii nimi. <sup>8</sup> Unii umɔk mee Uwumbor na, u ga tii u. Unii umɔk ban na, u ga kan. Unii umɔk kpaar jaalej na, u ga piir tii u. <sup>9</sup> Tɔ, ubo ubaa yaa mee ute maab kan, u ga di litakpal tii u uu? <sup>10</sup> U yaa mee u ujan kan, u ga di ukuub tii u uu? <sup>11</sup> Nimi titunwanbirdam yaa tee nyi ipiin i ḥjan na ki tii nimi aabim kan, ḥmaninkabaa Nite Uwumbor u bi paacham na le aan di tiwan ni ḥjan na ki di tii binib bi mee u na aa?

<sup>12</sup> “Nima pu na, naah ban ke binib li ḥjani nimi pu na mɔmɔk, ni mu li ḥjani bi kina. Uwumbor aakaal ni waabɔnabr aabɔr le mɔk kina.”

\***6:27** : Bee “...aan ki di lisaj libaa kpee waafɔfɔk pu uu?”

### Naah ga dii pu na

(Luk 13.24)

<sup>13</sup> “Ni li dii mbisamōb mu kaa waa na. Nsan mu cha mmii mu kaan junn na ni na waa la. Nsan ngbaan aabisamōb mu waa la. Binib bi dii mu na, bi wiir la. <sup>14</sup> Nsan mu cha limofal li kaa kpa ndoon na ni na aa waa. Nsan ngbaan aabisamōb mu aa waa. Binib bi dii mu na aa wiir.”

### Naah ga ḥa pu ki bee binib aabimbin na

(Luk 6.43-44)

<sup>15</sup> “Ni li nyi binyamōndam bi ḥmanni ke bi ye Uwumbōr aabonabr na. Bi ḥmanni ke bi ye ipiih, le ki tee ye ḥisapol ḥi ga bii nimi na. <sup>16</sup> Baatalun pu le ga cha ni bee bi. Bukokom ga ḥmaa lu nkakan aa? Ichakpeejagar ga ḥmaa lu saasaa aa? <sup>17</sup> Isui imk̄ ḥjan na ga lu ḥisubil ḥi ḥjan na la. Isui i kaa ḥjan na ga lu ḥisubil ḥi kaa ḥjan na la. <sup>18</sup> Busub bu ḥjan na aan ḥmaa lu ḥisubil ḥi kaa ḥjan na. Busub bu kaa ḥjan na mu aan ḥmaa lu ḥisubil ḥi ḥjan na. <sup>19</sup> Busub bumōk kaa lu ḥisubil ḥi ḥjan na kan, bi ga gaa bu, ki di ḥja mmii ni. <sup>20</sup> Nima pu na, baah ḥja pu na le ga cha ni bee biŋmaŋmannim bi ḥmanni ke bi ye Uwumbōr aabonabtiib na.”

### Binib bi ga koo Uwumbōr aanaan ni na

(Luk 13.25-27)

<sup>21</sup> “Naa ye binib bimōk yin mi ke ‘Dindaan, Dindaan’ na le ga koo Uwumbōr aanaan ni. Binib bi ḥjani Nte Uwumbōr u bi paacham na aah gee pu na le ga koo waanaan ni. <sup>22</sup> Liyaadaal ngbaan le binib pam ga bui mi, ‘Tidindaan, Tidindaan, ti nan nabr Uwumbōr aabōr saayimbil pu, ki nyan tiyayaar binib ni, saayimbil pu, ki tun lijinjiir aatun saayimbil pu.’ <sup>23</sup> Lem ga tuk bi, ‘Nimi titunwanbirdam, maa nyi nimi. Siir m chee man.’”

### Bidimaab bilee aabor

(Luk 6.47-49)

<sup>24</sup> “Nima pu na, unii umōk ḥjun maabor ngbaan ki ḥjani kina na, naahn unii u kpa nlan, ki maa waadiik litakpal pu na. <sup>25</sup> Utaal nun, le nwam nyan, le libuln daa, le ki pee kidiik ngbaan. Kaah si litakpal pu na, le kaa lir.

<sup>26</sup> “Unii umōk ḥjun maabor ngbaan, kaa ḥjani kina na, naahn unii u kaa kpa nlan ki maa waadiik litambol pu na la. <sup>27</sup> Utaal nun, le nwam nyan, le libuln daa ki pee kidiik ngbaan; le ki lir. Ki lir kookoo la.”

### Yesu aapcōon

<sup>28</sup> Yesu nan len doo. Waah tuk bi tibōr ti na, le ni gar kinipaak ngbaan. <sup>29</sup> Utuk bi ke unii u kpa Uwumbōr aapcōon na la, kaa tuk bi ke Uwumbōr aakaal aamōmōkb aah tuk bi pu na.

### Yesu aah cha ukondaan pōok pu na

(Mak 1.40-45; Luk 5.12-16)

**8** Yesu nan sunn ni ligongoln na taab. Le kinipaak sakpej dii u. <sup>2</sup> Le ukondaan ubaa dan u chee ki nan gbaan unimbiin ni, le ki doon u ki bui u, “Ndindaan, aa yaa gee kan, aa ga ḥmaa cha m pōok.”

<sup>3</sup> Le Yesu taln uŋjaal, ki meeh u, le ki bui u, “M gee. Aa pōok a.” Libuul ngbaan ni le u pōok. <sup>4</sup> Le Yesu bui u, “Li nyi, ki taa tuk unii ubaa. Li cha Uwumbōr aato-toor chee ki ti di aabaa mōk u, ki toor kitork tii Uwumbōr, Moses aakaal aah len pu na. Nima le ga mōk binib ke aa pōok a.”

### Yesu aah cha butōb aajab aaninkpel aatutunn pōok pu na

(Luk 7.1-10)

<sup>5</sup> Yesu nan koo Kapenaum aatiŋ ni. Le butōb aajab nkub aaninkpel ubaa dan u chee ki nan gaŋ u ki bui u, <sup>6</sup> “Ndindaan,

maatutunn dɔ linampal. Uwon faan ki wu sakpen a.”

<sup>7</sup> Le Yesu bui u, “M ga dan ki nan cha waaween sɔŋ.”

<sup>8</sup> Le u bui u, “Ndindaan, maa neer aa dan ndo ki nan koo maadichal ni. Aa yaa po len ke ‘Pɔɔk’ kan, maatutunn ngbaan ga pɔɔk. <sup>9</sup> Min mbaa kii maaninkpel aamɔɔb, ki mu ye butɔɔb aa-jab aaninkpel la, le ki bui ubaa, ‘Li cha,’ le u buen; ki bui ubaa mu, ‘Dan,’ le u dan; ki bui maanaagbiija, ‘Na kina,’ le u ja.”

<sup>10</sup> Yesu aah ḥun waah len pu na, le ni gar u pam. Le u bui binib bi dii u na ke, “M tuk nimi mbamon la, maa kee kan unii ubaa bi Israel yaab ponn ni ki gaa mi ki kii mbamɔɔm kina. <sup>11</sup> M tuk nimi la, binib pam ga nya ni liwipuul wɔɔb, ni liwilir wɔɔb, ki nan kal, ki ji Abraham, ni Aisak, ni Jakob chee tijikaar Uwumbɔr aanaan ni. <sup>12</sup> Le Juu yaab bi ba ga koo ni na, Uwumbɔr ga chuu nyan bi li-paal mbɔɔmbɔɔn aah bi nin chee na. Bi ga wii ki ḥmo ḥinyin nima chee.” <sup>13</sup> Tɔ, le u bui butɔɔb aa-jab aaninkpel ngbaan, “Li dii saasan. Saah gaa mi ki kii mbamɔɔm pu na, ni ja kina ki tii si.”

Yesu aah len kina na, libuul ngbaan ni le uninkpel ngbaan aatutunn pɔɔk.

### Yesu aah cha bibum pam pɔɔk pu na

(Mak 1.29-34; Luk 4.38-41)

<sup>14</sup> Yesu nan buen Piita aadichal ni, le ki ti kan Piita aapuu aana bun ki dɔ kidiik ni. Le uwon ton. <sup>15</sup> Le Yesu meeh uŋjaal. Le uwon sɔŋ. Le u fii, ki chann u tichann.

<sup>16</sup> Kijook aah joor na, le binib dan Yesu chee, ki joo ni binib bi tiyayaar joo bi na pam. Yesu nan po len tibɔr baanja la, le tiyayaar ngbaan nyan bi ni. Le u cha bibum mɔɔmɔɔk mu pɔɔk. <sup>17</sup> U ja kina ke ni gbiin Uwumbɔr aabɔɔnabr Aisaya aah

nan len pu na ke, “Uma ubaa le nyan ni iween, ni tibunbunn timi aawon ni.”<sup>†</sup>

### Binib bi nan ban ke bi dii Yesu na

(Luk 9.57-62)

<sup>18</sup> Yesu nan kan ke kinipaak ki dii u na wiir sakpen a. Nima pu le u nan tuk waadidiliib ke u ban u puur nnyusakpem la.

<sup>19</sup> Le Uwumbɔr aakaal aamɔɔmɔɔkr ubaa nan dan u chee ki nan bui u, “Umɔɔmɔɔkr, m ga dii si, saah cha nin chee na mɔɔk.”

<sup>20</sup> Le Yesu bui u, “Iŋɔk kpa yaah koo ibuu i ponn ni na. Inyoon i laani paacham na mu kpa yaadil. Min Unibɔn Aabo ma aa kpa maah ga doon nin chee na.”

<sup>21</sup> Le waadidiir ubaa mu bui u, “Ndindaan, m mee si nsan, cha m buen ti sub nte waahr, aan ki nan dii si.”

<sup>22</sup> Le Yesu bui u, “Dii mi dandana wee, ki cha bitekpiib sub tɔɔb.”

### Yesu aah ḥa pu ki cha kibuŋ ḥɔmin na

(Mak 4.35-41; Luk 8.22-25)

<sup>23</sup> Le Yesu koo buŋɔɔb ni. Le waadidiliib mu dii u. <sup>24</sup> Baah chuun nnyun ni cha na le kibuŋ ti fii ki bi daar, le tinyunkpenn fii ti ti biin buŋɔɔb pu. Yesu nan dɔ geen. <sup>25</sup> Le waadidiliib dan ki nan gbaa finn u ki bui u, “Tidindaan, ter timi. Ti ga bee nnyun ni.”

<sup>26</sup> Le u bui bi, “Ba ḥa ni san ijawaan? Naa gaa mi ki kii mbamɔɔm.” Le u fii ki kae kibuŋ ni nnyun. Le kibuŋ ni nnyun mɔɔk ḥɔmin chii.

<sup>27</sup> Ni nan gar bi pam. Le bi baa tɔɔb, “Ba aanibol le na? Hali kibuŋ ni nnyun kii waamɔɔb.”

### Yesu aah cha biwaab bilee pɔɔk pu na

(Mak 5.1-20; Luk 8.26-39)

<sup>28</sup> Le bi fuu nnyusakpem aadapuul, Gadarene yaab aatiŋ ni. Baah fuu nima na le biwaab bilee nyan ni baah sui binib

<sup>†</sup>8:17 : Lik Aisaya 53.4.

titakpalunn ti ponn ni na, ki tooh u nsan ni. Biwaab ngbaan yaa nan kan unii kan, bi ga gbaa u la. Nima pu na, ubaa aa nan ηmaa jer nima chee. <sup>29</sup> Baah kan Yesu na, le bi teen ke, “Sin, Uwumbor Aajapoon, aa ban ba ti chee? Aa dan do ke aa nan ḥa timi falaa n-yoonn aah kaa kee ḥeer buyoonn aa?”

<sup>30</sup> Le igbeer i wiir na bi dandar ki chuun ji. <sup>31</sup> Le tiyayaar ti bi bijab ngbaan ni na ganj Yesu, “Aa yaa nyan timi binib ngbaan ponn ni kan, cha ti ti koo igbeer ngbaan ni.”

<sup>32</sup> Le Yesu bui ti, “Li cha man.” Le ti nyan binib ngbaan ni, le ki ti koo igbeer na ni. Libuul ngbaan ni, le igbeer ngbaan mɔmɔk san sunn limɔɔgongoln taab, le ki ti koo nnyun ni ki kpo.

<sup>33</sup> Le bijab bi kiir igbeer ngbaan na san buen kitij ni, ki ti tuk binib Yesu aah cha biwaab ngbaan pɔɔk pu na, ni tibɔr ngbaan mɔmɔk. <sup>34</sup> Kitij ngbaan aanib aah ḥun kina na, le bi mɔmɔk dan ki nan tooh Yesu nsan ni. Baah kan u na, le bi ganj u ke u nyan baatiŋ ni.

### Yesu aah cha uja u aawon faan na pɔɔk pu na

(Mak 2.1-12; Luk 5.17-26)

**9** Le u gir koo buŋb ni, ki ki puur nnyusakpem ki kun udo aatiŋ ni. <sup>2</sup> Le bijab bibaa luln ni uja u aawon faan na likekeln ni Yesu chee. Le Yesu kan baah gaa u ki kii mbamɔm pu na, le ki bui uja u aawon faan na, “Maabo, chuu aabaa, m di cha saatunwanbir pinn si.”

<sup>3</sup> Waah len kina na, le Uwumbor aakaal aamɔmɔkb bibaa dakl bisui ni ke, “Uja wee sii Uwumbor la.”

<sup>4</sup> Le Yesu bee baalandak, le ki baa bi, “Ba ḥa ni dak ilandak i kaa ḥan na nisui ni? <sup>5</sup> Maah len ke m di cha waatunwanbir pinn u na le pɔɔ aan m yaa len ke ‘Fii ki li chuun’ le pɔɔ? <sup>6</sup> M ga mɔk nimi

ke min Unibɔn Aabo kpa mpɔɔn dulnyaa wee ni ke m di cha pinn titunwanbir.” Waah len kina na, le u bui uja u aawon faan na ke, “Fii ki yoor saawandookaan ki li chaa kun.”

<sup>7</sup> Libuul ngbaan ni le uja ngbaan fii ki chaa kun. <sup>8</sup> Kinipaak ngbaan aah kan kina na, le bi san ijawaan, ki nyuŋ Uwumbor u tii unibɔn mpɔɔn kina na.

### Yesu aah yin Matiu pu na

(Mak 2.13-17; Luk 5.27-32)

<sup>9</sup> Le Yesu siir nima ki Buen. Waah cha na, le u kan ulampoogaar ubaa bi yin u ke Matiu. U ka baah gaal lampoo nin chee na. Le Yesu bui u, “Li dii mi.”

Le u fii ki dii u.

<sup>10</sup> Le Yesu ni waadidiliib nan kal Matiu do ki jin tijikaar. Le bilampoogaab ni titunwanbirdam bi wiir na dan nan jin bi chee tijikaar. <sup>11</sup> Farisii yaab aah kan kina na, le bi baa waadidiliib, “Ba ḥa nimi aamɔmɔkr ji bilampoogaab ni titunwanbirdam chee tijikaar?”

<sup>12</sup> Le Yesu ḥun baah len pu na, le ki bui ke, “Binib bi kpa laafee na aa ban dɔkta, see binib bi bun na le ban dɔkta.

<sup>13</sup> Uwumbor Aagbaj len ke waa ban ke binib toor kitork baanja ki tii u. U ban ke bi li san tɔb kinimbaak la.<sup>‡</sup> Li cha ki ti bae tibɔr ngbaan aataaa. Maa dan ke m nan yin bininyaam. M dan ke m nan yin titunwanbirdam [ke bi nan kpeln baabimbin.]

### Kimolul aabor

(Mak 2.18-22; Luk 5.33-39)

<sup>14</sup> Le Jɔnn aadidiliib dan Yesu chee, le ki nan bui u, “Ti ni Farisii yaab lul bumɔb kpakpaayuk la. Ba pu saadidiliib ma aa lulni bumɔb?”

<sup>15</sup> Le u baa bi, “Bicham bi dan bi nan ji ubɔndinn aajim na ga ηmaa li kpa mpombiin buyoonn upiidinn bi bi chee

<sup>‡</sup>9:13 : Lik Hosea 6.6.

na aa? Aayii. N-yoonn choo, le bi ga nan chuu nyan upiidinn na bi chee mpcoo. N-yoonn ngbaan le bi ga lul bumob.”

<sup>16</sup> Yesu nan ki len ke, “Ubaa aan di likekepeln aageln lej libokukpokl. U yaa ja kina kan, likekepeln aageln na ga kar libokukpokl na. Liboln ngbaan ga jernjan yaan. <sup>17</sup> Ubaa mu aan di ndawiin ki di ja kilookpok ponn ni. U yaa ja kina kan, kilook ngbaan ga puu, ki bii. Ndaan mu ga kpir. Bi ga di ndawiin ki di ja kiloopoj ni la. Le ndaan aan kpir. Kilook ngbaan mu aan bii.”

### **Yesu aah cha upii ubaa poɔk aan ki likr upiibo nkun ni pu na**

(Mak 5.21-43; Luk 8.40-56)

<sup>18</sup> Yesu aah bi len kina na, le uninkpel ubaa dan nan gbaan unimbiin ni ki doon u, le ki bui u, “Mbiscal kpo a. Dan nan diaajaal paan u pu, le u ga likr.”

<sup>19</sup> Le Yesu fii ki dii u. Waadidiliib mu dii u.

<sup>20</sup> Le upii u fu tipiir qibin kipiik ni njilee taa door na nan bi nima, ki dan Yesu aapuwob, le ki nan meeh waabokul aamqjuul; <sup>21</sup> ba pu? u nan dak usui ni ke u yaa po meeh Yesu aabokul kan, u ga poɔk.

<sup>22</sup> Le Yesu fenn ki kan u, le ki bui u, “Mbiscal, chuu aabaa. Saah gaa mi ki kii mbamom pu na, nima le cha aa poɔk.” Libuul ngbaan ni le u poɔk.

<sup>23</sup> Le Yesu fuu uninkpel ngbaan aadichal ni, ki ti koo li ponn ni, ki kan kinipaak nima. Bi nan wii ikpowiil, ki pii qiwul, ki faa kifuuk. <sup>24</sup> Le u bui bi, “Nyan lipaal man. Upiibo ngbaan aa kpo. U geen la.”

Le bi laa u sakpen. <sup>25</sup> Baah nyan kinipaak ngbaan lipaal na, le u koo ni upiibo ngbaan aah bi kidiik ki ponn ni na, le ki ti chuu ujaal, le u fii. <sup>26</sup> Le bi mooni tibor ngbaan itingbaan momok ni.

### **Yesu aah likr bijoom bilee aanimbil pu na**

<sup>27</sup> Yesu nan siir nima. Waah cha na le bijoom bilee dii u, ki tar ke, “David Aayaabil, san timi kinimbaak.”

<sup>28</sup> Le u ti koo kidiik ni. Le bijoom ngbaan mu koo ni u chee. Le u baa bi, “Ni pak ke m ga qmama likr ninimbil aa?”

Le bi kii, “Tidindaan, een.”

<sup>29</sup> Baah len kina na, le u meeh binimbil, le ki bui bi, “Naah gaa mi ki kii pu na, ni ja kina ki tii nimi.” <sup>30</sup> Le binimbil likr. Le u sur bi mbamom ke bi taa tuk unii ubaa.

<sup>31</sup> Le bi buen ki ti joo waayimbil mooni itingbaan momok ni.

### **Yesu aah cha ubir poɔk pu na**

<sup>32</sup> Bijoom ngbaan aah nyan ni Yesu chee na, le binib bibaa nan joo ni ubir u tiyayaar joo u na. <sup>33</sup> Le Yesu nyan tiyayaar u ni. Le u len, kaa ki ye ubir. Le ni gar kinipaak ngbaan pam. Le bi len ke, “Taa kee kan kina timi Israel yaab aatin ni.”

<sup>34</sup> Le Farisii yaab bui ke tiyayaar aayidaan le tii u mpcoo ke u nyan tiyayaar binib ni.

### **Yesu aah san kinipaak ngbaan kinimbaak pu na**

<sup>35</sup> Yesu nan bo dii ntisakpem, ni ntiaatiir ni, le ki koo mmeen aadir ni, ki tuk binib Uwumbor aabor, ki mooni Uwumbor aanaan aabonyaan tee, le ki cha bibum bi kpa iween aaboj momok na, ni binib bimok kaa poɔk na poɔk.

<sup>36</sup> Waah kan kinipaak ngbaan na, le u san bi kinimbaak sakpen; ba pu? bi naahn ipihi yol ki do kitij, kaa kpa upihkpaa na la. <sup>37</sup> Le u bui waadidiliib, “Idi biir a, ki wiir. Bidicheeliib ma aa wiir. <sup>38</sup> Nima pu na, ni li mee kisaak Aadindaan man ke u tun ni bidicheeliib bi nan chee waajikaar.”

### **Yesu aakpambalb kipiik ni bilee**

(Mak 3.13-19; Luk 6.12-16)

**10** Yesu nan yin waakpambalb kipiik ni bilee ke bi dan u chee, le ki nan tii bi mpɔɔn ke bi ti nyan tiyayaar binib ni, ki cha bibum bi kpa iween aabɔŋ mɔmɔk na, ni binib bimɔk kaa pɔɔ na pɔɔk.

<sup>2</sup> Waakpambalb kipiik ni bilee ngbaan aayimbil sɔ: njan, Simonn u bi yin u ke Piita na, ni Andru u ye Simonn aanaal na; Jems u ye Sebedee aaajapɔɔn na, ni Jɔnn u ye Jems aanaal na; <sup>3</sup> Filip, ni Batolomiu; Tomas, ni Matiu u nan gaal lampoo na; Jems u ye Alfeus aaajapɔɔn na, ni Tadeus; <sup>4</sup> ni Simonn u nan ban u kuln waatin aadim na, ni Judas Iskariot u ga nan kooh Yesu na.

### **Yesu aakpambalb kipiik ni bilee aatuln**

(Mak 6.7-13; Luk 9.1-6)

<sup>5</sup> Yesu nan tun waakpambalb kipiik ni bilee ngbaan bi ti moon Uwumbɔr aabɔr ki bui bi, “Ni taa buen binib bi kaa ye Juu yaab na aatiŋ ni, ki taa buen Samaria yaab aatiŋ kibaa ni.” <sup>6</sup> Li cha man Israel yaab bi yenn Uwumbɔr aasan ni na aatim ni, <sup>7</sup> ki ti li mooni Uwumbɔr aabɔr ke waanaan peen ni a, <sup>8</sup> ki cha bibum pɔɔk, ki li fikr binib bi kpo na, ki cha bikɔndam pɔɔk, ki nyan tiyayaar ni bipɔníb binib ni. Ni kan mpɔɔn, kaa pan nibaa. Ni mu li tii bibum laafee, ki taa li ban tipar. <sup>9</sup> Ni taa li joo ɔjimombil tilpalɔnn ni, <sup>10</sup> ki taa li tu lituln, ki taa li joo libɔkul ki kpee naah pee li na pu, ki taa li joo ɔjinaatak, ki taa li joo tijaangbar; ba pu? ni ɔjan ke ututunn mɔmɔk ji waatuln pu la.

<sup>11</sup> “Ni yaa fuu kitij kibaa ni kan, ni li ban uninyaan u ga gaa nimi waadiik ni na, ki li bi nima ki ti saa buyoonn ni ga nan nya nima na. <sup>12</sup> Ni yaa koo lidichal libaa ni kan, ni doon bi ki bui be ki Uwumbɔr aanyoor bi bi pu. <sup>13</sup> Lidichal

ngbaan aanib yaa gaa nimi kan, Uwumbɔr aanyoor ga li bi bi pu. Bi yaa kaa gaa nimi kan, waanyoor aan li bi bi pu. <sup>14</sup> Lidichal libaa aanib, bee kitij kibaa aanib yaa kaa gaa nimi, ki yaa kaa kii nimi aabɔr kan, ni nyan nima ki kpaa nitaa aatatan ki lii nima. <sup>15</sup> M tuk nimi mbamɔn la, bundaln Uwumbɔr ga nan ji binib tibɔr na, binib ngbaan aatafadaan ga jer Sodom ni Gomora aatim aanib aatafadaan.”

### **Binib aah ga ɔja Yesu aanib falaa pu na**

(Mak 13.9-13; Luk 21.12-17)

<sup>16</sup> “M ga tun nimi, ni ti moon Uwumbɔr aabɔr. Ni ga li bi ke ipiih i bi ɔjisapol aakaasisik ni na la. Ni li kpa nlan ke iwaa aah kpa nlan pu na, ki li bi suuna ke ɔjinanjel aah bi pu na. <sup>17</sup> Ni li nyi man. Bi ga nan chuu nimi ki ji nimi tibɔr, ki gbaa nimi ɔjinaalab mmeen aadir ni. <sup>18</sup> M pu, le ntim aaninkpiib ni bibɔrb ga ji nimi tibɔr. Le ni ga tuk Juu yaab, ni bi kaa ye Juu yaab na tibɔnyaan tee. <sup>19</sup> Bi yaa chuu nimi kan, ni taa baa nisui ni ke ni ga len kinye; n-yoonn ngbaan yaa nan fiu ni kan, Uwumbɔr Aafuur Nyaan le ga tuk nimi naah ga len pu na; <sup>20</sup> naa ye nimi le ga len, Nite Uwumbɔr Aafuur Nyaan le ga cha ni len.

<sup>21</sup> “Binib ga di binaabitib ɔja binib aanyaal ni, ke bi ti ku bi. Tetiib mu ga di baabim ɔja binib aanyaal ni, ke bi ti ku bi. Binib mu ga yii betetiib ni binatiib, ki cha binib ku bi. <sup>22</sup> Le binib mɔmɔk ga li nan nimi m pu. Unii umɔk jin limɔr ki dii mi ki ti saa limɔfal aadoon na, uma le ga ɔjmar. <sup>23</sup> Bi yaa ɔja nimi falaa kitij kibaa ni kan, ni san buen kitij kiken ni. M tuk nimi mbamɔn la, buyoonn min Unibɔn Aabo ga nan gir ni na, naan kee bɔ dii Israel yaab aatim mɔmɔk ni, ki doo.

<sup>24</sup> “Unii u bae mbaem na aa jer waamɔmɔkr. Unaagbiija ubaa mu aa jer udindaan. <sup>25</sup> Unii u bae mbaem na yaa

bi ke waamɔmɔkr aah bi pu na kan, cha unimbil gbiin kina. Unaagbijja yaa bi ke udindaan na kan, cha unimbil gbiin kina. Bi yaa yin udichadaan kinimbɔŋdaan kan, baan yin waachiln ni aanib mu kinimbɔŋdam aa?”

### Ni li san Uwumbɔr baanja

(Luk 12.2-7)

<sup>26</sup>“Ni taa san binib ijawaan man. Tibɔrkaan mɔmɔk ga kpiir. Tibɔr timɔk bɔɔ na, ti ga nyan mpaan pu. <sup>27</sup>Maah tuk nimi tibɔr ti libɔɔl ni na, ni li mooni ti binib ni. Maah loon tibɔr ti nitafal ni na, ni li mooni ti lipaal. <sup>28</sup>Ni taa san binib ijawaan man. Bi ga njmaa ku nimi aawon baanja la. Baan njmaa ku nimi aawiin. Ni li san Uwumbɔr u ga njmaa bii tiwon ni nwiin mɔmɔk mmii mu kaan junn na ponn ni na. <sup>29</sup>Bi kooh iyaar illee janjan ubaa la. Nite Uwumbɔr yaa kaa kii kan, uyaar ubaa aan lir ni kitij. <sup>30</sup>Uwumbɔr nyi nimi aayikpir aakahm. <sup>31</sup>Nima pu na, ni taa san ijawaan man. Ni jer iyaar pam.”

### Len binib aanimbil ni ke aa ye Yesu yoo la

(Luk 12.8-9)

<sup>32</sup>“Unii umɔk len binib aanimbil ni ke u ye miyoo na, m mu ga len Nte Uwumbɔr u bi paacham na aanimbil ni ke udaan ngbaan le ye miyoo. <sup>33</sup>Unii umɔk len binib aanimbil ni ke waa ye miyoo na, m mu ga len Nte Uwumbɔr u bi paacham na aanimbil ni ke udaan ngbaan aa ye miyoo.”

### Binib bi dii Yesu na, ni bi kaa dii u na aa kpaa kimɔbaan

(Luk 12.51-53; 14.26-27)

<sup>34</sup>“Maah dan dulnyaa wee ni na, ni taa dak ke nima le ga cha binib mɔmɔk li kpaa kimɔbaan. M pu, le butɔb ga li bi.

<sup>35</sup>M pu, uja ga kpak ute kinikpapkak, us-apɔɔn mu ga kpak una, upii mu ga kpak uchapii. <sup>36</sup>Unii aadim ga li ye waachiln ni aanib la.<sup>¶</sup>

<sup>37</sup>“Unii umɔk gee ute, bee una ki jer mi na, waa neer u le ye maadidiir. Unii umɔk gee ujapɔɔn, bee ubisal ki jer mi na, u mu aa neer u le ye maadidiir. <sup>38</sup>Unii umɔk kaan yoor waadɔpuinkoo ki dii mi na kan, waa neer u le ye maadidiir.

<sup>39</sup>“Unii yaa kaa kii ke u kpo m pu kan, waamɔfal ga bee yɔli la. Unii yaa kpo m pu kan, u ga kan limɔfal li kaa kpa ndoon na.”

### Uwumbɔr aah ga pa binib pu na

(Mak 9.41)

<sup>40</sup>“Unii yaa gaa nimi maanib kan, u gaa mi le na. Unii yaa gaa mi kan, u gaa Uwumbɔr u tun ni mi na le na. <sup>41</sup>Unii yaa gaa Uwumbɔr aabɔnabr kan, waah ye Uwumbɔr aabɔnabr na pu le cha u gaa u, nima na, u ga kan Uwumbɔr aabɔnabr aapal. Unii yaa gaa uninyaan kan, waah ye uninyaan na pu le cha u gaa u, nima na, u ga kan uninyaan aapal. <sup>42</sup>M tuk nimi mbamɔn la, unii umɔk tii maadidiir waatiir ubaa nnyunyunkoo baanja na kan, waah ye maadidiir pu na le cha u tii u, nima na, u ga kan tiyaapar.”

### Jɔnn aah tun ni waadidiliib

Yesu chee pu na

(Luk 7.18-35)

**11** Yesu aah tuk waadidiliib kina ki ti doo na, le u siir nima, ki buen ti moon Uwumbɔr aabɔr itingbaan ni.

<sup>2</sup>Le Jɔnn u muini binib nnyun ni na bi kiyondiik ponn ni ki ɔjun Yesu Kristo aah tun pu na. Le u tun ni waadidiliib u chee <sup>3</sup>ke bi ti baa u ke u ye unii u Uwumbɔr aabɔnabiib nan len ke u ga dan na aan waa ye? Bi li ban uken aa?

<sup>4</sup> Le Yesu bui bi, "Gir buen Jønn chee ki ti tuk u naah ḷun pu na, ni naah kan pu na; <sup>5</sup> ke m likr bijoom aanimbil, ki cha biwøb, ni bikøndam, ni bitafakpaab pøøk, ki fikr binib bi kpo na nkun ni, ki tuk bigiim Uwumbør aabønyaan tee. <sup>6</sup> Unii u kaa joo mi beeni na, Uwumbør aanyoor bi u pu."

<sup>7</sup> Le Jønn aadidiliib ki gir buen u chee. Baah cha na, le Yesu len kinipaak ngbaan chee Jønn aabør ke, "Naah nan buen Jønn chee nteersakpiin ni na, ni nan buen ni ti kan ba? Lipul li libuln fiini li na aa? Aayii. <sup>8</sup> Ni nan buen ni ti kan ba? Uja u pee tiwanyaan na aa? Aayii. Binib bi pee tiwanyaan na bi bibørba aadichal ni la. <sup>9</sup> Ni nan buen ni ti kan ba? Uwumbør aabønabr aa? Mbamøn, m tuk nimi la, ni nan kan unii u jer Uwumbør aabønabr na. <sup>10</sup> Ni ḷmee Uwumbør Aagbaŋ ni ke Uwumbør bui ke, 'Maattutunn so. M tun ni u ke u loln ni nsan ki nan toor nsan ki siin si.'<sup>8</sup> Jønn le ye ututunn ngbaan. <sup>11</sup> M tuk nimi mbamøn la, baa kee ma unii ubaa u jer Jønn u muini binib nnyun ni na. Le unii u ye uwaatiir Uwumbør aanaan ni na jer Jønn. <sup>12</sup> Buyoonn Jønn nan fuu ni ki nan saa dandana na, le binib aanimbil man ke bi ti koo Uwumbør aanaan ni, le ki koo mpøøn pu. <sup>13</sup> Uwumbør aakaal ni waabønabr aaliin nan len Uwumbør aanaan aah ga li bi pu na, ki nan saa Jønn aayoonn. <sup>14</sup> Ni yaa ban ke ni pak baah nan len pu na kan, ni ga bee ke Jønn ye Uwumbør aabønabr Elaija u bi nan len ke u ga fuu ni na la. <sup>15</sup> U kpa litafal u ḷun na kan, u ḷun.

<sup>16</sup> "M ga di ba ḷanj dandana aanib ngbaan? Bi bi ke mbim mu ka kinyaj ni ki bui bijeen aatøtiib, <sup>17</sup> 'Ti pii ḷjiwul tii nimi, le naa saar. Ti wii ikpowiil, le naa kaani.' <sup>18</sup> Dandana aanib ngbaan mu bi kina la; Jønn dan ki nan lulni bumøb, kaa nyu ndaan, le bi len ke u kpa kin-

imboŋ. <sup>19</sup> Min Unibøn Aabo dan le ki ji ki nyu, le bi len ke m ye upusakpiidaan ki ye udanyur, ki jønni bilampoogaab ni titunwanbirdam. Tø, nlan aah tun pu na le møk ke mu ḷjan."

### Binib bi kaa kpeln baabimbin na aabør

(Luk 10.13-15)

<sup>20</sup> N-yoonn ngbaan le Yesu piin ki bi len ki kae ntim mubaa aanib. U nan tun lijinjiir aatun pam ntim ngbaan ponn ni, le baa kpeln baabimbin. Nima le cha u kae bi. <sup>21</sup> U nan len ke, "Korasinn aatij aanib, tibøbir bi ni pu. Betseda aatij aanib, tibøbir bi ni mu pu; ba pu? m yaa ba nan tun lijinjiir aatun Taya aatij ponn ni, ni Saidonn aatij ponn ni ke maah tun ni ponn ni pu na kan, bi ba ga kpeln baabimbin ni yunn a, ki li pee tiwanpeenkaan ni saak kuub na, ki di nfatan puk biyil, aan ki møk ke bisui bii baatunwanbir pu. <sup>22</sup> M tuk nimi la, bundaln Uwumbør ga ji binib tibør na, nimi aatafadaan ga jer Taya ni Saidonn aatim aanib aatafadaan. <sup>23</sup> Nimi Kapenaum aatij aanib, bi ga voor nimi paacham aa? Aayii. Bi ga sunn nimi kitekpiitij ni; ba pu? m yaa ba nan tun lijinjiir aatun Sodom aatij ponn ni ke maah tun ni ponn ni pu na kan, kitij ngbaan ba ga li bi ki nan saa dandana wee. <sup>24</sup> M tuk nimi la, bundaln Uwumbør ga ji binib tibør na, nimi aatafadaan ga jer Sodom aatij aanib aatafadaan."

### Dan Yesu chee man ki kan lifuur

(Luk 10.21-22)

<sup>25</sup> N-yoonn ngbaan le Yesu bui ke, "Nte Uwumbør, u ye paacham ni taab Aadindaan na, aa bør tibør timina bilankpalb ni binimbiwolm, le ki di møk chapøntiib, nima pu le m pak si. <sup>26</sup> Nte, saageehn le na, nima le cha aa ja kina.

<sup>27</sup> “Tɔ, Nte Uwumbɔr le tii mi tiwan mɔmɔk. Ubaa aa nyi min Uwumbɔr Aajapɔɔn, see Nte Uwumbɔr. Ubaa mu aa nyi Nte Uwumbɔr, see min Ujapɔɔn. Binib bi m ban ke m di Uwumbɔr mɔk bi na, bi mu nyi u.

<sup>28</sup> “Nimi bimɔk tun lituln ki ti bak na, dan m chee man, le m ga tii nimi lifuur.

<sup>29</sup> Gaa maatuln man, ki bae mbaem m chee; m bi suuna, ki sunn mbaa taab. Ni ga kan lifuur; <sup>30</sup> ba pu? maamɔkm aapɔɔ. Maatuln mu aa nyuun.”

### Juu yaab aakpaakool daal aabor

(Mak 2.23-28; Luk 6.1-5)

**12** N-yoonn ngbaan le Yesu ni waan- didiliib bɔ dii kisaak kibaa ponn ni, Juu yaab aakpaakool daal. Nkon nan joo waadidiliib, le bi piin ki bi chur ti- jikaar ki geei ki per ki ŋmo. <sup>2</sup> Le Farisii yaab kan baah ŋjani pu na, le ki bui Yesu, “Lik saadidiliib aah ŋjani pu na. Timi aakaal aa kii ke bi ŋja kina likpaakool daal.”

<sup>3</sup> Le u baa bi, “Naa karn Ubɔr David aah nan ŋja pu na aa? Nkon nan joo u ni waanib. <sup>4</sup> Le u koo Uwumbɔr Aadichal ni. Le u ni bi ŋjman Uwumbɔr aaboroboro. Baah ŋjman boroboro ng- baan na, le bi bii Moses aakaal mu len ke Uwumbɔr aatotoorb baanja le ga ŋmo boroboro ngbaan na. <sup>5</sup> Tɔ, likpaakool daal mɔmɔk Uwumbɔr aatotoorb bi bi waadichal ni na mu bii likpaakool daal aakaal, le ubaa aa galni bi. Naah kee karn kina Nkaal aagbaŋ ni ii? <sup>6</sup> M tuk nimi la, unii u jer Uwumbɔr Aadichal na bi do. <sup>7</sup> Uwumbɔr Aagbaŋ len ke waa ban ke binib toor kitork baanja ki tii u. U ban ke bi li san tɔb kinimbaak. <sup>\*\*</sup> Ni yaa ba nyi iliin ngbaan aataataa kan, naa ba ga galn binib bi kaa kpa taani na. <sup>8</sup> Tɔ, min Unibɔn Aabo le ye likpaakool daal mu Aadindaan.”

### Yesu aah cha uja u aanjaal faan na pɔɔk pu na (Mak 3.1-6; Luk 6.6-11)

<sup>9</sup> Le u siir nima, ki koo baameen aadiik ni. <sup>10</sup> Le uja u aanjaal faan na bi nima. Le bi ban ke bi galn Yesu, le ki baa u, “Timi aakaal kii ke unii li tei bibum likpaakool daal aa?”

<sup>11</sup> Le u baa bi, “Ni ponn ni ubaa yaa kpa upiih ubaa aan u yaa lir liboln ni likpaakool daal kan, saan nyan u uu?

<sup>12</sup> Unibɔn aa jer upiih ii? Nima le mɔk ke timi aakaal kii ke ti ŋjani ni ŋjan na lik- paakool daal.” <sup>13</sup> Waah len kina na, le u bui uja u aanjaal faan na, “Taln aanjaal.”

Le u taln ujaal. Le mu naar, ki pɔɔk ke muken na. <sup>14</sup> Le Farisii yaab nyan lipaal, le ki kpokl baah ga ŋja pu ki ku Yesu na.

### Ututunn u Uwumbɔr lee u na aah bi pu na

<sup>15</sup> Yesu nan bee baah kpokl pu na, le ki siir nima. Kinipaak nan dii u, le u cha bibum mɔmɔk pɔɔk, <sup>16</sup> le ki bui bi ke bi taa li joo u mooni. <sup>17</sup> Waah ŋja kina na, le ni gbiin Uwumbɔr aabɔnabr Aisaya aah nan len pu na, ke Uwumbɔr len ke,

<sup>18</sup> “Maatutunn u m lee u na sɔ.

M gee u, le u gbiin nnimbil.

M ga di Maafuur Nyaan gbiin u.

Le u ga tuk ŋjinibol mɔmɔk  
maah ga ji binib tibɔr pu na.

<sup>19</sup> Waan li kpak kinikpapkak,  
kaan li tar,

kaan li kpa kifuuk ntim ni,

<sup>20</sup> kaan koo lidabil li boon na,

kaan junn karyaa u kaa wiin mbamɔm na.

U ga kan linyan, ki tii binib mɔmɔk baabamɔn.

\*\*12:7 : Lik Hosea 6.6.

<sup>21</sup> U pu, le ḥinibol aanib mɔmɔk ga li kpa limakl.”<sup>††</sup>

**Binib bibaa aah sii Uwumbor  
Aafuur Nyaan pu na**

(Mak 3.20-30; Luk 11.14-23)

<sup>22</sup> Le binib bibaa joo ni unii u tiyayaar ja u ujoon ni ubir na Yesu chee. Le Yesu cha u pɔɔk, le u len, unimbil mu likr. <sup>23</sup> Le ni gar kinipaak ngbaan mɔmɔk pam. Le bi bi baa tɔb, “Uja ngbaan sil ye Ubɔr David Aayaabil aa?”

<sup>24</sup> Farisii yaab aah ḥun kina na, le bi len ke Beelsebul, u ye tiyayaar aayidaan na, le tii u mpɔɔn ke u nyan tiyayaar binib ni.

<sup>25</sup> Le Yesu bee baalandakbir ngbaan, le ki bui bi, “Nnaan mubaa ni aanib yaa jaa tɔb kijaak kan, nnaan ngbaan ga bee yɔli la. Kitij kibaa ni aanib mu yaa jaa tɔb kijaak kan, kitij ngbaan ga bee yɔli. Lidichal libaa ni aanib mu yaa jaa tɔb kijaak kan, lidichal ngbaan ga bee yɔli. <sup>26</sup> Tiyayaar aayidaan yaa nyan tiyayaar binib ni kan, u jan ubaa kijaak la. Waanaan ga ja kinye aan ki sil? <sup>27</sup> Ni yaa len ke tiyayaar aayidaan Beelsebul le tii mi mpɔɔn ke m nyan tiyayaar binib ni kan, ke ḥma tii nimi aanib mu mpɔɔn ke bi nyan tiyayaar binib ni? Nimi aanib aah ḥjani pu na le ga mɔk ke ni kpa mbamɔn bee naa kpa. <sup>28</sup> Tɔ, Uwumbor Aafuur Nyaan le tii mi mpɔɔn le m nyani tiyayaar binib ni. Nima le mɔk ke Uwumbor aanaan fuu ni ni chee.”

**Yesu aah nyan mpɔɔndaan  
kinimbɔŋ ki bii kaawan pu na**

<sup>29</sup> “Ubaa aan ḥmaa koo mpɔɔndaan Aadichal ni ki bii waawan, see u puen buu u le waahr, le ki nin bii waadichal.

<sup>30</sup> “Unii umɔk kaa dii mi na, u ye maadin la. Unii umɔk kaa kuuni binib tii mi na, u yaal bi la. <sup>31</sup> M tuk nimi la,

Uwumbor ga di cha pinn binib aatunwanbir ni baasiibil mɔmɔk. Tɔ, unii yaa sii Uwumbor Aafuur Nyaan ma kan, Uwumbor aan di cha pinn udaan ngbaan. <sup>32</sup> Unii yaa bii min Unibɔn Aabo kan, Uwumbor ga di cha pinn u. Unii yaa bii Uwumbor Aafuur Nyaan kan, Uwumbor aan di cha pinn u dulnyaa wee ni, kaan di cha pinn u paacham mu.”

**Naah ga ja pu ki bee unii  
aabimbin aah bi pu na**

(Luk 6.43-45)

<sup>33</sup> “Busub yaa ḥjan kan, bu aasubil ga li ḥjan. Bu yaa kaa ḥjan kan, bu aasubil mu aan li ḥjan. Bu aasubil pu le aa ga bee bu aah ye busub bu na. Kina le unii aatuln pu le ga cha aa bee ke u ḥjan aan waa ḥjan. <sup>34</sup> Nimi ikuub aabim, ni ye titunwanbirdam la. Ni ga ja kinye ki len iluin i ḥjan na? Ilandak i gbii unii aasui ni na, ima le u ga len. <sup>35</sup> Ilandak nyaan bi uninyaan aasui ni, nima le u ga len iluin i ḥjan na. Ilandak i kaa ḥjan na bi unii u kaa ḥjan na aasui ni, nima le u ga len iluin i kaa ḥjan na.

<sup>36</sup> “M tuk nimi la, bundaln Uwumbor ga ji binib tibor na, liyaadaal ngbaan le bi ga kpiir baah nan len tibor yɔl yɔl ti na mɔmɔk ki tuk Uwumbor. <sup>37</sup> Saamɔliin le ga nyan si. Saamɔliin mu le ga bii si.”

**Baah ban ke Yesu tun  
lijinjiir aatuln pu na**

(Mak 8.11-12; Luk 11.29-32)

<sup>38</sup> N-yoonn ngbaan le Uwumbor aakaal aamɔmɔkb bibaa ni Farisii yaab bibaa bui Yesu, “Umɔmɔkr, ti ban ke aa tun lijinjiir aatuln, aan tinimbil kan, aan ti gaa si ki kii.”

<sup>39</sup> Le u bui bi, “Nimi dandana aanib, ni ye titunwanbirdam la, kaa dii Uwumbor, nima le ni ban lijinjiir aatuln. Uwumbor aabɔnabr Jona aah nan bi ujan sakpiin

<sup>††</sup>12:21 : Lik Aisaya 42.1-4.

aaponn ni iwiin itaa ni tinxer titaa pu na,  
<sup>40</sup> kina le min Unibon Aabo mu ga li bi  
 kitij ponn ni iwiin itaa ni tinxer titaa.  
 Lijinjiir aatuln limina baanja le ni ga  
 kan. <sup>41</sup> Jona nan tuk Ninefa aatiij aanib  
 Uwumbor aabor. Le bi kpeln baabimbin.  
 Min, u jer Jona na, le tuk nimi Uwum-  
 bør aabor, le naa kpeln nimi aabim-  
 bin. Bundaln Uwumbor ga ji binib tibor  
 na, Ninefa aatiij aanib aah nan kpeln  
 baabimbin pu na, nima le ga mok ke  
 nimi aabor bii. <sup>42</sup> Seba aapiibor nan nyan  
 ni dandar ke u nan jun Ubør Solomonnn  
 aalan aaliin. Min u jer Solomonnn na bi do  
 la, le naa jun maaliin. Bundaln Uwum-  
 bør ga ji binib tibor na, upiibor ngbaan  
 aah nan ja pu na, nima le ga mok ke nimi  
 aabor bii.”

### Tiyayaar aah ga gir ni pu na

(Luk 11.24-26)

<sup>43</sup> “Tiyayaar yaa nyan unii ni kan, ti ga  
 li chuun gor nnyun aah kaa bi kipook ki  
 ponn ni na, ki ban taah ga kal nin chee  
 ki fuur na, kaan kan. <sup>44</sup> Le ti ga len ke  
 ti ga gir kun taah nyan unii u ponn ni  
 na la. Le ti ga gir ni, le ki nan kan ke bi  
 toor taakookoo yaan ki ja mu mbamom,  
 nibaa aa bi ni ni. <sup>45</sup> Le ti ga buen ki ti  
 joo ni tiyayaar tilole ti bir ki jer ti na. Le  
 ti momok ga nan koo unii ngbaan ponn  
 ni, ki ga li bi u ponn ni, le ki bii u ki jer  
 waah nan bi njan pu na. Kina le ni ga li  
 bi dandana aanib bi kaa jan na chee.”

### Binib bi ye Yesu aana ni unaatiib na

(Mak 3.31-35; Luk 8.19-21)

<sup>46</sup> Yesu aah bi len kinipaak ngbaan  
 chee na, le una ni unaatiib dan nan sil  
 lipaal ki ban ke bi len u chee. <sup>47</sup> Le kini-  
 paak ngbaan ponn ni ubaa tuk u, “Aana  
 ni aanaatiib si lipaal ki ban bi len aa  
 chee.”

<sup>48</sup> Le u baa bi, “Jma ye nna? Bilabi ye  
 nnaatiib?” <sup>49</sup> le ki taln urjaal mok waa-  
 didiliib, le ki bui ke, “Lik, nna ni nnaatiib

so. <sup>50</sup> Ba pu? unii umok janii Nte Uwum-  
 bør u bi paacham na aah gee pu na, uma  
 le ye mnaal, ni nninkpan, ni nna.”

### Unii u yaa njikaabim na aayatajajakl

(Mak 4.1-9; Luk 8.4-8)

**13** Liyaadaal ngbaan le Yesu nyan  
 lipaal, le ki buen ki ti kal  
 nnyusakpem aagbaan. <sup>2</sup> Le kinipaak  
 sakpen dan u chee, ki wiir. Nima le u koo  
 bujobj ni, nnyun ni, le ki kal bu ponn ni.  
 Kinipaak ngbaan momok mu si lipaal.

<sup>3</sup> Le u tuk bi tibor pam njiyatayak ponn  
 ni, le ki bui ke, “Ukpaal ubaa le nan buen  
 u ti yaa njikaabim. <sup>4</sup> Waah yaa na, le  
 mubaa lir nsan ponn ni. Le inyooin dan  
 nan peeji jin. <sup>5</sup> Le mubaa mu lir ntak-  
 pateer paab, titan aah kaa wiir nin chee  
 na. Titan aah kaa wiir na, le mu guu puln  
 mala. <sup>6</sup> Le nwiin puu, ki ton, ki see mu.  
 Mu aah kaa kpa inyaan mbamom na, le  
 mu yol. <sup>7</sup> Le mubaa mu lir ikokon ponn  
 ni. Le ikokon muun le ki ku mu. <sup>8</sup> Le  
 mubaa mu lir kitij ki jan na ponn ni le ki  
 mar. Ngem lun nkub nkub, ngem mu lun  
 imonko itata, ngem mu lun piitaa piitaa.

<sup>9</sup> “U kpa litafal na kan, u jun.”

### Janitaa ji pu u jak bi njiyatayak na

(Mak 4.10-12; Luk 8.9-10)

<sup>10</sup> Le waadidiliib dan nan baa u, “Ba  
 pu aa jak bi njiyatayak?”

<sup>11</sup> Le u bui bi, “Nimi le Uwumbor cha  
 ni bee waanaan aaboborkaan, kaa cha  
 bima bee. <sup>12</sup> Unii u kpa nlan ki bee  
 Uwumbor aanaan aabor na, Uwumbor ga  
 kpee u, le u li kpa sakpen. Unii u kaa  
 kpa na, Uwumbor ga chuu gaa waah kpa  
 mu pokaa na. <sup>13</sup> Kinipaak ngbaan lik, kaa  
 waa, ki pel kaa jun, kaa bee maaliin  
 aatataa. Nima le cha m jak bi njiyatayak.  
<sup>14</sup> Baah bi pu na, le ni gbiin Uwumbor  
 aabonabr Aisaya aah nan len pu na ke,  
 ‘Bi ga pel ki pel,  
 kaan bee Uwumbor aaliin aatataa.  
 Bi ga lik ki lik kaan li waa.’

<sup>15</sup> Ba pu? binib ngbaan aasui aa bi nibaa ni.

Bitafal kpaa la.

Bi ḷub binimbil,  
kaa ban ke binimbil woln,  
kaa ban ke bitafal ḷun,  
kaa ban ke bisui bee Uwumbor aaliin  
aatataa,  
kaa ban ke bi kpeln baabimbin ki dii  
Uwumbor aasan ke u tii bi laafee.<sup>\*\*</sup>

<sup>16</sup> “Nimi maadidiliib, Uwumbor  
aanyoor bi ni pu; ba pu? ninimbil  
woln, nitafal mu ḷun. <sup>17</sup> M tuk nimi  
mbamɔn la, Uwumbor aabɔnabtiib pam  
ni bininyaam pam nan ban bi kan naah  
kan tiwan ni na, kaa kan. Bi nan ban bi  
ṇun naah ḷun tibor ti na, kaa ḷun ti.”

### Liyataŋjaki ngbaan aatataa aah cha pu na

(Mak 4.13-20; Luk 8.11-15)

<sup>18</sup> “Li pel man aan m tuk nimi unii  
u yaa njikaabim na aayataŋjaki aatataa.

<sup>19</sup> Binib yaa ḷun Uwumbor aanaan aabɔr  
kaa bee taatataa kan, le kinimbɔŋ ga  
dan nan nyan tibor ti bi bisui ni na.  
Njikaabim mu lir nsan ponn ni na le

na. <sup>20</sup> Njikaabim mu lir ntakpateeर pu  
na mu ye binib bi ḷun tibor ngbaan, ki

gaa ti mala ni mpopiin na. <sup>21</sup> Bi mu aa  
gaa ti mbamɔn bisui ni. Bi ga li joo ti

ni yunn siib. Bi yaa kan limukl ti pu  
kan, bee binib yaa ḷa bi falaa ti pu kan,  
libuul ngbaan ni, le bi ga di ti lii. <sup>22</sup> Binib

ngem mu bi ke njikaabim mu lir ikokon  
ponn ni na la. Bi ḷun tibor ngbaan la.  
Le bitafal bi baabimbin ni, ni liwankpal

ni. Nima le ku tibor ngbaan bisui ni, le  
taa mar. <sup>23</sup> Binib bi ḷun tibor ngbaan ki

bee taatataa, ki kii ti na, bima le bi ke  
njikaabim mu lir kitij ki ḷan na ponn ni,

ki mar na. Ngem lun nkub nkub, ngem  
mu lun imonko itata, ngem mu lun pi-  
itaa piitaa.”

### Timoor ti bi ipui ponn ni na aayataŋjaki

<sup>24</sup> Yesu nan ki ḷakl bi liyataŋjaki liken  
ke, “Uwumbor aanaan naahn ukpaal u  
yaa ipui i ḷan na waakpaab ni na la.

<sup>25</sup> Kinyeek kibaa daal, binib aah dɔ geen  
na, le waadin dan nan di timoor yaa  
ṣmal ipui ngbaan ponn ni, le ki buen.

<sup>26</sup> Ipui aah muun ki mar na le bi kan  
ke timoor mu bi i ponn ni. <sup>27</sup> Le ukpaal  
ngbaan aatutum dan nan baa u, ‘Timi  
aaninkpel, saa nan di ipui i ḷan na le di  
yaa saakpaab ni ii? Timoor ngbaan mu  
nyan ni la?’ <sup>28</sup> Le u bui bi, ‘Maadin ubaa  
le ḷa kina.’ Le bi baa u, ‘Aa ban ke ti  
buen ti ḷoi nyan timoor ngbaan aa?’ <sup>29</sup> Le  
u bui bi, ‘Aayii. Di cha ti man. Ni yaa  
ṣoi nyan timoor ngbaan kan, nibaakan,  
ipui ibaa mu ga li kpaan ḷoi ki dii ti.

<sup>30</sup> Cha man ipui ngbaan ni timoor ng-  
baan kpaan muun, aan ki nan biir. Ni  
yaa nan ḷeer lipuicheel kan, m ga tuk  
bipuicheeb: Puen ḷoi nyan man timoor  
ngbaan waahr, aan ki buu ti, ki di see  
mmii, aan ki nin chee ipui ki di fu maapil  
ponn ni.”

### Tisufar aabil aayataŋjaki

(Mak 4.30-32; Luk 13.18-19)

<sup>31</sup> Yesu nan ki ḷakl bi liyataŋjaki liken  
ke, “Uwumbor aanaan naahn linaanyi-  
imbil li uja ubaa nan di bun waakpaab  
ni na la. <sup>32</sup> Tisufar ngbaan aabil le ye li-  
waatiir, ḷibil momɔk filk jer lima la. Bi  
yaa di libil ngbaan bun kan, li ga puln  
ki muun, ki jer tisufar momɔk, ki ga ḷa  
busub la. Le inyoon i laani paacham na  
dan nan ter yaadil bu aabon pu.”

### Boroboro aanyɔk aayataŋjaki

(Luk 13.20-21)

<sup>33</sup> Yesu nan ki ḷakl bi liyataŋjaki liken  
ke, “Uwumbor aanaan naahn boroboro

\*\*13:15 : Lik Aisaya 6.9-10.

aanyɔk mu upii nan di ɔa boroboro aayon ponn ni, aan boroboro ngbaan mɔk duun na la.”

### **Yesu di ɔiyataŋak ɔymeen ki tuk bi**

(Mak 4.33-34)

<sup>34</sup>Kina le Yesu ɔakl ɔiyataŋak ki tuk kinipaak ngbaan, kaa len tibaa bi chee see ɔiyataŋak ɔymeen. <sup>35</sup>Waah ɔa kina na, le ni gbiin Uwumbɔr aabɔnabr aah nan len pu na ke,

“M ga waar mmɔb ki ɔakl ɔiyataŋak, ki len tibɔbɔrkaan ti nan bɔr buyoonn Uwumbɔr nan naan dulnyaa wee ki nan saa dandana wee na.”<sup>¶¶</sup>

### **Timoor ti nan bi ipui ponn ni na aayataŋakl aatataa**

<sup>36</sup>Yesu nan siir cha kinipaak ngbaan, ki gir buen kidiik ni. Le waadidiliib dan u chee, ke u tuk bi timoor ti bi ipui ponn ni na aayataŋakl aatataa.

<sup>37</sup>Le u bui bi, “Ukpaal u yaa ipui i ɔan na le ye min Unibɔn Aabo. <sup>38</sup>Bukpaab ngbaan le ye dulnyaa wee. Ipui i ɔan na le ye Uwumbɔr aanaan ni aanib. Timoor ngbaan le ye kinimboj aanib. <sup>39</sup>Ukpaal aadin u yaa timoor ngbaan na le ye kinimboj. Lipuicheel le ye dulnyaa aadoon. Bipuicheeb ngbaan le ye Uwumbɔr aatuuntiib. <sup>40</sup>Baah nan ɔci timoor ti ki di see mmii ponn ni na, dulnyaa aadoon ga nan li bi kina la. <sup>41</sup>Min Unibɔn Aabo ga tun ni maatuuntiib dulnyaa wee ni, bi nan chuu titunwanbirdam, ni bitɔtɔj mɔmɔk, aan ki nyan bi maanaan ni, <sup>42</sup>ki di ti ɔa mmii sakpiin ni. Bi ga wii ki ɔmɔ ɔnyinyin nima chee. <sup>43</sup>N-yoonn ngbaan le bininyaam ga li bi Bite Uwumbɔr aanaan

ni, ki wiin ke nwiin aah wiin pu na. U kpa litafal na kan, u ɔjun.”

### **Liwankpal li bɔr na aayataŋakl**

<sup>44</sup>“Uwumbɔr aanaan naahn liwankpal li bɔɔ bukpaab ni, kitij ponn ni na la. Le uja ti kan liwankpal ngbaan, le ki ki di biin li pu. Le ni mɔ u ki ti nyaɔ. Le u buen ke u ti kooh waawan mɔmɔk, ki gir ti daa bukpaab ngbaan.”

### **Nleenyaaan aayataŋakl**

<sup>45</sup>“Uwumbɔr aanaan naahn uwankooh u chuun ban nleen mam mu ɔjan na ke u daa na la, <sup>46</sup>le ki ti kan nleenyaaan mu kpa kidaak sakpen na, le ki buen ti kooh waawan mɔmɔk, ki ti daa nleenyaaan ngbaan.”

### **Kipɔɔk aayataŋakl**

<sup>47</sup>“Uwumbɔr aanaan naahn kipɔɔk ki bijanbam di mee nnyun ni ki chuu ijan mɔk aabɔŋ na la. <sup>48</sup>Kaah gbiin ijan na, le bi dar ki nyan lipaal, le ki kal ki gann ijan i ɔan na ki di ɔa tibɔokur ni, ki cha i kaa ɔan na, ki di mee. <sup>49</sup>Dulnyaa aadoon mu ga nan li bi kina la. Uwumbɔr aatuuntiib ga nan dan dulnyaa ni, ki nan gann titunwanbirdam bininyaam ponn ni, <sup>50</sup>ki ti di ɔa mmii sakpiin ni, binib aah wii ki ɔmɔ ɔnyinyin nin chee na.”

### **Tibɔkpokr ni tibɔɔnn**

<sup>51</sup>Le Yesu baa bi, “Ni bee tibɔr timina mɔmɔk aatataa aa?”

Le bi kii, “Een.”

<sup>52</sup>Le u bui bi, “Unii u tuk binib Uwumbɔr aakaal na yaa dii mi kan, u naahn udichadaan u nyan ni waawankpal ponn ni tiwankpokr ni tiwapɔnn.”<sup>§§</sup>

<sup>¶¶</sup>13:35 : Lik Ilahn 78.2.

<sup>§§</sup>13:52 : Nibaakan tiwankpokr ye Uwumbɔr aagbapkok, tiwapɔnn mu ye Yesu aamɔkm.

## Nasaref aatiŋ aanib aah yii Yesu pu na

(Mak 6.1-6; Luk 4.16-30)

<sup>53</sup> Waah nan ḥakl ḥiyatajāk ngbaan ti doo na, le u siir nima, <sup>54</sup> le ki gir kun udo aatiŋ Nasaref ni, le ki ti koo mmeen aadiik ni, ki tuk binib Uwumbor aabor. Waah tuk bi pu na, le ni gar bi. Le bi baa tōb, “Uja wee kan nlan mue la chee? U kan mpōon mue la chee ki tun lijinjiir aatun ngbaan?” <sup>55</sup> Waa ye kapenta na aabo la aa? Una aa ye Mari la aa? Unattiib aa ye Jems, ni Josef, ni Simonn, ni Judas la aa? <sup>56</sup> Uninkpatiib mōmōk aa bi do chee na la aa? U kan nlan mue, ni mpōon mue la chee?” <sup>57</sup> Bi nan len kina le ki yii u.

Le Yesu bui bi, “Binib pak Uwumbor aabɔ̄nabiib see bido aatiŋ ni aanib, ni baachiln ni aanib baanja le aa pak bi.” <sup>58</sup> Baah kaa gaa u ki kii na, waa nan tun lijinjiir aatun pam nima chee.

## Jōnn u nan muin binib nnyun ni na aakun

(Mak 6.14-29; Luk 9.7-9)

**14** N-yoonn ngbaan le Ubɔ̄r Herod ijun Yesu bɔ̄r, <sup>2</sup> le ki bui waatum ke, “Jōnn u nan muini binib nnyun ni na le na. U fikr nkun ni la. Nima le cha u kpa mpōon, ki tun lijinjiir aatun.”

<sup>3</sup> Budabu pu Herod len kina na le ye ke u nan chuu Jōnn ki buu u tikululn ki di u ḥa kiyondiik ni. Taani u cha u nan chuu u na le ye ke Jōnn nan bui u <sup>4</sup> ke waah joo unaal aapuu Herodias na, naa ḥjan, ke u bii Uwumbor aakaal la. <sup>5</sup> Jōnn aah nan len kina na, le Herod ban ke u ku u, le ki san Juu yaab ijawaan. Bi nan len ke Jōnn ye Uwumbor aabɔ̄nabr la.

<sup>6</sup> Le Herod aamaaldaal aawiin fuu ni. Le u ḥa tijir ke bi ji. Le Herodias aabisal dan nan waa liwaal, Ubɔ̄r Herod ni waanib aanimbiin ni. Le ni mōr Herod sakpen. <sup>7</sup> Le u puu tipuur ke u ga tii u waah ban pu na.

<sup>8</sup> Le una bui u ke u bui Ubɔ̄r Herod ke u tii u Jōnn aayil likusambil ponn ni.

<sup>9</sup> Usapōon ngbaan aah bui u kina na, le Ubɔ̄r Herod aasui bii. Waah puu tipuur ti bicham aanimbil ni na pu, waa ban ke ti bee. <sup>10</sup> Nima le u tun unii ke u li cha kiyondiik ponn ni ki ti gii ni Jōnn aayil. <sup>11</sup> Le u ti joo ni uyil likusambil ponn ni ki nan di tii usapōon ngbaan. Le u mu di ti tii una. <sup>12</sup> Le Jōnn aadidiliib dan nan yoor linikpol ngbaan ki ti sub, le ki buen ti tuk Yesu.

## Yesu aah kpiin binib njichur ḥijmu pu na

(Mak 6.30-44; Luk 9.10-17; Jōnn 6.1-14)

<sup>13</sup> Yesu aah ḥyun kina na, le u koo bujɔ̄b ni, le ki buen kipōok ni, binib aah kaa bi nin chee na. Le kinipaak ngbaan ḥyun ke u buen, le ki nyan baatim ni, ki chuun kitij ki buen u chee. <sup>14</sup> Waah nyan bujɔ̄b ni na, le u kan kinipaak sakpen, le ki san bi kinimbaak, le ki cha bi ponn ni bi ye bibum na pōok.

<sup>15</sup> Naah joor na, le waadidiliib dan nan bui u, “Ti bi kipōok ni la. Ni jer tijikaar aajim yoonn a. Cha kinipaak ngbaan buen itingbaan ni ki ti daa tijikaar ji.”

<sup>16</sup> Le u bui bi, “Taa cha bi buen man. Nimi nibaa tii bi tijikaar bi ji man.”

<sup>17</sup> Le bi bui u, “Ijiboroboro kpin ḥijmu ni ijan ilee baanja le bi.”

<sup>18</sup> Le u bui bi, “Li joo ni tii ni mi man,”

<sup>19</sup> le ki bui kinipaak ngbaan, “Kal kitij timosōnn pu man,” le ki yoor njiboroboro kpin ḥijmu ni ijan ilee ngbaan, ki waan lik paacham, ki doon Uwumbor, le ki gii boroboro ni ijan ngbaan, ki di tii waadidiliib. Le bi yakr siin kinipaak ngbaan mōk aanimbiin ni. <sup>20</sup> Bi mōmōk nan ḥman ki bab. Baah ḥman ki bab ki gur ni na, le Yesu aadidiliib nan yoor tijikaar ti gur na ki gbiin tibōokur kipiik ni tilee. <sup>21</sup> Bijab bi jin tijikaar ngbaan na ga nan

li fuu njichur njijmu. Baa nan kahn bipiib ni mbim kpee.

### Yesu aah chuun nnyun pu pu na

(Mak 6.45-52; Jønn 6.15-21)

<sup>22</sup>Libuul ngbaan ni le Yesu muk waa-didiliib ke bi koo buŋjɔb ni ki loln u pu nsan ki puur nnyusakpem na. Le u tuk kinipaak ngbaan ke bi li chaa kun. <sup>23</sup>Waah tuk bi kina na, le u jon lijool paab ubaa, u ti mee Uwumbør. Le ni mue. Le u bi nima chee ubaa. <sup>24</sup>Waa-didiliib mu bi buŋjɔb ni nnyusakpem aakaasisik ni. Libuln nan daar sakpen ki tok bi, tinyunkpenn mu yeŋni baarŋjɔb.

<sup>25</sup>Ikooja aah wii buyoonn na, le u chuun nnyun paab, ki buen bi chee, ki ti njaj bi. <sup>26</sup>Waadidiliib aah kan u chuun nnyun pu na, le ijawaan chuu bi sakpen, le bi len ke ni ye utekpiir aawiin la, le ki faa ikuun ton ton.

<sup>27</sup>Libuul ngbaan ni le Yesu bui bi, “Chuu nibaa man. Min ye. Ni taa san ijawaan man.”

<sup>28</sup>Le Piita bui u, “Ndindaan, ni yaa sil ye si kan, bui mi ke m chuun nnyun pu ki dan aa chee.”

<sup>29</sup>Le Yesu bui u, “Li chuun choo.” Le Piita nyan buŋjɔb ni, ki chuun nnyun paab ki cha Yesu chee. <sup>30</sup>Le u kan libuln aah daar ki feeni tinyunkpenn pu na, le ki san ijawaan, le ki piin ki bi muini cha, le ki teen ke, “Ndindaan, nyan mi.”

<sup>31</sup>Libuul ngbaan ni le Yesu taln uŋaal ki chuu u, le ki bui u, “Saa gaa mi ki kii mbamɔm. Ba ḥa aa joo mi beeni?”

<sup>32</sup>Le bi mɔmɔk bilee koo buŋjɔb ni. Libuul ngbaan ni le libuln ḥmin. <sup>33</sup>Le binib bi bi buŋjɔb ponni na gbaan Yesu aanimbiin ni, ki dooni u, le ki len ke, “Mbamɔn, aa sil ye Uwumbør Aajapɔon la.”

### Yesu aah tii bibum laafee Genesaret aatiŋ ni pu na

(Mak 6.53-56)

<sup>34</sup>Le bi fuu nnyusakpem aadapuul, Genesaret aatiŋ chee, le ki nyan buŋjɔb ni. <sup>35</sup>Le kitij ngbaan aanib bee u, le ki buen itingbaan mɔmɔk ni, ki ti yoor bibum mɔmɔk, ki joo ni bi Yesu chee, <sup>36</sup>ki nan mee u ke u cha bibum ngbaan meeh waabɔkul aamɔjuul. Binib bimɔk meeh li na pɔɔk libuul ngbaan ni.

### Biyaajatiib aakaal

(Mak 7.1-13)

**15** N-yoonn ngbaan le Farisii yaab, ni Uwumbør aakaal aamɔmɔkb nyan ni Jerusalem ni ki dan Yesu chee, le ki nan baa u, <sup>2</sup>“Ba ḥa saadidiliib bii tiyaajatiib aakaal, kaa ḥir biŋaal aan ki nin ji tijikaar?”

<sup>3</sup>Le Yesu baa bi, “Ba ḥa ni mu bii Uwumbør aakaal, nimi aakaal pu?

<sup>4</sup>Uwumbør len ke, ‘Aa li pak aate ni aana,’ ki ki len ke, ‘Unii yaa len tibɔbir lii ute bee una pu kan, ni ku u.’<sup>†</sup> <sup>5</sup>Tɔ, nimi le len ke unii yaa bui ute, bee una, ‘Maah ba ga tii si ni na, maan ki ḥmaa tii si. M di tii Uwumbør a,’ <sup>6</sup>ki yaa kaa pak ute kan, ni len ke naa kpa taani. Naah len kina na, le ni yii Uwumbør aabɔr nimi aakaal pu. <sup>7</sup>Ni ye bijmanjmannim la. Uwumbør aabɔnabr Aisaya aah nan len nimi aabɔr pu na, u nan len mbamɔn la, ke,

<sup>8</sup>‘Binib ngbaan pak Uwumbør bumɔb ni la.

Bisui daa u chee.

<sup>9</sup>Bi dooni u yɔli la,  
ki mɔk binib biyaajatiib aakaal  
ke ni ye waakaal la.”<sup>‡</sup>

\*15:4 : Lik Nnyam 20.12; Ikaal 5.16.

†15:4 : Lik Nnyam 21.17; Liifai Yaab 20.9.

‡15:9 : Lik Aisaya 29.13.

**Tiwan ni ḥjani unii  
titunwanbirdaan na**

(Mak 7.14-23)

<sup>10</sup> Le Yesu yin kinipaak ngbaan, ki nan bui bi, “Li pel man, aan ki bee man maah ga tuk nimi pu na aatataa. <sup>11</sup> Tijikaar ti koo unii aamōb ni na aan ḥjmaa ḥja u titunwanbirdaan. Tiwan ni nyan umōb ni na, nima le ḥjani u titunwanbirdaan.”

<sup>12</sup> Le Yesu aadidiliib dan nan baa u, “Saa nyi ke saah len pu na le cha Farisii yaab gee libuul aa?”

<sup>13</sup> Le u bui bi, “Tisufar timōk Nte Uwumbōr aa bun ti na, u ga chuu ḥjoi ti la. <sup>14</sup> Taa gar bi man. Bi ye bisanmōkb bi jōb na la. Ujoon yaa mōk ujoon nsan kan, bi mōmōk bilee ga lir libuul ponn ni la.”

<sup>15</sup> Le Piita bui Yesu, “Tuk timi liy-atarjakl ngbaan aatataa.”

<sup>16</sup> Le Yesu baa bi, “Ni mu aa kee bee maaliin aatataa aa? <sup>17</sup> Tiwan ni koo unii aamōb ni na koo lipuul ni, le u ti sōnn. Naa nyi kina aa? <sup>18</sup> Tiwan ni nyan unii aamōb ni na, ni nyan usui ni, ki ḥjani u titunwanbirdaan la. <sup>19</sup> Tiwan ni nyan binib aasui ni na le ye ilandak i kaa ḥjan na, ni linikul, ni kidagook aatuln, ni kinaayuk, ni linyamōnggee, ni ḥjisiibil.

<sup>20</sup> Nimina le ḥjani unii titunwanbirdaan. U yaa kaa ḥjir ujaal ki ji tijikaar kan, nima le aan ḥja u titunwanbirdaan.”

**Upii aah gaa Yesu ki  
kii mbamōm pu na**

(Mak 7.24-30)

<sup>21</sup> Le Yesu nyan nima, ki buen Taya ni Saidonn aatingbaan ni. <sup>22</sup> Le upii u ye Kanaann aabo na bi nima, le ki dan nan teen ke, “Ndindaan, si u ye Ubōr David Aayaabil na, san mi kinimbaak. Tiyayaar le joo mbisal ki muk u sakpen a.”

<sup>23</sup> Le Yesu aa len tibaa. Le waadidiliib dan nan gaŋ Yesu ke u jenn u, u paa bi pu ki kpa kifuuk sakpen a.

<sup>24</sup> Le Yesu bui bi, “Uwumbōr tun ni mi ke m nan ter Israel yaab bi yenn Uwumbōr aasan ni na baanja la.”

<sup>25</sup> Waah len kina na, le upii ngbaan dan ki nan gbaan unimbiin ni ki doon u, le ki bui u, “Ndindaan, ter mi.”

<sup>26</sup> Le Yesu bui u, “Ti yaa di mbim aajikaar ki di tii ibō kan, naa ḥjan.”

<sup>27</sup> Le u bui u, “Ndindaan, ni ye mbamōm la; ibō mu tee ji ḥjijikaabol ḥji nyan ni idindaan aateebul pu ki lir ni kitin na.”

<sup>28</sup> Le Yesu bui u, “Upii, aa gaa mi ki kii mbamōm la. Saah ban pu na, ni ḥja kina ki tii si.” Libuul ngbaan ni le ubisal pōok, kaa ki bun.

**Yesu aah tii bibum pam laafee pu na**

<sup>29</sup> Yesu nan siir nima ki bō dī Galilee Aanyusakpem ni, le ki ti jon lijool paab, le ki kal kitij. <sup>30</sup> Le kinipaak sakpen joo ni biwōb, ni bijoom, ni bibirb, ni bitaageeb, ni bibum aabōj, ki nan di bil Yesu aanimbiin ni. Le u tii bi mōmōk laafee. <sup>31</sup> Le ni gar kinipaak ngbaan pam; bi kan bibirb len tibōr, ni bitaagendam pōok ki chuun, ni biwōb mu fii chuun, ni bijoom aanimbil likr. Le bi pak Israel yaab Aawumbōr.

**Yesu aah kpiin binib  
nichur ḥjinaa pu na**

(Mak 8.1-10)

<sup>32</sup> Yesu nan yin waadidiliib ke bi dan u chee, le ki bui bi, “M san kinipaak ngbaan kinimbaak la; bi bi m chee iwiin itaa, kaa kpa nibaa bi ji. Maa ban m tuk bi ke bi li chaa kun, kaa puen tii bi tijikaar ke bi ji. Nibaakan, bi ga ti fik nsan ponn ni.”

<sup>33</sup> Le waadidiliib bui u, “Ti bi kipōok ni la. Ti ga kan tijikaar la chee aan ki tii kinipaak ngbaan aan bi ji bab?”

<sup>34</sup> Le u baa bi, “Ni kpa ḥjiboroboro kpin ḥjija?”

Le bi bui u, "Ti kpa njiboroboro kpin njilole, ni njanbim siib."

<sup>35</sup> Le u bui kinipaak ngbaan, "Kal kitij man," <sup>36</sup> le ki yoor njiboroboro kpin njilole ni njanbim ngbaan, le ki doon Uwumbor, ki gii gii, ki di tii waadidiliib, le bi yakr siin kinipaak ngbaan mɔmɔk aanimbiin ni. <sup>37</sup> Le bi mɔmɔk ɔjman ki bab. Baah ɔjman ki bab na, le waadidiliib yoor tijikaar ti gur na, ki gbiin tibɔkur tilole. <sup>38</sup> Bijab bi nan jin tijikaar ngbaan na nan ye bijab ɔjichur ɔjinaa la. Baa nan kahn bipiib ni mbim kpee.

<sup>39</sup> Le u bui kinipaak ngbaan, "Li chaa kun man," le ki koo buŋɔb ni, ki buen Magadann aatiŋ ni.

### Baah ban ke Yesu tun lijinjiir aatuln pu na

(Mak 8.11-13; Luk 12.54-56)

**16** Farisii yaab ni Sajusii yaab bibaa nan dan Yesu chee, ki ban bi tɔŋ u, le ki bui u, "Tun lijinjiir aatuln Uwumbor aapɔɔn pu, aan ti kan." <sup>2</sup> Le u bui bi, "Paacham yaa maln kijook kan, le ni bui ke uteal aan nu. <sup>3</sup> Paacham yaa maln ki bɔln kichakpiik ni kan, le ni bui ke uteal ga nu din. Paacham pu, le ni beer ke uteal ga nu aan waan nu. Le naa bee Uwumbor aah ɔjani pu dandana na. <sup>4</sup> Nimi dandana aanib, ni ye titunwanbirdam la, kaa dii Uwumbor, nima le ni ban lijinjiir aatuln. Uwumbor aah nan ɔja lijinjiir aatuln ki ɔja waabɔnabr Jona pu na, lituln limina aaboln le ni ga kan. Maan mɔk nimi lijinjiir aawan niken kpee."

Waah len kina na, le u siir nima ki cha bi.

### Bi li nyi Farisii yaab ni Sajusii yaab aamɔkm

(Mak 8.14-21)

<sup>5</sup> Le u ni waadidiliib puur nnyusakpem. Le waadidiliib suln, kaa joo boroboro. <sup>6</sup> Le Yesu bui bi, "Ni li

nyi man Farisii yaab ni Sajusii yaab aaboroboro aanyɔk bɔr."

<sup>7</sup> Le bi bui tɔb, "Taah kaa joo boroboro na, nima le cha u len kina."

<sup>8</sup> Le Yesu bee baah len tɔb chee pu na, le ki baa bi, "Ba pu ni len tɔb chee ke naa joo boroboro? Naa gaa mi ki kii mbamɔm. <sup>9</sup> Naa kee bee maabimbin aa? Naa teer maah nan di njiboroboro kpin njimmu kpiin bijab ɔjichur njimmu pu na aa? Ni nan yoor tijikaar ti gur na tibɔkur tiŋa? <sup>10</sup> Naa teer maah nan di njiboroboro kpin njilole kpiin bijab ɔjichur ɔjinaa pu na aa? Ni nan yoor tijikaar ti gur na tibɔkur tiŋa? <sup>11</sup> Ba pu naa bee ke maa len boroboro aabɔr? M len ke ni li nyi Farisii yaab ni Sajusii yaab aaboroboro aanyɔk aabɔr la."

<sup>12</sup> Waah len kina na, le bi bee ke waa len boroboro aabɔr. U len ke bi li nyi ki taa dii Farisii yaab ni Sajusii yaab aamɔkm la.

### Piita aah len Yesu aabɔr pu na

(Mak 8.27-30; Luk 9.18-21)

<sup>13</sup> Le Yesu buen Siisarea Filipi aatingbaan ni. Waah bi nima na, le u baa waa-didiliib, "Binib bui ke min Unibɔn Aabo ye ɔjma?"

<sup>14</sup> Le bi bui u, "Bibaa len ke aa ye Jɔnn u nan muini binib nnyun ni na la, le biken mu len ke aa ye Uwumbor aabɔnabr Elaija u nan bi n-yaayoonn na la, le biken mu len ke aa ye Uwumbor aabɔnabr Jeremia, bee Uwumbor aabɔnabr ubaa la."

<sup>15</sup> Le u baa bi ke, "Nimi, ni len ke m ye ɔjma?"

<sup>16</sup> Le Simonn Piita bui u, "Aa ye Kristo u ga gaa binib lii na. Aa ye Uwumbor u fu na Aajapɔɔn la."

<sup>17</sup> Le Yesu bui u, "Simonn, Jɔnn aajapɔɔn, Uwumbor aanyoor bi aa pu la. Naa ye unibɔn le kpiir kina mɔk si. Nte Uwumbor u bi paacham na le kpiir kina mɔk si. <sup>18</sup> Piita, m tuk si la, aa ye litak-

pal<sup>¶</sup> la. Litakpal limina pu le m ga di maanib siin. Le nkun aapcoon aan nyaŋ bi.<sup>19</sup> M ga tii si mpcoon Uwumbor aanaan ni. Tiwan ni aa ga buu dulnyaas wee ni na, nima le buu paacham mu. Tiwan ni aa ga buur lii dulnyaas wee ni na, nima le buur lii paacham mu.”

<sup>20</sup> Le Yesu sur waadidiliib ke bi taa tuk unii ubaa ke u ye Kristo ngbaan.

**Yesu tuk waadidiliib  
waah ga ji falaa pu na**

(Mak 8.31–9.1; Luk 9.22–27)

<sup>21</sup> N-yoonn ngbaan le Yesu piin ki bi kpiir tuk waadidiliib, “See m buen Jerusalem ki ji falaa sakpen. Juu yaab aaninkpiib, ni Uwumbor aatotoorninkpiib, ni Uwumbor aakaal aamomokb ga ja mi falaa sakpen, le ki ku mi. Iwiin itaadaal le Uwumbor ga fikr mi nkun ni.”

<sup>22</sup> Le Piita di u nyany n-gbaan, le ki ti sur u ke, “Ndindaan, Uwumbor cha ni ja libuln ki daa jer. U taa cha ni pii si.”

<sup>23</sup> Le Yesu fenn lik Piita le ki bui u, “Kinimboŋ, siir foor m chee. Aa ye lisugeln la, le ki lek mi nsan. Aa dak ke unibon aah dak pu na la, kaa dak ke Uwumbor aah dak pu na.”

<sup>24</sup> Yesu nan bui waadidiliib, “Unii yaa ban u dii mi kan, cha u yii ubaa, ki yoor waadopuinkoo aan ki li dii mi. <sup>25</sup> Unii umok kaan ḥmaa kpo m pu na kan, waamfal ga bee yoli la. Unii umok ga ḥmaa kpo m pu na kan, u ga kan lim-fal li kaa kpa ndoon na. <sup>26</sup> Unii yaa kan dulnyaas wee ni aawan momok ki lann waamfal kan, ba aanyoor le u kan? Unii tee ga di ba ki daa waamfal? <sup>27</sup> Min Unibon Aabo ga fuu ni ki ga li kpa Nte

Uwumbor aapcoon. Le Uwumbor aatuuntiib ga li dii mi. N-yoonn ngbaan le m ga tii binib momok lipal, baatuln aah neer pu na. <sup>28</sup> M tuk nimi mbamōn la, binib bi si do na ponn ni bibaa aan kpo see bi puen kan min Unibon Aabo jin maanaan waahr.”

**Yesu aawon aah kpeln pu na**

(Mak 9.2-13; Luk 9.28-36)

**17** Iwiin iloop aah jer na, le u di Piita, ni Jems, ni unaal Jōnn, ki jon lijool fɔfɔk libaa paab, bibaa. <sup>2</sup> Le uwon kpeln binimbil ni. Unimbil wob wiin ke nwiin aah win pu na. Le waawan-peenkaan kpalm tiwanpipinn ke nwiihn aah piin pu na. <sup>3</sup> Le bi kan n-yaayoonn na aabɔnabiib Moses ni Elaija bi len u chee tibor. <sup>4</sup> Le Piita bui u, “Ndindaan, taah bi do na, ni ḥjan. Aa yaa gee kan, cha m ja ḥiboo ḥitaa, ki di libaa tii si, ki di liken tii Moses, ki di liken tii Elaija.”

<sup>5</sup> Waah beenin bi len kina na, libuul ngbaan ni le ntaalangbapiin dan nan biin bi pu. Le nneel len ntaalangbapiin na ponn ni ke, “Njapcoon u m gee u na so. Nnimbil gbiin u. Li ḥjun waah len pu na man.”<sup>8</sup>

<sup>6</sup> Waadidiliib aah ḥjun nneel ngbaan pu na, le bi san ijawaan sakpen, le ki lir kitig lichichikr. <sup>7</sup> Le Yesu dan nan meeh bi, ki bui bi, “Fii man. Taa san ijawaan man.” <sup>8</sup> Le bi waan lik paacham, kaa ki kan ubaa see Yesu baanja.

<sup>9</sup> Le bi gir sunn ni lijool ngbaan taab. Baah bi sunni na, le Yesu bui bi, “Ni taa tuk ubaa naah kan pu na, ki nan saa buyoonn min Unibon Aabo ga fikr nkun ni na.”

<sup>¶</sup>16:18 : Piita aataataa le ye ke “litakpal”.

<sup>§</sup>17:5 : Lik Aisaya 42.1.

<sup>10</sup> Le bi baa u, “Ba pu Uwumbor aakaal aamɔmɔkb len ke Elaija le ga puen dan le Kristo<sup>\*\*</sup> nin fuu ni?”<sup>††</sup>

<sup>11</sup> Le u bui bi, “Mbamon, see Elaija fuu ni, ki nan toor tiwan mɔmɔk. <sup>12</sup> M tuk nimi la, Elaija puun fuu ni a. Le baa nyi u, ki ɔja u baah ban pu na. Baah ɔja u falaa pu na, kina le bi ga ɔja min Unibɔn Aabo mu falaa.”

<sup>13</sup> Yesu aah len Elaija aabor kina na, le waadidiliib bee ke u len Jɔnn u nan muini binib nnyun ni na aabor la.

### Yesu aah nyan libimbikl ubo ni pu na

(Mak 9.14-29; Luk 9.37-43a)

<sup>14</sup> Le bi fuu kinipaak ngbaan aah bi nin chee na. Baah fuu ni na, le uja ubaa dan nan gbaan unimbiin ni, <sup>15</sup> le ki bui u, “Ndindaan, san maabo kinimbaak. Libimbikl le joo u, ki ɔjani u falaa sakpen, ki cha u lir mmii ni, ni nnyun ni kpala kpala. <sup>16</sup> M joo ni u saadidiliib chee, le baa ɔjmaa nyan libimbikl na u ni.”

<sup>17</sup> Le Yesu bui ke, “Nimi dandana aanib, naa gaa Uwumbor ki kii, ki mu aa dii u mbamɔm. Ni ban ke m yunn ni chee kinye pu, aan ki li kpa limɔr ni pu, aan ni gaa mi ki kii? Li joo ni ubo ngbaan m chee.” <sup>18</sup> Baah joo ni u na, le Yesu kae libimbikl li joo u na. Le li nyan u ni. Libuul ngbaan ni le u pɔɔk, kaa ki bun.

<sup>19</sup> Le Yesu aadidiliib dan u chee bibaa, le ki nan baa u, “Ba pu taa ɔjmaa nyan libimbikl ngbaan u ni?”

<sup>20</sup> Le u bui bi, “Naa gaa Uwumbor ki kii mbamɔm. Nima le naa ɔjmaa nyan li. M tuk nimi mbamɔn la, ni yaa gaa Uwumbor ki kii siib kina kan, ni ga bui lijool limina ke, ‘Fii nima chee,’ le li ga fii. Ni-baa aan li pɔɔ ni chee. [<sup>21</sup> Libimbikl limina aaboln ma kan, ni yaa kaa lul bumɔb

ki mee Uwumbor kan, naan ɔjmaa nyan li.”]

### Yesu aah ki tuk bi waakun aabor pu na

(Mak 9.30-32; Luk 9.43-45)

<sup>22</sup> Waadidiliib mɔmɔk aah nan bi Galilee aatij ni na, le u bui bi, “Bi ga di min Unibɔn Aabo ɔja binib aanjaal ni, <sup>23</sup> le bi ku mi. Le iwiin itaadaal Uwumbor ga fikr mi nkun ni.”

Le biponn bii sakpen.

### Uwumbor Aadichal aamombil

<sup>24</sup> Yesu ni waadidiliib aah fuu Kape-naum aatij ni na, le binib bi gaal Uwumbor Aadichal aamombil na dan nan baa Piita, “Saamɔmɔkr aa pa Uwumbor Aadichal aamombil aa?”

<sup>25</sup> Le u bui bi ke, “U pa la.”

Piita aah fuu linampal na, le Yesu puen len u chee ke, “Simonn, dulnyaa wee ni aaborb gaal baatinj aanib chee lampoo aan bicham chee? Aa dak kinye?”

<sup>26</sup> Le u bui u, “Bicham chee.”

Le Yesu bui u, “Kina kan, baatinj aanib aa pa. <sup>27</sup> Tɔ, taa ban ti koo baataani ni. Li cha nnyusakpem ni ki ti di njapiin lii nnyun ni. Saah ga chuu njan aajan u na, yoor u ki chuu waar umɔb. Aa ga kan limombil umɔb ponn ni. Nyan li ki ti pa tii bi, m ni si pu.”

### Ulau ye uninyuun?

(Mak 9.33-37; Luk 9.46-48)

**18** N-yoonn ngbaan le Yesu aa-didiliib dan nan baa u, “Uwumbor aanaan ni, ulau tee ye uninyuun?”

<sup>2</sup> Le u yin ubo ke u dan u chee, ki di u siin bikaasisik ni, <sup>3</sup> le ki bui bi, “M tuk nimi mbamɔn la, ni yaa kaa kpeln ki bi ke bibilb waatiir aah bi pu na kan,

\*\*17:10 : Hiibru aaliin ni, bi yin Kristo ke Masiya. Naatataa le ye ke unii u ga gaa binib lii na.

††17:10 : Lik Malakai 4.5.

naan koo Uwumbor aanaan ni. <sup>4</sup> Unii umɔk sunn ubaa taab ki bi ke ubo waatiir umina aah bi pu na kan, udaan ngbaan le ye uninyuu Uwumbor aanaan ni. <sup>5</sup> Unii umɔk gaa ubo umina aaboln maayimbil pu na, u gaa mi le na.”

### Taa tɔŋ ubo ubaa ke u tun titunwanbir

(Mak 9.42-48; Luk 17.1-2)

<sup>6</sup> “Unii yaa tɔŋ mbim bi gaa mi ki kii na ponn ni ubaa ke u tun titunwanbir kan, tibɔbir ga li bi u pu. Bi yaa ba tee di ki-naak sakpej ki di tul leen uneen ni, ki tur u lii nnyusakpem ni, nin chee nyoo na kan, ni ba soor ki tii u, ni u tɔŋ ubo ubaa. <sup>7</sup> Ntɔŋ pu, tibɔbir bi dulnyaa wee ni aanib pu. Tɔŋ, ntɔŋ ga li bi. Tibɔbir mu bi unii u tɔŋ binib ke bi tun titunwanbir na pu.

<sup>8</sup> “Aa yaa gee tiwan ke saah gee aajaal, bee aataal pu na kan, tiwan ngbaan yaa tɔŋ si ke aa tun titunwanbir kan, di ni lii. Aa yaa lann ɲjaal mubaa, bee litaal libaa, ki kan limɔfal li kaa kpa ndoon na kan, ni soor ni aa li kpa ijaaal ilee ni ɲitaa ɲilee ki ti li bi mmii mu kaan junn na ni. <sup>9</sup> Aa yaa gee tiwan ke saah gee aanimbil pu na kan, tiwan ngbaan yaa tɔŋ si ke aa tun titunwanbir kan, di ni lii. Aa yaa lann linimbil libaa, ki kan limɔfal li kaa kpa ndoon na kan, ni soor ni aa li kpa ɲinimbil ɲilee, ki ti li bi mmii mu kaan junn na ni.”

### Kiwakork ki wɔŋ na aayataŋjakl

(Luk 15.3-7)

<sup>10</sup> “Li nyi man ki taa lik bibilb ponn ni ubaa fam. M tuk nimi la, baatuuntiib bi paacham Nte Uwumbor aanimbiin ni n-yoonn mɔmɔk. <sup>[11]</sup> Min Unibɔn Aabo dan dulnyaa wee ni ke binib bi wɔŋ na ɲmar la.]

<sup>12</sup> “Unii yaa kpa ipiih nkub, i ponn ni ubaa yaa wɔŋ kan, ni dak ke u ga ɲa kinye? U ga di cha ipiih imonko inaa ni kipiik ni iwae na ligongoln paab, ki buen ti ban upiih u wɔŋ na la. <sup>13</sup> M tuk nimi mbamɔn la, u yaa ti kan u kan, u ga li mɔɔni upiih ngbaan pu, ki jer waah ga li mɔɔni ipiih imonko inaa ni kipiik ni iwae i kaa wɔŋ na pu na. <sup>14</sup> Kina le Nite Uwumbor u bi paacham na aa ban ke bibilb waatiib ngbaan ponn ni ubaa wɔŋ.”

### Saah ga ɲa aana aabo u ɲa si bakaa na pu na

<sup>15</sup> “Aana aabo yaa ɲa si bakaa kan, pɔɔn aabaa ki buen ti kan u n-gbaan suuna ki tuk u waataani. U yaa ɣun tii si kan, aa giin u ki siin waabuul ni la. <sup>16</sup> U yaa yii, kaa kii tii si kan, pɔɔn aabaa ki ban unii ubaa, bee bilee, ki ki buen u chee ki ti kan u, aan binib bilee, bee bitaa ngbaan ɣun tibɔr ngbaan mɔmɔk ki li ye saaseeraadam. <sup>‡‡</sup> <sup>17</sup> U yaa yii, kaa kii tii bi mu kan, nyan ti mpaan pu ki tuk Uwumbor aanib. U yaa yii, kaa kii tii bi mu kan, ni lik u ke ulampoogaar, bee unii u kaa dii Uwumbor aasan na.

<sup>18</sup> “M tuk nimi mbamɔn la, tiwan ni, ni ga buu dulnyaa wee ni na, nima le buu paacham. Tiwan ni, ni ga buur lii dulnyaa wee ni na, nima le buur lii paacham mu.

<sup>19</sup> “Cha m moo tuk nimi man, ni ponn ni bilee yaa kpaan kimɔbaan dulnyaa wee ni, ki mee Nte Uwumbor u bi paacham na kan, u ga ɲa naah ban pu na ki tii nimi. <sup>20</sup> Binib bilee, bee bitaa, yaa kuun tɔb chee maayimbil pu kan, m ga li bi bikaasisik ni.”

<sup>‡‡</sup>18:16 : Lik Ikaal 19.15.

**Unii u kaa di cha pinn  
waatutujeer na**

<sup>21</sup> Le Piita dan nan baa Yesu, “Ndindaan, nna aabo yaa ḥjani mi bakaa kan, m ga di cha pinn u nfum muŋa? Nfum mulole ee?”

<sup>22</sup> Le Yesu bui u, “Maa tuk si ke nfum mulole. Cha pinn u imonko itaa ni kipiik nfum mulole. <sup>23</sup> Ba pu? Uwumbor aanaan naahn ubɔrkpaan u nan ban u bee waatutum aah joo waapɔln pu na la. <sup>24</sup> Waah piin ki bi lik kina na, le bi joo ni waatutunn ubaa u joo waapɔln tikunabr aamombil ḥjichur ḥjichur kipiik.” <sup>25</sup> Waah kaa kpa ḥjimobil ḥjibaa ki ga pa lipɔln ngbaan na, le udindaan bui ke bi di u ni upuu, ni waabim, ni waah kpa tiwan ni na mɔmɔk, ki di kooh, aan ki di ḥjimobil ngbaan pa lipɔln ngbaan. <sup>26</sup> Le ututunn ngbaan gbaan udindaan aanimbiin ni, ki gaŋ u ke, ‘Ndindaan, pɔɔn aabaa ki ji limɔr. M ga pa si maah jin saapɔln li mɔk na.’ <sup>27</sup> Le udindaan san u kinimbaak, ki di cha pinn u lipɔln ngbaan, le ki di u lii.

<sup>28</sup> “Le ututunn ngbaan nyan lipaal, ki ti kan waatutujeer u joo waapɔln kpakpaln nkub na, le ki chuu u, le ki chuu uneen ni, ki bui u ke, ‘Pa mi saah joo maapɔln li na.’ <sup>29</sup> Le waatutujeer ngbaan gbaan unimbiin ni, ki gaŋ u ke, ‘Pɔɔn aabaa ki ji limɔr. M ga pa si.’ <sup>30</sup> Le waa kii, le ki chuu u ti ḥja kiyondiik ni, u li bi nima ki ti saa buyoonn u ga pa lipɔln ngbaan na. <sup>31</sup> Waatutujeertiib aah kan kina na, le ni bii bisui sakpen. Le bi dan nan tuk bidindaan waah ḥja pu na mɔmɔk. <sup>32</sup> Le bidindaan yin u, ki nan bui u, ‘Aa ye bakadaan la. Saah gaŋ mi na,

le m di cha pinn si saapɔln mɔmɔk. <sup>33</sup> Aa mu ba ga san saatutujeer kinimbaak ke maah san si pu na la.’ <sup>34</sup> Udindaan aah gee lijuul u pu sakpen pu na, le u cha bi ti ḥjani u falaa kiyondiik ni, ki ti saa buyoonn u ga pa lipɔln ngbaan mɔmɔk doo na.

<sup>35</sup> “Tɔ, unii umɔk kaa di cha pinn una aabo usui ponn ni na kan, Nte Uwumbor u bi paacham na mu ga daa utafal kina la.”

**Uja taa jenn upuu**

(Mak 10.1-12)

**19** Yesu aah len kina ti doo na, le u nyan Galilee aatiŋ ni, ki buen Judea aatiŋ ki bi Jɔɔdann aamɔɔdapuul na ni. <sup>2</sup> Le kinipaak sakpeŋ dii u. Le u cha bi ponn ni bi ye bibum na pɔɔk.

<sup>3</sup> Le Farisii yaab bibaa nan dan u chee, ki ban bi tɔŋ u, le ki baa u, “Uja yaa jenn upuu lii waageehn pu kan, timi aakaal kii kina aa?”

<sup>4</sup> Le Yesu baa bi, “Naa karn Uwumbor Aagbaŋ aah len pu na aa? Ni ḥjmee ke Uwumbor u naan bi na, u nan naan uja ni upii,” <sup>5</sup> le ki len ke waah naan uja ni upii na, uja yaa yoor upii kan, bi ga nya cha bitetiib ni binatiib, ki kpaan tɔb chee, ki ḥja unibaan.\* <sup>6</sup> Nima pu na, baa ki ye binib bilee, bi ye unibaan la. Uwumbor aah kpaan bi na, unibɔn taa yakr bi.”

<sup>7</sup> Le Farisii yaab ngbaan baa u, “Ni yaa ye kina kan, ba pu Moses nan len ke uja yaa ban u jenn upuu kan, u ḥjmee kigbaŋ ponn ni ke u jenn u, ki di tii u, ki nin jenn u?”

<sup>8</sup> Le Yesu bui bi, “Nitafal aah pɔɔ pu na, nima le cha Moses tii nimi nsan ke ni jenn nipiutiib. N-yoonn mu Uwumbor nan naan tiwan mɔmɔk ki nan saa dan-

\*<sup>18:24</sup> : Griik aaliin ni, bi ḥjmee ke “talenti ḥjichur kipiik.” Ni ga fuu unii aapal ki ti saa ḥjibin kipiik ni ḥjirmu la.

<sup>38:19:4</sup> : Lik Mpiin 1.27; 5.2.

\*<sup>19:5</sup> : Lik Mpiin 2.24.

dana wee na, waa tii bi nsan kina. <sup>9</sup>M tuk nimi la, upii yaa kaa gør kidagook, aan uchal jenn u lii ki ki yoor upii uken kan, uja ngbaan kpalm udagoor la. [Upii aachal yaa jenn u lii, uja uken yaa yoor upii ngbaan kan, uja ngbaan kpalm udagoor la.]

<sup>10</sup>Le Yesu aadidiliib bui u, “Uja ni upuu aabor yaa ye kina kan, uja yaa kaa yoor upii kan, ni soor.”

<sup>11</sup>Le Yesu bui bi, “Bijab mɔmɔk aan ɔjmaa gaa naah len pu na ki yii bipoob mɔmɔk. Bijab bi Uwumbor tii bi mpɔɔn ke bi yii bipoob na, bima le ga ɔjmaa yii bi. <sup>12</sup>Bibaa bi, baah ma bi na, baa ye bijab. Bibaa mu bi, bi kpaa bi la. Bibaa mu bi, ki yii bipoob mɔmɔk Uwumbor aanaan aatuln pu. Uja umɔk ga ɔjmaa gaa tibor ngbaan ki yii bipoob mɔmɔk na, u gaa ti.”

### Yesu aah ɔja Uwumbor aanyoor ki ɔja mbim pu pu na

(Mak 10.13-16; Luk 18.15-17)

<sup>13</sup>Le binib joo ni mbim ki di dan Yesu chee ke u nan di ɔujaal paan bi pu, ki mee

Uwumbor tii bi. Le waadidiliib kae bi.

<sup>14</sup>Le Yesu bui bi, “Cha mbim ngbaan dan m chee man. Taa ki jenn bi man. Binib bi aabimbin bi ke mbim aah bi pu na, bima le yeh Uwumbor aanaan.”

<sup>15</sup>Le u di ɔujaal paan bi pu, le ki siir nima.

### Yesu aah tuk uwankpadaan ubaa pu na

(Mak 10.17-31; Luk 18.18-30)

<sup>16</sup>Unachipɔɔn ubaa nan dan Yesu chee le ki nan baa u, “Umɔmɔkr, m ga tun litunyaan bayaar aan ki kan limɔfal li kaa kpa ndoon na?”

<sup>17</sup>Le Yesu baa u, “Ba pu aa baa mi litunyaan pu? Uwumbor baanja le ɔjan.

Aa yaa ban limɔfal li kaa kpa ndoon na kan, kii waakaal.”

<sup>18</sup>Le u ki baa u, “Mulakaal?”

Le Yesu bui u, “Taa ku binib; taa gør kidagook; taa su kinaayuk; taa li ye nnyamɔn aaseeraadaan; <sup>19</sup>li pak aate ni aana; <sup>†</sup> li gee aana aabo ke saah gee aabaa pu na.”<sup>‡</sup>

<sup>20</sup>Le unachipɔɔn ngbaan bui u, “M joo ikaal imina mɔmɔk tibir ni la. Ba gur?”

<sup>21</sup>Le Yesu bui u, “Aa yaa ban ke aa li bi mbamɔm kan, buen ti kooh saah kpa tiwan nimɔk na, ki di ɔjimobil ngbaan di tii bigiim, aan ki li kpa liwangol paacham, aan ki dan nan dii mi.”

<sup>22</sup>Unachipɔɔn ngbaan aah ɔjun kina na, le ni ɔja u mpombiin; ba pu? u nan kpa liwankpal sakpen a. Le u siir nima.

<sup>23</sup>Le Yesu bui waadidiliib, “M tuk nimi mbamɔn la, ni pɔɔ uwankpadaan koo Uwumbor aanaan ni. <sup>24</sup>Cha m moo tuk nimi man, uwankpadaan aah ga koo Uwumbor aanaan ni pu na, ni pɔɔ jer laakumii aah ga koo seerkaa aaboln ni pu na.”

<sup>25</sup>Waadidiliib aah ɔjun kina na, le ni gar bi pam. Le bi baa u, “Ni yaa ye kina kan, ɔjma ga tee ɔjmar?”

<sup>26</sup>Le Yesu lik bi le ki bui bi, “Ni pɔɔ binib le chee. Nibaa aa pɔɔ Uwumbor chee.”

<sup>27</sup>Le Piita bui u, “Lik, ti nan di timi aawan mɔmɔk di lii ki dii si. Ti ga kan ba aanyoor?”

<sup>28</sup>Le Yesu bui bi, “M tuk nimi mbamɔn la, min Unibɔn Aabo ga kal libɔrjal pu, ki kan mpakm sakpen dulnyaapɔɔn ponn ni. N-yoonn ngbaan, nimi bi dii mi na mu ga kal ɔjibɔrjal kipiik ni ɔjilee pu, ki ga ji Israel yaab aanibol kipiik ni ɔjilee tibɔr. <sup>29</sup>Unii umɔk di cha waadichal, bee ukpetiib, bee unaatiib, bee uninkpatiib, bee ute, bee una, bee waabim, bee ti-

<sup>†</sup>19:19 : Lik Nnyam 20.12-16; Ikaal 5.16-20.

<sup>‡</sup>19:19 : Lik Liifai Yaab 19.18.

sar, maayimbil pu na kan, u ga kan kina nfum nkub, ki ga li kpa limɔfal li kaa kpa ndoon na.<sup>30</sup> Tɔ, binib bi ye bisalolm na pam ga nan ɔa puwɔb yaab. Binib bi ye puwɔb yaab na pam ga nan ɔa bisalolm.”

### Ukpaal aah pa paatiib pu na

**20** “Uwumbɔr aanaan naahn ukpaal u nan pue kichakpinaanyeek ni u ti ban paatiib bi nan tun waasaak ni aatuln na la.<sup>2</sup> Waah kan njan yaab bi na, u nan tuk bi, ‘M ga pa nimi tikunabr aamombil libaa nwiin ni mu aalirn.’<sup>4</sup> Bi nan kii tii waah siin bi pu na. Le u mɔk bi waasaak ponn ni.<sup>3</sup> Le ni saa tikur ti-wae yoonn, le u ki buen kinyaj ni ki ti mui bijab bibaa si nima, kaa kpa lituln libaa.<sup>4</sup> Le u bui bi, ‘Buen maasaak ponn ni ki ti tun man. Naah tun pu na, m ga pa nimi kina la.’<sup>5</sup> Le bi buen. Nwiin aah ti saa sisik ni na, le u ki gir buen kinyaj ni, le ki ti ki mui bijab bibaa mu si nima. Le u tuk bi mu kina. Nwiin aah ti kpar na, le u ki gir buen kinyaj ni, le ki ti ɔa kina.<sup>6</sup> Nwiin aah ti taln ɔitaa ki ban mu lir na, le u ki gir buen kinyaj ni, le ki ti ki mui bijab bibaa mu si nima. Le u baa bi, ‘Ba pu ni si kina nwimɔn, kaa tun nibaa?’<sup>7</sup> Le bi bui u, ‘Taa kan unii u ga tii timi lituln aan ti tun na.’ Le u bui bi, ‘Ni mu li cha maasaak ponn ni, ki ti tun man.’

<sup>8</sup> “Nwiin aah lir kijoobɔŋ na, le ukpaal ngbaan tuk bitutum aaninkpel, ‘Yin ni paatiib ngbaan ki nan pa bi baapal. Piin ki pa bijab bi gbiln puwɔb na, aan ki ti pii bisalolm.’<sup>9</sup> Le bijab bi gbiln puwɔb na aah dan bi nan gaa baapal na, u pan bi tikunabr aamombil libaabaa.<sup>10</sup> Bisalolm aah dan bi nan gaa baapal na, bi dak ke bi ga kan ki jer puwɔb yaab na, le u pan bi mu tikunabr aamombil libaabaa.<sup>11</sup> Baah gaa baapal na, le bi ɔul ukpaal ngbaan pu,<sup>12</sup> ki len ke, ‘Bijab bi gbiln

puwɔb na tun kikurk kibaa baanja la. Timi le boo ko nwimɔn. Ntoton ɔun timi la. Le ti ni baapal ki ɔjak.’

<sup>13</sup> “Le ukpadaan bui bi ponn ni ubaa, ‘Njɔ, maa jin si pem pem. Aa ba kii ke aa ga gaa tikunabr aamombil libaa la. Naa ye kina aa?<sup>14</sup> Yoor saamombil ki li chaa kun linampal. M ban m tii puwɔb yaab ke maah tii si pu na la.<sup>15</sup> Maa kpa nsan ke m di maamombil ɔa maah gee pu na aa? Maah kpa tibulchinn pu na le cha aa kpa lipiipoln aa?”

<sup>16</sup> “Liyatanjakl liminaaatataa le ye ke puwɔb yaab ga nan ɔa bisalolm. Bisalolm mu ga nan ɔa puwɔb yaab.”

### Yesu aah ki len waakun aabɔr taataa pu na

(Mak 10.32-34; Luk 18.31-34)

<sup>17</sup> Yesu ni waadidiliib ni kinipaak nan cha Jerusalem. Waah cha na le u di waadidiliib kipiik ni bilee na nyan n-gbaan, le ki bui bi,<sup>18</sup> “Li pel man, ti yaa ti fuu Jerusalem kan, bi ga di min Unibɔn Aabo ɔa Uwumbɔr aatotoorninkpiib ni Uwumbɔr aakaal aamɔmɔkb aanjaal ni, le bi ji mi tibɔr, ki ga len ke ni ɔneer bi ku mi,<sup>19</sup> le ki ga di mi ɔa binib bi kaa ye Juu yaab na aanjaal ni ke bi yook mi, ki lue mi ɔjinaalab, ki kpaa mi ndɔpuinkoo pu. Le iwiin itaadaal Uwumbɔr ga fikr mi nkun ni.”

### Waadidiliib ponn ni bilee aana aah mee u pu na

(Mak 10.35-45)

<sup>20</sup> N-yoonee ngbaan le Sebedee aa-japɔtiib bilee na, ni bina, nan dan Yesu chee, le bina nan gbaan unimbiin ni, ki doon u, ki mee u ke u ter u.

<sup>21</sup> Le u baa u, “Aa ban ba?”

Le u bui u, “Aa yaa jin saanaan kan, cha njapɔtiib bilee ngbaan li ka aa chee,

<sup>20:2</sup> : Griik aaliin ni, bi ɔjmee ke “denarius ubaa.” Ni nan ye nwiin mubaa aapal la.

ubaa li ka aanjangii wob, uken mu li ka aanjangan wob."

<sup>22</sup> Le Yesu bui binachipom ngbaan, "Naa nyi naah mee mi pu na aatataa. Ni ga njmaa ji falaa ke maah ga ji pu na aa?"

Le bi bui u, "Ti ga njman."

<sup>23</sup> Le u bui bi, "Ni mu ga sil ji falaa ke maah ga ji pu na. Binib bi ga kal njangang ni njangan wob na ma kan, naa ye min le ga lee bi. Nte Uwumbor le leer binib bi ga kal nima chee na."

<sup>24</sup> Le waadidiliib kipiik bi gur na aah njun Sebedee aajapotiib aah bui Yesu pu na, bi gee lijuul bi pu. <sup>25</sup> Le Yesu yin bi momok ke bi dan u chee, le ki nan bui bi, "Ni nyi ke dulnyaa ni aanib aayidam yoor bibaa paacham la. Binib bi kpa tininkpir na mu joo baanib mpocoen pu la. <sup>26</sup> Nima taa li bi kina man. Ni ponn ni ubaa yaa ban ke u li ye uninyuun kan, u ja ubaa ni momok aatutunn. <sup>27</sup> Ubaa yaa ban ke u li ye usaloln kan, u ja ubaa ni momok aanaagbijja, <sup>28</sup> ki li bi ke min Unibon Aabo aah bi pu na; maa dan dulnyaa wee ni ke bi nan tun lituln tii mi, m dan ke m nan tun lituln tii binib, ki kpo ke m gaa binib pam lii la."

### Yesu aah likr bijoom bilee aanimbil pu na

(Mak 10.46-52; Luk 18.35-43)

<sup>29</sup> Yesu ni waadidiliib nan nyan Jeriko aatiij ponn ni. Le kinipaak sakpej dii bi.

<sup>30</sup> Baah cha na, le bijoom bilee ka nsan aamogbeln, le ki njun ke Yesu ban u jer. Le bi tar ke, "Tidindaan u ye Ubor David Aayaabil na, san timi kinimbaak."

<sup>31</sup> Le kinipaak ngbaan kae bi ke bi njmin. Le bi moo tar ke, "Tidindaan u ye Ubor David Aayaabil na, san timi kinimbaak."

<sup>32</sup> Le Yesu sil nsan ni, ki yin bi ke bi dan, le ki nan baa bi, "Ni ban ba?"

<sup>33</sup> Le bi bui u, "Tidindaan, ti ban ke aa likr tinimbil tii timi la."

<sup>34</sup> Le kinimbaak chuu Yesu. Le u meeh binimbil. Libuul ngbaan ni le binimbil likr, le bi dii u.

**Jerusalem aanib aah nyun Yesu pu na**

(Mak 11.1-11; Luk 19.28-40; Jnn 12.12-19)

**21** Bi nan peen Jerusalem, ki fuu Be-fej aatiij, ki bi lijool li bi yin li ke Olif aasui aajool na paab. Baah ti fuu nima chee na, <sup>2</sup> le Yesu bui waadidiliib ponn ni bilee, "Li cha man naah si gbok kitij ki na ni. Ni yaa koo ki ponn ni kan, libuul ngbaan ni, ni ga kan ubon si gbin, waabo si u chee. Chuu gbiln ubon ngbaan, ki li joo ni u ni waabo m chee man. <sup>3</sup> Unii ubaa yaa len tibaa kan, ni bui u, 'Tidindaan le ban i,' le u ga cha ni li joo ni i libuul ngbaan ni."

<sup>4</sup> Nimina le gbiin Uwumbor aabonabr aah nan len pu na ke,

<sup>5</sup> "Tuk Sionn aatiij aanib, Lik, nimi aaborkpaan choo ni chee la. U sunn ubaa taab le ki dik ubon pu, u dik ubon u laa diin na pu la."<sup>§</sup>

<sup>6</sup> Le Yesu aadidiliib buen ki ti ja waah len pu na, <sup>7</sup> ki joo ni ubon ngbaan ni waabo, le ki di baakeken paan u pu. Le Yesu dij u pu. <sup>8</sup> Kinipaak ngbaan nan di baakeken ter nsan ponn ni. Bibaa mu bar tisufar ki di ter nsan ponn ni. <sup>9</sup> Le binib bi loln u pu nsan na, ni binib bi paa puwob na nan bi tar ke, "Hosiana,"<sup>\*\*</sup> pakn Ubor David Aayaabil man. Uwumbor ja tinyoor ja unii u choo waayimbil ni na pu. Hosiana bi paacham."<sup>††</sup>

<sup>§</sup>21:5 : Lik Sekaria 9.9.

<sup>\*\*</sup>21:9 : Hosiana aatataa le ye ke "gaa timi lii."

<sup>††</sup>21:9 : Lik Ilahn 118.25, 26.

<sup>10</sup> Yesu aah fuu Jerusalem ni na, le kitij ngbaan aanib momok fii ki bi baa tɔb, “Ijma ye umina?”

<sup>11</sup> Le kinipaak ngbaan bui bi, “U ye Uwumbor aabonabr Yesu u nyan ni Nasaref aatiq ki bi Galilee aatiq ponn ni na la.”

**Yesu aah toor  
Uwumbor Aadichal pu na**  
(Mak 11.15-19; Luk 19.45-48; J̄nn 2.13-22)

<sup>12</sup> Yesu nan ti koo Uwumbor Aadichal ni, le ki jenn nyan binib bimok kooh tiwan ki daa tiwan li ponn ni na, ki labr bilikpelm aateebul mam chij, le ki labr binib bi kooh qinajel na mu aajal ki di chij, <sup>13</sup> le ki bui bi, “Ni qmee Uwumbor Aagbaq ni ke Uwumbor len ke, ‘Bi ga yin Maadichal ke Mmeen Aadichal la;’ nimi le qjani li bififirb aakakaa chee.”<sup>\*\*</sup>

<sup>14</sup> Bijoom ni biwob nan dan Yesu chee Uwumbor Aadichal ni, le u cha bi poɔk. Le mbim mu bi Uwumbor Aadichal ni na tar ke, “Hosiana, pakn Ubɔr David Aayaabil man.” <sup>15</sup> Uwumbor aatotoorninkpiib ni Uwumbor aakaal aamɔmɔkb aah qjun kina, ki kan Yesu aah tun lijinjiir aatun pu na, le bi gee lijuul, <sup>16</sup> le ki baa Yesu ke, “Saa qjun mbim ngbaan aah len pu na aa?”

Le Yesu bui bi ke, “M qjun. Naa kee karn Uwumbor Aagbaq ni ii? ke, ‘Mbim ni mbipɔm ga pak Uwumbor mbamɔm.’”<sup>\*\*\*</sup>

<sup>17</sup> Yesu aah len kina na, le u siir cha bi, le ki nyan Jerusalem, ki buen Betani aatiq ni, u ti doon nima.

**Yesu aah len tibɔbir  
busub bubaa pu na**  
(Mak 11.12-14, 20-24)

<sup>18</sup> Naah ki woln kitaak na, le u gir buen Jerusalem. Waah cha na, le nkong joo u.

<sup>19</sup> Le u kan likakaln si nsan aamɔgbeln, le ki buen bu taab, kaa kan lisubil libaa bu pu, see tifar qjemeen. Le u bui busub ngbaan, “Saan ki lu qjisubil n-yoonn mu kaa kpa ndoon na.” Libuul ngbaan ni le busub ngbaan momok kuur.

<sup>20</sup> Waadidiliib aah kan kina na, le ni gar bi pam. Le bi baa ke, “Ba pu busub ngbaan kuur mala kina?”

<sup>21</sup> Le Yesu bui bi, “M tuk nimi mbamɔn la, ni yaa gaa Uwumbor ki kii, kaa joo beeni kan, ni mu ga qjamaa ja kina. Naa ye nimina baanja le ni ga ja. Ni yaa po bui lijool limina ke li fii ki ti lir nnyusakpem ni kan, ni ga ja kina. <sup>22</sup> Ni yaa mee Uwumbor ki yaa pak ke u ga ja naah mee u pu na kan, u ga ja kina tii nimi.”

**Baah baa Yesu waatuln pu pu na**  
(Mak 11.27-33; Luk 20.1-8)

<sup>23</sup> Yesu nan koo Uwumbor Aadichal ni, le ki tuk binib Uwumbor aabɔr. Waah qjani kina na, le Uwumbor aatotoorninkpiib ni Juu yaab aaninkpiib dan u chee ki nan baa u, “Aa kpa nsan ke aa ja saah qjani pu na aa? Ijma tii si nsan ngbaan?”

<sup>24</sup> Le u bui bi, “M mu ga baa nimi mbaan. Ni yaa qjamaa gar kan, m mu ga tuk nimi maah kpa nsan pu ki qjani maah qjani pu na. <sup>25</sup> J̄nn aah nan muin binib nnyun ni na, qjma nan tii u nsan? Uwumbor aan binib?”

Le bi kpokl tɔb ke, “Ti yaa bui ke Uwumbor le tii u nsan kan, u ga baa timi ke ba ja taa nan gaa u ki kii. <sup>26</sup> Ti yaa ki

<sup>\*\*</sup>21:13 : Lik Aisaya 56.7; Jeremia 7.11.

<sup>\*\*\*</sup>21:16 : Lik Ilahn 8.2.

len ke binib le tii u nsan kan, ti san kini-paak ngbaan ijawaan baah ga ja timi pu na la; ba pu? bi momok len ke Jonn nan ye Uwumbor aabonabr la.”<sup>27</sup> Nima le bui Yesu, “Taa nyi.”

Le Yesu bui bi, “M mu aan tuk nimi maah kpa nsan pu ki jani maah jani pu na.”

### **Binachipom bilee aayatajaml**

<sup>28</sup> “Dakl lik man maah ga tuk nimi pu na aatataa. Uja ubaa nan kpa japoatiib bilee, le ki dan nan bui u ye upol na, ‘Maabo, buen kisaak ponn ni din ki ti tun.’ Le u bui u,<sup>29</sup> ‘Maan buen.’ Naah kpee siib na, le u jer waalandak ki buen kisaak.<sup>30</sup> Le uja ngbaan buen uwaatiir mu chee le ki bui u, ‘Maabo, buen kisaak ponn ni din ki ti tun.’ Le u bui u, ‘Maaninkpel, m ga buen,’ ki mu aa buen.<sup>31</sup> Mbim bilee ngbaan ponn ni, ulau ja bite aageehn?”

Le bi bui u, “Njan yoo.”

Le u bui bi, “M tuk nimi mbamona, bilampoogaab ni bipiidagoob koo Uwumbor aanaan ni, ki cha nimi.<sup>32</sup> Ba pu? Jonn nan dan ni chee ki nan tuk nimi nsan mu jan na. Le naa gaa u ki kii. Bilampoogaab ni bipiidagoob le gaa u ki kii. Ni nan kan baah gaa u ki kii pu na, le naa kpeln nimi aabimbin, kaa gaa u ki kii.”

### **Bikpaab bi kaa jan na aayatajaml**

(Mak 12.1-12; Luk 20.9-19)

<sup>33</sup> “Li pel man liyatajaml liken. Udichadaan ubaa le nan bi le ki naan kisaak, le ki jum isui i lu jisubil na ki ponn ni, le ki di ido gob kisaak ngbaan, le ki gbii libuul li bi ga di jisubil ja li ponn ni na aan ki mueni nyani jaanyun na, le ki maa libimbifofej ke unii li ka li paab ki kiir kisaak ngbaan, le ki yin bikpaab bibaa, le ki di kisaak ngbaan

ja bijaal ni, ke bi li lik ki. Isui ngbaan yaa nan lun jisubil kan, bi ker ki tii u, aan ki ker bibaa mu. Waah ja kina na, le u siir ki buen kitij ki daa na ni.<sup>34</sup> Buyoonn jisubil nan puir na, le u di waatatum tun bikpaab ngbaan chee, bi ti gaa ni waasubil kisaak ngbaan ponn ni, ki li joo ni.<sup>35</sup> Le bikpaab ngbaan ti chuu waatatum ngbaan, ki gbaa ubaa, ki ku ubaa mu, ki yur ubaa mu njitakpal u ti kpo.<sup>36</sup> Le usadaan ngbaan ki tun bitutum bi wiir ki jer njan yaab na. Le bikpaab ngbaan ja bi mu kina.<sup>37</sup> Kookoo yaan le u di ujapoon tun ni bi chee, le ki bui ke ‘Bi ga pak uma la.’<sup>38</sup> Bikpaab ngbaan aah kan waabo ngbaan na, le bi bui tsb, ‘Uma le ye waafaajil. Cha ti ku u man aan ki ji waafaal.’<sup>39</sup> Le bi chuu u, ki di nyan n-gbaan, le ki ti ku u.

<sup>40</sup> “Kina pu na, usadaan yaa nan fuu ni kan, u ga ja bikpaab ngbaan kinye?”

<sup>41</sup> Le bitotoorninkpiib ni Juu yaab ngbaan bui ke, “Uga sil ku titunwanbirdam ngbaan, ki di kisaak ngbaan tii bikpaab bi ga li bilni u waasubil jibin momok na.”

<sup>42</sup> Le Yesu baa bi, “Naah kee karn Uwumbor Aagban aah len pu na aa? ke, ‘Litakpal li bidimaab yii li na, lima le ye litakpajal.

Uwumbor le ja kina, le ni gar timi pam.”<sup>§§</sup>

<sup>43</sup> “M tuk nimi la, Uwumbor ga nyan ni chee waanaan, ki di tii linibol li ga dii waah ban pu na. [<sup>44</sup> Unii u lir litakpal ngbaan pu na, u ga kool. Unii u litakpal ngbaan lir u pu na, li ga nan u ke ntayon na.]”

<sup>45</sup> Uwumbor aatotoorninkpiib ni Farisii yaab aah jum kina na, le bi bee ke Yesu di liyatajaml ngbaan jan bima la.<sup>46</sup> Le bi ban ke bi chuu u, ki mu san kinipaak ngbaan ijawaan; ba

pu? kinipaak ngbaan len ke Yesu ye Uwumbor aabonabr la.

### Unii u ja ubondinn aajikaar na aayatajakl

(Luk 14.15-24)

**22** Le Yesu ki ḥakl bi liyatanjakl ke, <sup>2</sup>“Uwumbor aanaan naahn uborkpaan u ja ubondinn aajikaar ki tii ujapco, <sup>3</sup>ki tun waatutum ke bi yin binib bi u ban ke bi dan nan ji na. Baah yin bi na, le bi yii, kaa dan. <sup>4</sup>Le u ki tun bitutum biken ke bi ti yin bi ki tuk bi, ‘Uborkpaan len ke u gor tijikaar mɔmɔk doo a. U kɔr inaaja ni tiwakor ti filk na, ki gor tiwan mɔmɔk doo a,’ ke bi dan. <sup>5</sup>Le baa gar waatutum. Bi nan beenin tun baatuln; ubaa nan buen kisaak, uken mu buen u ti tiir kitir. <sup>6</sup>Bi gur na chuu bitutum ngbaan, ki gbaa bi ki ku bi. <sup>7</sup>Le uborkpaan ngbaan gee lijuul sakpen, le ki tun waajab le bi ti ku binikurb ngbaan, le ki see baatiq mmii. <sup>8</sup>Le u bui waatutum, ‘Ubondinn aajikaar gor a. Binib bi m yin bi na aa neer bi ji tijikaar ngbaan. <sup>9</sup>Li cha kitij ponn ni aasan ni man, ki ti yin ni naah ga kan binib bimok na, bi dan ki nan ji ubondinn aajikaar ngbaan.’ <sup>10</sup>Le waatutum buen kitij ponn ni aasan ni, ki ti yin ni baah kan bi na mɔmɔk, binib bi ḥjan na ni bi kaa ḥjan na mɔmɔk. Le bi nan gbiin kidiik ki bi ji tijikaar ki ponn ni na.

<sup>11</sup>“Le uborkpaan ngbaan koo ni u nan lik binib bi dan bi nan ji tijikaar ngbaan na, le ki kan uja u kaa pee tibondinn aawanpeenkaan na. <sup>12</sup>Le uborkpaan ngbaan baa u, ‘Njo, aa ja kinye ki koo ni do, kaa pee tibondinn aawanpeenkaan?’ Le u si ḥmin. <sup>13</sup>Le uborkpaan ngbaan bui waatutum ke bi chuu u, ki buu uŋjaal ni utaa, ki nyan u, ki ti di mee lii lipaal mbɔmbɔɔn ni. U ga wii ki ḥmo ḥjinyin nima chee.

<sup>14</sup>“Liyatanjakl ngbaan aatataa le ye ke baah yin bi na wiir, le baa nyan bi na aa wiir.”

### Baah pen Yesu nlan pu na

(Mak 12.13-17; Luk 20.20-26)

<sup>15</sup>Le Farisii yaab buen bi ti kpokl baah ga peei Yesu nlan pu aan ki chuu u na.

<sup>16</sup>Le bi tun baadidiliib ni Ubɔr Herod aanib bibaa Yesu chee, le bi ti bui u, “Umɔmɔkr, ti bee ke aa len mbamɔn la, ki mɔk timi Uwumbor aasan mbamɔm, kaa san unii ubaa ijawaan, kaa pak ubaa ki jer ukен. <sup>17</sup>Tuk timi saah dak pu na. Ni ḥjan ti pa lampoo ki tii Uborkpaan Siisa aan naa ḥjan?”

<sup>18</sup>Le Yesu bee baah bir pu na, le ki baa bi, “Nimi bijmajmannim, ba ja ni tɔŋ mi? <sup>19</sup>Mɔk mi lampoo aamombil.”

Le bi joo ni limombil nan mɔk u. <sup>20</sup>Le u baa bi, “Ijma aanaaj ni liyimbil bi li pu?”

<sup>21</sup>Le bi bui u, “Siisa yaan.”

Le u bui bi, “Nima pu na, di ni ye Siisa yaan na, ki di tii u man, ki di ni ye Uwumbor yaan na, ki di tii Uwumbor.”

<sup>22</sup>Baah ḥjun kina na, le ni gar bi pam. Le bi di cha u ki Buen.

### Binib bi ga fikr nkun ni na aah ga li bi pu na

(Mak 12.18-27; Luk 20.27-40)

<sup>23</sup>Liyaadaal ngbaan le Sajusii yaab dan u chee. Bima le len ke binib aan fikr nkun ni. <sup>24</sup>Le bi bui u, “Umɔmɔkr, Moses nan len ke uja yaa kpo, kaa kpa mbim kan, unaal di ukpoppii ngbaan kpan, ki maa mbim tii ukpel.\* <sup>25</sup>Naabitiib bilole nan bi ti ponn ni. Le upol din upii, ki kpo, kaa kpa ubo. Le unaal di ukpoppii ngbaan kpan, <sup>26</sup>ki mu kpo, kaa kpa ubo. Le u paa u pu na mu ja kina. Le bimok bilole kpan upiibaan, ki kpo doo, kaa kpa ubo. <sup>27</sup>Kookoo yoo, le ukpoppii ng-

\*22:24 : Lik Ikaal 25.5.

baan mu kpo. <sup>28</sup>Kina pu na, binib yaa nan fikr nkun ni kan, upii ngbaan ga li ye njma aapuu? Bi mɔmɔk bilole nan joo u la.”

<sup>29</sup>Le Yesu bui bi, “Naa bee Uwumbor Aagbaŋ aah len pu na, kaa bee Uwumbor aah kpa mpɔɔn pu na. Nima le cha ni yenn nimi aaliin ni. <sup>30</sup>Binib yaa nan fikr nkun ni kan, baan yoor bipiib, bipiib mu aan mɔn bijab. Bi ga li bi ke Uwumbor aatuuntiib bi bi paacham na aah bi pu na la. <sup>31</sup>Joo cha binib aah ga fikr nkun ni pu na aabor kan, naa karn Uwumbor aah nan len pu na aa? <sup>32</sup>ke uma le ye Abraham, ni Aisak, ni Jakob Aawumbor.<sup>†</sup> Uwumbor yaa len ke u ye binib bi kpo na Aawumbor kan, nima le mɔk ke bi kpa limɔfal.”

<sup>33</sup>Kinipaak ngbaan aah ḥun Yesu aah tuk bi pu na, le ni gar bi pam.

### Mulakaal ye nkaalkpaan?

(Mak 12.28-34; Luk 10.25-28)

<sup>34</sup>Le Farisii yaab ḥun ke Yesu len tibɔr ki jin Sajusii yaab. Le bi kuun ki dan Yesu chee. <sup>35</sup>Le bi ponn ni ubaa, u nyi Uwumbor aakaal mbamɔm na, ban ke u pen Yesu nlan, le ki baa u, <sup>36</sup>“Umɔmɔkr, Uwumbor aakaal ponn ni, mulakaal jer ikaal mɔmɔk?”

<sup>37</sup>Le Yesu bui u, “Aa li gee Aadindaan Uwumbor aasui mɔmɔk ni, ni saawiin mɔmɔk, ni saalandak mɔmɔk.”<sup>‡</sup> <sup>38</sup>Nkaal mumina le ye nkaalkpaan ki jer ikaal mɔmɔk. <sup>39</sup>Leler aakaal naahn nkaal ngbaan la, ‘Aa li gee aana aabo ke saah gee aabaa pu na.’<sup>¶</sup> <sup>40</sup>Moses aakaal mɔmɔk, ni Uwumbor aabɔnabr aabor mɔmɔk si ikaal ilee yee le pu.”

### Kristo u ga gaa binib lii na aabor

(Mak 12.35-37; Luk 20.41-44)

<sup>41</sup>Farisii yaab aah kuun tɔb chee pu na, le Yesu baa bi mbaan mubaa ke,

<sup>42</sup>“Kristo u ga gaa binib lii na aabor pu, ni dak kinye? ḥjma aayaabil ye u?”

Le bi bui u, “David aayaabil ye.”

<sup>43</sup>Le u baa bi, “Kristo ngbaan yaa ye David aayaabil kan, ba pu Uwumbor Aafuur Nyaan nan cha David yin u ke Udindaan? David nan len ke,

<sup>44</sup>‘Uwumbor bui Ndindaan ke: Kal ḥŋjangii wɔb,  
ki ti saa buyoonn m ga nyaj saadim mɔmɔk na.’<sup>§</sup>

<sup>45</sup>Tɔ, David aah nan yin Kristo ngbaan ke Udindaan kina na, Kristo ga li ḥmaa ye uyaabil aa?”

<sup>46</sup>Yesu aah baa bi kina na, le ubaa aa ḥmaa gar mbaan ngbaan, ki mu aa ki kaa bi baa u mbaan muken daalbaadaal.

### Bi li nyi Uwumbor aakaal aamɔmɔkb ni Farisii yaab aabor

(Mak 12.38-39; Luk 11.43, 46; 20.45-46)

**23** Yesu nan bui kinipaak ngbaan ni waadidiliib, <sup>2</sup>“Uwumbor aakaal aamɔmɔkb ni Farisii yaab tuk nimi Moses aakaalaatataa. <sup>3</sup>Nima pu na, baah tuk nimi pu na mɔmɔk, ni kii kina man, ki li ḥjani kina. Ni mu taa ḥakni baah tun pu na. <sup>4</sup>Bi mɔk nimi ni ḥjan na la, kaa dii ni. Bi di nkaal mu pɔɔ sakpen na, le ki di kpee Uwumbor aakaal pu, ki tuk binib ke bi li dii kina. Bima bibaa aa ter bi ke bi dii kina. <sup>5</sup>Baah tun pu na mɔmɔk, bi ban ke binib kan aan ki pak bi. Bi di Uwumbor aabor tam biyigbeer pu, ki ḥja baabɔkur aamɔgbeln ni fɔk, ke binib kan aan ki pak bi. <sup>6</sup>Bi gee

<sup>†</sup>22:32 : Lik Nnyam 3.6.

<sup>‡</sup>22:37 : Lik Ikaal 6.5.

<sup>¶</sup>22:39 : Lik Liifai Yaab 19.18.

<sup>§</sup>22:44 : Lik Ilahn 110.1.

ke bi kal bininyuum aakakaa yaan njim chee, ni mmeen aadir ni,<sup>7</sup> ki gee ke binib doon bi mbamom kinyaq ni, ki yin bi ke ‘Umɔmɔkr.’<sup>8</sup> Nimi, ni taa li ban ke binib yin nimi ke ‘Umɔmɔkr;’ ba pu? ni kpa Umɔmɔkr ubaa baanja la. Ni mɔmɔk ye naabitiib la.<sup>9</sup> Ni taa yin ubaa ke ‘Nite’ dulnyaa wee ni; ba pu? ni kpa te ubaa la, le u bi paacham.<sup>10</sup> Ni taa li ban ke ubaa yin nimi ke Dindaan; ba pu? ni kpa dindaan ubaa la. Uma le ye Kristo u gaa binib lii na.<sup>11</sup> Ni ponn ni ubaa yaa ban ke u li ye usaloln kan, u li ye nimi aatutunn.<sup>12</sup> Unii umɔk nyuj ubaa na, Uwumbɔr ga sunn u taab. Unii umɔk sunn ubaa taab na, Uwumbɔr ga nyuj u.”

### Tibɔbir ga li bi bijmajmannim pu

(Mak 12.40; Luk 11.39-42,  
44, 52; 20.47)

<sup>13</sup> “Nimi Uwumbɔr aakaal aamɔmɔkb ni Farisii yaab, bi ye bijmajmannim na, tibɔbir bi ni pu; ni kiir binib ke bi taa koo Uwumbɔr aanaan ni. Nimi nibaa aa koo ni, ki mu aa kii ke binib bi ban bi koo ni na koo ni.

[<sup>14</sup> “Nimi Uwumbɔr aakaal aamɔmɔkb ni Farisii yaab, bi ye bijmajmannim na, tibɔbir bi ni pu; ni ji bikpopiib pem pem, le ki mee Uwumbɔr ni yunni, ni ɔmanni ke ni ye bininyaam. Nima pu na, Uwumbɔr ga daa nitafal ki jer waah ga daa biken aatafal pu na.]

<sup>15</sup> “Nimi Uwumbɔr aakaal aamɔmɔkb ni Farisii yaab, bi ye bijmajmannim na, tibɔbir bi ni pu; ni puur nnyusakpem ki chuun ntim mɔmɔk ni ke ni kan unii ubaa ki ɔja u nimi aadidiir. Ni yaa ti kan u kan, le ni ɔja u titunwanbirdaan ki jer nimi nibaa aah ye pu na.

<sup>16</sup> “Nimi bisanmɔkb bi jɔb na, tibɔbir bi ni pu; ni len ke ‘Unii yaa puu Uwumbɔr aadiik pu kan, naa ye nibaa, ke u yaa puu ilik i bi ki ni na pu kan, see u gbiin tipuur ngbaan.’<sup>17</sup> Nimi bijɔrb bi

jɔb na, nilani jer niken, ilik ngbaan le aan Uwumbɔr aadiik ki ɔja ilik ngbaan chain na?<sup>18</sup> Ni ki len ke ‘Unii yaa puu Uwumbɔr aatork aabimbiln pu kan, naa ye nibaa, ke u yaa puu ipiin i bi li paab na pu kan, see u gbiin tipuur ngbaan.’<sup>19</sup> Nimi bijoom, nilani jer niken, ipiin ngbaan le aan Uwumbɔr aatork aabimbiln li ɔja ipiin ngbaan chain na?<sup>20</sup> Nima pu na, unii yaa puu Uwumbɔr aatork aabimbiln pu kan, u puu tiwan nimɔk bi li pu na mu la.<sup>21</sup> Unii yaa puu Uwumbɔr aadiik pu kan, u puu Uwumbɔr u bi ki ni na mu la.<sup>22</sup> Unii yaa puu paacham pu kan, u puu Uwumbɔr aaborjal, ni Uwumbɔr u ka li pu na mu la.

<sup>23</sup> “Nimi Uwumbɔr aakaal aamɔmɔkb ni Farisii yaab, tibɔbir bi ni pu; ni yakr tikpifar nfum kipiik ki nyan nibaa na ki di tii Uwumbɔr, ki muk nibaa ke ni joo Uwumbɔr aakaal mumina, ki yii nkaal mu ye nkaalkpaan na. Ni yii, kaa ɔjani ni ɔjan na, kaa san binib kinimbaak, kaa dii Uwumbɔr mbamom. Ni ɔjan ke ni li joo nkaal ngbaan, ki yakr nimi aawan mu ki di tii Uwumbɔr.<sup>24</sup> Ni ye bisanmɔkb bi jɔb na la. Kisibirk waatiir yaa bi tiwanyukaan ni kan, ni yak nyani ki. Laakumi ma yaa bi kan, ni kpaan nyu laakumi ni tiwanyukaan mɔk la.

<sup>25</sup> “Nimi Uwumbɔr aakaal aamɔmɔkb ni Farisii yaab, bi ye bijmajmannim na, tibɔbir bi ni pu; ni ɔjir tiyir ni ɔjisambil aapuwɔb mbamom, kaa ɔjir ni ponn ni. Kina le ni ban ke binib bui ke ni ye bininyaam. Le nisui ponn ni gbii kinaayuk aatuln, ni iniman aatuln.<sup>26</sup> Nimi Farisii yaab bi jɔb na, puen nyan kinaayuk aatuln, ni iniman nisui ni waahr, aan lipaal yaan li ɔjan.

<sup>27</sup> “Nimi Uwumbɔr aakaal aamɔmɔkb ni Farisii yaab, bi ye bijmajmannim na, tibɔbir bi ni pu. Ni naahn ɔjikaakul ɔji bi di ikukuun aayon ki piir ɔji na la, le lipaal ɔjan, ponn ni mu gbii inikpab, ni tiwan ni bur na, ni tijɔj mɔk aabɔj.

<sup>28</sup>Ni mu bi kina la. Ni ɳmanni ke ni ye bininyaam la, le ni ponn ni gbii inyamɔn, ni titunwanbir.”

**Uwumbor aah ga daa  
biŋmajmannim aatafal pu na**

(Luk 11.47-51)

<sup>29</sup>“Nimi Uwumbor aakaal aamɔmɔkb ni Farisii yaab, bi ye biŋmajmannim na, tibɔbir bi ni pu; ni maa ɳikaakul ki tii Uwumbor aabɔnabtiib bi nan bi n-yaayoonn na, ki di ikukuun aayon ki piir bininyaam aakaakul, <sup>30</sup>le ki len ke ni yaa ba nan bi niyaajatiib yoonn ngbaan kan, naa ba ga ɳa baah nan ɳa pu ki ku Uwumbor aabɔnabtiib ngbaan na. <sup>31</sup>Naah len pu na le mɔk ke ni ye binib bi nan ku Uwumbor aabɔnabtiib ngbaan na aayaabitiib la. Nima le nimi aabor bii. <sup>32</sup>Niyaajatiib aah nan tun titunwanbir ti na, ni mu ga tun tima la, le ki ti doo. <sup>33</sup>Nimi iwaa, bi ye ijagen aabim na, ni ga ɳa kinye ki nya ntafadaan mu ga pii nimi, mmii mu kaan junn na ponn ni. <sup>34</sup>Nima pu le m ga tun ni Uwumbor aabɔnabtiib ni bilankpalb ni bimɔmɔkb ni chee. Le ni ga ku bibaa, ki kpaa bibaa mu idɔpuinkee pu, ki gbaa bibaa mu ɳinaalab nimi aameen aadir ni, ki ɳa bi falaa ntim mɔmɔk ni. <sup>35</sup>N-yoonn mɔmɔk binib nan ku bininyaam la. Njan bi nan ku Abel u nan ye uninyaan na, le ki ku bininyaam ki joo cha, ki ti pii Barakia aabo Sakaria, u bi nan ku u Uwumbor aadiik ni na. Bininyaam ngbaan mɔmɔk aakun pu, le ntafadaan ga pii nimi. <sup>36</sup>M tuk nimi mbamɔn la, ntafadaan ngbaan ga pii nimi dandana aanib la.”

**Yesu aah gee Jerusalem aanib pu na**

(Luk 13.34-35)

<sup>37</sup>“Jerusalem aanib, nsui bii ni pu la. Ni ku Uwumbor aabɔnabtiib, ki yur waatutum ɳitakpal ki ku bi. N-yoonn

mɔmɔk le m nan ban m kuun nimi ki di kpaan mbaa chee ke ukɔla aah kuuni waakoobi pu ki ɳjani uefen ni na, le naa kii. <sup>38</sup>Lik, Uwumbor siir cha nimi. <sup>39</sup>M tuk nimi la, naan ki kan mi ki nan saa bundaln ni ga bui ke ‘Uwumbor ɳa tinyoor ɳa unii u choo waayimbil ni na pu.’”\*\*

**Baah ga gbaa wii  
Uwumbor Aadichal pu na**

(Mak 13.1-2; Luk 21.5-6)

**24** Yesu nan nyan Uwumbor Aadichal ni. Waah nyan ki cha na, le waadidiliib dan ki nan mɔk u, “Lik Uwumbor Aadichal aah wiir pu na.” <sup>2</sup>Le u bui bi, “Ni kan tiwan nimina mɔmɔk aa? M tuk nimi la, bi ga nan gbaa wii lidichal limina mɔmɔk. Litakpal libaa aan ki li paa liken pu.”

**Falaa aayoonn aah ga li bi pu na**

(Mak 13.3-13; Luk 21.7-19)

<sup>3</sup>Le u buen ti kal Olif aasui aajool paab. Le waadidiliib dan u chee bibaa, ki nan bui u, “Tuk timi, bi ga ɳa kina bayoonn? Ba ga li ye limɔkl ki mɔk timi ke ni ɳjeer aa fuu ni, ki ɳjeer dulnyaa aadoon?”

<sup>4</sup>Le u bui bi, “Ni li nyi man, ubaa taa ɳmann nimi. <sup>5</sup>Binib pam ga nan dan ki nan pur maayimbil ke bima le ye Kristo u ga gaa binib lii na, ki ɳmann binib pam. <sup>6</sup>Ni ga ɳun ke binib to butɔb kɔnkɔni do, ni dandar mu. Ni taa cha ni li muk nimi man. Uwumbor le siin ke nimina mɔmɔk ga ɳa. Nima le aan mɔk ke dulnyaa wee ga doo libuul ngbaan ni. <sup>7</sup>Linibol libaa ga to linibol liken butɔb. Nnaan mubaa aanib ni nnaan muken aanib ga to tɔb butɔb. Nkon ga lir ntim pam ponn ni. Kitin ga deŋ ɳipepel pam. <sup>8</sup>Nimina mɔmɔk le ga li ye ɳjan aafalaa.

<sup>9</sup>“N-yoonn ngbaan bi ga chuu nimi, ki ɳa nimi falaa, ki ga ku nimi. M

\*\*23:39 : Lik Ilahn 118.26.

pu, le ɻjinibol mɔmɔk ga li nan nimi.  
<sup>10</sup>N-yoonn ngbaan le binib pam ga di maasan lii, ki ga kooh tɔb, ki ga li nan tɔb. <sup>11</sup>Le binib bi ɻjmanni ke bi ye Uwumbɔr aabɔnabiib na ga li wiir ki ɻjmanni binib pam. <sup>12</sup>Le titunwanbir ga li wiir. Nima le binib pam aan ki li gee mi ke baah nan gee mi njan pu na. <sup>13</sup>Unii umɔk ji limɔr ki dii mi ki ti saa limɔfal aadoon na, uma le ga ɻjmar. <sup>14</sup>Bi ga moon Uwumbɔr aanaan aabɔnyaan tee itingbaan kookoo ni waahr, aan ɻjinibol mɔmɔk ɻjnar, le dulnyaa ga nin doo.”

### Tiwan ni kaa ɻjan na aabor

(Mak 13.14-23; Luk 21.20-24; Daniel 9.27)

<sup>15</sup>“Ni ga kan tiwanbir ni bii tiwan nimɔk bi chain na si Uwumbɔr Aadichal ni, ke Uwumbɔr aabɔnabr Daniel aah nan len pu na.”† Tɔ, nimi bi karni na, ni li beer nimina aataata. <sup>16</sup>“N-yoonn ngbaan yaa nan fuu ni kan, binib bi bi Judea aatin ponn ni na, bi san buen ɻijoo paab. <sup>17</sup>Unii yaa bi kidiik paab‡ kan, u taa ki koo waadiik ni u ti yoor waawan, u san mala. <sup>18</sup>Unii yaa bi kisaak kan, u taa gir kun linampal ke u ti yoor waakekeln. <sup>19</sup>N-yoonn ngbaan, bipiib bi kpa ɻipuu na, ni bipiib bi kpa mbim bi laa ɻja libiil na ga li kpa kinimbaak. <sup>20</sup>Mee Uwumbɔr man, aan u taa cha ni san kakab aayoonn, bee likpaakool daal. <sup>21</sup>N-yoonn ngbaan binib ga ji falaa pam. Buyoonn Uwumbɔr nan naan dulnyaa wee ki nan saa dandana wee na, baa kee jin falaa ngbaan aaboln, ki mu aan ki ji falaa kina. <sup>22</sup>Uwumbɔr yaa kaa bar falaa ngbaan aayoonn aawiin kan, ubaa aan ɻjmar. Le

waanib aanimbaasaln pu u ga bar falaan ngbaan aayoonn aawiin.

<sup>23</sup>“N-yoonn ngbaan, unii yaa bui nimi ke ‘Lik, Kristo u gaa binib li na sɔ,’ ki yaa ki bui ke ‘U bi nima chee’ kan, ni taa gaa waah len pu na man. <sup>24</sup>Ba pu? bijmaŋ-mannim ga li bi. Bibaa ga bui ke bi ye Kristo ngbaan la. Biken mu ga bui ke bi ye Uwumbɔr aabɔnabiib la. Le bi ga tun lijinjiir aatun pam, ki ɻjmann binib. Hali, bi ga pɔɔn bibaa ke bi ti ɻjmann binib bi Uwumbɔr nyan bi na. <sup>25</sup>Li pel man, m puen tuk nimi la.

<sup>26</sup>“Nima pu na, bi yaa tuk nimi ke Kristo ngbaan bi nteersakpiin ni kan, taa buen ti lik man. Bi yaa ti ki tuk nimi ke u bi kidiik ni kan, taa gaa man. <sup>27</sup>Min Unibɔn Aabo yaa gir ni kan, ni ga li bi ke uteaal aah moor liwipuul ki cha liwilir pu na, unii mɔmɔk ga kan.

<sup>28</sup>“Liwankpol aah bi nin chee na, nangba mam mu kuuni nima chee la.”

### Yesu aah ga gir ni pu na

(Mak 13.24-27; Luk 21.25-28)

<sup>29</sup>“N-yoonn ngbaan aafalaa aapuwɔb, le paacham aawan aan ki li bi mbamɔm. Nwiin ga bɔln. Unjmal mu aan ki li wiin. Ijmabi mu ga lir.”¶ <sup>30</sup>N-yoonn ngbaan le binib ga kan limɔkl li ga li bi paacham ki mɔk bi ke min Unibɔn Aabo choo na. N-yoonn ngbaan le ɻjinibol ɻjimɔk bi dulnyaa wee ni na ga wii. Bi ga kan min Unibɔn Aabo bi ntaalangbam ni ki choo, ki wiin chain, ki joo mpɔɔn. <sup>31</sup>Le kakaan ga wii mpɔɔn pu. Le m ga tun ni maatuuntiib ke bi buen liwipuul, ni liwilir, ni ɻjangan, ni ɻjangii, ki ti kuun ni maanib mɔmɔk, ki di dan m chee.”

†<sup>24:15</sup> : Lik Daniel 9.27; 11.31; 12.11.

‡<sup>24:17</sup> : Bi yaa maa kidiik kan, baa di timoor pinn ki, kaa maa lidikokoln. Bi nan di idɔ paan puln tidir paab, le ki di titan pɔr biin. Bi nan maa ɻjibimbin le ki taa joi kidiik aapaacham.

¶<sup>24:29</sup> : Lik Aisaya 13.10, 34.4; Esekiel 32.7-8; Joel 2.10, 31; 3.15; Tibɔkpiirkaan 6.12-13.

### Bukpasom aayatajaml

(Mak 13.28-31; Luk 21.29-33)

<sup>32</sup>“Bukpasom le ye liyatajaml ki tii nimi. Bu aabon yaa bi ḥjani tifar kan, ni bee ke ni yaa kpee siib kan, kiseek ga seer. <sup>33</sup>Kina na, ni yaa kan nimina mɔmɔk bi ḥjani kan, ni bee ke ni yaa kpee siib kan, m ga gir ni. <sup>34</sup>M tuk nimi mbamɔn la, dandana aanib aan jer le tiwan nimina mɔmɔk puen ḥja. <sup>35</sup>Paacham ni taab ga jer. Maamɔbon ma aan jer.”

### Ubaa aa nyi bundaln Yesu ga gir ni na

(Mak 13.32-37; Luk 17.26-30, 34-36)

<sup>36</sup>“Ubaa aa nyi buyoonn m ga gir ni na. Uwumbɔr aatuuntiib bi bi paacham na aa nyi. Min Uwumbɔr Aajapɔon mu aa nyi. Nte Uwumbɔr baanja le nyi. <sup>37</sup>Min Unibɔn Aabo aah ga nan gir ni buyoonn na, ga li bi ke naah nan bi Nowa aayoonn pu na la. <sup>38</sup>Nowa aayoonn ngbaan, buyoonn nnyusakpem aa nan kee jin kitij na, binib nan bi, ki ji, ki nyu, bijab yoor bipiib, bipiib mu mɔn bijab, ki ti saa bundaln Nowa nan koo bujɔb ni na. <sup>39</sup>Baa nan nyi ke nibaa ga ḥja bi, ki ti saa buyoonn nnyusakpem nan jin kitij mɔmɔk na. Le bi mɔmɔk nan bee nnyun ni. Buyoonn min Unibɔn Aabo ga nan gir ni na, ni ga li bi kina la. <sup>40</sup>N-yoonn ngbaan bijab bilee ga li boo kisaak ko. M ga nan yoor ubaa ki di buen, ki cha uken. <sup>41</sup>Bipiib bilee ga li boo nan idi. M ga nan yoor ubaa ki di buen, ki cha uken.

<sup>42</sup>“Ni li nyi man. Naa nyi bundaln min Nidindaan ga gir ni na. <sup>43</sup>Ni li nyi ke udichadaan yaa ba nyi buyoonn un-aayuk ga fuu ni na kan, waa ba ga doon geen. U ba ga li ka lik, unaayuk ngbaan taa koo waadichal ni. <sup>44</sup>Nima pu na, ni mu li gor man; ba pu? buyoonn naan li dak ke m ga gir ni na, n-yoonn ngbaan le m ga gir ni.”

### Ututunn u ḥjan na, ni u kaa ḥjan na

(Luk 12.41-48)

<sup>45</sup>“Uyidaan ubaa yaa tii waatutunn ubaa tininkpir ke u li lik waachiln ni aanib ki tii bi tijikaar naah neer buyoonn na kan, ututunn ngbaan ga ḥja kinye ki li kpa nlan, ki li tun waatuln mbamɔm? <sup>46</sup>Udindaan yaa nan fuu ni ki mui waatutunn ḥjani uma udindaan aah ban pu na kan, Uwumbɔr aanyoor ga li bi ututunn ngbaan pu. <sup>47</sup>M tuk nimi mbamɔn la, u ga tii u tininkpir u li lik waawan mɔmɔk. <sup>48</sup>Tɔ, ututunn yaa ye titunwanbirdaan kan, u ga dakl usui ni ke udindaan ga yunn, <sup>49</sup>ki ga piin ki gbaa ututujeen aatɔtiib, ki ga dii bidagbiib, ki ji, ki nyu ndaan ki gbii. <sup>50</sup>Le udindaan ga gir ni buyoonn waan li dak ke u ga gir ni na, <sup>51</sup>ki ga gbaa u ḥjinaalab mbamɔm, ki ga di u ḥja bijmajmannim aah bi nin chee na. U ga wii ki ḥjmo ḥjinyin nima chee.”

### Bisapom kipiik aayatajaml

**25** “Uwumbɔr aanaan naahn bisapom kipiik bi nan joo baakaryaa mam, bi ti tooh upiidinn nsan ponn ni na la. <sup>2</sup>Bi ponn ni bijmu nan ye bijɔrb, bijmu mu nan ye bilankpalb. <sup>3</sup>Bijɔrb na nan joo baakaryaa mam, kaa joo nkpan. <sup>4</sup>Bilankpalb na joo baakaryaa mam, ki joo nkpan mu. <sup>5</sup>Le upiidinn ngbaan yunn. Le bi mɔmɔk dɔ geen.

<sup>6</sup>“Kinyetaasiik le bi ḥjun bi teen mpɔɔn pu ke, ‘Upiidinn choo. Nya ki tooh u nsan ni man.’ <sup>7</sup>Le bisapom kipiik ngbaan mɔmɔk fii ke bi toor baakaryaa mam. <sup>8</sup>Le bijɔrb bijmu na bui bilankpalb bijmu na, ‘Tii timi nkpan man. Timi aakaryaa mam ban bi junn la.’ <sup>9</sup>Le bilankpalb ngbaan bui bi, ‘Nibaakan, timi aakpan ngbaan aan neer ti ni nimi. Li cha man binib bi kooh nkpan na chee ki ti daa ḥja man.’ <sup>10</sup>Baah buen bi ti daa na, le upiidinn fuu ni. Le bilankpalb bijmu

bi gor na dii upiidinn ngbaan, ki koo waadiik ni, bi ti ji upiidinn aajikaar. Le bi laj kidiik ngbaan.

<sup>11</sup> “Le bijorb ngbaan mu nan fuu ni, le ki bui ke, ‘Tidindaan, Tidindaan, chuu piir tii timi.’ <sup>12</sup> Le u bui bi, ‘M tuk nimi mbamɔm la, maa nyi nimi.’”

<sup>13</sup> Tɔ, Yesu aah ḥakl bi liyataŋakl ngbaan doo na, le u bui ke, “Nima pu na, ni li nyi man. Naa nyi bundalm m ga gir ni na.”

### Bitutum bitaa aayataŋakl

(Luk 19.11-27)

<sup>14</sup> “Uwumbɔr aanaan naahn uja u nan cha nsan, ki yin waatutum ki nan di waawan mɔmɔk ḥa bijaal ni na la. <sup>15</sup> U nan di salmaa aakur aamombil ḥichur ḥijimu ki di tii ubaa, ki di ḥichur ḥilee ki di tii uken, ki di lichur libaa ki di tii uken mu. U nan tii bi mɔmɔk baah ga ḥjmaa tun pu na, le ki nyan buen. <sup>16</sup> Ututunn u nan joo ḥichur ḥijimu na, libuul ngbaan ni le u tiir kitiir, ki kan tinyoor ḥichur ḥijimu ki di kpee. <sup>17</sup> Ututunn u joo ḥichur ḥilee na mu tiir kitiir ki kan tinyoor ḥichur ḥilee ki kpee. <sup>18</sup> Ututunn u nan joo lichur libaa na ma nan buen ti gbii libuul, le ki di udindaan aamombil sub nima.

<sup>19</sup> “Ni joo cha ki ti yunn, le bitutum ngbaan aadindaan fuu ni, ki ban u lik bimɔk aah tun pu na. <sup>20</sup> Le ututunn u nan gaa salmaa aakur aamombil ḥichur ḥijimu na nan joo ḥi, ni ḥichur ḥijimu ki kpee, ki nan bui u, ‘Ndindaan, aa nan tii mi ḥichur ḥijimu la. M mu tiir kitiir ki kan tinyoor ḥichur ḥijimu kpee.’ <sup>21</sup> Le udindaan bui u, ‘Nfaan, aa ye ututunn la, ki tun lituln mbamɔm. Maah nan tii si tiwan ni siib na, aa joo ni mbamɔm. M ga ḥa si tiwan sakpenn aaninkpel. Ji maamɔɔn.’

<sup>22</sup> “Le ututunn u nan joo ḥichur ḥilee na mu yoor ḥi, le ki nan bui u, ‘Ndindaan, aa nan tii mi ḥichur ḥilee la. M tiir

kitiir ki kan tinyoor ḥichur ḥilee ki kpee.’

<sup>23</sup> Le udindaan bui u, ‘Nfaan, aa ye ututunn la, ki tun lituln mbamɔm. Maah nan tii si tiwan ni siib na, aa joo ni mbamɔm. M ga ḥa si tiwan sakpenn aaninkpel. Ji maamɔɔn.’

<sup>24</sup> “Le ututunn u nan joo lichur libaa na yoor li, ki nan bui u, ‘Ndindaan, m nyi aabɔr, ke aa chur binib mpɔɔn la. Saah kaa bun ni na, aa chee nima la. Saah kaa poo tijikaar ti na, aa faa tima la. <sup>25</sup> Nima le m san ijawaan, ki gbii libuul, ki di saamombil sub. Lik, saamombil so.’

<sup>26</sup> “Le udindaan bui u, ‘Utunwanbirdaan umina, ubganyakdaan umina, aa bui ke aa nyi mbɔr ke maah kaa bun ni na, m chee nima la, maah kaa poo ti na, m faa tima la. <sup>27</sup> Saah nyi kina na, ba ḥa saa di maamombil ti bil banki ponn ni? Maah fuu ni na, m ba ga kan maamombil ni tinyoor ki kpee,’ le ki bui biken, <sup>28</sup> ‘Chuu gaa lichur libaa li u kpa na man, ki di kpee ututunn u joo ḥichur kipiik na. <sup>29</sup> Unii umɔk kpa na, bi ga kpee u, le u li kpa sakpen. Unii u kaa kpa na, bi ga chuu gaa waah kpa ni pɔkkaa na. <sup>30</sup> Chuu ututunn u kaa kpa tinyoor ngbaan na, ki nyan u ki ti di u lii lipaal, mbɔmbɔɔn ni. U ga wii ki ḥmɔ ḥinyin nima chee.’”

### Yesu Kristo aah ga ji binib tibɔr pu na

<sup>31</sup> “Min Unibɔn Aabo ni maatuuntiib ga fuu ni. Le m ga li kpa mpɔɔn sakpen ki kal maaborjal pu ke ubɔrkpaan na.

<sup>32</sup> Le bi ga kuun ni dulnyaa wee ni aanib mɔmɔk nnimbiin ni. Le m ga yakr bi ke upihkpaal aah yakr ipiil ni ijoob pu na,

<sup>33</sup> ki ga di bininyaam siin ḥɔnggii wɔb, ki di tiniwanbir siin ḥɔnggian wɔb. <sup>34</sup> Le min, u ye Ubɔrkpaan ngbaan na, ga bui binib bi si ḥɔnggii wɔb na, ‘Nimi bi Nte Uwumbɔr ḥa tinyoor ḥa ni pu na, dan nan ji nnaan mu u nan toor siin nimi, buyoonn u nan naan dulnyaa wee na.

<sup>35</sup> Ba pu? nkɔn nan joo mi, le ni nan tii mi tijikaar m ji. Nnyunyuu nan joo mi,

ni nan tii mi nnyun m nyun. M nan ye uchaan la, le ni nan gaa mi.<sup>36</sup> M nan chuun njjmeen la, le ni nan tii mi tiwan-peenkaan m peen. M nan bun la, le ni dan nan mann mi. M nan bi kiyondiik ni, le ni dan nan lik mi.’

<sup>37</sup> “Le bininyaam ngbaan ga baa mi, ‘Tidindaan, bayoonn ti nan kan si nkon joo si, ti tii si, aa jin? Bayoonn ti nan kan si, nnyunyuu joo si, ti tii si, aa nyun? <sup>38</sup> Bayoonn ti nan kan si, aa ye uchaan, ti gaa si? Bayoonn ti nan kan si, aa chuun aajmeen, ti peen si?’ <sup>39</sup> Bayoonn ti nan kan si, aa bun, ti dan nan mann si? Bayoonn ti nan kan si, aa bi kiyondiik ni, ti dan nan lik si?’ <sup>40</sup> Le min Ubɔrkpaan ngbaan ga bui bi, ‘M tuk nimi mbamɔn la, naah nan ja kina ki tii nnaabitiib, bi-waatiib bimina na, ni nan ja tii mi le na.’

<sup>41</sup> “Le m ga bui binib bi si njjangan wɔb na, ‘Nimi bi Uwumbɔr puun lii ni pu na, nya m chee man, ki ti koo mmii mu kaan junn, aan Uwumbɔr nan tuur siin kinimbɔŋ ni kaawanbir mɔmɔk na.’ <sup>42</sup> Ba pu? nkon nan joo mi, naa nan tii mi tijikaar m ji. Nnyunyuu nan joo mi, naa nan tii mi nnyun, m nyun. <sup>43</sup> M nan ye uchaan, naa nan gaa mi. M nan chuun njjmeen, naa nan peen mi. M nan bun, naa nan dan nan mann mi. M nan bi kiyondiik ni, naa nan dan nan lik mi.’

<sup>44</sup> “Le bi mu ga baa mi, ‘Tidindaan, bayoonn ti nan kan si, nkon joo si, bee nnyunyuu joo si, bee aa ye uchaan, bee aa chuun aajmeen, bee aa ye ubun, bee aa bi kiyondiik ni, kaa ter si?’ <sup>45</sup> Le m ga bui bi, ‘M tuk nimi mbamɔn la, naah kaa nan ter nnaabitiib, biwaatiib bimina na, naa nan ter mi le na.’ <sup>46</sup> Le bi ga kan ntafadaan n-yoonn mu kaa kpa ndoon na. Le bininyaam ngbaan ga kan limɔfal li kaa kpa ndoon na.”

**Bi kpokl baah ga ku Yesu pu na**  
(Mak 14.1-2; Luk 22.1-2; J̄nn 11.45-53)

**26** Yesu aah len kina ki ti doo na, le u bui waadidiliib,<sup>2</sup> “Ni nyi ke ni gur iwiin ilee le bi ga ji Lakr-jer aajim.<sup>88</sup> N-yoonn ngbaan le bi ga di min Unibɔn Aabo ja binib aanjaal ni, le bi ti kpaa mi ndɔpuinkoo pu.”

<sup>3</sup> Tɔ, n-yoonn ngbaan le Uwumbɔr aatotoorninkpiib ni Juu yaab aaninkpiib nan kuun Uwumbɔr aatotoorninkpel Kayafas aachiln ni,<sup>4</sup> le ki kpokl ke bi ga loon chuu Yesu ki ku u,<sup>5</sup> le ki bui tɔb, “Ti taa chuu u njim ngbaan aayoonn man. Ti yaa chuu u n-yoonn ngbaan kan, kini-paak ngbaan ga njma tijar.”

**Upii ubaa aah nyuŋ Yesu pu na**  
(Mak 14.3-9; J̄nn 12.1-8)

<sup>6</sup> Tɔ, Yesu nan bi Betani aatij ni, ki bi Simonn u nan ye ukɔndaan na do, ki bi ji tijikaar. <sup>7</sup> Waah bi ji tijikaar kina na, le upii ubaa joo ni tulalee u kpa kidaak sakpen na ki nan di kpir Yesu aayil paab. Tulalee ngbaan nan bi kpalba nyaan u bi yin u ke alabasta na ponn ni la. <sup>8</sup> Waadidiliib aah kan kina na, le bi gee lijuul, ki len ke, “Ba ja u bii tulalee ngbaan kina? <sup>9</sup> Ti ba ga njmaa di u kooh ki kan ilik sakpen ki di tii bigiim.”

<sup>10</sup> Yesu nan bee baah len pu na, le ki baa bi, “Ba ja ni muk upii ngbaan kina? U tun lituln li ḥjan na le ki tii mi. <sup>11</sup> Bigiim ga li bi ni chee n-yoonn mɔmɔk. Mma aan li bi ni chee n-yoonn mɔmɔk. <sup>12</sup> Waah di tulalee ngbaan kpir nwon pu na, u toor mi ke bi ti sub mi la. <sup>13</sup> M tuk nimi mbamɔn la, baah ga moon tibɔnyaan tee nin chee itingbaan mɔmɔk ni na, bi ga len waah ja pu na ke binib li teer waabɔr.”

<sup>88</sup> **26:2** : Israel yaab nan ji Lakr-jer aajim ke bi teer buyoonn Uwumbɔr nan nyan bi tinaagbiir ni, Ijipt aatij ni na. Lik Nnyam 12.1-27.

**Judas aah ban ke u kooh Yesu pu na***(Mak 14.10-11; Luk 22.3-6)*

<sup>14</sup> Le Yesu aadidiliib kipiik ni bilee ponn ni ubaa, bi yin u ke Judas Iskariot, buen Uwumbor aatotoorninkpiib chee, <sup>15</sup> le ki ti baa bi, "M yaa di Yesu ja ninjaal ni kan, ni ga tii mi ba?" Le bi kahn tikur aamombil piitaa ki di tii u. <sup>16</sup> Liyaadaal ngbaan le u piin ki bi ban nsan mu u ga di Yesu ja bijaal ni na.

**Yesu ni waadidiliib aah jin njim ngbaan pu na***(Mak 14.12-21; Luk 22.7-13, 21-23; Jønn 13.21-30)*

<sup>17</sup> Lakr-jer aajim, buyoonn bi ga njmo boroboro u kaa kpa nnyok na aajan aawindaal, le Yesu aadidiliib dan nan baa u, "Aa ban ke ti gor njim ngbaan aajikaar la chee ki tii si?"

<sup>18</sup> Le u bui bi, "Ni li cha kitij ngbaan ni, uja ubaa chee man, ki ti bui u, 'Umomokr bui ke waayoonn fuu a. U ni waadidiliib ga dan nan ji Lakr-jer aajim aado.'"

<sup>19</sup> Le Yesu aadidiliib ja waah tuk bi pu na, le ki gor njim ngbaan aajikaar.

<sup>20</sup> Kijook aah joor na, le Yesu ni waadidiliib kipiik ni bilee nan kal ke bi ji tijikaar ngbaan. <sup>21</sup> Baah bi ji na, le u bui bi, "M tuk nimi mbamøn la, ni ponn ni ubaa ga kooh mi."

<sup>22</sup> Waah len kina na, le bisui bii sakpen. Le bi momok baa u ubaabaa ubaabaa, "Ndindaan, ni ye min la aa?"

<sup>23</sup> Le u bui bi, "M ni unii u kpaani ji lisambil libaa ni na le ga kooh mi.

<sup>24</sup> Min Unibøn Aabo ga kpo ke naah njmee Uwumbor Aagbañ ponn ni ke m ga kpo pu na. Uja u ga kooh mi na ma kan, tibbir ga li bi u pu; bi yaa kaa ba ma u kan, ni ba soor ki tii u."

<sup>25</sup> Le Judas, u ga kooh u na, baa u, "Umomokr, ni ye min la aa?"

Le Yesu bui u, "Ni ye saah len pu na."

**Tidindaan aajim***(Mak 14.22-26; Luk 22.14-20; 1 Korint Yaab 11.23-25)*

<sup>26</sup> Baah bi ji tijikaar na, le Yesu yoor boroboro, le ki doon Uwumbor, ki gii, ki di tii waadidiliib, ki bui bi, "Gaa ki li njmo man. Nwon le na."

<sup>27</sup> U nan yoor kiyinyook mu, le ki doon Uwumbor, ki di tii bi, le ki bui bi, "Ni momok nyu man. <sup>28</sup> Maasin le na. Maasin pu, le Uwumbor puu tipuupøln ki tii nimi. Maasin ga nya binib pam aatunwanbir pu, aan Uwumbor di cha pinn bi. <sup>29</sup> M tuk nimi la, maan ki nyu njisubil aanyun ngbaan, ki ti saa bundaln m ni nimi ga kpaan nyu mu nsanpoon ni, Nte Uwumbor aanaan ni na."

<sup>30</sup> Le bi gaa Uwumbor aalahn, ki buen Olif aasui aajool paab.

**Yesu aah bui ke Piita ga nee u pu na***(Mak 14.27-31; Luk 22.31-34; Jønn 13.36-38)*

<sup>31</sup> Yesu nan bui bi, "Kinyeek kee, ni momok ga san ki cha mi. Ni njmee Uwumbor Aagbañ ni ke 'Uwumbor ga ku upihdaan, le ipiih yaa.\*" <sup>32</sup> Buyoonn Uwumbor ga fikr mi nkun ni na, le m ga loln ni pu nsan ki buen Galilee aatiij ni."

<sup>33</sup> Le Piita bui u, "Bi momok yaa san ki cha si kan, mma aan san cha si."

<sup>34</sup> Le Yesu bui u, "M tuk si mbamøn la, kinyeek kimina, aa ga len nfum mutaa ke saa nyi mi le ukooja nin wii."

<sup>35</sup> Le Piita bui u, "Bi yaa po ban bi ku m ni si kan, maan len ke maa nyi si."

Le waadidiliib momok mu len kina.

\*26:31 : Lik Sekaria 13.7.

### **Yesu aah mee Uwumbor pu na**

(Mak 14.32-42; Luk 22.39-46)

<sup>36</sup> U ni waadidiliib nan ti fuu nibaa chee, le bi yin nima chee ke Getsemane. Le u bui bi, “Kal do man, aan m buen nibaa chee ki ti mee Uwumbor.” <sup>37</sup> Le u di Piita ni Sebedee aajapotiib bilee na buen. Le usui bii sakpen ki ti nyaq. <sup>38</sup> Le u bui bi, “Nsui bii ki ti nyaq. Ni wu ke nkun aah wu pu na. Kaln do man, ki li lik man.”

<sup>39</sup> Le u foor siib, ki doon lichichikr, le ki mee Uwumbor, “Nte, aa yaa kii kina kan, nyaan mi falaa u choo na ni. To, ja saageehn, ki taa ja maageehn.”

<sup>40</sup> Le u gir buen waadidiliib bitaa ngbaan chee, ki ti mui bi dō geen; le u baa Piita, “Naa ḥmaa li ka lik kikurk kibaa aa? <sup>41</sup> Ni li ka lik man, aan ki li mee Uwumbor, aan ki taa koo ntɔj ni. Nisui ban ke ni li lik, le tiwon aa pɔɔ.”

<sup>42</sup> Le u ki foor siib, ki ki mee Uwumbor, le ki bui ke, “Nte, ni yaa kaa ye m nyaan falaa u choo na ni kan, cha saageehn ja.”

<sup>43</sup> Le u ki gir buen waadidiliib chee, ki ti mui bi ki dō geen; ngeen nan joo bi sakpen a.

<sup>44</sup> Le u siir cha bi, le ki ki foor siib, ki ki mee Uwumbor taataa, ki ki bui u tibor tichachaan ngbaan. <sup>45</sup> Le u ki gir buen waadidiliib chee, ki ti baa bi, “Ni beenin fuur, ki dō geen la aa? Lik man, n-yoonn fuu a. U kooh min Unibon Aabo ki di ja titunwanbirdam aajaal ni la. <sup>46</sup> Fii, ti li cha man. Lik, uja u kooh mi na peeni a.”

### **Baah chuu Yesu pu na**

(Mak 14.43-50; Luk 22.47-53; J̄nn 18.3-12)

<sup>47</sup> Waah laa bi len kina na, le Judas u ye waadidiliib kipiik ni bilee ponn ni ubaa na fuu ni. Le kinipaak dii u. Bi nan joo kijaak aajum ni jagbaali mam. Bi

nan nyan ni Uwumbor aatotoorninkpiib ni Juu yaab aaninkpiib chee la. <sup>48</sup> Judas u kooh Yesu na nan bui kinipaak ngbaan ke bi yaa ti kan u moor unii u aatakplin<sup>†</sup> na kan, uma le na, bi chuu u.

<sup>49</sup> Baah fuu ni Yesu ni waadidiliib aah bi nin chee na, le Judas kpaan buen Yesu chee, le ki ti bui u, “Umɔmɔkr, aa pɔɔ ḥɔɔ?” le ki moor utakplin.

<sup>50</sup> Le Yesu bui u, “Njɔ, aa chuun kinye?”

Le bi dan nan chuu Yesu mpɔɔn. <sup>51</sup> Le Yesu aadidiliib ponn ni ubaa voor waa-jaak aajuk ki gaa per Uwumbor aatotoorninkpel aanaagbjia aatafal. <sup>52</sup> Le Yesu bui u, “Di saajuk ngbaan ki di fu kijuchook ni. Binib bimɔk voor kijaak aajuk na, kijaak aajuk le ga ku bi. <sup>53</sup> Saa nyi ke m yaa mee Nte Uwumbor kan, u ga tun ni bituuntiib bi jer ḥichur kipiik ni ḥilee na m chee dandana aa? <sup>54</sup> M mu yaa ja kina kan, maan gbiin Uwumbor Aagbaŋ aah len pu na ke m ga ji falaa u choo na.”

<sup>55</sup> N-yoonn ngbaan le u baa kini-paak ngbaan, “Ni joo kijaak aajum, ni ḥichakukul ni nan chuu mi ke maah ye ufifir le na aa? M nan bi Uwumbor Aadichal ni iwiin mɔmɔk, ki tuk binib Uwumbor aabɔr, le naa chuu mi. <sup>56</sup> To, nimina mɔmɔk ja ke ni gbiin Uwumbor aabɔnabtiib aah nan ḥmee pu na.”

Le waadidiliib mɔmɔk san cha u.

### **Juu yaab aaninkpiib aah jin Yesu tibor pu na**

(Mak 14.53-65; Luk 22.54-55,  
63-71; J̄nn 18.13-14, 19-24)

<sup>57</sup> Binib bi nan chuu Yesu na nan di u buen Uwumbor aatotoorninkpel Kayafas aadichal ni, Uwumbor aakaal aamɔmɔkb ni Juu yaab aaninkpiib aah kuun nin chee na. <sup>58</sup> Le Piita paa Yesu pu, ki bi dandar, le ki ti fuu Uwumbor aa-

<sup>†</sup>26:48 : Israel yaab nan doon binaabitiib kina le ki mɔk ngeehn.

totoorninkpel aachiln ni, le ki koo ni, ki ti kal butəb aajab chee ke u lik naah ga ti doo pu na.<sup>59</sup> Le Uwumbor aatotoorninkpiib ni bibojirb aaninkpiib mɔmɔk ban binib bi ga mɔln inyamɔn ki paan Yesu na, aan bi kan waataani ki ti ku u na. Le biseeraadam pam dan nan mɔln inyamɔn paan u.<sup>60</sup> Bi mu aa kan waataani. Kookoo yaan le binyamɔndam bilee dan nan bui bi<sup>61</sup> ke uja ngbaan bui ke u ga ŋmaa gbaa wii Uwumbor Aadichal, ki ki maa ki iwiin itaa daal.

<sup>62</sup> Le Uwumbor aatotoorninkpel fii sil, ki baa Yesu, “Saan len tibaa aa? Binib ngbaan aah bii si pu na, ti gbii aan taa gbii?”<sup>63</sup> Le Yesu si ŋmin. Le Uwumbor aatotoorninkpel bui u, “Puu Uwumbor u fu na pu, aa ye Uwumbor Aajapɔɔn Kristo u Uwumbor lee u na aan saa ye?”<sup>64</sup>

<sup>64</sup> Le Yesu bui u, “Ni ye saah len pu na. M tuk nimi la, n-yoonn mu choo na, ni ga kan min Unibɔn Aabo ka Uwumbor aajangii wɔb, ki ga kan mi ntaalangbam ni paacham ki choo.”

<sup>65</sup> Waah len kina na, le Uwumbor aatotoorninkpel chuu kar ubaa aawankenkaan, le ki bui ke, “U di ubaa ŋaŋ Uwumbor la. Taa ki ban seeraadam. Ni ŋun waah sii Uwumbor pu na.<sup>66</sup> Ni dak kinye?”

Le bi bui ke, “U ŋeeri ti ku u la.”

<sup>67</sup> Le bi teei timɔɔtan ŋa unimbil wɔb, le ki gbaa u. Bibaa mu gbaa u ntapam,<sup>68</sup> ki bui u, “Kristo ngbaan, lem Uwumbor aabɔnabr aaliin ki tuk timi, ulau faa si.”

### Piita aah nee Yesu pu na

(Mak 14.66-72; Luk 22.56-62;  
J̄nn 18.15-18, 25-27)

<sup>69</sup> Piita nan ka lichiln ni. Le usapɔɔn u ye ututunn na dan nan bui u, “Aa mu nan bi Yesu u ye Galilee aatiŋ aanii na chee.”

<sup>70</sup> Le u nee bi mɔmɔk aanimbil ni ki bui u, “Maa nyi saah len pu na aatataa,”

le ki buen kikaakpaak ni.<sup>71</sup> Le usapɔɔn uken mu ti kan u, le ki bui binib bi bi nima chee na, “Uja wee mu nan bi Yesu u ye Nasaref aatiŋ aanii na chee.”

<sup>72</sup> Le u ki nee ki puu Uwumbor ke waa nyi u.

<sup>73</sup> Le ni kpee siib, le binib bi si nima chee na dan nan bui u, “Ni ye mbamɔn, aa ye waadidiliib ponn ni ubaa la; saaliin ni baaliin kpaan la.”

<sup>74</sup> Le u ki puu Uwumbor, le ki bui ke, “Maa nyi uja ngbaan. M yaa mɔn nnyamɔn kan, Uwumbor daa ntafal.”

Libuul ngbaan ni le ukooja wii.<sup>75</sup> Le Piita teer Yesu aah ba tuk u pu na ke, “Aa ga len nfum mutaa ke saa nyi mi, le ukooja nin wii.” Piita nan nyan lipaal, ki ti wii sakpen.

### Baah nan di Yesu di buen Pailat aanimbiin ni pu na

(Mak 15.1; Luk 23.1-2; J̄nn 18.28-32)

**27** Ki woln kitaak le Uwumbor aatotoorninkpiib ni Juu yaab aaninkpiib mɔmɔk kpokl baah ga ŋa pu ki ku Yesu na.<sup>2</sup> Le bi buu u tikululn, ki di u buen kitij ngbaan aaninkpel chee, bi yin u ke Pailat, ki ti di ŋa unjaal ni.

### Judas aah ku ubaa pu na

(Lituln 1.18-19)

<sup>3</sup> Tɔ, Judas u kooh Yesu na aah kan ke bi ga ku Yesu na, le u jer waalandak, le ki ki giin ni tikur aamombil piitaa ngbaan ke u ti di tii Uwumbor aatotoorninkpiib ni Juu yaab aaninkpiib,<sup>4</sup> le ki bui bi, “M tun titunwanbir la. M kooh unii u kaa kpa taani na ke bi ti ku u.”

Le bi bui u, “Naa ye timi aabɔr. Ni ye saabɔr la.”

<sup>5</sup> Le u di ŋimombil ngbaan di lii Uwumbor Aadichal ni, ki siir cha bi, le ki buen ti leen ubaa ŋŋmin le ki kpo.

<sup>6</sup> Le Uwumbor aatotoorninkpiib pii ŋimombil ngbaan ki bui ke, “Ni ye nsin aamombil la. Timi aakaal aa kii ke ti di

kina aamombil ḥa Uwumbor aamombil ni.”<sup>7</sup> Le bi kpokl baah ga ḥa ḥi pu na, le ki di ḥi daa Kiyakmaabuuk aapepel ke bi ti li sui bicham nima.<sup>8</sup> Nima pu, le bi yin nima chee ke “Nsin aatiq” ki nan saa dandana wee.

<sup>9-10</sup> Le ni gbiin Uwumbor aabɔ̄nabr Jeremia aah nan len pu na ke, “Bi di tikur aamombil piitaa le daa kiyakmaabuuk aapepel, Uwumbor aah tuk bi pu na. ḥimobil ngbaan ye unii aadaak, Israel yaab ngem aah len ke bi ga daa u pu na.”<sup>‡</sup>

### Pailat aah jin Yesu tibor pu na

(Mak 15.2-5; Luk 23.3-5; J̄nn 18.33-38)

<sup>11</sup> Bi nan di Yesu ti siin kitij ngbaan aaninkpel Pailat aanimbiin ni. Le Pailat baa u, “Aa ye Juu yaab aabor la aa?”

Le u bui u, “Saah len pu na, ni ye kina.”<sup>12</sup> Le Uwumbor aatotoorninkpiib ni Juu yaab aaninkpiib bii Yesu. Le waa len tibaa.

<sup>13</sup> Le Pailat baa u, “Saa ḥjun baah bii si sakpen pu na aa?”

<sup>14</sup> Le Yesu si ḥmin, kaa len tibaa. Le ni gar Pailat pam.

### Baah len ke bi ga ku Yesu pu na

(Mak 15.6-15; Luk 23.13-25;  
J̄nn 18.39-19.16)

<sup>15</sup> Njim ngbaan aayoonn yaa nan saa kan, Pailat ga nyan unaagbijja u kini-paak ban u na ki lii.<sup>16</sup> N-yoonn ngbaan unaagbijja u kpa liyimbil na nan bi kiyondiik ni. Bi nan yin u ke Barabas.

<sup>17</sup> Kinipaak aah kuun na, le Pailat baa bi, “Ni ban m nyan ḥma kiyondiik ni? Barabas le aan Yesu u bi yin u ke Kristo ngbaan na?”<sup>18</sup> Pailat nan bee ke bi kpa lipiipoln Yesu pu, nima le cha bi di u ḥjaal ni.

<sup>19</sup> Buyoonn u bi ji Yesu tibor na, Pailat aapuu nan di unii tun ni, ke u li nyi ki

taa ḥa uja nyaan ngbaan nibaa; ke uja ngbaan pu, u daq tidaq ti muk u sakpen na kinyeek na.

<sup>20</sup> Le Uwumbor aatotoorninkpiib ni Juu yaab aaninkpiib bui kinipaak ngbaan ke bi tuk Pailat ke u di Barabas lii, ki ku Yesu.<sup>21</sup> Tɔ̄, le Pailat ki baa bi, “Bijab bilee ngbaan ponn ni, m ga di ulau lii?”

Le bi bui u, “Di Barabas lii.”

<sup>22</sup> Le Pailat baa bi, “Yesu u bi yin u ke Kristo ngbaan na, m ga ḥja u kinye?”

Le bi mɔ̄mɔ̄k bui u, “Kpaa u ndɔ̄puinkoo pu.”

<sup>23</sup> Le u ki baa bi, “Ba ḥja? U tun bakaa bayoo?”

Le bi moo tar mpɔ̄on pu ke, “Kpaa u ndɔ̄puinkoo pu,” le ki ban bi ḥmaa tijar.

<sup>24</sup> Pailat mu kan ke waan ḥmaa ḥja nibaa, le ki ban nnyun, ki ḥir ḥjaal binimbil ni, ki len ke, “Uja nyaan ngbaan aasin aa bi ḥjaal ni. Ni ye nimi aabor la.”

<sup>25</sup> Le bi mɔ̄mɔ̄k bui u, “Cha waasin li bi timi, ni timi aabim aajaal ni.”

<sup>26</sup> Le Pailat nyan Barabas lii, ki cha waajab lue Yesu ḥinaalab, le ki di u ḥja bi ḥjaal ni, bi ti kpaa u ndɔ̄puinkoo pu.

### Butɔ̄b aajab aah yook Yesu pu na

(Mak 15.16-20; J̄nn 19.2-3)

<sup>27</sup> Butɔ̄b aajab ngbaan nan di Yesu koo Pailat aadichal ni, le ki kuun ni bijab bi gur na ki nan gob u.<sup>28</sup> Le bi chuu peer waawanpeenkaan, ki di libɔ̄kumaln peen u,<sup>29</sup> le ki di ikokon luu kiyikpupuk, ki di chij u, ki di lidabil ḥum ujangii ni ke ubor na, le ki gbaan unimbiin ni, ki ḥja u mbɔ̄nyun, ki bui u, “Juu yaab Aabor, aa pɔ̄ɔ cɔ̄?”<sup>30</sup> le ki teei timɔ̄tan lœ u, le ki gaa lidabil ngbaan ki di faa uyil paab.

<sup>31</sup> Baah ḥja u mbɔ̄nyun ki ti doo na, le bi chuu peer libɔ̄kumaln ngbaan, le ki di waawanpeenkaan peen u, le ki joo u cha, bi ti kpaa u ndɔ̄puinkoo pu.

<sup>‡</sup>27:9-10 : Lik Sekaria 11.12-13.

## Baah kpaa u ndɔ̄puinkoo pu pu na

(Mak 15.21-32; Luk 23.26-43; Jɔnn 19.17-27)

<sup>32</sup>Baah cha na, le bi kan uja ubaa, u ye Sairene aatiŋ aani, aan bi yin u ke Simonn na. Le bi chuu u mpɔɔn ke u tun Yesu aadɔ̄puinkoo. <sup>33</sup>Le bi ti fuu nibaa chee. Bi yin nima chee ke Golgota. Golgota aatataa le ye ke “Kiyikpaŋ aaapel.” Baah fuu nima chee na, <sup>34</sup>le binib bibaa di ndaan ni nnyɔk ki di ŋmal tɔb ponn ni, ki di tii Yesu ke u nyun. Waah lak lik na, le u yii, kaa nyun.

<sup>35</sup>Le butɔb aajab ngbaan kpaa u ndɔ̄puinkoo pu, ki di waawanpeenkaan ti yakr tɔb, le ki too inaan ke bi lik bimɔk aah ga kan ni na,<sup>4</sup> <sup>36</sup>le ki ka lik u. <sup>37</sup>Bi nan ŋmee kigbaŋ budabu cha bi ku u na, ki di tam waadɔ̄puinkoo pu, uyl paab. Kigbaŋ ngbaan len ke, “Yesu u ye Juu yaab Aabor na le na.” <sup>38</sup>Le bi di bififiirb bilee mu kpaa idɔ̄puinkee pu. Bi nan di ubaa kpaa uŋjangii wɔb, ki di uken kpaa uŋjangani wɔb.

<sup>39</sup>Le binib bi jer nima chee na sii u, ki gbakr biyil, <sup>40</sup>le ki bui u, “Si u len ke aa ga gbaa wii Uwumbor Aadichal ki i maa li iwiin itaa na, aa yaa ye Uwumbor Aajapɔɔn kan, sunn ni ndɔ̄puinkoo pu, ki ŋmar.”

<sup>41</sup>Le Uwumbor aatotoorninkpiib, ni Uwumbor aakaal aamɔmɔkb, ni Juu yaab aaninkpiib mu ŋa u mbɔɔnyun, ki bui ke, <sup>42</sup>“U nan gaal biken lir, kaan ŋmaa gaa ubaa lii ki ŋmar. U yaa ye Juu yaab Aabor kan, u sunn ni ndɔ̄puinkoo pu, aan ti gaa u ki kii.” <sup>43</sup>U gaa Uwumbor ki kii, ki bui ke u ye Uwumbor Aajapɔɔn. Uwumbor yaa ban u kan, cha u gaa u lii dandana.”

<sup>44</sup>Le bififiirb bi bi di kpaa u chee idɔ̄puinkee pu na mu sii u kina.

## Yesu aah kpo pu na

(Mak 15.33-41; Luk 23.44-49; Jɔnn 19.28-30)

<sup>45</sup>Nwiin kaasisik ni le itingbaan mɔmɔk bɔln, ki ti saa nwiin aah kpar pu na. <sup>46</sup>Nwiin aah kpar na, le Yesu teen mpɔɔn pu, “Eli, Eli, lama sabaktani.” Naatataa le ye ke, “Maawumbor, Maawumbor, ba pu aa siir cha mi?”<sup>8</sup>

<sup>47</sup>Binib bi si nima chee na aah ŋjun waah teen pu na, le bibaa bui ke, “Uja ngbaan yin Elaija la.” <sup>48</sup>Libuul ngbaan ni le bi ponn ni ubaa san buen ki ti yoor nkiisuk, ki nan di bɔn ndaan mu mɔɔn na ni, le ki di ŋa lidabil pu ki di ŋa umɔb chee ke u moor.

<sup>49</sup>Le binib bi gur na bui ke, “Di cha. Cha ti lik ke Elaija ga dan nan gaa u lii aan waan dan.”

<sup>50</sup>Le Yesu ki teen mpɔɔn pu, le ki cha waawiin nyan, le ki kpo.

<sup>51</sup>N-yoonn ngbaan, le likekeln li yakr Uwumbor aadiik ni nfum mulee na chuu kar paacham ki ti saa kitin. Le kitin deŋ, le ŋitakpasakpiin chuu war. <sup>52</sup>ŋIjakaakul ngem mu chuu piir, le Uwumbor aani, bi nan kpo na pam fikr nkun ni, ki nyan ŋIjakaakul ngbaan ponn ni. <sup>53</sup>Buyoonn Yesu fikr nkun ni na, le bi koo Jerusalem aatiŋ ni, ki di bibaa mɔk binib pam.

<sup>54</sup>Butɔb aajab aaninkpel, ni binib bi bi u chee ki si kii Yesu na aah kan kitin aah deŋ pu na, ki kan tiwan nimɔk ŋa na, le ijawaan chuu bi sakpen. Le bi bui ke, “Mbamɔn, u sil ye Uwumbor Aajapɔɔn la.”

<sup>55</sup>Bipiib pam mu nan bi nima, ki si dandar, ki si lik. Bi nan ye bipiib bi nyan ni Galilee aatiŋ ni ki dii Yesu, ki tun lituln ki ter u na. <sup>56</sup>Bi ponn ni ubaa ye Mari Magdalene; uken mu ye Mari, u ye Jems

<sup>4</sup>27:35 : Lik Ilahn 22.18.

<sup>8</sup>27:46 : Lik Ilahn 22.1.

ni Josef aana na; uken mu ye Sebedee aajapotiib aana.

### Baah sub Yesu pu na

(Mak 15.42-47; Luk 23.50-56; J̄nn 19.38-42)

<sup>57</sup> Kijook aah joor na, le uwankpadaan ubaa, u ye Arimatea aatiq aanii na fuu ni. Bi yin u ke Josef. U mu nan dii Yesu.

<sup>58</sup> Le uja ngbaan buen Pailat chee ki ti bui u, "Tiin mi Yesu aawon." Le Pailat bui waajab ke bi di ti tii u. <sup>59</sup> Le Josef yoor Yesu aawon, ki di poo likekenyaan ni, <sup>60</sup> ki di ti sub kitakpaluj ni. Kitakpaluj ngbaan le Josef nan cha bi gbii ki, uma ubaa pu. Baa nan kee sub unii ubaa ki ponn ni. Waah di Yesu sub na, le u di litakpasapkeln li pee na, ki di lej mbisamob, le ki buen. <sup>61</sup> Le Mari Magdalene ni Mari uken mu bi nima chee, ki ka gbok kitakpaluj ngbaan.

### Bikikiirb aah kii Yesu aakaakul pu na

<sup>62</sup> Le ki woln Juu yaab aakpaakool daal, le Uwumbor aatotoorninkpiib ni Farisii yaab kuun Pailat chee, <sup>63</sup> le ki bui u, "Timi aaninkpel, ti teer ke unyamondaan ngbaan aah nan bi na, u nan bui ke u yaa kpo kan, iwiin itaadaal u ga fikr nkun ni. <sup>64</sup> Nima pu na, cha bijab li kii waakaakul, ki ti saa iwiin itaa daal, waadidiliib taa dan nan kur u, ki bui binib ke u fikr nkun ni la. Bi yaa ja kina kan, kookoo aanyamom mue ga jer njan yoo."

<sup>65</sup> Le Pailat bui bi, "To, yoor bikikiirb, ki li cha man, ki ti cha bi li kii waakaakul naah ban pu na."

<sup>66</sup> Le bi buen ki ti dab litakpal li lej likaakul aamob na, ki cha bikikiirb ka kii li.

### Yesu aah fikr nkun ni pu na

(Mak 16.1-10; Luk 24.1-12; J̄nn 20.1-10)

**28** Juu yaab aakpaakool aah jin ki woln kitaak na, le Mari Magda-

lene ni Mari uken na buen ti lik likaakul ngbaan kichakpinaanyek ni. <sup>2</sup> Le kitij dej sakpen; ba pu? Uwumbor aatuun ubaa nan nyan ni paacham, le ki nan chuu lekr litakpal ngbaan, le ki kal li pu. <sup>3</sup> U nan moor lak lak ke utaal aah moor pu na. Waawanpeenkaan piin chain ke nkokoyon na. <sup>4</sup> Bikikiirb aah kan u na, le ijawaan chuu bi sakpen, le biwon gbaa, le bi lir ki fik.

<sup>5</sup> Le Uwumbor aatuun ngbaan bui bipiib ngbaan, "Ni taa san ijawaan man. M nyi ke ni ban Yesu u bi nan kpaa u nd̄pouinkoo pu na la. <sup>6</sup> Waa bi do. U fikr nkun ni, waah nan len pu na. Dan man ki nan lik waah ba dō nin chee na, <sup>7</sup> aan ki buen mala ki ti tuk waadidiliib ke u fikr nkun ni a, ki loln bi pu nsan ki cha Galilee aatiq ni. Bi ga ti kan u nima. Nima ina le m ban m tuk nimi."

<sup>8</sup> Bipil ngbaan nan san ijawaan, ki mu tee kpa mpopiin pam. Le bi siir likaakul chee mala, ki san buen ke bi ti tuk Yesu aadidiliib Uwumbor aatuun ngbaan aah tuk bi pu na.

<sup>9</sup> Baah cha na, le Yesu ton bi nsan ni, le ki doon bi. Le bi gbaan umimbiin ni, ki joo u, le ki dooni u. <sup>10</sup> Le u bui bi, "Taa san ijawaan man. Li cha ki ti tuk maa-didiliib ke bi li cha Galilee. Bi ga ti kan mi nima chee."

### Bikikiirb aah moln inyamom pu na

<sup>11</sup> Bipil ngbaan aah cha na, le bikikiirb bi nan kii Yesu aakaakul na buen Jerusalem, ki ti tuk Uwumbor aatotoorninkpiib tiwan nimok ja na. <sup>12</sup> Le Uwumbor aatotoorninkpiib ni Juu yaab aaninkpiib kuun t̄ob chee, le ki kal ki kpokl, le ki nyan qimombil pam, ki di tii bikikiirb ngbaan, <sup>13</sup> le ki bui bi, "Li cha man ki ti qimann binib ke naah dō geen kinyeek na, le waadidiliib dan ki nan nyan u likaakul ni. <sup>14</sup> Kitij aaninkpel yaa qun ke ni len ke ni dō geen, ki yaa jin nimi tibor kan, ti ga nyan nimi."

<sup>15</sup>Le bikikiirb ngbaan gaa ɻimobil ngbaan, le ki buen ti tuk binib ke Yesu aadidiliib dan nan nyan waawon likaakul ni a. Nima pu le Juu yaab beenin len kina ki nan saa din.

**Yesu aah di ubaa mɔk  
waadidiliib pu na**

(*Mak 16.14-18; Luk 24.36-49;  
J̄nn 20.19-23; Lituln 1.6-8*)

<sup>16</sup>Yesu aadidiliib kipiik ni ubaa na nan buen lijool libaa paab, Galilee aatiq ni, Yesu aah nan mɔk bi nin chee na.

<sup>17</sup>Le Yesu fuu ni bi chee. Baah kan u na, le bi gbaan unimbiin ni ki doon u. Le bibaa mu joo beeni. <sup>18</sup>Le Yesu bui bi, “Uwumbor tii mi mpooñ mɔmɔk, paacham ni taab. <sup>19</sup>Li cha man ɻinibol mɔmɔk chee, ki ti ɻja bi maadidiliib, ki muin bi nnyun ni, Nte Uwumbor, ni min Ujapoɔn, ni Nfuur Nyaan aayimbil pu, <sup>20</sup>ki tuk bi ke bi li keei maah tuk nimi pu na mɔmɔk. Teer man ke m bi ni chee n-yoonn mɔmɔk, ki nan saa dulnyaa aadoon.”

*Tibɔnyaan ti*

**MAK**

*ŋmee ti na*

**Jɔnn u nan muin binib  
nnyun ni na aabɔr**

(Matiu 3.1-12; Luk 3.1-18; Jɔnn 1.19-28)

**1** Tibɔr timina le ye Uwumbɔr Aajapɔɔn Yesu Kristo aabɔnyaan.

<sup>2</sup>Uwumbɔr aabɔnbr Aisaya nan ŋmee waabɔr ngbaan aah ga piin pu na. U nan ŋmee ke Uwumbɔr bui Waabo ke, “Maatutunn sɔ. M tun ni u ke u loln ni nsan,

ki nan toor nsan ki siin si.”<sup>\*\*</sup>

<sup>3</sup>Unii ubaa bi nteersakpiin ni ki tar ke, ‘Toor Uwumbɔr aasan man, ki ja waasan mu li tok ki tii u.”<sup>††</sup>

<sup>4</sup>Kina le uja ubaa nyan sil nteersakpiin ni, bi yin u ke Jɔnn. U nan muini binib nnyun ni, le ki mooni ke, “Kpeln nimi aabimbin man aan Uwumbɔr di cha nimi aatunwanbir pinn nimi, le m ga muin nimi nnyun ni.”<sup>5</sup> Le kinipaak nyan Judea aatim mɔmɔk ni, ni Jerusalem aatiŋ ni, ki dan u chee, ki nan kpiir baatunwanbir tuk Uwumbɔr. Le Jɔnn muin bi nnyun ni, Jɔċċdann aamɔɔl ni.

<sup>6</sup>Jɔnn nan pee kikpalk ki bi nan di laakumii aakor luu ki na. U nan di ligbabapaln buu uchaj ni. Waajikaar nan ye itoon ni tisiir la.<sup>7</sup> U nan mooni kinipaak ngbaan ke, “Unii u jer mi na paan ni m pu la. Maa ŋeer ke m gbiln waanaataak aajmin ki tii u.”<sup>8</sup> Mma muin nimi nnyun ni la. Uma le ga nan di Uwumbɔr Aafuur Nyaan gbiin nimi.”

**Waah muin Yesu nnyun ni pu na**

(Matiu 3.13-4.11; Luk 3.21-22; 4.1-13)

<sup>9</sup>N-yoonn ngbaan le Yesu nyan Nasaref, kitij ki bi Galilee ni na, ki dan Jɔnn chee. Le Jɔnn muin u nnyun ni, Jɔċċdann aamɔɔl ni.<sup>10</sup> Yesu aah nyan nnyun ni na, le u kan kitaapaak chuu piir, le ki kan Uwumbɔr Aafuur Nyaan sunn ni ki nan tɔj u pu, ki naahn linanjel.<sup>11</sup> Le nneel nyan ni paacham ki len ke, “Aa ye Njapoɔn u m gee si na la. Nnimbil gbiin si.”<sup>‡‡</sup>

<sup>12</sup>N-yoonn ngbaan le Uwumbɔr Aafuur Nyaan di Yesu buen nteersakpiin ni. U nan ti bi nima iwiin imonko ilee la. Le kinimbɔj tɔjni u nima.<sup>13</sup> Timoor ni aapeel mu nan bi nima. Le Uwumbɔr aatuuntiib nyan ni paacham ki dan nan ja u tijann.

<sup>14</sup>Le binib nan chuu Jɔnn ki di u ja kiyondiik ni. Nee aapuwɔb, le Yesu buen Galilee aatiŋ ni, ki ti mooni Uwumbɔr aabɔnyaan,<sup>15</sup> le ki bui ke, “N-yoonn fuu a. Uwumbɔr aanaan peen ni a. Kpeln nimi aabimbin man, ki gaa tibɔnyaan tee ki kii man.”

**Yesu aah yin bijanbam binaa pu na**

(Matiu 4.12-22; Luk 4.14-15; 5.1-11)

<sup>16</sup>Yesu nan chuun kpak Galilee Aanyusakpem aagbaan, le ki ti kan Simonn ni unaal Andru bi mae kipɔɔk nnyun ni; bi ye bijanbam la.<sup>17</sup> Le Yesu bui bi, “Dii mi man, aan m cha ni ban binib ki nan tii Uwumbɔr.”<sup>18</sup> Waah len kina na, libuul ngbaan ni le bi siir cha baapɔr, ki dii u.

<sup>19</sup>Le u foor siib ki kpee, le ki kan Jems ni unaal Jɔnn, bi ye Sebedee aajapɔtiib na. Bi nan bi baajɔb ponni ni, ki bi lejñi baapɔr.<sup>20</sup> Libuul ngbaan ni le Yesu yin

<sup>\*\*1:2</sup> : Lik Malakai 3.1.

<sup>††1:3</sup> : Lik Aisaya 40.3.

<sup>‡‡1:11</sup> : Lik Aisaya 42.1.

bi. Le bi siir cha bite Sebedee ni waatum buŋjəb ngbaan ponn ni, le ki dii Yesu.

### **Yesu aah nyan tiyayaar uja ni pu na**

(Luk 4.31-37)

<sup>21</sup> Le bi ti fuu Kapenaum aatiŋ ni. Juu yaab aakpaakool daal, le Yesu koo mmeen aadiik ni, ki tuk binib Uwumbor aabor. <sup>22</sup> Waah tuk bi tibɔ̄t i na, le ni gar bi pam. U tuk bi ke unii u kpa Uwumbor aapɔ̄on na la, kaa tuk bi ke Uwumbor aakaal aamɔ̄mɔ̄kb aah tuk bi pu na.

<sup>23</sup> Le uja u tiyayaar joo u na bi mmeen aadiik ngbaan ni, <sup>24</sup> le ki teen ke, “Sin Yesu u ye Nasaref aatiŋ aanii na, aa ban ba ti chee? Aa dan aa nan ja timi fam la aa? M nyi si. Aa ye Uwumbor aanii u ye chain na la.”

<sup>25</sup> Le Yesu kae tiyayaar ngbaan, ki len ke, “Ijimim. Di uja ngbaan lii.”

<sup>26</sup> Le tiyayaar ngbaan cha uja ngbaan aawon gbaa, le ki teen mpɔ̄on pu, ki di u lii. <sup>27</sup> Le ni gar bi mɔ̄mɔ̄k pam. Le bi baa tɔ̄b, “Ba so? Ni ye mmɔ̄km pɔ̄on la aa? U kpa mpɔ̄on, le ki tuk tiyayaar ke ti di binib lii, le ti kii waamɔ̄b.”

<sup>28</sup> Nima pu na, Yesu aayimbil nan moon Galilee aatingbaan mɔ̄mɔ̄k ni.

### **Yesu aah tii bibum pam laafee pu na**

(Matiu 8.14-17; Luk 4.38-41)

<sup>29</sup> Yesu ni binib bi dii u na nan nyan mmeen aadiik ngbaan ni, le ki buen Simonn ni Andru aadichal ni. Jems ni Jɔnn mu nan dii bi. <sup>30</sup> Le Simonn aapuu aana bun, ki dɔ̄ kidiik ni. Le uwon ton. Le bi tuk Yesu ke u bun la. <sup>31</sup> Le Yesu buen u chee, ki ti chuu uŋjaal, ki fiin u kaan. Le uwon sɔ̄ŋ. Le u chann bi tichann.

<sup>32</sup> Liyaadaal aajook, buyoonn nwiin lir na, binib nan dan Yesu chee, le ki joo ni bibum mɔ̄mɔ̄k, ni tiyayaar aah joo binib bi na mɔ̄mɔ̄k. <sup>33</sup> Kitiŋ ngbaan aanib mɔ̄mɔ̄k nan kuun nima, Simonn ni Andru do linampal. <sup>34</sup> Bibum ngbaan nan wiir

pam ki nan kpa iween aabɔ̄ŋ aabɔ̄ŋ na, le Yesu cha bi pɔ̄ok, ki nyan tiyayaar aah joo binib bi na mu. Tiyayaar ngbaan aah nan nyi waah ye unii u na, waa nan tii ti nsan ke ti len tibaa.

### **Yesu aah tuk binib Uwumbor aabɔ̄r Galilee aatim ni pu na**

(Luk 4.42-44)

<sup>35</sup> Njan aakooja aah wii na, le Yesu fii ki nyan lipaal, ki buen nibaa chee, le ki ti bi nima ubaa ki mee Uwumbor.

<sup>36</sup> Naah woln kichakpiik ni na, le Simonn ni ujɔ̄tiib mu fii ki nyan, ki bi ban u, <sup>37</sup> le ki ti kan u, le ki bui u ke, “Binib mɔ̄mɔ̄k bi ban si la.”

<sup>38</sup> Le u bui bi, “Cha ti buen ntim muken ni, aan m ti tuk bi mu Uwumbor aabor. Nima le cha m nyan ni Uwumbor do.”

<sup>39</sup> Le u buen Galilee aatim mɔ̄mɔ̄k ni, ki koo mmeen aadir ni, ki tuk binib Uwumbor aabor, le ki nyan tiyayaar binib ponn ni.

### **Yesu aah cha ukɔ̄ndaan pɔ̄ok pu na**

(Matiu 8.1-4; Luk 5.12-16)

<sup>40</sup> Ukɔ̄ndaan ubaa nan dan Yesu chee, le ki nan gbaan unimbiin ni, ki gaŋ u ke u ter u, le ki bui u ke, “Aa yaa gee kan, aa ga ɻ̄maa cha m pɔ̄ok.”

<sup>41</sup> Le kinimbaak chuu Yesu. Le u taln uŋjaal, ki meeh u, ki bui u, “M gee. Aa pɔ̄ok.” <sup>42</sup> Libuul ngbaan ni le u pɔ̄ok, kaa ki ye ukɔ̄ndaan. <sup>43</sup> Le Yesu bui u ke u li cha, ki sur u mbamɔ̄m ke, <sup>44</sup> “Li nyi ki taa tuk unii ubaa. Li cha Uwumbor aatotoor chee, ki ti di aabaa mɔ̄k u, ki toor kitork tii Uwumbor ke Moses aakaal aah len pu na. Nima le ga mɔ̄k binib ke aa pɔ̄ok a.”

<sup>45</sup> Le uja ngbaan buen, ki joo tibɔ̄r ngbaan tuk binib mɔ̄mɔ̄k. Waah ja kina na, le Yesu aa ki ɻ̄maa koo kitij kibaa ni, binib aanimbil ni. U nan gur bi kipɔ̄ok ni la. Le binib nya itingbaan mɔ̄mɔ̄k ni, ki chaa u chee.

**Yesu aah cha uja u aawon  
faan na pɔɔk pu na**

(Matiu 9.1-8; Luk 5.17-26)

**2** Iwiin ilee aah jer na, le Yesu ki gir  
buen Kapenaum aatiŋ ni. Le binib  
ŋjun ke u bi linampal.<sup>2</sup> Le kinipaak kuun  
ni nima chee. Baah wiir pu na, mpaan aa  
nan ki gur mbisamɔb chee, ubaa ki sil.  
Le u tuk bi Uwumbɔr aabɔr.<sup>3</sup> Waah bi  
tuk bi Uwumbɔr aabɔr na, le binib bibaa  
fuu ni, ki luln ni unii u aawon faan na  
likekeln ni. Binib binaa le nan luln ni  
u.<sup>4</sup> Kinipaak ngbaan pu, baa nan ŋmaa  
koo ni Yesu chee. Le bi jon kidiik paab,<sup>5</sup>  
ki chee liboln ki tuur waah si nin chee  
kidiik ponn ni na, le ki di baah luln ni  
unii u likekeln ni na ŋa liboln ngbaan  
ponn ni, ki di u bil Yesu aanimbiin ni.<sup>6</sup>  
Le Yesu kan baah gaa u ki kii mbamɔm  
pu na, le ki bui uja u aawon faan na ke,  
“Maabo, m di cha pinn saatunwanbir.”

Uwumbɔr aakaal aamɔmɔkb bibaa  
nan ka nima, le ki bi dak bisui ni ke,<sup>7</sup> “Ba  
ŋa uja wee len kina? U sii Uwumbɔr la.  
Ubaa aan ŋmaa di cha pinn titunwanbir,  
see Uwumbɔr baanja.”

Le Yesu bee baah dak pu na, le ki baa  
bi, “Ba ŋa ni dak kina nisui ni?<sup>8</sup> Maah  
bui uja u aawon faan na ke m di cha  
waatunwanbir pinn u na le pɔɔ, aan m  
yaa bui u ke u fiin ki yoor waawan-  
dookaan ki li chuun, le pɔɔ?<sup>10</sup> M ga mɔk  
nimi ke min, Unibɔn Aabo kpa mpɔɔn  
dulnyaa wee ni ke m di cha pinn titun-  
wanbir.” Waah len kina na, le u bui uja  
u aawon faan na ke,<sup>11</sup> “M bui si la, fiin,  
ki yoor saawandookaan, ki li chaa kun.”

<sup>12</sup> Libuul ngbaan ni le u fii sil, ki  
yoor waawandookaan, ki nyan lipaal bi  
mɔmɔk aanimbil ni. Le ni gar bi mɔmɔk  
pam. Le bi nyuŋ Uwumbɔr ki bui ke,  
“Taa kee kan kina.”

<sup>11</sup><sup>2:4</sup> : Bi yaa maa kidiik kan, baa di timoor pinn ki, kaa maa lidikokoln. Bi nan di  
idɔ paan puln tidir paab, le ki di titan pɔr biin. Bi nan maa ŋibimbin le ki taa joi  
kidiik aapaacham.

**Yesu aah yin Liifai pu na**

(Matiu 9.9-13; Luk 5.27-32)

<sup>13</sup> Yesu nan ki gir buen nnyusakpem  
ni. Le kinipaak dan u chee. Le u tuk bi  
Uwumbɔr aabɔr.<sup>14</sup> Waah cha na, le u  
kan ulampoogaar ubaa u ka baah gaal  
lampoo nin chee na. Bi yin u ke Liifai, le  
ute ye Alfeus. Le Yesu bui u, “Li dii mi.”  
Le u fii, ki dii u.

<sup>15</sup> Nee aapuwɔb, le Yesu bi Liifai do, ki  
bi ji tijikaar. Le bilampoogaab ni titun-  
wanbirdam nan wiir, ki dii Yesu. Le bi  
ponn ni pam mu ka u ni waadidiliib  
chee, ki bi ji tijikaar.<sup>16</sup> Le Uwumbɔr  
aakaal aamɔmɔkb bibaa, bi ye Farisii  
yaab na aah kan ke Yesu bi ji bil-  
ampoogaab ni titunwanbirdam chee ti-  
jikaar na, le bi baa waadidiliib, “Ba ŋa u  
ji bilampoogaab ni titunwanbirdam chee  
tijikaar?”

<sup>17</sup> Le Yesu ŋjun baah len pu na, le ki bui  
bi, “Binib bi kpa laafee na aa ban dɔkta,  
see bi bun na le ban dɔkta. Maa dan ke m  
nan yin bininyaam. M dan ke m nan yin  
titunwanbirdam bi nan kpeln baabimbin  
la.”

**Kimɔlul aabɔr**

(Matiu 9.14-17; Luk 5.33-39)

<sup>18</sup> Le Jɔnn aadidiliib ni Farisii yaab  
nan bi lulni bumɔb. Le binib bibaa dan  
nan bui Yesu ke, “Jɔnn aadidiliib ni  
Farisii yaab aadidiliib lulni bumɔb la. Ba  
pu saadidiliib ma aa lulni?”

<sup>19</sup> Le u baa bi, “Bicham bi dan bi  
nan ji ubɔndinn aajim na ga ŋmaa lul  
bumɔb buyoonn upiidinn bi bi chee na  
aa? Aayii. Buyoonn upiidinn bi bi chee  
na, baan ŋmaa lul bumɔb.<sup>20</sup> N-yoonn  
mu choo, le bi ga chuu nyan upiidinn na  
bi chee mpɔɔn. N-yoonn ngbaan le bi ga  
lul bumɔb.

<sup>21</sup> “Ubaa aan di likekepoln aageln, ki di lej libokukpokl. U yaa ḷa kina kan, likekepoln aageln na ga kar libokukpokl na. Liboln ngbaan ga waar ki jer njan yaan. <sup>22</sup> Ubaa mu aan di ndawiin, ki di ḷa kilookpok ponn ni. U yaa ḷa kina kan, kilookpok na ga puu, ki bii. Ndaan na mu ga kpir. Bi ga di ndawiin ki di ḷa kilo-opoŋ ni la.”

### Juu yaab aakpaakool daal aabor

(Matiu 12.1-8; Luk 6.1-5)

<sup>23</sup> Juu yaab aakpaakool libaa daal, le Yesu ni waadidiliib bɔ̄ dii kisaak kibaa ponn ni. Baah chuun ki cha na, le waadidiliib joo tijikaar na geei, bi ti ḷmo. <sup>24</sup> Le Farisii yaab nan baa Yesu ke, “Ba ḷa saadidiliib ḷani kina? Timi aakaal aa kii ke bi ḷa kina likpaakool daal.”

<sup>25</sup> Le u baa bi, “Naa karn Ubɔ̄ David aah nan ḷa pu na aa? Nkon nan joo u ni waanib. Baa nan kpa tijikaar. <sup>26</sup> Le u koo Uwumbɔ̄ Aadichal ni, buyoonn Abiatar nan ye Uwumbɔ̄ aatotoorninkpel na, le ki di Uwumbɔ̄ aaboroboro ḷman, ki joo ti tii waanib mu, bi ḷman. Baah ḷa kina na, le bi bii Moses aakaal mu len ke Uwumbɔ̄ aatotoorb baanja le ga ḷmo boroboro ngbaan na.

<sup>27</sup> “M tuk nimi la, unibɔ̄n pu le likpaakool daal bi, naa ye likpaakool daal pu le unibɔ̄n bi. <sup>28</sup> Min Unibɔ̄n Aabo le ye likpaakool daal mu Aadindaan.”

### Yesu aah cha uja u aanjaal faan na pɔ̄ok pu na

(Matiu 12.9-14; Luk 6.6-11)

**3** Le u ki gir buen mmeen aadiik ni. Le uja u aanjaal faan na bi nima. <sup>2</sup> Le bi lik Yesu, ke u ga cha uja ngbaan pɔ̄ok likpaakool daal aan waan cha u pɔ̄ok. Ba pu? bi ban bi kan nsan aan ki galn u ke u bii likpaakool daal. <sup>3</sup> Le Yesu bui uja u aanjaal faan na ke, “Nan sil tikaasisik ni,” <sup>4</sup> le ki baa bi, “Likpaakool daal kan, ti ga ḷa ni ḷan na aan ni kaa ḷan na? Ti ga tii

unii limɔ̄fal aan ti ga ku u? Timi aakaal mɔ̄k timi kinye?”

Le baa len tibaa. <sup>5</sup> Le u lik bi mɔ̄mɔ̄k, le ki gee lijuul bi pu. Bitafal aah pɔ̄o pu na, le ni bii usui. Le u bui uja u aanjaal faan na ke, “Taln aanjaal.” Le u taln ujaal. Le mu pɔ̄ok. <sup>6</sup> Le Farisii yaab ngbaan nyan lipaal, le ki buen Ubɔ̄ Herod aanib chee, le ki kpokl baah ga ḷa pu ki ku Yesu na.

### Kinipaak aah nan kuun nnyusakpem chee pu na

<sup>7</sup> Yesu ni waadidiliib nan buen Galilee Aanyusakpem ni. Le kinipaak dii u. Bi nyan ni Galilee aatim ni la, ni Judea aatim ni, <sup>8</sup> ni Jerusalem, ni Idumea aatim ni, ni ntim mu bi Jɔ̄oddann aamɔ̄odapuul na, ni Taya ni Saidonn aatingbaan ni. Bi nan wiir sakpen a. Bi ḷun Yesu aah tun lijinjiir aatun pu na. Nima le cha bi dan u chee. <sup>9</sup> Le u bui waadidiliib ke bi di buŋɔ̄ deen nnyun pu, nnyusakpem aagbaan chee, aan u koo ni, kinipaak ngbaan taa muen u. <sup>10</sup> U nan tii binib pam laafee. Nima le bibum mɔ̄mɔ̄k tur tɔ̄b, bi ti fuu u chee aan ki di bijaal meeh u. <sup>11</sup> Tiyayaar ti joo binib na aah kan u na, le ti cha bi gbaan unimbiin ni, le ki teen ke, “Aa ye Uwumbɔ̄ Aajapɔ̄on la.”

<sup>12</sup> Le Yesu kae tiyayaar ngbaan ke, “Taa li joo mi mooni man.”

### Yesu aah nyan waakpambalb kipiik ni bilee pu na

(Matiu 10.1-4; Luk 6.12-16)

<sup>13</sup> Yesu nan jon lijool paab, le ki yin waah ban binib bi na ke bi dan u chee. Le bi dan u chee. <sup>14</sup> Le u nyan bijab kipiik ni bilee, bi ti li bi u chee. Le u yin bi ke waakpambalb. U nyan bi ke u tun bi, aan bi ti tuk binib Uwumbɔ̄ aabor, <sup>15</sup> ki li kpa mpɔ̄on ki nyan tiyayaar binib ni.

<sup>16</sup> Waah nyan bijab kipiik ni bilee bi na aayimbil sɔ̄: Simonn, le Yesu duln u ke Piita; <sup>17</sup> Jems ni unaal Jɔ̄nn bi ye Sebedee aajapɔ̄tiib na, le Yesu duln bi

ke Boanejes. Boanejes aatataa le ye ke “Binib bi tar ke utaal na”;<sup>18</sup> ni Andru, ni Filip, ni Batolomiu, ni Matiu, ni Tomas, ni Jems u ye Alfeus aajapoon na; ni Tadeus; ni Simonn u nan ban u kuln waatiq aadim na;<sup>19</sup> ni Judas Iskariot, u ga nan kooh uma Yesu na.

**Binib bibaa aah sii Uwumbor  
Aafuur Nyaan pu na**

(Matiu 12.22-32; Luk 11.14-23; 12.10)

<sup>20</sup> Le Yesu chaa kun. Le kinipaak ki kuun ni u chee. Nima pu na, u ni waa-didiliib aa nan kpa nsan bi ji tijikaar. <sup>21</sup> Udoyaab aah qun kina na, le bi dan bi nan chuu u; ba pu? bi qun binib len ke u waara la.

<sup>22</sup> Uwumbor aakaal aamomokb bi nyan ni Jerusalem na le bui ke kinimbɔŋ, ki bi yin ki ke Beelsebul, u ye tiyayaar aayidaan na, le joo u ki tii u mpoon ke u nyan tiyayaar binib ni.

<sup>23</sup> Baah len kina na, le Yesu yin bi ke bi dan u chee, le ki qak bi qiyatajak ke, “Kinimbɔŋ ga ja kinye ki nyan kima kinimbɔŋ binib ni?” <sup>24</sup> Kitij kibaa ni aanib yaa yakr ki jaa kijaak kan, kitij ngbaan ga bee yɔli. <sup>25</sup> Lidichal libaa ni aanib yaa yakr ki jaa kijaak kan, lidichal ngbaan ga bee yɔli. <sup>26</sup> Kinimbɔŋ aanaan yaab yaa yakr ki jaa kijaak kan, kaan ki qmaa sil. Kaanaan ga doo.”

**Yesu aah nyan mpoondaan  
kinimbɔŋ ki bii kaawan pu na**

(Matiu 12.29; Luk 11.21-22)

<sup>27</sup> “Ubbaa aan qmaa koo mpoondaan<sup>§§</sup> aadichal ni, ki bii waawan, see u puen buu u le waahr, le ki nin bii waadichal.

<sup>28</sup> “M tuk nimi mbamɔn la, Uwumbor ga di cha binib aatunwanbir mɔmɔk ki pinn bi. Bi yaa sii u kan, u ga di cha pinn bi. <sup>29</sup> Uwumbor Aafuur Nyaan ma kan, unii yaa sii muma kan, Uwumbor aan di

cha pinn u. U ga li kpa taani n-yoonn mu kaa kpa ndoon na.” <sup>30</sup> Binib bibaa nan bui ke tiyayaar le joo Yesu. Nima le cha u len kina.

**Binib bi ye Yesu aana ni unaatiib na  
(Matiu 12.46-50; Luk 8.19-21)**

<sup>31</sup> Le Yesu aana ni unaatiib fuu ni ki si lipaal, le ki tun unii ke u ti yin Yesu.

<sup>32</sup> Le kinipaak ka gob Yesu. Le bi tuk u, “Lik, aana ni aanaatiib si lipaal ki ban si la.”

<sup>33</sup> Le u baa bi ke, “Qma ye nna? Bilabi ye nnaatiib?” <sup>34</sup> le ki fenn toŋ waa-didiliib bi ka gob u na, le ki bui ke, “Lik, nna ni nnaatiib so. <sup>35</sup> Ba pu? unii umɔk qjani Uwumbor aah gee pu na, uma le ye nnaal, ni nninkpan, ni nna.”

**Unii u yaa njikaabim na aayataqakl  
(Matiu 13.1-9; Luk 8.4-8)**

**4** Yesu nan ki gir buen Galilee aanyusakpem aagbaan, ki ti tuk binib Uwumbor aabɔr. Le kinipaak sakpeŋ ki kuun ni u chee. Baah wiir pu na, le u koo kal buŋɔb ni, nnyun ni. Kinipaak ngbaan mu nan si nnyusakpem aagbaan. <sup>2</sup> Le u tuk bi tibɔr pam qiyatajak ponn ni.

<sup>3</sup> U nan bui bi ke, “Li pel man, ukpaal ubaa le nan buen u ti yaa njikaabim.

<sup>4</sup> Waah yaa njikaabim ngbaan na, le mubaa lir nsan ni. Le inyoondan, ki nan peei jin. <sup>5</sup> Le mubaa mu lir ntakpatee paab, titan aah kaa wiir nin chee na. Titan aah kaa wiir na, le mu guu punn mala. <sup>6</sup> Le nwiin puu, ki ton, ki see mu. Mu aah kaa kpa inyaan mbamɔm na, le mu yɔl, ki kpo. <sup>7</sup> Le mubaa mu lir ikokon ponn ni. Le ikokon muun, le ki ku mu, le mu aa mar. <sup>8</sup> Le mubaa mu lir kitij ki qan na ponn ni, ki punn, le ki muun, ki mar. Ngem lun piitaa piitaa, ngem

<sup>§§</sup>3:27 : Mpoondaan na ye kinimbɔŋ la. Le Yesu kpa mpoon jer u ki buu u.

mu lun imonko itata, ngem mu lun nkub nkub.

<sup>9</sup> “U kpa litafal na kan, u ɣun.”

### ɻitaa ɻi pu u ɻak bi ɻiyataŋak na

(Matiu 13.10-17; Luk 8.9-10)

<sup>10</sup> Yesu aah bi ubaa na, le waadidiliib kipiik ni bilee na, ni binib bi nan bi u chee na nan dan ki nan baa u waay-ataŋak ngbaan aatataa. <sup>11</sup> Le u bui bi ke, “Uwumbor le cha ni bee waanaan aabɔɔrkaan. Binib bi kaa bi waanaan ni na, u ɻak bima le ɻiyataŋak,

<sup>12</sup> ‘Aan bi lik ki lik, kaa waa, ki pel ki pel, kaa beer naatataa. Bi yaa ɣun ki bee naatataa kan, nibaakan bi ga kpeln baabimbin, aan Uwumbor di cha baatunwanbir ki pinn bi.’”\*

### Unii u yaa njikaabim na aayataŋakl aatataa

(Matiu 13.18-23; Luk 8.11-15)

<sup>13</sup> Le Yesu baa bi ke, “Naa bee liy-ataŋakl ngbaan aatataa aa? Ni ga ɣanye ki bee ɻiyataŋak ɣiken aatataa?

<sup>14</sup> Liyataŋakl ngbaan aatataa le ye ke ulkaal ngbaan le ɣaj unii u tuk binib Uwumbor aabor na. <sup>15</sup> Ndibim mu lir nsan ni na le ɣaj binib bi ɣun Uwumbor aabor na. Libuul ngbaan ni le kinimbɔŋ dan ki nan nyan ti bisui ni. <sup>16</sup> Mu lir ntakpateer pu na le ɣaj binib bi ɣun tibor ngbaan, ki gaa ti mala ni mpopiin na. <sup>17</sup> Bi mu aa gaa ti bisui ni mbamɔm, kaa joo ti ni yunn. Bi yaa kan limukl ti pu kan, bee binib yaa ɣa bi falaa ti pu kan, libuul ngbaan ni le bi ga di ti lii. <sup>18</sup> Binib bibaa mu bi ke njikaabim mu lir ikokon ponni na la. <sup>19</sup> Bi ɣun tibor ngbaan la. Le dulnyaa wee ni aabor, ni liwankpal aakɔrk, ni tiwan aabɔŋ aakɔrk mu koo

bisui ni, le ki ku tibor ngbaan bisui ni, le taa mar. <sup>20</sup> Mu lir kitij ki ɣan na ponni na le ɣaj binib bi ɣun tibor ngbaan, ki gaa ti, le ki mar. Ngem mar piitaa piitaa, ngem mu mar imonko itata, ngem mu mar nkub nkub.”

### Karyaa aayataŋakl

(Luk 8.16-18)

<sup>21</sup> Le u baa bi ke, “Unii yaa see karyaa kan, u ga di lisambil chij u pu uu? U ga di siin tiwandookaan aataab la aa? Waan di tɔŋ tiwan nibaa pu la aa? <sup>22</sup> Tibor timok bɔɔ na, ti ga kpiir. Tibɔɔrkaan mɔmɔk mu ga nyan mpaan pu. <sup>23</sup> U kpa litafal na kan, u ɣun.”

<sup>24</sup> “Cha nitafal li bi naah ɣun ti na ni man. Naah tii pu na, Uwumbor mu ga giin kina le ki tii nimi. U ga tii nimi ki jer naah tii pu na. <sup>25</sup> Unii umok kpa na, Uwumbor ga kpee u. Unii u kaa kpa na, Uwumbor ga chuu gaa waah kpa ni pɔkkaa na.”†

### Tijikaar aah ɣa pu na aayataŋakl

<sup>26</sup> “Uwumbor aanaan naahn njikaabim mu uja bun waasaak ni na la. <sup>27</sup> U geeni kinyeek, kitaak yaa woln kan, u fii. Le njikaabim ngbaan ga punn, ki muun. Waa nyi mu aah ɣa pu ki punn, aan ki muuni na. <sup>28</sup> Kitij ngbaan le cha tijikaar ɣa. Njan le mu punn, le ki nin muun ki poo, le ki mar. <sup>29</sup> Ti yaa nan biir kan, ni ɣeer lijikaacheel la. Nima pu na, u ga di gɔrk, ki buen ti chee ti.”

### Tisufar aabil aayataŋakl

(Matiu 13.31-32, 34; Luk 13.18-19)

<sup>30</sup> Yesu nan baa bi ke, “M ga di ba ki di ɣaj Uwumbor aanaan? M ga di liyataŋakl bayaar ki di ɣaj mu? <sup>31</sup> Mu naahn linaanyiimbil la. Libil ngbaan le

\*4:12 : Lik Aisaya 6.9-10.

†4:25 : Naatataa le ye ke unii u pel Uwumbor aabor na, Uwumbor ga cha u moo ɣun. Unii u kaa pel na, Uwumbor aan ki cha u ɣun.

ye libil waatiir, njibil mɔmɔk filk jer lima la.<sup>32</sup> Bi yaa di li bun kan, li ga punn ki muun ki jer tisufar mɔmɔk, ki ja ibon i filk na. Le inyooin i laani paacham na ga njmaa ter yaadil ibon ngbaan pu.”

<sup>33</sup> Kina le Yesu di njiyatanjak njimina aaboln pam tuk bi Uwumbor aabɔr. U njak bi njiyatanjak ki ti neer baah ga njmaa pel pu na la.<sup>34</sup> Waa len tibaa bi chee, see njiyatanjak njmeen. U ni waadidiliib aah bi bibaa na, le u neer njiyatanjak ngbaan aatataa tuk bi.

### Yesu aah ja pu ki cha kibuj njmin na

(Matiu 8.23-27; Luk 8.22-25)

<sup>35</sup> Nwiin ngbaan daal aajook, le u bui waadidiliib ke, “Cha ti puur nnyusakpem man.”<sup>36</sup> Le bi siir kinipaak ngbaan chee, ki koo u chee bujɔb ni. Injoi iken mu nan bi nima chee.<sup>37</sup> Baah cha na, le kibuj ti fii ki bi daa. Le tinyunkpenn fii yeqni, ki koo bujɔb ngbaan ponn ni, le bu ban bu liin.<sup>38</sup> Yesu mu dɔ liyikukur pu geen, liŋjjuul wɔb. Le bi dan nan finn u, le ki bui u ke, “Umɔmɔkr, ti yaa bee nnyun ni kan, aatafal aa bi ti ni ii?”

<sup>39</sup> Le u fii ki kae kibuj ngbaan, le ki bui nnyun ngbaan ke, “Doon suuna.” Libuul ngbaan ni, le kibuj ngbaan njmin, nnyun mu doon suuna, ni mɔmɔk njmin chii.<sup>40</sup> Le u baa bi, “Ba ja ni san ijawaan? Naa kee gaa mi ki kii mbamɔm aa?”

<sup>41</sup> Tɔ, ijawaan nan chuu bi sakpen, le bi baa tɔb ke, “Ba aanibol bi na? Kibuj ni nnyun mu kpaan kii waamɔb.”

### Yesu aah cha uwaar pɔɔk pu na

(Matiu 8.28-34; Luk 8.26-39)

**5** Le bi fuu nnyusakpem aadapuul, Gerasiin yaab aatiŋ ni.<sup>2</sup> Le uwaar ubaa nan bi nima.<sup>3</sup> Waakookoo yaan nan ye baah sui binib titakpalunn ti ponn ni na la. Ubaa aa njmaa baa u kaan. Bi yaa buu u tikululn kan, u keei ti la.<sup>4</sup> Bi nan joo idɔribi ni tikululn buu u kpala kpala.

Le u keei tikululn ngbaan, ki gbaa wiir idɔribi mu. Ubaa aa njmaa tiŋ u.<sup>5</sup> Nwiin pu ni kinyeek, u po bi njikaakul ngbaan ni, ni njigongon paab, ki tar, ki joo njitakpal geei ubaa.

<sup>6</sup> Yesu aah nyan bujɔb ni na, le uwaar ngbaan bi dandar, ki kan u, ki san nan tooh u nsan ni, le ki nan gbaan unimbiin ni, ki doon u.<sup>7-8</sup> Le Yesu bui ke, “Tiyayaar, nyan uja ngbaan ni.” Le u teen ki len mpɔɔn pu ke, “Yesu, si u ye Uwumbor u kaa kpa njeen aatɔ na Ajapɔɔn na, aa ban ba m chee? M gaŋ si Uwumbor pu, taa ja mi falaa.”

<sup>9</sup> Le Yesu baa u, “Bi yin si ke ba?”

Le u bui u, “Ti ye tiyayaar ti wiir na la, nima le bi yin mi ke Kipaak,”<sup>10</sup> le ki gaŋ u sakpen ke u taa jenn nyan ti kitij kee ni.

<sup>11</sup> Igbeer ibaa mu nan bi nima chee, ki wiir, ki chuun ji limɔɔgongoln paab.<sup>12</sup> Le tiyayaar ngbaan gaŋ Yesu ke, “Cha ti ti koo igbeer ngbaan ni.”<sup>13</sup> Le u kii. Le ti nyan uja ngbaan ni, ki ti koo igbeer na ni. Le igbeer mɔmɔk san sunn limɔɔgongoln taab, ki ti koo nnyun ni, ki bee nnyun ni. I ga nan li fuu njichur njilee.

<sup>14</sup> Le bijab bi kii igbeer ngbaan na san buen kitij ni, ni itingbaan ni, ki ti tuk binib tibɔr ngbaan. Binib aah njun kina na, le bi dan bi nan lik budabu ja na,<sup>15</sup> le ki fuu ni Yesu chee, ki kan uja u tiyayaar ti wiir na nan joo u na ka nima. U cheer, ki pee tiwanpeenkaan, kaa ki chuun ujmeen. Le ijawaan chuu bi.<sup>16</sup> Binib bi kan Yesu aah nyan tiyayaar uja ngbaan ni pu na nan tuk bi Yesu aah ja pu na, ki tuk bi naah ja igbeer ngbaan mu pu na.<sup>17</sup> Le bi gaŋ Yesu ke u nya baatiŋ ni.

<sup>18</sup> Le u gir ti koo bujɔb na ni. Waah gir u ti koo bujɔb ni na, le uja u tiyayaar nan joo u na gaŋ u ke u cha u dii u.<sup>19</sup> Le u yii, le ki bui u, “Gir kun, ki ti tuk aadoyaab Uwumbor aah san si kinimbaak ki tun litukpaan tii si pu na.”

<sup>20</sup> Le u buen, ki di bɔ̄ dii kitij ki bi yin ki ke Ntim Kipiik na ni, le ki tuk binib Yesu aah tun litukpaan pu ki tii u na. Le ni gar bi momɔ̄k pam.

**Yesu aah cha upii ubaa pɔ̄ok aan ki fikr upiibo nkun ni pu na**  
(Matiu 9.18-26; Luk 8.40-56)

<sup>21</sup> Yesu nan ki gir puur nnyusakpem aadapuul, buŋɔ̄b na ni. Waah ti fuu nima na, le kinipaak sakpeŋ kuun ni u chee. Le u si nnyun aagbaan. <sup>22</sup> Le uja ubaa dan u chee. U ye mmeen aadiik ni aaninkpel ubaa la. Le bi yin u ke Jairus. Waah kan Yesu na, le u nan gbaan unimbiin ni, <sup>23</sup> ki gan u sakpen le ki bui u ke, “Ni yaa ki kpee siib na kan, mbisal ga kpo. M gan si la, dan nan di aajaal ki di paan u pu, aan u pɔ̄ok ki taa kpo.”

<sup>24</sup> Le Yesu dii u buen. Le kinipaak ngbaan mu dii Yesu, ki mueni u.

<sup>25</sup> Le upii u fu tipiir ɔ̄jibin kipiik ni ɔ̄jilee taa door na, mu bi nima chee.

<sup>26</sup> U nan chaa biteteeb chee, ki kan falaa aabɔ̄j momɔ̄k, ki jin waamombil momɔ̄k doo, le naa soor. U nan moo buŋni la. <sup>27-28</sup> Le u ɔ̄jun Yesu aabor, le ki len usui ni ke u yaa po meeh waawanpeenkaan kan, u ga pɔ̄ok. Le u bɔ̄ kinipaak ngbaan ponn ni, ki paan Yesu aapuwɔ̄b, ki taln ujaal, ki meeh waawanpeenkaan.

<sup>29</sup> Libuul ngbaan ni, le u pɔ̄ok, ki bee uwon ponn ni ke iween ngbaan doo a. <sup>30</sup> Le Yesu bee usui ni ke mpɔ̄ɔ̄n ngem nyan u ni a. Le u fenn kini-paak ngbaan ni, ki baa ke, “Ijma meeh maawanpeenkaan?”

<sup>31</sup> Le waadidiliib bui u, “Aa kan kini-paak ngbaan aah kpei si pu na, le aa baa ke ijma meeh si?”

<sup>32</sup> Le u fenn, ki lik ɔ̄jipepel momɔ̄k ke u kan udaan u meeh u na. <sup>33</sup> Le upii ngbaan bee tiwan ni ɔ̄ja u na. Ijawaan mu chuu u, le uwon gbaa. Le u dan nan gbaan Yesu aanimbiin ni, ki tuk u waabor momɔ̄k. <sup>34</sup> Le Yesu bui u,

“Mbisal, saah gaa mi ki kii mbamɔ̄m pu na, nima le cha aa pɔ̄ok. Li cha ni mpopiin. Saaween ngbaan aan ki fii.”

<sup>35</sup> Yesu aah len kina na, le binib bibaa nyan ni Jairus do, ki tooh ni bi nsan ni, ki nan bui Jairus ke, “Aabisal kpo a. Taa ki cha Umɔ̄mɔ̄kr ngbaan ɔ̄jani falaa ki cha aado.”

<sup>36</sup> Yesu nan ɔ̄jun baah len pu na, le ki bui Jairus, “Tii mi naadii, ki taa san ijawaan.” <sup>37</sup> Yesu aa nan cha ubaa ki dii u ki kpee Piita ni Jems, ni Jems aanaal Jɔ̄nn pu. <sup>38</sup> Yesu nan fuu Jairus do le ki ɔ̄jun kifuuk pu. Binib bi nima ki wiir, ki wii ikpowiil, ki kaani. <sup>39</sup> Le u koo lidichal ngbaan ni. Waah koo ni na, le u baa bi, “Ba ɔ̄ja ni kpa kifuuk kina, ki wii? Ubo ngbaan aa kpo. U geen la.”

<sup>40</sup> Le bi laa u sakpen. Le u jenn nyan bi momɔ̄k lipaal, <sup>41</sup> ki di ubo ngbaan aate ni una, ni waadidiliib bitaa na, ki di koo waah bi kidiik ki ponn ni na, le ki ti chuu ujaal, ki bui u ke, “Upiibo, m bui si la, fiin.”

<sup>42</sup> Libuul ngbaan ni, le u fii sil, ki chuun gonni. U nan ye ɔ̄jibin kipiik ni ɔ̄jilee aabo la. Le ni gar bi ki ti nyaj. <sup>43</sup> Le Yesu bui bi ke bi taa tuk unii ubaa, le ki bui bi ke bi tii upiibo ngbaan tijikaar u ji.

**Nasaref aatij aanib aah yii Yesu pu na**

(Matiu 13.53-58; Luk 4.16-30)

**6** Yesu nan siir nima chee, ki gir buen udo aatij ni. Le waadidiliib dii u. <sup>2</sup> Likpaakool daal, le u buen mmeen aadiik ni, ki ti tuk binib Uwumbɔ̄r aabor. Kinipaak ki bi nima na aah ɔ̄jun waaliin na, ni gar bi pam. Le bi baa tɔ̄b ke, “Uja wee kan nimina momɔ̄k la chee? U tee kpa ba aalanboln na? Waah tun lijin-jiir aatun pu na, u ɔ̄jani kinye ki tun ɔ̄j? <sup>3</sup> Waa ye kapenta na aa? Waa ye Mari aajapɔ̄ɔ̄n la aa? Waa ye Jems, ni Joses, ni Judas, ni Simonn aakpel la aa?

Uninkpatiib aa bi do chee na la aa?"  
Binib ngbaan nan len kina ki yii u.

<sup>4</sup>Le u bui bi, "Binib pak Uwumbor aabonabtiib la, see bido aatiij ni aanib, ni baamaal, ni baachiln ni aanib baanja le aan pak bi."

<sup>5</sup>Le u di unjaal paan bibum siib pu, ki cha bi pook, kaa ki qmaa tun lijinjiir aatuln liken nima chee; ba pu? baa nan gaa u ki kii. <sup>6</sup>Baah kaa gaa u ki kii na, le ni gar u pam.

**Yesu aah tun waadidiliib  
kipiik ni bilee pu na**

(Matiu 10.5-15; Luk 9.1-6)

U nan bɔ̄ dii itingbaan ni, le ki tuk binib Uwumbor aabɔ̄r. <sup>7</sup>Le u yin waadidiliib kipiik ni bilee na ke u tun bi nibaa chee, bilelee, bilelee. U tii bi mpɔ̄ɔ̄n ke bi ti nyan tiyayaar binib ni, <sup>8</sup>le ki bui bi, "Ni taa tun lisachuln aatuln libaa. Ni taa li joo nibaa see kijaangbeek baanja. Ni taa li joo tijikaar, ki taa li joo litaakor, ki taa li joo qimombil tikpalonn ni, ki taa li joo libokul ki kpee naah pee li na pu. <sup>9</sup>Ni li tak qjinaatak man. <sup>10</sup>Naah ti koo lidichal li ponn ni na, ni li bi li ponn ni ki ti saa bundaln ni ga nyan kitij ngbaan ponn ni na, ki taa ki kpeln lidichal. <sup>11</sup>Kitiij kibaa aanib yaa kaa gaa nimi, ki yaa yii nimi aabɔ̄r kan, ni nya nima, ki kpaar nitaa aatatan lii nima. Nimina le ga li ye nsurm ki tii bi."

<sup>12</sup>Waadidiliib ngbaan nan buen, le ki ti bui binib, "Kpeln nimi aabimbin man."

<sup>13</sup>Bi nan nyan tiyayaar binib pam ponn ni, ki di nkpan nuk binib pam aayil, le bi pook.

<sup>14</sup>Yesu aayimbil nan moon qipepel mɔ̄mɔ̄k ni. Le Ubɔ̄r Herod mu ti qun u pu, le ki bui ke Jɔ̄nn u nan muini binib nnyun ni na le fikr nkun ni, nima le cha u kpa mpɔ̄ɔ̄n ki tun lijinjiir aatun ngbaan.

<sup>15</sup>Le biken mu bui ke u ye Uwumbor aabonabri Elaija u nan bi n-yaayoonn na la. Le biken mu bui ke u ye Uwum-

bɔ̄r aabonabri ke bibonabtiib bi nan bi n-yaayoonn na la.

**Jɔ̄nn u nan muini binib  
nnyun ni na aakun**

(Matiu 14.1-12; Luk 9.7-9)

<sup>16</sup>Tɔ̄, Ubɔ̄r Herod aah qun Yesu aabɔ̄r na, le u bui ke, "U ye Jɔ̄nn, u m nan chuu gii uyil na la. U fikr nkun ni la." <sup>17</sup>Budabu pu Ubɔ̄r Herod len kina na le ye ke u nan tun waajab bi ti chuu Jɔ̄nn, ki buu u tikululn, ki di u ja kiyondiik ni. Taani u cha u chuu u na, le ye ke Jɔ̄nn nan bui u ke waah ja pu na, naa qjan. Ba pu? Ubɔ̄r Herod nan kpa naal ubaa, bi yin u ke Filip, le u nan gaa unaal ngbaan aapuu u chee. Bi yin upii ngbaan ke Herodias. <sup>18</sup>Le Jɔ̄nn bui Ubɔ̄r Herod ke waah gaa unaal aapuu na, u bii Uwumbor aakaal.

<sup>19</sup>Nima pu le Herodias nan nann Jɔ̄nn, ki ban u ku u, kaa qman; <sup>20</sup>ba pu? Ubɔ̄r Herod aa nan cha u ja u nibaa. Herod san Jɔ̄nn ki bee ke u ye uninyaan u bi chain na la. Nima pu na, Herod nan gee u li pel waabɔ̄r. Waah nan qun waabɔ̄r ti na nan ja u ilandak sakpen a.

<sup>21</sup>Le Ubɔ̄r Herod aamaal aawiin daal nan fuu. Le u ja tijikaar pam, ki yin bininyuum, ni waajab aaninkpiib, ni Galilee aatiij aaninkpiib ke bi dan nan ji. <sup>22</sup>Baah bi ji tijikaar ngbaan na, le Herodias aabisal dan nan waa liwaal bi mɔ̄mɔ̄k aanimbiin ni. Le ni mɔ̄ɔ̄r Ubɔ̄r Herod, ni binib bimɔ̄k nan bi ji u chee tijikaar na. Le Ubɔ̄r Herod bui u ke u ga tii u ipiin. U yaa len waah ban pu na kan, nima le u ga tii u. <sup>23</sup>U nan puu Uwumbor ke u ga tii u waah ban pu na; ni yaa po ye waanaan ligeln kan, u ga tii u.

<sup>24</sup>Le usapɔ̄ɔ̄n ngbaan buen ti baa una ke, "M ga bui u ke u tii mi ba?"

Le una Herodias kan nsan mu u ga di ku Jɔ̄nn na, le ki bui waabo ke, "Li cha ti bui u ke aa ban Jɔ̄nn u muini binib nnyun ni na aayil la."

<sup>25</sup> Le u gir buen Ubɔr Herod chee mala, ki ti bui u ke, “M ban ke aa di Jənn u muini binib nnyun ni na aayil, ki di ja likusambil ponn ni, ki di tii ni mi dandana wee.”

<sup>26</sup> Waah len kina na, le ni bii Ubɔr Herod aasui sakpen. Waah puu tipuur ti bicham aanimbil ni na, nima le waa ban ke ti bee. <sup>27</sup> Libuul ngbaan ni le u tun waajab ponn ni ubaa ke u ti li joo ni Jənn aayil. Le uja ngbaan buen kiyondiik ni, ki ti chuu gii ni Jənn aayil, <sup>28</sup> ki di ja likusambil ponn ni, ki joo ni nan di tii usapɔɔn ngbaan. Le u mu di ti tii una. <sup>29</sup> Jənn aadidiliib aah ḷun kina na, bi dan nan yoor linikpol ngbaan, ki ti di sub.

**Yesu aah kpiin bijab  
ŋichur ŋijmu pu na**  
(Matiu 14.13-21; Luk 9.10-17; Jənn 6.1-14)

<sup>30</sup> Yesu aakpambalb nan ki gir ni u chee, ki nan tuk u baah tuk binib Uwumbɔr aabɔr, ki tun lituln mɔmɔk pu na. <sup>31</sup> Binib mu nan bi nima chee ki wiir, bibaa choo, biken mu gir. Nima pu na, u ni waadidiliib aa nan kpa mpaan bi ji tijikaar. Le u bui bi, “Cha ti buen kipɔɔk ni, binib aah kaa bi nin chee na, ki ti li bi tibaa, ki kal ki fuur.” <sup>32</sup> Le bi koo buŋɔb ni, ki kpak nnyusakpem aagbaan, ki ti bi kipɔɔk ni bibaa.

<sup>33</sup> Binib nan kan baah cha pu na. Le bi ponn ni pam bee bi, le ki nyan itingbaan mɔmɔk ni, ki san kpak nnyusakpem aagbaan, ki ti puen bi fuu nima. <sup>34</sup> Yesu aah nan ti fuu nima ki nyan buŋɔb ni na, u kan kinipaak sakpen. Bi nan bi ke ipiih i chuun kaa kpa upihkpaal na. Nima le u san bi kinimbaak, ki tuk bi Uwumbɔr aabɔr pam. <sup>35</sup> Kijook aah joor na, le waadidiliib dan nan bui u ke, “Ti bi kipɔɔk ni la. Kijook mu joor a. <sup>36</sup> Cha binib ngbaan buen itingbaan ni ki ti daa tijikaar ki ji.”

<sup>37</sup> Le u bui bi, “Nimi nibaa tii bi tijikaar bi ji man.”

Le bi baa u, “Ti ga di iwiin ikui ilee aapal ki daa tijikaar ki nan tii bi, bi ji ii?”

<sup>38</sup> Le u baa bi, “Ni kpa ŋiboroboro kpin ŋiŋja? Li cha ti lik man.”

Le bi buen ti lik, ki gir ni nan tuk u ke, “Ti kpa ŋiboroboro kpin ŋiŋmu ni ijan ilee.”

<sup>39</sup> Le u bui kinipaak ngbaan mɔmɔk ke, “Kalm kitij timosɔɔn pu man, ŋikpuk ŋikpuk.” <sup>40</sup> Le bi kal nkub nkub, ikuul piŋjemu pu. <sup>41</sup> Le u yoor ŋiboroboro kpin ŋiŋmu, ni ijan ilee ngbaan, ki waan lik paacham, ki doon Uwumbɔr, le ki gii gii boroboro ngbaan, ki di tii waadidiliib ke bi yakr siin binib ngbaan aanimbiin ni. Le u yakr ijan ilee ngbaan mu, ki di tii bi mɔmɔk. <sup>42</sup> Le bi mɔmɔk ŋman ki bab. <sup>43</sup> Baah ŋman ki bab na, le waadidiliib kuun boroboro ni ijan i gur na, ki gbiin tibɔɔkur kipiik ni tilee. <sup>44</sup> Bijab bi jin tijikaar ngbaan na nan ye ŋichur ŋiŋmu la.

**Yesu aah chuun nnyun pu pu na**  
(Matiu 14.22-33; Jənn 6.15-21)

<sup>45</sup> Libuul ngbaan ni, le Yesu muk waadidiliib ke bi gir koo buŋɔb na ni, ki loln u pu nsan, ki puur nnyusakpem aada-puul, ki buen Betseda aatij ni. Le u tuk kinipaak ngbaan ke bi li cha kun.

<sup>46</sup> Waah Choi bi na, le u jon lijool paab, u ti mee Uwumbɔr. <sup>47</sup> Le ni mue. Le u bi nima, ubaa. Waadidiliib mu nan bi buŋɔb ni, nnyusakpem aakaasisik ni. <sup>48</sup> Libuln mu daar ki tok bi sakpen ki muk bi. Le Yesu kan ke ni pɔɔ sakpen baah ga ŋaal buŋɔb pu aan bu chuun na. Ikooga aah wii buyoonn na, le u chuun nnyun paab, ki buen bi chee, ki ti ḷaj bi. U ba ga nan jer bi pu. <sup>49-50</sup> Le bi mɔmɔk kan u chuun nnyun pu. Baah kan u na, le bi dak ke ni ye utekpiir aawiin la. Le ijawaan chuu bi sakpen. Le bi faa ikuun.

Libuul ngbaan ni le u bui bi, "Chuu nibaa man. Min ye. Ni taa san ijawaan man," <sup>51</sup> le ki koo buŋjob ni bi chee. Waah koo buŋjob ni na, le libuln ŋmin. Le ni gar bi ki ti nyaj; <sup>52</sup> ba pu? bitafal aah pɔɔ pu na, nima le baa bee waah fe di boroboro tun lijinjiir aatuln pu na aatataa.

### **Yesu aah cha bibum pɔɔk Genesaret aatiŋ ni pu na**

(Matiu 14.34-36)

<sup>53</sup> Le bi fuu nnyusakpem aadapuul, Genesaret aatiŋ chee, le ki nyan buŋjob ni, ki di bu gbin. <sup>54</sup> Baah ti nyan buŋjob ni na, libuul ngbaan ni le binib bee Yesu, <sup>55</sup> ki san buen itingbaan mɔmɔk ni, ki luln ni bibum ŋikeken ni, ki joo ni bi u chee. Bi yaa ŋun waah bi nin chee na kan, le bi joo ni bibum u chee. <sup>56</sup> U yaa buen ntisakpem ni, bee itingbaan ni kan, bi joo ni bibum, ki nan bilni kinyaj ni, le ki mee u ke u cha bibum meeh waabɔkul aamɔjuul. Bimɔk meeh li na, libuul ngbaan ni le bi pɔɔk.

### **Biyaajatiib aakaal**

(Matiu 15.1-9)

**7** Le Farisii yaab ni Uwumbor aakaal aamɔmɔkb bibaa nyan Jerusalem, ki dan nan kuun Yesu chee. <sup>2</sup> Bi nan kan ke waadidiliib bibaa aah ji tijikaar pu na, bi bii baakaal; ba pu? baa ŋir bijaal.

<sup>3</sup> Farisii yaab ni Juu yaab biken dii biyaajatiib aakaal la. Bi yaa kaa ŋir bijaal mbamɔm kan, baan ji tijikaar. <sup>4</sup> Bi yaa nyan kinyaj ni kan, baan ji nibaa see bi puen fu nnyun waahr, le ki dii ikaal aabɔŋ aabɔŋ ke nimina na, ki ŋir ŋisambil, ni ŋibuu, ni tiyir, ni tiwandookaan, baakaal aah dii pu na.

<sup>5</sup> Le Farisii yaab, ni Uwumbor aakaal aamɔmɔkb ngbaan baa Yesu ke, "Ba ŋa saadidiliib aa dii tiyaajatiib aakaal? Bi ji tijikaar kaa ŋir bijaal."

<sup>6</sup> Le u bui bi, "Nimi biŋmaŋmannim, Uwumbor aabɔnbr Aisaya aah nan len nimi aabɔr na, u nan len mbamɔn la ke, 'Binib ngbaan pak Uwumbor bumɔb ni la.

Bisui daa u chee.

<sup>7</sup> Bi dooni u yɔli la, ki mɔk binib biyaajatiib aakaal, ke ni ye waakaal la." <sup>8</sup>\*

<sup>8</sup> Yesu nan ki tuk bi ke, "Ni di Uwumbor aakaal lii, le ki joo binib yaan.

<sup>9</sup> "Ni tee yii Uwumbor aakaal, le ki dii niyaajatiib aakaal. <sup>10</sup> Moses nan len ke, 'Aa li pak aate ni aana,' <sup>11</sup> ki ki len ke, 'Unii yaa len tibɔbir lii ute, bee una pu kan, ni ku u.' <sup>12</sup> Le nima len ke unii yaa bui ute, bee una ke, 'Maah ba ga tii si ni na, maan ki ŋmaa tii si. M di tii Uwumbor a,' <sup>13</sup> ki yaa kaa tii ute ni una nibaa kan, ni kii kina la. <sup>14</sup> Nimina ponn ni, ni yii Uwumbor aabɔr, le ki dii niyaajatiib aakaal, ki tuk binib ke bi mu li dii kina. Ni ŋani tiwan nimina mɔmɔk aabɔŋ pam."

### **Tiwan ni ŋani unii titunwanbirdaan na**

(Matiu 15.10-20)

<sup>14</sup> U nan ki yin kinipaak ngbaan, le ki bui bi, "Ni mɔmɔk li pel man, aan ki bee maah ga tuk nimi pu na aatataa. <sup>15</sup> Tiwan ni unii di ŋa umɔb ni u di nab na nibaa aan ŋmaa ŋa u titunwanbirdaan. Tiwan ni nyani umɔb ni na, nima le ŋani u titunwanbirdaan. [<sup>16</sup> U kpa litafal na kan, u ŋun.]

<sup>17</sup> Le u siir kinipaak ngbaan chee, ki kun. Waah koo kidiik ni na, le

<sup>7:7</sup> : Lik Aisaya 29.13.

<sup>7:10</sup> : Lik Nnyam 20.12; Ikaal 5.16.

<sup>7:10</sup> : Lik Nnyam 21.17; Liifai Yaab 20.9.

waadidiliib baa u waayataŋjäkl ngbaan aatataa.<sup>18</sup> Le u baa bi, “Ni mu aa kee bee maaliin aatataa aa? Naa nyi ke unii aah ji tiwan ni na aan ŋmaa ŋa u titunwanbirdaan aa?<sup>19</sup> Waah ji ni na aa koo usui ni. Ni koo lipuul ni la, le u ti sɔnn.” Yesu aah len kina na, ni mɔk ke tijikaar tibaa aa kɔ.

<sup>20</sup> Le u nan ki tuk bi, “Tiwan ni nyan unii aamɔb ni na, nima le ŋjani u titunwanbirdaan.<sup>21</sup> Tiwan ni nyani binib aasui ni na le ye ilandak i kaa ŋjan na, ni kidagook aatuln, ni kinaayuk, ni linikul,<sup>22</sup> ni iniman, ni mbiin, ni linyamɔngee, ni inimpoo, ni lipiipoln, ni ŋjisiibil, ni kalmbaani, ni kijɔrk aatuln.<sup>23</sup> Tiwanbir nimina mɔmɔk nyan ni unii aasui ni la, le ki ŋjani u titunwanbirdaan.”

### Upii aah gaa Yesu ki kii mbamɔm pu na

(Matiu 15.21-28)

<sup>24</sup> Le Yesu siir nima, ki buen Taya ni Saidonn aatingbaan ni, ki ti koo lidichal libaa ni, kaa gee ke unii ubaa li nyi ke u bi nima. U mu aa ŋmaa bɔr.<sup>25-26</sup> Upii ubaa nan bi nima chee. Waa ye Juu yaab aanii ponn ni ubaa. Bi nan ma u Fonisia aatij ni, Siria aatingbaan ni la. Le tiyayaar joo ubisal. Le upii ngbaan ŋjun Yesu pu, ki dan nan gbaan unimbiin ni, ki gaŋ u ke u nyan tiyayaar ti joo waabo na.<sup>27</sup> Le Yesu bui u, “Cha ti kpiin mbim waahr. Ti yaa di mbim aajikaar ki di tii ibɔ kan, naa ŋjan.”

<sup>28</sup> Le u bui u, “Ndindaan, ni ye mbamɔn la; ibɔ mu tee dɔ teebul taab ki ji mbim aajikaabol ni lir kitij na.”

<sup>29</sup> Le Yesu bui u, “Saah len mbamɔn pu na, nima le cha m nyan tiyayaar ngbaan saabo ni. Aa ga ŋmaa gir kun.”

<sup>30</sup> Le u gir kun linampal, ki ti kan ke tiyayaar ngbaan sil nyan waabo ni. U nan dɔ kidiik ni la.

### Yesu aah cha ubir poɔk pu na

<sup>31</sup> Le Yesu ki nyan Taya aatingbaan ni, ki di bɔn dii Saidonn aatij ni, ki ti bɔn dii kitij ki bi yin ki ke Ntim Kipiik na ni, ki ti fuu Galilee Aanyusakpem ni.<sup>32</sup> Le binib bibaa joo ni ubir u chee. Utafal mu kpaa. Le bi gaŋ Yesu ke u di ujaal paan u pu.<sup>33</sup> Le Yesu di u nyan kinipaak ngbaan ponn ni, ki di buen n-gbaan, ki ti di ujanbim meeh utafakpaa ngbaan aatafal, ki tii timɔɔtan meeh utafakpaa ngbaan aalambil,<sup>34</sup> le ki waan lik paacham, ki fuur lii uponn ni, le ki bui u ke, “Efata.” Efata aatataa le ye ke “Kpaar.”

<sup>35</sup> Libuul ngbaan ni, le u ŋjun. Ulambil mu lɔkr, le u piin ki bi len tibɔr mbamɔm.

<sup>36</sup> Yesu nan bui bi ke bi taa tuk ubaa. U yaa bui bi ke bi taa tuk ubaa kan, le bi moo mooni ti.<sup>37</sup> Ni nan gar binib ki ti nyaŋ, le bi len ke, “Waah ŋjani nimɔk na, ni ŋjan. U cha bitafakpaa ŋjun, ki cha bibirb mu len.”

### Yesu aah kpiin binib ŋichur ŋjinaa pu na

(Matiu 15.32-39)

**8** N-yoonn ngbaan le kinipaak ngbaan ki kuun ni Yesu chee. Baa nan kpa nibaa bi ji. Le u yin waadidiliib ke bi dan u chee, le ki bui bi ke,<sup>2</sup> “M san kinipaak ngbaan kinimbaak la; bi bi m chee iwiin itaa, kaa kpa nibaa bi ji.<sup>3</sup> Bibaa nyan ni dandar la. M yaa kaa tii bi tijikaar, ki bui bi ke bi li chaa kun kan, bi ga ti fik nsan ponn ni.”

<sup>4</sup> Le waadidiliib bui u, “Ti bi kipoɔk ni la. Ti ga kan tijiir la chee aan ki di tii binib ngbaan mɔmɔk aan bi ji bab?”

<sup>5</sup> Le u baa bi, “Ni kpa ŋjiboroboro kpin ŋjina?”

Le bi bui u ke, “ŋjilole.”

<sup>6</sup> Le u bui kinipaak ngbaan, “Kalm kitij man.” Le u yoor ŋjiboroboro kpin ŋjilole ngbaan, ki doon Uwumbɔr, ki gii gii, ki

di tii waadidiliib ke bi yakr siin kini-paak ngbaan aanimbiin ni. Le bi yakr siin binimbiin ni.<sup>7</sup> Bi nan kpa njanbim siib mu. Le u yoor ijan ngbaan mu, ki doon Uwumbor, le ki bui bi ke bi di i mu ki di yakr siin binimbiin ni.<sup>8</sup> Le bi məmək ɻjman ki bab.<sup>9</sup> Bi ga nan li fuu ɻjichur ɻjinaa. Baah ɻjman ki gur na, le waadidiliib peei ki gbiin tibɔ̄okur tilole. Le u bui kinipaak ngbaan ke bi li chaa-kun.<sup>10</sup> Libuul ngbaan ni, le u ni waadidiliib koo buŋjøb ni, ki buen Dalmanuta aatiŋ ni.

**Baah ban ke Yesu tun  
lijinjiir aatuln pu na**

(Matiu 12.38-42; 16.1-4)

<sup>11</sup> Le Farisii yaab dan, ki nan kpak Yesu kinikpakpak. Bi nan ban bi tɔ̄j u la, le ki bui u ke u tun lijinjiir aatuln Uwumbor aapɔ̄ɔn pu, aan bi kan.<sup>12</sup> Le Yesu fuur lii uponn ni, ki baa bi, “Nimi dandana aanib, ba ɻja ni ban ke m tun lijinjiir aatuln aan ni kan? M tuk nimi mbamɔ̄n la, maan tun lijinjiir aatuln aan ni kan.”

<sup>13</sup> Le u siir nima ki cha bi. Le u ni waadidiliib ki gir koo buŋjøb ngbaan ni ke bi puur nnyusakpem.

**Bi li nyi Farisii yaab aamɔ̄km**

(Matiu 16.5-12)

<sup>14</sup> Waadidiliib nan sulp kaa joo boroboro. Boroboro kpiln libaa baanja le nan bi baajøb ni.<sup>15</sup> Le u bui bi, “Ni li nyi man Farisii yaab, ni Ubɔ̄r Herod aaboroboro aanyɔ̄k.”

<sup>16</sup> Le bi bui tɔ̄b, “Taah kaa joo boroboro na, nima le cha u len kina.”

<sup>17</sup> Le Yesu bee baah len tɔ̄b chee pu na, le ki baa bi, “Ba ɻja ni len tɔ̄b chee ke naa joo boroboro? Naa kee bee maabim-bin aa? Naa bee maah len pu na aatataa aa? Nitafal pɔ̄ɔ la aa?<sup>18</sup> Ni kpa ɻjinimbil, kaa waa aa? ki kpa ɻitafal, kaa ɻjun aa?

<sup>19</sup> Maah nan di ɻiboroboro kpin ɻijmu

ki gii yakr binib ɻichur ɻijmu na, ni nan pee ni gur na tibɔ̄okur tiŋa? Naa teer la a?”

Le bi bui u, “Kipiik ni tilee.”

<sup>20</sup> Le u ki gir baa bi, “Maah nan di ɻiboroboro kpin ɻilole ki gii yakr tii binib ɻichur ɻjinaa na, ni nan pee ni gur na tibɔ̄okur tiŋa?”

Le bi bui u, “Tilole.”

<sup>21</sup> Le u ki baa bi, “Naa kee nin bee maah len pu na aatataa aa?”

**Yesu aah likr ujoon aanimbil pu na**

<sup>22</sup> Le bi fuu Betseda aatiŋ ni. Le binib bibaa joo ni ujoon Yesu chee, ki nan gan u ke u di uŋaal meeh u.<sup>23</sup> Le Yesu chuu uŋaal, ki dar u ki di nyan kitij ngbaan ni, le ki ti tii timɔ̄ɔtan ɻja ujoon ngbaan aanimbil ni, ki di uŋaal paan u pu, ki baa u, “Aa waa aa?”

<sup>24</sup> Le u lik, le ki bui ke, “M waa binib chuun ki naahn isui la.”

<sup>25</sup> Le Yesu ki gir di uŋaal paan unimbil pu. Le u lik mbamɔ̄m, ki pɔ̄ɔk, ki waa tiwan məmək chain.<sup>26</sup> Le Yesu bui u ke u li tak nsan chaa kun. U taa bɔ̄ dii kitij ngbaan ni.

**Piita aah len Yesu aabɔ̄r pu na**

(Matiu 16.13-20; Luk 9.18-21)

<sup>27</sup> Yesu ni waadidiliib nan siir nima ki di buen Siisarea Filipi aatingbaan ni. Baah cha na, le u baa bi, “Binib bui ke m ye ɻjma?”

<sup>28</sup> Le bi bui u, “Bibaa len ke aa ye Jɔ̄nn u nan muini binib nnyun ni na. Biken mu len ke aa ye Uwumbor aabɔ̄nabr Elaija u nan bi n-yaayoonn na la. Biken mu len ke aa ye n-yaayoonn na aabɔ̄nabiib ponni ubaa la.”

<sup>29</sup> Le u ki baa bi, “Nima len ke m ye ɻjma?”

Le Piita bui u, “Aa ye Kristo u Uwumbor lee u na la.”

<sup>30</sup> Le Yesu sur bi ke bi taa tuk unii ubaa.

**Yesu aah tuk waadidiliib  
waah ga ji falaa pu na**

(Matiu 16.21-28; Luk 9.22-27)

<sup>31</sup> Le u piin ki tuk waadidiliib ke, “Min Unibon Aabo ga ji falaa sakpen. Juu yaab aaninkpiib, ni Uwumbor aatotoorninkpiib, ni Uwumbor aakaal aamomokb ga yii mi, ki ku mi. Iwiin itaa daal le m ga fikr nkun ni.” <sup>32</sup> U tuk bi tibor ngbaan chain la. Le Piita di u nyan n-gbaan, ki ti sur u mbamom ke u taa len kina. <sup>33</sup> Le Yesu fenn ki toŋ waadidiliib biken, le ki kae Piita, ki bui ke, “Kinimbɔŋ, siir foor m chee. Saa dak ke Uwumbor aah dak pu na. Aa dak ke binib aah dak pu na la.”

<sup>34</sup> Le Yesu yin kinipaak ngbaan ni waadidiliib, le ki bui bi, “Unii yaa ban u dii mi kan, cha u yii ubaa, ki yoor waadɔpuinkoo, aan ki li dii mi. <sup>35</sup> Unii umok kaan ɔmaa kpo m pu na kan, waamɔfal ga bee yoli la. Unii umok ga ɔmaa kpo m pu, ni tibɔnyaan tee pu na kan, u ga kan limɔfal li kaa kpa ndoon na. <sup>36</sup> Unii yaa kan dulnyaa wee ni aawan momok, ki lann waamɔfal kan, ba aanyoor le u kan? <sup>37</sup> Unii tee ga di ba ki daa waamɔfal? <sup>38</sup> Dandana aanib ye titunwanbirdam la, kaa dii Uwumbor. Unii yaa san inimɔon m ni maabor chee ke u di tuk biken kan, min Unibon Aabo ga nan yii udaan ngbaan. M ga gir ni, ki li kpa Nte Uwumbor aapɔon. Uwumbor aatuuntiib bi ye chain na, mu ga dii mi. N-yoonn ngbaan le m ga yii udaan ngbaan.”

**9** U nan ki tuk bi, “M tuk nimi mbamɔn la, binib bi si do na ponn ni bibaa aan kpo see bi puen kan Uwumbor aanaan fuu ni ni mpoɔon.”

**Yesu aawon aah kpeln pu na**

(Matiu 17.1-13; Luk 9.28-36)

<sup>2</sup> Iwiin iloop nan jer, le Yesu di Piita, ni Jems, ni Jønn, ki jon lijool fɔfɔk

paab, bibaa. Le uwon kpeln binimbil ni. <sup>3</sup> Waawanpeenkaan nan kpalm tiwan-pipiln, ki wiin chain. Ubaa aa bi dulnyaa wee ni, ki ga ɔmaa ja likekeln li li piin kina. <sup>4</sup> Le bi kan n-yaayoonn na aabɔn-abtiib Elaija ni Moses bi len Yesu chee tibor. <sup>5-6</sup> Le ijawaan chuu waadidiliib sakpen. Piita aa nan nyi waah ga len pu na, le ki bui Yesu ke, “Umomɔkr, taah bi do na, ni jan. Cha ti ja njboo njtaa, ki di libaa tii si, ki di liken tii Moses, ki di liken tii Elaija.”

<sup>7</sup> Le ntaalangbam dan nan biin bi pu. Le nneel len ntaalangbam ngbaan ni ke, “Njapɔɔn u m gee u na so. Li ɔjun waah len pu na man.” <sup>8</sup> Le bi fenn lik mala, kaa kan unii ubaa, see Yesu baanja.

<sup>9</sup> Le bi gir sunn ni lijool ngbaan taab. Baah bi sunni na, le Yesu bui bi, “Ni taa tuk ubaa naah kan pu na, ki nan saa buyoonn min Unibon Aabo ga fikr nkun ni na.”

<sup>10</sup> Le bi kii kina. Bi mu nan baa tɔb ke, “Waah len ke u ga fikr nkun ni na, naatataa ye kinye?” <sup>11</sup> Le bi baa u, “Ba pu Uwumbor aakaal aamomokb len ke Elaija le ga puen dan, le Kristo nin fuu ni?”

<sup>12</sup> Le u bui bi, “Mbamɔn, see Elaija puen fuu ni ki nan toor tiwan momok. Ni mu ɔmee Uwumbor Aagbaŋ ni ke min Unibon Aabo ga ji falaa sakpen. Binib mu ga yook mi. <sup>13</sup> M tuk nimi la, Elaija puun fuu ni a. Le binib ja u bakaa, baah gee pu na. Bi ja u naah ɔmee pu Uwumbor Aagbaŋ ni ke bi ga ja u pu na.”

**Yesu aah nyan libimbikl ubo ni na**

(Matiu 17.14-21; Luk 9.37-43a)

<sup>14</sup> Le bi fuu waadidiliib biken aah bi nin chee na, ki kan kinipaak sakpeŋ si gob bi. Uwumbor aakaal aamomokb bibaa mu bi kpak bi kinikpakpak. <sup>15</sup> Le kinipaak ngbaan kan Yesu. Baah kan u na, le ni gar bi momok pam. Le bi san

buen u chee, ki ti doon u. <sup>16</sup>Le u baa waadidiliib, “Ni ni bi kpak ba pu?”

<sup>17</sup>Le kinipaak ngbaan ponn ni, uja ubaa bui u ke, “Umɔmɔkr, m joo ni maabo le aa chee. Libimbikl le joo u, ki ḥa u ubir. <sup>18</sup>Li yaa ti chuu u nin chee na kan, li di u lii kitij la. Le umɔb ponn ni puk tipupukr, le u ḥɔmɔ ḥinyin. Le uwon chaar ki pɔɔk. Le m gañ saadidiliib ke bi nyan libimbikl ngbaan. Bi mu aa ḥjmaa nyan li.”

<sup>19</sup>Le Yesu bui bi, “Nimi dandana aanib, naa gaa Uwumbor ki kii. Ni ban ke m yunn ni chee kinye pu, aan ki li kpa limɔr ni pu, aan ni gaa Uwumbor ki kii. Li joo ni ubo ngbaan m chee.” <sup>20</sup>Le bi joo ni u Yesu chee.

Libimbikl ngbaan aah kan Yesu na, le li cha ubo ngbaan aawon gbaa sakpen. Le u lir kitij, ki binni. Le umɔb puk tipupukr. <sup>21</sup>Le Yesu baa ute ke, “Libimbikl ngbaan aah chuu saabo ngbaan na, ni yunn kinye?”

Le ute bui u ke, “Li chuu u tibir ni la. <sup>22</sup>Li lir u mmii ni, ni nnyun ni kpala kpala, ki ban li ku u. Aa yaa ga ḥjman kan, san timi kinimbaak ki ter timi.”

<sup>23</sup>Le Yesu bui u ke, “Aa len ke m yaa ga ḥjman kan. Nibaa aa pɔɔ unii u gaa mi ki kii na chee.”

<sup>24</sup>Libuul ngbaan ni le uja ngbaan teen ke, “M gaa si ki kii la. Ter mi aan m gaa si ki kii mbamɔm.”

<sup>25</sup>Le Yesu kan ke kinipaak ngbaan san choo, ki kuuni, ki goi bi. Le u kae libimbikl ngbaan, le ki bui li ke, “Libimbikl li ḥa u ubir ni utafakpaa na, m bui si la, nyan u ni, ki taa ki chuu u daalbaadaal.”

<sup>26</sup>Le libimbikl ngbaan teen, ki cha ubo ngbaan aawon gbaa sakpen, ki nyan u ni. Le u gur dɔ ki naahn linikpol. Bi ponn ni pam nan bui ke u kpo a. <sup>27</sup>Le Yesu chuu ḥjaal, ki fiin u. Le u fii sil.

<sup>28</sup>Le Yesu koo lidichal ni. Waah koo ni na, le waadidiliib nan dan u chee bibaa,

ki nan baa u, “Ba pu taa ḥjmaa nyan libimbikl ngbaan u ni?”

<sup>29</sup>Le u bui bi, “Naan ḥjmaa nyan libimbikl limina aaboln, see ni mee Uwumbor [ki lul bumɔb.]”

### Yesu aah ki tuk bi waakun aabɔr pu na

(Matiu 17.22-23; Luk 9.43-45)

<sup>30</sup>Le bi siir nima, ki bɔ dii Galilee aat-ingbaan ni. Waa ban ke ubaa li nyi waah bi nin chee na; u ban ke u ni waadidiliib li bi bibaa, aan u tuk bi tibɔr tibaa. <sup>31</sup>U bui bi ke, “Bi ga di min Unibɔn Aabo, ki di ḥa binib aajaal ni, le bi ku mi. Bi yaa ku mi kan, iwiin itaa daal le m ga fikr nkun ni.”

<sup>32</sup>Waadidiliib aa nan bee waah len pu na aatataa, kaa kaa bi baa u.

### Ulau ye uninyuun?

(Matiu 18.1-5; Luk 9.46-48)

<sup>33-34</sup>Baah chuun nsan ni na, le waadidiliib kpak tɔb ke, “Ti ponn ni, ulau tee ye uninyuun?” Le bi fuu Kapenaum aatiq ni, ki koo lidichal libaa ni. Baah bi kidiik ni na, le u baa bi, “Naah ba chuun nsan ni na, ni ba kpak ba pu?”

Le bi si ḥjmin. <sup>35</sup>Le u kal, ki yin waadidiliib kipiik ni bilee ngbaan mɔmɔk, ki bui bi ke, “Unii yaa ban ke u li ye usaloln kan, u ḥa puwɔb yoo, ki li ye ni mɔmɔk aatutunn.” <sup>36</sup>Le u di ubo siin bikaasisik ni, ki yoor u ḥjaal ni, ki bui bi, <sup>37</sup>“Unii umɔk gaa ubo umina aaboln maayimbi pu na, u gaa mi le na. Unii umɔk gaa mi na, naa ye mi baanja le u gaa, u gaa Uwumbor u tun ni mi na la.”

### Taa kiir unii u tun Uwumbor aatuln na

(Luk 9.49-50)

<sup>38</sup>Le Jɔnn bui u ke, “Umɔmɔkr, ti kan unii ubaa nyan tiyayaar binib ponn ni saayimbi pu. U mu aa dii timi, nima le ti bui u ke u di cha.”

<sup>39</sup> Le Yesu bui bi, “Ni taa ki tuk u ke u di cha. Unii yaa tun lijinjiir aat-uln maayimbil pu kan, waan ɣmaa len tibɔbir m pu mala. <sup>40</sup> Ba pu? unii u kaa ye timi aadin na si tichaŋ ni la. <sup>41</sup> M tuk nimi mbamɔn la, unii yaa tii nimi nnyun-yunkoo kan, naah ye maanib pu na le cha u tii nimi, u ga sil kan tiyaapar.”

### Taa tɔŋ ubo ubaa ke u tun titunwanbir

(Matiu 18.6-9; Luk 17.1-2)

<sup>42</sup> “Unii yaa tɔŋ mbim bi gaa mi ki kii na ponn ni ubaa ke u tun titunwanbir kan, tibɔbir ga li bi u pu. Bi yaa ba tee di kinaak sakpeŋ, ki di tul leen uneen ni, ki tur u lii nnyusakpem aabuul li nyoo na ni kan, ni ba soor ki tii u, ni u tɔŋ ubo ubaa. <sup>43</sup> Aa yaa gee tiwan ke saah gee aanjaal pu na aan tiwan ngbaan yaa tɔŋ si ke aa tun titunwanbir kan, di ni lii. Aa yaa lann ɣjaal mbaa, ki kan limɔfal li kaa kpa ndoon na kan, ni soor ni aa li kpa injaal ilee, ki koo mmii mu kaan junn na ni. [<sup>44</sup> Nima chee, ‘ŋikpaambil ɣi ɣmɔ biwon na aan kpo daalbaadaal, le mmii mu wu bi na mu aan junn.’] <sup>45</sup> Aa yaa gee tiwan ke saah gee aataal pu na aan tiwan ngbaan yaa tɔŋ si ke aa tun titunwanbir kan, di ni lii. Aa yaa lann litaal libaa, ki kan limɔfal li kaa kpa ndoon na kan, ni soor ni aa li kpa ɣitaa ɣilee, ki ti li bi mmii mu kaan junn na ni. [<sup>46</sup> Nima chee, ‘ŋikpaambil ɣi ɣmɔ biwon na aan kpo daalbaadaal, le mmii mu wu bi na mu aan junn.’] <sup>47</sup> Aa yaa gee tiwan ke saah gee aanimbil pu na aan tiwan ngbaan yaa tɔŋ si ke aa tun titunwanbir kan, di ni lii. Aa yaa lann linimbil libaa ki koo Uwumbɔr do kan, ni soor ni aa li kpa ɣinimbil ɣilee, ki ti li bi mmii mu kaan junn na ni. <sup>48</sup> Nima chee, ‘ŋikpaambil ɣi

ɣmɔ biwon na aan kpo daalbaadaal, le mmii mu wu bi na mu aan junn.’\*\*

<sup>49</sup> “Mmii ga ja unii mɔmɔk chain ke n-yaan aah ɣani kitork aanann chain pu na. <sup>50</sup> N-yaan ɣan la. Tɔ, mu yaa bii ki yaa kaa ki mɔ kan, nibaa aa bi ki ga ki ɣmaa ɣa mu aan mu mɔɔk. Ni li bi ke n-yaan aah mɔ pu na, ki li bi suuna tɔb chee man.”

### Uja taa jenn upuu

(Matiu 19.1-12; Luk 16.18)

**10** Yesu nan siir nima, ki di buen Judea aapepel, le ki puur Joo-dann aamɔɔdapuul. Le kinipaak ki kuun ni u chee. Le u tuk bi Uwumbɔr aabor, waah ɣani pu n-yoonn mɔmɔk na.

<sup>2</sup> Le Farisii yaab bibaa dan u chee, ki ban bi tɔŋ u, le ki baa u ke, “Uja yaa jenn upuu lii kan, timi aakaal kii kina aa?”

<sup>3</sup> Le u baa bi, “Moses nan len kinye?”

<sup>4</sup> Le bi bui ke, “Moses nan len ke uja yaa ban u jenn upuu kan, u ga ɣmaa ɣmee kigbaŋ pu ke u jenn u a, ki di tii u, le ki nin jenn u.”

<sup>5</sup> Le Yesu bui bi, “Nitafal aah pɔɔ pu na, nima le Moses nan ɣmee nkaal mue tii nimi. <sup>6</sup> Uwumbɔr le aa len kina. Buyoonn u nan naan dulnyaa wee na, u nan naan uja ni upii.†† <sup>7</sup> Nima pu na, uja yaa yoor upii kan, bi ga nya cha bitetiib ni binatiib, ki kpaan tɔb chee, <sup>8</sup> ki ɣa unibaan. Nima pu na, baa ki ye binib bilee, bi ye unibaan la.‡‡ <sup>9</sup> Uwumbɔr aah di bi kpaan na, unibɔn taa yakr bi.”

<sup>10</sup> Le Yesu ni waadidiliib koo lidichal libaa ni. Baah bi kidiik ni na, le waadidiliib ki baa u tibɔr ngbaan. <sup>11</sup> Le u bui bi, “Uja umɔk jenn upuu lii, ki ki yoor upii uken na, uja ngbaan ye udagoor la. <sup>12</sup> Upii mu yaa yii uchal, ki ki mɔn uja uken kan, upii ngbaan ye udagoor la.”

\*\*9:48 : Lik Aisaya 66.24.

††10:6 : Lik Mpiin 1.27, 5.2.

‡‡10:8 : Lik Mpiin 2.24.

**Yesu aah ḥa Uwumbor  
aanyoor ḥa mbim pu pu na**  
(Matiu 19.13-15; Luk 18.15-17)

<sup>13</sup>N-yoonn ngbaan le binib bibaa joo ni mbim Yesu chee, ki ban ke u di ujaal paan bi pu. Le waadidiliib kae bi.  
<sup>14</sup>Waah kan ke bi kae bi na, le u gee lijuul, ki bui waadidiliib ke, “Cha mbim ngbaan dan m chee man. Taa ki jenn bi man. Binib bi aabimbin bi ke mbim aah bi pu na, bima le yeh Uwumbor aanaan.  
<sup>15</sup>M tuk nimi mbamɔn la, unii umɔk kaa gaa Uwumbor aanaan ke ubo aah gaal tiwan pu na, waan koo mu ni.”<sup>16</sup>Le u yoor mbim ngbaan ḥymam, ki di ujaal paan bi pu, ki ḥa Uwumbor aanyoor ḥa bi pu.

**Yesu aah tuk  
uwankpadaan ubaa pu na**

(Matiu 19.16-30; Luk 18.18-30)

<sup>17</sup>Yesu aah nyan nima chee na, le uja ubaa san choo u chee, le ki nan gbaan unimbiin ni, ki baa u ke, “Umɔmɔkr nyaan, m ga ḥa kinye ki kan limɔfal li kaa kpa ndoon na?”

<sup>18</sup>Le Yesu baa u ke, “Ba pu aa yin mi ke Umɔmɔkr nyaan? Ubaa aa ḥjan, see Uwumbor baanja. <sup>19</sup>Aa nyi Uwumbor aakaal: ‘Taa ku binib; taa gor kidagook; taa su kinaayuk; taa li ye nnyamɔn aaseeraadaan; taa ji binib pem pem; li pak aate ni aana.’”<sup>20</sup>

<sup>20</sup>Le uja ngbaan bui u ke, “Umɔmɔkr, m joo ikaal imina mɔmɔk tibir ni la.”

<sup>21</sup>Le Yesu lik u, ki gee u, le ki bui u ke, “Tiwan nibaa le gur. Buen ti kooh saah kpa tiwan nimɔk na, ki di ḥimomobil ngbaan tii bigiim, aan ki li kpa li-wangol paacham, aan ki dan nan li dii mi.”<sup>22</sup>Yesu aah len kina na, le uja ngbaan aanimbil wɔb ḥa gbilngbiln. Ni ḥa u mpombiin; ba pu? u kpa liwankpal sakpen a. Le u siir nima.

<sup>23</sup>Le Yesu fenn lik waadidiliib, ki bui bi ke, “Ni pɔɔ sakpen ke binib bi kpa li-wankpal na koo Uwumbor aanaan ni.”

<sup>24</sup>Waah len kina na, le ni gar waadidiliib pam. Le u ki bui bi, “Maabim, ni pɔɔ sakpen ke binib [bi tii liwankpal naadii na] koo Uwumbor aanaan ni.  
<sup>25</sup>Uwankpadaan aah ga koo Uwumbor aanaan ni pu na, ni pɔɔ ki jer laakumii aah ga koo seerkaa aaboln ni pu na.”

<sup>26</sup>Le ni gar bi ki ti nyar. Le bi baa tɔb ke, “Ni yaa ye kina kan, ḥyma ga tee ḥymar?”

<sup>27</sup>Le Yesu lik bi, ki bui bi ke, “Ni pɔɔ binib le chee. Naa pɔɔ Uwumbor chee; nibaa aa pɔɔ Uwumbor chee.”

<sup>28</sup>Le Piita bui u ke, “Tima kan, ti nan di tiwan mɔmɔk di lii, ki dii si la.”

<sup>29</sup>Le Yesu bui bi, “M tuk nimi mbamɔn la, unii umɔk di cha waadichal, bee ukpetiib, bee unaatiib, bee uninkpatiib, bee una, bee ute, bee waabim, bee waasaak, m pu, ni tibɔnyaan tee pu na,<sup>30</sup>u ga kan ḥidichal, ni kpetiib, ni naatiib, ni ninkpatiib, ni nattiib, ni mbim, ni tisar, ni mɔmɔk nfum nkub dandana aayoonn. Binib mu ga ḥa u falaa, le n-yoonn mu choo na, u ga nan kan limɔfal li kaa kpa ndoon na.<sup>31</sup>To, binib bi ye bisalolm na pam le ga nan ḥa puwɔb yaab. Binib bi ye puwɔb yaab na pam le ga nan ḥa bisalolm.”

**Yesu aah ki len waakun  
aabɔr taataa pu na**

(Matiu 20.17-19; Luk 18.31-34)

<sup>32</sup>Yesu ni waadidiliib nan dii nsan ki cha Jerusalem. Le Yesu loln bi pu nsan. Le ni gar waadidiliib. Binib bi dii bi na mu san ijawaan. Le u di waadidiliib kipiik ni bilee na nyan n-gbaan, ki tuk bi binib aah ga ḥa u pu na.<sup>33</sup>U nan bui bi, “Li pel man, ti yaa fuu Jerusalem kan, bi ga di min Unibɔn Aabo ki di ḥa Uwum-

<sup>20</sup>10:19 : Lik Nnyam 20.12-16; Ikaal 5.16-20.

bɔr aatotoorninkpiib ni Uwumbɔr aakaal aamɔmɔkb aanjaal ni, le bi ji mi tibɔr, ki ga len ke ni ɔneer bi ku mi, ki ga di mi ja binib bi kaa ye Juu yaab na aanjaal ni.  
<sup>34</sup> Le bi ga yook mi, ki teei timɔɔtan ɔna m pu, ki lue mi ɔninaalab, le ki nin ku mi. Iwiin itaa daal le m ga fikr nkun ni.”

### Jems ni Jɔnn aah ban pu na

(Matiu 20.20-28)

<sup>35</sup> N-yoonn ngbaan le Sebedee aa-japɔtiib Jems ni Jɔnn nan dan Yesu chee, ki nan bui u ke, “Umɔmɔkr, ti ban ke aa ɔna taah ga mee si pu na le ki tii timi.”

<sup>36</sup> Le u baa bi ke, “Ni ban ke m ɔna ba ki tii nimi?”

<sup>37</sup> Le bi bui u, “Aa yaa ji saanaan ki kan mpɔɔn kan, cha ti ponn ni ubaa li ka aajangii wɔb, uken mu li ka aajangan wɔb.”

<sup>38</sup> Le u bui bi ke, “Naa nyi naah mee mi pu na aataataa. Ni ga ɔnmaa ji falaa ke maah ga ji falaa pu na aa?”

<sup>39</sup> Le bi bui u, “Ti ga ɔnman.”

Le u bui bi, “Ni ga sil ji falaa ke maah ga ji pu na.  
<sup>40</sup> To, binib bi ga kal ɔnjangii, ni ɔnjangan wɔb na ma kan, Uwumbɔr le ga lee bi; naa ye min le ga lee bi.”

<sup>41</sup> Le waadidiliib kipiik bi gur na ɔn Jems ni Jɔnn aah tuk u pu na. Baah ɔn kina na, le bi gee lijuul bi pu.  
<sup>42</sup> Le u yin bi mɔmɔk ke bi dan u chee, le ki nan bui bi, “Ni nyi ke dulnyaa wee ni aanib aayi-dam yoor bibaa paacham la. Binib bi kpa tininkpir na mu joo baanib mpɔɔn pu la.  
<sup>43</sup> Nima taa li bi kina man. Ni ponn ni ubaa yaa ban ke u li ye uninyuun kan, u ɔna ubaa ni mɔmɔk aatutunn.  
<sup>44</sup> Ubaa yaa ban ke u li ye usaloln kan, u ɔna ubaa ni mɔmɔk aanaagbijja.  
<sup>45</sup> Min Unibɔn Aabo aa dan dulnyaa wee ni ke bi nan tun lit-uln tii mi. M dan ke m nan tun lituln tii binib, ki kpo ke m gaa binib pam lii.”

### Yesu aah likr ujoon ubaa aanimbil pu na

(Matiu 20.29-34; Luk 18.35-43)

<sup>46</sup> Le Yesu ni waadidiliib fuu Jeriko aatiŋ ni, ki jer cha. Le kinipaak sakpen dii bi. Baah cha na, le ujoon u ye uwannermeer na, ka nsan aamɔgbeln, bi yin u ke Batimeus, u ye Timeus aajapɔɔn na.  
<sup>47</sup> Le u ɔn ke Yesu u ye Nasaref aatiŋ aanii na ban u jer. Le u tar ke, “Yesu, u ye Ubɔr David aayaabil na, san mi kinimbaak.”

<sup>48</sup> Le binib pam kae u ke u ɔnmin. Le u moo tar ke, “Ubɔr David aayaabil, san mi kinimbaak.”

<sup>49</sup> Le Yesu sil nsan ni, ki bui bi, “Yin ni u.”

Le bi yin u ke u dan, le ki bui u, “Li kpa mpopiin, ki fii sil. U yin si la.”

<sup>50</sup> Le u chuu peer waakekeln, ki fii mala, ki dan Yesu chee.

<sup>51</sup> Le Yesu baa u ke, “Aa ban ba?”

Le u bui u ke, “Umɔmɔkr, m ban ke aa likr nnimbil le tii mi.”

<sup>52</sup> Le Yesu bui u ke, “Saah tii mi naadii na le cha aa likr. Li dii saasan.”

Libuul ngbaan ni le unimbil likr, le u dii Yesu nsan ni nima.

### Jerusalem aanib aah nyun Yesu pu na

(Matiu 21.1-11; Luk 19.28-40; Jɔnn 12.12-19)

**11** Le bi peen Jerusalem, ki fuu Befej ni Betani aatim, mu bi lijool li bi yin li ke Olif aasui aajool na paab.  
<sup>2</sup> Baah ti fuu nima chee na, le u bui waadidiliib ponn ni bilee ke, “Li cha man naah si gbɔk kitij ki na ni. Ni yaa koo ki ponn ni kan, libuul ngbaan ni, ni ga kan ubon u laa diin na si gbin. Ubaa aa kee dij u pu. Chuu gbiln u, ki li joo ni u m chee man.  
<sup>3</sup> Unii ubaa yaa baa nimi, ‘Ba ɔna ni chuu gbiln u?’ kan, ni bui u, ‘Tidindaan le ban u. U ga giin ni u dandana wee.’”

<sup>4</sup> Le bi buen ki ti kan ubon u laa diin na gbin lipaal, mbisamɔb chee, ki mal nsan.

Le bi chuu gbiln u. <sup>5</sup> Le binib bi si nima chee na bibaa baa bi ke, “Ba ḥa ni chuu gbiln ubon ngbaan?”

<sup>6</sup> Le bi tuk bi Yesu aah tuk bi baah ga bui bi pu na. Le binib ngbaan cha bi buen. <sup>7</sup> Le bi joo ni ubon ngbaan Yesu chee, ki di baakeken biin u pu. Le Yesu dij u pu. <sup>8</sup> Le binib pam di baakeken ter nsan ponn ni. Bibaa mu koo timoor ni, ki bar tisufar ki di ter nsan ponn ni. <sup>9</sup> Le binib bi loln nsan na, ni bi paan puwɔb na nan tar ke, “Hosiana,<sup>§§</sup> Uwumbɔr ḥa tinyoor ḥa unii u choo waayimbil ni na pu.”<sup>\*</sup> <sup>10</sup> Uwumbɔr aanyoor bi tiyaaja David aanaan mu choo na pu. Hosiana bi paacham.”

<sup>11</sup> Le Yesu fuu Jerusalem, ki koo Uwumbɔr Aadichal ni, ki lik tiwan mɔmɔk. Le nwiin ban mu lir. Nima pu na, u nan nyan, le u ni waadidiliib buen Betani aatin ni.

### Yesu aah bui busub bubaa pu na

(Matiu 21.18-19)

<sup>12</sup> Naah woln kitaak na, le bi nyan Betani aatin ni. Baah cha na, le nkón joo u. <sup>13</sup> Le u kan likakaln li kpa tifar na si dandar. Le u buen u ti lik ke njisubil bi aan ḥaa bi. Waah ti fuu bu taab na, waa kan nibaa see tifar ḥimeen. Naa nan kee neer njikakan lu. <sup>14</sup> Le u bui busub ngbaan ke, “Ubaa aan ki kan lisubil libaa aa pu ki ḥymɔ n-yoonn mu kaa kpa ndoon na.”

Le waadidiliib ḥun waah len pu na.

### Yesu aah toor

### Uwumbɔr Aadichal pu na

(Matiu 21.12-17; Luk 19.45-48; J̄nn 2.13-22)

<sup>15</sup> Le bi fuu Jerusalem. Le u koo Uwumbɔr Aadichal ni, ki jenn nyan binib bi kooh tiwan ki daa tiwan na

li ponn ni, ki labr bilikpelm aateebul mam chij, ki labr binib bi kooh ḥinan-jel na mu aajal chij. <sup>16</sup> Waa nan kii ke unii ubaa ki li tu lituln ki dii Uwumbɔr Aadichal ponn ni jer. <sup>17</sup> Le u bui bi ke, “Ni ḥmee Uwumbɔr Aagbañ ni ke Uwumbɔr len ke, ‘Maadichal ga li ye mmeen aadichal, nin chee ḥinibol mɔmɔk mee mi na la;’ le nimi di li ḥa bififirb aakaka chee.”†

<sup>18</sup> Le Uwumbɔr aatotoorninkpiib, ni Uwumbɔr aakaal aamɔmɔkb ḥun Yesu aah ḥa pu na. Nima le bi kpokl baah ga ḥa pu ki ku u na. Bi nan san u ijawaan, ba pu? waah tuk kinipaak ngbaan Uwumbɔr aabɔr pu na, ni gar bi mɔmɔk pam.

<sup>19</sup> Nwiin aah ban mu lir na, le Yesu ni waadidiliib ki nyan Jerusalem aatiñ ni.

### Likakaln ngbaan aamɔkm

(Matiu 21.20-22)

<sup>20</sup> Naah woln kitaak kichakpinaany-eek ni, aan bi chuun nsan ni ki ti jer likakaln ngbaan aah bi nin chee na, le bi mui busub ngbaan kuur ki nan saa taab.

<sup>21</sup> Le Piita teer Yesu aah fe ḥa pu na, le ki bui u ke, “Umɔmɔkr, lik, saah fe puun lli busub bu pu na, bu kuur a.”

<sup>22</sup> Le Yesu bui bi, “Tii Uwumbɔr naadii man. <sup>23</sup> M tuk nimi mbamɔn la, unii umɔk ga bui lijool limina ke li fii ki ti lir nnyusakpem ni na, u yaa pak ke ni ga ḥa waah len pu na, ki yaa kaa joo beeni usui ni kan, ni ga ḥa kina ki tii u. <sup>24</sup> M tuk nimi la, naah ga mee Uwumbɔr tiwan nimɔk na, ni tii u naadii ke ni kan ni, le ni ga sil kan. <sup>25</sup> Ni yaa bi mee Uwumbɔr kan, di cha pinn binib bimɔk tun nimi taani na. Ni yaa di cha pinn bi kan, Nite Uwumbɔr u bi paacham na mu ga di cha pinn nimi aatunwanbir. <sup>[26]</sup> Ni yaa kaa di cha pinn biken kan, Nite Uwumbɔr u

§§11:9 : Hosiana aatataa le ye ke “Gaa timi lii.”

\*11:9 : Lik Ilahn 118.25-26.

†11:17 : Lik Aisaya 56.7; Jeremia 7.11.

bi paacham na mu aan di cha pinn nimi aatunwanbir.”]

### Baah baa Yesu waatuln pu pu na

(Matiu 21.23-27; Luk 20.1-8)

<sup>27</sup> Le bi ki fuu Jerusalem. Waah chuun Uwumbor Aadichal ni na, le Uwumbor aatotoorninkpiib, ni Uwumbor aakaal aamɔmɔkb, ni Juu yaab aaninkpiib dan u chee, <sup>28</sup> le ki nan baa u ke, “Aa kpa nsan ke aa ḥja saah ḥjani pu na aa? ḥjma tii si nsan ngbaan ke aa ḥja kina?”

<sup>29</sup> Le u bui bi, “M mu ga baa nimi mbaan. Ni yaa ḥjmaa gar kan, m mu ga tuk nimi maah kpa nsan pu ki ḥja maah ḥjani pu na. <sup>30</sup> Jɔnn aah nan muin binib nnyun ni na, ḥjma nan tii u nsan? Uwumbor aan binib? Tuk mi man.”

<sup>31</sup> Le bi kpokl tɔb ke, “Ti yaa bui ke Uwumbor le tii u nsan kan, u ga baa timi ke ba ḥja taa nan gaa u ki kii. <sup>32</sup> Taah san kinipaak ngbaan ijawaan pu na, taan ḥjmaa len ke binib le tii u nsan, ba pu? bi mɔmɔk len ke Jɔnn nan ye Uwumbor aabɔnabamɔn la.” <sup>33</sup> Nima le bi bui Yesu ke, “Taa nyi.”

Le Yesu bui bi ke, “M mu aan tuk nimi maah kpa nsan pu ki ḥjani maah ḥjani pu na.”

### Bikpaab bi kaa ḥjan na aayataŋjakl

(Matiu 21.33-46; Luk 20.9-19)

**12** Le Yesu ki ḥnakl bi ḥiyataŋjakl ke, “Uja ubaa le nan naan kisaak, le ki ḥnum isui i lu ḥjisubil na ki ponn ni, le ki di idɔ gob kisaak ngbaan, le ki gbii libuul li bi ga di ḥjisubil ḥja li ponn ni aan ki muen nyan ḥjaanyun na, le ki maa li-bimbifɔfɔŋ ke unii li ka li paab ki kiir kisaak ngbaan, le ki yin bikpaab bibaa, ki di kisaak ngbaan ḥja biŋaal ni ke bi li lik ki. Isui ngbaan yaa nan lun ḥjisubil kan, bi ker tii u, aan ki ker bibaa mu. Waah ḥja kina na, le u siir ki buen kitin

ki daa na ni. <sup>2</sup> Buyoonn ḥjisubil ngbaan nan puir na, le u di unaagbiija tun bikpaab ngbaan chee, u ti gaa ni waasubil kisaak ngbaan ponn ni, ki li joo ni. <sup>3</sup> Le bi ti chuu u, ki gbaa u, ki giin ni u, kaa tii u nibaa. <sup>4</sup> Le usadaan ngbaan ki di unaagbiija uken tun bi chee. Le bi ti gbaa u mu aayil wɔb, ki yook u. <sup>5</sup> Le usadaan na ki di unaagbiija uken tun bi chee. Le bi ti ku u. Le u ki di binaagbiib pam tun bi chee; le bi gbaa bibaa, ki ku bibaa mu. <sup>6</sup> Unii ubaa le ti gur u chee. Ujapɔnbaal u, u gee u na le gur. Kookoo yaan le u di ujapɔn ngbaan tun bikpaab ngbaan chee, le ki bui ke, ‘Bi ga pak njapɔn ma.’ <sup>7</sup> Le bikpaab ngbaan kpokl tɔb, ‘Uma le ye waafaajil. Cha ti ku u man, aan ki ji waafaal.’ <sup>8</sup> Le bi chuu u, ki ku u, le ki di linikpol ngbaan nyan n-gbaan.

<sup>9</sup> “To, usadaan ngbaan ga ḥja kinye? U ga dan nan ku bikpaab ngbaan, ki di kisaak na tii bikpaab biken. <sup>10</sup> Naa karn Uwumbor Aagban aah len pu na aa? ke, ‘Litakpal li bidimaab yii li na, lima le ye litakpajal.

<sup>11</sup> Uwumbor le ḥja kina, le ni gar timi pam.”<sup>‡</sup>

<sup>12</sup> Le Juu yaab aaninkpiib bee ke Yesu di liyataŋjakl ngbaan ḥjaŋ bima la. Nima pu le bi nan ban bi chuu u, ki mu san kinipaak ngbaan ijawaan, ki di cha u, ki siir.

### Baah pen Yesu nlan pu na

(Matiu 22.15-22; Luk 20.20-26)

<sup>13</sup> Le bi di Farisii yaab bibaa, ni Ubɔr Herod aanib bibaa tun Yesu chee bi ti pen u nlan. <sup>14</sup> Baah fuu ni u chee na, le bi bui u ke, “Umɔmɔkr, ti bee ke aa len mbamɔn la, kaa san ubaa ijawaan, kaa pak ubaa ki jer uken. Aa mɔk timi Uwumbor aasan mbamɔm la. Ni ḥjan ti pa lampoo tii Ubɔrkpaan Siisa aan naa ḥjan? Ti pa aan ti taa pa?”

\*12:11 : Lik Ilahn 118.22-23.

<sup>15</sup> Le u bee ke bi ban bi pen u nlan la, le ki baa bi, “Ba ḥa ni ṭoŋ mi? Li joo ni limombil m lik man.”

<sup>16</sup> Le bi joo ni li. Le u baa bi, “Ijma aanaj ni liyimbil bi li pu?”

Le bi bui u ke, “Siisa yaan.”

<sup>17</sup> Le u bui bi ke, “Di ni ye Siisa yaan na, ki di tii u man, ki di ni ye Uwumbor yaan na tii Uwumbor.”

Waah len kina na, le ni gar bi pam.

### Binib bi ga fikr nkun ni na aah ga li bi pu na

(Matiu 22.23-33; Luk 20.27-40)

<sup>18</sup> Le Sajusii yaab bibaa dan u chee. Bima le len ke binib aan fikr nkun ni na. <sup>19</sup> Le bi bui u ke, “Umɔmɔkr, Moses nan ḥmee nkaal ki di tii timi ke, ‘Uja yaa kpo, ki cha upuu, kaa kpa ubo kan, un-aal di ukpoppii ngbaan kpan, ki ma mbim ki tii ukpel.’<sup>¶</sup> <sup>20</sup> To, naabitii bilole nan bi. Upol nan yoor upii, le ki kpo, kaa kpa ubo. <sup>21</sup> Le unaal di ukpoppii ngbaan kpan, ki mu kpo, kaa kpa ubo. Le utatar mu di ukpoppii ngbaan kpan ki mu kpo, kaa kpa ubo. <sup>22</sup> Bijab ngbaan mɔmɔk bilole mu ḥa kina, ki kpo doo, kaa nan kpa ubo. Kookoo yoo le upii ngbaan mu kpo. <sup>23</sup> Binib yaa nan fikr nkun ni kan, upii ngbaan ga li ye ḥma aapuu? Bi mɔmɔk bilole nan joo u la.”

<sup>24</sup> Le Yesu bui bi, “Naa bee Uwumbor Aagbaj aah len pu na, kaa bee Uwumbor aah kpa mpɔɔn pu na. Nima le cha ni yenn nimi aaliin ni. <sup>25</sup> Binib yaa nan fikr nkun ni kan, baan yoor bipiib, bipiib mu aan mɔn bijab. Bi ga li bi ke Uwumbor aatuuntiib bi bi paacham na aah bi pu na la. <sup>26</sup> Joo cha binib aah ga fikr nkun ni pu na aabor, naa karn Moses aah nan

ḥmee busub bu nan gaal mmii na aabor nin chee na aa? Nima chee le ni ḥmee ke Uwumbor nan bui Moses, ‘Min le ye Abraham, ni Aisak, ni Jakob Aawumbor.’<sup>§</sup> <sup>27</sup> Uwumbor yaa len ke u ye binib bi kpo na Aawumbor kan, nima le mɔk ke bi kpa limɔfal. Nimi, naah len ke binib aan fikr nkun ni na, ni yenn sakpen a.”

### Mulakaal ye nkaal kpaan?

(Matiu 22.34-40; Luk 10.25-28)

<sup>28</sup> Le Uwumbor aakaal aamɔmɔkb ponni ubaa nan bi nima, le ki ḥun baah gbaa tɔb chee tibor pu na, ki bee ke Yesu aah len pu na, u gar bi mbamɔm la. Le u dan Yesu chee, ki nan baa u ke, “Mulakaal ye nkaal kpaan?”

<sup>29</sup> Le Yesu bui u ke, “Nkaal kpaan le ye ke, ‘Israel yaab, li ḥun man, Tidindaan Uwumbor ye Dindaan baan la.

<sup>30</sup> Aa li gee Aadindaan Uwumbor aasui mɔmɔk ni, ni saawiin mɔmɔk, ni saalandak mɔmɔk, ni saapɔɔn mɔmɔk.’\*\*

<sup>31</sup> Nkaal mu paa na le ye ke, ‘Aa li gee aana aabo ke saah gee aabaa pu na.’†† Nkaal mubaa aa jer ikaal illee yee.”

<sup>32</sup> Le u bui Yesu ke, “Umɔmɔkr, aa len mbamɔm la. Saah bui ke Uwumbor ye Uwumbor baan na, ti gbii la. Ubaa aa bi ki kpee u pu. <sup>33</sup> Unii yaa gee Uwumbor usui mɔmɔk ni, ni waalandak mɔmɔk, ni waapɔɔn mɔmɔk, ki gee una aabo ke waah gee ubaa pu na kan, nima le ḥjan ki jer u di tiwakor toor kitork ki see mmii ni tii Uwumbor.”

<sup>34</sup> Le Yesu bee ke u len nlan aabor la. Le u bui u, “Saa daa Uwumbor aanaan ni.”

Baah len tibor ngbaan doo na, ubaa aa ki kaa u baa Yesu mbaan kpee.

\*12:19 : Lik Ikaal 25.5.

§12:26 : Lik Nnyam 3.6.

\*\* 12:30 : Lik Ikaal 6.4-5.

††12:31 : Lik Liifai Yaab 19.18.

### Kristo aabɔr

(Matiu 22.41-46; Luk 20.41-44)

<sup>35</sup> Yesu nan bi Uwumbɔr Aadichal ni, ki tuk binib Uwumbɔr aabɔr, ki baa bi, "Uwumbɔr aakaal aamɔmɔkb ḥa kinye pu ki bui ke Kristo u ga gaa binib lii na ga li ye Ubɔr David aayaabil?" <sup>36</sup> Uwumbɔr Aafuur Nyaan nan cha Ubɔr David ubaa len ke,

"Uwumbɔr bui Ndindaan ke: Kal ḥŋjangii wɔb

ki ti saa buyoonn m ga nyan saadim mɔmɔk na." <sup>\*\*</sup>

<sup>37</sup> "Ubɔr David ubaa aah nan yin Kristo ngbaan ke Udindaan kina na, Kristo ga li ḥŋmaa ye uyaabil aa?"

### Bi li nyi Uwumbɔr aakaal aamɔmɔkb aabɔr

(Matiu 23.1-36; Luk 20.45-47)

Le kinipaak ngbaan pel Yesu aah len pu na, ki nan kpa mpopiin. <sup>38</sup> Waah tuk bi Uwumbɔr aabɔr na, le u bui bi, "Ni li nyi man Uwumbɔr aakaal aamɔmɔkb aabɔr. Baageehn le ye ke bi li pee ḥibokul fɔfɔk, ki gee ke binib doon bi mbamɔm kinyan ni, <sup>39</sup> ki ban ke bi kal bininyuum aakakaa chee mmeen aadir ni, ni njim chee. <sup>40</sup> Bi ji bikpopiib durm la, le ki mee Uwumbɔr ni yunni ke bi ḥmann ke bi ye bininyaam la. Uwumbɔr ga daa bitafal ki jer waah ga daa binib biken aatafal pu na."

### Ukpopiib ubaa aah tii sakpen pu na

(Luk 21.1-4)

<sup>41</sup> Yesu nan ka mal Uwumbɔr aapiin aadakaa, ki lik kinipaak ngbaan aah joo ḥimombil ḥjani dakaa ngbaan ponn ni pu na. Le biwankpadam pam nan di ḥimombil pam ḥa u ponn ni. <sup>42</sup> Le ukpopiigiin ubaa mu dan nan di janjan mam bilee, ni ye kpakpaln na, ki di ḥa u ponn ni.

<sup>43</sup> Le Yesu yin waadidiliib, ki bui bi, "M tuk nimi mbamɔn la, ukpopiigiin wee tii ḥjimombil ki jer bi mɔmɔk aah tii pu na. <sup>44</sup> Bi mɔmɔk tii, ki gur ḥjimombil sakpen a. U ye ugiin la, le ki di waamombil mɔmɔk tii, kaa ki gur nibaa."

### Baah ga gbaa wii Uwumbɔr Aadichal pu na

(Matiu 24.1-2; Luk 21.5-6)

**13** Yesu nan nyan Uwumbɔr Aadichal ngbaan ni. Waah nyan ni na le waadidiliib ponn ni ubaa bui u ke, "Umɔmɔkr, lik ḥjitatkal ḥjipal ni bi di maa lidichal lee na aah ḥjan pu na, lik tidir tee aah wiir pu na."

<sup>2</sup> Le Yesu bui u, "Aa kan tidir sakpiin tee ee? Bi ga nan gbaa wii lidichal limina mɔmɔk. Litakpal libaa aan ki li paa liken pu."

### Falaa aayoonn aah ga li bi pu na

(Matiu 24.3-14; Luk 21.7-19)

<sup>3</sup> Le u buen ki ti kal Olif aasui aajool li bi tok Uwumbɔr Aadichal na paab. Le Piita, ni Jems, ni Jønn, ni Andru dan u chee bibaa, ki nan bui u ke, <sup>4</sup> "Tuk timi, bi ga ḥja kina bayoonn? Ba ga li ye limɔkl ki mɔk timi ke ni ḥneer bi ḥja kina?"

<sup>5</sup> Le u bui bi ke, "Ni li nyi man, ubaa taa ḥmann nimi. <sup>6</sup> Binib pam le ga nan dan, ki pur maayimbil, ke bima le ye min Yesu, ki ḥmann binib pam. <sup>7</sup> Ni ga ḥjun ke binib to butɔb kɔnkɔni do, ni dandar mu. Ni taa cha ni li muk nimi man. Uwumbɔr le siin ke nimina mɔmɔk ga ḥja. Nima le aan mɔk ke dulnyaai wee ga doo libuul ngbaan ni. <sup>8</sup> Linibol libaa ga to linibol liken butɔb. Nnaan mubaa aanib ni nnaan muken aanib ga to tɔb butɔb. Kitig ga dej ḥipepel, ḥipepel. Nkon ga lir ntim pam ponn ni. Nimina mɔmɔk le ga li ye njan aafalaa.

\*\*12:36 : Lik Ilahn 110.1.

<sup>9</sup>“Nimi nibaa, li nyi man. Bi ga nan chuu nimi, ki di buen bibɔjirb chee. Bi ga gbaa nimi mmeen aadir ni. M pu, le ntim aaninkpiib ni bibɔrb ga ji nimi tibɔr. Le ni ga tuk bi tibɔnyaan tee. <sup>10</sup> Binib ga di tibɔnyaan tee tuk ɻinibol mɔmɔk waahr, aan dulnyaa wee nin doo. <sup>11</sup> Bi yaa chuu nimi, ki di buen bibɔjirb chee kan, ni taa puen dak nisui ni ke ni ga len kinye. N-yoonn ngbaan yaa nan fuu ni kan, ni len Uwumbɔr aah ga tuk nimi pu na. Naa ye nimi le ga len. Uwumbɔr Aafuur Nyaan le ga len. <sup>12</sup> N-yoonn ngbaan le unii ga di una aabo ɻa binib aaŋjaal ni ke bi ti ku u. Tetiib mu ga di baabim ɻa binib aaŋjaal ni ke bi ti ku bi. Binib mu ga yii bitetiib ni binatiib, ki cha binib ku bi. <sup>13</sup> M pu, le binib mɔmɔk ga li nan nimi. Unii umɔk jin limɔr ki dii mi ki ti saa limɔfal aadoon na, uma le ga ɻamar.”

### Tiwan ni kaa ɻan na aabor

(Matiu 24.15-28; Luk 21.20-24; Daniel 9.27)

<sup>14</sup>“Ni ga kan tiwanbir ni bii tiwan nimɔk bi chain na si naah kaa ba ga li si nin chee na.” (Tɔ, nimi bi karni na, ni li beer nimina aatataa.) “N-yoonn ngbaan yaa nan fuu ni kan, binib bi bi Judea aatij ponni na san buen ɻijoo paab. <sup>15</sup> Unii yaa bi kidiik paab<sup>14</sup> kan, u taa ki koo waadiik ni ke u ti yoor nibaa, u san mala. <sup>16</sup> Unii yaa bi kisaak kan, u taa ki gir kun linampal ke u ti yoor waakekeln. <sup>17</sup> N-yoonn ngbaan kan, bipiib bi kpa ɻipuu na, ni bipiib bi kpa mbim bi laa ɻaa libiil na gal i kpa kinimbaak. <sup>18</sup> Mee Uwumbɔr man ke u taa cha tibɔr tee ɻa kakab aayoonn. <sup>19</sup> N-yoonn ngbaan, binib ga ji falaa sakpen a. Buy-oonn Uwumbɔr nan naan dulnyaa na, ki nan saa dandana wee na, baa kee jin falaa ngbaan aaboln, ki mu aan ki

ji falaa kina. <sup>20</sup> Uwumbɔr yaa kaa bar falaa ngbaan aayoonn aawiin pu kan, ubaa aan ɻamar. Le waanigeekaab aan-imbaasaln pu na, u ga bar falaa ngbaan aayoonn aawiin pu.

<sup>21</sup>“N-yoonn ngbaan unii ubaa yaa bui nimi ke, ‘Lik, Kristo u ga gaa binib lii na so,’ ki yaa ki bui ke, ‘U bi nima chee’ kan, ni taa gaa waah len pu na man. <sup>22</sup> Ba pu? biŋmajmannim ga li bi. Bibaa ga bui ke bi ye Kristo la. Biken ga bui ke bi ye Uwumbɔr aabɔnabtiib la. Bi ga tun lijinjiir aatun ki ɻemann binib; bi ga poɔn bibaa ke bi ɻemann Uwumbɔr aanib mu. <sup>23</sup> Ni li nyi man. M puun tuk nimi tibɔr timina mɔmɔk.”

### Yesu aah ga gir ni pu na

(Matiu 24.29-31; Luk 21.25-28)

<sup>24-25</sup>“N-yoonn ngbaan aafalaa aa-puwɔb, le paacham aawan aan ki li bi mbamɔm. Nwiin ga bɔln. Uŋmal mu aan ki li wiin. Ijmabi mu ga lir. <sup>26</sup> N-yoonn ngbaan le ni ga kan min Unibɔn Aabo bi ntaalangbam ni ki choo, ki wiin chain, ki joo mpɔɔn. <sup>27</sup> N-yoonn ngbaan le m ga tun Uwumbɔr aatuuntiib dulnyaa wee ponni mɔmɔk, liwipuul, ni liwilir, ni ɻɔngangan, ni ɻɔngangii wɔb, bi ti kuuni maanib mɔmɔk, ki di dan m chee.”

### Bukpasɔm aayataŋjakl

(Matiu 24.32-35; Luk 21.29-33)

<sup>28</sup>“Bukpasɔm le ye liyataŋjakl ki tii nimi. Bu aabon yaa bi ɻani tifar kan, ni bee ke ni yaa kpee siib na kan, kiseek ga seer. <sup>29</sup> Kina na, ni yaa kan nimina bi ɻani kan, ni bee ke ni yaa kpee siib na kan, m ga gir ni. <sup>30</sup> M tuk nimi mbamɔn la, dandana aanib aan jer le tiwan nimina mɔmɔk puen ɻa. <sup>31</sup> Paacham ni taab ga jer. Maamɔbon ma aan jer.”

<sup>14</sup>13:15 : Bi yaa maa kidiik kan, baa di timoor pinn ki, kaa maa lidikokoln. Bi nan di idɔ paan puln tidir paab, le ki di titan pɔr biin. Bi nan maa ɻibimbin le ki taa joi kidiik aapaacham.

## Ubaa aa nyi bundaln Yesu ga gir ni na

(Matiu 24.36-44)

<sup>32</sup> “Ubaa aa nyi buyoonn m ga gir ni na. Uwumbor aatuuntiib bi bi paacham na aa nyi. Min Uwumbor Aajapoon mu aa nyi. Nte Uwumbor baanja le nyi. <sup>33</sup> Ni li nyi man, ki li ka lik man, aan ki li mee Uwumbor; ba pu? naa nyi buyoonn m ga gir ni na. <sup>34</sup> Ni naahn uja u nan ban u chuun nsan, ki tuk waatutum ke bi li joo waadichal mbamɔm, ki mɔk bi mɔmɔk baah ga tun lituln li na, ki tuk ukikiir na ke u li kii, le ki nin buen. <sup>35</sup> Ni mu li nyi man. Naa nyi bundaln min Nidindaan ga gir ni na, nibaakan kijoobɔŋ, nibaakan kinyetaasiik, nibaakan ikooga aah wii buyoonn na, nibaakan lichakpi-taawoln. <sup>36</sup> Ni li nyi man, aan m yaa lir nimi ki fuu ni kan, maan nan muin ni dɔ geen. <sup>37</sup> Maah tuk nimi pu na, m tuk binib mɔmɔk la, li nyi man.”

## Baah kpokl ke bi ga ku Yesu pu na

(Matiu 26.1-5; Luk

22.1-2; Jɔnn 11.45-53)

**14** N-yoonn ngbaan, ni nan gur iwiin ilee, bi kuun ki ti ji njim mu bi yin mu ke Lakr-jer aajim na.<sup>§§</sup> N-yoonn ngbaan, le bi ŋɔmo boroboro u kaa kpa nnyɔk na. Le Uwumbor aatotoorninkipiib, ni Uwumbor aakaal aamɔmɔkb nan kal ki kpokl baah ga ja pu ki loon chuu Yesu ki ku u na, <sup>2</sup> le ki bui tɔb ke, “Ti taa chuu u njim ngbaan aayoonn man. Ti yaa chuu u n-yoonn ngbaan kan, kinipaak na ga ŋɔmo tijar.”

## Upii ubaa aah nyuŋ Yesu pu na

(Matiu 26.6-13; Jɔnn 12.1-8)

<sup>3</sup> Tɔ, Yesu nan bi Betani aatiŋ ni, ki bi Simonn u nan ye ukɔndaan na do, ki ka ji tijikaar. Waah ka ji tijikaar kina na, le

upii ubaa koo ni ki joo ni tulalee u kpa kidaak sakpen na, bi yin mu ke naad, ki bi kpalba nyaan u bi yin u ke alabasta na ponn ni. Upii ngbaan nan chuu gii kpalba ngbaan aaneen ni, ki di tulalee na mɔmɔk kpir Yesu aayil pu. <sup>4</sup> Waah ja kina na, le bi ponn ni bibaa gee lijuul, ki baa tɔb ke, “Ba ja u bii tulalee ngbaan kina? <sup>5</sup> Ti ba ga ŋmaa di u kooh ki kan ilik ni jer iwiin ikui itaa aapal na, ki di tii bigiim.” Le bi ŋulni u pu.

<sup>6</sup> Le Yesu bui bi, “Di cha u man. Ba ja ni muk u kina? U tun lituln li ŋan na le ki tii mi. <sup>7</sup> Bigiim ga li bi ni chee n-yoonn mɔmɔk. Naah gal bi ban ni ter bi buyoonn na kan, ni ga ŋmaa ter bi. Mma aan li bi ni chee n-yoonn mɔmɔk. <sup>8</sup> U ja waah ga ŋmaa ja pu na la. U di tulalee ngbaan kpir m pu ki puen toor nwon ke bi ti sub mi la. <sup>9</sup> M tuk nimi mbamɔn la, baah ga moon tibnyaan tee nin chee itingbaan mɔmɔk ni na, bi ga len waah ja pu na ke binib li teer waabor.”

## Judas aah ban ke u kooh Yesu pu na

(Matiu 26.14-16; Luk 22.3-6)

<sup>10</sup> Le Yesu aadidiliib kipiik ni bilee ponn ni ubaa, bi yin u ke Judas Iskariot, buen Uwumbor aatotoorninkipiib chee, ki ti tuk bi ke u ban u di Yesu ja bijaal ni la. <sup>11</sup> Baah ŋun kina na, le ni ja bi mpopiin. Le bi puu tipuur ke bi ga tii u ŋimobil. Le u ban nsan mu u ga di Yesu ja bijaal ni na.

## Yesu ni waadidiliib aah jin njim ngbaan pu na

(Matiu 26.17-25; Luk 22.7-14,  
21-23; Jɔnn 13.21-30)

<sup>12</sup> Lakr-jer aajim, buyoonn bi ga ŋɔmo boroboro u kaa kpa nnyɔk na aajan aawi-indaal, bundaln bi ga kɔr upihbo na, le Yesu aadidiliib dan nan baa u ke, “Aa

<sup>§§</sup>14:1 : Israel yaab nan ji Lakr-jer aajim ke bi teer buyoonn Uwumbor nan nyan bi tinaagbiir ni, Ijipt aatiŋ ni na. Lik Nnyam 12.1-27.

ban ke ti gor njim ngbaan aajikaar la chee ki tii si?"

<sup>13</sup> Le u bui waadidiliib ponn ni bilee ke, "Ni li cha kitij ngbaan ponn ni man. Ni yaa koo ki ponn ni kan, uja u tu nnyun na ga ton nimi nsan ponn ni." <sup>14</sup> Ni li dii u man, ki ti koo waah ga koo lidichal li ponn ni na, ki bui udichadaan ngbaan, "Umɔmɔkr bui ke u ni waadidiliib ga ji njim ngbaan aajikaar kiladiik ni?" <sup>15</sup> Le u ga mɔk nimi paacham aadisakpeñ ki bi puun toor ki na. Ni gor njim ngbaan aajikaar nima chee ki tii timi."

<sup>16</sup> Le bi siir, ki buen kitij ngbaan ni, ki ti kan Yesu aah tuk bi ke bi ga kan pu na. Le bi gor njim ngbaan aajikaar.

<sup>17</sup> Kijook aah joor na, le Yesu ni waadidiliib kipiik ni bilee na koo kidiik ngbaan ponn ni, ki kal ke bi ji. <sup>18</sup> Baah bi ji na, le u bui bi, "M tuk nimi mbamɔn la, ni ponn ni ubaa ga kooh mi. Nimi bi bi ji m chee na ponn ni ubaa le ga ḥa kina."

<sup>19</sup> Bisui nan bii. Le bi baa u ubaabaa ubaabaa, "Ni ye min la aa?"

<sup>20</sup> Le u bui bi, "Nimi kipiik ni bilee bimina ponn ni ubaa le ga ḥa kina. Ni ye m ni unii u kpaan bi ji lisambil libaa ponn ni na la." <sup>21</sup> Min Unibɔn Aabo ga kpo ke naah ḥmee Uwumbɔr Aagbar ponn ni ke m ga kpo pu na. Tibɔbir mu ga li bi uja u ga kooh mi na pu. Bi yaa kaa ba ma u kan, ni ba soor ki tii u."

### Tidindaan aajim

(*Matiu 26.26-30; Luk 22.14-20; 1 Korint Yaab 11.23-25*)

<sup>22</sup> Baah bi ji tijikaar na, le Yesu yoor boroboro, le ki doon Uwumbɔr, ki gii, ki di tii waadidiliib, le ki bui ke, "Gaa man. Maawon le na."

<sup>23</sup> Le u yoor kiyinyook, ki doon Uwumbɔr, ki di tii bi. Le bi mɔmɔk nyun. <sup>24</sup> Le u bui bi, "Maasin le na. Maasin pu, le Uwumbɔr puu tipuupɔln tii nimi. Binib

pam aatunwanbir pu le maasin ngbaan ga nya." <sup>25</sup> M tuk nimi mbamɔn la, maan ki nyu ḥisubil aanyun ngbaan ki ti saa bundaln m ga ti nyu ḥisubil aanyunpɔm Uwumbɔr aanaan ni na."

<sup>26</sup> Le bi gaa Uwumbɔr aalahn, ki buen Olif aasui aajool paab.

### Yesu aah bui ke Piita ga nee u pu na

(*Matiu 26.31-35; Luk 22.31-34; Jɔnn 13.36-38*)

<sup>27</sup> Le Yesu ti bui bi, "Ni mɔmɔk ga san cha mi. Ni ḥmee Uwumbɔr Aagbañ ni ke, 'Uwumbɔr ga ku upihdaan, le ipiñh yaa'." <sup>28</sup> Buyoonn Uwumbɔr ga fikr mi nkun ni na, le m ga loln ni pu nsan, ki buen Galilee."

<sup>29</sup> Le Piita bui u, "Bi mɔmɔk yaa san ki cha si kan, mma aan san cha si."

<sup>30</sup> Le Yesu bui u, "M tuk si mbamɔn la, kinyek kimina, aa ga len nfum mutaa ke saa nyi mi le lelee aakooja nin wii."

<sup>31</sup> Le Piita po beenin len ke, "Bi yaa po ban bi ku m ni si kan, maan len ke maa nyi si."

Le waadidiliib mɔmɔk mu len kina.

### Yesu aah mee Uwumbɔr pu na

(*Matiu 26.36-46; Luk 22.39-46*)

<sup>32</sup> Le bi ti fuu nibaa chee, bi yin nima chee ke Getsemane. Le u bui waadidiliib, "Kal do man, m buen ti mee Uwumbɔr."

<sup>33</sup> Le u di Piita, ni Jems, ni Jɔnn buen. Le usui bii pam. Mpombiin ni nsuugar nan muk u sakpen. <sup>34</sup> Le u bui bi, "Nsui bii sakpen, ki ti nyān. Ni wu ke nkun aah wu pu na. Kal do ki li lik man."

<sup>35</sup> Le u foor siib, ki doon kitij lichichikr, ki mee Uwumbɔr ke ni yaa ga ḥmaa ḥa aan u taa ji falaa u choo na kan, u taa cha u ji falaa ngbaan, <sup>36</sup> ki bui ke, "Nte, aa ga ḥmaa ḥa tiwan mɔmɔk. Nyan mi falaa u choo na ni. Aa mu tee ḥa saageehn, ki taa ḥa maageehn."

\*14:27 : Lik Sekaria 13.7.

<sup>37</sup> Le u gir buen waadidiliib bitaa ngbaan chee, ki ti muin bi dō geen; le u bui Simonn Piita ke, “Simonn, aa dō geen la aa? Saa ḥmaa li ka lik kikurk kibaa aa?

<sup>38</sup> Ni li ka lik man, aan ki li mee Uwumbor, aan ki taa koo ntɔŋ ni. Nisui ban ni li lik, le tiwon aa pɔ̄o.”

<sup>39</sup> Le u ki foor siib ki ti mee Uwumbor, ki ki bui u tibor tichachaan ngbaan, <sup>40</sup> le ki ki gir buen waadidiliib chee, ki ti muin bi ki dō geen la; ngeen nan joo bi sakpen. Le baa nyi baah ga len pu na.

<sup>41</sup> Le u ki buen ti mee Uwumbor, ki ki gir ni taataa, ki ki muin bi dō geen; le u baa bi, “Ni beenin fuur ki dō geen la aa? Ni ḥneer a. N-yoonn fuu a. U kooh min Unibon Aabo, ki di ḥja titunwanbirdam aajaal ni la. <sup>42</sup> Fii, ti li cha man. Lik, unii u kooh mi na peen ni a.”

### Baah chuu Yesu pu na

(Matiu 26.47-56; Luk 22.47-53; J̄nn 18.3-12)

<sup>43</sup> Waah laa bi len kina na, le Judas u ye waadidiliib kipiik ni bilee ponn ni ubaa na fuu ni. Le kinipaak dii u. Bi nan joo kijaak aajum ni jagbaali mam. Bi nan nyan ni Uwumbor aatotoorninkpiib, ni Uwumbor aakaal aamɔ̄mɔ̄kb, ni Juu yaab aaninkpiib chee la. <sup>44</sup> Judas u kooh Yesu na, nan bui kinipaak ngbaan ke bi yaa ti kan u moor unii u aatakpln<sup>†</sup> na kan, uma le na. Bi chuu u mpɔ̄oñ, ki di u buen.

<sup>45</sup> Judas aah fuu ni na, le u kpaan buen Yesu chee, ki ti bui ke, “Umɔ̄mɔ̄kr,” le ki moor utakpln. <sup>46</sup> Le bi chuu Yesu mpɔ̄oñ pu. <sup>47</sup> Waadidiliib ponn ni ubaa nan yoor waajaak aajuk ki gaa per Uwumbor aatotoorninkpel aanaagbiija aatafal. <sup>48</sup> Le Yesu baa binib bi dan and bi nan chuu u na ke, “Ni joo kijaak aajum ni jagbaali mam ke ni nan chuu mi ke maah ye ufifiir le na aa? <sup>49</sup> Iwiin mɔ̄mɔ̄k m nan

bi ni chee Uwumbor Aadichal ni, ki tuk binib Uwumbor aabɔ̄r, le naa chuu mi. Tɔ̄, nimina ḥja ke ni gbiin Uwumbor Aagbaŋ aah len pu na la.”

<sup>50</sup> Le waadidiliib mɔ̄mɔ̄k san cha u.

<sup>51</sup> Unachipɔ̄oñ ubaa nan bi nima chee, ki pee likekepiln, ki paani Yesu pu. Le bi laan chuu unachipɔ̄oñ ngbaan aakekeln. <sup>52</sup> Le u san cha waakekeln, ki san cha upmeen.

### Juu yaab aaninkpiib aah jin Yesu tibor pu na

(Matiu 26.57-68; Luk 22.54-55,  
63-71; J̄nn 18.13-14, 19-24)

<sup>53</sup> Le bi di Yesu buen Uwumbor aatotoorninkpel aadichal ni. Uwumbor aatotoorninkpiib, ni Juu yaab aaninkpiib, ni Uwumbor aakaal aamɔ̄mɔ̄kb mu kuun ni nima chee. <sup>54</sup> Le Piita paa Yesu pu, ki bi dandar, le ki ti fuu Uwumbor aatotoorninkpel aachiln ni, ki koo, ki ti kal bikikiirb chee wol mmii. <sup>55</sup> Le Uwumbor aatotoorninkpiib ni bibɔ̄jirb aaninkpiib mɔ̄mɔ̄k ban biseeraadam bi ga bii Yesu aan bi ku u na. <sup>56</sup> Le biseeraadam pam mɔ̄lñ inyamɔ̄n paan u, ki bii u. Baah len pu na, naa kpaan. Nima pu na, baa kan waataaani.

<sup>57</sup> Le bijab bibaa fii sil, ki mɔ̄lñ inyamɔ̄n paan u, le ki bui ke, <sup>58</sup> “Ti ḥjun u len ke u ga gbaa wii Uwumbor Aadichal li binib maa li na, ki ki maa liken li binib aa maa li na, iwiin itaa.” <sup>59</sup> Le bijab bimina mu aah len pu na, naa kpaan.

<sup>60</sup> Le Uwumbor aatotoorninkpel ngbaan fii sil bi mɔ̄mɔ̄k aanimbiin ni, le ki baa Yesu, “Saan len tibaa aa? Binib ngbaan aah bii si pu na, ti gbii aan taa gbii?”

<sup>61</sup> Le Yesu si ḥmin, kaa len tibaa. Le Uwumbor aatotoorninkpel ki baa u, “Aa ye Kristo u ga gaa binib lii na aan saa ye?

<sup>†</sup>14:44 : ...moor utakpln: Israel yaab nan doon tɔ̄b kina le ki mɔ̄k ngeehn.

Aa ye Uwumbor u ti pak u na Aajapcoon  
aa?"

<sup>62</sup> Le Yesu bui ke, "M ye. Ni ga kan min  
Unibon Aabo ka Uwumbor aarjangii wob.  
Ni ga kan m bi ntaalangbam ni paacham  
ki choo."

<sup>63</sup> Waah len kina na, le Uwumbor aa-  
totoorninkpel chuu kar ubaa aawan-  
peenkaan, le ki bui ke, "Taa ki ban seer-  
aadam. U di ubaa janj Uwumbor la. <sup>64</sup> Ni  
janj waah sii Uwumbor pu na. Ni dak  
kinye?"

Le bi momok bui ke u neer bi ku u la.

<sup>65</sup> Le bi ponn ni bibaa piin ki bi tee  
timootan janj u pu, le ki di likekeln poo  
unimbil, ki gbaa u, ki baa u ke, "Ulau  
faa si?" Bikikiirb ngbaan mu nan gaa u  
ki gbaa u.

### Piita aah nee Yesu pu na

(Matiu 26.69-75; Luk 22.56-62;  
Jonn 18.15-18, 25-27)

<sup>66</sup> Piita aah nan bi lichiln ngbaan ni na,  
le Uwumbor aatotoorninkpel aanaagbi-  
ipiib ubaa dan <sup>67</sup> ki nan kan Piita bi wol  
mmii. Le u lik u mbamom, le ki bui u,  
"Aa mu nan bi Yesu u ye Nasaref aatiñ  
aanii na chee."

<sup>68</sup> Le Piita nee, ki bui u, "Maa bee  
saah len pu na aataata," le ki nyan lipaal  
kikaakpaak ponn ni. N-yoonn ngbaan le  
ukooja wii.

<sup>69</sup> Le unaagbiipi ngbaan ki kan u, le ki  
bui binib bi si nima chee na ke, "Umina  
ye Yesu aadidiliib ponn ni ubaa la." <sup>70</sup> Le  
Piita ki nee lelee.

Le ni ki kpee siib, le binib bi si u chee  
na bui u ke, "Ni ye mbamom, aa ye Yesu  
aadidiliib ponn ni ubaa la; aa mu ye  
Galilee aatiñ aanii la."

<sup>71</sup> Le Piita puu Uwumbor, ki bui ke,  
"Maa nyi naah len unii u na. M yaa mom  
nnyamom kan, Uwumbor daa ntafal."

<sup>72</sup> Libuul ngbaan ni, le lelee aakooja  
wii. Le Piita teer ke Yesu ba bui u ke, "Aa  
ga len nfum mutaa ke saa nyi mi le lelee

aakooja nin wii." Piita aah teer kina na,  
le u wii pam.

### Pailat aah jin Yesu tibor pu na

(Matiu 27.1-2, 11-14;  
Luk 23.1-5; Jonn 18.28-38)

**15** Kichakpinaanyeeek ni le  
Uwumbor aatotoorninkpiib, ni Juu yaab aaninkpiib, ni Uwumbor  
aakaal aamomokb, ni bibojirb  
aaninkpiib momok kal ki kpokl baah ga  
janj pu na. Le bi buu Yesu tikululn, ki di  
u buen kitij ngbaan aaninkpel u bi yin  
u ke Pailat na chee, ki di u janj unaal ni.  
<sup>2</sup> Le Pailat baa u, "Aa ye Juu yaab aabor  
la aa?"

Le u bui u, "Saah len pu na, ni ye kina."

<sup>3</sup> Le Uwumbor aatotoorninkpiib ng-  
baan bii u sakpen. <sup>4</sup> Le Pailat ki baa u,  
"Saan len tibaa aa? Li pel baah bii si  
sakpen pu na."

<sup>5</sup> Le Yesu aa ki len tibaa. Waah kaa len  
tibaa na, le ni gar Pailat pam.

### Baah len ke bi ga ku Yesu pu na

(Matiu 27.15-26; Luk  
23.13-25; Jonn 18.39-19.16)

<sup>6</sup> Njim ngbaan aayoonnan saa kan,  
Pailat ga nyan unaagbiija u kinipaak ban  
u na lii. <sup>7</sup> N-yoonn ngbaan, unaagbiija  
ubaa nan bi kiyondiik ni, bi yin u ke  
Barabas. U ni bakadam bi nan dii u na  
nan tukni kitij ngbaan aaninkpiib, ki  
ku binib. Nima pu le bi nan di bi janj  
kiyondiik ni. <sup>8</sup> Le kinipaak ngbaan dan  
Pailat chee, ki bui u ke u janj waah ti  
janj pu njim ngbaan yoonn momok na,  
ki nyan unaagbiija ubaa lii. <sup>9</sup> Le u baa  
bi, "Ni ban m nyan ni Juu yaab aabor  
la aa?" <sup>10</sup> Pailat bee ke Uwumbor aato-  
toorninkpiib kpa lipiipoln Yesu pu, nima  
le cha bi di u janj unaal ni.

<sup>11</sup> Le Uwumbor aatotoorninkpiib bui  
kinipaak ngbaan ke bi tuk Pailat ke u  
nyan Barabas lii, naa ye Yesu. <sup>12</sup> Kini-  
paak ngbaan aah tuk Pailat kina na, le

u ki baa bi, "Kina kan, uja u ni yin u ke Juu yaab aabor na, m ga ḥa u kinye?"

<sup>13</sup> Le bi teen ke, "Kpaa u ndɔpuinkoo pu."

<sup>14</sup> Le Pailat baa bi, "Ba ḥa? U tun bakaa bayoo?"

Le bi moo tar sakpen ke, "Kpaa u ndɔpuinkoo pu."

<sup>15</sup> Le Pailat ban ke u sɔŋ bisui. Kina pu na, u nan nyan Barabas lii, le ki cha waajab lue Yesu ḥinaalab, ki di u ḥa binjaal ni, bi ti kpaa u ndɔpuinkoo pu.

### Butɔb aajab aah yook Yesu pu na

(Matiu 27.27-31; Jɔnn 19.2-3)

<sup>16</sup> Le butɔb aajab ngbaan di u buen Pailat aachiln ni, ki yin bijab biken ke bi kuun ni. <sup>17</sup> Le bi chuu peer waawanpeenkaan, le ki di libɔkumaln peen u, ki di ikokon luu kiyikpupuk ki di chiq u, <sup>18</sup> le ki doon u ke, "Juu yaab aabor, aa pɔɔ cɔ?" <sup>19</sup> ki joo lidabil gbaa uyil paab, le ki teei timɔɔtan lœ u, ki gbaan unimbiin ni ki doon u. <sup>20</sup> Baah ḥa u mbɔnyun ki ti doo na, le bi chuu peer libɔkumaln ngbaan, ki di waawanpeenkaan peen u, ki di u nyan, bi ti kpaa u ndɔpuinkoo pu.

### Baah kpaa u ndɔpuinkoo pu pu na

(Matiu 27.32-44; Luk 23.26-43; Jɔnn 19.17-27)

<sup>21</sup> Baah cha na, le bi ton uja ubaa nsan ni, bi yin u ke Simonn, u ye Sairene aatin aanii la. U nyan ni ntingbaan ni, le ki choo Jerusalem. U nan ye Aleksanda ni Rufus aate la. Le bi chuu u mpɔɔn ke u tun Yesu aadɔpuinkoo. <sup>22</sup> Le bi di Yesu buen nibaa chee, bi yin nima chee ke Golgota. Golgota aatataa le ye ke "Kiyik-paŋ aapepel." <sup>23</sup> Baah ti fuu nima chee na, le binib bibaa ban bi tii Yesu ndaan mu nnyɔk ḥjmal mu ponni na ke u nyun. Le u yii, kaa nyun. <sup>24</sup> Le butɔb aa-

jab ngbaan kpaa u ndɔpuinkoo pu, ki di waawanpeenkaan yakr tɔb. Bi nan too inaan ke bi lik bimɔk aah ga kan ni na. <sup>25</sup> Ni nan ye kichakpiik ni, tikur tiwae yoonn la, le bi kpaa u ndɔpuinkoo pu. <sup>26</sup> Le bi ḥmee kigbaŋ budabu cha bi ku u na, ki di tam waadɔpuinkoo pu, uyil paab. Bi nan ḥmee ke, "Juu yaab aabor." <sup>27</sup> Bi nan di bififirb bilee kpaa idɔpuinkoo pu. Bi di ubaa kpaa uŋjangii wɔb, ki di uken kpaa uŋangan wɔb. [<sup>28</sup> Le ni gbiin Uwumbɔr Aagbaŋ aah len pu na ke, "Bi ḥa u ke baah ḥjani titunwanbir-dam pu na." <sup>‡</sup>]

<sup>29</sup> Waah lee ndɔpuinkoo pu na, le binib bi jer nima chee na seei u, ki gbakr biyil, le ki bui u, "Aa mu. Si u len ke aa ga gbaa wii Uwumbɔr Aadichal ki ki maa li iwiin itaa na, <sup>30</sup> sunn ni ndɔpuinkoo ngbaan pu ki ḥmar."

<sup>31</sup> Le Uwumbɔr aatotoorninkpiib, ni Uwumbɔr aakaal aamɔmɔkb mu ḥa u mbɔnyun, ki bui tɔb ke, "U gaal biken le bi ḥmar, kaan ḥmaa gaa ubaa lii. <sup>32</sup> Kristo u ga gaa binib lii ki ye Juu yaab aabor na, u sunn ni ndɔpuinkoo pu dandana wee, aan ti kan ki gaa u ki kii."

Le baah di bififirb bilee bi kpaa u chee idɔpuinkoo pu na, bi mu sii u.

### Yesu aah kpo pu na

(Matiu 27.45-56; Luk 23.44-49; Jɔnn 19.28-30)

<sup>33</sup> Nwiin kaasisik ni, le itingbaan mɔmɔk bɔln, ki ti saa nwiin aah kpar pu na. <sup>34</sup> Nwiin aah kpar na, le Yesu teen mpɔɔn pu ke, "Eloi, eloi, lama sabaktani." Naatataa le ye ke "Maawumbɔr, Maawumbɔr, ba pu aa siir cha mi?"<sup>¶</sup>

<sup>35</sup> Binib bi nan si nima chee na ḥjun waah teen pu na, le bibaa bui ke, "Li pel man, u yin Elaija la." <sup>36</sup> Le bi ponni ni ubaa san buen ki ti yoor nkiisuk, ki nan

\*15:28 : Lik Aisaya 53.12.

†15:34 : Lik Ilahn 22.1.

di bɔn ndaan mu mɔɔn na ni, le ki di ḥa lidabil pu, ki di ḥa Yesu aamɔb chee ke u moor, le ki bui ke, "Di cha man, aan ti lik ke Elaija ga dan ki nan sunn ni u aan waan dan."

<sup>37</sup> Le Yesu ki teen mpɔɔn pu, le ki kpo.

<sup>38</sup> Le likekeln li yakr Uwumbɔr aadiik ni nfum mulee na, chuu kar paacham ki ti saa kitij. <sup>39</sup> Le butb aajab aaninkpel u si ndɔpuinkoo ngbaan taab na kan Yesu aah kpo pu na, le ki bui ke, "Mbamɔn, uja ngbaan sil ye Uwumbɔr Aajapɔɔn la."

<sup>40</sup> Bipiib bibaa mu nan bi nima chee, ki si dandar, ki si lik. Bi ponn ni ubaa ye Mari Magdalene, uken mu ye Salome, uken mu ye Mari u ye Jems waatiir ni Joses aana na. <sup>41</sup> Yesu aah nan bi Galilee na, le bipiib ngbaan nan dii u, ki tun lituln ter u. Bipiib bi wiir ki nan dii u dan Jerusalem na mu nan bi nima chee.

### Baah sub Yesu pu na

(Matiu 27.57-61; Luk 23.50-56; Jɔnn 19.38-42)

<sup>42</sup> Kijook aah joor na, le uja ubaa fuu ni, bi yin u ke Josef. U nan ye Arimatea aatiij aanii la, ki ye bibɔjirb aaninkpiib ponn ni ubaa, ki kpa liyimbil. <sup>43</sup> U mu nan bi kii Uwumbɔr aanaan aah ga fuu ni buyoonn na. Ni nan ye kitaak ki ga woln Juu yaab aakpaakool daal na, buyoonn bi gor ke bi ji likpaakool daal na. Le Josef buen Pailat chee ni lipobil, ki ti bui u, "Tii mi Yesu aawon." <sup>44</sup> Pailat aah ḥun ke u kpo na, le ni gar u. Le u yin ni bijab aaninkpel na, ki nan baa u ke, "Yesu aah kpo na, ni yunn aa?" <sup>45</sup> Le u tuk u waah kpo buyoonn na. Pailat aah ḥun ke u kpo na, le u tii Josef nsan ke u yoor waawon. <sup>46</sup> Josef nan daa likekenyaan, ki nyan Yesu aawon ndɔpuinkoo pu, ki di u poo likekeln ngbaan ni, ki di u ti sub kitakpaluj ni. Bi nan gbii kitakpaluj ngbaan litakpasapkeln libaa aasikakl ni la. Le u di litakpapapaln lej mbisamɔb.

<sup>47</sup> Le Mari Magdalene, ni Mari u ye Joses

aana na, kan baah di Yesu aawon sub nin chee na.

### Yesu aah fikr nkun ni pu na

(Matiu 28.1-8; Luk 24.1-12; Jɔnn 20.1-10)

**16** Juu yaab aakpaakool daal aa-jook, le Mari Magdalene ni Salome, ni Mari u ye Jems aana na, buen ti daa tulalee, bi ti di ḥa Yesu aawon pu. <sup>2</sup> Le ki woln kitaak kichakpinaanyek ni, nwiin aah laa puu na, le bi buen likaakul ngbaan chee. <sup>3</sup> Tɔ, litakpal li lek kitakpaluj ngbaan aamɔb na ye lisakpeln la. Nima pu na, baah cha na, le bi baa tɔb ke, "Ijma ga ti biln litakpal na tii timi?" <sup>4</sup> Le bi lik, ki kan ke litakpal na aa ki lek. <sup>5</sup> Le bi koo likaakul na ponn ni ki kan unachipɔɔn ubaa ka ḥɔrangii wɔb ki pee libɔkupiln fɔfɔk. Le ni gar bi pam.

<sup>6</sup> Le u bui bi, "Ni taa cha ni gar nimi man. Ni ban Yesu u ye Nasaref aatiij aanii u bi nan kpaa u ndɔpuinkoo pu na la. U fikr nkun ni a. Waa bi do. Lik man baah nan di u bil nin chee na. <sup>7</sup> Ni li cha ki ti tuk Piita ni waadidiliib biken ke u loln bi pu nsan, ki cha Galilee aatiij ni. Bi ga ti kan u nima, waah nan tuk bi pu na."

<sup>8</sup> Le ni gar bipiib na pam, le biwon gbaa. Le bi nyan likaakul na ni, ki san. Ijawaan aah chuu bi na, le baa tuk unii ubaa.

### Yesu aah di ubaa mɔk binib pu na

(Matiu 28.9-10; Jɔnn 20.11-18; Luk 24.13-35)

<sup>9</sup> Juu yaab aakpaakool daal aah jin ki woln kitaak na aachakpitaawoln, Yesu aah fikr nkun ni na, le u puen di ubaa mɔk Mari Magdalene. Mari le ye upii u Yesu nan nyan tiyayaar tilole u ni na.

<sup>10</sup> Le Mari buen binib bi nan dii Yesu na chee. Bi nan kpa mpombiin ki ka wii. Le Mari tuk bi ke u kan Yesu, u fikr nkun ni a. <sup>11</sup> Baah ḥun kina na, le baa pak ti.

<sup>12</sup>Nimina aapuwōb, le bi ponn ni bilee nan chuun cha ntingbaan ni. Baah cha na, le Yesu nan di ubaa mōk bi. Waa nan bi ke waah nan bi pu buyoonn Mari Magdalene kan u na. <sup>13</sup>Le bi gir buen biken chee, ki ti tuk bi ke bi kan Yesu. Le baa pak baah len pu na.

### **Yesu aah di ubaa mōk waadidiliib pu na**

(*Matiu 28.16-20; Luk 24.36-49;  
J̄nn 20.19-23; Lituln 1.6-8*)

<sup>14</sup>Nimina aapuwōb, le waadidiliib kipiik ni ubaa ka ji tijikaar. Baah bi ji na, le Yesu di ubaa mōk bi, le ki kae bi, ke ba ḷa baa pak binib bi kan u, waah fikr nkun ni aapuwōb na aah len pu na, ke bitafal le pōo. Baa gaa u ki kii mbamōm. <sup>15</sup>Le u ki tuk bi, “Ni li cha dulnyaa mōmōk ni, ki di tibonyaan tee tuk binib mōmōk. <sup>16</sup>Unii u gaa mi ki kii, ki

cha bi muin u nnyun ni na, u ga ḷamar. Unii u kaa gaa mi ki kii na, Uwumbōr ga bui ke waabōr bii. <sup>17</sup>Binib bi gaa mi ki kii na ga tun lijinjiir aatun. Maayimbil pu le bi ga nyan tiyayaar binib ni; bi ga len ilii yayan; <sup>18</sup>bi ga chuu iwaa, le yaan ḷa bi nibaa. Bi yaa nyu lilooul kan, laan ḷa bi nibaa. Bi ga di biŋaal paan bībum pu, le bi ga pōok.”

### **Uwumbōr aah di Yesu buen paacham pu na**

(*Luk 24.50-53; Lituln 1.9-11*)

<sup>19</sup>Tidindaan Yesu aah len bi chee tibōr doo na, le Uwumbōr di u buen paacham, le u ti kal uŋangii wōb. <sup>20</sup>Le waadidiliib buen niipepel mōmōk ni, ki ti tuk binib tibonyaan tee. Le Tidindaan ter bi, ki cha bi tun lijinjiir aatun. Baah tun lijinjiir aatun na, nima le mōk binib ke baah len tibonyaan ti na, ti gbii. Amii.]

*Tibɔnyaan ti*

**LUK**

*ŋmee ti na*

**1** Maaninkpel Teofilus, binib pam nan pɔɔn bibaa ki ŋmee kigbaŋ ponn ni tibɔr ti nan ḥa tikaasisik ni na. <sup>2</sup>Binib bi kan tibɔr ngbaan aah piin ki ti doo pu na mooni ti, ki tuk timi. Le bi ŋmee baah tuk timi pu na. <sup>3</sup>Min Luk, m mu bee mbamɔɔn tibɔr ngbaan aah piin pu ki ti doo pu na. Nima le m dak ke ni ḥjan m mu ŋmee ti, taah piin ki ti saa pu na, ki tii si, <sup>4</sup>aan aa mu bee baah tuk si tibɔr ti na aabamɔɔn.

### **Uwumbɔr aatuun aah len ke bi ga maa Jɔnn pu na**

<sup>5</sup>Buyoonn Herod nan ye Judea aatiŋ aabor na, le Uwumbɔr aatotoor ubaa nan bi, bi nan yin u ke Sekaria. U nan ye Abija aamaal ponn ni aanii la. Upuu aayimbil nan ye Elisabef. U mu nan ye Uwumbɔr aatotoor Aaronn aamaal ponn ni aanii ubaa la. <sup>6</sup>Sekaria ni upuu mɔɔmɔk nan ye bininyaam Uwumbɔr chee, ki dii waakaal mɔɔmɔk, ki ḥjan waah ban pu na, kaa kpa taani ubaa. <sup>7</sup>Baa nan kpa ubo. Elisabef nan ye upiŋoob la. Bi mɔɔmɔk mu nan por la.

<sup>8-9</sup>Uwumbɔr aatotoorb aakaal aah dii pu na, le bi lee Sekaria, u ti koo Uwumbɔr Aadichal ni ki see tulalee aayon. Waayoonn aah fuu ni na, le u koo Uwumbɔr Aadichal ni, u ti tun lituln limina. <sup>10</sup>Buyoonn u bi seer tulalee aayon ngbaan tii Uwumbɔr na, le kinipaak sakpeŋ bi lipaal, ki mee Uwumbɔr. <sup>11</sup>Le u kan Uwumbɔr aatuun, baah seer tulalee aayon libimbiłn li paab na aajangii wɔb. <sup>12</sup>Sekaria aah kan u na, le ni muk u, le ijawaan chuu u. <sup>13</sup>Le Uwumbɔr

aatuun ngbaan bui u, “Sekaria, taa san ijawaan. Uwumbɔr ḥjun saameen a. Aapuu Elisabef ga maa ubijabo, ki tii si. Le aa ga yin u ke Jɔnn. <sup>14</sup>U yaa ma u kan, le aa ga li kpa mpopiin pam. Binib pam mu ga li mɔɔni. <sup>15</sup>U ga li ye uninyuun Uwumbɔr chee. Waan nyu ḥisubil aadaan, ki mu aan nyu ndaan mubaa. U ga li gbii Uwumbɔr Aafuur Nyaan buyoonn bi ga maa u na, ki li joo cha. <sup>16</sup>U ga cha nimi Israel yaab pam gir ti dii Bidindaan Uwumbɔr. <sup>17</sup>U ga li kpa Uwumbɔr Aafuur Nyaan, ni mpoɔɔn, ke Uwumbɔr aabɔɔnabr Elaija aah nan kpa pu na, ki ga loln ni Tidindaan pu nsan. U ga cha tetiib ni baabim ki kpaan.<sup>8</sup> U ga cha binib bi kaa kii Uwumbɔr aamɔɔb na li kpa nlan, aan bi kpeln, ki li dii bininyaam aah dii pu na. U ga toor binib, bi li ye binib bi gor ki kii Uwumbɔr na.”

<sup>18</sup>Le Sekaria bui Uwumbɔr aatuun ngbaan, “M por a, mpuu mu por a; m ga ḥja kinye ki bee ke saah len pu na ga sil ḥja.”

<sup>19</sup>Le Uwumbɔr aatuun ngbaan bui u, “M ye Gabriel u si Uwumbɔr aanimbiin ni na la. U tun ni mi ke m nan tuk si tibɔnyaan tee. <sup>20</sup>Ni yaa nan ḥneer kan, maah len pu na ga gbiin. Saah kaa pak maah len pu na, le aa ga ḥja ubir, kaan ki ḥjmaa len tibɔr ki ti saa buyoonn tiwan nimina ga ḥja na.”

<sup>21</sup>Le kinipaak ngbaan si lipaal, ki si kii buyoonn Sekaria ga nya ni Uwumbɔr Aadichal ni na. U nan yunn kaa nyan ni, le ni gar bi pam. <sup>22</sup>Waah nan nyan ni na, waa ḥjmaa len bi chee tibɔr. Nima le cha bi bee ke u kan lijiniir aawan Uwumbɔr Aadichal ni. Le u beenin len libir, kaa ḥjmaa len tibɔr.

<sup>23</sup>Waawiin aah ye pu u tun lituln Uwumbɔr Aadichal ni na aah doo na, le u kun. <sup>24</sup>Ni bi ki cha, le upuu Elisabef dek lipuul, ki di ubaa bɔr ijmal ijmu, <sup>25</sup>le ki bui ke, “Uwumbɔr lik maah bi pu

na la, le ki ḥa mi tibulchinn kina ki tii  
mi, ki nyan mi inimcoon ni.”

### **Uwumbor aatuun aah bui Mari ke u ga maa Yesu pu na**

<sup>26</sup> Lipuul aah ḥa ijmal iloop aapuul na, le Uwumbor tun waatuun Gabriel ke u buen Galilee aatiij kibaa ni, bi yin ki ke Nasaref, <sup>27</sup> ke u buen usapcoon ubaa chee, bi yin u ke Mari. Waa nyi uja. Bi nan puu ke bi ga tii u tichar. Bi yin uchal Josef, u ye Ubɔr David aamaal ponn ni aaniubaa la. <sup>28</sup> Le Uwumbor aatuun ngbaan fuu ni Mari chee ki doon u, le ki bui u, “Uwumbor ḥa si tibulchinn sakpen a, ki bi aa chee, ki ḥa tinyoor ḥa aa pu ki jer waah ḥa bipiib momok pu na.”

<sup>29</sup> Waah len kina na, le ni gar Mari sakpen. Le u dakl lik waah len pu na aatataa. <sup>30</sup> Le u ki bui u, “Mari, taa san ijawaan. Uwumbor ḥa si tibulchinn la. <sup>31</sup> Aa ga dek lipuul, ki maa ubijabo ki yin u ke Yesu. <sup>32</sup> U ga li ye uninyuu la. Bi ga yin u Uwumbor u kaa kpa ḥeen aats na Aajapcoon. Tidindaan Uwumbor ga tii u uyaaja Ubɔr David aanaan. <sup>33</sup> U ga li ye uyaaja Jakob aayaabitiib<sup>\*\*</sup> aabor n-yoonn mu kaa kpa ndoon na. Waanaan aan doo.”

<sup>34</sup> Le Mari baa Uwumbor aatuun ngbaan ke, “Maah kaa nyi uja na, m ga ḥa kinye ki maa ubo?”

<sup>35</sup> Le u bui u, “Uwumbor Aafuur Nyaan ga sunn ni aa pu. Uwumbor u kaa kpa ḥeen aats na aapcoon ga cha aa dek lipuul. Nima pu na, saah ga maa ubo u na ga li ye chain. Bi ga yin u ke Uwumbor Aajapcoon la. <sup>36</sup> Lik, aana aabo Elisabef, u por na, u mu pil ubijabo aapuul. Baah nan yin u ke upiijoob na kpa ijmal iloop aapuul la; <sup>37</sup> nibaa aa pco Uwumbor chee.”

<sup>38</sup> Le Mari bui Uwumbor aatuun ngbaan, “M ye Uwumbor aanaagbiipi la. Saah len pu na, u cha ni ḥa kina.” Le Uwumbor aatuun ngbaan buen.

### **Mari aah mann Elisabef pu na**

<sup>39</sup> N-yoonn ngbaan le Mari gor mala ki buen ḥijoo ponn ni, le ki ti buen kitij kibaa ni, ki bi Juda aatiij ponn ni,<sup>††</sup> <sup>40</sup> le ki koo Sekaria do, ki doon Sekaria aapuu Elisabef. <sup>41</sup> Elisabef aah ḥyun idoon pu na, le waabo fii uponn ni. Le Uwumbor Aafuur Nyaan gbiin Elisabef. <sup>42</sup> Le u len mpcoon pu ki bui Mari, “Uwumbor ḥa tinyoor ḥa aa pu ki jer waah ḥa bipiib momok pu na, ki ḥa tinyoor ḥa ubo u bi aaponn ni na mu la. <sup>43</sup> Ba ḥa Uwumbor nyuj mi kina ki cha Ndindaan aana dan nan mann mi? <sup>44</sup> Ntafal aah ḥyun saadoon na, le maabo fii mponn ni, waah kpa mpopiin pu na. <sup>45</sup> Si u gaa Uwumbor ki kii na, u ḥa tinyoor ḥa aa pu la, ki ga ḥa waah nan tuk si ke u ga ḥa pu na.”

### **Mari aah gaa nlahn ki pak Uwumbor pu na**

<sup>46</sup> Le Mari bui ke,

“M nyujni Uwumbor nsui ni la.

<sup>47</sup> M kpa mpopiin sakpen, Uwumbor u gaa mi lii na pu.

<sup>48</sup> U teer mi u ye waanaagbiipiigii na bɔr.

Dandana ki joo cha, binib momok ga len ke Uwumbor ḥa tinyoor ḥa m pu la,

<sup>49</sup> ba pu? Uwumbor u kpa mpcoon na tun litukpaan ki tii mi.

Waayimbil ye chain la.

<sup>50</sup> Binib bi san u na, u san bi kinimbaak, ni biyaabitiib, ni biyaabisɔɔk ponn ni ki joo cha.

<sup>51</sup> U mɔk binib waapcoon, ki jenn kalmbaanidam bi dak ke bi ye bininyuum na.

<sup>\*\*1:33</sup> : Jakob aayaabitiib ye Israel yaab la.

<sup>††1:39</sup> : Ni nan ye iwiin inaa bee ijmu aasachuln la.

<sup>52</sup> U nyan bibɔrkpaam baanaan ni,  
ki nyuŋ bigiim.

<sup>53</sup> Binib bi nikon joo bi na,  
u tii bi tijikaar nyaan, bi ji bab.  
U cha biwankpadam chuun ni iŋaalpeen.  
<sup>54</sup> Waah nan puu tipuur ti tii tiyaajatiib  
na,

u ḥa kina la, ki ter waatutum Israel yaab.  
<sup>55</sup> U teer ki san Abraham ni uyaabitiiib  
kinimbaak  
n-yoonn mu kaa kpa ndoon na la.”

<sup>56</sup> Tɔ, Mari nan bi Elisabef do ijmal  
itaa, le ki nin gir kun.

### Baah ma Jɔnn u muini binib nnyun ni na pu na

<sup>57</sup> Le ni neer Elisabef maa ubo. Le u ma  
ubijabo. <sup>58</sup> Le udoyaab ḥun ke Uwumbɔr  
san u kinimbaak sakpen. Le u ni bi kpaan  
ki mɔɔni.

<sup>59</sup> Waabo aawiin iniiñ daal, le bi dan  
bi nan gii uchakpaln, le ki ban bi yin u  
ke Sekaria ke baah yin ute pu na. <sup>60</sup> Le  
una aa kii, ki bui ke bi ga yin u ke Jɔnn  
la.

<sup>61</sup> Le bi bui u, “Unii ubaa aa kpa liyim-  
bil limina nimi aamaal ponn ni.” <sup>62</sup> Le bi  
di biŋaal len ute chee, ki baa u ke u ban  
ke bi yi waabo kinye.

<sup>63</sup> Le u bui bi ke bi tii u kigbañ. Baah  
tii u na, le u ḥmee ke, “Waayimbil le  
ye Jɔnn.” Le ni gar bi mɔmɔk pam.

<sup>64</sup> Libuul ngbaan ni le Sekaria aalambil  
lɔkr. Le u piin ki bi len ki pak Uwumbɔr.  
<sup>65</sup> Le ijawaan chuu bidoyaab mɔmɔk. Le  
Judea aatim mumɔk bi ḥijoo ponn ni  
na aanib ḥun tibɔr ngbaan. <sup>66</sup> Ni nan ḥa  
binib bimɔk ḥun ti na ilandak. Le bi baa  
ke, “Ubo ngbaan ga li ye ba aanibol?” Ba  
pu? Uwumbɔr aajaal nan bi u pu.

### Sekaria aah pak Uwumbɔr pu na

<sup>67</sup> Le Uwumbɔr Aafuur Nyaan gbiin  
Sekaria, u ye Jɔnn aate na, le ki cha u  
len Uwumbɔr aabɔr:

<sup>68</sup> “Cha ti pak Tidindaan u ye timi Israel  
yaab Aawumbɔr na.

U dan nan ter waanib, ki nyan bi tinaag-  
biir ni,

<sup>69</sup> ki tii timi unii u ga gaa timi lii, ki kpa  
mɔɔn,

ki ye waatutunn Ubɔr David  
aamaal ponn ni aani ubaa na.

<sup>70</sup> U nan cha waabɔnabtiib chain len  
kina n-yaayoonn na

ki joo cha.

<sup>71</sup> U nan puu tipuur ke u ga nyan timi,  
timi aadim aajaal ni,

ni bimɔk nan timi na aajaal ni, aan ti  
ŋmar.

<sup>72</sup> U nan len ke u ga san tiyaajatiib  
kinimbaak,

ki teer waah puu tipuur ti ye chain na  
bɔr.

<sup>73</sup> U nan puu tipuur tii tiyaaja Abraham,

<sup>74</sup> ke u ga nyan timi, timi aadim aajaal  
ni,

aan ti dii u ki taa li san ijawaan,

<sup>75</sup> ki li bi chain,

ki li kpa mbimbinyaan u chee n-yoonn  
mɔmɔk.

<sup>76</sup> Si, maabo, bi ga yin si ke Uwumbɔr u  
kaa kpa

ŋeen aatɔ na aabɔnabr.

Aa ga loln ni Tidindaan pu nsan,  
ki toor nsan tii u,

<sup>77</sup> ki tuk waanib ke u ga di cha baatun-  
wanbir pinn bi,

ki gaa bi lii;

<sup>78</sup> ba pu? timi Aawumbɔr kpa tibulchinn,  
ki san timi kinimbaak.

U yaa gaa timi lii kan,

ni ga li bi ke nwiin aah puu ni pu na.

<sup>79</sup> Ni ga woln binib bi bi mbɔmbɔɔn

ni ki san nkun ijawaan na pu,

ni ga mɔk timi nsan mu ga tii timi nsuu-  
doon na.”

<sup>80</sup> Le ubo ngbaan muun, ki dii Uwumbɔr  
ni usui mɔmɔk, le ki nan bi nteer-  
sakpiin ni, ki ti saa buyoonn u piin ki bi  
tuk Israel yaab Uwumbɔr aabɔr na.

## Baah ma Yesu pu na

(Matiu 1.18-25)

**2** N-yoonn ngbaan le Uborkpaan Siisa Agustus len ke binib mɔmɔk kuun ni ki nan ŋmee baayimbil, u lik baah wiir pu na.<sup>2</sup> Baah kahn binib kina njan pu na, Kirinius le nan ye Siria aatij aaninkpel.<sup>3</sup> Le binib mɔmɔk buen bido aatij ni, bi ti ŋmee baayimbil.

<sup>4</sup> Josef nan ye Ubɔr David aamaal ponn ni aanii ubaa la. Nima pu na, u nan nyan Nasaref, kitij ki bi Galilee aatij ni na, le ki buen Ubɔr David aatij, ki bi yin ki ke Betlehem, ki bi Judea aatij ni na.<sup>5</sup> Le u ni upuu Mari, u kpa lipuul na, buen bi ti ŋmee baayimbil.<sup>6</sup> Baah bi Betlehem aatij ni na, le ni neer u maa ubo.<sup>7</sup> Le u ma waajan aabijabo, ki di u poo likekeln ni, ki di u di ja tiwakor aah ŋmɔ timoor dakaa u ponn ni na; mpaan aa nan ki bi bicham aadiik ponn ni ke bi koo.

### Uwumbɔr aatuuntiib aah fuu ni bipihdam chee pu na

<sup>8</sup> Bipihdam bibaa nan bi nima chee timoor ni, ki kpaa baapiih ki lik i kiny-eek.<sup>9</sup> Le Uwumbɔr aatuun dan bi chee. Le Uwumbɔr aawiihn woln bi pu. Le ijawaan chuu bi sakpen.<sup>10</sup> Le Uwumbɔr aatuun ngbaan bui bi, “Taa san ijawaan man. M joo ni tibɔnyaan ti ga tii binib mɔmɔk mpopiin sakpen na la.<sup>11</sup> Kiny-eek kee bi ma unii u ga gaa nimi lii na, Ubɔr David aatij ni. Uma le ye Tidindaan Kristo.<sup>12</sup> Ni ga kan ubo ngbaan aah poo ŋikeken ni, ki dɔ tiwakor aah ŋmɔ timoor dakaa u ponn ni na. Nima le ga li ye limɔkl ki tii nimi.”

<sup>13</sup> Libuul ngbaan ni le Uwumbɔr aatuuntiib bi wiir sakpen na fuu ni ntuun ngbaan chee, le ki pak Uwumbɔr, ki len ke,

<sup>14</sup> “Cha ti nyuj Uwumbɔr u bi paacham na.

Liftuur ga li bi dulnyaa wee ni. Uwumbɔr san binib kinimbaak la.”

<sup>15</sup> Le Uwumbɔr aatuuntiib ngbaan gir buen paacham. Le bipihdam ngbaan bui tsɔb, “Cha ti buen Betlehem aatij ni dandana, ki ti lik Uwumbɔr aah tuk timi ke tiwan ni ja nima na.”

<sup>16</sup> Le bi buen mala, ki ti kan Mari, ni Josef, ni ubo ngbaan. Ubo ngbaan dɔ tiwakor aah ŋmɔ timoor dakaa u ponn ni na.<sup>17</sup> Bipihdam ngbaan aah kan u na, le bi tuk binib Uwumbɔr aatuun ngbaan aah tuk bi ubo ngbaan aabɔr pu na.<sup>18</sup> Binib bimɔk ŋun bipihdam ngbaan aah len pu na, le ni gar bi.<sup>19</sup> Mari le teer tibɔr timina mɔmɔk, ki dakl lik taatataa usui ni.<sup>20</sup> Le bipihdam ngbaan gir buen baapiih chee timoor ni. Baah cha na, le bi nyurni Uwumbɔr ki pak u, baah kan ki ŋun pu na mɔmɔk pu; bi kan ki ŋun Uwumbɔr aatuun ngbaan aah tuk bi pu na.

### Baah yin Yesu liyimbil pu na

<sup>21</sup> Ubo ngbaan aawiin iniin daal le ni neer bi gii uchakpaln. Le bi yin u ke Yesu. Buyoonn Mari aa nan kee dek lipuul na, le Uwumbɔr aatuun ngbaan nan bui u ke bi yin u kina.

### Baah di Yesu ki di tii Uwumbɔr pu na

<sup>22</sup> Buyoonn ni neer bi ja Mari chain, Moses aakaal aah mɔk pu na, le bi di ubo ngbaan buen Jerusalem, bi ti di u tii Uwumbɔr.<sup>23</sup> Ni ŋmee Uwumbɔr aakaal aagbaŋ ni ke bi di njan aabijabo mɔk ki di tii Uwumbɔr.<sup>24</sup> Le Josef ni Mari toor kitork ki tii Uwumbɔr, waakaal aah len pu na. Nkaal ngbaan len ke bi di ŋinan-jel ŋilee, bee mbɔrnanjibim mulee ki di toor kitork ngbaan.

<sup>##2:11</sup> : Hiibru aaliin ni, bi yin Kristo ke Masiya. Masiya aatataa le ye ke bi di olif aakpan kpir unii aayil pu ki mɔk ke u ye Uwumbɔr yoo.

<sup>25</sup> Uja ubaa nan bi Jerusalem aatiŋ ni. Bi nan yin u ke Simeonn. U nan ye uninyaan la, ki dii Uwumbor aakaal mɔmɔk mbamɔm, ki lik bundaln Uwumbor ga nyan Israel yaab baafalaan ni na. Uwumbor Aafuur Nyaan nan bi u chee, <sup>26</sup> ki nan mɔk u ke waan kpo, see u kan Uwumbor aanii Kristo u ga gaa binib lii na waahr. <sup>27</sup> Uwumbor Aafuur Nyaan nan cha u koo Uwumbor Aadichal ni, le Yesu aate ni una joo ni Yesu ki di koo ni Uwumbor Aadichal ni, bi ti di u tii Uwumbor. Buyoonn bi di u koo ni na <sup>28</sup> le Simeonn gaa u unjaal ni, le ki pak Uwumbor, ki bui ke,

<sup>29</sup> “Uwumbor, aa ga ŋmaa cha saatutunnya dulnyaa wee ni, nsuudoon ni; ba pu? dandana aa ŋa saah nan len pu na,

<sup>30</sup> ki cha nnimbil kan Saabo u ga gaa timi lii na.

<sup>31</sup> Aa nan len ke aa ga tun ni u dulnyaa wee ni.

Dandana wee u ga nya, aan binib mɔmɔk bee waabor.

<sup>32</sup> U ye nwiihn ki ga woln binib bi kaa ye Israel yaab na aanimbil. U pu, le binib ga nyuj saanib Israel yaab.”

<sup>33</sup> Simeonn aah len ubo ngbaan aabor kina na, le ni gar ute ni una. <sup>34</sup> Le Simeonn ŋa Uwumbor aanyoor ŋa bi pu, le ki bui ubo ngbaan aana Mari, “Uwumbor nyan ubo ngbaan ke u sunn timi Israel yaab ponn ni pam taab, ki nyuj ti ponn ni pam mu. U ye limɔkl li binib pam ga yii li na. <sup>35</sup> Nima le ga kpiir baah dak pu bisui ni na. Aasui mu ga bii sakpen a, ki ga li wu ke unyoohn na.”

<sup>36</sup> Le upininkpel ubaa, u ye Uwumbor aabɔnabpii, aan bi yin u ke Ana na, mu nan bi. U nan ye Fanuel aabisal, ki ye Aser aanibol ponn ni aanii ubaa la. U

nan por sakpen a. U nan bi uchal chee ŋibin ŋilole, le uchal kpo cha u, le u ye ukpopii. <sup>37</sup> U nan ye ŋibin imonko inaa ni ŋinaa aanii la. U nan bi Uwumbor Aadichal ni n-yoonn mɔmɔk, ki dooni u nwiin pu ni kinyeek, ki lulni bumɔb, ki mee u. <sup>38</sup> N-yoonn ngbaan le u mu fuu ni, ki dooni Uwumbor ubo ngbaan pu, le ki di waabor tuk Jerusalem aanib bimɔk lik buyoonn Uwumbor ga gaa bi lii na.

### Baah gir ni Nasaref aatiŋ ni pu na

<sup>39</sup> Yesu aate ni una nan ŋa Uwumbor aakaal aah len pu na mɔmɔk, le ki gir kun bido aatiŋ Nasaref ki bi Galilee aatiŋ ni na. <sup>40</sup> Le ubo ngbaan muun, ki moo kan mpɔɔn, ki kpa nlan sakpen. Le Uwumbor aanyoor nan bi u pu.

### Yesu aah bi Uwumbor Aadichal ni pu na

<sup>41</sup> Libiln mɔk, ute ni una nan chaa Jerusalem, buyoonn Juu yaab ji Lakr-jer aajim<sup>¶¶</sup> <sup>42</sup> Yesu aah nan ti saa ŋibin kipiik ni ŋilee na, le bi buen Jerusalem bi ti ji njim ngbaan, baah ŋani pu ŋibin mɔmɔk na. <sup>43</sup> Bi nan bi nima ki ti saa buyoonn njim ngbaan aawiin doo na, le ki gir chaa kun. Le Yesu u nan laa ye ubo na gaar Jerusalem ni. Ute ni una mu aa nyi. <sup>44</sup> Bi dak ke u bi usachun ŋeen aatɔtiib ponn ni. Le bi chuun nwimɔn aasachuln, le ki nin ban u bidoyaab ponn ni, kaa kan u. <sup>45</sup> Baah kaa kan u na, le bi gir buen Jerusalem ponn ni, ki ti chuun ban u. <sup>46</sup> Iwiin itaa daal le bi ti kan u Uwumbor Aadichal ni. U ka bimɔmɔkninkpiib aakaasisik ni, ki pel baah len pu na, ki mu baa bi mbaan, <sup>47</sup> ki kpa nlan ki bee baah len pu na aatataa, ki giin kii bi mbamɔm. Nima le ni gar binib bimɔk ŋun na. <sup>48</sup> Ute ni una aah kan u na, le ni gar bi pam. Le una baa

<sup>¶¶</sup> 2:41 : Bi nan ji Lakr-jer aajim ke bi teer bundaln Uwumbor aatuun u ku binib na nan lakr bi pu jer na. Lik Nnyam 12.1-27; Ikaal 16.1-8.

u, “Maabo, ba ḥa aa ḥa timi kina? M ni aate ban si ni mpombiin.”

<sup>49</sup> Le u baa bi, “Ba pu ni ban mi? Naa nyi ke ni ye ke m li bi Nte Uwumbor aat-uln ni ii?” <sup>50</sup> Le baa bee waah len pu na aatataa.

<sup>51</sup> Le u dii bi ki gir Nasaref aatij ni, le ki kii bimoi. Le una joo tibor timina mɔmɔk usui ni. <sup>52</sup> Yesu nan muun ki moo kan nlan, le ki kan kipak binib ni Uwumbor mu chee.

**Jənn u muini binib nnyun ni na aah moon Uwumbor aabɔr pu na**

(Matiu 3.1-12; Mak 1.1-8; Jənn 1.19-28)

**3** Buyoonn Ubɔrkpaan Tiberius Siisa nan jin waanaan ɔjibin kipiik ni njimmu ni, aan Pontius Pailat mu ye Judea aatij aaninkpel, Herod mu ye Galilee aabɔr, aan unaal Filip mu ye Iturea aatij, ni Trakonitis aatij aabɔr, Lisanus mu ye Abilene aatij aabɔr,<sup>2</sup> aan Anas ni Kayafas mu ye Uwumbor aatoorninkpiib na, n-yoonn ngbaan le Jənn u ye Sekaria aajapɔɔn na nan bi nteersakpiin ni. Le Uwumbor len u chee tibor nima.<sup>3</sup> Le u bɔ dii Jɔɔdann aamɔɔl aat-ingbaan ni, ki mooni ke, “Kpeln nimi aabimbin man, aan m muin nimi nnyun ni, le Uwumbor ga di cha nimi aatun-wanbir pinn nimi.”<sup>4</sup> Waah ḥa kina na, le ni gbiin Uwumbor aabɔnabr Aisaya aah nan ɔjmee pu Uwumbor Aagban ni na ke, “Unii ubaa bi nteersakpiin ni ki tar, Toor Uwumbor aasan man

ki ḥa waasan mu li tok ki tii u.

<sup>5</sup> Bi ga di titan gbiin tifatann mɔmɔk, ki ber ɔjigoo ni ɔjigongon mɔmɔk lii taab, ki naar isan imɔk gor na, ki ḥa isan imɔk kaa joon na, i li joon tii u.

<sup>6</sup> Binib mɔmɔk ga kan Uwumbor aah ga gaa bi lii pu na.”<sup>§§</sup>

<sup>7</sup> Le kinipaak nan dan Jənn chee, ki ban ke u muin bi nnyun ni. Le u baa bi, “Nimi ijagen aabim, ɔjma sur nimi ke ni nya ntafadaan mu choo na ni?”<sup>8</sup> Ni li tun lituln li ga mɔk ke ni sil kpeln nimi aabimbin na, ki taa bui ke niyaaja aah ye Abraham na, nima le ga cha ni nyan ntafadaan ni. M tuk nimi la, Uwumbor ga ɔjmaa di ɔnitakpal ɔjimina kpalm Abraham aayaabitiiib.<sup>9</sup> Dandana wee Uwumbor toor kichɔk ke u ti gaa isui imɔk kaa lu ɔjisubil ḥi ḥan na, ki di ḥa mmii ni.”

<sup>10</sup> Le kinipaak ngbaan baa u, “Kina kan, ti ga ḥa kinye?”

<sup>11</sup> Le u bui bi, “Unii u kpa ɔjibokul ɔjilee na, u tii unii u kaa kpa libaa na. Unii u mu kpa tijikaar na, u yakr tii unii u kaa kpa na.”

<sup>12</sup> Bilampoogaab mu nan dan u chee, ki ban ke u muin bi nnyun ni, le ki baa u, “Umɔmɔkr, ti mu ga ḥa kinye?”

<sup>13</sup> Le u bui bi, “Ni taa gaa ɔjimobil ki jer baah siin nimi pu na.”

<sup>14</sup> Le butɔb aajab mu baa u, “Ti mu ga ḥa kinye?”

Le u bui bi, “Ni taa gaa unii ubaa aamobil mpɔɔn man, ki taa galn unii u kaa kpa taani na. Cha ninimbil gbiin nimi aapal.”

<sup>15</sup> Jənn pu, le binib aalandak fii. Bi mɔmɔk baa bisui ni ke, “U ye Kristo u ga gaa timi lii na aan waa ye?”<sup>16</sup> Le Jənn bui bi mɔmɔk, “Mma muin nimi nnyun ni la. Tɔ, unii u jer mi na mu choo. Maa jeer ke m gbiln waanaatak aajmin ki tii u. Uma le ga muin nimi Uwumbor Aafuur Nyaan, ni mmii ni.”<sup>17</sup> U joo waayikpimbik ujaal ni, u ti chaar waajikaar, ki di njikaabim ḥa lipil ni, ki di tigbengbir see mmii mu kaan junn na ni.”

<sup>18</sup> Kina le Jənn nan sur binib ngbaan, ki di ɔjimɔbon aabɔŋ kpee ki sur bi, ki mooni tibɔnyaan ngbaan.<sup>19</sup> U nan sur

Ubør Herod mu. Herod nan gaa unaal aapuu Herodias, ki ki tun titunwanbir sakpen ki kpee. Nima le cha Jɔnn nan sur u.<sup>20</sup> Le Herod ki tun titunwanbir tiken ki kpee, ki chuu Jɔnn laj kiyondiik ni.

### Jɔnn aah muin Yesu nnyun ni pu na (Matiu 3.13-17; Mak 1.9-11)

<sup>21</sup> Jɔnn aah nan muin binib nnyun ni na, le u muin Yesu mu nnyun ni. Le Yesu mee Uwumbør. Waah bi mee Uwumbør na, le kitaapaak chuu piir. <sup>22</sup> Le Uwumbør Aafuur Nyaan sunn ni, ki nan tɔŋ u pu, ki naahn linanjel. Le nneel nyan ni paacham ki len, “Aa ye Njapcoo u m gee si na la. Nnimbil gbiin si.”\*

### Yesu aayaajatiib ponni aayimbil

(Matiu 1.1-17)

<sup>23</sup> Buyoonn Yesu naahn ke waah ḥa njibin piitaa aanii na, le u piin ki tuk binib Uwumbør aabor. Binib nan dak ke u ye Josef aajapcoo la.

Josef nan ye Heli aajapcoo,

<sup>24</sup> Heli mu nan ye Matat aajapcoo, Matat mu nan ye Liifai aajapcoo, Liifai mu nan ye Melki aajapcoo, Melki mu nan ye Janai aajapcoo,

Janai mu nan ye Josef aajapcoo,

<sup>25</sup> Josef mu nan ye Matatias aajapcoo, Matatias mu nan ye Amos aajapcoo,

Amos mu nan ye Nahum aajapcoo, Nahum mu nan ye Esli aajapcoo,

Esli mu nan ye Nagai aajapcoo,

<sup>26</sup> Nagai mu nan ye Maaf aajapcoo, Maaf mu nan ye Matatias aajapcoo,

Matatias mu nan ye Semeinn aajapcoo, Semeinn mu nan ye Josek aajapcoo,

Josek mu nan ye Joda aajapcoo,

<sup>27</sup> Joda mu nan ye Joanann aajapcoo, Joanann mu nan ye Resa aajapcoo,

Resa mu nan ye Serubabel aajapcoo, Serubabel mu nan ye Sealtiel aajapcoo,

Sealtiel mu nan ye Neri aajapcoo,

<sup>28</sup> Neri mu nan ye Melki aajapcoo, Melki mu nan ye Adi aajapcoo,

Adi mu nan ye Kosam aajapcoo, Kosam mu nan ye Elmadam aajapcoo,

Elmadam mu nan ye Er aajapcoo,

<sup>29</sup> Er mu nan ye Josua aajapcoo, Josua mu nan ye Elieser aajapcoo,

Elieser mu nan ye Jorim aajapcoo, Jorim mu nan ye Matat aajapcoo,

Matat mu nan ye Liifai aajapcoo,

<sup>30</sup> Liifai mu nan ye Simeonn aajapcoo, Simeonn mu nan ye Juda aajapcoo,

Juda mu nan ye Josef aajapcoo, Josef mu nan ye Jonam aajapcoo,

Jonam mu nan ye Eliakim aajapcoo,

<sup>31</sup> Eliakim mu nan ye Melea aajapcoo, Melea mu nan ye Mena aajapcoo,

Mena mu nan ye Matata aajapcoo, Matata mu nan ye Natann aajapcoo,

Natann mu nan ye Ubør David aajapcoo,

<sup>32</sup> Ubør David mu nan ye Jese aajapcoo, Jese mu nan ye Obed aajapcoo,

Obed mu nan ye Boas aajapcoo, Boas mu nan ye Salmonn aajapcoo,

Salmonn mu nan ye Nasonn aajapcoo,

<sup>33</sup> Nasonn mu nan ye Aminadab aajapcoo, Aminadab mu nan ye Adminn aajapcoo,

Adminn mu nan ye Arni aajapcoo, Arni mu nan ye Hesronn aajapcoo,

Hesronn mu nan ye Peres aajapcoo, Peres mu nan ye Juda aajapcoo,

<sup>34</sup> Juda mu nan ye Jakob aajapcoo, Jakob mu nan ye Aisak aajapcoo,

Aisak mu nan ye Abraham aajapcoo, Abraham mu nan ye Tera aajapcoo,

Tera mu nan ye Nahor aajapcoo,

<sup>35</sup> Nahor mu nan ye Serug aajapcoo, Serug mu nan ye Reu aajapcoo,

Reu mu nan ye Peleg aajapcoo, Peleg mu nan ye Eber aajapcoo,

Eber mu nan ye Sela aajapcoo,

\*3:22 : Lik Aisaya 42.1.

<sup>36</sup> Sela mu nan ye Kainann aaajapcoon, Kainann mu nan ye Afaksad aaajapcoon, Afaksad mu nan ye Sem aaajapcoon, Sem mu nan ye Nowa aaajapcoon, Nowa mu nan ye Lamek aaajapcoon, <sup>37</sup> Lamek mu nan ye Metusela aaajapcoon, Metusela mu nan ye Enok aaajapcoon, Enok mu nan ye Jared aaajapcoon, Jared mu nan ye Mahalaleel aaajapcoon, Mahalaleel mu nan ye Kenann aaajapcoon, <sup>38</sup> Kenann mu nan ye Enos aaajapcoon, Enos mu nan ye Sef aaajapcoon, Sef mu nan ye Adam aaajapcoon, Uwumbor le nan naan Adam.

### Kinimbəŋ aah təŋ Yesu pu na

(Matiu 4.1-11; Mak 1.12-13)

**4** Yesu, u nan gbii Uwumbor Aafuur Nyaan na nan nyan Jċċdann aamċoł chee. Le Uwumbor Aafuur Nyaan cha u buen nteersakpii ni, <sup>2</sup> le kinimbəŋ ti təŋ u nima, iwiin imonko ilee. Iwiin imonko ilee ngbaan Yesu aa jin nibaa. Le iwiin ngbaan aah jer na, nkon chuu u.

<sup>3</sup> Le kinimbəŋ bui u, “Aa yaa ye Uwumbor Aajapcoon kan, bui litakpal limina aan li kpalm tijikaar.”

<sup>4</sup> Le Yesu bui ki ke, “Ni ɣmee Uwumbor Aagbaŋ ni ke, ‘Tijikaar baanja aan ɣmaa tii unii limafal.’”

<sup>5</sup> Le kinimbəŋ di u buen lijool li fɔk na paab, ki ti mok u dulnyaa wee ni aanaan mɔmɔk libuul ngbaan ni, <sup>6</sup> le ki bui u, “M ga di mpocoñ mumina mɔmɔk, ni mu aawangol tii si. Bi nan di ni mɔmɔk tii mi la. M mu ga ɣmaa di ni tii unii u m ban na. <sup>7</sup> Aa yaa gbaan nmimbiin ni ki pak mi kan, sin le ga li yeh ni mɔmɔk.”

<sup>8</sup> Le Yesu bui ki ke, “Ni ɣmee Uwumbor Aagbaŋ ni ke, ‘Li pak Aadindaan Uwumbor ki dii uma baanja.’”

<sup>9</sup> Le kinimbəŋ di u buen Jerusalem, ki ti di u təŋ Uwumbor Aadichal paab, le ki bui u, “Aa yaa ye Uwumbor Aajapcoon

kan, lir ni kitin; <sup>10</sup> ni ɣmee Uwumbor Aagbaŋ ni ke, ‘U ga tuk waatuuntiib ke bi li lik si. <sup>11</sup> Le bi ga li joo si bijaal ni, aataal taa gbeer litakpal.’”

<sup>12</sup> Le Yesu bui ki ke, “Uwumbor Aagbaŋ len ke, ‘Taa təŋ Aadindaan Uwumbor.’”

<sup>13</sup> Kinimbəŋ aah təŋ Yesu ntəŋ mɔmɔk ki ti doo na, le ki laa siir cha u.

### Yesu aah piin waatuln Galilee aatiŋ ni pu na

(Matiu 4.12-17; Mak 1.14-15)

<sup>14</sup> N-yoonn ngbaan le Yesu gir kun Galilee aatiŋ ni. Uwumbor Aafuur Nyaan aapcoon mu bi u ni. Le waayimbil moon Galilee aatingbaan mɔmɔk ni. <sup>15</sup> Le u koo mmeen aadir ni, ki tuk binib Uwumbor aabɔnyaan. Le binib mɔmɔk nyuj u.

### Nasaref aatiŋ aanib aah yii Yesu pu na

(Matiu 13.53-58; Mak 6.1-6)

<sup>16</sup> Yesu nan ti fuu Nasaref aatiŋ, baah nan kpiin u nin chee na. Juu yaab aak-paakool daal, le u koo mmeen aadiik ni, waah ɣani pu n-yoonn mɔmɔk na. Le u fii sil ke u karn Uwumbor Aagbaŋ ni. <sup>17</sup> Le bi nan di Uwumbor aabɔnabr Aisaya aagbaŋ di tii u. Le u kpar kigbaŋ ngbaan, ki kan nin chee ɣmee ke,

<sup>18</sup> “Uwumbor Aafuur Nyaan bi m ni; u nyan mi ke m tuk bigiim tibɔnyaan tee. U tun ni mi ke m nan sɔŋ binib bi kpa mpombiin na aasui,

ki tuk binaagbiib ke m gaa bi lii la, ki tuk bijoom ke m likr binimbil, ki nyan bifalaadam baafalaa ni,

<sup>19</sup> ki tuk binib ke buyoonn Uwumbor ga gaa waanib lii na fuu ni.”†

<sup>20</sup> Le Yesu ki kpab kigbaŋ ngbaan, ki ki giin ki tii mmeen aadiik ni aatotoor ngbaan, le ki kal. Le binib bimɔk bi mmeen aadiik ni na aanimbil kal u pu. <sup>21</sup> Le u

†4:19 : Lik Aisaya 61.1-2.

bui bi, "Naah ḥun Uwumbor Aagbaŋ ni aabor ti din wee na gbiin la."

<sup>22</sup> Le bi mɔmɔk pak u. Waah len ili-inyaan pu na, le ni gar bi pam. Le bi baa tɔb, "Waa ye Josef aajapɔɔn la aa?"

<sup>23</sup> Le u bui bi, "M bee ke ni ga bui mi liyatajakl limina, 'Dokta, tii aabaa laafee.' Ni ga ki bui mi, 'Ti ḥun saah tun lijinjiir aatun Kapenaum aatiŋ ni pu na. Tun kina do chee na, saatij ponn ni.'

<sup>24</sup> M tuk nimi mbamɔɔn la, binib aan nyuŋ Uwumbor aabɔɔnabr ubaa udo aatiŋ ni.

<sup>25</sup> "Li pel man, Elaija aayoonn na, utaal aa nan nun ḥibin ḥitaa ni ijmal iloob. Le nkon sakpem lir kitij ngbaan ni. N-yoonn ngbaan Israel yaab ponn ni bikpopiib nan bi ki wiir. <sup>26</sup> Uwumbor mu aa nan tun Elaija u ti ter bi ponn ni ubaa. U nan tun u Sarefaf aatiŋ, ki bi Saidonn aatiŋ ni na, ke u ti ter ukpopiib u bi nima na. <sup>27</sup> Uwumbor aabɔɔnabr Elaisa aayoonn na, bikɔndam nan bi Israel yaab ponn ni ki wiir; le Uwumbor aa cha bi ponn ni ubaa pɔɔk. Naamann, u nan ye Siria aatiŋ aanii na baanja le u nan cha u pɔɔk."

<sup>28</sup> Yesu aah len kina na, le binib bimɔk bi mmeen aadiik ni na gee lijuul sakpen, <sup>29</sup> le ki fii, ki chuu nyan u kitij ngbaan ni, ki di u buen baatiŋ aah bi li-jool li paab na, bi ti di u lii lijool ngbaan aataab. <sup>30</sup> Le u bɔ̄ dii bikaasisik ni ki buen.

### Yesu aah nyan tiyayaar uja ni pu na

(Mak 1.21-28)

<sup>31</sup> U nan fuu Kapenaum, kitij ki bi Galilee aatiŋ ni na. Le Juu yaab aak-paakool daal u koo mmeen aadiik ni, ki ti tuk binib Uwumbor aabor. <sup>32</sup> Waah tuk bi tibɔ̄ ti na, le ni gar bi pam. Ba pu? waabor nan kpa mpɔɔn. <sup>33</sup> Le uja u tiyayaar joo u na bi mmeen aadiik ngbaan ni, le ki teen mpɔɔn pu ke, <sup>34</sup> "Sin Yesu u ye Nasaref aatiŋ aanii na, aa ban ba ti chee? Aa dan aa nan ḥa timi yɔli la

aa? M nyi si. Aa ye Uwumbor aanii u ye chain na la."

<sup>35</sup> Le Yesu kae tiyayaar ngbaan, ki len ke, "Ḥjmim. Di uja ngbaan lii." Le tiyayaar ngbaan di u lii kitij, ki nyan cha u. Taah lii u kitij na, naa ḥa u nibaa.

<sup>36</sup> Le ni gar bi mɔmɔk pam. Le bi baa tɔb, "Ba aabɔboln sɔ? U kpa yiko ni mpɔɔn le ki tuk tiyayaar ke ti di binib lii. Le ti kii waambɔ̄." <sup>37</sup> Le Yesu aayimbil moon ḥipepel mɔmɔk, nima chee.

### Yesu aah tii bibum pam laafee pu na

(Matiu 8.14-17; Mak 1.29-34)

<sup>38</sup> Yesu nan nyan mmeen aadiik ni, ki buen Simonn aadichal ni. Le Simonn aapuu aana awon toj sakpen. Le bi mee Yesu ke u ter u. <sup>39</sup> Le Yesu dan nan sil jonn u pu, le ki kae iween i joo u na. Le uwon sɔŋ. Libuul ngbaan ni le u fii, ki chann bi tichann.

<sup>40</sup> To, nwiin aah bi lir na, le binib bimɔk kpa bibum bido na joo ni bi Yesu chee. Le iween aabɔ̄ aabɔ̄ joo bi. Le u di ujaal paan bi mɔmɔk pu, ki cha bi pɔɔk. <sup>41</sup> Le tiyayaar mu di binib pam lii, ki teen ke, "Aa ye Uwumbor Aajapɔɔn la."

Tiyayaar ngbaan bee ke u ye Kristo u gaa binib lii na. Nima pu le u kae ti, kaa cha ti len tibaa.

### Yesu aah tuk binib Uwumbor aabɔ̄ Judea aatiŋ ni pu na

(Mak 1.35-39)

<sup>42</sup> Naah woln kichakpinaanyek ni na, le u nyan nima, ki buen nibaa chee, ki ti bi ubaa. Le kinipaak ngbaan bi ban u. Baah ti kan u na, le bi gaŋ u ke u taa buen cha bi. <sup>43</sup> Le u bui bi, "See m buen ntim muken ponn ni, ki ti tuk bi mu Uwumbor aanaan aabɔ̄nyaan. Nima le cha Uwumbor tun ni mi."

<sup>44</sup> U nan bɔ̄ dii Juu yaab aatim ni, le ki koo mmeen aadir ni, ki tuk binib Uwumbor aabor.

## Yesu aah yin njan aadidiliib pu na

(Matiu 4.18-22; Mak 1.16-20)

**5** Daalbaadaal le Yesu nan si Genesaret Aanyusakpem aagbaan,<sup>‡</sup> le kinipaak gob u, ki mueni u, bi ḥun Uwumbor aabɔr. <sup>2</sup> Le u kan ijɔi ilee nnyusakpem aagbaan. Bijanbam aa bi i ponn ni. Bi nan bi nibaa chee, ki bi finni baapɔr. <sup>3</sup> Le Yesu koo buŋɔb bubaa ponn ni, bu ye Simonn yaab na, le ki bui u ke u foor buen nnyun ponn ni siib. Baah foor siib na, le u kal nima chee buŋɔb na ponn ni, le ki tuk kinipaak ngbaan Uwumbor aabɔr.

<sup>4</sup> Waah tuk bi ti doo na, le u bui Simonn, “Buen nnyun aah nyoo nin chee na, aan ni ti mee tipɔr ngbaan ki chuu ijan.”

<sup>5</sup> Le Simonn bui u, “Ndindaan, ti ban ijan kinyeek na mɔk linimaln, kaa kan nibaa. Tɔ, saah len pu na, m ga mee tipɔr na nnyun ni.” <sup>6</sup> Le bi mee tipɔr, ki chuu ijan pam. Le tipɔr ngbaan ban ti kar. <sup>7</sup> Le bi kab bijaal ki yin bineen aatɔtiib bi bi buŋɔb buken ponn ni na ke bi dan nan ter bi. Le bi dan, ki nan nyan ijan ki gbiin ijɔi ilee ngbaan mɔmɔk. Nima le cha ijɔi ngbaan ban i muin. <sup>8</sup> Simonn Piita aah kan kina na, le u gbaan Yesu aanimbiin ni, ki bui u, “Ndindaan, siir m chee. M ye titunwanbirdaan la.”

<sup>9</sup> Baah chuu ijan sakpen pu na, le ni gar Simonn ni binib bimɔk bi u chee na, <sup>10</sup> ni Sebedee aajapɔtiib Jems ni Jɔnn bi nan ye Simonn aatutujeertiib na. Le Yesu bui Simonn, “Taa san ijawaan. Dan-dana ki joo cha, aa ga li ban binib tii Uwumbor la.”

<sup>11</sup> Le bi dar baarjɔi cha n-gbaan, ki di cha ni mɔmɔk, ki dii Yesu.

## Yesu aah cha ukɔndaan pɔɔk pu na

(Matiu 8.1-4; Mak 1.40-45)

<sup>12</sup> Yesu nan bi kitij kibaa ni. Ukɔndaan ubaa mu bi nima. Waah kan Yesu na, le u dan nan gbaan unimbiin ni, ki di unimbil chiŋ kitij, ki gaŋ u, le ki bui u, “Ndindaan, aa yaa gee kan, aa ga ḥmaa cha m pɔɔk.”

<sup>13</sup> Le Yesu taln uŋaal ki meeh u, ki bui u, “M gee. Aa pɔɔk.” Libuul ngbaan ni, le u pɔɔk. <sup>14</sup> Le Yesu bui u, “Taa tuk unii ubaa. Li cha Uwumbor aatotoor chee, ki ti di aabaa mɔk u, ki toor kitork tii Uwumbor ke Moses aakaal aah siin pu na. Nima le ga mɔk binib ke aa pɔɔk a.”

<sup>15</sup> Le Yesu aayimbil moo moon ḥipe-pel mɔmɔk. Le kinipaak sakpeŋ kuun u chee ke bi ḥun waah len pu na, ki ban ke u cha bi ponn ni bi ye bibum na pɔɔk. <sup>16</sup> N-yoonn, n-yoonn kan, le u ti nya bi chee, ki buen kipɔɔk ni, u ti mee Uwumbor.

## Yesu aah cha uja u aawon faan na pɔɔk pu na

(Matiu 9.1-8; Mak 2.1-12)

<sup>17</sup> N-yoonn ngbaan le Yesu nan bi tuk binib Uwumbor aabɔr. Le Farisii yaab ni ikaal aamɔmɔkb bi nyan ni Galilee aatingbaan ni, ni Judea aatingbaan ni, ni Jerusalem na, nan ka u chee. Uwumbor aapɔɔn nan bi u chee, le u cha bibum pɔɔk. <sup>18</sup> Le bijab bibaa luln ni uja u aawon faan na likekeln ni, ki ban bi di u koo ni kidiik ni, ki di u bil Yesu aanimbiin ni. <sup>19</sup> Binib aah nan wiir pu na, baa kan mpaan bi koo ni. Le bi jon kidiik ngbaan paab,<sup>¶</sup> le ki chee liboln, ki di u di luln ni, ki di u bil kidiik ponn ni, Yesu aanimbiin ni. <sup>20</sup> Le Yesu kan baah gaa u

<sup>‡5:1</sup> : Genesaret Aanyusakpem: Bi ki yin mu ke Galilee Aanyusakpem la.

<sup>¶5:19</sup> : Bi yaa maa kidiik kan, baa di timoor pinn ki, kaa maa lidikokoln. Bi nan di idɔ paan puln tidir paab, le ki di titan pɔr biin. Bi nan maa ḥibimbin le ki taa joi kidiik aapaacham.

ki kii pu na, le ki bui uja u aawon faan na, "Njɔ, m di cha saatunwanbir pinn si."

<sup>21</sup> Waah len kina na, le Uwumbor aakaal aamɔmɔkb ni Farisii yaab dak bisui ni ke, "U ye ŋma ki sii Uwumbor? Ubaa aan ŋmaa di cha pinn titunwanbir see Uwumbor baanja."

<sup>22</sup> Yesu nan bee baah dak pu na, le ki baa bi, "Ba pu ni dak kina nisui ni?

<sup>23</sup> Maah len ke m di cha waatunwanbir pinn u na le pɔɔ aan m yaa len ke 'Fiin ki li chuun' le pɔɔ? <sup>24</sup> M ga mɔk nimi ke min Unibon Aabo kpa mpɔɔn dulnyaa wee ni ke m di cha pinn titunwanbir." Waah len kina na, le u bui uja u aawon faan na, "M bui si la, fii ki yoor saawandookaan ki li chaa kun."

<sup>25</sup> Libuul ngbaan ni le u fii binimbil ni, ki yoor waawandookaan, ki chaa kun, le ki chuun nyuŋni Uwumbor. <sup>26</sup> Le ni gar bi mɔmɔk pam. Le bi nyuŋ Uwumbor, ki san ijawaan, ki bui ke, "Din, le ti kan li jinjiir aawan."

### Yesu aah yin Liifai pu na

(Matiu 9.9-13; Mak 2.13-17)

<sup>27</sup> Nee aapuwɔb, le Yesu nyan nima. Waah cha na le u kan ulampoogaar ubaa, bi nan yin u ke Liifai. U ka baah gaal lampoo nin chee na. Le Yesu bui u, "Li dii mi." <sup>28</sup> Le u di cha waawan mɔmɔk ki fii, ki dii u.

<sup>29</sup> Le Liifai ŋa tijikaar sakpen waadichal ni ki tii Yesu. Le bilampoogaab pam ni binib biken dan nan ka ji bi chee tijikaar. <sup>30</sup> Le Farisii yaab ni Uwumbor aakaal aamɔmɔkb bi mu ye Farisii yaab na bi ŋulni, le ki baa Yesu aadidiliib, "Ba ŋa ni ni bilampoogaab ni titunwanbirdam kpaan ki ji tijikaar ki nyu?"

<sup>31</sup> Le Yesu bui bi, "Binib bi kpa laafee na aa ban dɔkta, see bi bun na le ban dɔkta. <sup>32</sup> Maa dan ke m nan yin bininyaam. M dan ke m nan yin titun-

wanbirdam ke bi nan kpeln baabimbin la."

### Kimɔlul aabor

(Matiu 9.14-17; Mak 2.18-22)

<sup>33</sup> Binib bibaa nan dan ki nan tuk Yesu, "Jonn aadidiliib ni Farisii yaab aadidiliib lulni bumɔb kpala kpala, ki mee Uwumbor. Le saadidiliib ma ji ki nyu."

<sup>34</sup> Le u baa bi, "Ni ga ŋmaa cha bicham bi dan bi nan ji ubɔndinn aajim na lul bumɔb buyoonn upiidiinn bi bi chee na aa? Aayii. <sup>35</sup> N-yoonn choo, le bi ga chuu nyan upiidiinn na bi chee mpɔɔn. N-yoonn ngbaan le bi ga lul bumɔb."

<sup>36</sup> Le u ki ŋakl bi liyataŋakl ke, "Ubaa aan chuu gii lekr libɔkukpɔln aakekengeln ki ti di leŋ libɔkukpokl. U yaa ŋa kina kan, u ga bii lipɔln na. Libɔkupɔln aageln ni libɔkukpokl ngbaan aa ŋak. <sup>37</sup> Ubaa mu aan di ndawiin ki di ŋa kilookpok ponn ni. U yaa ŋa kina kan, kilookpok ngbaan ga puu ki bii. Ndaan na mu ga kpir. <sup>38</sup> See bi di ndawiin ŋa kiloopɔŋ ni. <sup>39</sup> Unii mu yaa nyu ndakpaan kan, waan ki ban ndapɔm. U ga len ke mu kpok na le mo."

### Juu yaab aakpaakool daal aabor

(Matiu 12.1-8; Mak 2.23-28)

**6** Juu yaab aakpaakool libaa daal, le Yesu ni waadidiliib bɔ dii kisaak kibaa ponn ni. Le waadidiliib geei tijikaar ki per ki ŋmɔ. <sup>2</sup> Le Farisii yaab bibaa nan baa bi, "Ba ŋa ni ŋani kina? Timi aakaal aa kii ke ni ŋa kina likpaakool daal."

<sup>3</sup> Le Yesu baa bi, "Naa karn Ubɔr David aah nan ŋa pu na aa? Nkon nan joo u ni waanib. <sup>4</sup> Le u koo Uwumbor Aadichal ni, ki di Uwumbor aaboroboro ŋman, ki joo tii waanib mu, bi ŋman. Baah ŋa kina na, le bi bii Moses aakaal mu len ke Uwumbor aatotoorb baanja le ga ŋmɔ boroboro ngbaan na."

<sup>5</sup> “Tɔ, min Unibɔn Aabo le ye lik-paakool daal mu Aadindaan.”

**Yesu aah cha uja u aajaal  
faan na pɔɔk pu na**

(Matiu 12.9-14; Mak 3.1-6)

<sup>6</sup> Juu yaab aakpaakool liken daal, le Yesu ki koo mmeen aadiik ni, ki tuk binib Uwumbɔr aabɔr. Le uja u aaŋjangii faan na bi nima. <sup>7</sup> Le Uwumbɔr aakaal aamɔmɔkb ni Farisii yaab lik Yesu, ke u ga cha u pɔɔk likpaakool daal aan waan cha u pɔɔk. Bi ban bi kan nsan aan ki galn u, ke u bii likpaakool daal. <sup>8</sup> Le Yesu bee baalandak, le ki bui uja u aajaal faan na, “Dan nan sil do binib aanimbiin ni.” Le u fii ti sil nima. <sup>9</sup> Le Yesu baa bi, “Likpaakool daal kan, ti ŋa ni ŋan na aan ni kaa ŋan na? Ti tii unii limɔfal aan ti ku u? Timi aakaal mɔk timi kinye?” <sup>10</sup> Le u lik bi mɔmɔk, le ki bui uja u aajaal faan na, “Taln aajaal.” Le u taln uŋjaal. Le mu pɔɔk.

<sup>11</sup> Le bi gee liŋuul Yesu pu pam, le ki kpokl baah ga ŋa u pu na.

**Yesu aah nyan waakpambalb  
kipiik ni bilee pu na**

(Matiu 10.1-4; Mak 3.13-19)

<sup>12</sup> N-yoonn ngbaan le Yesu jon lijool paab, u ti mee Uwumbɔr, le ki mee u kinyeek ngbaan ki ti woln kitaak.

<sup>13</sup> Naah woln kichakpinaanyeek ni na, le u yin waadidiliib ke bi dan u chee, le ki nyan bi ponn ni bijab kipiik ni bilee, ki yin bi ke waakpambalb. <sup>14</sup> Baayimbil sɔ; Simonn u Yesu duln u ke Piita na, ni unaal Andru; ni Jems, ni Jɔnn, ni Filip, ni Batolomiu, <sup>15</sup> ni Matiu, ni Tomas, ni Jems u ye Alfeus aajapɔɔn na; ni Simonn u nan ban u kuln waatij aadim na; <sup>16</sup> ni Judas u ye Jems aajapɔɔn na; ni Judas Iskariot u ga nan kooh Yesu na.

**Yesu aah moon Uwumbɔr aabɔr  
ki cha bibum pɔɔk pu na**

(Matiu 4.23-25)

<sup>17</sup> Le Yesu sunn ni lijool ngbaan paab, ki nan sil nin chee ŋak na. Waakpambalb ngbaan mu bi u chee. Binib bi dii u na mu bi u chee ki wiir. Kinipaak ki nyan ni Judea aatingbaan mɔmɔk ni, ni Jerusalem, ni nnyusakpem aatim Taya ni Saidonn aatingbaan ni na, mu bi nima. <sup>18</sup> Bi dan ke bi nan ŋun waaliin, ki ban ke u tii bi ponni bi ye bibum na laafee. Le u cha bi pɔɔk, ki cha binib bi tiyayaar joo bi na mu pɔɔk. <sup>19</sup> Le kinipaak ngbaan mɔmɔk ban ke bi di bijaal meeh u; ba pu? mpɔɔn nyan u ni, ki cha bi mɔmɔk pɔɔk.

**Uwumbɔr aanyoor ni tibɔbir aabɔr**

(Matiu 5.1-12)

<sup>20</sup> Yesu nan lik waadidiliib le ki bui ke: “Nimi bi ye bigiim na, Uwumbɔr aanyoor bi ni pu; nimi le yeh Uwumbɔr aanaan.

<sup>21</sup> Nimi bi nkɔn joo nimi dandana na, Uwumbɔr aanyoor bi ni pu; ni ga nan ji ki bab. Nimi bi wii dandana na, Uwumbɔr aanyoor bi ni pu; ni ga nan laa.

<sup>22</sup> Binib yaa nan nimi, ki yakr ni chee, ki sii nimi, ki yin nimi mbiindam, min Unibɔn Aabo pu kan, Uwumbɔr aanyoor bi ni pu. <sup>23</sup> Bi yaa ŋa nimi kina kan, ni li kpa mpopiin sakpen ki li mɔɔni; ba pu? ni ga nan kan tnyoɔr sakpen paacham. Kina le biyaajatiib nan ŋa Uwumbɔr aabɔnabiib falaa.

<sup>24</sup> Nimi biwankpadam, tibɔbir ga li bi ni pu;

ba pu? ni puen kan ni mɔ na la.

<sup>25</sup> Nimi bi ji babr dandana na, tibɔbir ga li bi ni pu.

Nkon ga nan chuu nimi.

Nimi bi laa dandana na, tibɔbir ga li bi ni pu.

Ni ga nan li kpa mpombiin ki li wii.

<sup>26</sup>“Binib mɔmɔk yaa pak nimi kan, tibɔbir ga li bi ni pu. Kina le biyaajatiib nan pak bijmaŋmannim bi nan ɔmanni ke bi ye Uwumbɔr aabɔnabiib na.”

### Naah ga ɔja nimi aadim pu na

(Matiu 5.38-48; 7.12a)

<sup>27</sup>“M tuk nimi bi pel na, ni li gee nimi aadim man, ki ɔja binib bi nan nimi na tijann, <sup>28</sup>ki ɔja Uwumbɔr aanyoor ɔja binib bi seei nimi na pu, ki mee Uwumbɔr tii binib bi ɔja nimi bakaa na. <sup>29</sup>Unii yaa faa si kitapak kibaa kan, cha u faa kiken mu. Unii yaa gaa saakekeln aa chee kan, di saabɔkul mu ki kpee u. <sup>30</sup>Unii umɔk mee si tiwan na kan, tiin u. Unii yaa yoor saawan kan, taa bui u ke u giini ni. <sup>31</sup>Naah ban ke binib li ɔjani nimi pu na, ni mu li ɔjani bi kina.

<sup>32</sup>“Ni yaa gee binib bi gee nimi na baanja kan, ni kpa tinyoor Uwumbɔr chee ee? Titunwanbirdam mu gee binib bi gee bi na la. <sup>33</sup>Ni yaa ter binib bi ter nimi na baanja kan, ni kpa tinyoor Uwumbɔr chee ee? Titunwanbirdam mu ɔjani kina la. <sup>34</sup>Ni yaa pinn binib bi ga giin tii nimi na baanja kan, ni kpa tinyoor Uwumbɔr chee ee? Titunwanbirdam mu pinn titunwanbirdam ke bi ki giin baah pinn bi pu na tii bi. <sup>35</sup>Ni ma kan, ni li gee nimi aadim, ki ɔja bi tijann, ki pinn binib tiwan, ki taa ki li ban ni. Le Uwumbɔr ga tii nimi tinyoor sakpen. Ni ga li ye Uwumbɔr u kaa kpa ɔneen aato na aabim. Uma le ɔjani titunwanbirdam ni binib bi kaa dooni u na tibulchinn. <sup>36</sup>Ni li kpa linimbaasaln ke Nite Uwumbɔr aah kpa pu na.”

### Ni taa galni binib

(Matiu 7.1-5)

<sup>37</sup>“Ni taa ji binib tibɔr, le Uwumbɔr mu aan ji nimi tibɔr. Ni taa galni binib,

le Uwumbɔr mu aan galn nimi. Ni di cha pinn binib man, le Uwumbɔr mu ga di cha pinn nimi. <sup>38</sup>Tiin binib man, le Uwumbɔr mu ga tii nimi. U ga tii nimi sakpen. Mbamɔn, u ga lee gbiin nimi lisambil, le ki yek yek, ki ki lee kpee, le ki nyii nyii ki moo lee kpee aan li ti bar kpir, aan ki di tii nimi. Naah tii binib pu na, Uwumbɔr mu ga giin kina le ki tii nimi.”

<sup>39</sup>Le Yesu ɔjakl bi liyatajaml ke, “Ujoon ga ɔjmaa mɔk ujoon nsan aa? Bi mɔmɔk bilee aan lir libuul ponni ii? <sup>40</sup>Unii u bae mbaem na aa jer waamɔmɔkr. Unii umɔk bae mbaem ki chikr na ga li bi ke waamɔmɔkr aah bi pu na la.

<sup>41</sup>“Ba ɔja aa lik ki waa lidɔchɔl li bi aana aabo aanimbil ni na, kaa tee waa jaatɔlk u bi aayaan ni na? <sup>42</sup>Aa yaa kaa waa jaatɔlk u bi aabaa aanimbil ni na kan, aa ga tee ɔja kinye ki bui aana aabo ke, ‘Nna aabo, cha m nyan lidɔchɔl li bi aanimbil ni na?’ Sin ɔnjmaŋmann, chuu nyan jaatɔlk u bi aanimbil ni na waahr, aan ki li waa mbamɔm, aan ki nan nyan aana aabo yaan ni lidɔchɔl.”

### Naah ga ɔja pu ki bee unii aabimbin na

(Matiu 7.16-20; 12.33-35)

<sup>43</sup>“Busub bu ɔjan na aan lu ɔjisubil ɔji kaa ɔjan na. Busub bu kaa ɔjan na mu aan lu ɔjisubil ɔji ɔjan na. <sup>44</sup>Busub aasubil pu, le aa ga bee bu aah ye busub bu na. Binib aa ker saasaa bukokom pu, kaa ker nkakan ichakpee jagar pu. <sup>45</sup>Ilandak nyaan bi uninyaan aasui ni, le ki cha u len ni ɔjan na. Ilandakbir bi mbiindaan aasui ni, le ki cha u len ni bir na. Ba pu? ilandak i gbii unii aasui ni na, ima le u ga len.”

### Bidimaab bilee aabor

(Matiu 7.24-27)

<sup>46</sup>“Ba pu ni yin mi ke ‘Dindaan, Dindaan,’ kaa ɔjani maah tuk nimi ke ni ɔja

pu na? <sup>47</sup> Unii umok dan m chee, ki jun maaliin, ki jani kina na, m ga mok nimi waah naahn udaan u na. <sup>48</sup> U naahn uja u ban u maa kidiik, ki gbii ni nyoo, ki maa lidinyikl njitakpal pu na la. Le nwam nyan, ki puu ki yur kidiik ngbaan, le kaa dejnj; ba pu? u maa ki mbamom. <sup>49</sup> Unii u jun maaliin, kaa jani kina na naahn uja u maa kidiik kitij pu, kaa puen gbii mbuu ki maa lidinyikl na la. Le nwam nyan ki puu yur ki. Libuul ngbaan ni le ki lir kookoo.”

**Yesu aah cha butob aajab  
aaninkpel aanaagbija poock pu na**

(Matiu 8.5-13)

**7** Waah len tibor timina binib aatafal ni ki ti doo na, le u buen Kapenaum aatiij ni. <sup>2</sup> Le butob aajab nkub aaninkpel ubaa nan kpa unaagbija ubaa ki gee u sakpen. Le unaagbija ngbaan bun, ki ban u kpo. <sup>3</sup> Le butob aajab aaninkpel ngbaan jun Yesu aabbor, le ki tun ni Juu yaab aaninkpiib u chee, bi nan bui u ke u dan nan cha waanaagbija poock. <sup>4</sup> Juu yaab aaninkpiib ngbaan aah fuu ni Yesu chee na, le bi gañ u ki bui ke, “Butob aajab aaninkpel neer ke aa ter u. <sup>5</sup> U gee timi aanib, ki maa mmeen aadiik tii timi.”

<sup>6</sup> Le Yesu dii bi buen. Waah ti peen butob aajab aaninkpel ngbaan aadichal na, le uninkpel ngbaan tun ni ujotiib ke bi tooh u nsan ni, ki ti bui u, “Tidindaan, butob aajab aaninkpel ke: Taa ki jani falaa, ke waa neer aa dan udo ki koo waadiik ni. <sup>7</sup> U mu aa dak ke u neer u dan aa chee. Aa yaa po sil nsan ni ki len kan, waanaagbija ga poock. <sup>8</sup> Uma ubaa kii uninkpel aamob, ki mu ye butob aajab aaninkpel la, le ki bui ubaa, ‘Li cha,’ le u buen; ki bui ubaa mu, ‘Dan,’ le u dan; le ki bui waanaagbija, ‘Ta kina,’ le u ja.”

<sup>9</sup> Yesu aah jun waah len pu na, le ni gar u pam. Le u fenn ki toj kinipaak ki dii u na, le ki bui bi, “M tuk nimi la, maa

kee kan unii u bi Israel yaab ponn ni ki gaa mi ki kii mbamom kina na.”

<sup>10</sup> Le binib bi tooh Yesu nsan ponn ni na gir kun butob aajab aaninkpel do, le ki ti mui waanaagbija ngbaan poock a.

**Yesu aah fikr ukpopii  
aajapcoon nkun ni pu na**

<sup>11</sup> Naa yunn le Yesu buen kitij kibaa ni, bi yin ki ke Neenn. Le waadidiliib ni kinipaak pam dii u. <sup>12</sup> Waah peen kitij ngbaan aagoln aabisamob na, le u kan uja ubaa kpo, bi tu ni u. Una nan ye ukpopii la. U mu ye ujaponaal la. Le waatij aanib pam mu dii u ki wiir.

<sup>13</sup> Tidindaan aah kan ukpopii ngbaan na, le kinimbaak chuu u. Le u bui u, “Taa ki wii,” <sup>14</sup> le ki too foor duun linikpol na aawandookaan chee, ki meeh ni. Le binib bi tu ni u na sil. Le Yesu bui ke, “Unachipcoon, m bui si, fiin.” <sup>15</sup> Le uja u kpo na fii kal, ki piin ki bi len. Le Yesu di u tii una.

<sup>16</sup> Le ijawaan chuu bi momok. Le bi nyujni Uwumbor, ki bui ke, “Uwumbor aabonabr kpaan bi tikaasisik ni. Uwumbor dan u nan ter waanib la.”

<sup>17</sup> Le bi mooni tibor timina itingbaan i bi nima chee na ni, ni Judea aatingbaan momok ni, ki mooni Yesu aayimbiil.

**Jonn aah tun ni waadidiliib  
Yesu chee pu na**

(Matiu 11.2-19)

<sup>18</sup> Jonn aadidiliib nan tuk u Yesu aah jani pu na momok. <sup>19</sup> Le u yin bi ponn ni bilee, le ki tun bi ke bi buen Tidindaan chee, ki ti baa u ke u ye unii u Uwumbor aabonabtiib nan len ke u ga dan na aan waa ye? Bi ga li ban uken aa?

<sup>20</sup> Le Jonn aadidiliib ngbaan fuu ni Yesu chee ki nan bui u ke, “Jonn u muini binib nnyun ni na tun ni timi aa chee ti nan baa si ke, ‘Aa ye unii u Uwumbor aabonabtiib nan len ke u ga dan na aan saa ye, bee ti ga li ban uken la aa?””

<sup>21</sup> N-yoonn ngbaan le Yesu cha bibum pam pɔɔk, ki nyan tiyayaar binib ni, ki likr bijoom bi wiir na aanimbil; <sup>22</sup> le ki bui Jɔnn aadidiliib, “Gir buen Jɔnn chee, ki ti tuk u naah ɔjun pu ki kan pu na, ke m likr bijoom aanimbil, ki cha biwɔb, ni bikɔndam, ni bitafakpaab pɔɔk, ki fikr binib bi kpo na nkun ni, ki tuk bigiim Uwumbɔr aabɔnyaan tee. <sup>23</sup> Unii u kaa joo mi beeni na, Uwumbɔr aanyoor bi u pu.”

<sup>24</sup> Le Jɔnn aadidiliib aah buen na, Yesu len kinipaak ngbaan chee Jɔnn aabɔr ke, “Naah nan buen Jɔnn chee nteersakpiin ni na, ni nan dak ke ni ga kan kinye? Ni nan dak ke ni ga kan lipul li libuln fiini li na la aa? <sup>25</sup> Ni nan buen ni ti kan uja u pee tiwanyaan na la aa? Binib bi pee tiwanyaan ki ji mmɔɔn na bi bibɔrb aadichal ni la. <sup>26</sup> Ni nan buen ni ti kan Uwumbɔr aabɔnabr la aa? Mbamɔn, m tuk nimi la, u jer Uwumbɔr aabɔnabr. <sup>27</sup> Ni ɔmee Uwumbɔr Aagbaŋ ni ke Uwumbɔr bui ke, ‘Maatutunn sɔ. M tun ni u ke u loln ni nsan, ki nan toor nsan siin si.<sup>28</sup> Jɔnn le ye ututunn ngbaan. <sup>28</sup> M tuk nimi la, baa kee ma unii ubaa u jer Jɔnn. Le unii u ye uwaatiir Uwumbɔr aanaan ni na jer Jɔnn.”

<sup>29</sup> Binib mɔmɔk ni bilampoogaab nan ɔjun Jɔnn aaliin, ki cha u muin bi nnyun ni. Nima le mɔk ke bi kii ki tii Uwumbɔr aabamɔn. <sup>30</sup> Farisii yaab ni Uwumbɔr aakaal aamɔmɔkb aa nan cha u muin bi nnyun ni. Nima le mɔk ke bi yii Uwumbɔr aamɔboln.

<sup>31</sup> Tɔ, Yesu nan ki bui kinipaak ngbaan ke, “M ga di ba ki di ɔnaj dandana aanib ngbaan? Bi bi ke ba na? <sup>32</sup> Bi bi ke mbim mu ka kinyaq ni ki tuk bijeen aatɔtiib, ‘Ti pii ɔnjwul le ki tii nimi, le naa saar. Ti wii ikpowiil, le naa kaani.’ <sup>33</sup> Dandana aanib ngbaan mu bi kina la; Jɔnn nan dan ki nan lul bumɔb, kaa nyu ndaan, le

bi bui ke u kpa kinimbɔŋ. <sup>34</sup> Min Unibɔn Aabo dan le ki ji ki nyu, le bi bui ke m ye upusakpiindaan ki ye udanyur, ki jɔnni bilampoogaab ni titunwanbirdam la. <sup>35</sup> Tɔ, binib bimɔk kpa nlan mbamɔm na, bi bee ke Uwumbɔr aah ɔnani pu na, ni ɔjan.”

### Upii ubaa aah nyuŋ Yesu pu na

<sup>36</sup> Farisii aanii ubaa nan bui Yesu ke u dan nan ji u chee tijikaar. Le u koo waadichal ni, ki kal ki bi ji. <sup>37</sup> Le upii u ye titunwanbirdaan na bi kitij ngbaan ni, ki ɔjun ke Yesu ka ji tijikaar Farisii aanii ngbaan do. Le u joo ni nkpan mu nun mɔ na, kpalba nyaan u bi yin u ke alabasta na ponn ni, <sup>38</sup> le ki dan nan sil Yesu aapuwɔb, utaa chee, le ki wii, ki cha tinyunyunn lir Yesu aataa pu, ki finn utaa, le ki joo waayikpir per utaa, ki moor utaa, ki di tulalee ngbaan ɔnjmir utaa. <sup>39</sup> Farisii aanii ngbaan aah kan kina na, le u dak usui ni ke, “Uja wee yaa sil ye Uwumbɔr aabonabr kan, u ba ga bee upii u meeh u na aabimbin aah bi pu na, ke u ye titunwanbirdaan la.”

<sup>40</sup> Le Yesu tuk Farisii aanii ngbaan ke, “Simonn, m ban m bui si tibɔr tibaa la.”

Le u bui u, “Umɔmɔkr, lem.”

<sup>41</sup> Le Yesu bui u, “Bijab bilee le nan bi, le ki joo uwankpadaan aapɔln. Ubaa joo waapɔln ɔnjimobil ɔni ɔneer iwiin ikui ijmu aapal na, ubaa mu joo waapɔln ɔnjimobil ɔni ɔneer iwiin piijmu aapal na. <sup>42</sup> Bi mɔmɔk bilee aah kaa kpa nibaa bi giin tii u na, le u di cha pinn bi mɔmɔk. Bijab bilee ngbaan ponn ni, ulau ga li gee u ki jer ukен?”

<sup>43</sup> Le Simonn bui u, “Waah di cha pinn unii u aapɔln wiir na le ga li gee u ki jer u aapɔln kaa wiir na.”

Le Yesu bui u, “Aa len mbamɔn la,”

<sup>44</sup> le ki fenn toŋ upii ngbaan, ki bui Simonn, “Aa kan upii wee ee? M koo ni

saadichal ni, le saa tii mi nnyun ke m finn ntaa. Upii wee ma kan, u di tinyunnyunn le finn ntaa, ki di waayikpir per ntaa. <sup>45</sup>Saa moor ntakpiln.\*<sup>\*</sup> Uma le moor ntaa buyoonn m koo ni na ki nan saa dandana. <sup>46</sup>Saa di nkpan ɣmir n-yil. Uma le di tulalee ɣmir ntaa. <sup>47</sup>M tuk si la, m di cha waatunwanbir ti wiir na ki pinn u. Nima le cha u gee mi sakpen. M yaa di cha pinn unii titunwanbir siib na kan, udaan ga li gee mi siib la.”

<sup>48</sup>Yesu nan bui Simonn kina, le ki tuk upii ngbaan, “M di cha pinn si saatunwanbir la.”

<sup>49</sup>Le binib bi bi ji u chee tijikaar na baa bibaa bisui ni, “U ye ɣma ki di cha pinn titunwanbir?”

<sup>50</sup>Le Yesu bui upii ngbaan, “Saah gaa mi ki kii pu na, nima le cha aa ɣmar. Li cha ki li kpa nsuudoon.”

### Bipiib bi dii Yesu na

**8** Naa yunn le Yesu bɔ dii ntisakpem ni ntiwaatiir ni, ki mooni Uwumbor aanaan aabɔnyaan tee. Waakpambalb kipiik ni bilee mu dii u. <sup>2</sup>Bipiib bi u nan cha bi pɔok na mu dii u. Iween le nan joo bibaa. Tiyayaar mu nan joo biken. Bi ponn ni ubaa nan ye Mari, u bi yin u ke Magdalene na. Tiyayaar tilole le nan joo u, le Yesu nan jenn nyan ti u ni. <sup>3</sup>Bi ponn ni ubaa mu ye Joana, u ye Ubɔrkpaan Herod aatutunn Chusa aapuu na. Ubaa mu ye Susana. Bipiib biken mu nan bi ki dii u ki wiir. Le bi momɔk di baawan ter u ni waakpambalb.

### Unii u yaa njikaabim na aayatanjakl

(Matiu 13.1-9; Mak 4.1-9)

<sup>4</sup>Le binib nyan itingbaan momɔk ni, ki dan Yesu chee, ki ɣa kinipaak sakpej. Le u ɣakl bi liyatanjakl:

<sup>5</sup>“Ukpaal ubaa nan buen u ti yaa njikaabim. Waah yaa na, le mubaa lir nsan ponn ni. Le binib taa taa mu pu. Le inyoon i laani paacham na dan nan pee i jin. <sup>6</sup>Le mubaa mu lir ntakpatee pu. Le mu guu punn mala, ki mu ki yɔl mala; ba pu? nima chee aa soon. <sup>7</sup>Le mubaa mu lir ikokon ponn ni. Le mu ni ikokon kpaan muun. Le ikokon ku mu. <sup>8</sup>Le mubaa mu lir kitij ki jan na ponn ni, ki muun, ki mar, ki lu nkub nkub.”

Yesu aah len kina ti doo na, le u teen ke, “U kpa litafal na kan, u ɣun.”

### ɣitaa ɣi pu u ɣakl bi ɣiyatanjakl na

(Matiu 13.10-17; Mak 4.10-12)

<sup>9</sup>Le waadidiliib dan ki nan baa u liyatanjakl ngbaan aatataa. <sup>10</sup>Le u bui bi, “Uwumbor le cha ni bee waanaan aabɔbɔrkaan. Biken ma kan, u ɣak bi ɣiyatanjak, aan bi lik, kaan li waa, ki pel, kaan bee naatataa.”††

### Unii u yaa njikaabim na aayatanjakl aatataa

(Matiu 13.18-23; Mak 4.13-20)

<sup>11</sup>“Liyatanjakl ngbaan aatataa le ye ke njikaabim ngbaan le ye Uwumbor aabɔr. <sup>12</sup>Mu lir nsan ponn ni na le ye binib bi ɣun Uwumbor aabɔr na. Le kinimbɔŋ dan nan nyan ti bisui ni, bi taa gaa Uwumbor ki kii, ki ɣmar. <sup>13</sup>Mu lir ntakpatee pu na le ye binib bi ɣun Uwumbor aabɔr ki gaa ti ni mpopiin na. Bi mu aa gaa ti bisui ni mbamɔm. Bi gaa Uwumbor ki kii ni yunn siib; to, ntɔŋ yaa pii bi kan, le bi ga di u lii. <sup>14</sup>Mu lir ikokon ponn ni na le ye binib bi ɣun Uwumbor aabɔr aan ki cha bitafal bi liwankpal ni, ni dulnyaa ni aawan ni mɔ na ni, ni baabimbin aabɔr ni na. Nima le ku tibɔr ngbaan bisui ni. Le taa mar. <sup>15</sup>Mu lir kitij ki jan na ponn ni na le ye binib bi aasui jan ki

\*\*7:45 : ...moor ntakpiln: Israel yaab nan doon tɔb kina le ki mɔk ngeehn.

††8:10 : Lik Aisaya 6.9-10.

ye mbamɔn na, ki ɔyun Uwumbɔr aabɔr, ki joo ti mbamɔm, ki kpa limɔr, ki dii Uwumbɔr kaa di cha na.”

### Karyaa aayataŋjaki

(Mak 4.21-25)

<sup>16</sup> “Unii yaa see karyaa kan, waan di lisambil ki di chij u pu, kaan di siin ti-wandookaan aataab. U ga di u tɔŋ tiwan paab la, le u li wiin aan binib bimɔk koo ni na li waa.

<sup>17</sup> “Tibɔr timɔk bɔɔ na, ti ga kpiir. Tibɔbɔrkaan mɔmɔk mu ga nyan mpaan pu.

<sup>18</sup> “Cha nitafal li bi naah ɔyun pu na ni man. Unii u kpa na, Uwumbɔr ga kpee u. Unii u kaa kpa na, Uwumbɔr ga chuu gaa waah dak ke u kpa ti na.”

### Binib bi ye Yesu aana ni unaatiib na

(Matiu 12.46-50; Mak 3.31-35)

<sup>19</sup> Yesu aana ni unaatiib nan fuu ni ki ban u. Kinipaak ngbaan pu le baa ɔymaa koo ni u chee. <sup>20</sup> Le bibaa tuk u, “Aana ni aanaatiib si lipaal ki ban si la.”

<sup>21</sup> Le u bui bi, “Nna ni nnaatiib le ye binib bi ɔyun Uwumbɔr aabɔr ki ɔjani taah len pu na.”

### Yesu aah ɔja pu ki cha kibuŋ ɔymin na

(Matiu 8.23-27; Mak 4.35-41)

<sup>22</sup> N-yoonn ngbaan le Yesu ni waadidiliib koo buŋɔb ni. Le u bui bi, “Cha ti puur nnyusakpem man.” Le bi buen.

<sup>23</sup> Buŋɔb na aah cha na, le u do bu ponn ni geen. Le kibuŋ piin ki daar. Le nnyun feei ki koo buŋɔb na ni, le bu ban bu gbii. Ni nan ye linimaln la. <sup>24</sup> Le bi dan ki nan finn Yesu ki bui ke, “Tidindaan, Tidindaan, ti ga bee nnyun ni.”

Le finn, ki kae kibuŋ ni tinyunkpenn. Le kibuŋ ni tinyunkpenn ɔymin chii. <sup>25</sup> Le u baa bi, “Ba pu naa gaa mi ki kii?”

Yesu aah ɔja pu na, le ni gar bi pam. Le ijawaan chuu bi. Le bi baa tɔb, “Ba

aanibol bi na, ki kae kibuŋ ni nnyun mu, aan ni kii waamɔb.”

### Yesu aah cha uwaar pɔɔk pu na

(Matiu 8.28-34; Mak 5.1-20)

<sup>26</sup> Bi nan fuu Gerasiin yaab aatiŋ ki bi Galilee Aanyusakpem aadapuul na.

<sup>27-29</sup> Le uwaar ubaa nan bi nima, ki chuun ɔyjmeen ni yunn, ki koo baah sui binib titakpalunn ti ponn ni na, kaa kii u li bi linampal. Tiyayaar chur u kpala kpala. Le udoyaab nan di idɔribi ni tikululn buu u ke bi kiir u. Le u nan keei tikululn ni idɔribi ngbaan. Tiyayaar ngbaan le di u buen nteersakpiin ni. Le Yesu aah nyan buŋɔb ni na, uja ngbaan dan nan tooh u nsan pu. Le Yesu tuk tiyayaar ngbaan, “Nyan u ni.” Nima pu na, waah kan Yesu na, le u teen, ki gbaan kitij, unimbiin ni, le ki len mpɔɔn pu ke, “Yesu, sin u ye Uwumbɔr u kaa kpa ɔymin aato na Ajapɔɔn na, aa ban ba m chee? M gaŋ si, taa ɔja mi falaa.”

<sup>30</sup> Le Yesu baa u, “Bi yin si ke ba?”

Tiyayaar pam aah bi u ni na, nima le u bui ke bi yin u ke Kipaak. <sup>31</sup> Le tiyayaar ngbaan gaŋ Yesu ke u taa bui ti ke ti buen libuul li nyoo na ni.

<sup>32</sup> Igbeer nan bi nima chee ki wiir, ki chuun ji limɔɔgongoln paab. Le tiyayaar ngbaan gaŋ Yesu ke u cha ti koo igbeer ngbaan ni. Le u kii. <sup>33</sup> Le ti nyan uja ngbaan ni, ki ti koo igbeer na ni. Le igbeer ngbaan mɔmɔk san sunn ni limɔɔgongoln taab, ki ti koo nnyun ni, ki bee nnyun ni.

<sup>34</sup> Tɔ, bijab bi kii igbeer ngbaan na aah kan kina na, le bi san buen kitij ni, ni itingbaan ni, le ki ti tuk binib tibɔr ngbaan. <sup>35</sup> Binib aah ɔyun kina na, le bi dan bi nan lik budabu ɔja na, le ki fuu ni Yesu chee, ki kan uja u tiyayaar nyan u ni na ka Yesu chee ki cheer ki pee tiwanpeenkaan, kaa ki chuun ɔyjmeen. Le ijawaan chuu bi. <sup>36</sup> Le binib bi kan Yesu aah cha uja ngbaan pɔɔk pu na,

tuk bi waah ḥa pu na. <sup>37</sup>Le Gerasiin aatiŋ aanib, ni itingbaan mɔmɔk aanib san ijawaan pam. Nima le bi gaŋ Yesu ke u nya baatiŋ ni. Le u koo burjɔb ni ke u gir buen nnyusakpem aadapuul. <sup>38</sup>Le uja u tiyayaar nyan u ni na gaŋ Yesu ke u cha u dii u.

Le Yesu aa kii, ki bui u, <sup>39</sup>“Gir kun ki ti tuk binib Uwumbɔr aah tun litukpaan tii si pu na.”

Le u siir, ki bɔ dii waatiŋ ngbaan ni, njipel mɔmɔk, ki tuk binib Yesu aah tun litukpaan pu tii u na.

### **Yesu aah cha upii ubaa pɔɔk aan ki fikr upiibo nkun ni pu na**

(Matiu 9.18-26; Mak 5.21-43)

<sup>40</sup>Yesu aah puur nnyusakpem na, kinipaak nan si kii u nima, ki kpa mpopiin ki gaa u. <sup>41</sup>Le uja ubaa, u ye mmeen aadiik ni aaninkpel, aan bi yin u ke Jairus na, dan nan gbaan kitij Yesu aanimbiin ni, ki gaŋ u ke u dan udo, <sup>42</sup>ke ubisabaan, u ye ḥibin kipiik ni ḥilee na bun, ki ban u kpo. Le Yesu dii u ki buen.

Waah cha na, le kinipaak dii u ki mueni u. <sup>43</sup>Le upii u fu tipiir ḥibin kipiik ni ḥilee taa door na bi nima. U nan chaa biteteeb chee, ki jin waamombil mɔmɔk doo. Bi ponn ni ubaa mu aa ḥamaa cha u pɔɔk. <sup>44</sup>Le u dan Yesu aapuwɔb, le ki nan meeh waabɔkul aamɔjuul. Libuul ngbaan ni le u pɔɔk. <sup>45</sup>Le Yesu baa ke, “Ḥama meeh mi?”

Le bi mɔmɔk nee ke baa meeh u. Le Piita ni binib bi bi u chee na bui u, “Ndin-daan, kinipaak ngbaan mɔmɔk bi aa chee ki mueni si kina, le aa baa ke ḥama meeh si?”

<sup>46</sup>Le Yesu bui ke, “Unii ubaa le meeh mi. M bee ke mpɔɔn nyan m ni.” <sup>47</sup>Le upii ngbaan nan bee ke waa bɔr. Ijawaan nan chuu u, le uwon gbaa. Le u dan nan gbaan Yesu aanimbiin ni, ki tuk u binib mɔmɔk aanimbil ni, budabu cha u meeh u na, ni waah pɔɔk libuul ngbaan ni pu

na. <sup>48</sup>Le Yesu bui u, “Mbisal, saah gaa mi ki kii na, nima le cha aa pɔɔk. Li cha ni mpopiin.”

<sup>49</sup>Yesu aah len kina na, le unii ubaa nyan ni Jairus do ki tooh Jairus nsan pu, ki nan tuk u ke, “Aabisal kpo a. Taa ki cha Umɔmɔkr ngbaan ḥani falaa ki cha aado.”

<sup>50</sup>Le Yesu ḥun waah len pu na, ki bui Jairus, “Taa san ijawaan. Aa yaa ḥa naadii baanja kan, u ga pɔɔk.”

<sup>51</sup>Yesu aah fuu Jairus do na, le waa cha unii ubaa dii u ki koo ni, see Piita, ni Jɔnn, ni Jems, ni upiibo ngbaan aate ni una. <sup>52</sup>Le binib bi mɔmɔk bi lichiln ni na bi wii ikpowiil ki kaani. Le Yesu bui bi, “Taa wii man. Waa kpo. U geen la.”

<sup>53</sup>Le bi laa u pam. Bi bee ke u kpo la.

<sup>54</sup>Le Yesu chuu ujaal ki bui u, “Upiibo, fiin.” <sup>55-56</sup>Libuul ngbaan ni le waawiin ki gir koo u ni, le u ffi. Le ni gar ute ni una pam. Le Yesu bui bi ke bi taa tuk unii ubaa waah ḥa pu na, le ki bui bi ke bi tii ubo ngbaan tijikaar u ji.

### **Yesu aah tun waadidiliib kipiik ni bilee pu na**

(Matiu 10.5-15; Mak 6.7-13)

**9** Yesu nan yin ni waadidiliib kipiik ni bilee ke bi kuun ni u chee, le ki tii bi mpɔɔn bi ti nyan tiyayaar aabɔŋ mɔmɔk binib ni, ki mu cha bibum pɔɔk; <sup>2</sup>le ki tun bi, bi ti li tuk binib Uwumbɔr aanaan aabɔr, ki cha bibum pɔɔk, le ki bui bi, <sup>3</sup>“Ni taa li tu lisachuln aatuln libaa. Ni taa li joo kijaangbeek, ki taa li joo litaakɔr, ki taa li joo tijikaar, ki taa li joo ḥimombil, ki taa li joo ḥibɔkul ḥilee.” <sup>4</sup>Naah ti koo lidichal li ponn ni na, ni li bi li ponn ni ki ti saa bundaln ni ga nyan kitij ngbaan ponn ni na. <sup>5</sup>Kitiŋ kibaa aanib yaa kaa gaa nimi kan, ni nyan nima ki kpaar nitaa aatatan ki lii nima. Nimina le ga li ye nsurm ki tii bi.”

<sup>6</sup>Yesu aah tuk waadidiliib kina ki doo na, le bi siir ki bɔ dii ntim ni, ki mooni

tibɔnyaan tee. Baah buen nimɔk na, le bi cha bibum pɔɔk.

**Ubɔr Herod aah len pu  
joo cha Yesu wəb na**

(Matiu 14.1-2; Mak 6.14-29)

<sup>7</sup> Ubɔr Herod nan ɔjun Yesu aah ɔpu na, kaa nyi waah ye udaan u na. Bibaa len ke Jɔnn le fikr nkun ni, <sup>8</sup> bibaa mu len ke Elaija, bibaa mu len ke n-yaayoonn na aabɔnabr ubaa le fikr. <sup>9</sup> Le Herod bui ke, “M nan chuu gii Jɔnn aayil. Maah ɔjun u aabor na, u ye ɔjma?” le ki ban ke u kan u.

**Yesu aah kpiin binib  
ɔjichur ɔnjmu pu na**  
(Matiu 14.13-21; Mak 6.30-44; Jɔnn 6.1-14)

<sup>10</sup> Le Yesu aakpambalb ki gir ni, ki nan tuk u baah ɔja pu na. Le u di bi buen Betseda aatiŋ ni, bima bibaa. <sup>11</sup> Le kini-paak ngbaan ɔjun ke u buen nima. Le bi mu paan u pu. Le u gaa bi, ki tuk bi Uwumbɔr aanaan aabor, le ki cha bi ponni bi ye bibum na pɔɔk.

<sup>12</sup> Nwiin aah ban mu lir na, le waak-pambalb kipiik ni bilee na dan nan bui u, “Ti bi kipɔɔk ni la; cha kinipaak ngbaan buen itingbaan ni, ki ti ban tijikaar ni nkookoo yaan.”

<sup>13</sup> Le u bui bi, “Nimi nibaa tii bi tijikaar man, bi ji.”

Le bi bui u, “Njiboroboro kpin ɔnjmu ni ijan ilee baanja le bi. Aa ban ke ti buen ti daa tijikaar ti ga ɔneer binib ngbaan mɔmɔk na aa?” <sup>14</sup> Bijab ngbaan ga nan li fuu ɔjichur ɔnjmu.

Le u bui waakpambalb ke bi cha kini-paak ngbaan kal kitij ɔnikpuk ɔnikpuk, pi-ɔnjmu piiŋmu.

<sup>15</sup> Le waakpambalb ɔja kina, ki cha bi mɔmɔk kal. <sup>16</sup> Le u yoor njiboroboro kpin ɔnjmu, ni ijan ilee ngbaan, le ki waan lik paacham, ki doon Uwumbɔr, ki gii, le ki di tii waakpambalb ke bi yakr siin kini-

paak ngbaan mɔmɔk aanimbiin ni. <sup>17</sup> Le bi mɔmɔk ɔjman ki bab. Baah ɔjman ki bab ki gur ni na, le waakpambalb yoor tijikaar ti gur na, ki gbiin tibɔɔkur kipiik ni tilee.

**Piita aah len Yesu aabor pu na**

(Matiu 16.13-19; Mak 8.27-29)

<sup>18</sup> Kitaak kibaa daal, le Yesu nan bi mee Uwumbɔr ubaa. Waadidiliib mu bi u chee. Le u baa bi, “Kinipaak ngbaan bui ke m ye ɔjma?”

<sup>19</sup> Le bi bui u, “Bibaa len ke aa ye Jɔnn u nan muini binib nnyun ni na, le biken mu len ke aa ye Uwumbɔr aabɔnabr Elaija u nan bi n-yaayoonn na la; biken mu len ke n-yaayoonn na aabɔnabr ubaa le fikr nkun ni.”

<sup>20</sup> Le u baa bi, “Nimi nibaa len ke m ye ɔjma?”

Le Piita bui u, “Aa ye Uwumbɔr Aanii Kristo u ga gaa timi lii na la.”

**Yesu aah tuk bi waah ga ji falaa pu na**

(Matiu 16.20-28; Mak 8.30-9.1)

<sup>21</sup> Le u sur bi mbamɔm ke bi taa tuk unii ubaa, <sup>22</sup> le ki bui bi, “Min Unibɔn Aabo ga ji falaa sakpen. Juu yaab aaninkpiib, ni Uwumbɔr aatotoorninkpiib, ni Uwumbɔr aakaal aamɔmɔkb ga yii mi, ki ku mi. Iwiin itaa daal le Uwumbɔr ga fikr mi nkun ni.”

<sup>23</sup> To, u nan bui waadidiliib ni kini-paak ngbaan, “Unii yaa ban u dii mi kan, u yii ubaa, ki yoor waadɔpuinkoo iwiin mɔmɔk aan ki li dii mi. <sup>24</sup> Unii umɔk kaan ɔjmaa kpo m pu na kan, waamɔfal ga bee yɔli la. Unii umɔk ga ɔjmaa kpo m pu na kan, u ga kan limɔfal li kaa kpa ndoon na. <sup>25</sup> Unii yaa kan dulnyaa wee ni aawan mɔmɔk, ki lann waamɔfal, ki wɔŋ kan, ba aanyoor le u kan? <sup>26</sup> Unii yaa san inimɔɔn m ni maaliin chee u tuk binib biken kan, min Unibɔn Aabo ga nan yii udaan ngbaan. M ga gir ni, ki li

kpa m ni Nte Uwumbor aapcoen. Uwumbor aatuuntiib bi ye chain na mu ga nyuŋ mi. N-yoonn ngbaan le m ga yii udaan ngbaan. <sup>27</sup> M tuk nimi mbamɔn la, binib bi si do na ponn ni bibaa aan kpo see bi puen kan Uwumbor aanaan waahr.”

### **Yesu aawon aah kpeln pu na**

(Matiu 17.1-8; Mak 9.2-8)

<sup>28</sup> Waah len kina na, ni naahn iwiin iniin aapuwɔb le u di Piita, ni Jɔnn, ni Jems, ki di jon lijool paab, u ti mee Uwumbor. <sup>29</sup> Waah bi mee Uwumbor na, le unimbil wɔb kpeln. Le waawan-peenkaan mu kpalm tiwanpipiln ni ga li deer aanimbil na. <sup>30-31</sup> Le bi kan bijab bilee bi wiin chain na bi len u chee tibor. Bi nan ye n-yaayoonn na aabɔnabtiib Moses ni Elaija la. Bi nan len waah ga ḥa Uwumbor aageehn ki kpo Jerusalem ponn ni pu na. <sup>32</sup> Le ngeen joo Piita mam. Baah finn na, le bi kan Yesu aah wiin chain pu na, ki kan bijab bilee bi si u chee na. <sup>33</sup> Bijab bilee ngbaan aah siir cha u na, le Piita bui u, “Ndindaan, taah bi do na, ni ḥan. Cha ti ḥa ḥiboo ḥitaa, ki di libaa tii si, ki di liken tii Moses, ki di liken tii Elaija.” Piita aah len kina na, waa nyi waah len ti cha ni wɔb na.

<sup>34</sup> Waah laa bi len kina na, le ntaalangbam dan nan biin bi pu. Mu aah biin bi pu na, le ijawaan chuu Yesu aadidiliib ngbaan. <sup>35</sup> Le nneel len ntaalangbam na ni ke, “Maabo u m lee u na sɔ. Li ḥun waah len pu na man.”<sup>\*\*</sup>

<sup>36</sup> Nneel ngbaan aah len ki ti doo na, bi nan kan Yesu baanja le si. Le bi joo tibor ngbaan bima baanja, kaa tuk unii ubaa n-yoonn ngbaan baah kan pu na.

### **Yesu aah nyan libimbikl ubo ni pu na**

(Matiu 17.14-18; Mak 9.14-27)

<sup>37</sup> Kitaak aah woln na, le bi sunn ni lijool ngbaan taab. Le kinipaak sakpej

tooh u nsan ni. <sup>38</sup> Le kinipaak ngbaan ponn ni uja ubaa teen ke, “Umɔmɔkr, m gaŋ si, san njapcoen kinimbaak. U ye maabobaal la. <sup>39</sup> Libimbikl le lir u ki cha u tar, ki cha uwon gbaa, le umɔb ponn ni puk tipupukr, ki liin u nsin sakpen, kaa ban li di u lii. <sup>40</sup> M gaŋ saadidiliib ke bi nyan u libimbikl ngbaan. Bi mu aa ḥymaa nyan u.”

<sup>41</sup> Le Yesu bui ke, “Nimi dandana aanib, naa gaa Uwumbor ki kii, ki mu aa dii u mbamɔm. Ni ban ke m yunn ni chee kinye pu, aan ki li kpa limɔr ni pu?” le ki tuk ubo ngbaan aate, “Li joo ni aajapcoen ngbaan m chee.”

<sup>42</sup> Le ubo ngbaan aah choo na, libimbikl lii u kitinj, le ki cha uwon gbaa sakpen. Le Yesu kae libimbikl ngbaan, ki cha ubijabo ngbaan pɔok, le ki di u giin tii ute. <sup>43</sup> Baah kan Uwumbor aah kpa mpɔɔn sakpen pu na, le ni gar kinipaak ngbaan mɔmɔk pam.

### **Yesu aah ki tuk waadidiliib waakun aabɔr pu na**

(Matiu 17.22-23; Mak 9.30-32)

Naah gar binib ngbaan mɔmɔk kina na, le Yesu bui waadidiliib, <sup>44</sup> “Bi ga di min Unibɔn Aabo ḥa binib aanjaal ni la. Cha tibor timina koo nitafal ni man.” <sup>45</sup> Le baa bee taatataa. Uwumbor le bɔr taatataa ke bi taa bee. Le baa kaa ke bi baa Yesu taatataa.

### **Ulau ye uninyuun?**

(Matiu 18.1-5; Mak 9.33-37)

<sup>46</sup> Le waadidiliib kpak tɔb kinikpakpak ke ulau ye uninyuun bi ponn ni. <sup>47</sup> Le Yesu bee baah dak pu na, le ki di ubo siin ubaa chee, <sup>48</sup> le ki tuk bi, “Unii umɔk gaa ubo wee maayimbil pu na kan, u gaa mi le na. Unii umɔk gaa mi na kan, u gaa Uwumbor u tun ni mi na le na. Unii

\*\*9:35 : Lik Aisaya 42.1.

u ye uwaatiir ni ponn ni na, uma le ye uninyuun.”

**Taa kiir unii u tun  
Uwumbor aatuln na**

(Mak 9.38-40)

<sup>49</sup> Le Jønn tuk Yesu, “Ndindaan, ti kan unii ubaa nyan tiyayaar binib ponn ni, saayimbil pu. U mu aa dii timi, nima le ti bui u ke u di cha.”

<sup>50</sup> Le Yesu bui u, “Taa ki tuk u ke u di cha. Unii u kaa ye nimi aadin na si nichajñ ni la.”

**Samaria yaab bibaa  
aah yii Yesu pu na**

<sup>51</sup> Bundaln Yesu ga gir buen paacham na peen ni. Le u poøk ubaa ke u buen Jerusalem, <sup>52</sup> le ki tun bitutum ke bi loln u pu nsan. Le bi buen, le ki ti fuu Samaria yaab<sup>¶</sup> aatij kibaa ponn ni, bi ti gor kiir u. <sup>53</sup> Le kitij ngbaan ni aanib kan ke u ban u buen Jerusalem. Nima le bi yii u. <sup>54</sup> Waadidiliib Jems ni Jønn aah kan ke bi yii u na, le bi baa u, “Tidindaan, aa ban ke ti mee Uwumbor aan mmii nyan paacham ki gaa bi [ke Elaija aah nan ña pu na aa]?”

<sup>55</sup> Yesu nan fenn ton Jems ni Jønn le ki kae bi, [ki bui bi, “Naa nyi Mfuir Nyaan mu yeh nimi na aah bi pu na. <sup>56</sup> Min Unibon Aabo aa dan m nan ku binib. M dan ke m nan gaa bi lii la.”]

Le bi buen kitij kiken ni.

**Binib bi ban ke bi dii Yesu na**

(Matiu 8.19-22)

<sup>57</sup> Baah cha na, le uja ubaa dan nan bui Yesu, “M ga dii si saah cha nin chee na mok.”

<sup>58</sup> Le Yesu bui u, “Injok kpa yaah koo ibuu i ponn ni na. Inyoön i laani

paacham na mu kpa yaadil. Min Unibon Aabo aa kpa maah ga doon nin chee na.”

<sup>59</sup> Le Yesu tuk uja uken, “Li dii mi.”

Le u bui u, “Ndindaan, m mee si nsan, cha m buen ti sub nte waahr, aan ki nan dii si.”

<sup>60</sup> Le Yesu bui u, “Cha bitekpiib sub tøb. Si ma kan, aa li cha ti moon Uwumbor aanaan aabor.”

<sup>61</sup> Le uja uken mu tuk Yesu, “Ndindaan, m ga dii si la. M mu mee si nsan, cha m buen ti choi maachiln ni aanib waahr, aan ki nan dii si.”

<sup>62</sup> Le Yesu bui u, “Unii yaa joo unaaja ko kisaak ki lik puwøb kan, waa ñeer Uwumbor aanaan ni aatuln.”<sup>§§</sup>

**Yesu aah tun waadidiliib  
imonko itaa ni kipiik pu na**

**10** Nee aapuwøb le Tidindaan nyan bijab imonko itaa ni kipiik ki kpee, le ki tun bi bilelee ke bi loln u pu nsan, ki ti koo waah ga buen ntim mu momøk ni na. <sup>2</sup> U bui bi, “Idi biir le ki wiir. Bidicheeb aa wiir. Nima pu na, ni li mee kisaak aadindaan man ke u tun bidicheeb bi ti chee waajikaar. <sup>3</sup> Li cha man. Maah tun nimi na, ni ga li bi ke ipihbi i bi ñisapol aakaasisik ni na la. <sup>4</sup> Ni taa li joo ñimombil aataakør, ki taa tun ñitun, ki taa li joo ñinaatak, ki taa sil nsan ni ki doon unii ubaa. <sup>5</sup> Ni yaa koo lidichal ni kan, njan aawan le ye ke ni bui bi, ‘Uwumbor aanyoor bi lidichal lee aanib pu.’ <sup>6</sup> Uninyaan yaa bi nima chee kan, Uwumbor aanyoor ga li bi u pu. Uninyaan yaa kaa bi kan, Uwumbor aanyoor ga gir ni ni pu. <sup>7</sup> Lidichal libaa aanib yaa gaa nimi kan, ni li bi nima ki ti saa buyoonn ni ga nan nya na, ki taa jir lidichal. Ni li ji ki li nyu baah ga tii nimi ni na; ututunn momøk ñeer waa-

<sup>¶</sup>9:52 : Samaria yaab ni Juu yaab aakaasisik ni aa nan mɔ.

<sup>§§</sup>9:62 : Naatataa le ye ke unii yaa kaa gaa Uwumbor aatuln ijaaal ilee kan, waa ñeer u tun li.

par.<sup>8</sup> Ni yaa koo kitij kibaa ni aan bi gaa nimi kan, ni li ji baah ga tii nimi ni na,<sup>9</sup> ki bui bi ke, ‘Uwumbor aanaan peen ni nimi la,’ ki cha bibum bi bi nima na poɔk.<sup>10</sup> Ni yaa koo kitij kibaa ni, aan baa gaa nimi kan, ni bɔ dii ki ponn ni ki bui ke,<sup>11</sup> ‘Nimi aatiij aatatan ti bi titaaپɔتن ni na, tima le ti kpaar lii do chee na, ni li ye nsurm ki tii nimi. Ni li nyi ke Uwumbor aanaan peen ni, le ni yii.’<sup>12</sup> M tuk nimi la, bundaln Uwumbor ga ji binib tibor na, binib ngbaan aatafadaan ga jer Sodom aatiij aanib aatafadaan.”

### **Binib bi kaa kpeln baabimbin na aabor**

(Matiu 11.20-24)

<sup>13</sup> “Korasinn aatiij aanib, tibɔbir bi ni pu. Betseda aatiij aanib, tibɔbir bi ni mu pu; ba pu? m yaa ba nan tun lijinjiir aatun Taya ni Saidonn aatim aanib aakaasisik ni ke maah tun lijinjiir aatun nikaasisik ni pu na kan, bi ba ga kpeln baabimbin ni yunn, ki li pee tiwan-peenkaan ni saak kuub na, ki di nfatan puŋ biyil, aan ki mɔk ke bisui bii baatunwanbir pu.<sup>14</sup> Bundaln Uwumbor ga ji binib tibor na, nimi aatafadaan ga jer Taya aatiij aanib ni Saidonn aatiij aanib aatafadaan.<sup>15</sup> Nimi Kape-naum aatiij aanib ma kan, bi ga yoor nimi paacham aa? Aayii. Bi ga sunn nimi tataab tataab la.”

<sup>16</sup> Yesu nan tuk waadidiliib, “Unii u ɻun nimi aabor na kan, u ɻun maabor le na. Unii u yii nimi na kan, u yii mi le na. Unii u yii mi na kan, u yii Uwumbor u tun ni mi na le na.”

### **Waadidiliib imonko itaa ni kipii kaa aah gir ni pu na**

<sup>17</sup> Le bijab imonko itaa ni kipiik ngbaan gir ni Yesu chee ni mpopiin, ki nan bui u, “Tidindaan, tiyayaar mu kii timi aamɔb, saayimbil pu.”

<sup>18</sup> Le u bui bi, “M kan kinimbɔŋ nyan ni paacham ki ɻa yɔli ke utaal aah moor ki lir pu na.<sup>19</sup> Lik man, m tii nimi mpɔɔn, ni ti taa ikuub ni inyoohn pu, ki tii nimi mpɔɔn, ni nyaŋ timi aadin kinimbɔŋ aapɔɔn mɔmɔk, le tiwan nibaa aan ɻmaa ja nimi nibaa.<sup>20</sup> Tɔ, tiyayaar aah kii nimi aamɔb na, ni taa cha nima baanja le li ye nimi aapopiin. Nimi aayimbil aah ɻmee paacham na le ye mpopiin mbamɔm.”

### **Yesu aah kpa mpopiin sakpen pu na**

(Matiu 11.25-27; 13.16-17)

<sup>21</sup> N-yoonn ngbaan le Uwumbor Aafuur Nyaan cha Yesu kpa mpopiin pam, ki bui ke, “Nte Uwumbor u ye paacham ni taab Aadindaan na, aa bɔr tibor timina bilankpalb ni binimbiwolm, le ki di mɔk chapɔntiib, nima le m pak si. Nte, saageehn le na, nima le cha aa ja kina.

<sup>22</sup> “Nte Uwumbor le tii mi tiwan mɔmɔk. Ubaa aa nyi min Uwumbor Ajapɔɔn aah ye udaan u na, see Nte Uwumbor. Ubaa mu aa nyi Nte Uwumbor aah ye udaan u na, see min Ujapɔɔn. Binib bi m ban ke m di Uwumbor mɔk bi na, bi mu nyi u.”

<sup>23</sup> Le u fenn ki toj waadidiliib, ki bui bi libɔɔl ni, “Uwumbor aanyoor bi ni pu, ninimbil aah kan tiwan ni na pu.<sup>24</sup> M tuk nimi la, Uwumbor aabɔnabitib ni bibɔrb bi wiir na nan ban bi kan naah kan tiwan ni na, kaa kan. Bi nan ban bi ɻun naah ɻun tibor ti na, kaa ɻun ti.”

### **Samaria aatiij aaninyaan aah ja pu na**

<sup>25</sup> Le uja u nyi Uwumbor aakaal mbamɔm na ubaa fii sil ki pen Yesu nlan, ki baa u, “Umɔmɔkr, m ga ja kinye ki kan limɔfali li kaa kpa ndoon na?”

<sup>26</sup> Le Yesu baa u, “Ni ɻmee kinye Uwumbor aakaal ponn ni? Aa karn kinye?”

<sup>27</sup> Le u bui u, “Ni ḥmee ke, ‘Aa li gee Aadindaan Uwumbor aasui mōmōk ni, ni saawiin mōmōk, ni saapcoo mōmōk, ni saalandak mōmōk, ki li gee aana aabo ke saah gee aabaa pu na.”

<sup>28</sup> Le Yesu bui u, “Aa len mbamōn la. Li ḥjani kina, le aa ga kan limōfāl.”

<sup>29</sup> Le u ban ke u li kpa mbamōn, le ki baa Yesu, “Ḥjma ye nna aabo?”

<sup>30</sup> Le Yesu bui u, “Uja ubaa nan nyan Jerusalem ki cha Jeriko. Waah cha na, le u ti lir bififiirb aajaal ni. Le bi chuu peer waawanpeenkaan ki gbaa u, le u ti ban u kpo. Le bi siir cha u. <sup>31</sup> Naah kpee siib na, le Uwumbor aatotoor ubaa mu jer nima, ki kan u. Waah kan u na, le u gōln u ki jer. <sup>32</sup> Le Liifai\* aanii ubaa mu paan ni, ki nan jer nima, le ki kan u, le ki mu gōln u ki jer. <sup>33</sup> Le Samaria† aatiŋ aanii ubaa mu cha waasachuln, ki nan fuu nima chee. Waah kan u na, le kinimbaak chuu u. <sup>34</sup> Le u buen u chee, ki di nnyōk ni nkpan meen ibuun ngabaan, ki di ḥjitan poo u, le ki di u diŋ uma ubaa aabon pu, ki di u buen tichaandir ponn ni, ki ti lik u nima. <sup>35</sup> Le ni woln kitaak le u di ḥjimobil tii tichaandirdaan, le ki bui u, ‘Lik u tii mi. Aa yaa jin ḥjimobil ni jer ḥjmina kan, m nan gir ni kan, m ga nan pa si.’”

<sup>36</sup> Le Yesu baa nkaal aamōmōkr ngabaan, “Uja u lir bififiirb aajaal ni na, bijab bitaa ngabaan ponn ni, ulau tee ye una aabo? Aa dak kinye?”

<sup>37</sup> Le u bui u, “Unii u san u kinimbaak na le ye una aabo.”

Le Yesu bui u, “Li cha ki mu li ḥjani kina.”

### Yesu aah mann Mata ni Mari pu na

<sup>38</sup> Tɔ, Yesu ni waadidiliib aah chuun lisachuln pu na, le bi ti fuu kitij kibaa ponn ni. Le upii u bi yin u ke Mata na

gaa u waadichal ni. <sup>39</sup> Mata nan kpa naal ubaa, bi yin u ke Mari. Le Mari ka Yesu chee, ki pel waah len pu na. <sup>40</sup> Mata le tun tichann aatuln ki bi gonnī ki ti bak. Nima le u dan nan bui Yesu, “Ndindaan, nnaal cha mi baanja le channi nimi tichann kaa ter mi. Aatafal aa bi ni ni ii? Bui u ke u ter mi.”

<sup>41</sup> Le Tidindaan bui u, “Mata, Mata, aa cha tiwan sakpen le muk si ki ja si ilandak. <sup>42</sup> Tiwan nibaa baanja le aa lann. Mari aah lee ni na le ḥjan. Ubbaa aan nyan waah lee ni na u chee.”

**Yesu tuk bi baah ga  
mee Uwumbor pu na**

(Matiu 6.9-13; 7.7-11)

**11** Kitaak kibaa daal, le Yesu nan bi nibaa chee ki bi mee Uwumbor. Waah mee u ti doo na, le waadidiliib ponn ni ubaa bui u, “Ndindaan, mōk timi taah ga mee Uwumbor pu na, ke Jɔnn u nan muini binib nnyun ni na aah nan mōk waadidiliib pu na.”

<sup>2</sup> Le Yesu bui bi, “Ni yaa mee Uwumbor kan, ni bui ke,  
‘Tite Uwumbor [u bi paacham na,]  
cha binib li san saayimbil;  
cha saanaan dan.

[Bi li ḥjani saageehn dulnyaa wee ni,  
ke baah ḥjani paacham pu na.]

<sup>3</sup> Tiin timi din aawiin aajikaar.

<sup>4</sup> Cha timi aatunwanbir pinn timi; ba pu?  
ti mu di cha pinn binib bimōk koo timi  
aaaaani ni na.

Taa cha ti kan ntɔŋ.

[Nyan timi tibɔbir ni.]”

<sup>5</sup> Le Yesu ki bui bi, “Ni ponn ni ubaa yaa buen aajɔ do kinyetaasiik ki ti sil li-paal ki bui u, ‘Njɔ, pinn mi ḥjiboroboro kpin ḥjita; <sup>6</sup> njɔ ubaa chuun fuu ni ndo; m mu aa kpa tijiir tibaa m tii u’ kan, <sup>7</sup> le aajɔ u bi kidiik ni na ga bui si, ‘Taa muk

\***10:32** : Liifai yaab nan tun lituln Uwumbor Aadichal ni la.

†**10:33** : Samaria yaab ni Juu yaab aakaasisik ni aa nan mo.

mi. M ni maabilb doon ki lar kidiik a. Maan ḥmaa fii ki tii si.<sup>8</sup> Naa ye kijotiik pu le u ga fii ki tii si. Aa yaa gajni u ki gajni u ki muk u kan, nima le ga cha u fii ki tii si saah ban pu na momok. <sup>9</sup>Nima pu na, m tuk nimi la, ni li mee Uwumbor man, le u ga tii nimi. Ni li ban Uwumbor chee man, le ni ga kan. Ni li kpaar jaalej man, le u ga piir tii nimi. <sup>10</sup>Unii umok mee Uwumbor na, u ga tii u. Unii umok ban na, u ga kan. Unii umok kpaar jaalej na, u ga piir tii u. <sup>11</sup>Ni ponn ni ubaa aabo yaa mee si maab kan, aa ga di litakpal tii u uu? U yaa mee si ujan kan, aa ga di uwaa tii u uu?<sup>12</sup>U yaa mee si likoojiln kan, aa ga di unyoohn tii u uu?<sup>13</sup>Nimi titunwanbirdam yaa tee nyi ipini i ḥjan na ki tii nimi aabim kan, ḥmaninkabaa Nite Uwumbor u bi paacham na le aan di Waafuur Nyaan tii binib bi mee u ki ban mu na aa?”

**Binib bibaa aah sii Uwumbor  
Aafuur Nyaan pu na**

(Matiu 12.22-30; Mak 3.20-27)

<sup>14</sup>Uja u tiyayaar cha u ḥja ubir na nan bi nima chee. Le Yesu nyan tiyayaar ngbaan u ni, le u len, kaa ki ye ubir. Le ni gar kinipaak ngbaan pam. <sup>15</sup>Bi ponn ni bibaa mu bui ke kinimbɔŋ ki bi yin ki ke Beelsebul, u ye tiyayaar aayidaan na, le tii u mpɔɔn ke u nyan tiyayaar binib ni.

<sup>16</sup>Bibaa mu tɔŋ u ki ban ke u tun li-jinjiir aatuln ki mɔk bi ke u ye Uwumbor Aanii. <sup>17</sup>Le u bee baah dak pu na, le ki bui bi, “Nnaan mubaa ni aanib yaa jaa tɔb kijaak kan, nnaan ngbaan ga bee yoli la. Lidichal libaa ni aanib mu yaa jaa tɔb kijaak kan, bi ga lir la. <sup>18</sup>Ni len ke Beelsebul u ye tiyayaar aayidaan na le tii mi mpɔɔn ke m nyan tiyayaar binib ni. Tiyayaar aayidaan kinimbɔŋ yaa ḥja kina kan, ki jan kibaa kijaak la. Kaanaan ga ḥja kinye aan ki sil? <sup>19</sup>Ni yaa len ke tiyayaar aayidaan Beelsebul le tii mi

mpɔɔn ke m nyan tiyayaar binib ni kan, ḥja tii nimi aanib mu mpɔɔn ke bi nyan tiyayaar binib ni? Nimi aanib aah ḥjan pu na le ga mɔk ke ni kpa mbamɔm aan naa kpa. <sup>20</sup>Mma kan, Uwumbor aapɔɔn pu le m nyani tiyayaar binib ni. Nima le mɔk ke Uwumbor aanaan fuu ni ni chee.

**Yesu aah nyaj kinimbɔŋ  
ki bii kaawan pu na**

(Matiu 12.29; Mak 3.27)

<sup>21</sup>“Liwɔkl li kpa tijawan sakpen na yaa lik waadichal kan, ubaa aan bii waawan.

<sup>22</sup>Le unii u kpa mpɔɔn jer u na yaa lir u pu ki nyaj u kan, u ga gaa waajawan ti ter u na momok, ki ji waawan.

<sup>23</sup>“Unii u kaa dii mi na kan, u ye maadin la. Unii u mu kaa kuuni binib tii mi na kan, u yaani bi la.”

**Tiyayaar aah ga gir ni pu na**

(Matiu 12.43-45)

<sup>24</sup>“Tiyayaar yaa nyan unii ni kan, ti ga li chuun gor nnyun aah kaa bi kipɔɔk ki ponn ni na, ki ban taah ga kal nin chee ki fuur na, kaan kan. Le ti ga len ke, ‘M ga gir kun maah nan nyan unii u ponn ni na la.’ <sup>25</sup>Le ti ga gir ni ki nan kan ke bi toor taakookoo yaan, le ni ḥjan. <sup>26</sup>Le ti ga buen ki ti joo ni tiyayaar tilole ti bir ki jer ti na. Le ti momok ga koo unii ngbaan ponn ni, ki ga li bi u ponn ni, le ki ḥja u yoli ki jer waah nan bi njan na pu na.”

**Binib bi kpa Uwumbor  
aanyoor mbamɔm na**

<sup>27</sup>Yesu aah len kina na, le kinipaak ngbaan ponn ni upii ubaa len mpɔɔn pu, “Uwumbor aanyoor bi upii u ma si ki tii si libiil na pu.”

<sup>28</sup>Le Yesu bui ke, “Binib bi ḥju Uwumbor aabɔr ki kii ti na, Uwumbor aanyoor bi bima le pu.”

**Baah ban ke Yesu tun  
lijinjiir aatuln pu na**  
(Matiu 12.38-42)

<sup>29</sup> Kinipaak aah kuun ni Yesu chee na, le u bui ke, “Dandana aanib ye binib bi bir na la. Bi ban ke m mok bi li jinjiir aawan, aan bi nin gaa mi ki kii. Uwumbor aah nan ja lijinjiir aatuln ki ja waabonabr Jona pu na, lituln limina aaboln le bi ga kan. Maan mok bi lijinjiir aawan niken. <sup>30</sup>Uwumbor aah nan ja Jona pu na, ni nan ye limokl le ki tii Ninefa aatiij aanib. Kina le waah ga ja min Unibon Aabo pu na ga li ye limokl ki tii dandana aanib ngbaan. <sup>31</sup>Seba aatiij aapiibor nan nyan ni dandar ke u nan qun Ubør Solomonnn aalan aaliin. Min u jer Solomonnn na bi do la, le naa qun maaliin. Bundaln UWumbor ga ji binib tibor na, upiibor ngbaan aah nan ja pu na, nima le ga mok ke dandana aanib aabbor bii. <sup>32</sup>Jona nan tuk Ninefa aatiij aanib UWumbor aabbor, le bi kpeln baabimbin. Min, u jer Jona na le tuk dandana aanib UWumbor aabbor, le baa kpeln baabimbin. Bundaln UWumbor ga ji binib tibor na, Ninefa aatiij aanib aah nan kpeln baabimbin pu na, nima le ga mok ke dandana aanib aabbor bii.”

**Tiwon aawiihn**  
(Matiu 5.15; 6.22-23)

<sup>33</sup> “Unii yaa see karyaa kan, waan di u di bør, kaan di lisambil chiq u pu. U ga di u tøj tiwan paab la, le u li wiin binib bimok koo ni na chee, bi li waa. <sup>34</sup>Aanimbil ye saawon aakaryaa la. Aanimbil yaa woln ke aa dii UWumbor aasan kan, saabimbin mɔmɔk gbii nwiihn la. Aanimbil yaa kaa woln kan, saabimbin gbii mbɔmbɔon la. <sup>35</sup>Li nyi ki taa cha nwiihn mu bi aa ni na li ye mbɔmbɔon.

<sup>36</sup> Saabimbin mɔmɔk yaa gbii nwiihn, kaa bɔɔn nibaa chee kan, aa ga li bi nwiihn ni mbamɔm. Ni ga li bi ke karyaa u wiin chain na aah ga woln saah bi nin chee na pu na la.”

**Yesu aah galn Farisii yaab  
ni ikaal aamɔmɔkb pu na**

(Matiu 23.1-36; Mak 12.38-40)

<sup>37</sup> Yesu aah len kina ki ti doo na, le Farisii aanii ubaa bui u ke u dan udo ki nan ji tijikaar. Le u koo waadichal ni, ki kal ki bi ji. <sup>38</sup> Le Farisii aanii ngbaan kan ke Yesu ji kaa qir ujaal. Le ni gar u. <sup>39</sup> Le Tidindaan bui u, “Nimi Farisii yaab, ni qir tiyir ni qisambil aapuwɔb mbamɔm, kaa qir ni ponn ni. Kina le ni ban ke binib bui ke ni ye bininyaam; nisui ponn ni mu gbii kinaayuk aatuln ni titunwanbir. <sup>40</sup> Nimi bijɔrb bimina, UWumbor u nan naan tiwon na, uma le naan nisui mu. <sup>41</sup> Di naah kpa tiwan ni na tii bigiim, ki di nibaa mu tii bi. Ni yaa ja kina kan, tijɔn tibaa aan ki li bi ni chee.

<sup>42</sup> “Nimi Farisii<sup>‡</sup> yaab, tibɔbir bi ni pu; ba pu? ni yakr tikpifar nfum kipiik le ki nyan nibaa le di tii UWumbor, kaa qani ni qan na, kaa gee UWumbor. Ni qan ke ni li qani ni qan na, ki li gee UWumbor, ki yakr nimi aawan mu ki di tii u.

<sup>43</sup> “Nimi Farisii yaab, tibɔbir bi ni pu; ba pu? ni gee ke ni kal bininyuum aakakaa chee mmeen aadir ni, ki gee ke binib doon nimi mbamɔm kinyaŋ ni. <sup>44</sup> Tibɔbir bi ni pu. Ni naahn qjakaakul qjibɔɔna, qjibinib chuun taar qjipu, kaa nyina.”

<sup>45</sup> Le UWumbor aakaal aamɔmɔkr ubaa bui u, “Umɔmɔkr, saah len kina na, aa sii ti mu la.”

<sup>46</sup> Le Yesu bui ke, “Nimi UWumbor aakaal aamɔmɔkb, tibɔbir bi ni mu pu. Ni di nkaal mu pɔɔ sakpen na, le ki di

---

\*11:42 : Farisii yaab nan ye Juu yaab bibaa bi aanimbil man ke binib li dii Moses aakaal na.

kpee Uwumbor aakaal pu, ki tuk binib ke bi li dii kina. Ni mu aa ter bi ke bi dii kina.<sup>47</sup> Tibobir bi ni pu; ba pu? ni maa njikaakul ki tii Uwumbor aabonabtiib bi nan bi n-yaayoonn na. Niyaajatiib le nan ku bi.<sup>48</sup> Ni mu nyi baah nan ku bi pu na, ki mu kii baah nan ja pu na. Niyaajatiib le nan ku bi. Ni mu maa njikaakul tii bi.<sup>49</sup> Nima pu le Uwumbor aah kpa nlan pu na, u bui ke, ‘M ga tun bibonabr ni bitutum bi chee. Le bi ga ku ngem ki ja biken mu falaa.’<sup>50</sup> Buyoonn dulnyaa wee nan piin ki joo cha na, binib nan ku Uwumbor aabonabtiib. Linikul ngbaan momok pu le Uwumbor ga daa dandana aanib aatafal.<sup>51</sup> Njan, bi nan ku Abel, le ki ku bininyaam ki joo cha, ki ti pii Uwumbor aabonabr Sekaria, u bi nan ku u, kitork aabimbiln ni Uwumbor Aadichal aakaasisik ni na. Mbamom, m tuk nimi la, linikul ngbaan momok pu le Uwumbor ga daa dandana aanib aatafal.

<sup>52</sup>“Nimi Uwumbor aakaal aamomokb, tibobir bi ni pu. Naa mok binib Uwumbor aakaal mbamom. Nimi nibaa aa dii mu, le ki tee lej binib bi ban bi dii mu na nsan.”

<sup>53</sup>Yesu aah nyan nima chee na, le Uwumbor aakaal aamomokb, ni Farisii yaab kpak u kinikpakpak pam, ki baa u mbaan tibor ti wiir na pu,<sup>54</sup> ki ban bi pen u nlan ki kan waataani aan ki galn u.

### Yesu tuk waadidiliib ke bi li nyi binib bi ηmann bi na

(Matiu 10.26-27)

**12** Binib churbaka aah nan kuun Yesu chee ki ti taar tob pu pu na, le u bui waadidiliib, “Ni li nyi Farisii yaab aabimbin aah bi pu na, ki taa li bi kina man. Bi ηmanni ke bi ye bininyaam, kaa ye. <sup>2</sup>Tiboborkaan momok ga kpiir. Tibor timok bco na, ti ga nyan mpaan pu.<sup>3</sup> Naah loon len tibor ti mbombcoon ni na, binib qun ti nwiihn pu. Naah loon

tibor ti binib aatafal ni kidiik ponn ni na, bi ga di ti moon lipaal.”

### Ni li san Uwumbor baanja

(Matiu 10.28-31)

<sup>4</sup>“Nimi bi ye njotiib na, m tuk nimi la, ni taa san binib ijawaan man. Bi ga ηmaa ku nimi aawon baanja la. Baan ki ηmaa ja nimi nibaa.<sup>5</sup> M sur nimi naah ga li san u ijawaan na. Ni li san Uwumbor. U yaa ku binib kan, u kpa mpocoon ke u di bi ja mmii mu kaan junn na ni. Mbamom, m tuk nimi la, ni li san uma.

<sup>6</sup>“Bi kooh iyaar ijmu janjan bilee la. Le Uwumbor aa suln i ponn ni ubaa aabor.<sup>7</sup> Ni taa san ijawaan man. Ni jer iyaar pam. Uwumbor nyi nimi aayikpir aakahm.”

### Lem binib aanimbil ni ke aa ye Kristo yoo la

(Matiu 10.32-33; 12.32; 10.19-20)

<sup>8</sup>“M tuk nimi la, unii umok len binib aanimbil ni ke min le ye Udindaan na, min Unibon Aabo mu ga len Uwumbor aatuuntiib aanimbil ni ke udaan ngbaan le ye miyoo.<sup>9</sup> Unii umok yii mi binib aanimbil ni na, m mu ga yii udaan ngbaan Uwumbor aatuuntiib aanimbil ni.

<sup>10</sup>“Unii yaa bii min Unibon Aabo kan, Uwumbor ga ηmaa di cha pinn u. Unii yaa sii Uwumbor Aafuur Nyaan kan, Uwumbor aan di cha pinn u.

<sup>11</sup>“Bi yaa chuu nimi, ki di ja mmeen aadir ni, bee ntim aaninkpiib aanimbii ni, bi ti ji nimi tibor kan, ni taa baa nisui ni ke ni ga len kinye aan ki nyan nibaa tibor ni.<sup>12</sup> N-yoonn ngbaan yaa fuu ni kan, Uwumbor Aafuur Nyaan le ga mok nimi naah ga len pu na.”

### Uwankpadaan u ye ujor na

<sup>13</sup>Kinipaak ngbaan ponni le uja ubaa tuk Yesu, “Umomokr, bui nkpel ke u yakrtite afaal ki di min yaan tii mi.”

<sup>14</sup> Le Yesu bui u, “Uja, ḷma tii mi nsan ke m ji nimi tibor ki yakr lifaal tii nimi?”  
<sup>15</sup> le ki tuk kinipaak ngbaan, “Ni li nyi man ki taa li kpa iniman. Unii yaa kpa liwangol li wiir na kan, nima le aan tii u limɔfal.”

<sup>16</sup> Yesu nan ḷakl bi liyataŋakl ke, “Uwankpadaan ubaa aasaak nan ḷa tijikaar ti wiir na.”<sup>17</sup> Le u dak usui ni, ‘Maa ki kpa maah ga di maajikaar ḷa tiwan ni ponn ni na. M ga ḷa kinye?’<sup>18</sup> M ga ḷa kina la; m ga gbaa wii maapil mɔmɔk, ki ki maa ḷipil ḷi filk ki jer ḷimina na. M ga di maajikaar mɔmɔk ḷa ḷi ponn ni.’<sup>19</sup> Le m ga bui mbaa, M kpa tijikaar ti ga fuu mi ḷibin sakpen na. M ga fuur, ki ji, ki nyu, ki li mɔɔni.’<sup>20</sup> To, le Uwumbor bui u, ‘Si ujɔr wee, kinyeek kee le aa ga kpo. Saah kuun liwangol limɔk siin na, ḷma ga li yeh li?’

<sup>21</sup> “Kina le unii umɔk di liwangol bil kiir ubaa, kaa kpa liwangol Uwumbor chee na, u mu ye ujɔr.”

### Gaa Uwumbor ki kii mbamɔm man

(Matiu 6.25-34)

<sup>22</sup> Le Yesu bui waadidiliib, “Nima le m tuk nimi, ni taa cha nimi aalandak li muk nimi tiwon aawan pu, ki taa li dak ke, ‘Ti ga ji ba? Ti ga peen ba?’

<sup>23</sup> Limɔfal bi tijikaar baanja pu la aa? Ti-won bi tiwanpeenkaan baanja pu la aa?

<sup>24</sup> Dakl lik ḷikakaa aah bi pu na. ḷaa ko tijikaar, ki mu aa chee ti, kaa kpa ḷipil, kaa kpa ḷiboo. Uwumbor le kpiini ḷi. Naa jer ḷi sakpen aa?<sup>25</sup> Ni ponn ni ubaa ga ḷmaa muk waalandak aan ki yunn ki jer Uwumbor aah siin pu na aa?”<sup>26</sup> Naah kaa ḷmaa ḷa tiwan ni kaa pɔɔ na, ba pu ni cha ilandak muk nimi ni gur na pu?

<sup>27</sup> Dakl lik mmopuun aah bi pu na. Mu aa tun lituln, ki mu aa fik tikokonn. M tuk nimi la, Ubɔr Solomonn u nan pee tiwanpeenkaan nyaan na aawanpeenkaan

aa nan ḷjan ke mmopuun aah ḷjan pu na.<sup>28</sup> Timoor bi din, ki ga fe wu mmii fen, le Uwumbor ḷa ti mmopuun mu ḷjan na. Waan tii nimi tiwanpeenkaan aa? Naa gaa Uwumbor ki kii mbamɔm. U ga tii nimi.<sup>29</sup> Ni taa cha ninimbil li man tijikaar ni tiwanyukaan pu, ki taa cha ilandak li muk nimi.<sup>30</sup> Tiwan ngbaan mɔmɔk pu le dulnyaa wee ni aanib bi kaa dii Uwumbor aasan na aanimbil man. Nite Uwumbor nyi ke ni ban tiwan ngbaan.<sup>31</sup> Ni cha ninimbil li man Uwumbor aanaan pu, le u ga di tiwan ngbaan mɔmɔk kpee nimi.”

### Paacham aawankpal

(Matiu 6.19-21)

<sup>32</sup> “Maanib bi bi siib na, ni taa san ijawaan man. Nite Uwumbor le ban ke u tii nimi nnaan. Waageehn le na.<sup>33</sup> Ni kooh naah kpa tiwan ni na man, ki di ḷimombil ngbaan tii bigiim, aan ki li kpa ḷimombil ḷi kaan doo na. Ni ga li kpa liwankpal li kaan doo na paacham. Unaayuk ubaa aan buen nima. ḷikpaambil aan li bi nima ki bii ni.<sup>34</sup> Saawankpal aah bi nin chee na, aasui mu bi nima chee la.”

### Bitutum bi si kii na aayataŋakl

<sup>35</sup> “Ni gor nibaa pu man, ki see nimi aakaryaa mam,<sup>36</sup> ki li bi ke bitutum bi si kii buyoonn bidindaan ga nya tibɔndinn aajikaar aajim ni, ki fuu ni na. U yaa nan fuu ni ki kpaar jaaleŋ kan, libuul ngbaan ni le bi ga chuu piir tii u.<sup>37</sup> Bitutum bi lik bidindaan aah ga fuu ni pu na, Uwumbor aanyoor bi bi pu. M tuk nimi mbamɔn la, u ga cha bi kal, ki ga di tijikaar siin binimbiin ni.<sup>38</sup> U yaa fuu ni kinyetaasiik, bee u yaa fuu ni likoojawiil yoonn, ki kan ke bi gor kan, Uwumbor aanyoor bi bi pu la.<sup>39</sup> Ni nyi ke udichadaan yaa ba nyi buyoonn unaayuk ga fuu ni na kan,

<sup>12:25</sup> : Bee “...aan ki di lisaj libaa kpee waafɔfɔk pu uu?”

waa ba ga doon ki geen, u ba ga li ka lik, unaayuk ngbaan taa koo ni waadichal ni.  
<sup>40</sup> Ni mu gor man; ba pu? buyoonn naan li dak ke m ga gir ni na, n-yoonn ngbaan le m ga gir ni.”

### **Ututunn u jan na, ni u kaa jan na**

(Matiu 24.45-51)

<sup>41</sup> Le Piita baa Yesu, “Ndindaan, aa ḥakl liyatapakl ngbaan ki tii timi baanja le aan aa ḥakl ki tii binib momok la?”

<sup>42</sup> Le Tidindaan bui u, “Uyidaan ubaa yaa tii waatutunn ubaa tininkpir ke u li lik waachiln ni aanib ki tii bi tijikaar naah neer buyoonn na kan, ututunn ngbaan ga ḥa kinye ki li kpa nlan, ki li tun waatuln mbamom? <sup>43</sup> Udindaan yaa nan fuu ni ki mui waatutunn ḥani uma udindaan aah ban pu na kan, Uwumbor aanyoor bi ututunn ngbaan pu. <sup>44</sup> M tuk nimi mbamom la, u ga tii u tininkpir u li lik waawan momok. <sup>45</sup> To, ututunn ngbaan mu yaa dak usui ni ke udindaan ga yunn, ki yaa piin ki gbaa ututunjeen aatɔtiib, bijab ni bipiib momok, ki ji ki nyu ndaan gbii kan, <sup>46</sup> udindaan ga gir ni buyoonn waan li dak ke u ga gir ni na, ki ga gbaa u ḥinaalab mbamom, ki ga di u ḥa binib bi yii waamob na aah bi nin chee na.

<sup>47</sup> “Ututunn u nyi udindaan aah ban pu na, kaa gor, kaa ḥani kina na, bi ga gbaa u sakpen. <sup>48</sup> Ututunn u kaa nyi udindaan aah ban pu na, ki tun lituln li neer ḥinaalab aagbaan na kan, bi ga gbaa u siib la. Uwumbor yaa tii unii nlan sakpen kan, u ga li ban ke u di nlan ngbaan tun litunyaan jer biken. Uwumbor yaa tii unii tininkpir kan, u ga li ban ke udaan ngbaan tun ki jer biken aah tun pu na.”

### **Binib aah ga yakr tɔb chee Yesu pu pu na**

(Matiu 10.34-36)

<sup>49</sup> “M dan m nan tuur mmii dulnyaa wee ni. Mu yaa puun gaal kan, m ba gee. <sup>50</sup> M ga ji falaa ki ti nyaj. Nsui aan

doon see m jin falaa ngbaan ki ti doo. <sup>51</sup> Maah dan dulnyaa wee ni na, ni dak ke nima le ga cha binib momok li kpaan kimɔbaan aa? Aayii. M tuk nimi la, m pu le bi ga yakr tɔb chee. <sup>52</sup> Dandana ki joo cha, binib biŋmu yaa bi lidichal libaa ni kan, bi ga yakr tɔb chee la. Bitaa ga kpak bilee bi gur na. Bilee ngbaan mu ga kpak bitaa na. <sup>53</sup> Uja ga yakr ujapɔon chee; japoɔon mu ga yakr ute chee; upii mu ga yakr ubisal chee; bisal mu ga yakr una chee; upii mu ga yakr ubipuu chee; bipuu mu ga yakr uchapii chee.”

### **Baa bee Uwumbor aah ḥani pu na**

(Matiu 16.2-3)

<sup>54</sup> Le Yesu bui kinipaak ngbaan, “Ni yaa kan utaal yun ki bɔln liwilir wɔb kan, libuul ngbaan ni le ni ga bui ke, ‘Utaal ga nu la,’ le u nu. <sup>55</sup> Libuln yaa nyan ni ḥɔjangii aasikakl wɔb kan, le ni ga bui ke, ‘Kitoton koo a,’ le ki koo. <sup>56</sup> Nimi biŋ-majmannim, kitin ni paacham pu le cha ni beer naah ga li bi pu na. Ba ḥa naa bee Uwumbor aah ḥani pu dandana na?”

### **Aa yaa koo unii aataani ni kan, chuu utsaal mala**

(Matiu 5.25-26)

<sup>57</sup> “Ba ḥa naa ḥmaa dakl lik ki bee ni ḥan na? <sup>58</sup> Aa ni unii yaa kpa tibor, u ban u di ti buen bibɔjirb chee kan, chuu utsaal mala, u taa kee fuu bi chee, ki taa di si ḥa biŋaal ni, bi di si ḥa kiyondiik ni. <sup>59</sup> M tuk si la, saan nya nima ki nan saa buyoonn aa ga pa kooti ni aamombil momok doo na.”

### **Kpeln nimi aabimbin man**

**13** N-yoonn ngbaan le binib bibaa dan nan bui Yesu ke Galilee aatiŋ aanib aah nan bi toor kitork tii UWUMBOR na, Pailat nan ku bi. <sup>2</sup> Le Yesu baa bi, “Ni dak ke Galilee aatiŋ aanib ngbaan nan ye titunwanbirdam ki jer Galilee yaab biken aa? Nima le cha u ku bi ii? <sup>3</sup> Aayii.

M tuk nimi la, ni yaa kaa kpeln nimi aabimbin kan, ni mɔmɔk ga kpo kina la.<sup>4</sup> Tɔ, libimbifɔŋ aah nan lir ki ku bijab kipiik ni biniin Siloam aatiŋ ni na, ni dak ke bi nan kpa taani ki jer Jerusalem aanib mɔmɔk aa? <sup>5</sup> Aayii. M tuk nimi la, ni yaa kaa kpeln nimi aabimbin kan, ni mɔmɔk ga kpo kina la.”

### **Busub bu kaa lu ɲisubil na**

<sup>6</sup> Le u ɲakl bi liyataŋjakl ke, “Uja ubaa nan bun busub bubaa waasaak ponn ni; ki joo cha, le u dan nan lik ke ɲisubil bi aa ɲaa bi, le kaa kan nibaa. <sup>7</sup> Le u bui waatutunn, ‘Tjibin ɲitaa le na, le m choo m nan lik busub bue. Maa kan lisubil libaa. Gaa bu lii. Taa cha bu li si ki gaa kitij ɔ̄li.’ <sup>8</sup> Le ututunn ngbaan bui u, ‘Ndindaan, di cha bu libiln lee, m gbii bu taab, ki ban tinaabin ki bil bu. <sup>9</sup> Libiln li choo na, bu yaa lun kan, ni ɲan. Bu yaa kaa lun kan, aa gaa bu lii.’”

### **Yesu aah cha upii u boo gui na pɔɔk pu na**

<sup>10</sup> Juu yaab aakpaakool daal le Yesu bi mmeen aadiik ni, ki bi tuk binib Uwumbɔr aabor. <sup>11</sup> Le upii ubaa bi nima. Tiyayaar le joo u ki ɲa u ubun ɲibin kipiik ni ɲiniin. U boo gui, kaa ɲmaa yaar. <sup>12</sup> Yesu aah kan u na, le u yin u ke u dan u chee, le ki bui u, “Upii, aa kan aabaa saaween chee,” <sup>13</sup> le ki di unjaal paan u pu. Libuul ngbaan ni le u yaar, le ki nyuŋ Uwumbɔr.

<sup>14</sup> Yesu aah cha upii ngbaan pɔɔk likpaakool daal na, nima le cha mmeen aadiik ni aaninkpel gee lijuul Yesu pu, le ki bui kinipaak ngbaan, “Iwiin iloop le bi likpaakool aakaasisik ni, ti li tun lituln, ki cha likpaakool daal. Nima pu na, ni dan iwiin iloop ngbaan aakaasisik ni aan u cha ni pɔɔk. Ni taa ki dan nan ban laafee likpaakool daal.”

<sup>15</sup> Le Tidindaan bui u, “Nimi bijmaj-mannim, likpaakool daal kan, ni ga chuu

gbiln nimi aanaaja, bee nimi aabon, ki di u buen nkpen ni ke u ti nyu nnyun. <sup>16</sup> Upii wee ye Abraham aayaabil la, le kinimboŋ buu u ɲibin kipiik ni ɲiniin le ki ɲa u u boo gui na. Maah chuu buur u likpaakool daal na, naa ɲan aa?” <sup>17</sup> Yesu aah len kina na, le inimɔɔn chuu binib bimɔk kpak u kinikpakpak na. Waah tun lijinjiir aatun pam pu na, le kinipaak ngbaan mɔmɔk nan kpa mpopiin pam.

### **Tisufar aabil aayataŋjakl**

(Matiu 13.31-32; Mak 4.30-32)

<sup>18</sup> Le Yesu baa bi, “Uwumbɔr aanaan naahn ba? M ga di ba ki di ɲaq mu? <sup>19</sup> Mu naahn linaanyiimbil li uja ubaa nan di bun waakpaab ni na la. Le li muun ki ɲa busub. Le inyoон i laani paacham na dan nan ter yaadil bu aabon pu.”

### **Boroboro aanyɔk aayataŋjakl**

(Matiu 13.33)

<sup>20</sup> Yesu nan ki baa bi, “M ga di ba ki di ɲaq Uwumbɔr aanaan? <sup>21</sup> Mu naahn nnyɔk mu bi joo ɲani boroboro ni aan upii ubaa nan di ɲa boroboro aayon ponn ni na, le boroboro ngbaan mɔk duun.”

### **Naah ga dii pu na**

(Matiu 7.13-14, 21-23)

<sup>22</sup> Le Yesu cha Jerusalem. Waah cha na, le u bɔ dii ntisakpem ni ntiaatiir ni, le ki tuk binib Uwumbɔr aabor. <sup>23</sup> Le unii ubaa baa u, “Ndindaan, binib bi ɲmar na le bi siib aa?”

<sup>24-25</sup> Le Yesu bui bi, “Cha ninimbil li man ni li dii mbisamɔb mu kaa waa na. M tuk nimi la, buyoonn udichadaan na ga nan fii ki laj kidiik na, nee aapuwɔb le binib pam gal bi koo ni, kaan ɲmaa koo ni. Ni ga li si lipaal, ki kpaar jaaleŋ, ki bui ke, ‘Tidindaan, chuu piir tii timi.’ Le u ga bui nimi, ‘Maa nyi nimi. Ni nyan ni la chee?’ <sup>26</sup> Le ni ga bui ke, ‘Ti ni si le nan kpaan ji ki nyun. Aa nan

tuk binib Uwumbor aabor timi aatiq ni la.’<sup>27</sup> Le u ga ki bui nimi, ‘M tuk nimi la, maa nyi nimi. Ni nyan ni la chee? Nimi titunwanbirdam, ni momok siir m chee man.’<sup>28</sup> Le u ga jenn nimi. Le ni ga li waa Abraham, ni Aisak, ni Jakob, ni Uwumbor aabonabtiib momok Uwumbor aanaan ni. Ni ga li bi lipaal, ki wii ki njman njinyin nima chee.<sup>29</sup> Binib ga nya liwipuul wob, ni liwilir wob, ni isikakl mok, ki ga li ka ki ji tijikaar Uwumbor aanaan ni.<sup>30</sup> Li pel man, puwob yaab bibaa ga nan ja bisalolm. Bisalolm bibaa mu ga nan ja puwob yaab.”

### **Yesu aah gee Jerusalem aanib pu na** (Matiu 23.37-39)

<sup>31</sup> N-yoonn ngbaan le Farisii yaab bibaa dan Yesu chee, ki nan bui u, “Nya do chee, ki li cha. Ubør Herod ban u ku si la.”

<sup>32</sup> Le Yesu bui bi, “Ni li cha ti tuk ujok ngbaan, ‘Din ni fen le m ga nyan tiyayaar binib ni, ki cha bibum poök. Iwiin itaa daal le maatuln ga doo.’<sup>33</sup> Nima le m cha Jerusalem din, ni fen, ni daalpu. Baan ku Uwumbor aabonabr ubaa nibaa chee, see Jerusalem ponn ni.

<sup>34</sup> “Jerusalem aanib, nsui bii ni pu la. Ni ku Uwumbor aabonabtiib, ki yur waatutum njitakpal ki ku bi. N-yoonn momok le m nan ban m kuun nimi ja mbaa chee ke ukola aah kuuni waakoobi pu ki nani ufeen ni na, le naa kii.<sup>35</sup> Lik, Uwumbor siir cha nimi. M tuk nimi la, naan ki kan mi ki nan saa bundaln ni ga nan bui ke, ‘Uwumbor aanyoor bi unii u choo uma Uwumbor aayimbil ni na pu.’”<sup>8</sup>

### **Yesu aah cha ubun poök pu na**

**14** Juu yaab aakpaakool daal le Yesu nan buen Farisii yaab aaninkpel ubaa do, u ti ji tijikaar. Le bi lik waah ga

ja pu na momok.<sup>2</sup> Le uja u taakpachoo fuukoo nan chuu u na mu bi nima, le ki dan Yesu chee.<sup>3</sup> Le Yesu baa Uwumbor akaal aamomokb ni Farisii yaab, “Timi akaal kii ke unii cha bibum poök lik-paakool daal aa?”

<sup>4</sup> Le baa len tibaa. Le Yesu chuu uja ngebaan ki ti cha waaween doo, ki cha u buen.<sup>5</sup> Le u baa bi, “Unii ubaa aabon, bee waanaaja yaa lir nnyunbun ni lik-paakool daal kan, waan nyan u lik-paakool daal ngbaan aa?”

<sup>6</sup> Le baa ki njmaa len tibaa.

### **Binib bi Uwumbor ga nyuj bi na**

<sup>7</sup> Le Yesu kan ke binib bi dan bi nan ji tijikaar na buen ti kal bininyuum aakakaa chee. Nima le u njak bi liyatankl:<sup>8</sup> “Unii ubaa yaa yin si ke aa dan nan ji u chee tijikaar kan, taa kal bininyuum aakakaa chee. Nibaakan, unii u jer si na ga fuu ni.<sup>9</sup> Le udichadaan ngbaan ga dan nan bui si, ‘Cha uja wee kal do chee.’ Le inimoon ga chuu si. Le aa ga fii ki ti kal uwaatiir aakakaa chee.<sup>10</sup> Unii yaa yin si ke aa dan nan ji u chee tijikaar kan, ti puen kal unii waatiir aakakaa chee. Le udichadaan ngbaan ga dan nan bui si, ‘Njo, nan kal nkakaa mu njan na chee.’ Le binib bimok ji aa chee tijikaar na ga nyuj si.<sup>11</sup> Naatataa le ye ke unii umok nyuj ubaa na, Uwumbor ga sunn u taab. Unii umok sunn ubaa taab na, Uwumbor ga nyuj u.”

<sup>12</sup> Le Yesu bui Farisii yaab aaninkpel u yin u ke u dan nan ji tijikaar na, “Aa yaa ja njim kan, taa yin aajotiib, bee saamaal aanib, bee aanaabitiib, bee aajeen aatotiib bi ye biwankpadam na, ke bi dan nan ji; ba pu? bi mu ga ki yin si ke aa nan ji bi chee tijikaar ki teen.<sup>13</sup> Aa yaa ja njim kan, yin bigiim, ni bitaageeb, ni biwob, ni bijoom, ke bi dan nan ji.<sup>14</sup> Bima le aa kpa nibaa ke bi ki giin tii si. Uwum-

<sup>8</sup>13:35 : Lik Ilahn 118.26.

bør le ga ḥa tinyoor ḥa aa pu. Buyoonn bininyaam ga fikr nkun ni na, le Uwumbør ga tii si saapal.”

### Njim sakpem aayatajakl

(Matiu 22.1-10)

<sup>15</sup> Binib bi ji u chee tijikaar na ponn ni ubaa ḥun waah len pu na, le ki bui u, “Binib bi ga ji tijikaar Uwumbør aanaan ni na, waanyoor bi bi pu la.”

<sup>16</sup> Le Yesu bui u, “Uja ubaa nan bui binib pam ke u ga ḥa tijikaar bi dan nan ji. Le u ḥa tijikaar pam. <sup>17</sup> Tijikaar aajim yoonn, le u tun waatutunn u ti bui bi, ‘Ni ḥeer a. Dan man.’ <sup>18</sup> Waah bui bi kina na, le bi mɔmɔk kpaan yii. Njan yoo na bui u, ‘M daa bukpaab la, ki ban ke m buen ti lik bu aah bi pu na. M ḥa si gafara la.’ <sup>19</sup> Le ubaa mu bui u, ‘M daa inaaja i ko kisaak na kipiik la. M cha m ti lik yaah bi pu na la. M ḥa si gafara.’ <sup>20</sup> Le ubaa mu bui u, ‘M laa kunn upii la, le kaan ḥmaa dan.’

<sup>21</sup> “Le ututunn ngbaan gir kun udin-daan chee, ki ti tuk u bi mɔmɔk aah len pu na. Le lijuul chuu u. Le u bui waatutunn ngbaan, ‘Li cha kinyaŋ ni mala, ki ti yin ni bigiim, ni bitageeb, ni bijoom, ni biwɔb, ke bi dan nan ji.’ <sup>22</sup> Le waatutunn ḥa kina, ki dan nan bui u, ‘Ndindaan, m ḥa saah len pu na. Mpaan gur bi.’ <sup>23</sup> Le udindaan bui u, ‘Li cha isan ni, ki ti gaŋ binib ke bi dan nan ji, aan maadichal gbiin.’ <sup>24</sup> M tuk nimi la, binib bi m nan puen bui bi ke bi dan nan ji na, bi ponn ni ubaa aan lak maajikaar.”

### Unii u kaa ḥmaa yee tiwan mɔmɔk na aan ḥmaa dii Yesu

(Matiu 10.37-38)

<sup>25</sup> Le kinipaak pam dii Yesu. Le u fenn toŋ bi, ki bui bi, <sup>26</sup> “Unii yaa dan u nan dii mi, ki yaa kaa gee mi ki jer waah gee ute ni una, ni upuu, ni waabim, ni unaatiib, ni ukpetiib, ni uninkpatiib, ni waamɔfal pu na kan, waan ḥmaa dii mi.

<sup>27</sup> Unii umɔk kaan yoor waadɔpuinkoo ki dii mi na kan, waan ḥmaa li ye maadidiir.

<sup>28</sup> “Ni ponn ni ubaa yaa ban ke u maa kidifɔfɔŋ kan, u ga puen dakl lik ke waamombil ga fuu aan ḥaan fuu. <sup>29</sup> U yaa piin ki bi maa kidiik, kaa puen dakl lik waamombil aah bi pu na kan, nibaakan, waamombil aan fuu. Le waan ḥmaa maa kidiik ngbaan doo. Binib bimɔk kan na ga laa u, ki bui ke, <sup>30</sup> ‘Uja wee nan piin ki bi maa kidiik, kaan ḥmaa doo.’

<sup>31</sup> “Tɔ, ubɔr u kpa butɔb aajab ḥichur kipiik na yaa ban u buen ti to ubɔr u kpa butɔb aajab ḥichur moninko na butɔb kan, u ga puen dakl lik ke u ga ḥman aan waan ḥman. <sup>32</sup> U yaa nyi ke waan ḥmaa nyaŋ u kan, waah laa bi ni daa na, u ga tun bitutum bi ti tooh u nsan ni, ki bui u ke u pɔɔk ubaa aan bi ti kpokl ki kuln kijaak ngbaan. <sup>33</sup> ḥiyatajak ngbaan aatataa le ye ke aa yaa kaa yee saah kpa nimɔk na kan, saan ḥmaa dii mi.”

### N-yaan aayatajakl

(Matiu 5.13; Mak 9.50)

<sup>34</sup> “Tɔ, n-yaan ḥan la. Mu yaa bii, ki yaa kaa ki mɔ kan, nibaa aa bi ki ga ki ḥmaa ḥa mu aan mu mɔɔk. <sup>35</sup> Mu ḥa yɔli le na. Mu aan ki li kpa nterm tii nibaa. Bi ga di kpir la. U kpa litafal na kan, u ḥun.”

### Kiwakork ki wɔŋ na aayatajakl

(Matiu 18.12-14)

**15** Bilampoogaab ni titunwanbir-dam pam nan bi kuuni Yesu chee ke bi ti pel waah len tibɔr ti na. <sup>2</sup> Le Farisii yaab ni Uwumbør aakaal aamɔmɔk ḥulni u pu ke, “Uja wee gaal titunwanbirdam ki ji bi chee tijikaar.”

<sup>3</sup> Nima pu le Yesu ḥakl bi liyatanjakl,

<sup>4</sup> “Ni ponn ni ubaa yaa kpa ipiih nkub, ubaa yaa wɔŋ kan, u ga di cha ipiih imonko inaa ni kipiik ni iwae i gur na

timoor ni, ki buen ti ban upiih u wɔŋ na, ki ti saa buyoonn u ga kan u na.<sup>5</sup> U yaa ti kan u kan, u ga li mɔɔni, ki di u burj usil, ki chaa kun.<sup>6</sup> U yaa ti fuu linampal kan, le u ga yin ni ujɔtiib ni udoyaab, ki nan bui bi, ‘Maapiih u wɔŋ na, m kan u. Cha ti li mɔɔni man.’<sup>7</sup> Liyatjanjakl lee aatataa le ye ke titunwanbirdaan ubaa yaa kpeln waabimbin kan, paacham yaab ga li mɔɔni unii u kpeln waabimbin na pu, ki jer baah ga li mɔɔni bininyaam imonko inaa ni kipiik ni biewae bi kaa ban bi kpeln baabimbin na pu.’

### ¶imombil ŋi wɔŋ na aayatajanakl

<sup>8</sup> “Upii ubaa yaa kpa tikunabr aamombil kipiik, libaa yaa wɔŋ kan, u ga see karyaa, le ki ŋjal lidichal ni, ki lik mbamɔm ki ti kan li.<sup>9</sup> To, u yaa ti kan li kan, u ga yi ni unaakoontiib ni udoyaab, ki nan bui bi, ‘Maamombil li wɔŋ na, m kan li. Cha ti li mɔɔni man.’<sup>10</sup> Liyatjanjakl lee aatataa le ye ke titunwanbirdaan ubaa yaa kpeln waabimbin kan, u pu le Uwumbor aatuuntiib ga li mɔɔni paacham.”

### Japɔɔn u wɔŋ na aayatajanakl

<sup>11</sup> Yesu nan ki bui bi, “Uja ubaa nan bi ki nan kpa japɔtiib bilee.<sup>12</sup> Le uwaatiir na bui u ke, ‘Nte, yakr maafaal ki di tii mi dandana.’ Le ute yakr bimɔk aafaal ki di tii bi.<sup>13</sup> Iwiin ilee aah jer na, le uwaatiir na kuun waafaal mɔmɔk, ki di buen kitij ki daa na ni. Waah ti bi nima na, le u jin waafaal mɔmɔk yɔl yɔl, le li ti doo.<sup>14</sup> Waah jin ni mɔmɔk ti doo na, le nknon sakpem lir nima chee. Igiin le nan gur joo u.<sup>15</sup> Le u di ubaa ti kpaan kitij ngbaan ni aanii ubaa chee. Le u tun u igbeer chee timoor ni ke u ti li ŋjani i tijikaar.<sup>16</sup> Nkon aah joo u sakpen pu na, u ga ŋmaa ŋmc igbeer ngbaan aajikaar.

Unii ubaa mu aa tii u nibaa.<sup>17</sup> Le u ŋjanlan le ki bui ke, ‘Nte aatutum mɔmɔk ji ki gur. Le nknon ban mu ku mi do chee na.<sup>18</sup> M ga gir kun nte do, ki ti bui u ke, Nte, m koo aa ni Uwumbor mɔk aataani ni.<sup>19</sup> Naa ki ŋjan ke aa yin mi aajapɔɔn. ɻja mi saah ŋjani saatutum pu na.’<sup>20</sup> Le u fii ki cha ute do.

“Waah laa bi ni daa na, le ute waa u, ki san u kinimbaak, le ki san tooh u nsan ni, ki ti di ujaaal kpal u, le ki moor utakpihn.<sup>\*\*</sup><sup>21</sup> Le ujapɔɔn bui u, ‘Nte, m koo aa ni Uwumbor mɔk aataani ni. Naa ki ŋjan ke aa yin mi aajapɔɔn.’<sup>22</sup> Le ute bui waatutum, ‘Li cha mala ki ti voor ni lininkpebokul nyaan na, ki nan di peen u, ki di kibɔmbik ŋjamaan u, ki di ŋjinaataktaj u,<sup>23</sup> ki li joo ni unaabo u filk na, ki nan kɔr u, aan ti ji ki li mɔɔni.<sup>24</sup> M nan nyi ke njapɔɔn umina kpo a, le u bi. U nan wɔŋ a, le m ki kan u.’ Le bi piin ki bi mɔɔni.

<sup>25</sup> “To, ujapɔɔpol na nan bi kisaak. Waah nyan ni kisaak ki peen ni linampal na, le u ŋjun bi gbaa tibar ki gaa ilahn.<sup>26</sup> Le u yin bitutum ponn ni ubaa, le ki nan baa u, ‘Ni ye kinye?’<sup>27</sup> Le u bui u, ‘Aanaal na fuu ni a. Waah fuu ni ni laafee na, le aate cha bi kɔr unaabo u filk na.’<sup>28</sup> Ukpel aah ŋjun kina na, le u gee lijuul, kaa ban u koo ni. Le ute nyan ni lipaal, ki nan gaŋ u ke u koo ni.<sup>29</sup> Le u bui ute, ‘Lik, m tun lituln ŋjibin sakpen le ki tii si, kaa kee yii saamɔb. Le saa po tii mi ujobo ke m ni njɔtiib ji ki li mɔɔni.<sup>30</sup> Aajapɔɔn umina le nan dii bipiidagoob ki ti bii saawangol mɔmɔk doo, le waah fuu ni na, aa kɔr unaabo u filk na ki tii u.’<sup>31</sup> Le ute bui u, ‘Maabo, aa bi m chee n-yoonn mɔmɔk la. Sin le yeh maah kpa tiwan ni na mɔmɔk.<sup>32</sup> Aanaal umina, m nan nyi ke u kpo a, le u bi. U nan wɔŋ a, le m ki kan u. Nima le ni ŋjan ke ti li mɔɔni ki li kpa mpopiin.”

\*\*15:20 : ...moor utakpihn: Israel yaab nan doon tɔb kina le ki mɔk ngeehn.

### Ututunn u kpa nlan na

**16** Tɔ̄, Yesu nan bui waadidiliib, “Uwankpadaan ubaa le nan bi ki kpa ututunn u lik waawan mɔ̄mɔ̄k na. Le bibaa dan nan bii u udindaan aanimbiin ni ke u joo waawan ji la. <sup>2</sup> Le udindaan yin u ki nan baa u, ‘Maah ɔ̄n saabor ti na, ti ye kinye? Mɔ̄k mi saah ɔ̄ maawan pu na mɔ̄mɔ̄k. Saan ki li ye maatutunn.’ <sup>3</sup> Le ututunn ngbaan dak usui ni, ‘Ndindaan ga nyan mi waatuln ni. M ga ɔ̄ kinye? Maan ɔ̄maa ko kisaak. M mu yaa kpalm uwanmeer kan, inimɔ̄on ga li joo mi. <sup>4</sup> M nyi maah ga ɔ̄ pu na, aan ndindaan yaa nyan mi waatuln ni kan, bibaa gaa mi baadichal ni.’ <sup>5</sup> Le u buen ti yin ni binib bi joo udindaan aapɔ̄ln na ke bi dan u chee ubaabaa ubaabaa, le ki baa njan yoo na, ‘Aa joo ndindaan aapɔ̄ln ijə?’ <sup>6</sup> Le u bui u, ‘Nkpan ankora nkub.’ Le u bui u, ‘Yoor saapɔ̄ln aagbaj ki kal mala ki ɔ̄mee ankora piiŋmu.’ <sup>7</sup> Le u baa uken, ‘Si, aa mu joo waapɔ̄ln ijə?’ Le u bui u, ‘Idi bɔ̄tɔ̄ nkub.’ Le u bui u, ‘Yoor saapɔ̄ln aagbaj ki ɔ̄mee bɔ̄tɔ̄ imonko inaa.’ <sup>8</sup> Tɔ̄, ututunn u kaa ɔ̄jan na aadindaan aah ɔ̄n ni pu na, le u pak u, ke waah ɔ̄na pu na, u kpa nlan la. Naatataa le ye ke dulnyaa wee aanib kpa nlan baabor ni ki jer Uwumbor aanib aah kpa pu na.

<sup>9</sup> “M tuk nimi la, ni di dulnyaa wee ni aawankpal ter bigiim, aan ni yaa doo kan, ni ga koo nkookoo yaan mu ga li bi ki cha n-yoonn mu kaa kpa ndoon na ni. <sup>10</sup> Unii u tun lituwaatiir mbamɔ̄m na, u ga tun litusakpeln mu mbamɔ̄m. Unii u kaa tun lituwaatiir mbamɔ̄m na, waan tun litusakpeln mu mbamɔ̄m. <sup>11</sup> Ni yaa kaa joo dulnyaa wee ni aawankpal mbamɔ̄m kan, ɔ̄ma ga di Uwumbor aatuln ɔ̄ ja aajaal ni? <sup>12</sup> Ni yaa kaa ɔ̄ja dulnyaa wee ni aawan mbamɔ̄m kan, Uwumbor aan tii nimi paacham aawan.

<sup>13</sup> “Unaagbija ubaa aan ɔ̄maa tun lituln ki tii dindatiib bilee. U ga li nan

ubaa, le ki li gee uken. U ga li si ubaa aachaŋ ni, le ki lik uken fam. Naan ɔ̄maa li dii Uwumbor ni liwankpal mu.”

### Yesu aah ki len pu na

(Matiu 11.12-13;  
5.31-32; Mak 10.11-12)

<sup>14</sup> Le Farisii yaab, bi gee ɔ̄nimobil sakpen na, ɔ̄n Yesu aah len tibor timina mɔ̄mɔ̄k pu na, le ki laa u. <sup>15</sup> Le u bui bi, “Nimi le ban ke binib li dak ke ni ye bininyaam. Uwumbor le nyi nisui ni aah bi pu na. Binib aah nyuŋni tiwan ni na ye fam le Uwumbor chee.

<sup>16</sup> “Uwumbor aakaal ni waabɔ̄nabtiib aaliin nan joo binib ki nan saa Jɔ̄nn u nan muini binib nnyun ni na aayoonn. Waayoonn ngbaan ki joo cha, le bi mooni Uwumbor aanaan aabɔ̄nyaan tee. Le binib mɔ̄k aabɔ̄j koo Uwumbor aanaan ni mpɔ̄on. <sup>17</sup> Uwumbor aakaal mubaa aah ga ɔ̄ yɔ̄li pu na, ni pɔ̄ ki jer paacham ni taab aah ga jer pu na.

<sup>18</sup> “Uja umɔ̄k jenn upuu lii ki ki yoor upii uken na, uja ngbaan kpalm udagoor la. Upii aachal yaa jenn u lii aan uja uken ki yoor u kan, uja ngbaan mu kpalm udaagoor la.”

### Uwankpadaan ni wanmeer Lasarus aabɔ̄r

<sup>19</sup> “Tɔ̄, uwankpadaan ubaa nan bi, ki peeni tiwanpeenkaan nyaan, ki ji tijikaar ti mɔ̄ na iwiin mɔ̄mɔ̄k. <sup>20</sup> Le uwanmeer ubaa mu nan bi, bi nan yin u ke Lasarus. Le ibusoon joo u. Le bi joo u ti bilni uwankpadaan ngbaan aabisamɔ̄b chee. <sup>21</sup> Le u ban ke u li peei ɔ̄nsaabol ɔ̄ni nyan uwankpadaan ngbaan aateebul paab ki lir kitij na ji. Le ibɔ̄ mu choo nan laskr waabuun ngbaan. <sup>22</sup> Naah joo cha na, le uwanmeer ngbaan nan kpo. Le Uwumbor aatuuntiib dan nan yoor u ki di buen paacham, Abraham chee. <sup>23</sup> Le uwankpadaan ngbaan mu nan kpo. Le binib di u ti sub. Waah kpo na, le u ti

bi mmii mu kaan junn na ni, ki ji falaa sakpen, le ki waan lik paacham, ki waa Abraham dandar, ki waa Lasarus mu bi u chee nima.<sup>24</sup> Le u teen, ‘Nte Abraham, m ji falaa sakpen mmii mue ponn ni; san mi kinimbaak, ki tun Lasarus u ti di ujanbilik tu nnyun ki nan di mee hnlambil aan li sɔɔj.’

<sup>25</sup> “Le Abraham bui u, ‘Maabo, teer ke saah nan bi limɔfal ni na, aa nan bi ji saamɔɔn la. Lasarus mu nan bi ji falaa la. Dandana wee Lasarus aasui sɔɔj do chee na. Aa mu bi ji falaa la.’<sup>26</sup> Libu-usakpeln mu bi ti ni saakaasisik ni, aan binib bi ban bi nyan do ki puur buen aa chee na taa ɔmaa puur, ubaa mu taa nyan aa chee ki dan do chee na.’<sup>27</sup> Le uwankpadaan ngbaan bui u, ‘Nte, ni yaa ye kina kan, m gaj si, tun Lasarus u buen nte do<sup>28</sup> ki ti sur nnaatiib bijmu bi gur na, bi taa dan do chee na, ki mu nan ji falaa wee.’

<sup>29</sup> “Le Abraham bui u, ‘Bi kpa Uwumbor Aagban. Bi li ɔjun kigbanj ngbaan aah len pu na.’<sup>30</sup> Le u bui ke, ‘Nte Abraham, aayii, baan ɔjun; unii yaa fikr nkun ni ki buen bi chee kan, nima le bi ga kpeln baabimbin.’<sup>31</sup> Le Abraham bui u, ‘Bi yaa kaa ɔjun Uwumbor Aagban aah len pu na kan, unii yaa fikr nkun ni kan, nima le aan cha bi kpeln baabimbin.’”

### Taa tɔɔj unii ke u tun titunwanbir

(Matiu 18.6-7, 21-22; Mak 9.42)

**17** Yesu nan bui waadidiliib, “Ntɔɔj ga sil li bi; tibɔbir mu bi unii u tɔɔjni binib ke bi tun titunwanbir na pu.<sup>2</sup> Bi yaa ba tee di kinaasakpej ki di tulleen uneen ni, ki tur u lii nnyusakpem nin chee nyoo na ni kan, ni ba soor ki tii u, ni u tɔɔj maadidiliib ponn ni uwaatiir ubaa u tun titunwanbir.<sup>3</sup> Ni li nyi man.

“Aana aabo yaa ɔja si bakaa kan, sur u. U yaa kpeln waabimbin kan, di cha pinn

u.<sup>4</sup> U yaa ɔja si bakaa nfum mulole nwiin mbaa ponn ni, ki yaa dan aa chee nfum mulole ki nan bui si, ‘M ɔja si gafara la,’ kan, aa di cha pinn u.”

### Gaa Uwumbor ki kii

<sup>5</sup> Le waapkambalb bui u, “Tidindaan, too kpee timi aanaadii pu.”

<sup>6</sup> Le u bui bi, “Ni yaa gaa Uwumbor ki kii siib na kan, ni ga ɔmaa bui busub ngbaan ke bu ɔjb libuul ngbaan ni ki ti ɔnum nnyusakpem ponn ni, le bu ga kii nimi aamɔb.”

### Unaagbiija aatuln aah ye pu na

<sup>7</sup> “Tɔɔ, ni ponn ni ubaa yaa kpa unaagbiija u ko kisaak, bee u kpaa ipiil na kan, u yaa nyan ni kisaak kan, saan bui u libuul ngbaan ni, ‘Nan ji tijikaar.’<sup>8</sup> Aa ga bui u, ‘Na tijikaar ki siin mi aan m ji ki nyu. M yaa jin doon kan, aa mu ga ji ki nyu.’<sup>9</sup> Saanaagbiija yaa ɔja saah ban pu na kan, aa ga doon u ke u ni lituln aa? Aayii.<sup>10</sup> Ni mu bi ke unaagbiija ngbaan aah bi pu na la. Ni yaa ɔja Uwumbor aah tuk nimi ke ni ɔja pu na mɔmɔk kan, ni bui ke, ‘Taa ɔneer ubaa pak timi. Ti po ɔja taah ba ga ɔja pu na la.’”

### Yesu aah cha bikɔndam kipiik pɔɔk pu na

<sup>11</sup> Yesu aah cha Jerusalem na, le u dii Samaria ni Galilee aatiŋ aanaanmɔk.

<sup>12</sup> Waah bi koo kitij kibaa ni na, le bikɔndam kipiik ton u nsan ni, ki si ni daa siib,<sup>13</sup> le ki teen ke, “Tidindaan Yesu, san timi kinimbaak.”

<sup>14</sup> Yesu aah waa bi na, le u bui bi, “Li cha Uwumbor aatotoortiib chee, aan bi ti ɔnj nimi.”

Baah cha na, le bi pɔɔk.<sup>15</sup> Le bi ponn ni ubaa aah kan ke u pɔɔk na, u gir ni, ki nyunjni Uwumbor mpɔɔn pu,<sup>16</sup> le ki nan gbaan Yesu aanimbiin ni, ki doon

u. <sup>17</sup> Uja ngbaan nan ye Samaria<sup>††</sup> aatiŋ aanii la. Le Yesu baa ke, “Maa cha bikondam kipiik pɔɔk la aa? ke biwae na bi la chee? <sup>18</sup> Ubaa aa gir ni u nan nyuŋ Uwumbor see uwawonja ngbaan baanja aa?” <sup>19</sup> le ki bui u, “Saah gaa mi ki kii na, nima le cha aa pɔɔk. Fiin ki li dii saasan.”

### **Uwumbor aanaan aah ga fuu ni pu na (Matiu 24.23-28, 37-41)**

<sup>20</sup> Le Farisii yaab nan baa u, “Uwumbor aanaan ga fuu ni bayoonn?” Le u bui bi, “Uwumbor aanaan aah ga fuu ni pu na, binib aanimbil aan li waa mu. <sup>21</sup> Baan ŋmaa bui ke, ‘Lik, mu bi do,’ kaan ŋmaa bui ke, ‘Mu bi nima la.’ Uwumbor aanaan bi ni ni.”

<sup>22</sup> Le u tuk waadidiliib, “N-yoonn choo, le ninimbil ga li man min Unibon Aabo aah ga gir ni bundaln na, kaan kan. <sup>23</sup> Le bi ga bui nimi, ‘Lik, u bi nima,’ ki ga ki bui ke, ‘Lik, u bi do.’ Ni taa buen ti lik, ki taa dii bi man. <sup>24</sup> Bundaln min Unibon Aabo ga nan gir ni na, ni ga li bi ke uteaal aah moor ki wolni paacham mɔmɔk pu na, aan binib mɔmɔk ga li waa pu na la. <sup>25</sup> Dandana aanib ga yii mi, le m ga ji falaa sakpen waahr, aan ki nin buen paacham aan ki gir ni. <sup>26</sup> Min Unibon Aabo aah ga gir ni buyoonn na ga li bi ke Nowa aayoonn aah nan bi pu na la.<sup>‡‡</sup> <sup>27</sup> Bi nan ji ki nyu, bijab nan yoor bipiib, bipiib mu nan mon bijab, ki ti saa bundaln Nowa nan koo buŋjɔb ni na, le nnyusakpem fuu ni ki nan jin bi mɔmɔk.<sup>¶¶</sup> <sup>28</sup> Tɔ, maah ga gir ni bundaln na mu ga li bi ke Lot aayoonn aah nan

bi pu na la. Bi nan ji ki nyu, ki daa tiwan ki kooh, ki bu tijikaar, ki maa tidir. <sup>29</sup> Bundaln Lot nyan Sodom aatiŋ ni na, le mmii ni chirbil nyan ni paacham ki lir ni, ki ku bi mɔmɔk.<sup>§§</sup> <sup>30</sup> Kina le ni ga li bi bundaln min Unibon Aabo ga nan nya ni mpaan pu na.

<sup>31</sup> “N-yoonn ngbaan, unii yaa bi kidiik paab\* kan, u taa koo waadiik ponn ni u ti yoor waawan ni bi ki ponn ni na. Unii u bi kisaak na mu taa gir kun. <sup>32</sup> Teer man tibor ti nan ja Lot aapuu na.<sup>†</sup> <sup>33</sup> Unii umɔk kaa di ubaa tii Uwumbor na kan, waamɔfal ga bee yɔli la. Unii umɔk di ubaa tii Uwumbor na kan, u ga kan limɔfal li kaa kpa ndoon na. <sup>34</sup> M tuk nimi la, buyoonn m ga gir ni na, binib bilee ga li dɔ kidiik kibaa ponn ni kinyeek. M ga nan yoor ubaa ki di buen, ki cha uken. <sup>35</sup> Bipiiib bilee ga li boo nan idi. M ga nan yoor ubaa ki di buen, ki cha uken. [<sup>36</sup> Bijab bilee ga li bi kisaak. M ga nan yoor ubaa ki di buen, ki cha uken.]”

<sup>37</sup> Le waadidiliib baa u, “Tidindaan, la chee?”

Le u bui bi, “Liwankpol aah bi nin chee na, nangba mam mu kuuni nima chee la.”

### **Ukpopii ni ubɔjir aabɔr**

**18** Le Yesu ɣakl bi liyatajanakl, u di mɔk bi ke ni ɣjan bi li mee Uwumbor n-yoonn mɔmɔk, ki taa cha bitaak-pab yɔl. <sup>2</sup> “Ubɔjir ubaa nan bi kitij kibaa ni, kaa san Uwumbor, ki mu aa pak binib. <sup>3</sup> Ukpopii ubaa mu nan bi kitij ngbaan ponn ni, le ki choo u chee n-yoonn

<sup>††</sup>17:17 : Samaria yaab ni Juu yaab aakaasisik ni aa nan mɔ.

<sup>‡‡</sup>17:26 : Lik Mpiin 6.5-8.

<sup>¶¶</sup>17:27 : Lik Mpiin 7.6-24.

<sup>§§</sup>17:29 : Lik Mpiin 18.20-19.25.

<sup>\*</sup>17:31 : Bi yaa maa kidiik kan, baa di timoor pinn ki, kaa maa lidikokoln. Bi nan di idɔ paan puln tidir paab, le ki di titan pɔr biin. Bi nan maa ɣibimbin le ki taa joi kidiik aapaacham.

<sup>†</sup>17:32 : Lot aapuu nan fenn lik upuwob le ki kpalm n-yaan aatakpali. Lik Mpiin 19.26.

mɔmɔk, ki nan bui u ke u nyan u waadin aaŋaal ni.<sup>4</sup> N-yoonn mɔmɔk le u yiil ni ti yunn. Naah joo cha kina na, le u ti len usui ni, ‘Maa san Uwumbɔr, ki mu aa pak binib.<sup>5</sup> Tɔ, ukpopii wee mu aah choo m chee n-yoonn mɔmɔk ki nan muk mi sakpen pu na, m ga tii u waabamɔn, u taa ki beenin choo nan muk mi kina aan nsui ti nyan mbaa ponn ni.’’

<sup>6</sup> Le Yesu ki bui waadidiliib, “Li ɻun man ubojir u kaa ɻan na aah len pu na.<sup>7</sup> Waah len ke u ga tii u waabamɔn pu na, Uwumbɔr aan tii waanib bi mee u n-yoonn mɔmɔk nwiin pu ni kinyeek na baabamɔn aa? U ga taan aa?<sup>8</sup> M tuk nimi la, u ga tii bi baabamɔn mala. Min Unibɔn Aabo mu yaa nan gir ni kan, m ga kan binib beenin tii mi naadii dulnyaa wee ni ii?”

### Farisii aanii ni ulampoogaar aabɔr

<sup>9</sup> Le Yesu ɻakl liyatajakl tii binib bi dak ke bima le ɻan ki jer unibɔn mɔmɔk, kaa lik pak ubaa na ke,<sup>10</sup> “Bijab bilee nan koo Uwumbɔr Aadichal ni ke bi ti mee Uwumbɔr. Ubaa nan ye Farisii aanii la, uken mu nan ye ulampoogaar.<sup>11</sup> Farisii aanii na nan sil ubaa ki mee Uwumbɔr ki bui ke, ‘Uwumbɔr, m doon si ke maa bi ke binib mɔmɔk aah bi pu na. Maa kpa iniman, kaa tun lituln li kaa ɻan na, kaa gɔr kidagook, kaa bi ke ulampoogaar umina aah bi pu na.<sup>12</sup> Lik-paakool mɔmɔk ponni, m lulni bumɔb iwiin ilee la. Maah kan tinyoor timɔk na, m yakr nfum kipiik ki nyan tibaa tii si.’

<sup>13</sup> “Ulampoogaar ngbaan nan sil dandar, kaa kaa u waan lik paacham. U nan po si jik uyil, le ki bui ke, ‘Uwumbɔr, san mi titunwanbirdaan kinimbaak,’ le ki siir kun.<sup>14</sup> M tuk nimi la, Uwumbɔr len ke ulampoogaar ngbaan aabɔr le ɻan, waa len ke Farisii aanii ngbaan aabɔr ɻan; ba pu? unii umɔk nyuŋ ubaa na, Uwumbɔr ga sunn u taab. Unii umɔk sunn ubaa taab na, Uwumbɔr ga nyuŋ u.”

### Yesu aah ɻa Uwumbɔr aanyoor ɻa mbim pu pu na (Matiu 19.13-15; Mak 10.13-16)

<sup>15</sup> Le binib bibaa joo ni mbipɔm, ki di dan Yesu chee, ki ban ke u di uŋaal paan bi pu. Waadidiliib aah kan kina na, le bi kae bi.<sup>16</sup> Le Yesu yin mbim ngbaan ke bi dan u chee, le ki bui waadidiliib, “Cha mbim ngbaan dan m chee man. Taa ki jenn bi man. Binib bi aabimbin bi ke mbim aah bi pu na, bima le yeh Uwumbɔr aanaan.<sup>17</sup> M tuk nimi mbamɔn la, unii umɔk kaa gaa Uwumbɔr aanaan ke ubo aah gaal tiwan pu na aan koo mu ni.”

### Yesu aah tuk uwankpadaan ubaa pu na

(Matiu 19.16-30; Mak 10.17-31)

<sup>18</sup> Uyidaan ubaa nan baa Yesu, “Umɔmɔkr nyaan, m ga ɻa kinye ki kan limɔfal li kaa kpa ndoon na?”

<sup>19</sup> Le Yesu baa u, “Ba pu aa yin mi ke Umɔmɔkr nyaan? Ubaa aa ɻan, see Uwumbɔr baanja.<sup>20</sup> Aa nyi Uwumbɔr aakaal: ‘Taa gɔr kidagook; taa ku binib; taa su kinaayuk; taa li ye nnyamɔn aaseeraadaan; li pak aate ni aana.’”

<sup>21</sup> Le u bui u, “M joo nkaal mumina mɔmɔk tibir ni la.”

<sup>22</sup> Yesu aah ɻun kina na, le u bui u, “Tiwan nibaa le gur. Kooh saah kpa tiwan ni na mɔmɔk, ki di ɻimombil ngbaan tii bigiim, aan ki li kpa liwangol paacham, aan ki dan nan dii mi.”<sup>23</sup> Waah ɻun kina na, le ni ɻa u mpombiin sakpen; ba pu? u nan kpa liwankpal pam.

<sup>24</sup> Yesu aah kan kina na, le u bui ke, “Ni pɔɔ sakpen binib bi kpa liwankpal na koo Uwumbɔr aanaan ni.<sup>25</sup> Uwankpadaan aah ga koo Uwumbɔr aanaan ni pu na, ni pɔɔ ki jer laakumii aah ga koo seerkaa aabolni pu na.”

<sup>26</sup> Le binib bi ɻun kina na bui ke, “Ni yaa ye kina kan, ɻjma ga tee ɻmar?”

<sup>27</sup> Le Yesu bui ke, “Tiwan ni pcc binib chee na aa pcc Uwumbor chee.”

<sup>28</sup> Le Piita bui u, “Tima kan, ti nan di taah kpa nimok na ki di lii, ki dii si la.”

<sup>29</sup> Le Yesu bui bi, “M tuk nimi mbamɔn la, unii umok di cha waadichal, bee upuu, bee unaabitiib, bee ute, bee una, bee waabim, Uwumbor aanaan pu na kan,<sup>30</sup> u ga kan ki jer waah di cha tiwan nimok na sakpen dandana wee. N-yoonn mu choo na, u ga nan kan limofal li kaa kpa ndoon na.”

### Yesu aah ki len waakun aabɔr taataa pu na

(Matiu 20.17-19; Mak 10.32-34)

<sup>31</sup> Yesu nan di waadidiliib kipiik ni bilee na nyan n-gbaan, le ki ti bui bi, “Li pel man, ti yaa fuu Jerusalem kan, bi ga ḥja min Unibon Aabo ke Uwumbor aabɔn-abtiib aah nan ḥjme ke bi ga nan ḥja mi pu na mɔmok. <sup>32</sup> Bi ga di mi ḥja binib bi kaa ye Juu yaab na aajaal ni, bi ti ḥja mi mbɔnyun, ki yook mi, ki teei timɔɔtan ḥjani m pu,<sup>33</sup> ki lue mi ḥjinaalab, ki ga ku mi. Iwiin itaa daal le m ga fikr nkun ni.”

<sup>34</sup> Le baa bee iluin imina aatataa. Uwumbor le bɔr yaatataa. Nima le baa bee waah len pu na aatataa.

### Yesu aah likr ujoon aanimbil pu na

(Matiu 20.29-34; Mak 10.46-52)

<sup>35</sup> Le Yesu aah peen Jeriko aatiŋ ni na, ujoon ubaa ka nsan aamɔgbeln, ki mee binib tiwan. <sup>36</sup> Le u ḥjun kinipaak aah choo pu na, ki baa ke, “Ba ḥja?”

<sup>37</sup> Le bi bui u, “Yesu u ye Nasaref aatiŋ aanii na le choo.”

<sup>38</sup> Le u teen ke, “Yesu, u ye Ubɔr David aayaabil na, san mi kinimbaak.”

<sup>39</sup> Le binib bi loln Yesu pu nsan na kae u ke u ḥmin. Le u moo tar, “Ubɔr David aayaabil, san mi kinimbaak.”

<sup>40</sup> Le Yesu sil nsan ni, le ki bui bi, “Li joo ni u man.” Waah duun ni u na, le Yesu baa u,<sup>41</sup> “Aa ban ba?”

Le u bui u, “Ndindaan, m ban ke aa likr nnimbil le tii mi.”

<sup>42</sup> Le u bui u, “Aa likr a. Saah gaa mi ki kii na, nima le cha aanimbil likr.”

<sup>43</sup> Libuul ngbaan ni le unimbil likr, le u dii u, le ki nyuŋni Uwumbor. Binib ngbaan mɔmok aah kan kina na, le bi pak Uwumbor.

### Yesu aah tuk bilampoogaab aaninkpel pu na

**19** Yesu nan koo Jeriko aatiŋ ni,  
ki bɔ dii ki ponn ni.<sup>2</sup> Uja ubaa  
nan bi nima, bi nan yin u ke Sakeus,  
u ye bilampoogaab aaninkpel, ki mu  
ye uwankpadaan la.<sup>3</sup> Le u ban ke u  
kan Yesu aah bi pu na, ki mu ye kini-  
genceŋ. Kinipaak ngbaan pu, waa ḥjmaa  
kan Yesu.<sup>4</sup> Le u san ki loln kinipaak ng-  
baan pu nsan, le ki ti jon likakaln aasub  
pu ke u li waa Yesu aah ga jer nima chee  
pu na.<sup>5</sup> Yesu aah nan fuu ni nima chee  
na, le u waan lik, ki bui u, “Sakeus, sunn  
ni mala. Din, m ga doon aado.”

<sup>6</sup> Le u sunn ni mala, ki gaa u, ki kpa  
mpopiin pam.<sup>7</sup> Kinipaak ngbaan aah  
kan ke u koo Sakeus do na, le bi mɔmok  
ḥjul u pu, ke u buen titunwanbirdaan do  
la.

<sup>8</sup> Tɔ, Sakeus nan fii sil, ki bui u, “Ndin-  
daan, lik, m ga di maawankpal ligeln tii  
bigiim la. Maah nan jin binib bi aawan  
na, m ga giin kina nfum munaa le ki di  
tii bi.”

<sup>9</sup> Le Yesu bui u, “Din le lidichal limina  
aanib ḥmar; ba pu? aa mu ye Abraham  
aayaabil la.<sup>10</sup> Min Unibon Aabo dan m  
nan ban binib bi wɔŋ na ke bi ḥmar la.”

**Bitutum aah joo  
bidindaan aapiin pu na**  
(Matiu 25.14-30)

<sup>11</sup> Yesu nan ḥakl binib bi ḥun tibor timina na liyatāŋakl, bi taa li dak ke waah peen Jerusalem na Uwumbor aanaan ga fuu ni libuul ngbaan ni. <sup>12</sup> U nan bui bi, “Uyidaan ubaa nan ban u buen kitij ki daa na ni, u ti ji nnaan ki gir ni. <sup>13</sup> Le u yin waatutum kipiik, le ki di salmaa aamombil kipiik, ki di yakr bi ubaabaa, le ki bui bi, ‘Li joo tiir kitir man, ki ti saa buyoonn m ga nan gir ni na,’ le ki buen. <sup>14</sup> Le waatij ni aanib nan nan u, kitun binib ke bi paan u pu ki ti bui uborkpaan na, ‘Taa ban ke uja ngbaan le ye timi aabor.’

<sup>15</sup> “Le u jin nnaan ngbaan, le ki gir kun, ki yin waatutum bi u nan tii bi ḥimobil ngbaan na, ke bi dan u chee, aan u lik bimok aah tiir kitir ki kan tinyoor pu na. <sup>16</sup> Le njan yoo dan nan bui u, ‘Ndindaan, saah nan tii mi limomobil libaa li na, m kan tinyoor ḥimobil kipiik ki kpee.’ <sup>17</sup> Le u bui u, ‘Nfaan. Aa ye ututunn nyaan la. Saah joo tiwan waatir mbamom na, m ga ḥa si ntisakpem kipiik ni aaninkpel la.’ <sup>18</sup> Le lelee yoo mu dan nan bui u, ‘Ndindaan, aa nan tii mi limomobil libaa la. M kan tinyoor ḥimobil ḥijmu le ki kpee.’ <sup>19</sup> Le u bui u mu, ‘M ga ḥa si ntisakpem mujmu ni aaninkpel la.’

<sup>20</sup> “Le uken na mu dan nan bui u, ‘Ndindaan, lik, saamombil le na. M nan di likekegeln le poo li, ki di bil. <sup>21</sup> Aa ye unii u chur binib mpɔɔn na la. Aa gaal saah kaa yeh tiwan ni na, ki chee saah kaa nan bun tijikaar ti na. Nima le m san si ijawaan.’ <sup>22</sup> Le u bui u, ‘Si ututunn u kaa ḥan na, saah len pu na, nima le bii si. Aa bui ke aa nyi ke m ye unii u chur binib mpɔɔn na ki gaal maah kaa yeh tiwan ni na, ki chee maah kaa nan bun tijikaar ti na. <sup>23</sup> Saah nyi kina na, ba ḥa saa

nan di maamombil ti bil banki ponn ni? Maah fuu ni na, m ba ga kan maamombil ni tinoor ki kpee,’ <sup>24</sup> le ki bui binib bi si u chee na, ‘Chuu gaa waamombil libaa ngbaan man, ki di kpee ututunn u joo ḥimobil kipiik na.’ <sup>25</sup> Le bi bui u, ‘Tidindaan, u kpa ḥimobil kipiik la.’ <sup>26</sup> Le u bui bi, ‘M tuk nimi la, unii umok kpa na, bi ga kpee u. U kaa kpa na, bi ga chuu gaa waah kpa ni pokaa na. <sup>27</sup> To, maadim bi kaa nan ban ke m li ye baabor na, li joo ni bi do chee na, ki nan ku bi nnimbiin ni.”

**Jerusalem aanib aah nyuj Yesu pu na**

(Matiu 21.1-11; Mak  
11.1-11; J̄nn 12.12-19)

<sup>28</sup> Yesu aah ḥakl bi liyatāŋakl ngbaan ti doo na, le u loln bi pu nsan ki cha Jerusalem. <sup>29</sup> Waah nan peen ni Befej ni Betani aatim mu bi lijool li bi yin li ke Olif aasui aajool paab na, <sup>30</sup> le u tuk waa-didiliib ponn ni bilee, “Li cha man naah si gbok kitij ki na. Ni yaa koo ki ponn ni kan, ni ga kan ubon u laa diin na si gbin. Ubaa aa kee dij u pu. Chuu gbiln u, ki li joo ni u m chee man. <sup>31</sup> Unii ubaa yaa baa nimi, ‘Ba ḥa ni chuu gbiln u?’ kan, ni bui u, ‘Tidindaan le ban u.’”

<sup>32</sup> Yesu aah tun bi pu na, le bi buen, ki ti kan ubon u laa diin na waah tuk bi ke bi ga kan pu na. <sup>33</sup> Baah bi gbilni u na, le binib bi yeh u na baa bi, “Ba ḥa ni bi gbilni ubon ngbaan?”

<sup>34</sup> Le bi bui bi, “Tidindaan le ban u,” <sup>35</sup> le ki joo ni u Yesu chee, ki di baakeken paan u pu, ki di Yesu dij u pu. <sup>36</sup> Le waah cha na, kinipaak ngbaan di baakeken ter nsan ponn ni.

<sup>37</sup> Le u peen Jerusalem, ki fuu baah sunni Olif aasui aajool nin chee na. Baah fuu nima chee na, le kinipaak kimak dii u na piin ki bi mɔɔni. Baah kan u tun lijinjiir aatun mɔɔk pu na, le bi pak Uwumbor mpɔɔn pu, <sup>38</sup> ki bui ke, “Uwumbor aanyoor bi Uborkpaan u choo waayimbil

ni na pu. Lifuur bi paacham. Ni li nyujni Uwumbor paacham man.”

<sup>39</sup> Le Farisii yaab bi bi kinipaak ngbaan ponn ni na bibaa bui Yesu, “Umɔmɔkr, tuk saadidiliib ngbaan ke bi kpa kifuuk.”

<sup>40</sup> Le Yesu bui bi, “M tuk nimi la, bi yaa ḥmin kan, ḥitakpal ḥimina ga li tar la.”

### Yesu aah wii Jerusalem aanib aafalaa u choo na pu na

<sup>41</sup> Yesu aah peen Jerusalem aatiŋ na, le u waa ki, ki wii sakpen ki pu, <sup>42</sup> ki bui ke, “Jerusalem aatiŋ aanib, ni yaa ba nyi nsuudoon aasan din kan, ni ba ga li ḥan ki tii nimi. Dandana wee, mu bɔr ke ninimbil taa li waa mu. <sup>43</sup> Buyoonn Uwumbor ban u ter nimi na, ni yii a. Nima le nimi aadim ga nan gob nimi aatiŋ, ki yuu laskr kaagoln pu, <sup>44</sup> ki kuln ni mɔmɔk, ki gbaa wii nimi aadir mɔmɔk. Tidir ngbaan aatakpali ḥilee aan ki li bi ki tok tɔb pu.”

### Yesu aah toor Uwumbor Aadichal pu na

(Matiu 21.12-17; Mak 11.15-19; Jɔnn 2.13-22)

<sup>45</sup> Yesu nan koo Uwumbor Aadichal ponn ni, le ki jenn nyan binib bi kooh tiwakor na, <sup>46</sup> le ki tuk bi, “Ni ḥmee Uwumbor Aagbar ni ke Uwumbor len ke, ‘Bi ga yin maadichal ke Mmeen Aadichal;’ tɔ, nimi le ḥa li bififiirb aakakaa chee.”\*

<sup>47</sup> Iwiin mɔmɔk Yesu nan bi Uwumbor Aadichal ponn ni, ki tuk binib Uwumbor aabɔr. Le Uwumbor aatotoorninkpiib, ni Uwumbor aakaal aamɔmɔkb, ni Juu yaab aaninkpiib ka ki kpokl baah ga ḥa pu ki ku Yesu na, <sup>48</sup> kaa ḥmaa kan baah ga ku u pu na; ba pu? binib ngbaan

mɔmɔk aanimbil man ke bi ḥun waah len pu na.

### Baah baa Yesu waatuln pu pu na

(Matiu 21.23-27; Mak 11.27-33)

**20** Kitaak kibaa daal, le waah bi Uwumbor Aadichal ni ki tuk binib Uwumbor aaliin, ki mooni tibɔnyaan tee na, le Uwumbor aatotoorninkpiib, ni Uwumbor aakaal aamɔmɔkb, ni Juu yaab aaninkpiib dan u chee, <sup>2</sup> le ki nan baa u, “Aa kpa nsan ke aa ḥa saah ḥani pu na aa? ḥma tii si nsan ngbaan? Tuk timi.”

<sup>3</sup> Le u bui bi, “M mu ga baa nimi mbaan. <sup>4</sup> Jɔnn aah nan muini binib nnyun ni na, ḥma nan tii u nsan? Uwumbor aan binib? Tuk mi man.”

<sup>5</sup> Le bi kpokl tɔb, “Ti yaa bui ke Uwumbor le nan tii u nsan kan, u ga baa timi ke ba ḥa taa nan gaa u ki kii. <sup>6</sup> Ti yaa ki len ke binib le tii u nsan kan, binib ngbaan mɔmɔk ga mae timi ḥitakpal; bi mɔmɔk len ke Jɔnn nan ye Uwumbor aabɔnabr la.” <sup>7</sup> Nima le bi bui Yesu ke baa nyi udaan u tii Jɔnn nsan na.

<sup>8</sup> Le Yesu bui bi, “M mu aan tuk nimi maah kpa nsan pu ki ḥani maah ḥani pu na.”

### Bikpaab bi kaa ḥan na aayataŋjaki

(Matiu 21.33-46; Mak 12.1-12)

<sup>9</sup> Le u ḥakl binib ngbaan liyatanaŋk, “Uja ubaa nan naan kisaak, ki ḥum isui i lu ḥisubil na ki ponn ni, le ki yin bikpaab bibaa, ki di kisaak ngbaan ḥa biŋaal ni ke bi li lik ki. Isui ngbaan yaa nan lun ḥisubil kan, bi ker tii u, aan ki ker bibaa mu. Waah ḥa kina na, le u siir ki buen kiṭij ki daa na ni, ki ti yunn nima. <sup>10</sup> Buyoonn ḥisubil ngbaan nan puir na, le u di unaagbiija ubaa tun bikpaab ngbaan chee ke bi tii ni u kisaak ngbaan ponn ni aasubil. Le bi gbaa u, ki giin ni u, kaa

\*19:46 : Lik Aisaya 56.7; Jeremia 7.11.

tti u nibaa.<sup>11</sup> Le u ki di unaagbija uken tun bi chee. Le bi ti gbaa u mu, ki yook u, le ki giin ni u, kaa tii u nibaa.<sup>12</sup> Le u ki tun unaagbija tatar bi chee. Le bi ti gbaa u mu, ni ti ja u iween, le ki jenn nyan u nima.<sup>13</sup> Le usadaan ngbaan bui ke, ‘M ga ja kinye? M ga di maabogeehn le tun bi chee. Nibaakan, bi ga pak uma.’<sup>14</sup> Le bikpaab ngbaan aah kan waabo ngbaan choo na, le bi kpokl tɔb, ‘Uma le ye waafaajil. Cha ti ku u man, aan ki ji waafaal.’<sup>15</sup> Le bi chuu u, ki di nyan n-gbaan, le ki ti ku u.

“Kina pu na, usadaan ngbaan ga ja bi kinye?<sup>16</sup> U ga dan nan ku bikpaab ngbaan, ki di kisaak ngbaan tii bikpaab biken.”

Kinipaak ngbaan aah ḥun kina na, le bi bui ke, “Uwumbor taa cha ni pii bi.”

<sup>17</sup> Le Yesu lik bi, ki bui bi, “U yaa kaa ja bi kina kan, Uwumbor Aagbaj aah len pu na aatataa ye kinye? ke, ‘Litakpal li bidimaab yii li na, lima le ye litakpajal.’”

<sup>18</sup> Unii umok lir litakpal ngbaan pu na, u ga kool. Unii u litakpal ngbaan lir u pu na, li ga nan u, u ja ke ntayon na.”

### Baah pen Yesu nlan pu na

(Matiu 22.15-22; Mak 12.13-17)

<sup>19</sup> Uwumbor aakaal aamomokb, ni Uwumbor aatotoorninkpiib nan bee ke Yesu di liyataŋjakl ngbaan ḥaj bima la. Nima pu, le bi nan ban bi chuu u libuul ngbaan ni, ki mu san kinipaak ngbaan ijawaan.<sup>20</sup> Le bi ban nsan mu pu bi ga chuu u na, ki di bipepekb tun u chee, bi ti ḥmann ke bi ye bininyaam la, aan ki pen u nlan, aan ki chuu u, ki di ja kitij ngbaan aayidaan aajaal ni.<sup>21</sup> Le bi dan nan bui u, “Umomokr, ti nyi ke aa len mbamom, ki tuk binib Uwumbor aabom mbamom, kaa pak ubaa ki jer uken. Aa

po mok bi Uwumbor aasan mbamom la.<sup>22</sup> Tuk timi, ni ḥan ti pa lampoo ki di tii Uborkpaan Siisa aan naa ḥan?”

<sup>23</sup> Le Yesu bee ke bi pen u nlan la, le ki bui bi,<sup>24</sup> “Mok mi limombil man.” Baah mok u na le u baa bi, “Ijma aanaŋ ni liyimbil bi li pu?”

Le bi bui u, “Siisa yaan.”

<sup>25</sup> Le u bui bi, “Nima pu na, ni di ni ye Siisa yaan na tii u man, ki di ni ye Uwumbor yaan na tii Uwumbor.”

<sup>26</sup> Yesu aah len kina na, le ni gar bi pam. Baa ḥmāa chuu u taani waabɔlen pu, binib aanimbil ni. Le bi ḥmin.

### Binib bi ga fikr nkun ni na aah ga li bi pu na

(Matiu 22.23-33; Mak 12.18-27)

<sup>27</sup> Le Sajusii yaab bibaa dan u chee. Bima le len ke binib aan fikr nkun ni na.<sup>28</sup> Le bi bui u, “Umomokr, Moses nan ḥmee nkaal tii timi ke, ‘Uja yaa kpa puu ki yaa kpo, kaa kpa ubo kan, unaal di ukpopii ngbaan kpan, ki maa mbim tii ukpel.’”<sup>29</sup> Tɔ, naabitiib bilole nan bi.

Upol na nan yoor upii, le ki kpo, kaa kpa ubo.<sup>30</sup> Le unaal di ukpopii ngbaan kpan, ki mu kpo, kaa kpa ubo.<sup>31</sup> Le u paa u pu na mu ja kina. Le bijab bilole ngbaan momok ja kina, ki kpo doo, kaa kpa ubo.<sup>32</sup> Kookoo yoo le upii ngbaan mu kpo.<sup>33</sup> Kina pu na, binib yaa nan fikr nkun ni kan, upii ngbaan ga li ye ḥma aapuu? Bi momok bilole nan joo u la.”

<sup>34</sup> Le Yesu bui bi, “Dulnyaa wee ponn ni, bijab yoor bipiib la. Bipiib mu mɔn bijab la.<sup>35</sup> Binib bi ḥneer ke bi fikr nkun ni ki li bi dulnyaa u choo na ni na aan yoor bipiib. Bipiib mu aan mɔn bijab.<sup>36</sup> Bi ga li bi ke Uwumbor aatuuntiib aah bi pu na, kaan ki kpo. Baah ga fikr nkun ni na, bi ga li ye Uwumbor aabim la.<sup>37</sup> Tɔ, Moses mu nan mok timi ke binib bi kpo

<sup>¶20:17</sup> : Lik Ilahn 118.22.

<sup>§20:28</sup> : Lik Ikaal 25.5.

na ga fikr nkun ni. Buyoonn u nan bi busub bu gaal mmii na chee na, u nan yin Uwumbor ke Abraham, ni Aisak, ni Jakob Aawumbor la.”<sup>38</sup> Uwumbor yaa len ke u ye binib bi kpo na Aawumbor kan, nima le mok ke bi kpa limafal. Bi momok ye binifuub Uwumbor chee la.”

<sup>39</sup> Le Uwumbor aakaal aamomokb bibaa bui Yesu, “Umomokr, saah len pu na, ni jan la.”<sup>40</sup> Le baa kaa bi ki baa u mbaan.

### Kristo u ga gaa binib lii na aabor

(Matiu 22.41-46; Mak 12.35-37)

<sup>41</sup> Le Yesu baa bi, “Binib ja kinye pu ki bui ke Kristo u ga gaa binib lii na ye Uwumbor David aayaabil?”<sup>42</sup> David ubaa nan len Uwumbor aalahn aagbaj ponn ni ke, ‘Uwumbor bui Ndindaan ke: Kal njanggii wɔb,

<sup>43</sup> ki ti saa buyoonn m ga nyaj saadim momok na.”<sup>††</sup>

<sup>44</sup> David aah nan yin Kristo ngbaan ke Udindaan kina na, Kristo ga li njamaa ye uyaabil aa?”

### Bi li nyi Uwumbor aakaal aamomokb aabor

(Matiu 23.1-36; Mak 12.38-40)

<sup>45</sup> Kinipaak ngbaan aah pel Yesu aah len pu na, le u bui waadidiliib,<sup>46</sup> “Ni li nyi man Uwumbor aakaal aamomokb aabor. Baageehn le ye ke bi li pee njibokul fɔfɔk, ki gee ke binib li dooni bi kinyaŋ ni, ki gee ke bi kal bininyuum aakakaa chee mmeen aadir ni, ni njim chee.<sup>47</sup> Bi ji bikpopiib durm la, le ki mee Uwumbor ni yunni ke bi njmann ke bi ye bininyaam la. Uwumbor ga daa bitafal ki jer waah ga daa binib biken aatafal pu na.”

### Ukpoppii ubaa aah tii sakpen pu na

(Mak 12.41-44)

**21** Yesu nan yaar lik, ki kan bi-wankpadam joo njimobil pam janji Uwumbor aapiin aadakaa ni,<sup>2</sup> ki kan ukpopiigii ubaa mu di janjan bilee ki di ja u ponn ni.<sup>3</sup> Le Yesu bui ke, “M tuk nimi mbamɔn la, ukpopiigii wee tii njimobil ki jer bi momok aah tii pu na.<sup>4</sup> Bi momok tii ki gur njimobil sakpen. U ye ugiin la, le ki di waamombil momok tii, kaa ki gur nibaa.”

### Baah ga gbaa wii Uwumbor Aadichal pu na

(Matiu 24.1-2; Mak 13.1-2)

<sup>5</sup> To, binib bibaa nan bi len Uwumbor Aadichal aah jan pu na, ki kpa njitakpanyaan, ni ipiin i binib tii Uwumbor na.<sup>6</sup> Le Yesu bui bi, “N-yoonn choo, bi ga nan gbaa wii lidichal limina momok. Litakpal libaa aan ki li paa liken pu.”

### Falaa aayoonn aah ga li bi pu na

(Matiu 24.3-14; Mak 13.3-13)

<sup>7</sup> Le Yesu aadidiliib baa u, “Umomokr, bi ga ja kina bayoonn? Ba ga li ye limokl ki mok timi ke ni neer bi ja kina?”

<sup>8</sup> Le u bui bi, “Ni li nyi man, aan ubaa taa njmann nimi. Binib pam ga nan dan ki pur maayimbil ke bima le ye min Yesu, ki ga bui ke ni neer a. Ni taa dii bi man.

<sup>9</sup> Ni yaa jan ke ntim mubaa aanib to tɔb butɔb, aan ntim muken aanib kpa tibor kan, ni taa san ijawaan man. Uwumbor le siin ke nimina momok ga ja. Nima le aan mok ke dulnyaa wee ga doo libuul ngbaan ni.

<sup>10</sup> “Linibol libaa ga to linibol liken butɔb. Nnaan mubaa aanib ni nnaan muken aanib ga to tɔb butɔb.<sup>11</sup> Kitiŋ ga deŋ sakpen njipepel njipepel. Nkon mu ga

\*\*20:37 : Lik Nnyam 3.6.

††20:43 : Lik Ilahn 110.1.

lir. Iween mu ga lir, ki ku binib pam ntim ntim ponn ni. Lijinjiir aawan, ni tiwan ni faani binib na mu ga li bi paacham.

<sup>12</sup> “Nimina mɔmɔk aa kaa kee ja buyoonn na, le bi ga chuu nimi, ki ja nimi falaa, ki di nimi ja mmeen aadir ni ki ji nimi tibɔr, ki di nimi ja kiyondiik ponn ni. M pu, le bi ga di nimi siin bibɔrb ni ntim aaninkpiib aanimbiin ni ke bi ji nimi tibɔr. <sup>13</sup> Nima le ga tii nimi nsan le ni tuk bi tibɔnyaan tee. <sup>14</sup> Ni di ja nisui ni man ke naan puen baa nisui ni ke ni ga len kinye? <sup>15</sup> M ga tuk nimi naah ga len pu na, aan nimi aadim ubaa taa ki ɻmaa kpak nimi, kaan ki ɻmaa len tibaa. <sup>16</sup> Nitetiib, ni ninatiib, ni ninaabitiib, ni nidoyaab, ni njɔtiib, ga kooh nimi. Le binib ga ku ni ponn ni bibaa. <sup>17</sup> Binib mɔmɔk ga li nan nimi m pu. <sup>18</sup> Ni mu aan bee yɔli; nimi aayikpirk kibaa le aan bee yɔli. <sup>19</sup> Ni yaa ji limɔr falaa mɔmɔk ponn ni kan, ni ga kan limɔfal li kaa kpa ndoon na.”

### Baah ga bii Jerusalem aatiŋ pu na

(Matiu 24.15-21; Mak 13.14-19)

<sup>20</sup> “Ni yaa kan butɔb aajab si gob Jerusalem aatiŋ kan, ni li nyi man, naan yunn, le bi ga bii kitij ngbaan doo. <sup>21</sup> N-yoonn ngbaan yaa nan fuu ni kan, binib bi bi Judea aatiŋ ponn ni na san buen ɻjoo paab. Binib bi bi Jerusalem ponn ni na mu li nya ki ni. Binib bi bi it-ingbaan ni na, bi taa koo ni Jerusalem aatiŋ ni. <sup>22</sup> N-yoonn ngbaan le Uwumbɔr ga daa Jerusalem aatiŋ aanib aatafal, aan ni gbiin waagbaŋ aah ɻmee pu na mɔmɔk. <sup>23</sup> N-yoonn ngbaan, bipiib bi kpa ɻipuu na, ni bipiib bi kpa mbim bi laa ɻaa libiil na ga li kpa kinimbaak; ba pu? Uwumbɔr ga gee lijuul sakpen kitij ngbaan aanib pu. Bi ga ji falaa pam. <sup>24</sup> Bi ga di kijaak aajum ku bibaa, ki ga chuu bibaa mu tinaagbiir ki di buen ɻjinibol mɔmɔk aakaasisik ni. Le binib bi kaa ye

Juu yaab na ga bii Jerusalem ki ti saa baayoonn aah ga doo pu na.”

### Yesu aah ga gir ni pu na

(Matiu 24.29-31; Mak 13.24-27)

<sup>25</sup> “Lijinjiir aawan ga li bi nwiin, ni uŋmal, ni ɻijmabil ponn ni. Nnyusakpem ga ja tinyunkpenn sakpiin, ki faa kifuuk sakpen, ki ja binib ilandak. Baan ki li nyi baah ga ja pu na. <sup>26</sup> Paacham aawan aan ki li bi mbamɔm. Nima le binib ga lik naah ga li bi pu dulnyaa wee ni na, ki ga san ijawaan ki ti fik. <sup>27</sup> N-yoonn ngbaan le bi ga kan min Unibɔn Aabo bi ntaalangbam ni ki choo, ki wiin chain, ki joo mpɔɔn. <sup>28</sup> Ni yaa kan tiwan nimina mɔmɔk bi ɻjani kan, chuu nibaa man, ki pɔɔk nitaakpab. Naan yunn le ni ga ɻjmar.”

### Isui aayataŋjakl

(Matiu 24.32-35; Mak 13.28-31)

<sup>29</sup> Yesu nan ɻjakl bi liyataŋjakl ke, “Ni li lik bukpasɔm ni isui mɔmɔk man. <sup>30</sup> Ni yaa nan kan yaabon bi ɻjani tifar kan, ni bee ke ni yaa kpee siib kan, kiseek ga seer. <sup>31</sup> Kina na, ni yaa kan nimina bi ɻjani kan, ni bee ke ni yaa kpee siib kan, Uwumbɔr aanaan ga fuu ni.

<sup>32</sup> “M tuk nimi mbamɔm la, dandana aanib aan jer le tiwan nimina mɔmɔk puen ja. <sup>33</sup> Paacham ni taab ga jer. Maamɔbon ma aan jer.”

### Yesu aagirndaal aabɔr

<sup>34</sup> “Ni li nyi man, ki taa nyu ndaan gbii ki li kpa ndaan aaween, ki taa cha nimi aabimbin aabɔr gbiin nimi aalandak mɔmɔk, aan maagirndaal taa yuk nipoobil. <sup>35</sup> Maagirndaal kan, dulnyaa wee ni aanib mɔmɔk aapobil ga yuk ke gaawɔb aah chuu upeel kan, upobil yukr pu na. <sup>36</sup> Li nyi man n-yoonn mɔmɔk, ki mee Uwumbɔr u tii nimi mpɔɔn ke ni nya falaa umɔk choo na ni, ki nan sil min Unibɔn Aabo aanimbiin ni.”

<sup>37</sup>Iwiin mɔmɔk le Yesu nan bi Uwumbor Aadichal ni, ki tuk binib Uwumbor aabɔr. Tinyer mɔmɔk le u buen Olif aasui aajool paab ki ti dɔ geen.  
<sup>38</sup>Kichakpinaanyeek ni mɔmɔk le binib chaa u chee Uwumbor Aadichal ni, bi ti njun waah len pu na.

### Baah kpokl ke bi ga ku Yesu pu na

(*Matiu 26.1-5; Mak 14.1-2; Jɔnn 11.45-53*)

**22** N-yoonn ngbaan, naa nan ki daa ke bi ji Lakr-jer aajim,<sup>\*\*</sup> ki ŋmɔ boroboro u kaa kpa nnyɔk na. <sup>2</sup>Le Uwumbor aatotoorninkpiib, ni Uwumbor aakaal aamɔmɔkb nan kpokl baah ga ḥja pu ki ku Yesu na. Bi mu nan san binib na ijawaan.

### Judas aah nan ban ke u kooh Yesu pu na

(*Matiu 26.14-16; Mak 14.10-11*)

<sup>3</sup>Le kinimbɔŋ koo Judas Iskariot aasui ni. Judas nan ye Yesu aadidiliib kipiik ni bilee na ponn ni ubaa. <sup>4</sup>Kinimbɔŋ aah koo Judas aasui ni na, le u buen Uwumbor aatotoorninkpiib, ni Uwumbor Aadichal aakikiirb aaninkpiib chee, u ti kpokl bi waah ga ḥja pu ki di Yesu ḥja bijaal ni na. <sup>5</sup>Le bi nan kpa mpopiin, ki puu tipuur ke bi ga tii u ḥjimomobil. <sup>6</sup>Le u kii, ki ban nsan mu u ga di Yesu ḥja bijaal ni, buyoonn kinipaak ngbaan aa bi u chee na.

### Baah toor njim ngbaan pu na

(*Matiu 26.17-25; Mak 14.12-21; Jɔnn 13.21-30*)

<sup>7</sup>Lakr-jer aajim, buyoonn bi ga ŋmɔ boroboro u kaa kpa nnyɔk na aawiin mu daal bi ga kɔr upihbo na, <sup>8</sup>le Yesu bui Piita ni Jɔnn, “Li cha ti gor njim ngbaan aajikaar aan ti jii.”

<sup>9</sup>Le bi baa u, “Aa ban ke ti gor ti la chee?”

<sup>10</sup>Le u bui bi, “Ni yaa koo kitip ngbaan ni kan, uja u tu nnyun na ga ton nimi nsan ponn ni. Ni li dii u man, ki ti koo waah ga koo lidichal li ponn ni na, <sup>11</sup>ki bui udichadaan na, ‘Umɔmɔkr bui ke u ni waadidiliib ga ji njim ngbaan aajikaar kiladiik ni?’ <sup>12</sup>Le u ga mɔk nimi paacham aadisakpeŋ ki bi puen toor ki na. Ni gor njim ngbaan aajikaar nima chee.”

<sup>13</sup>Le bi buen, ki ti kan Yesu aah tuk bi ke bi ga kan pu na. Le bi gor njim ngbaan aajikaar.

### Tidindaan aajim

(*Matiu 26.26-30; Mak 14.22-26; 1 Korint Yaab 11.23-25*)

<sup>14</sup>Tijikaar aajim yoonn aah fuu ni na, le Yesu ni waadidiliib dan nan kal. <sup>15</sup>Le u bui bi, “Nnimbil nan man ke m ni nimi kpaan ji njim mue waahr aan m nin ji maafalaa ngbaan. <sup>16</sup>M tuk nimi la, maan ki ji njim mue ki ti saa buyoonn Uwumbor ga nan ḥja mu aah mɔk pu na waanaan ni.”

<sup>17</sup>Yesu nan yoor kiyinyook, le ki doon Uwumbor, le ki bui bi, “Gaa man ki yakr tɔb. <sup>18</sup>M tuk nimi la, maan ki nyu ḥjisubil aanyun ngbaan ki ti saa buyoonn Uwumbor aanaan ga fuu ni na.”

<sup>19</sup>Le u yoor boroboro, le ki doon Uwumbor, ki gii, ki di tii waadidiliib ki bui bi, “Maawon le na. Nimi aatunwanbir pu le m tii tiwon tee. Ni li ŋmɔ kina aan ki li teer mbɔr.” <sup>20</sup>Baah jin tijikaar ngbaan ti doo na, le u yoor kiyinyook, ki doon Uwumbor, ki di tii bi, le ki bui bi, “Tiwanyukaan ngbaan ye maasin aamɔkl la. Maasin ga nya nimi aatunwanbir pu la. Maasin pu, le Uwumbor puu tipuupɔln tii nimi.

<sup>\*\*22:1</sup> : Israel yaab nan ji Lakr-jer aajim ke bi teer buyoonn Uwumbor nan nyan bi tinaagbiir ni, Ijipt aatiŋ ni na. Lik Nnyam 12.1-27.

<sup>21</sup> “Lik, unii u ga kooh mi na, m ni uma le aajaal kpaan bi lisambil ni na. <sup>22</sup> Min Unibɔn Aabo ga sil kpo, Uwumbɔr aah nan len ke m ga kpo pu na. Tibɔbir mu ga li bi uja u ga kooh mi na pu.”

<sup>23</sup> Le waadidiliib baa tɔb, “Ti ponn ni, ulau ga tee ḥa kina?”

### Ulau ye uninyuun?

<sup>24</sup> Tɔ, Yesu aadidiliib nan kpak tɔb kinikpakpak ke ulau tee ye uninyuun bi ponn ni. <sup>25</sup> Le u bui bi, “Dulnyaa wee ni aanibol aabɔrb yoor bibaa paacham la. Binib bi kpa tininkpir na, baanib yin bi baateterb la. <sup>26</sup> Nimi, ni taa li bi kina man. Unii u ye uninyuun ni ponn ni na kan, u ḥa ubaa ke uwaatiir na. Unii u ye usaloln na kan, u ḥa ubaa ke nimok aatu-tunn na. <sup>27</sup> Unii u ḥa tijikaar na, ni unii u ji na, ḥma jer uken? Naa ye unii u ji na aa? Mma kan, m bi ke ututunn na le ni ponn ni.

<sup>28</sup> “Tɔ, maah bi ntɔŋ ni na, nimi le sil nchaŋ ni. <sup>29</sup> M ga ḥa nimi bibɔrb ke Nte Uwumbɔr aah ḥa mi ubɔr pu na. <sup>30</sup> Le ni ga ji tijikaar ki nyu nnyun m chee maanaan ni, ki kal ḥibɔrjal pu, ki ji Israel yaab aanibol kipiik ni ḥjilee tibɔr.”

### Yesu aah bui ke Piita ga nee u pu na

(Matiu 26.31-35; Mak 14.27-31; J̄nn 13.36-38)

<sup>31</sup> Le Yesu bui Simonn Piita, “Simonn, Simonn, lik, kinimboj kan nsan ke ki tɔŋ nimi, aan ni lir. <sup>32</sup> Le m mee Uwumbɔr tii si, aa taa di cha maasan. Aa yaa ki gir ni ki nan dii mi kan, pɔɔn aanaabitib aataakpab.”

<sup>33</sup> Le Piita bui u, “Ndindaan, m ga ḥmaa kpaan aa chee kiyondiik ni. M ni si ga ḥmaa kpaan ki kpo.”

<sup>34</sup> Le Yesu bui u, “Piita, m tuk si la, din, aa ga len nfum mutaa ke saa nyi mi, le ukooja nin wii.”

### Litaakɔr ni kijaak aajuk aabɔr

<sup>35</sup> Tɔ, Yesu nan baa bi, “Maah nan tun nimi ki nan bui nimi ke ni taa li joo ḥimobil aataakɔr, ki taa li joo litaakɔr mu, ki taa li joo ḥjinaatak na, ni nan lann nibaa aa?”

Le bi bui u, “Taa nan lann nibaa.”

<sup>36</sup> Le u bui bi, “Dandana wee, naa ki bi ke naah nan bi pu na. Unii u kpa ḥjimobil aataakɔr na kan, u li joo li. Unii u kpa litaakɔr mu na kan, u li joo li. Unii u kaa kpa kijaak aajuk na kan, u di waabɔkul kooh, ki daa kibaa. <sup>37</sup> M tuk nimi la, ni ḥmee Uwumbɔr Aagbaŋ ponn ni ke bi ga ḥa mi ke baah ḥjani titunwanbirdam pu na. Le bi ga sil ḥa mi kina. Baah nan ḥmee maabɔr pu na, ni mɔmɔk bi gbiini la.”

<sup>38</sup> Le bi bui u, “Ndindaan, lik, ti kpa kijaak aajum mulee la.”

Le u bui bi, “Ni ḥneer a.”

### Yesu aah mee Uwumbɔr pu na

(Matiu 26.36-46; Mak 14.32-42)

<sup>39</sup> Le u nyan nima, le ki buen Olif aasui aajool paab, waah chaa nima n-yoonn mɔmɔk pu na. Waadidiliib mu dii u.

<sup>40</sup> Waah ti fuu nima chee na, le u bui bi, “Ni li mee Uwumbɔr man, aan ki taa koo ntɔŋ ni.”

<sup>41</sup> Le u siir cha bi, ki foor siib, le ki gbaan kitij ki mee Uwumbɔr ke, <sup>42</sup> “Nte, ni yaa ye saageehn kan, nyan mi falaa u choo na ni. Tɔ, ḥa saageehn, ki taa ḥa maageehn.” <sup>43</sup> Le Uwumbɔr aatuun nyan ni paacham ki dan u chee ki nan pɔɔk utaakpab. <sup>44</sup> Le Yesu aasui ponn ni wu ki ti nyaj. Le u ki mee Uwumbɔr lini-maln. Le kitotoŋ naa u, ki ye nsin ki tuu lir kitij.

<sup>45</sup> Le u mee Uwumbɔr ti doo, le ki fii, ki gir buen waadidiliib chee, ki ti mui bi dɔ geen, mpombiin pu. <sup>46</sup> Le u baa bi, “Ba ḥa ni dɔ geen? Fiin, ki li mee Uwumbɔr man, aan ki taa koo ntɔŋ ni.”

### Baah chuu Yesu pu na

(Matiu 26.47-56; Mak 14.43-50; J̄nn 18.3-11)

<sup>47</sup> Waah laa bi len kina na, le kinipaak fuu ni bi chee. Judas u ye waadidiliib kipiik ni bilee ponn ni ubaa na, loln kini-paak ngbaan pu nsan, le ki buen Yesu chee ke u moor utakpiln.<sup>¶¶</sup> <sup>48</sup> Le Yesu baa u, “Judas, aa moor ntakpiln ke aa kooh min Unibon Aabo oo?”

<sup>49</sup> Yesu aadidiliib aah kan ke binib ngbaan ban bi chuu u na, le bi baa u, “Tidindaan, ti di kijaak aajum jan bi ii?” <sup>50</sup> Le waadidiliib ponn ni ubaa di kijaak aajuk ki gaa per Uwumbor aatotoorninkpel aatutunn aatafagir.

<sup>51</sup> Le Yesu bui bi, “Di cha kina man,” le ki di uŋjaal meeh utafal le ki cha li pɔɔk.

<sup>52</sup> Le Yesu baa Uwumbor aatotoorninkpiib, ni Uwumbor Aadichal ni aakikiirb, ni Juu yaab aaninkpiib bi dan bi nan chuu u na, “Ni joo kijaak aajum ni jagbaali mam ke ni nan chuu mi, ke maah ye ufifiir le na aa?<sup>53</sup> M nan bi ni chee Uwumbor Aadichal ni iwiin mɔɔmɔk, le naa nan chuu mi. Tɔ, dandana wee le ye n-yoonn mu Uwumbor siin ki tii nimi ni kinimbɔɔŋ ki tun mbɔɔmbɔɔŋ aatuln na.”

### Piita aah nee Yesu pu na

(Matiu 26.57-58, 69-75; Mak 14.53-54, 66-72; J̄nn 18.12-18, 25-27)

<sup>54</sup> Le bi chuu Yesu ki di u buen Uwumbor aatotoorninkpel aadichal ni. Le Piita paa u pu ki bi dandar. <sup>55</sup> Le bi tuur mmii lichiln ngbaan ni, ki ka gob mu. Piita mu nan ti kal bi chee ki ka bikaa-sisik ni. <sup>56</sup> Mmii aah woln unimbil wɔb na, le usapɔɔn u ye ututunn na kan u, ki ka lik u sulm, le ki ti bui ke, “Uja umina mu nan bi Yesu chee.”

<sup>57</sup> Le u nee, ki bui u, “Upii, maa nyi u.”

<sup>58</sup> Le ni kpee siib, le unii uken mu kan u, ki mu bui u, “Aa mu ye bi ponn ni ubaa la.”

Le Piita bui u, “Uja, maa ye.”

<sup>59</sup> Le ni ki kpee siib, le uja uken bui ke, “Ni ye mbamɔɔn, uja wee mu nan bi u chee. U mu ye Galilee aatiŋ aanii la.”

<sup>60</sup> Le Piita bui u, “Uja, maa nyi saah len pu na aatataa.”

Waah laa bi len kina na, libuul ngbaan ni, le ukooja wii. <sup>61</sup> Tidindaan nan fenn ki lik Piita. Le Piita teer Tidindaan aah ba tuk u pu na ke, “Din, aa ga len nfum mutaa ke saa nyi mi le ukooja nin wii.” <sup>62</sup> Le Piita nyan lipaal, ki ti wii pam.

### Baah yook Yesu ki gbaa u pu na

(Matiu 26.67-68; Mak 14.65)

<sup>63</sup> Le bijab bi joo Yesu na ḥa u mbɔɔnyun, le ki gbaa u, <sup>64</sup> ki di likekeln poo unimbil, le ki baa u, “Uwumbor aabɔɔnabr, ulau faa si?” <sup>65</sup> le ki seei u ḥisi-ibil pam.

### Juu yaab aaninkpiib aah jin Yesu tibɔr pu na

(Matiu 26.59-66; Mak 14.55-64; J̄nn 18.19-24)

<sup>66</sup> Ki woln kitaak kichakpiik ni, le Juu yaab aaninkpiib, ni Uwumbor aatotoorninkpiib, ni Uwumbor aakaal aamɔɔmɔk kuun ni tɔb chee, le ki di Yesu siin binimbiin ni, <sup>67</sup> le ki baa u, “Aa ye Kristo u ga gaa timi lii na aa? Tuk timi.”

Le u bui bi, “M yaa tuk nimi kan, naan li pak maah len pu na. <sup>68</sup> M mu yaa baa nimi mbaan kan, naan giin tii mi, [kaan di mi lii.] <sup>69</sup> Dandana ki joo cha, min Unibon Aabo ga kal Uwumbor u yeh mpoɔɔn mɔɔmɔk na aajangii wɔb.”

<sup>70</sup> Le bi mɔɔmɔk baa u, “Aa ye Uwumbor Aajapɔɔn la aa?”

Le u bui bi, “Ni ye naah len pu na la.”

<sup>¶¶</sup>22:47 : ...moor utakpiln: Israel yaab nan doon binaabitiib kina le ki mɔk ngeehn.

<sup>71</sup> Le bi bui ke, “Taa ki ban seeraadam. Timi tibaa ḥun waah len umob ni pu na.”

### Pailat aah jin Yesu tibor pu na

(Matiu 27.1-2, 11-14; Mak 15.1-5; Jōnn 18.28-38)

**23** Bi mōmōk nan fii, le ki di Yesu buen kitij ngbaan aaninkpel chee, bi nan yin u ke Pailat,<sup>2</sup> le ki piin ki bi galni u, ki bui ke, “Ti kan uja wee ḥmanni timi aanibol la. U tuk bi ke bi taa ki pa lampoo tii Uborkpaan Siisa, ke uma ubaa le ye Kristo u ga gaa binib lii na, ki ye Ubōr.”

<sup>3</sup> Le Pailat baa u, “Aa ye Juu yaab aabōr la aa?”

Le u bui u, “Saah len pu na, ni ye kina.”

<sup>4</sup> Le Pailat bui Uwumbōr aatotoorninkpiib ni kinipaak ngbaan, “Maa kan uja wee aataani ubaa.”

<sup>5</sup> Le bi moo galni u, ki bui ke, “U tuk binib waaliin la, le bi ḥma tijar. U nan piin Galilee aatij ni, le ki bō dī Judea aatim mōmōk ni, ki nan fuu ni kitij kee ni.”

### Ubōr Herod aah jin Yesu tibor pu na

<sup>6</sup> Pailat aah ḥun kina na, le u baa bi, “U ye Galilee aatij aanii la aa?”<sup>7</sup> Tō, Ubōr Herod le nan joo Galilee aatij aanib. Pailat aah ḥun ke Yesu nyan nima na, le u di u tun Herod chee. U mu nan bi Jerusalem aatij ni n-yoonn ngbaan.<sup>8</sup> Ubōr Herod aah kan Yesu na, le u kpa mpopiin sakpen. U nan ḥun waabor, ki ban u kan u ni yunn, ki mak ke u ga tun lijinjiir aatuln aan u kan.<sup>9</sup> Le u baa Yesu mbaan pam. Yesu ma aa len tibaa.<sup>10</sup> Le Uwumbōr aatotoorninkpiib, ni Uwumbōr aakaal aamōmōk mu si nima ki galni u mpōon pu.<sup>11</sup> Le Ubōr Herod ni waatōb aajab lik u fam, ki ḥa u mbonyun, ki di kikpalk nyaan peen u, ki di u giin Pailat chee.<sup>12</sup> Liyaadaal ngbaan le Herod ni Pailat ki ḥa kijōtiik. Bi nan ye tōb aadim la.

### Baah len ke bi ga ku Yesu pu na

(Matiu 27.15-26; Mak 15.6-15; Jōnn 18.39-19.16)

<sup>13</sup> Pailat nan yin Uwumbōr aatotoorninkpiib, ni Juu yaab aaninkpiib, ni kinipaak ngbaan,<sup>14</sup> le ki bui bi, “Ni joo ni uja wee m chee, ki bui ke u ḥmanni binib la. Le m jin u tibor ninimbil ni. Nimi aagalm ngbaan ponn ni, maa kan u ḥa tibaa.<sup>15</sup> Ubōr Herod mu aa kan waataani, le u di u giin ni ti chee. Waa ḥa nibaa ni ḫeer u nkun.<sup>16</sup> M ga cha bi lue u ḥinaalab, le ki di u lii.”

[<sup>17</sup> Njim ngbaan mōmōk yoonn kan, see Pailat nyan unaagbiija ubaa lii.]<sup>18</sup> Le bi mōmōk kpaan ki teen ke, “Ku uja wee. Di Barabas di lii.”<sup>19</sup> Barabas nan tukni kitij ngbaan aaninkpiib, ki ku binib, le bi laj u kiyondiik ni.

<sup>20</sup> Pailat nan ban u di Yesu lii, nima pu le u ki len kinipaak ngbaan chee.<sup>21</sup> Le bi ki teen ke, “Kpaa u ndōpuinkoo pu. Kpaa u ndōpuinkoo pu.”

<sup>22</sup> Le Pailat baa bi, “Ba ḥa? U tun bakaa bayoo? Maa kan u ḥa nibaa ni ḫeer u nkun. M ga cha bi lue u ḥinaalab, le ki di u lii.”

<sup>23</sup> Le bi beenin tar mpōon pu, “Kpaa u ndōpuinkoo pu.” Baah tar kina na, le bi nyaj Pailat.<sup>24</sup> Le u kii ke u ga ḥa baah ban pu na,<sup>25</sup> le ki di Barabas u nan tukni kitij ngbaan aaninkpiib ki ku binib, ki bi kiyondiik ni na lii, baah ban pu na, le ki di Yesu ḥa biļaal ni, bi ti ḥa u baah ban pu na.

### Baah kpaa Yesu ndōpuinkoo pu pu na

(Matiu 27.32-44; Mak 15.21-32; Jōnn 19.17-27)

<sup>26</sup> Le butōb aajab di Yesu buen. Baah cha na, le bi ton uja u nyan ni ntingbaan ni na nsan ni. Bi nan yin u ke Simonn, u ye Sairene aatij aanii na. Le bi chuu u ke u tun Yesu aadōpuinkoo ki li paan u pu.

<sup>27</sup> Le kinipaak sakpeŋ paa Yesu pu. Bi ponn ni bibaa ye bipiib bi wii ki kaani u pu na. <sup>28</sup> Le Yesu fenn ki top bi, le ki bui bi, “Jerusalem aatij aapiib, ni taa wii m pu. Ni li wii nimi nibaa ni nimi aabim pu; <sup>29</sup> ba pu? falaa aayoonn choo. N-yoonn ngbaan le bi ga len ke, ‘Bipi-injoob bi kaa ma mbim kaa tii bi libiin na, bima le kpa mpopiin.’ <sup>30</sup> N-yoonn ngbaan le bi ga bui njoo ni njogongon, ‘Lir ti pu, ki biin ti pu.’<sup>§§</sup> <sup>31</sup> Bi yaa di ndɔsoon ja mmii ni aan mu gaa kan, ndɔkuun ga li bi kinye?”\*

<sup>32</sup> Le bi di bakadam bilee kpee Yesu pu, ki di buen ke bi ti ku bi mu. <sup>33</sup> Le bi ti fuu nibaa chee, bi yin nima chee “Kiyikpanj.” Baah ti fuu nima na, le bi di u kpaa ndɔpuinkoo pu, le ki di bakadam bilee na mu kpaa idɔpuinkee pu. Bi kpaa ubaa ujjangii wɔb, ki kpaa uken ujangan wɔb. <sup>34</sup> Baah bi kpaa Yesu ndɔpuinkoo pu na, le u bui ke, “Nte Uwumbor, di cha pinn bi. Baa nyi baah ḥjani pu na.”

Le butɔb aajab ngbaan yoor waawan-peenkaan bi ti yakr tɔb, le ki too inaan ke bi lik bimɔk aah ga kan ni na. <sup>35</sup> Le kinipaak ngbaan si ki lik u. Le Juu yaab aaninkpiib sii u, ki bui ke, “U gaal biken le bi ḥmar; u yaa ye Kristo u ga gaa timi lii, aan Uwumbor nyan u na kan, u gaa ubaa mu lii.”

<sup>36</sup> Butɔb aajab ngbaan mu nan ja mɔbɔnyun, ki di ndaan mu mɔɔn na nyunn u, <sup>37</sup> le ki bui u, “Aa yaa ye Juu yaab aabor kan, gaa aabaa lii.”

<sup>38</sup> Bi nan ḥmee kigbaŋ tam waadɔpuinkoo pu, uyil paab. Ni ḥmee ke, “Juu yaab Aabor le na.”

<sup>39</sup> Le baah nan kpaa bakadam bilee bi idɔpuinkee pu na ponn ni ubaa mu sii u, ki baa u, “Saa ye Kristo u ga gaa binib

lii na aa? Gaa aabaa lii aan ki gaa ti mu lii.”

<sup>40</sup> Le bakadaan uken na kae u, le ki bui u, “Saa san Uwumbor aa? Aa ni u kpaan kan ntafadaan mubaa la. <sup>41</sup> Timi le ḥneer ntafadaan ngbaan. Bi ḥja timi, timi aatuln aah ḥneer pu na la. Uma le aa ḥja bakaa ubaa,” <sup>42</sup> le ki bui Yesu, “Ndindaan, aa yaa jin saanaan kan, aa teer mbɔr.”

<sup>43</sup> Le Yesu bui u, “M tuk si mbamɔn la, din aa ga li bi m chee Paradais ni.”†

### Yesu aah kpo pu na

(Matiu 27.45-56; Mak 15.33-41; Jɔnn 19.28-30)

<sup>44</sup> Ni nan ye nwiin kaasisik ni. Le dulnyaa mɔk bɔln, ki ti saa nwiin aah kpar pu na. <sup>45</sup> Nwiin aa ki wiin. Le likekeln li yakr Uwumbor aadiik ni nfum mulee na chuu kar paacham, ki ti saa kitinj. <sup>46</sup> Le Yesu teen mpɔɔn pu, le ki bui ke, “Nte Uwumbor, m di maawiin ḥja aanjaal ni la.” Waah len kina na, le u kpo.

<sup>47</sup> Tɔ, butɔb aajab aaninkpel aah kan naah ḥja pu na, le u nyuŋ Uwumbor, le ki bui ke, “Uja ngbaan sil ye uninyaan la.”

<sup>48</sup> Le kinipaak kimɔk kuun nima chee ke bi lik na aah kan tiwan ni mɔmɔk ḥja na, bi nan kpa mpombiin ki labr kun.

<sup>49</sup> Le ujɔtiib mɔmɔk, ni bipiib bi nyan ni Galilee aatij ni ki dii u na si dandar, ki waa ni mɔmɔk.

### Baah sub Yesu pu na

(Matiu 27.57-61; Mak 15.42-47; Jɔnn 19.38-42)

<sup>50-51</sup> Uja ubaa nan bi, bi nan yin u ke Josef, u nyan ni Juu yaab aatij ki bi yin ki ke Arimatea na ni. U nan ye uninyaan la, ki kii Uwumbor aanaan aah

§§23:30 : Lik Hosea 10.8.

\*23:31 : Naatataa le ye ke, uninyaan yaa ji falaa kina kan, bibiindam ga li bi kinye?

†23:43 : Paradais ye Uwumbor do paacham la.

ga fuu ni buyoonn na. U nan ye bibɔjirb aaninkpiib ponn ni ubaa la. Le waa kii baah kpokl pu ki ku Yesu na.<sup>52</sup> Le u buen Pailat chee, ki ti bui u, “Di Yesu aawon tii mi.”<sup>53</sup> Le Pailat kii. Le u nyan waawon ndɔpuinkoo pu, le ki di u poo likekenyaan ni, ki di u ti sub kitakpaluj ni. Bi nan gbii kitakpaluj ngbaan litak-pasakpeln aasikakl ni la. Baa nan kee sub unii ubaa ki ponn ni.<sup>54</sup> Ni nan ye kitaak ki ga woln Juu yaab aakpaakool daal na la.

<sup>55</sup> Le bipiib bi nan nyan Galilee aatiŋ ni ki dii Yesu na paan Josef pu, le ki ti kan kitakpaluj ngbaan, ki kan baah di Yesu aawon ki di ḥa ki ponn ni pu na.<sup>56</sup> Le bipiib ngbaan gir kun, ki ti ban tulalee ni nkpan mu nun mɔ na.

Juu yaab aakpaakool daal, le bi fuur, baakaal aah len pu na.

### Yesu aah fikr nkun ni pu na

(Matiu 28.1-10; Mak 16.1-8; Jɔnn 20.1-10)

**24** Juu yaab aakpaakool aah jin ki woln kitaak na, le bipiib ngbaan yoor tulalee ni nkpan ngbaan bi ti toor Yesu aawon, ki di buen likaakul ngbaan chee kichakpinaanyeek ni.<sup>2</sup> Baah ti fuu nima na, le bi kan ke litakpal li bi nan di lej kitakpaluj aamɔb na, aa ki bi.<sup>3</sup> Le bi koo, le kaa kan Tidindaan Yesu aawon.<sup>4</sup> Baa nyi baah ga li dak pu na. Libuul ngbaan ni le bijab bilee bi aawan-peenkaan wiin chain na sil bi chee.<sup>5</sup> Le ijawaan chuu bipiib ngbaan, le bi gbaan kitij binimbiin ni. Le bijab ngbaan baa bi, “Ba pu ni ban unifuub bitekpiib ponn ni?”<sup>6</sup> Waa bi do. U fikr nkun ni a. Teer man waah nan tuk nimi pu buyoonn u nan laa bi Galilee ni na,<sup>7</sup> ke Uwumbɔr siin ke bi ga di uma Unibɔn Aabo, ki di ḥa titunwanbirdam aanjaal ni, bi ti kpaa u ndɔpuinkoo pu, ke iwiin itaa daal u ga fikr nkun ni.”

<sup>8</sup> Le bipiib ngbaan teer waabor timina.<sup>9</sup> Le bi nyan kitakpaluj ngbaan chee, ki gir kun, le ki di tibɔr timina tuk waakpambalb kipiik ni ubaa na, ni waadidiliib bi gur na mɔmɔk.<sup>10</sup> Bipiib ngbaan aayimbil le nan ye Mari Magdalene, ni Joana, ni Mari u ye Jems aana na. Bi ni bipiib bi nan dii bi na nan di tibɔr timina tuk waakpambalb.<sup>11</sup> Le waakpambalb aa pak baah len pu na. Bi dak ke ni ye kijɔrk aaliin la.<sup>12</sup> Le Piita fii ki san buen kitakpaluj ngbaan chee, ki ti boon ki gbuun lik, le ki muin ḥikeken ngbaan baanja le dɔ. Ni nan gar u pam. Le u gir kun.

### Yesu aadidiliib ponn ni bilee aah kan u pu na

(Mak 16.12-13)

<sup>13</sup> Liyaadaal ngbaan le bi ponn ni bilee cha kitij ki bi yin ki ke Emaus na ni. Kitij ngbaan ni Jerusalem aah daa tɔb chee pu na ye mal bilole la.<sup>14</sup> Baah cha na, le bi gbaa tɔb chee tibɔr, le ki len tiwan nimɔk ḥa na.<sup>15</sup> Baah gbaa tɔb chee tibɔr kina na, le Yesu ubaa pii bi nsan ni, ki dii bi.<sup>16</sup> Le Uwumbɔr doj binimbiil ke bi taa bee u.<sup>17</sup> Le u baa bi, “Naah chuun gbaa tɔb chee tibɔr ti na, ti ye bɔr bayaar, aan ninimbiil wɔb bi gbilngbiln kina?”

<sup>18</sup> Le bi ponn ni ubaa, bi nan yin u ke Kleopas, baa u, “Bicham bi bi Jerusalem ponn ni na, si baanja le aa nyi tibɔr ti ḥa nima chee dandana na aa?”

<sup>19</sup> Le u baa bi, “Tilabɔr?”

Le bi bui u, “Yesu u nan ye Nasaref aatiŋ aanii na aabɔr. U nan ye Uwumbɔr aabɔnabr la. U nan kpa mpɔɔn ki tun lijinjiir aatun; waaliin mu nan kpa mpɔɔn. U piir Uwumbɔr ni binib mɔmɔk aasui.<sup>20</sup> Le Uwumbɔr aatotoorninkpiib ni timi Israel yaab aaninkpiib di u ḥa binib aanjaal ni, ke u neer nkun. Le bi kpaa u ndɔpuinkoo pu.<sup>21</sup> Ti nan kpa limakl ke uma le ga gaa timi Israel yaab lii. Baah nan ḥa u kina na, din le ye iwiin

itaa. <sup>22</sup>Ti ponn ni bipiib bibaa mu tuk timi tibor ti gar timi sakpen na. Bi buen kitakpaluj ngbaan chee kichakpinaany-eek ni, <sup>23</sup>kaa ti kan waawon, le ki gir ni ki nan tuk timi ke bi kan Uwumbor aatu-untiib bi tuk bi ke u fikr na. <sup>24</sup>Le ti ponn ni bibaa buen kitakpaluj ngbaan chee, ki ti kan ni bi ke bipiib ngbaan aah len pu na. Uma le baa kan.”

<sup>25</sup>Le Yesu bui bi, “Nimi aalan par la. Naa gaa Uwumbor aabɔnabtiib aah nan len pu na mɔmɔk mala. <sup>26</sup>Uwumbor le nan siin ke Kristo u ga gaa binib lii na ga ji falaa kina, le ki nin kan mpɔɔn.” <sup>27</sup>Le Yesu ɣeer waabor ti ɣmee Uwumbor Aagbaŋ ni na mɔmɔk tuk bi. Njan u tuk bi Moses aah nan ɣmee ti pu na, le ki nin tuk bi Uwumbor aabɔnabtiib mɔmɔk aah nan ɣmee ti pu na.

<sup>28</sup>Le bi duun baah cha kitij ki na ni. Le Yesu ɣa ke waah ga piln jer le na. <sup>29</sup>Le bi gaŋ u, “Doon ti chee. Kijook joor a. Naan yunn le ni ga mue.” Le u koo ni bi chee. <sup>30</sup>Le bi ti kal ke bi ji tijikaar. Waah kal bi chee ke u ji tijikaar na, le u yoor boroboro, ki doon Uwumbor, ki gii, ki di tii bi. <sup>31</sup>Le Uwumbor likr binimbil ke bi bee u. Libuul ngbaan ni le baa ki kan u. <sup>32</sup>Le bi bui tɔb, “Waah dii timi nsan ni ki len ti chee ki ɣeer Uwumbor Aagbaŋ aaliin aatataa tuk timi na, tisui aa ba piin u pu sakpen aa?”

<sup>33</sup>Libuul ngbaan ni, le bi fii, ki gir buen Jerusalem, ki ti kan Yesu aakpam-balb kipiik ni ubaa na, ni waadidiliib biken kuun tɔb chee, <sup>34</sup>ki bi len ke, “Tidindaan sil fikr nkun ni. Simonn le kan u.”

<sup>35</sup>Le waadidiliib bilee ngbaan mu tuk bi Yesu aah pii bi nsan ni pu na, ni baah bee u buyoonn u gii boroboro na.

### Yesu aah di ubaa mɔk waadidiliib pu na

(Matiu 28.16-20; Mak 16.14-18;  
Jonn 20.19-23; Lituln 1.6-8)

<sup>36</sup>Baah len tɔb chee tibor kina na, libuul ngbaan ni le Yesu ubaa sil bikassisik ni, le ki bui bi, “Ni li kpa nsuudoon man.”

<sup>37</sup>Le bipobil yuk; ijawaan chuu bi sakpen a. Bi nan dak ke bi kan utekpiir aawiin la. <sup>38</sup>Le u baa bi, “Ba ɣa ni san ijawaan? Ba ɣa ni beeni nisui ni? <sup>39</sup>Lik ɣjaal ni ntaa, ki bee ke m sil ye. Taln ninjaal ki di meeh mi ki lik man. Utekpiir aawiin aa kpa tinann ni ɣikpab ke naah kan m kpa pu na.”

<sup>40</sup>Waah len kina na, le u mɔk bi baah nan kpaa ɣjaal ni utaa ponn ni ipiin pu na. <sup>41</sup>Bi nan kpa mpopiin sakpen, ki mu aa kee gaa kii mbamɔm. Ni nan gar bi pam. Le u baa bi, “Tijikaar tibaa bi do oo?” <sup>42</sup>Le bi tii u lijangeln li bi pul li mmii ni na. <sup>43</sup>Le u gaa, ki ɣman li binimbil ni.

<sup>44</sup>U nan bui bi, “Maabor timɔk ɣmee Moses aakaal ponn ni, ni Uwumbor aabɔnabtiib aagbann ni, ni Uwumbor aalahna aagbaŋ ni na, Uwumbor le siin ke ni mɔmɔk ga gbiin. Maah nan laa bi ni chee na, m nan tuk nimi kina la.”

<sup>45</sup>Le u woln binimbil ke bi bee Uwumbor Aagbaŋ aaliin aatataa, <sup>46</sup>le ki bui bi, “Ni ɣmee ke Kristo u ga gaa binib lii na ga ji falaa, ki fikr nkun ni, iwiin itaa daal. <sup>47</sup>Ni li mooni binib maayimbil pu, ke bi yaa kpeln baabimbin kan, Uwumbor ga di cha baatunwanbir pinn bi. Ni piin ki li mooni Jerusalem aatiŋ aanib ni, aan ki nin moon ɣinibol mɔmɔk mu ni. <sup>48</sup>Nimi le ye maabor mɔmɔk aaseeraadam. <sup>49</sup>Nte Uwumbor aah puu tipuur ti ke u ga tii nimi Waafuur Nyaan na, m ga tun ni Nfuur Nyaan ngbaan ni chee. Ni li bi Jerusalem ni ki ti saa bundaln ni

ga kan mpoōn mu ga nyan ni paacham na.”

**Uwumbor aah di Yesu  
buen paacham pu na**

(*Mak 16.19-20; Lituln 1.9-11*)

<sup>50</sup>Le Yesu di bi buen Betani aatīj chee.  
Baah ti fuu nima na, le u yoor unjaal

paacham, ki ḷa Uwumbor aanyoor ḷa bi pu.<sup>51</sup> Waah laa bi ḷani kina na, le u nyan bi chee, Uwumbor di u buen paacham.<sup>52</sup> Le bi gbaan kitij ki doon u, ki nin gir buen Jerusalem ni, ki kpa mpopiin sakpen,<sup>53</sup> ki pak Uwumbor, waadichal ponn ni, n-yoonn mɔmɔk.

*Tibɔnyaan ti*

**JCNN**

*ŋmee ti na*

### Unii u bi yin u ke Limɔboln na aabor

**1** Uwumbor aah kaa nan kee naan dulnyaa na, ubaa nan bi, bi yin u ke Limɔboln. U nan bi Uwumbor chee, ki bi ke Uwumbor aah bi pu na. <sup>2</sup> U nan bi Uwumbor chee ki nyan ni mpiila. <sup>3</sup> Uwumbor nan cha u naan tiwan momɔk. Tiwan nibaa aa gur waa naan ni. <sup>4</sup> Uma le ye umɔfadaan. Limɔfal ngbaan tii binib nwiihn mu wolni binimbil na. <sup>5</sup> Nwiihn ngbaan wolni mbɔmbɔon ni. Mbɔmbɔon aa junn nwiihn ngbaan.

<sup>6</sup> Uwumbor nan tun ni uja ubaa, bi nan yin u ke Jɔnn. <sup>7</sup> U dan ke u nan tuk binib nwiihn ngbaan aabor, aan binib momɔk jjun waah len pu na, aan ki gaa nwiihn ngbaan. <sup>8</sup> Jɔnn aa nan ye nwiihn ngbaan. U dan ke u nan tuk binib nwiihn ngbaan aabor la. <sup>9</sup> Nwiihn ngbaan le ye nwiihn bamɔnn, le ki dan dulnyaa wee ni ki nan wolni binib momɔk aanimbil.

<sup>10</sup> Baah yin u ke Limɔboln na nan naan dulnyaa, ki dan nan bi dulnyaa ni, le dulnyaa aanib aa bee u. <sup>11</sup> U dan udo aatiŋ ni, le udo aatiŋ ni yaab yii u. <sup>12</sup> Binib bimɔk gaa u na, u tii bi nsan ke bi kpalm Uwumbor aabim. Bima le ye binib bi gaa u ki kii na. <sup>13</sup> Baah kpalm Uwumbor aabim na, naa ye ke binibɔm le ma bi Uwumbor aamaal ni, kaa ye binibɔm aageehn pu. Uwumbor le ma bi waamaal ponn ni.

<sup>14</sup> Baah yin u ke Limɔboln na nan kpalm unibɔn, ki nan bi tikaasisik ni. U gee binib chob, ki len ibamɔn baanja la. Le ti kan waah kpa mpɔɔn pu na. Waah ye Uwumbor Aajapɔnbaal na, u

kpa mpɔɔn ke Ute Uwumbor aah kpa pu na.

<sup>15</sup> Jɔnn nan tuk binib waabɔr, ki len ke, “M nan tuk nimi ke unii u ga paan ni mpumwɔb na jer mi; baah kaa nan kee ma mi na, u nan bi. Uma le na.”

<sup>16</sup> Uwumbor aah bi pu na, u mu bi kina le chob. Le ti momɔk gaa waabimbin. U ja Uwumbor aanyoor ja ti pu, ki beenin ŋjani timi tinyoor n-yoonn momɔk. <sup>17</sup> Uwumbor nan tuk Moses waakaal ke u di tuk timi. Yesu Kristo dan nan tuk timi Uwumbor aah gee timi pu na, ki tuk timi tibɔr ti ye mbamɔn na. <sup>18</sup> Ubaa aa kee kan Uwumbor. Ujaponbaal Yesu Kristo, u bi ke Ute Uwumbor aah bi pu na, ki bi u chee na, uma le tuk timi Uwumbor aah bi pu na.

**Jɔnn u nan muini binib nnyun  
ni na aah len pu na**

(Matiu 3.1-12; Mak 1.1-8; Luk 3.1-18)

<sup>19</sup> Juu yaab bi nan bi Jerusalem aatiŋ ni na nan tun ni Uwumbor aatotoorb ni Liifai yaab Jɔnn chee ke bi ti baa u, “Aa ye ŋjma?”

<sup>20</sup> Le Jɔnn tuk bi mbamɔn, kaa gur tibaa. U nan tuk bi mbamɔn, ki len ke, “Maa ye Kristo u ga gaa binib lii na.”

<sup>21</sup> Le bi ki baa u ke, “Aa ye ŋjma? Aa ye Elaija aa?”

Le u bui bi, “Maa ye.”

Bi nan ki baa u ke, “Aa ye Uwumbor aabɔnabr u bi bui ke u ga dan aa?”

Le u bui bi, “Aayii.”

<sup>22</sup> Nima pu na, bi nan ki baa u ke, “Aa ye ŋjma? Tuk timi, aan ti ti tuk binib bi tun ni timi na. Aa ga len saabɔr ngbaan kinye?”

<sup>23</sup> U nan bui ke,  
“M ye nneel mu tar nteersakpiin ni na ke:

‘Toor Uwumbor aasan man.’”‡

Uwumbor aabonabr Aisaya nan len kina la.

<sup>24</sup> Binib bi nan baa Jønn mbaan ngbaan na nyan ni Farisii yaab chee la.

<sup>25</sup> Le bi ki baa u ke, “Saah kaa ye Kristo u ga gaa timi lii na, kaa ye Elaija, kaa ye Uwumbor aabonabr ngbaan mu na, ba pu aa muini binib nnyun ni?”

<sup>26</sup> Le u bui bi, “Mma muini binib nnyun ni la. Ubaa mu bi nikaasisik ni. Nimi le aa nyi u. <sup>27</sup> U ye unii u paan ni mpuwob na. Maa neer ke m chuu gbiln waanaataak aajmin tii u.”

<sup>28</sup> Bi nan len tøb chee tibor ngbaan Bé-tani aatinj, ki bi Jølland aamodapuul, Jønn aah muini binib nnyun ni nin chee na ni.

### Unii u ye Uwumbor Aapihbo na

<sup>29</sup> Ki woln kitaak le Jønn kan Yesu choo u chee, le u bui ke, “Lik, Uwumbor Aapihbo u nyani dulnyaa ni aanib aatunwanbir na. <sup>30</sup> M nan len ke uja ubaa paan ni mpuwob ki mu tee jer mi; baah kaa nan kee ma mi na, u nan bi. Uma le na. <sup>31</sup> Min mbaa aa nan nyi u; m muini binib nnyun ni ke nimi Israel yaab bee u la.”

<sup>32</sup> Le Jønn jin seeraa ki tuk binib, “M kan Uwumbor Aafuur Nyaan nyan ni paacham ki naahn linanel, ki nan tøj u pu. <sup>33</sup> Min mbaa aa nan nyi u; Uwumbor u tun ni mi ke m nan muin binib nnyun ni na, uma le bui mi ke m ga kan Waafuur Nyaan sunn ni ki nan tøj uja ubaa pu, ke uma le ye unii u ga gbiin binib Uwumbor Aafuur Nyaan na. <sup>34</sup> Le m kan kina, ki ji seeraa ki tuk binib ke uma le ye Uwumbor Aajapcoon.”

### Binib bi puen ja Yesu aadidiliib na

<sup>35</sup> Ki woln kitaak le Jønn ni waadidiliib bilee nan ki bi nima, <sup>36</sup> ki kan Yesu bi chuun nima. Jønn nan lik u, le ki len ke, “Lik, Uwumbor Aapihbo.”

<sup>37</sup> Jønn aadidiliib bilee ngbaan jun waah len pu na, le ki di paan Yesu pu.

<sup>38</sup> Le Yesu fenn, ki kan bi paan ni u pu. Le u baa bi, “Ni ban ba?”

Le bi baa u, “Umomokr, aa koo la chee?”

<sup>39</sup> Le u bui bi, “Dan ki nan ti lik man.” Le bi dii u ki ti kan waah koo nin chee na. Ni nan ye tikur tinaa aayoonn la, le bi nan doon udo liyadaal ngbaan.

<sup>40</sup> Bijab bilee bi nan jun Jønn aah len pu aan ki dii Yesu na, bi yin bi ponni ubaa ke Andru, u nan ye Simonn Piita aanaal na. <sup>41</sup> Libuul ngbaan ni le u buen ti kan ukpel Simonn, ki tuk u, “Ti kan Masiya u ga gaa timi lii na.” Masiya ni Kristo ye liyimbibaan la. <sup>42</sup> Le u di u dan Yesu chee.

Le Yesu lik Piita, ki bui u, “Bi yin si le ke Simonn, Jønn aajapcoon. Bi ga li gur yin si ke Siifas la.” Siifas aatataa le ye ke “litakpal.” Siifas ni Piita ye liyimbibaan la.

### Yesu aah yin Filip ni Natanael pu na

<sup>43</sup> Ki woln kitaak le Yesu ban u buen Galilee aatinj ni, ki kan Filip, le ki bui u, “Li dii mi.” <sup>44</sup> Filip do le ye Betseda aatinj ni. U ni Andru ni Piita nyan ni kitinbaan ni la. <sup>45</sup> Filip mu nan ti kan Natanael le ki tuk u, “Ti kan unii u Moses ni Uwumbor aabonabtiib mu nan jumee waabor Uwumbor aakaal aagban ni na. Uma le ye Josef aajapcoon Yesu, u ye Nasaref aatinj aamii na.”

<sup>46</sup> Le Natanael baa u, “Tiwanyaan nibaa ga jumaa nyan ni Nasaref aatinj ni ii?”

Le Filip bui u, “Dan nan lik.”

<sup>47</sup> Yesu nan waa Natanael choo u chee, le ki bui ke, “Lik, Israel aabobamonn. Nnyamonn aa bi u ni.”

<sup>48</sup> Le Natanael baa u, “Aa ja kinye ki ti nyi mi?”

Le Yesu bui u, “Saah ba bi likakaln taab na, m puen kan si, Filip aa kee yin si.”

<sup>49</sup> Le Natanael bui u, “Umɔmɔkr, aa sil ye Uwumbor Aajapɔɔn. Aa ye Israel yaab Aabɔrkpaan la.”

<sup>50</sup> Le Yesu baa u, “Maah bui ke m kan si likakaln taab na, nima le cha aa gaa mi ki kii ii? Aa ga kan lijinjiir aawan ki jer nimina. <sup>51</sup> M tuk nimi mbamɔn la, ni ga kan kitaapaak chuu piir, ki ga kan Uwumbor aatuuntiib cha paacham ki ki sunni, min Unibɔn Aabo pu.”

### Yesu aah tun lijinjiir aatuln Kana aatiŋ ni pu na

**2** Iwiin itaa daal le bi nan ji ubɔndinn aajim Kana aatiŋ ki bi Galilee ni na. Yesu aana mu nan bi nima. <sup>2</sup> Bi nan yin Yesu ni waadidiliib ke bi mu dan nan ji. <sup>3</sup> Ni nan bi cha, le ɔjisubil aadaan na ti doo. Le Yesu aana bui u, “Baa ki kpa ndaan.”

<sup>4</sup> Le Yesu bui u, “Nna, ni ye maabor aa? Maayoonn aa kee fuu.”

<sup>5</sup> Le una bui bitutum na, “U yaa tuk nimi pu na kan, ni ja kina.”

<sup>6</sup> Ikin sakpiin iloop nan si nima. Galoj piitaa, bee moninko ga ɔmmaa koo mubaa ponn ni. Juu yaab joo ikin ngbaan aanyun le finni bibaa, baakaal aah dii pu na. <sup>7</sup> Le Yesu tuk bitutum ngbaan, “Ban nnyun gbiin ikin ngbaan man.” Le bi ban nnyun gbiin i mɔmɔk paapaa. <sup>8</sup> Le u tuk bi ke kab ti tii njim aaninkpel. Le bi kab ti tii u. <sup>9</sup> Baah kab nnyun ngbaan ti tii u na, le mu kpalm ndaan. Le u wub lik, kaa nyi mu aah nyan nin chee na. Bitutum bi kab tii u na le nyi. Le u yin uja u din upii na, <sup>10</sup> ki nan bui u, “Binib mɔmɔk yaa ban bi tii ndaan kan, bi puen tii mu mɔ na la. Binib yaa nyun ti bab kan, le bi nin tii bi ndaan mu kaa mɔ na. Si ma kan, saah tii bi mu puwɔb na le mɔ ki jer saah puen tii bi mu na.”

<sup>11</sup> Nima le ye njan aajinjiir aatuln li Yesu tun na. U nan tun lituln ngbaan Kana aatiŋ ki bi Galilee ni na ni la. Le binib kan waah kpa Uwumbor aapɔɔn pu na. Le waadidiliib gaa u ki kii.

<sup>12</sup> Ubɔndinn aajim ngbaan aah doo na, le u ni una ni unaatiib ni waadidiliib buen Kapenaum aatiŋ ni, ki ti ja iwiin ilee nima.

### Yesu aah toor Uwumbor Aadichal pu na

(Mati 21.12-13; Mak 11.15-17; Luk 19.45-46)

<sup>13</sup> Ni nan gur siib ke Juu yaab ji Lakr-jer aajim.<sup>14</sup> Le Yesu buen Jerusalem aatiŋ ni <sup>14</sup>ki ti koo Uwumbor Aadichal ni, le ki kan binib ka nima ki kooh inaaja, ni ipiih, ni ɔjinanjel. Binib bi kpelni ɔjimobil na mu ka nima. <sup>15</sup> Le u di ijmin ja linaalab, ki di jenn nyan inaaja, ni ipiih ngbaan mɔmɔk lipaal, le ki labr binib bi kpelni ɔjimobil na aateebul tiib chinj, le ɔjimobil yaa tsb chee. <sup>16</sup> U nan tuk binib bi kooh ɔjinanjel na, “Di ɔjinanjel ngbaan nyan lipaal man. Ni taa ki di Nte Uwumbor Aadichal ja kinyar.” <sup>17</sup> Le waadidiliib teer ke ni ɔjmee Uwumbor Aagbaŋ ni ke, “Uwumbor, maah neen saadichal pu na bi ke mmii le aah wu mponn ni na.” Le bi bee ke ni ye Yesu aabɔr la.

<sup>18</sup> Le Juu yaab baa u, “Aa ga ja ba aajinjiir aawan ki mɔk timi ke aa kpa nsan ke aa ja saah ɔnani pu na?”

<sup>19</sup> Le u bui bi, “Gbaa wii Uwumbor Aadichal limina, aan m di iwiin itaa ki fiin li.”

<sup>20</sup> Le bi bui ke, “Ijibin imonko ilee ni ɔiloob le bi nan di maa Uwumbor Aadichal ngbaan. Le aa bui ke aa ga di iwiin itaa fiin li ii?”

<sup>42:13</sup> : Israel yaab nan ji Lakr-jer aajim ke bi teer buyoonn Uwumbor nan nyan bi tinaagbiir ni, Ijipt aatiŋ ni na. Lik Nnyam 12.1-27.

<sup>21</sup>Tɔ, u mu aa nan len Uwumbɔr Aadichal aabɔr la. Uma ubaa aawon le u nan len. <sup>22</sup>N-yoonn mu u fikr nkun le na, le waadidiliib teer ke u nan len kina. Le bi pak waah len pu na, ni Uwumbɔr Aagbaŋ aah len pu na.

### Yesu nyi binib mɔmɔk aabimbin

<sup>23</sup>Yesu aah bi Jerusalem aatin ni, njim ngbaan aayoonn na, le kinipaak kan waah tun lijinjiir aatun pu na, le ki gaa u ki kii. <sup>24</sup>Uma aa tee gaa bi ki kii; <sup>25</sup>ba pu? u nyi binib mɔmɔk aabimbin. Waa ban ke ubaa nyaa u binib aabɔr. Uma ubaa nyi binib aasui ni aabɔr.

### Yesu aah tuk Nikodemus pu na

**3** Uja ubaa mu nan bi nima, bi nan yin u ke Nikodemus, u nan ye Farisii aanii la, ki ye Juu yaab aaninkpel ubaa. <sup>2</sup>Le u buen Yesu chee kinyeek ki nan bui u ke, “Umɔmɔkr, ti nyi ke aa ye Umɔmɔkr u nyan ni Uwumbɔr chee na la; ba pu? ubaa aan ɔjmaa tun lijinjiir aatun ke saah tun pu na, see Uwumbɔr bi u chee.”

<sup>3</sup>Le Yesu bui u, “M tuk si mbamɔn la, bi yaa kaa ma unii lelee kan, waan ɔjmaa koo Uwumbɔr aanaan ni.”

<sup>4</sup>Nikodemus nan baa u, “Unii yaa por kan, bi ga ɔja kinye ki ki ma u lelee? U ga ɔjmaa gir koo una aaponn ni aan bi ki ma u uu?”

<sup>5</sup>Le Yesu bui u, “M tuk si mbamɔn la, Uwumbɔr Aafuur Nyaan yaa kaa ma unii lelee aan bi muin u nnyun ni kan, waan ɔjmaa koo Uwumbɔr aanaan ni. <sup>6</sup>Unibɔn aah ma u na ye unibɔn la. Uwumbɔr Aafuur Nyaan aah ma u na ye Uwumbɔr Aafuur Nyaan yoo la. <sup>7</sup>M tuk si la, see bi ki ma nimi lelee. Maah tuk si pu na, taa cha ni gar nimi. <sup>8</sup>Libuln daar cha laah ban nin chee na, le aa ɔjun laah kpa kifuuk pu na, kaa nyi laah nyan ni nin chee na, ki mu aa nyi laah cha nin chee na. Ni bi

kina le ki tii unii umɔk Uwumbɔr Aafuur Nyaan ma u na.”

<sup>9</sup>Le Nikodemus baa u, “Ni ga ɔja kinye aan ki ɔja kina?”

<sup>10</sup>Le Yesu baa u, “Aa ye unii u mɔk Israel yaab Uwumbɔr aakaal na, le kaa bee maah len pu na aatataa aa? <sup>11</sup>M tuk si mbamɔn la, ti len taah nyi pu na la, ki tuk binib tinimbil aah kan pu na, le naa gaa taah len pu na. <sup>12</sup>M tuk nimi dulnyaa wee ni aabɔr, le naa pak ti, ka m yaa tuk nimi paacham aabɔr kan, ni ga ɔja kinye ki pak ti? <sup>13</sup>Ubaa aa kee buen paacham see min Unibɔn Aabo u [bi paacham ki] nyan ni paacham na.

<sup>14</sup>“Moses aah nan di uwaa fin ndɔ pu ki di chɔɔn paacham nteersakpiin ni pu na, see bi di min Unibɔn Aabo mu chɔɔn paacham kina, <sup>15</sup>aan unii umɔk gaa mi ki kii na li kpa limɔfal li kaa kpa ndoon na.”

<sup>16</sup>Uwumbɔr aah gee dulnyaa aaniib sakpen pu na, nima le u di Ujapɔnbaal tii ni ke unii umɔk gaa u ki kii na taa kpo, u li kpa limɔfal li kaa kpa ndoon na. <sup>17</sup>Uwumbɔr tun ni Ujapɔn dulnyaa ni. Waa tun ni u ke u nan ji dulnyaa wee ni aaniib tibɔr, u tun ni u ke u gaa bi lii la.

<sup>18</sup>Unii umɔk gaa u ki kii na, Uwumbɔr aa len ke waabɔr bii. Unii umɔk kaa gaa u ki kii na, Uwumbɔr len ke waabɔr bii a. Waah kaa gaa Uwumbɔr Aajapɔnbaal ki kii na, nima le cha Uwumbɔr len ke waabɔr bii. <sup>19</sup>Uwumbɔr aah ga ji bi tibɔr pu na le ye ke nwiihn dan dulnyaa ni, le binib yii mu, le ki gee mbɔmbɔɔn ni; ba pu? baatuln aa ɔjan. <sup>20</sup>Unii umɔk tun lituln li kaa ɔjan na, u nan nwiihn la, kaan dan nwiihn ponn ni, binib taa kan waah tun pu na. <sup>21</sup>Unii umɔk tun lituln li ɔjan na kan, u choo nwiihn ponn ni ke unii mɔmɔk nan kan waah tun pu na, ke u tun Uwumbɔr aah gee pu na la.

### Jənn aah len Yesu aabər pu na

<sup>22</sup> Yesu aah len tibər timina ki ti doo na, le u ni waadidiliib buen Judea aatiŋ ni, ki ti bi nima ki muini binib nnyun ni. <sup>23</sup> Jənn mu nan bi muini binib nnyun ni. U nan bi Enonn aatiŋ ni, Salim aatiŋ chee, nnyun aah wir nima chee pu na. Le binib choo u chee, le u muini bi nnyun ni. <sup>24</sup> Baa nan kee chuu u ḥa kiyondiik ni n-yoonn ngbaan.

<sup>25</sup> Le Jənn aadidiliib ni Juu aanii ubaa nan kpak təb kinikpapkak, baah muini binib nnyun ni pu na pu. <sup>26</sup> Le bi dan Jənn chee ki nan tuk u, “Uməməkr, lik, unii u nan bi aa chee Jəədann aaməddapuul na, aan aa nan tuk binib waabor na, u mu gur bi muini binib nnyun ni, le binib məmək gur chaa u chee.”

<sup>27</sup> Le Jənn bui bi, “Ubaa aan ḥjmaa ḥja nibaa see Uwumbər le tii u. <sup>28</sup> Nimi nibaa ḥjun m len ke maa ye Kristo u ga gaa binib lii na; Uwumbər tun ni mi ke m li ye Kristo aasaloln ki toor nsan tii u. <sup>29</sup> Usapoɔɔn yaa kun uchal do kan, uchal le yeh u. Le uchal aajə u si u chee ki ḥjun waaneel na kpa mpopiin pam. Nima le cha m mu kpa mpopiin mbamɔɔm. <sup>30</sup> Ni ḥjan ke uma Kristo li moo kani mpooɔn, le m ma gur.”

### Unii u nyan ni paacham na aabər

<sup>31</sup> Uma u nyan ni paacham na le jer binib məmək. Unii u nyan ni dulnyaa ni na ye dulnyaa ni aanii la, ki len dulnyaa ni aabər la. Yesu u nyan ni paacham na le jer binib məmək. <sup>32</sup> U tuk binib waah kan pu na, ni waah ḥjun pu na. Ubaa mu aa gaa waah len pu na. <sup>33</sup> Unii umək gaa waah len pu na, u kii ke Uwumbər ye mbamɔɔndaan la. <sup>34</sup> Yesu u Uwumbər tun ni u na le len uma Uwumbər aabər; ba pu? Uwumbər di Waafuur Nyaan mu

kaa kpa ḥjəaŋ na gbiin u. <sup>35</sup> Uwumbər gee Ujapoɔɔn Yesu ki di mpooɔn məmək ḥja ujaal ni. <sup>36</sup> Unii umək gaa Uwumbər Aajapoɔɔn ki kii na le kpa limɔfal li kaa kpa ndoon na. Unii umək kaa kii Uwumbər Aajapoɔɔn aaməb na, waan kan limɔfal li kaa kpa ndoon na. Uwumbər gee lijuul u pu n-yoonn mu kaa kpa ndoon na.

### Yesu aah tuk Samaria aatiŋ aapii pu na

**4** Le Farisii yaab ḥjun ke Yesu ḥja binib waadidiliib ki muin bi nnyun ni ki jer Jənn aah ḥja pu na. <sup>2</sup> Yesu ubaa mu aa muin binib nnyun ni. Waadidiliib na le muini bi. <sup>3</sup> Tɔ, waah bee ke Farisii yaab ḥjun kina na, le u nyan Judea aatiŋ ni, ki ki gir buen Galilee aatiŋ ni. <sup>4</sup> Waah cha na, le u neen ke u dii Samaria\*\* aatiŋ ni.

<sup>5</sup> Le u ti fuu Samaria aatiŋ kibaa ni, bi yin ki ke Saika. Bukpaab bu Jakob nan di tii ujapoɔɔn Josef na aa daa nima chee. <sup>6</sup> Jakob aanyunbun mu bi nima chee. Le Yesu aah chuun na, u bak a. Nima le u kal nnyunbun ngbaan aaməgbeln pu. Nwiin nan bi kaasisik ni.

<sup>7</sup> Le Samaria aapii ubaa dan u nan lu nnyun. Le Yesu bui u, “Pu mi nnyun m nyu.” <sup>8</sup> Waadidiliib na puun buen kitij ponn ni bi ti daa tijikaar.

<sup>9</sup> Le upii ngbaan bui u, “Aa ye Juu aanii la, m mu ye Samaria aapii la. Ba pu aa bui mi ke m tii si nnyun?” Juu yaab ni Samaria yaab aa kpaani təb chee, nima le cha u len kina.

<sup>10</sup> Le Yesu bui u, “Aa yaa ba nyi Uwumbər aah tii binib pu na, ki yaa ba nyi unii u mee si nnyun na kan, aa ba ga bui u ke u tii si nnyun mu ye limɔfal aanyun na, le u ba ga tii si.”

<sup>11</sup> Le upii ngbaan bui u, “Maaninkpel, saa kpa goomaa, nnyunbun ngbaan nyoo, aa ga kan limɔfal aanyun ngbaan

<sup>§3:29</sup> : Uja ni usapoɔɔn ngbaan si Yesu ni waanib aasisii la, Jənn le ye ujɔ.

\*\*4:4 : Samaria yaab ni Juu yaab aakaasisik ni aa nan mo.

la chee? <sup>12</sup> Tiyaaja Jakob, ni ujapotiib, ni waawakor nan nyu nnyunbun ngbaan ni la. Uma le nan tii timi nnyunbun ngbaan. Aa jer uma la aa?”

<sup>13</sup> Le Yesu bui u, “Unii umok nyu nnyun mue na, nnyunyuu ga ki chuu u.

<sup>14</sup> Unii umok nyun maah ga tii u nnyun mu na, nnyunyuu aan ki chuu u. Maah ga tii u nnyun mu na, mu ga li ye nnyunbun mu bu u ponn ni kaan foor na, mu ga tii u limofal li kaa kpa ndoon na.”

<sup>15</sup> Le upii ngbaan bui u, “Maaninkpel, tii mi nnyun ngbaan aan nnyunyuu taa ki chuu mi, aan m taa ki dan do nan lu nnyun.”

<sup>16</sup> Le Yesu bui u, “Li cha ki ti yin ni aachal, aan ki gir ni.”

<sup>17</sup> Le u bui u, “Maa kpa chal.”

Le Yesu bui u, “Saah len ke saa kpa chal na, ni ye mbamom la. <sup>18</sup> Aa nan kpa chatiib bijmu la. Saah bi uja u chee dandana na aachal aa ye u. Saah len pu na, aa len mbamom la.”

<sup>19</sup> Le upii ngbaan bui u, “Maaninkpel, m bee ke aa ye Uwumbor aabonabr la.

<sup>20</sup> Timi Samaria yaab aayaajatiib nan dooni Uwumbor lijool limina paab la, le nimi Juu yaab ma bui ke ni jan ke binib li dooni Uwumbor Jerusalem aatiij ni.”

<sup>21</sup> Le Yesu bui u, “Upii, pakn maah ga len pu na, n-yoonn choo, binib aan nan ki doon Tite Uwumbor lijool limina paab, ki mu aan ki doon u Jerusalem aatiij ni. <sup>22</sup> Nimi Samaria yaab dooni Uwumbor u naa nyi u na. Timi Juu yaab ma dooni Uwumbor u ti nyi u na la. Unii u ga gaa dulnyaa ni aanib lii na nyan ni Juu yaab aakaasisik ni la. <sup>23</sup> N-yoonn choo, ki mu fuu ni a, le binib bi dooni Tite Uwumbor mbamom na ga li dooni u bisui ni, Waafuur Nyaan aapcoen pu. Uwumbor ban binib kina aaboln le bi li

dooni u. <sup>24</sup> Uwumbor ye kifuurk la. Le binib bimok dooni u na li dooni u bisui ni, Waafuur Nyaan aapcoen pu.”

<sup>25</sup> Le upii ngbaan bui u, “M nyi ke Masiya†† u bi yin u ke Kristo na ga dan. U yaa fuu ni kan, u ga nan tuk timi tiwan momok aah bi pu na.”

<sup>26</sup> Le Yesu bui u, “Min u bi len aa chee na, m ye uma.”

<sup>27</sup> Libuul ngbaan ni le waadidiliib fuu ni. Baah nan mui u ni upii bi len tob chee tibor na,‡‡ le ni gar bi pam; ubaa mu aa baa upii ngbaan, “Aa ban ba?” kaa baa Yesu mu, “Ba pu aa len u chee tibor?”

<sup>28</sup> Le upii ngbaan di waanyunbuul siin, ki buen kitij ni, ki ti bui binib ke, <sup>29</sup> “Dan nan lik man uja u tuk mi maah nan tun pu na momok na. Uja ngbaan ga li ye Kristo u ga gaa timi lii na la aa?” <sup>30</sup> Le bi nyan kitij ni ki cha u chee.

<sup>31</sup> Upii ngbaan aah gir buen kitij ni na, le Yesu aadidiliib nan bi gaajni u ke, “Umomokr, ji tijikaar.”

<sup>32</sup> Le u bui bi, “M kpa tijikaar ti naa nyi tibor na m ji.”

<sup>33</sup> Waah len kina na le waadidiliib baa tob, “Ubaa le taanin joo ni tijikaar nan tii u uu?”

<sup>34</sup> Le u bui bi, “Maajikaar le ye ke m ja Uwumbor u tun ni mi na aah gee pu na, ki tun waatuln doo. <sup>35</sup> Ni jakl liyatankl ke, ‘Ni gur ijmal inaa le ni neer lijikaacheel.’ To, m tuk nimi la, yaar lik man, tijikaar neer licheel a. <sup>36</sup> Unii u chee na ga kan tipar, ki ga di binib koon Uwumbor aanaan ni, aan bi kan limofal li kaa kpa ndoon na. Nima le ga cha unii u bun na, ni unii u chee na momok li kpa mpopiin. <sup>37</sup> Bi len ke ‘Ubaa bun, le uken chee,’ le ti gbii; <sup>38</sup> ba pu? m tun nimi, ni ti chee tijikaar ti naa tun taatuln na. Biken aatuln pu, le ni jin tinyoor.”

††4:25 : Hiibru aaliin ni, bi yin u ke Masiya, le ki yin u ke Kristo, Griik aaliin ni. Naataata le ye ke “Unii u ga gaa binib lii na.”

‡‡4:27 : Juu yaab aabimbin aah nan bi pu na, uja ni upii u kaa ye upuu na aan gbaa tob chee tibor.

<sup>39</sup> Le upii ngbaan tuk Samaria yaab bi bi kitij ngbaan ni na ke Yesu tuk u waah nan tun pu na mɔmɔk, nima le cha bi ponn ni pam gaa Yesu ki kii. <sup>40</sup> Le bi dan u chee, ki gaŋ u ke u li bi bi chee. Le u ḥja bi chee iwiin ilee.

<sup>41</sup> Le binib bi gaa u ki kii waaliin pu na wiir ki jer binib bi gaa u ki kii upii ngbaan aaliin pu na. <sup>42</sup> Le bi tuk upii ngbaan, “Ti gaa u ki kii la; naa ki ye saaliin pu le ti gaa u ki kii. Timi tibaa ḥjun waah len pu na, ki bee ke u sil ye Kristo u ga gaa dulnyaa ni aanib lii na.”

### Yesu aah cha uninkpel ubaa aabo pɔɔk pu na

<sup>43</sup> Yesu aah bi bi chee iwiin ilee na, le u nyan nima ki buen Galilee aatiŋ ni. <sup>44</sup> Uma ubaa le len ke Uwumbor aabɔnabr ma kan, udo aatiŋ ni aanib aan nyuj u. <sup>45</sup> Waah ti fuu Galilee aatiŋ ni na le bi gaa u; ba pu? bi mu nan buen Jerusalem bi ti ji njim ngbaan, ki kan waah tun lijinjiir aatun njimɔk na, njim ngbaan yoonn.

<sup>46</sup> Le u ki dan Galilee aatiŋ kibaa ni, bi yin ki ke Kana, waah nan cha nnyun kpalm ndaan nin chee na. Le ubɔrkpaan aakpambalb ponn ni ubaa bi Kapenaum aatiŋ ni. Le ujapɔɔn bun. <sup>47</sup> Uninkpel ngbaan nan ḥjun ke Yesu nyan ni Judea aatiŋ ni ki bi Galilee aatiŋ ni. Le u buen Yesu chee, le ki ti gaŋ u ke u dan udo, ki nan cha ujapɔɔn u ban u kpo na aaween sɔŋ. <sup>48</sup> Le Yesu bui u, “Ni yaa kaa kan lijinjiir aatun kan, naan gaa mi ki kii.”

<sup>49</sup> Le uninkpel ngbaan bui u, “Ndindaan, dan mala. Aa yaa taan kan, aa ga nan mui maabo kpo a.”

<sup>50</sup> Le Yesu bui u, “Li dii saasan. Aajapɔɔn kan limɔfal la.”

Le uja ngbaan pak Yesu aah len pu na, ki labr kun. <sup>51</sup> Waah paan ni nsan pu na le waatutum tooh ni u nsan ni ki nan bui u ke waabo na kan limɔfal a.

<sup>52</sup> Le u baa bi, “Bayoonn ni sɔŋ?” Le bi bui u, “Fen na, nwiin aah kpar buyoonn na, le uwon sɔŋ.” <sup>53</sup> Le uja ngbaan mu bee ke n-yoonn mu Yesu fe bui u ke ujapɔɔn kan limɔfal na le na. Kina pu le cha u ni waachiln ni aanib mɔmɔk gaa Yesu ki kii.

<sup>54</sup> Nimina le nan ḥja lijinjiir aatuln leler le u tun waah nyan ni Judea aatiŋ ni ki bi Galilee ni na.

### Yesu aah cha uja pɔɔk nnyunbun chee pu na

**5** Nee aapuwɔb le Juu yaab aajim mubaa nan bi. Le Yesu buen Jerusalem. <sup>2</sup> Jerusalem ponn ni le nnyunbun mu waa na bi ipiih aabisamɔb chee. Juu yaab aaliin ponn ni bi yin nnyunbun ngbaan ke Betsata. Tinaamboln tijmu nan si gob nnyunbun ngbaan. <sup>3</sup> Le bibum wiir ki dɔ tinaamboln ngbaan ponn ni. Bi nan ye bijoom, ni biwɔb, ni binib bi aawon faan na, [ki dɔ kii buyoonn nnyun ga fii yeŋ na; <sup>4</sup> ba pu? nwiin nwiin le Uwumbor aatuun ubaa sunn ni ki nan koo nnyunbun ni, ki ti kur nnyun. Bundahn u yaa ti dan nan kur nnyun na kan, ubun u puen koo nnyun ni na kan, le u pɔɔk.] <sup>5</sup> Le uja ubaa bi nima ki bun ḥjibin piitaa ni ḥjiniin. <sup>6</sup> Le Yesu kan u, u dɔ nima, le ki bee ke u bun ni yunn. Le u baa u, “Aa ban aa pɔɔk aa?”

<sup>7</sup> Le u bui u, “Ndindaan, nnyun yaa fii yeŋ kan, maa kpa unii u ga di mi koon nnyun ni na. M yaa ban m koo nnyun ni kan, le ubaa puen mi ki koo.”

<sup>8</sup> Le Yesu bui u, “Fiin ki yoor saawandookaan ki li chuun.” <sup>9</sup> Libuul ngbaan ni le u pɔɔk, le ki yoor waawandookaan, ki bi chuun.

Liyaadaal ngbaan nan ye Juu yaab aakpaakool daal la. <sup>10</sup> Nima pu le Juu yaab bui uja u pɔɔk na, “Din ye lik-paakool la. Saah yoor saawandookaan na, aa bii timi aakaal.”

<sup>11</sup> Le u bui bi, “Uja u tii mi laafee na, uma le bui mi ke m voor maawan-dookaan ki li chuun.”

<sup>12</sup> Le bi baa u, “Ijma ye u bui si ke aa voor saawandookaan ki li joo chuun na?”

<sup>13</sup> Le uja u pɔɔk na aa nyi unii u ye na; ni ba ye kinipaak ni la, le Yesu nyan nima ki buen.

<sup>14</sup> Nee aapuwɔb le Yesu kan u Uwumbor Aadichal ni le ki bui u, “Lik, aa pɔɔk a. Aa taa ki tun titunwanbir aan ki taa ki kan falaa u jer saah kan u na.”

<sup>15</sup> Le uja ngbaan buen ti tuk Juu yaab ke Yesu le ye uja u cha u pɔɔk na. <sup>16</sup> Nima pu le Juu yaab nan muk Yesu, ke ba ja u tii ubun laafee likpaakool daal. <sup>17</sup> Le Yesu bui bi, “Nte Uwumbor beenin tun lituln le ki nan saa dandana wee, le m mu bi tun.”

<sup>18</sup> Waah len kina na, le Juu yaab moo ban bi ku u; ba pu? naa ye waah bii lik-paakool daal aakoobil na baanja, u yin Uwumbor ke Ute. Waah yin u ke Ute na, u di ubaa ḥaj Uwumbor la.

### Yesu aah kpa tininkpir pu na

<sup>19</sup> Le Yesu bui bi, “M tuk nimi mbamɔn la, min Uwumbor Aajapɔɔn aa ḥmaa ḥnaa mbaa pu. Maah kan Nte Uwumbor aah ḥjani pu na, le m ḥjani; waah ḥjani pu na, le min Ujapɔɔn mu ḥjani kina; <sup>20</sup> ba pu? Nte Uwumbor gee mi Ujapɔɔn, ki mɔk mi waah tun pu na mɔmɔk. U ga mɔk mi lituln li jer limina na ke m tun, aan ni moo gar nimi. <sup>21</sup> Nte Uwumbor aah fikr binib bi kpo na nkun ni, ki tii bi limɔfal pu na, kina le min Ujapɔɔn mu tii maah lee bi na limɔfal. <sup>22</sup> Nte Uwumbor aa ji unii ubaa tibor, u cha min Ujapɔɔn le ji binib mɔmɔk aabor, <sup>23</sup> aan binib mɔmɔk nyuŋ min Ujapɔɔn ke baah nyuŋ Nte Uwumbor pu na. Unii umɔk kaa nyuŋ min Uwumbor Aajapɔɔn na, waa nyuŋ Uwumbor u tun ni mi na le na.

<sup>24</sup> “M tuk nimi mbamɔn la, unii umɔk ḥjun maaliin ki gaa Uwumbor u tun ni mi na ki kii na, u kpa limɔfal li kaa kpa ndoon na. Uwumbor aan ji u tibor. U nyan nkun ni, ki kan limɔfal a. <sup>25</sup> M tuk nimi mbamɔn la, n-yoonn choo, ki mu fuu ni a, le binib bi kpo na ga ḥjun min Uwumbor Aajapɔɔn aaneel pu, le bi ḥjun na ga kan limɔfal. <sup>26</sup> Nte Uwumbor ye Umfadaan la, le ki ḥja min Ujapɔɔn mu Umfadaan, <sup>27</sup> ki tii mi mpɔɔn ke m ji binib tibor; ba pu? m ye Unibon Aabo la. <sup>28</sup> Ni taa cha nimina gar nimi man. N-yoonn choo, le binib bimɔk bi ḥnikaakul ni na ga ḥjun maaneel pu, <sup>29</sup> ki nyan ni. Binib bi nan tun lituln li ḥjan dulnyaa wee ni na ga fikr ki kan limɔfal li kaa kpa ndoon na. Binib bi nan tun lituln li kaa ḥjan na ga fikr ki kan ntafadaan.”

### Tiwan ni mɔk ke Yesu sil nyan ni Uwumbor chee na

<sup>30</sup> “Maa ḥmaa ḥja nibaa mbaa pu. M ji binib tibor, Uwumbor aah tuk mi pu na la. Maah ji bi tibor pu na, ni ḥjan; ba pu? maa ban maageehn, m ban Uwumbor u tun ni mi na aageehn la.

<sup>31</sup> “M yaa tuk nimi maah ye pu na kan, ni ga len ke taa gbii. <sup>32</sup> Ubaa mu bi ki len maah ye pu na. Uma le ye Uwumbor. M nyi ke waah len pu na, ti gbii. <sup>33</sup> Ni nan tun binib Jɔnn chee. U mu nan tuk nimi maah ye pu na, ki tuk nimi mbamɔn. <sup>34</sup> Naa ye ke m ban unibon aaseeraa la. M ban ke ni ḥjmar, nima le cha m teer nimi Jɔnn aah len pu na. <sup>35</sup> Jɔnn nan bi ke karya u gaal mmii ki wiin na la. Ni nan gee ke ni li bi waawiihn ni, ni yunn siib, ki nan kpa mpopiin. <sup>36</sup> Jɔnn nan tuk nimi maah ye pu na. Tiwan nibaa mu bi ki ji seeraa ki tii mi, ki jer Jɔnn aaseeraa. Nte Uwumbor tii mi lituln ke m tun li ki doo. Lima le m tun. Lituln ngbaan le ji seeraa ki tii mi ke Nte Uwumbor tun ni mi dulnyaa wee ni. <sup>37</sup> Nte Uwumbor u tun ni mi na, uma ubaa le ji seeraa ki tii

mi. Naa kee ḥun waaneel, ki mu aa kee kan unimbil wob. <sup>38</sup> Waaliin aa bi nisui ni; u tun ni mi ni chee, le naa pak maah len pu na; nima le mok ke waaliin aa bi nisui ni. <sup>39</sup> Ni karni Uwumbor Aagbaŋ ke ni bee kaah len pu na; ba pu? ni dak ke ni ga kan limfal li kaa kpa ndoon na ki ponn ni. Kigbaŋ ngbaan len maabor le na. <sup>40</sup> Le naa kii ke ni dan m chee, aan ki kan limfal.

<sup>41</sup> “U nyujni mi na aa ye unibon. <sup>42</sup> M nyi nimi ke naa gee Uwumbor. <sup>43</sup> M dan ni chee Nte Uwumbor aayimbil pu, le naa gaa mi. Ubaa mu yaa dan ni chee uma ubaa aayimbil pu kan, ni ga gaa uma. <sup>44</sup> Ni nyujni tɔb la, kaa ban ke Uwumbor, u ye Uwumbor baan na, li nyujni nimi. Ni ga ḥa kinye aan ki gaa mi ki kii? <sup>45</sup> Ni taa dak ke m ga bii nimi Nte Uwumbor chee. Ubaa le bi ki ga bii nimi. Uma le ye Moses. Ni mak ke ni ga ḥmar waamɔbon pu. <sup>46</sup> Tɔ, ni yaa ba pak waamɔbon kan, ni ba ga pak m mu aaliin; ba pu? maabor le u ḥmee. <sup>47</sup> Ni yaa kaa pak waah ḥmee pu na kan, ni ga ḥa kinye ki pak maah len pu na?”

### Yesu aah kpiin binib ŋichur ḥijmu pu na

(Matiu 14.13-21; Mak 6.30-44; Luk 9.10-17)

**6** Yesu aah len kina ki ti doo na, le u puur Galilee Aanyusakpem. Bi yin mu ke Galilee, le ki ki yin mu ke Tiberias. <sup>2</sup> Kinipaak nan dii u. Bi kan waah tun li-jinjiir aatun ki tii bibum laafee pu na, nima le cha bi dii u. <sup>3</sup> Le u jon lijool paab, le u ni waadidiliib kal kitij nima. <sup>4</sup> Ni nan gur siib Juu yaab ji njim mu bi yin mu ke Lakr-jer aajim na.<sup>¶</sup> <sup>5</sup> Le Yesu yaar lik, le ki kan kinipaak choo u chee. Le u baa Filip, “Ti ga daa tijikaar la chee aan binib ngbaan ji?” <sup>6</sup> Uma ubaa nyi waah

ga ḥa pu na, le ki baa Filip kina ke u lik ke u ga len kinye.

<sup>7</sup> Le Filip bui u, “Ti yaa di iwiin ikui ilee aapal daa tijikaar kan, taan fuu bi momok kan siisii ki ji.”

<sup>8</sup> Le waadidiliib ponn ni ubaa, bi yin u ke Andru aan u ye Simonn Piita aanaal na, bui u ke, <sup>9</sup> “Unachipɔnbo ubaa bi do ki joo ḥiboroboro kpin ḥijmu ni njanbim mulee; binib ngbaan mu aah wiir pu na, nimina ga ḥa bi ba?”

<sup>10</sup> Le Yesu bui bi, “Cha binib ngbaan kal kitij.” Timosɔnn nan wiir nima chee. Le bi kal kitij. Bijab ga nan li fuu ḥichur ḥijmu. <sup>11</sup> U nan yoor ḥiboroboro kpin ḥijmu ngbaan, le ki doon Uwumbor, ki geei geei ki tii binib bi ka kitij na, le ki geei geei njanbim mulee na mu, ki tii bi, bimok aah ban pu na. <sup>12</sup> Le bi momok ḥman ki ti bab. Baah ḥman ki ti bab na, le u bui waadidiliib, “Kuun ni baah ḥman gur ni na man, nibaa taa bii.” <sup>13</sup> Baah ḥman ḥiboroboro kpin ḥijmu ki ti bab ki gur ni na, bi nan kuun ni gbiin tibɔokur kipiik ni tilee la.

<sup>14</sup> Binib ngbaan aah kan Yesu aah tun lijinjiir aatuln ngbaan pu na, le bi bui ke, “Uja wee sil ye Uwumbor aabɔnabr u bi nan len ke u ga dan dulnyaa wee ni na la.” <sup>15</sup> Yesu nan bee ke bi ban bi chuu u mpɔɔn ki di ḥa baabɔr. Nima pu le u nyan bi chee, ki ki buen lijool ngbaan paab ubaa.

### Yesu aah chuun nnyun pu pu na

(Matiu 14.22-33; Mak 6.45-52)

<sup>16</sup> Kijook aah joor na, le waadidiliib buen nnyusakpem ni, <sup>17</sup> ki ti koo bujɔb ni, ki cha nnyusakpem aadapuul, Kape-naum aatij ni. Waa nan kee fuu bi chee, le ni mue. <sup>18</sup> Le libuln daar ki pɔɔ sakpen, le tinyunkpenn feeni. <sup>19</sup> Baah ḥaal bujɔb ki pii mal bitaa, bee binaa na, le bi

<sup>¶</sup>6:4 : Israel yaab nan ji Lakr-jer aajim ke bi teer buyoonn Uwumbor nan nyan bi tinaagbiir ni, Ijipt aatij ni na. Lik Nnyam 12.1-27.

kan u chuun nnyun pu ki choo, ki duun ni baaŋjəb chee. Le ijawaan chuu bi.<sup>20</sup> Le u bui bi, “Min ye. Taa san ijawaan man.”<sup>21</sup> Waah len kina na, le bi nan kpa mpopiin ki yoor u ḥa bunjəb na ni. Libuul ngbaan ni le bi fuu baah cha kitij ki ni na.

### **Kinipaak ngbaan aah ban Yesu pu na**

<sup>22</sup> Ki woln kitaak le kinipaak ki gur nnyusakpem aadapuul na kan ke bunjəb bubaa aa ki bi bi chee nima, ki nyi ke bunjəb bubaa baanja le fe bi nima, ki nyi ke Yesu aa fe koo bunjəb ngbaan ni, waadidiliib chee, bi fe buen bibaa la.<sup>23</sup> Le iŋɔi nyan ni Tiberias aatij ni, ki duun ni nin chee Yesu fe doon Uwumbor ki tii bi tijikaar bi ji na.<sup>24</sup> Kinipaak ngbaan kan ke Yesu ni waadidiliib aa ki bi. Nima pu le bi koo iŋɔi ni, ki cha nnyusakpem aadapuul, Kapenaum aatij ni, bi ti ban Yesu.

### **Yesu le ye limɔfal aajikaar**

<sup>25</sup> Le bi ti kan u nnyusakpem aadapuul, le ki baa u ke, “Umɔmɔkr, aa fuu ni do bayoonn?”

<sup>26</sup> Le u bui bi, “M tuk nimi mbamɔn la, naah fe jin tijikaar bab na, nima le ni ban mi, naa ye ke ni bee lijinjiir aatun ngbaan aatataa la.<sup>27</sup> Ni taa cha ninimbil li man tijikaar ti ga tii nimi limɔfal li kaa kpa ndoon na pu. Min Unibɔn Aabo le ga tii nimi tijikaar ngbaan; ba pu? min Unibɔn Aabo le Nte Uwumbor mɔk ke m ye Waanii.”

<sup>28</sup> Le bi baa u, “Ti ga ḥa kinye aan ki tun Uwumbor aatuln waah ban pu na?”

<sup>29</sup> Le Yesu bui bi, “Ni gaa mi, u Uwumbor tun ni na, ki kii man. Uwumbor aatuln le na.”

<sup>30</sup> Le bi baa u, “Aa ga tun lijinjiir aatuln bayaar, aan ti kan ki pak saah len pu

na? Aa ga tun bayaar?<sup>31</sup> Tiyaajatiib nan ji tijikaar ti bi yin ti ke mana na, nteersakpiin ni; ni ŋmee Uwumbor Aagbanj ni ke, ‘U tii bi tijikaar ti nyan ni paacham na ke bi ji.’”<sup>32</sup>

<sup>32</sup> Le Yesu bui bi, “M tuk nimi mbamɔn la, naa ye Moses le nan tii bi tijikaar ti nyan ni paacham na. Nte Uwumbor le tii nimi tijikaar bamɔn ti nyan ni paacham na.<sup>33</sup> Tijikaar ti Uwumbor tii nimi na le ye tijikaar ti nyan ni paacham ki tii dulnyaya ni aanib limɔfal li kaa kpa ndoon na.”

<sup>34</sup> Le bi bui u, “Tidindaan, li tii timi tijikaar ngbaan n-yoonn mɔmɔk.”

<sup>35</sup> Le u bui bi, “Min le ye limɔfal aajikaar. Unii umɔk dan m chee na kan, nkɔn aan ki chuu u. Unii umɔk gaa mi ki kii na, nnyunyuu aan ki chuu u.<sup>36</sup> M nan tuk nimi ke ni kan mi, ki mu aa gaa mi ki kii.<sup>37</sup> Binib bimɔk Uwumbor di bi tii mi na, bi ga dan m chee. Unii umɔk dan m chee na, maan yii u, m ga gaa u.<sup>38</sup> M nyan ni paacham ke m nan ḥa Uwumbor u tun ni mi na aageehn la. Maa dan m nan ḥa mbaa aageehn.<sup>39</sup> Uwumbor aah tii mi binib bimɔk na, u ban ke m taa cha bi ponni ubaa wɔŋj. U ban ke m fikr bi mɔmɔk nkun ni, kookoo aataadaal. Waageehn le na.<sup>40</sup> U ban ke unii umɔk bee ke m ye Ujapɔɔn, ki gaa mi ki kii na, u li kpa limɔfal li kaa kpa ndoon na. Le m ga fikr u nkun ni, kookoo aataadaal. Nte Uwumbor aageehn le na.”

<sup>41</sup> Le Juu yaab ḥul u pu, ke ba ḥa u bui ke u ye tijikaar ti nyan ni paacham na.

<sup>42</sup> Le bi baa tɔb ke, “Uja wee aa ye Josef aajapɔɔn Yesu uu? Ti nyi ute ni una. Ba ḥa u len ke u nyan ni paacham?”

<sup>43</sup> Le Yesu bui bi, “Ni taa ḥulni tɔb chee man.<sup>44</sup> Unii ubaa aan ŋmaa dan m chee see Nte Uwumbor u tun ni mi na daa foor ni u m chee. Unii umɔk dan m chee na le m ga fikr u nkun ni, kookoo aataadaal.

<sup>45</sup> Uwumbor aabonabtiib nan ŋmee ke Uwumbor ga mok bi mɔmɔk waasan.\* Unii umok ɣun Nte Uwumbor aah len pu na, ki bae waakaal na, u ga dan m chee. <sup>46</sup> Ubaa aa kee kan Nte Uwumbor. Min u nyan ni u chee na baanja le kan u. <sup>47</sup> M tuk nimi mbamɔn la, unii umok gaa mi ki kii na kpa limɔfal li kaa kpa ndoon na. <sup>48</sup> Min le ye limɔfal aajikaar. <sup>49</sup> Niyaajatiib bi nan jin mana ngbaan nteersakpiin ni na, bi kpo a. <sup>50</sup> Unii umok ji tijikaar ti nyan ni paacham na aan kpo. <sup>51</sup> Min le ye tijikaar ti nyan ni paacham ki tii binib limɔfal na. Unii yaa ji tijikaar ngbaan kan, u ga li bi n-yoonn mu kaa kpa ndoon na. Tijikaar ti m ga tii u na, tima le ye maawon. M ga di maawon tii dulnyaa ni aanib, aan bi kan limɔfal.”

<sup>52</sup> Waah len kina na, le Juu yaab kpak tɔb kinikpakpak, “Uja ngbaan ga ɣa kinye ki tii timi waawon, aan ti ji?”

<sup>53</sup> Le u bui bi, “M tuk nimi mbamɔn la, ni yaa kaa ji min Unibɔn Aabo aa-won, kaa nyu maasin kan, naa kpa limɔfal li kaa kpa ndoon na. <sup>54</sup> Unii umok ji maawon ki nyu maasin na, u kpa limɔfal li kaa kpa ndoon na, le m ga nan fikr u nkun ni, kookoo aataadaal. <sup>55</sup> Maawon ye tijikaar bamɔnn la. Maasin ye ti-wanyukaan bamɔnn la. <sup>56</sup> Unii umok ji maawon ki nyu maasin na, u bi m ni, le m mu bi u ni. <sup>57</sup> Nte Uwumbor u ye limɔfal daan ki tun ni mi na, u pu le m kpa limɔfal. Unii umok ji mi na, m pu le u mu ga li kpa limɔfal. <sup>58</sup> Timina le ye tijikaar ti nyan ni paacham na. Unii umok ji ti na ga li bi, ki nan saa n-yoonn mu kaa kpa ndoon na. Tijikaar timina aa bi ke tijikaar ti nyaajatiib nan jin ti na; tijikaar ngbaan aa nan tii bi limɔfal li kaa kpa ndoon na.”

<sup>59</sup> Yesu nan bi mmeen aadiik ni, Kape-naum aatiŋ ni, le ki len kina.

### Limɔfal li kaa kpa ndoon na aabɔr

<sup>60</sup> Binib bi dii u na aah ɣun kina na, le bi ponn ni pam bui ke, “Ti ye tibɔr ti pɔɔ na la. Ubaa aa ɣmaa pel ti.”

<sup>61</sup> Le u bee usui ni ke bi ɣulni tibɔr ngbaan pu, le ki baa bi, “Timina le kiir nimi maasan ni ii? <sup>62</sup> Ni yaa ti kan min Unibɔn Aabo gir buen paacham maah nan bi nin chee na kan, ni ga len kinye? <sup>63</sup> Uwumbor Aafuur Nyaan le tii binib limɔfal. Tiwon aa kpa tinyoor tibaa. Tibɔr ti m len ni chee na le tii nimi Nfuur Nyaan ni limɔfal. <sup>64</sup> Ni ponn ni bibaa mu aa gaa mi ki kii.” Yesu aah nan piin waatuln buyoonn na, u nan nyi binib bi kaa gaa u ki kii na, ki nyi udaan u ga nan di u kooh waadim pu na. <sup>65</sup> Le u ki bui bi, “Nima le cha m tuk nimi ke ubaa aa ɣmaa dan m chee, see Nte Uwumbor cha u dan.”

<sup>66</sup> Nee aapuwɔb le binib bi dii u na ponn ni pam gir puwɔb kaa ki dii u. <sup>67</sup> Le u baa waadidiliib kipiik ni bilee na, “Ni mu ga buen cha mi ii?”

<sup>68</sup> Le Simonn Piita bui u, “Ndindaan, ti ga buen ɣma chee? Sin le kpa limɔfal li kaa kpa ndoon na aaliin. <sup>69</sup> Ti pak saah len pu na, ki bee ke aa ye Uwumbor Aanii u ye Chain na la.”

<sup>70</sup> Le u bui bi, “M nyan nimi binib kipiik ni bilee, le ni ponn ni ubaa ye kinimbɔŋ aani.” <sup>71</sup> U len Judas u ye Simonn Iskariot aajapɔɔn na aabɔr la; uma Judas mu nan ye waadidiliib kipiik ni bilee na ponn ni ubaa, u ga nan di Yesu kooh waadim pu na.

### Yesu ni unaatiib aah len tɔb chee tibɔr pu na

**7** Nee aapuwɔb le Yesu bɔ dii Galilee aatingbaan ni. Waa gee u bɔ dii Judea aatingbaan ni; ba pu? Juu yaab bi bi nima na ban ke bi ku u la. <sup>2</sup> Ni nan gur siib, Juu yaab ji njim mu bi yin mu

\***6:45** : Lik Aisaya 54.13.

ke Tikakar Aajim na.<sup>†</sup> <sup>3</sup>Le unaatiib bui u, “Siir do, ki li cha Judea aatiij ni, aan binib bi dii si na mu ti kan saah tun lijiniir aatun pu na. <sup>4</sup>Unii u ban u li kpa liyimbil na, waan bør waah tun pu na. Aa yaa tun lijiniir aatun kan, cha binib mɔmɔk kan saah tun pu na.” <sup>5</sup>Unaatiib mu aa nan gaa u ki kii.

<sup>6</sup>Le u bui bi, “Maayoonn aa kee fuu. Nimi aayoonn bi n-yoonn mɔmɔk la. <sup>7</sup>Dulnyaa aanib aa ȳmaa li nan nimi. Bi nan mi la; ba pu? m tuk bi ke baatuln aa ḥjan. <sup>8</sup>Ni li cha ti ji njim ngbaan. Maan kee buen; maayoonn aa kee fuu.” <sup>9</sup>U nan len bi chee kina, ki gaar Galilee aatiin ni.

### Yesu aah jin njim ngbaan pu na

<sup>10</sup>Unaatiib aah buen bi ti ji njim ngbaan na, le u mu paan. Waa dii nsan binib aanimbil ni, ubaa aa nyi ubør. <sup>11</sup>Le Juu yaab aaninkpiib ban u binib bi ji njim na ponn ni, ki baa ke u bi la.

<sup>12</sup>Le kinipaak na looni len waabor tōb chee. Bibaa len ke u ye unibamɔnn la. Biken len ke waa ye, u ȳmanni binib la. <sup>13</sup>Ubaa mu aa len waabor lipaal; bi san Juu yaab aaninkpiib ijawaan la.

<sup>14</sup>Njim ngbaan aakpaakool aakaasisik ni le Yesu koo Uwumbør Aadichal ni, le ki tuk binib Uwumbør aabør. <sup>15</sup>Le ni gar Juu yaab aaninkpiib, ke uja ngbaan aa bae mbaem; u ȳa kinye ki nyi kigban?

<sup>16</sup>Le u bui bi, “Maah mɔk binib na, naa ye min mbaa aamɔkm, ni ye Uwumbør u tun ni mi na aamɔkm la. <sup>17</sup>Unii ubaa yaa ban ke u ȳa Uwumbør aageehn kan, u ga bee ke maah mɔk binib pu na, ni ye Uwumbør aamɔkm la, naa ye min mbaa aamɔkm. <sup>18</sup>Unii u len ubaa pu na, u ban ke binib nyuŋ u la. Unii u ban ke binib nyuŋ unii u tun ni u na, uma le ye mbamɔndaan, kaa ȳmanni binib. <sup>19</sup>Moses nan tii nimi nkaal. Ni ponn ni

ubaabaa aa dii nkaal ngbaan. Ba ȳa ni ban ni ku mi?”

<sup>20</sup>Le kinipaak ngbaan bui u, “Aa kpa kinimboj la. ȳma ban u ku si?”

<sup>21</sup>Le u bui bi, “Maah tun lijiniir aatuln libaa likpaakool daal na, le ni gar ni mɔmɔk. <sup>22</sup>Moses nan tii nimi nkaal ke ni li geei ȳichakpan. Tɔ, naa ye Moses le puen tii nimi nkaal ngbaan, niyaajatiib le nan puen tii nimi. Likpaakool daal, ubo u neer ni gii uchakpaln na kan, ni geei la. <sup>23</sup>Ni geei ubo aachakpaln likpaakool daal ke ni taa bii Moses aakaal. Le maah cha ubun aawon mɔmɔk pɔɔk likpaakool daal na, ni gee lijuul m pu uu? <sup>24</sup>Ni taa bii unii, kaa nyi tibor ti bi usui ni na. Puen bee tiwan ni bi usui ni na, aan ki nin len waabor mbamɔm.”

### Baah len Yesu aabor tōb chee pu na

<sup>25</sup>Yesu aah len kina na, le Jerusalem yaab bibaa baa ke, “Uja wee le bi ban bi ku u na aa? <sup>26</sup>Lik waah len binib aanimbil ni pu na, le ubaa aa len tibaa. Ni ye ke timi aaninkpiib sil nyi ke u ye Kristo u ga gaa timi lii na aa? <sup>27</sup>Kristo na yaa fuu ni kan, ubaa aan bee waah nyan nin chee na. Uja wee ma kan, ti mɔmɔk nyi waah nyan nin chee na.”

<sup>28</sup>Yesu nan bi Uwumbør Aadichal ni, ki bi tuk binib waaliin, le ki len mpɔɔn pu, “Ni sil nyi mi ii? Ni nyi maah nyan nin chee na aa? Maa dan mbaa pu. U tun ni mi na ye mbamɔndaan la. Le naa nyi u. <sup>29</sup>Min le nyi u; uma le tun ni mi. M nyan ni u chee la.”

<sup>30</sup>Waah len kina na, le bi ban bi chuu u. Ubbaa mu aa ȳa u nibaa; ba pu? waayoonn aa nan kee fuu. <sup>31</sup>Kinipaak ngbaan ponn ni binib pam le gaa u ki kii, le ki bui ke, “Kristo yaa fuu ni kan, waan tun lijiniir aatun ki jer uja ngbaan aah tun pu na.”

### Baah ban ke bi chuu Yesu pu na

<sup>32</sup> Farisii yaab nan ijun kinipaak ngbaan looni len Yesu aabor kina. Le bi ni Uwumbor aatotoorninkpiib tun baatum ke bi ti chuu ni u. <sup>33</sup> U nan bui kinipaak ngbaan, “M ga li bi ni chee ni yunn siib, le ki nin gir buen u tun ni mi na chee. <sup>34</sup> Ni ga nan ban mi, kaan kan mi. Maah ga ti li bi nin chee na, naan ijmaa buen nima chee.”

<sup>35</sup> Juu yaab nan baa tob ke, “Uja ngbaan ga buen la chee, aan taan kan u? U ga buen Juu yaab aah yaa nin chee Griik yaab aatingbaan ni na, ki ti tuk Griik yaab Uwumbor aabor aa? <sup>36</sup> U len ke ti ga ban u, kaan kan u, kaan ijmaa buen waah ga li bi nin chee na. Waah len pu na aatataa ye kinye?”

### Limofal aanyun aabor

<sup>37</sup> Bundaln njim ga doo na, liyaadaal le nan ye njim sakpem. Liyaadaal ngbaan le Yesu sil ki len mpcoen pu, “Nnyunuu yaa chuu u na kan, udaan dan m chee ki nan nyu. <sup>38</sup> Uwumbor Aagbañ len ke, ‘Unii umok gaa mi ki kii na, limofal aanyun ga puu nyan ni usui ni.’ <sup>39</sup> Waah len pu na aatataa le ye ke binib bi gaa u ki kii na, bi ga gaa Uwumbor Aafuur Nyaan. N-yoonn ngbaan Uwumbor aa nan kee tii binib Waafuur Nyaan; ba pu? waa nan kee yoor Yesu paacham.

### Kinipaak ngbaan aah len Yesu aabor tob chee pu na

<sup>40</sup> Kinipaak ngbaan aah ijun Yesu aah len pu na, le bibaa bui ke, “Uja ngbaan sil ye Uwumbor Aabonabr na la.”

<sup>41</sup> Bibaa mu bui ke u ye Kristo u ga gaa binib lii na la.

Biken mu bui ke, “Waa ye, ke Kristo aan nyan ni Galilee aatiñ ni. <sup>42</sup> Uwumbor Aagbañ len ke u ga li ye tiyaaja David aayaabil, ki ga nyan ni Betlehem aatiñ ni, kitij ki ye David do na.” <sup>43</sup> Kinipaak

ngbaan mok aamci nan bi ibaabaa la le Yesu aabor pu. <sup>44</sup> Bibaa mu nan ban bi chuu u mpcoen. Ubbaa mu aa ja u nibaa.

### Juu yaab aaninkpiib aah kaa gaa Yesu ki kii pu na

<sup>45</sup> Uwumbor aatotoorninkpiib ni Farisii yaab aah tun bitutum ke bi ti chuu ni Yesu na, le bitutum ngbaan gir ni bi chee. Le bi baa bi, “Ba ja naa chuu ni u?”

<sup>46</sup> Le bi bui bi, “Unii ubaa aa kee len ke waah len pu na.”

<sup>47</sup> Le Farisii yaab na baa bi, “U ijmann ni mu la aa? <sup>48</sup> Timi Farisii yaab ni nimi aaninkpiib ponn ni ubaa gaa u ki kii ii?

<sup>49</sup> Kinipaak bi kaa nji Uwumbor aakaal na ma kan, tibbir bi bi pu la.”

<sup>50</sup> Nikodemus u nan buen Yesu chee kinyeek na, u mu nan ye Farisii yaab ponn ni ubaa, le ki baa bi, <sup>51</sup> “Timi aakaal aah dii pu na, ti ga ijmaa bii unii kaa puen jin u tibor ki bee waah tun pu na aa?”

<sup>52</sup> Le Farisii yaab na baa u, “Aa mu nyan ni Galilee aatiñ ni la aa? Aa yaa karn Uwumbor Aagbañ ni kan, aa ga bee ke Uwumbor aabonabr ubaa aa nyan ni nima.”

[<sup>53</sup> Le bi momok kun.]

### Upii u ja kidagook na

**8** Yesu nan buen lijool libaa paab, bi yin li ke Olif aasui aajool. <sup>2</sup> Le ki woln kitaak kichakpinaanyeek ni, le u gir buen Uwumbor Aadichal ni. Le kinipaak kuun u chee, le u kal ki tuk bi Uwumbor aabor. <sup>3</sup> Le Uwumbor aakaal aamomokb ni Farisii yaab joo ni upii u bi pii u, u bi jani kidagook na, le ki di u siin kinipaak ngbaan aanimbiin ni, <sup>4</sup> ki bui Yesu, “Umomokr, upii wee bi jani kidagook, le bi pii u. <sup>5</sup> Moses aakaal len ke unii yaa ja kina kan, bi yur u jitakpal ki ku u, to, aa len waabor kinye?” <sup>6</sup> Baah baa Yesu kina na, bi nan bi tojni u ke bi

kan waataani aan ki galn u. Le u boon ki joo ujanbil ȳmee kitij.

<sup>7</sup> Bi nan beenin baa u, le u yaar ki bui bi, "Ni ponn ni u kaa kpa taani na kan, u puen mee upii wee litakpal," <sup>8</sup> ki ki boon ki joo ujanbil ki ȳmee kitij. <sup>9</sup> Baah ȳjun u len kina na, le bi mōmōk bolni ubaabaa; [ba pu? baalandak galn bi]. U ye uninkpel na puen boln siir, le bi mōmōk bolni ubaabaa, ki ti cha upii ngbaan si Yesu aanimbiin ni. <sup>10</sup> Le Yesu yaar ki baa u, "Upii, bi bi la chee? Ubaa aa galn si ii?"

<sup>11</sup> Le u bui u, "Ndindaan, ubaa aa galn mi."

Le Yesu bui u, "M mu aan galn si. Li cha, ki taa ki tun titunwanbir."

### Yesu le ye dulnyaa ni aawiihn

<sup>12</sup> Yesu nan ki len kinipaak ngbaan chee ki bui bi, "Min le ye dulnyaa ni aawiihn ki wolni binib aanimbil. Unii umōk dii mi na aan li bi mbōmbōon ni. U ga li kpa limofal, ki ga li bi nwiihn ni."

<sup>13</sup> Waah len kina na, le Farisii yaab bui u, "Aa ji seeraa ki tii aabaa la. Saaseeraa aa ye mbamōn."

<sup>14</sup> Le u bui bi, "M yaa ji seeraa ki tii mbaa kan, maaseeraa ye mbamōn; ba pu? m nyi maah nyan ni nin chee na, ki nyi maah cha nin chee na mu. Nimi le aa nyi maah nyan ni nin chee na, kaa nyi maah cha nin chee na mu. <sup>15</sup> Ni len maabōr binibōm aah len tibōr pu na la. Maa len unii ubaa aabōr. <sup>16</sup> M yaa len binib aabōr kan, m len mbamōn la; ba pu? naa ye min baanja le len baabōr, m ni Uwumbōr u tun ni mi na le len. <sup>17</sup> Nimi aakaal ponn ni, ni ȳmee ke binib bilee yaa ji seeraa ki len tibōbaan kan, baaseeraa ye mbamōn la. <sup>18</sup> M ji seeraa ki tii mbaa la. Nte u tun ni mi na mu ji seeraa ki tii mi."

<sup>19</sup> Le bi baa u, "Aate bi la?"

Le u bui bi, "Naa nyi mi, kaa nyi Nte mu. Ni yaa ba nyi mi kan, ni ba ga li nyi Nte mu."

<sup>20</sup> Waah len kina na, u nan bi Uwumbōr Aadichal ni, baah tii Uwumbōr ȳjimombil nin chee na. Le ubaa aa chuu u; ba pu? waayoonn aa kee fuu.

### Yesu aah sur Juu yaab pu na

<sup>21</sup> Le u ki tuk bi, "M ga buen nibaa chee. Ni ga ban mi, kaan kan mi, ki ga nan kpo; le Uwumbōr aan di cha pinn nimi. Maah cha nin chee na, naan ȳmaa buen nima chee."

<sup>22</sup> Le Juu yaab baa tōb, "U ga ku ubaa la aa? U len ke waah cha nin chee na, taan ȳmaa buen nima chee."

<sup>23</sup> Le u bui bi, "Ni nyan ni taab, le m ma nyan ni paacham. Ni ye kitij pu yaab la. Maa ye kitij pu yoo. <sup>24</sup> Nima le cha m tuk nimi ke ni ga kpo, le Uwumbōr aan di cha pinn nimi; ba pu? ni yaa kaa gaa mi ki kii ke m ye maah tuk nimi pu na kan, ni ga kpo, le Uwumbōr aan di cha pinn nimi."

<sup>25</sup> Le bi baa u, "Aa ye ȳma?"

Le u bui bi, "Maah tuk nimi n-yoonn mōmōk pu na, m ye kina la. <sup>26</sup> M ga ȳmaa len tibōr sakpenn ti ga bii nimi na. U tun ni mi na ye ubamōndaan la. Le m ȳjun waah len pu na, ki tuk dulnyaa ni aanib."

<sup>27</sup> Yesu aah len kina na, baa bee ke u len Ute Uwumbōr aabōr la. <sup>28</sup> Nima pu le u bui bi, "Ni yaa nan yoor min Unibōn Aabo kitij paacham kan, ni ga bee ke m ye maah ye u na. Ni ga bee ke maa tun nibaa mbaa pu. M len Nte Uwumbōr aah tuk mi pu na la. <sup>29</sup> U tun ni mi na bi m chee la. Waa cha m bi mbaa; ba pu? n-yoonn mōmōk m tun lituln li piir usui na la."

<sup>30</sup> Yesu aah len kina na, le binib pam gaa u ki kii.

### **Titunwanbir aah chuu binib tinaagbiir pu na**

<sup>31</sup> Le u tuk Juu yaab bi gaa u ki kii na, “Ni yaa beenin joo maamɔ̄bon kan, ni sil ye maadidiliib la. <sup>32</sup> Le ni ga li beer tibɔ̄bamɔ̄nn. Tibɔ̄bamɔ̄nn tee le ga nya nimi tinaagbiir ni.”

<sup>33</sup> Le bi bui u, “Ti ye Abraham aayaabitiib la. Ubaa aa kee chuu timi tinaagbiir. Ba ḥa aa bui ke ti ga nya tinaagbiir ni?”

<sup>34</sup> Le u bui bi, “M tuk nimi mbamɔ̄n la, unii umɔ̄k tun titunwanbir na kan, u ye titunwanbir aanaagbiija la. <sup>35</sup> Un-aagbiija aan li bi udindaan do n-yoonn mɔ̄mɔ̄k. Udindaan aajapɔ̄on ma ga li bi n-yoonn mɔ̄mɔ̄k. <sup>36</sup> Nima pu na, min Uwumbɔ̄r Aajapɔ̄on yaa nyan nimi tinaagbiir ni kan, ni ga sil nya tinaagbiir ni. <sup>37</sup> M nyi ke ni ye Abraham aayaabitiib, le ki tee ban ni ku mi. Ni yi maaliin la. Nima le cha ni ban ni ku mi.

<sup>38</sup> M tuk nimi maah kan Nte Uwumbɔ̄r chee pu na la. Ni mu ḥani naah ḥun nite chee pu na la.”

<sup>39</sup> Le bi bui u, “Tite le ye Abraham.”

Le u bui bi, “Ni yaa ba ye Abraham aabibamɔ̄n kan, ni ba ga tun waah nan tun pu na. <sup>40</sup> M ḥun tibɔ̄bamɔ̄nn Uwumbɔ̄r chee, le ki tuk nimi. Le ni ban ni ku mi. Abraham aa nan ḥani kina. <sup>41</sup> Ni ḥani ke nite aah ḥani pu na la.”

Le bi bui u, “Taa ye mbɔ̄nbim. Tite ye ubaa la. Uma le ye Uwumbɔ̄r.”

<sup>42</sup> Le u bui bi, “Nite yaa ba sil ye Uwumbɔ̄r kan, ni ba ga li gee mi; ba pu? m nyan ni u chee le ki dan do. Maa dan mbaa pu. Uma le tun ni mi. <sup>43</sup> Ba ḥa naa bee maah len pu na aatataa? Ni ye ke naa gee ke ni ḥun maaliin la. <sup>44</sup> Kinim-ɔ̄n aabim le ye nimi, kima le ye nite. Le ni ban ni li ḥani kaah gee pu na. Dulnyaa aah nan piin buyoonn ki nan saa dandana na, ki ye unikur la. Kaa len ibamɔ̄n. Mbamɔ̄n aa bi ki ni. Ki yaa len inyamɔ̄n

kan, ki len tibɔ̄r ti bi ki ni na la. Ki ye unyamɔ̄ndaan la. Kima le naan inyamɔ̄n.

<sup>45</sup> M ma len ibamɔ̄n la. Nima le cha naa pak maaliin. <sup>46</sup> Ni ponn ni, ḥma ga ḥmaa mɔ̄k maatunwanbir? M len ibamɔ̄n la. Ba ḥa naa pak maah len pu na? <sup>47</sup> Unii umɔ̄k ye Uwumbɔ̄r yoo na kan, uma le ḥun waaliin. Nimi le aa ḥun waaliin. Ba pu? Naa ye waanib. Nima le cha naa ḥun waaliin.”

### **Unii umɔ̄k kii Yesu aabɔ̄r na aan kpo**

<sup>48</sup> Le bi bui u, “Taah len ke aa ye Samaria aatiij aani ki kpa kinimbɔ̄n na, ti len mbamɔ̄n la.”

<sup>49</sup> Le u bui bi, “Maa kpa kinimbɔ̄n. M nyuŋ Nte Uwumbɔ̄r la. Le ni sii mi.

<sup>50</sup> Min le aa nyuŋni mbaa; Uwumbɔ̄r le nyuŋni mi. Uma le ga ji binib tibɔ̄. <sup>51</sup> M tuk nimi mbamɔ̄n la, unii yaa joo maaliin kan, waan kpo.”

<sup>52</sup> Le bi bui u, “Dandana wee ti bee ke aa kpa kinimbɔ̄n la. Tiyaaja Abraham nan kpo. Uwumbɔ̄r aabɔ̄nabtiib mu nan kpo, le aa len ke unii yaa joo saaliin kan, waan kpo. <sup>53</sup> Aa jer tiyaaja Abraham la aa? U nan kpo. Uwumbɔ̄r aabɔ̄nabtiib mu nan kpo. Aa len ke aa ye ḥmaa?”

<sup>54</sup> Le u bui bi, “M yaa nyuŋni mbaa kan, ni ye fam la; Nte le nyuŋni mi. Uma le ni len ke u ye nimi Aawumbɔ̄r. <sup>55</sup> Le naa nyi u. Min le nyi u. M yaa len ke maa nyi u kan, m ga li ye unyamɔ̄ndaan la, ke naah ye binyamɔ̄ndam pu na. M sil nyi u, ki joo waaliin. <sup>56</sup> Niyaaja Abraham nan mɔ̄oni; ba pu? u ga nan kan buyoonn m ga dan na. Waah sil kan n-yoonn mue na, nima le u nan kpa mpopiin.”

<sup>57</sup> Le bi baa u, “Saa ye ḥibin piiŋmu aani, ki bui ke aa nyi Abraham aa?”

<sup>58</sup> Le u bui bi, “M tuk nimi mbamɔ̄n la, baah kaa nan kee ma Abraham buyoonn na, m nan bi.”

<sup>59</sup> Le bi yoor ḥitakpal bi ti mae u. Le u miln ki nyan Uwumbɔ̄r Aadichal ni.

### **Yesu aah likr ujoon aanimbil pu na**

**9** Waah chuun cha na, le u kan ujoon ubaa. Baah ma u na, u nan ye ujoon la.<sup>2</sup> Le Yesu aadidilib baa u, "Umɔmɔkr, uja ngbaan le tun titunwanbir, aan ute ni una le tun, aan bi ma u ujoon."

<sup>3</sup> Le bui bi, "Naa ye uja ngbaan aatunwanbir pu, ki mu aa ye ute, bee una aatunwanbir pu. U ye ujoon aan binib kan Uwumbor aah ga tun lijinjiir aatuln pu ki tii u na.<sup>4</sup> Ni ɔjan ke ti tun Uwumbor u tun ni mi na aatuln nwiihn aah laa bi pu na; mbɔmbɔɔn choo, le ubaa aan ki ɔjmaa tun.<sup>5</sup> Maah laa bi dulnyaa ni na, m ye dulnyaa ni aawiihn ki wolni binib aanimbil la."

<sup>6</sup> Waah len kina ki ti doo na, le u tii timɔɔtan lili kitij, ki di ujaal lee, le ni ɔja titan, le ki di pɔl ujoon ngbaan aanimbil,<sup>7</sup> ki bui u, "Li cha ki ti finn aanimbil nnyunbun mu bi yin mu ke Siloam na ni." Siloam aataata le ye ke "Bi tun u." Le ujoon ngbaan buen ti finn unimbil, le unimbil likr, le u gir ni.

<sup>8</sup> Le udyaab, ni binib bi nyi ke u ye uwanmeer na baa tɔb, "Naa ye uja wee le nan ka ki mee na aa?"

<sup>9</sup> Bibaa bui ke u ye. Biken mu bui ke bi naahn la, waa ye.

Le uma ubaa bui ke u ye.

<sup>10</sup> Le bi baa u, "Aa ɔja kinye aan ki likr?"

<sup>11</sup> Le bui bi, "Uja u bi yin u ke Yesu na, uma le nan di titan pɔl nnimbil, le ki bui mi ke m li cha Siloam aanyunbun ni ki ti finn nnimbil. Le m buen ti finn, le nnimbil likr."

<sup>12</sup> Le bi baa u, "U bi la chee?"

Le bui bi, "Maa nyi."

### **Farisii yaab baa u waah ɔja pu aan ki likr na**

<sup>13</sup> Le bi di u buen Farisii yaab chee.

<sup>14</sup> Bundaln Yesu ɔja titan ki likr unimbil na nan ye Juu yaab aakpaakool daal la.

<sup>15</sup> Le Farisii yaab baa uja u nan ye ujoon na, "Aa ɔja kinye aan ki ti likr?" Le u bui bi, "U di titan le pɔl nnimbil, le m finn, le nnimbil likr."

<sup>16</sup> Le Farisii yaab bibaa bui ke, "Uja ngbaan aa joo likpaakool daal aakaal, nima le mɔk ke waa nyan ni Uwumbor chee."

Le biken mu bui ke, "Unii yaa ye utunwanbirdaan kan, u ga ɔja kinye ki tun lijinjiir aatuln ke waah tun pu na?" Le bi mɔmɔk aamɔi nan bi ibaabaa.

<sup>17</sup> Le bi ki baa uja u nan ye ujoon na, "Waah likr aanimbil na, aa len waabor kinye?"

Le bui bi, "U ye Uwumbor aabɔnabrla."

<sup>18</sup> Le baa pak ke u nan ye ujoon le ki likr. Le bi yin ni ute ni una,<sup>19</sup> ki nan baa bi, "Nijapɔɔn le na aa? Naah ma u na, u ye ujoon la aa? tɔ, u ɔja kinye ki likr dandana wee?"

<sup>20</sup> Le ute ni una bui bi, "Ti nyi ke ti japoɔɔn ye. Taah nan ma u na, u ye ujoon la.<sup>21</sup> Ti mu aa nyi waah ɔja pu ki likr dandana wee na, ki mu aa nyi udaan u likr unimbil na. U mu aa ki ye ubo. Baa u man. U ga tuk nimi waabor."<sup>22</sup> Budabu cha bi len kina na le ye ke bi san Juu yaab aaninkpiib ijawaan; ba pu? Juu yaab aaninkpiib nan puun len ke unii yaa bui ke Yesu le ye Kristo u ga gaa binib lii na kan, bi ga nyan udaan mmeen aadiik ni.<sup>23</sup> Nima le ute ni una bui ke, "Waa ki ye ubo. Baa u man."

<sup>24</sup> Le Farisii yaab ki yin uja u nan ye ujoon na, le ki nan bui u, "Nyuj Uwumbor. Ti nyi ke uja ngbaan le ye titunwanbirdaan."

<sup>25</sup> Le bui bi, "Maan ɔjmaa bee ke u ye titunwanbirdaan, bee waa ye. Maah nyi ni na le ye ke m nan ye ujoon la. Dandana wee nnimbil likr a."

<sup>26</sup> Le bi baa u, "U ɔja kinye aan ki likr aanimbil?"

<sup>27</sup> Le u bui bi, “Dandana wee le m tuk nimi. Le naa gee ke ni ḷun. Ba pu ni ban ke m ki gir tuk nimi? Ni mu ban ke ni ja waadidiliib la aa?”

<sup>28</sup> Waah len kina na, le bi sii u, ki bui u, “Aa ye waadidiir la. Tima kan, ti ye Moses aadidiliib la. <sup>29</sup> Ti nyi ke Uwumbor nan len Moses chee tibor. Uja ngbaan ma kan, taa nyi waah nyan nin chee na.”

<sup>30</sup> Le u bui bi, “U likr nnimbil la. Le naa nyi waah nyan nin chee na. Ni gar mi pam. <sup>31</sup> Ti nyi ke Uwumbor aan ḷun titunwanbirdam aameen. Unii yaa dii Uwumbor ki ja Uwumbor aageehn kan, uma le Uwumbor ga ḷun waameen. <sup>32</sup> Dulnyaa aah piin ki nan saa din na, baa kee ḷun ke unii likr unii u bi ma u ijoon ni na aanimbil. <sup>33</sup> Uja ngbaan yaa kaa nyan ni Uwumbor chee kan, waa ba ga ḷmaa ja nibaa.”

<sup>34</sup> Le bi bui u, “Bi ma si aa ye titunwanbirdaan la. Aa ye ḷma ki mok timi?” le ki jenn nyan u mmeen aadiik ni.

### Yesu aah wolni binib aanimbil pu na

<sup>35</sup> Yesu nan ḷun ke bi nyan u. Le u ti kan u, le ki baa u, “Aa gaa Uwumbor Aajapcoo ki kii ii?”

<sup>36</sup> Le u baa u, “Ndindaan, ḷma ye Uwumbor Aajapcoo? Tuk mi aan m gaa u ki kii.”

<sup>37</sup> Le Yesu bui u, “Aa waa u. Uma le len aa chee tibor na.”

<sup>38</sup> Le u bui u, “Ndindaan, m gaa si ki kii,” le ki gbaan unimbiin ni, ki pak u.

<sup>39</sup> Le Yesu bui ke, “M dan dulnyaa wee ni, m nan ji binib tibor, ki woln binib bi aanimbil aa woln na aanimbil, ki jōb binib bi aanimbil woln na aanimbil.”

<sup>40</sup> Le Farisii yaab bi bi u chee na ḷun waah len pu na, le ki baa u, “Ti mu aanimbil aa woln aa?”

<sup>41</sup> Le u bui bi, “Ninimbil yaa kaa ba woln kan, naa ba ga li kpa ngalm. Le ni

len ke ninimbil woln, nima pu le ni kpa ngalm.”

### Ipiih aabɔkpuij aayataŋakl

**10** “M tuk nimi mbamɔn la, unii u loon ki koo ipiih aabɔkpuij ni, kaa dii mbisamɔb na, u ye unaayuk la, ki ga peel ipiih mpɔɔn. <sup>2</sup> Unii u dii mbisamɔb koo ni na, uma le ye upihdaan. <sup>3</sup> Unii u kii mbisamɔb na ga piir tii u. Le ipiih ḷun waaneel. U yin uma ubaa aapiih aayimbil, le i nyan ni. <sup>4</sup> U yaa nyan waapiih mɔmɔk kan, le u loln nsan, le i paa u pu; ba pu? i nyi waaneel. <sup>5</sup> Yaan dii uniyayan. I ga san u chee; ba pu? yaa nyi waaneel.”

<sup>6</sup> Yesu ḷak bi liyatŋakl ngbaan, le baa bee laatataa.

### Yesu aah ye upihdaanyaan pu na

<sup>7</sup> Baah kaa bee liyatŋakl ngbaan aatataa na, le u ki bui bi, “M tuk nimi mbamɔn la, min le ye ipiih aabɔkpuij aabisamɔb. <sup>8</sup> Binib bimɔk puen mi ki dan na, bi nan ye binaayukb la, ki nan ban bi peel ipiih mpɔɔn. Ipiih aa nan pel baaneel. <sup>9</sup> Min le ye Uwumbor aanaan ni aabisamɔb. Unii yaa dii mi ki koo ni kan, u ga ḷmar, ki ga koo ki nya ki gir koo, ki ga kan timosoon la.<sup>‡</sup> <sup>10</sup> Unaayuk yaa dan kan, u ban ke u su ipiih, ki ku i, ki bii i la. M dan m nan tii binib limɔfal li kaa kpa ndoon na la.

<sup>11</sup> “Min le ye upihdaanyaan na. Upihdaanyaan ga ḷmaa kpo waapiih pu. <sup>12</sup> Unii u kpaa ipiih ḷimombil pu, kaa ye upihdaan na, u yaa kan lisapol choo kan, u ga san cha i. Lisapol ga chur i, ki cha i yaa. <sup>13</sup> U kpaa ipiih ḷimombil pu la. Utafal aa bi i ni. Nima le cha u san cha i. <sup>14</sup> Min le ye upihdaanyaan na, ki nyi maapiih. Le maapiih mu nyi mi, <sup>15</sup> ke Nte Uwumbor aah nyi mi pu na, kina le m mu nyi u. Le m ga kpo maapiih pu; ba

<sup>‡</sup>10:9 : Naatataa le ye ke binib bi dii Yesu na kan lifuur ni limɔfal aajikaar.

pu? m ye upihdaanyaan na la.<sup>16</sup> M kpa ipiih iken i kaa ye kibokpuij kee ponn ni aapiih na. M ga li joo ni i mu. Le i ga jun maaneel. I momok ga ja ipihbaan la, ki ga li kpa upihdaan ubaa la.

<sup>17</sup> “M ga di maamofal bil maanib pu, ki ga fikr nkun ni. Nima le cha Nte Uwumbor gee mi.<sup>18</sup> Ubbaa aan nyan maamofal m chee. M ga di li bil maageehn pu la. M kpa mpcoen ke m di li bil, ki kpa mpcoen ke m ki yoor li. Nte Uwumbor le tuk mi ke m ja kina.”

<sup>19</sup> Yesu aah len kina ki ti doo na, le Juu yaab aamci bi ibaabaa. <sup>20</sup> Bi ponn ni pam nan bui ke, “Tiyayaar le joo u. U waarr la. Ba ja ni pel waah len pu na?”

<sup>21</sup> Le biken mu len ke waah len pu na, naa ye unii u tiyayaar joo u na aaliin, ke unii u tiyayaar joo u na aan ymaa likr bijoom aanimbil.

### Juu yaab aah yii Yesu pu na

<sup>22</sup> N-yoonn ngbaan le Juu yaab ji njim Jerusalem ponn ni, ki teer baah nan toor Uwumbor Aadichal buyoonn na. Ni nan ye kakab aayoonn la. <sup>23</sup> Le Yesu nan bi chuun Solomonn aakaakpaak ki bi Uwumbor Aadichal ni na ni. <sup>24</sup> Le Juu yaab kuun ki si gob u, le ki baa u, “Aa ga cha ti li joo beeni ni yunn aa? Aa yaa ye Kristo u ga gaa timi lii na kan, tuk timi mbamom.”

<sup>25</sup> Le u bui bi, “M nan tuk nimi, le naa pak maah len pu na. M tun lituln Nte Uwumbor aayimbil pu. Lituln ngbaan le mok maah ye udaan u na. <sup>26</sup> Nimi, naa ye maanib. Nima le cha naa pak maah len pu na. <sup>27</sup> Maanib jun maaneel, le m nyi bi, le bi dii mi. <sup>28</sup> M tii maanib limofal li kaa kpa ndoon na. Baan kpo, ubaa mu aan ymaa nyan bi yjaal ni. <sup>29</sup> Nte Uwumbor u di bi tii mi na aapcoen jer mpcoen momok. Ubbaa aan ymaa nyan bi uma Uwumbor aajaal ni. <sup>30</sup> M ni Nte Uwumbor ye unibaan la.”

<sup>31</sup> Waah len kina na, le Juu yaab ki yoor yitakpal bi ti mae u. <sup>32</sup> Le u bui bi, “M tun litunyaan pam Nte Uwumbor aapcoen pu ninimbil ni. Lilatuln pu ni ban ni mae mi yitakpal?”

<sup>33</sup> Le Juu yaab bui u, “Naa ye litunyaan pu le cha ti ban ti mae si yitakpal. Aa sii Uwumbor la. Aa po ye unibon, le ki len ke aa ye Uwumbor la.”

<sup>34</sup> Le u bui bi, “Ni ymee nimi aakaal ponn ni ke Uwumbor len ke, ‘Ni ye maabim la.’ Ubbaa aan ymaa ja Uwumbor aaliin yoli. <sup>35</sup> Waah di waaliin ja binib bi aajaal ni na, u bui ke bi ye waabim. <sup>36</sup> M ma kan, Uwumbor nyan mi ki tun ni mi dulnyaa wee ni, le maah len ke m ye Ujapcoen na, ni bui ke m sii u uu? <sup>37</sup> M yaa kaa tun Nte Uwumbor aatuln kan, ni taa pak maah len pu na. <sup>38</sup> Ni yaa kaa pak maah len pu na kan, ni gaa mi ki kii Uwumbor aatuln li m tun na pu, aan ki bee mbamom ke Nte Uwumbor bi m ni, m mu bi u ni.”

<sup>39</sup> Waah len kina na, le bi ki ban bi chuu u mpcoen, le u miln bi chee.

<sup>40</sup> Le u ki puur Jocdann aamodapuul, le ki ti fuu nin chee Jonn nan muin binib mynyun ni njan na, ki nan bi nima. <sup>41</sup> Le kinipaak dan u chee, ki nan bui ke, “Jonn aa nan tun lijinjiir aatuln; to, u mu aah len uja wee aabor ti na momok gbii.” <sup>42</sup> Le binib gaa u ki kii nima chee, ki wiir.

### Lasarus aah nan kpo pu na

**11** To, uja ubaa nan bi, le ki bun, bi nan yin u ke Lasarus. U ni uninkpatiib Mari ni Mata nan bi kitij kibaa ni, bi yin ki ke Betani. <sup>2</sup> Mari ngbaan le ye upii u nan di tulalee kpir Tidindaan aataa pu, ki di waayikpir per na. Uma le aaninja Lasarus nan bun. <sup>3</sup> Waah bun na, le uninkpatiib tun unii u ti tuk Yesu, “Tidindaan, unii u aa gee u na bun.”

<sup>4</sup> Yesu aah jun kina na, le u bui ke, “Iween ngbaan aadoon aan li ye nkun.

Yaadoon le ga cha binib nyuj Uwumbor aan ki nyuj min Ujapoon mu.”

<sup>5</sup> Tɔ, Yesu nan gee Mata, ni unaal, ni Lasarus. <sup>6</sup> Waah ḥun ke u bun na, le u gaar waah bi nin chee na iwiin ilee. <sup>7</sup> Iwiin ilee ngbaan aah jer na, le u bui waadidiliib, “Cha ti ki gir buen Judea aatiij ni man.”

<sup>8</sup> Le waadidiliib baa u, “Umɔmɔkr, naa ye dandana le Juu yaab ban bi mae si njitakpal nima aa? Le aa ki ban aa gir buen nima aa?”

<sup>9</sup> Le u baa bi, “Nwiin mubaa aa ye tikur kipiik ni tilee ee? Unii yaa chuun nwiin pu kan, waan gbeer ki lir; ba pu? dulnyaa ni aawiihn le cha u waa. <sup>10</sup> Unii mu yaa chuun kinyeek kan, u ga gbeer ki lir; ba pu? nwiihn aa ki bi u chee.” <sup>11</sup> Yesu aah len kina ki ti doo na, le u ki len ke, “Tijo Lasarus dɔ geen. M cha m ti finn u la.”

<sup>12</sup> Le waadidiliib bui u, “Tidindaan, u yaa geen le kan, u ga pɔɔk.”

<sup>13</sup> Yesu mu aah len pu na le ye ke u kpo a. Waadidiliib ma nyi ke waah len pu na le ye ke u dɔ geen ngeenbamɔm la. <sup>14</sup> Nima le Yesu nin tuk bi chob chob, “Lasarus kpo a. <sup>15</sup> Ni ja mi mpopiin maah kaa nan bi u chee aan u kpo na; ba pu? nima le ga cha ni moo gaa mi ki kii. Cha ti li cha u chee man.”

<sup>16</sup> Le waadidiliib ponni ubaa, u bi yin u ke Tomas ki ki yin u ke Kijaan<sup>¶</sup> na le bui biken, “Cha ti mu dii u man, bi yaa ti ku u kan, ti mu kpo u chee.”

### U fikr binib nkun ni na le ye Yesu

<sup>17</sup> Le bi buen. Yesu aah ti fuu Betani aatiij ni na, le bi bui u, “Taah sub Lasarus na, iwiin inaa le na.” <sup>18</sup> Jerusalem ni Betani aa daa tɔb, naa pii mal bilee. <sup>19</sup> Juu yaab pam le nan nyan nima, ki dan Mata

ni Mari chee, bi nan sɔŋ bisui, bininja aah kpo pu na.

<sup>20</sup> Le Mata ḥun ke Yesu choo, le u tooh u nsan ni. Mari ma beenin ka kidiik ni.

<sup>21</sup> Le Mata ti bui Yesu, “Ndindaan, aa yaa ba bi do kan, nninja aa ba ga kpo.

<sup>22</sup> Dandana wee mu, m nyi ke aa yaa mee Uwumbor tiwan nimɔk pu na kan, u ga tii si.”

<sup>23</sup> Le Yesu bui u, “Aaninja ga fikr nkun ni.”

<sup>24</sup> Le Mata bui u, “M nyi ke u ga nan fikr nkun ni, kookoo aataadaal, bundaln binib mɔmɔk ga fikr nkun ni na.”

<sup>25</sup> Le Yesu bui u, “U fikr binib nkun ni, ki tii bi limɔfal na le ye min. Unii umɔk gaa mi ki kii na, u yaa kpo kan, u ga li kpa limɔfal. <sup>26</sup> Unii umɔk bi ki gaa mi ki kii na, waan kpo. Aa pak maah len pu na aa?”

<sup>27</sup> Le u kii ke, “Een, Ndindaan, m pak ke aa ye Uwumbor Aajapoon. Aa ye Kristo<sup>§</sup> u bi nan len ke u ga dan dulnyaa ni na.”

### Yesu aah wii pu na

<sup>28</sup> Mata aah len kina na, le u buen ti loon yin unaal Mari, le ki bui u, “Umɔmɔkr fuu ni, ki yin si.”

<sup>29</sup> Mari aah ḥun kina na, le u kpaan fii mala, ki buen u chee; <sup>30</sup> Yesu aa nan kee fuu ni kitij ni, u nan laa bi nsan ni, Mata aah tooh u nin chee na. <sup>31</sup> Juu yaab bi nan bi lidichal ni Mari chee ke bi sɔŋ usui na aah kan ke u kpaan fii nyan lipaal na, le bi mu fii paan u pu. Bi nan nyi ke u cha likaakul chee le u ti wii.

<sup>32</sup> Le u ti fuu Yesu aah bi nin chee na. Waah kan u na, le u gbaan unimbiin ni, ki bui u, “Ndindaan, aa yaa ba bi do kan, nninja aa ba ga kpo.”

<sup>¶</sup>11:16 : Kijaan: Baaliin ni, bi yin u ke Didimus la.

<sup>§</sup>11:27 : Hiibru aaliin ni, bi yin Kristo ke Masiya. Naatataa le ye ke unii u ga gaa binib lii na.

<sup>33</sup> Le Yesu kan ke u bi wii. Juu yaab bi mu dii u na, mu bi wii. Le usui bii. Le u fuur kaa lii u ponn ni.<sup>34</sup> le ki baa bi, “Ni sub u la chee?”

Le bi bui u, “Ndindaan, dan nan lik.”

<sup>35</sup> Le Yesu wii. <sup>36</sup> Le Juu yaab bui ke, “Lik waah gee u sakpen pu na.”

<sup>37</sup> Le bibaa mu bui ke, “Uja u likr ujoon aanimbil na, waa ba ga ijmaa cha Lazarus taa kpo oo?”

### Yesu aah fikr Lazarus nkun ni pu na

<sup>38</sup> Le Yesu ki fuur kaa lii u ponn ni, le ki ti fuu likaakul na chee. Ni nan ye kitakpadandaj aakaakul la. Le litakpal lek mbisamob. <sup>39</sup> Le u bui bi, “Chuu lekr litakpal na man.”

Mata, u ye uja u kpo na aaninkpan na nan bui u, “Ndindaan, waah kpo na, iwiin inaa din. Naah saa pu na, u ga li nuu a.”

<sup>40</sup> Le Yesu baa u, “Maa tuk si ke aa yaa gaa mi ki kii kan, aa ga kan Uwumbor aah kpa mpoon pu na aa?” <sup>41</sup> Waah len kina na, le bi chuu lekr litakpal na. Le u waan lik paacham ki bui ke, “Nte Uwumbor, maah len aa chee pu na, aa jum la. Nima le m dooni si. <sup>42</sup> M nyi ke n-yoonn momok aa jum maah len aa chee pu na. Kinipaak ki si do na pu, le m len kina, ke bi pak ke sin le tun ni mi.” <sup>43</sup> Waah len kina na, le u teen mpoon pu, “Lasarus, nya ni.” <sup>44</sup> Le utekpiir ngbaan fikr, ki nyan ni likaakul ni. Likekeln beenin poo ujaal, ni utaa, ni unimbil wob. Le Yesu bui bi, “Chuu poor likekeln ngbaan man, ki cha u li cha.”

### Baah kpokl ke bi ga ku Yesu pu na

(Matiu 26.1-5; Mak 14.1-2; Luk 22.1-2)

<sup>45</sup> Tɔ, Juu yaab bi dii Mari ki kan Yesu aah tun lijinjiir aatuln ngbaan pu na, bi ponn ni pam le nan gaa u ki kii.

<sup>46</sup> Bi ponn ni bibaa mu nan buen Farisii yaab chee ki ti tuk bi waah ja pu na.

<sup>47</sup> Farisii yaab aah jum kina na, le bi ni Uwumbor aatotoorninkpiib yin bibojirb aaninkpiib, le bi kuun ni bi chee. Le bi baa bi, “Ti ga ja kinye? Uja ngbaan tun lijinjiir aatun pam.” <sup>48</sup> Ti yaa cha u beenin jani kina kan, binib momok ga gaa u ki kii, le Rom yaab ga dan nan bii timi aatij, ki kuln timi aatimbul aanib momok.”

<sup>49</sup> Bi yin bi ponn ni ubaa ke Kayafas; uma le nan ye Uwumbor aatotoorninkpel libiln ngbaan; le u bui biken, “Naa nyi nibaa,<sup>50</sup> kaa nyi ke ni jan ke uja ubaa kpo binib momok pu, aan litimbul ngbaan momok taa kuln.” <sup>51</sup> Waah len pu na, naa ye ubaa pu le u len. U nan ye Uwumbor aatotoorninkpel le libiln ngbaan. Nima pu na, Uwumbor Aafuur Nyaan nan cha u len ke Yesu ga kpo litimbul ngbaan aanib momok pu. <sup>52</sup> Naa ye litimbul ngbaan baanja pu le u ga kpo. U ga kpo ki kuun Uwumbor aanib bi yaa ki bi njipepel momok ni na, ki kpaan bi ke bi ja unibaan.

<sup>53</sup> Uwumbor aatotoorninkpel ngbaan aah len kina na, liyaadaal ngbaan ki joo cha, bi nan kpokl baah ga ja pu ki ku Yesu na. <sup>54</sup> Nima pu le Yesu aa nan ki chuun mpaan pu Juu yaab aatij ni. U nan nyan nima ki buen kitij kibaa ni, bi yin ki ke Efraim, le u ni waadidiliib ti bi nima. Kaa daa nteersakpiin chee.

<sup>55</sup> Tɔ, ni nan gur siib le Juu yaab ji njim mu bi yin mu ke Lakr-jer aajim na.\*\* Njim aawiin aa nan kee fuu, le kinipaak nyan itingbaan ni ki buen Jerusalem, bi ti ja bibaa chain. <sup>56</sup> Le bi ban Yesu. Baah si Uwumbor Aadichal ni na, le bi baa tɔb, “Ni dak kinye? U ga tee dan njim mue ni aan waan dan?” <sup>57</sup> Le Uwumbor aatotoorninkpiib ni Farisii yaab nan bui bi

\*\*11:55 : Israel yaab nan ji Lakr-jer aajim ke bi teer buyoonn Uwumbor nan nyan bi tinaagbiir ni, Ijipt aatij ni na. Lik Nnyam 12.1-27.

ke unii ubaa yaa nyi waah bi nin chee na kan, u mɔk bi, aan bi buen ti chuu u.

### Upii ubaa aah nyuj Yesu pu na

(Matiu 26.6-13; Mak 14.3-9)

**12** Tɔ, ni nan gur iwiin iloop le Juu yaab ji Lakr-jer aajim ngbaan, le Yesu buen Betani aatiŋ ni. Lasarus, u Yesu nan fikr u nkun ni na, mu nan bi nima. <sup>2</sup> Le bi ja tijikaar ti jan na nima tii Yesu. Mata nan yoor tijikaar ngbaan siin bi. Lasarus nan ye binib bi nan ji Yesu chee tijikaar na ponn ni ubaa. <sup>3</sup> Le Mari yoor tulalee u kpa kidaak sakpen na kpalba ubaa, ki di ŋjimir Yesu aataa, ki di uyikpir per utaa. Tulalee ngbaan aah nu mɔ na, waabaam gaa kidiik ni. Bi yin tulalee ngbaan ke naad. <sup>4</sup> Le Yesu aadidiliib ponn ni ubaa, bi yin u ke Judas Iskariot, u ga nan kooh Yesu na, baa ke, <sup>5</sup> “Ba ja baa di tulalee ngbaan kooh ki kan ŋjimobil ji neer iwiin ikui itaa aapal ki di tii bigiim?” <sup>6</sup> Judas aatafal aa nan bi bigiim ni. U nan ye unaayuk la, ki nan ye unii u joo ŋjimobil aataakor na, ki su baah di ŋjimobil ji ja li ponn ni na. Nima le cha u len kina.

<sup>7</sup> Le Yesu bui Judas, “Di cha Mari. U joo tulalee wee u toor mi koir maasub daal la. <sup>8</sup> Bigiim ga li bi ni chee n-yoonn mɔmɔk. Mma aan li bi ni chee n-yoonn mɔmɔk.”

### Baah kpokl ke bi ga ku Lasarus pu na

<sup>9</sup> Tɔ, Juu yaab pam nan ŋjun ke Yesu bi Betani aatiŋ ni, le ki choo u chee. Naa ye Yesu baanja pu le bi dan. Bi nan ban bi kan Lasarus, u Yesu nan fikr u nkun ni na mu. <sup>10</sup> Nima pu le Uwumbɔr aatoorninkpiib kpokl ke bi ga ku Lasarus mu; <sup>11</sup> ba pu? u pu le Juu yaab pam gaa Yesu ki kii, kaa ki dii bima Uwumbɔr aatotoorninkpiib.

### Jerusalem aanib aah nyuj Yesu pu na

(Matiu 21.1-11; Mak 11.1-11; Luk 19.28-40)

<sup>12</sup> Ki woln kitaak le kinipaak ki bi Jerusalem ke bi ti ji njim na ŋjun ke Yesu choo. <sup>13</sup> Le bi yoor tibɔkpafar ki ti tooh u nsan ni, le ki tar, “Hosiana,<sup>††</sup> Uwumbɔr ja tinyoor ja unii u choo waayimbil ni na pu. Uwumbɔr ja tinyoor ja Israel yaab Aabɔrkpaan pu.”<sup>‡‡</sup>

<sup>14</sup> Le Yesu kan ubonsal ki diŋ u pu ke Uwumbɔr Aagban aah len pu na ke,

<sup>15</sup> “Sionn aatiŋ aanib, taa san ijawaan man.

Lik man, nimi Aabɔrkpaan choo ki dik ubon u laa diin na pu.”

<sup>16</sup> Kinipaak ngbaan aah tooh Yesu nsan pu kina na, n-yoonn ngbaan le waa-didiliib aa bee naatataa. Uwumbɔr aah yoor Yesu paacham na, n-yoonn ngbaan le bi teer ke ni ŋmee Uwumbɔr Aagban ni ke bi ga ja u kina, le ki teer kinipaak ngbaan aah nan ja u pu na.

<sup>17</sup> Kinipaak ki nan bi Yesu chee bundaln u yin Lasarus ke u nyan likaakul ni ki fikr u nkun ni na le nan mooni tibɔr ngbaan. <sup>18</sup> Le binib pam ŋjun waah tun li-jinjiir aatuln ngbaan pu na. Nima le cha bi tooh u nsan ni. <sup>19</sup> Farisii yaab aah kan kina na, le bi bui tɔb, “Ni kan aa? Taa ki kpa tinyoor tibaa. Dulnyaa ni aanib mɔmɔk dii uma la.”

### Griik yaab bibaa aah ban Yesu pu na

<sup>20</sup> Binib bi dan Jerusalem bi nan ji njim ngbaan ki doon Uwumbɔr na, bi ponn ni bibaa nan ye Griik yaab. <sup>21</sup> Le bi dan Filip chee. Filip nan ye Betseda aatiŋ ki bi Galilee aatiŋ ni na aanii la. Le bi bui u, “Uninkpel, ti ban ti kan Yesu.”

<sup>22</sup> Le Filip buen ti tuk Andru. Le bi mɔmɔk bilee buen ti tuk Yesu. <sup>23</sup> Le u

<sup>††</sup>12:13 : Hosiana aatataa le ye ke “Gaa timi lii.”

<sup>‡‡</sup>12:13 : Lik Ilahn 118.25, 26.

bui bi, "Buyoonn Uwumbor ga yoor min Unibon Aabo paacham na fuu ni a.<sup>24</sup> M tuk nimi mbam'on la, bi yaa di lidibil libaa bun kan, li ga kpo le ki nin ja tijikaar sakpen; bi yaa kaa di li bun kan, laan kpo, ki mu aan ja tijikaar, li ga li ye libil libaa la.<sup>25</sup> Unii umok gee waamofal ki jer min Yesu na, waamofal ga bee yoli la. Unii umok gee min ki jer waamofal dulnyaa wee ni na, u ga li kpa limofal li kaa kpa ndoon na, kaan bee yoli.<sup>26</sup> Unii yaa ban ke u tun lituln tii mi kan, udaan li dii mi. Maah bi nin chee na, maatutunn mu ga li bi nima. Unii yaa tun lituln tii mi kan, Nte Uwumbor ga nyuj udaan."

### **Yesu aah len waakun aabbor pu na**

<sup>27</sup> "Dandana, nsui bii sakpen a. M ga len kinye? M ga len ke, 'Nte, nyan mi falaa u choo na ni ii?' Maan len kina; ba pu? njitaa qj pu m dan dulnyaa wee ni na le ye ke m ji falaa ngbaan.<sup>28</sup> Nte, cha binib nyuj si."

Waah len kina na, le nneel nyan ni paacham ki len ke, "M cha bi nyuj mi, ki ga ki cha bi nyuj mi."

<sup>29</sup> Kinipaak ki si u chee ki jnun nneel ngbaan pu na, bi ponn ni bibaa nan bui ke uteal le gbenni, biken mu bui ke Uwumbor aatuun le len u chee.

<sup>30</sup> Le u bui bi, "Nneel ngbaan aa len m chee min baanja pu la. Mu len ni mu pu la.<sup>31</sup> Dandana wee, Uwumbor ga ji dulnyaa wee ni aanib tibor, ki ga jenn nyan kinimbɔŋ ki ye dulnyaa aanib aayidaan na, ki ja ki yoli.<sup>32</sup> Bi yaa yoor mi kitij paacham kan, m ga daa foor binib mɔmɔk dan mbaa chee."<sup>33</sup> U nan len kina ke bi bee waah ga kpo pu na.

<sup>34</sup> Le kinipaak ngbaan bui u, "Ti jnun Uwumbor Aagbaŋ len ke Kristo u ga gaa timi lii na ga li bi n-yoonn mɔmɔk. Aa ja kinye ki len ke bi ga yoor Unibon Aabo

kitiŋ paacham? Ijma ye Unibon Aabo ngbaan?"

<sup>35</sup> Le u bui bi, "Min u ye nwiihn na, maan ki li bi nikaasisik ni, ni yunn. Dii nwiihn mu aah laa bi pu na man, aan mbɔmbɔɔn taa pii nimi. Unii umok chuun mbɔmbɔɔn ni na kan, waa nyi waah cha niwɔb na.<sup>36</sup> Buyoonn min u ye nwiihn na laa bi ni chee na, gaa mi ki kii man, aan ki ja nwiihn ni aabim."

### **Juu yaab aah kaa gaa Yesu ki kii pu na**

Yesu aah len kina na, le u nyan nima ki bɔr ke bi taa ki kan u.<sup>37</sup> U nan tun lijinjiir aatun pam binimbil ni. Bi mu aa nan gaa u ki kii.<sup>38</sup> Baa gaa u ki kii, aan ni gbiin Uwumbor aabɔnabr Aisaya aah nan len pu na ke,

"Uwumbor, njma pak taah len pu na?  
Ijma bee saah kpa mpɔɔn pu na?"<sup>39</sup>

<sup>39</sup> Aisaya aah len kina na, le baa njmaa gaa Yesu ki kii; Aisaya mu ki len ke,

<sup>40</sup> "Uwumbor jɔb binimbil ke bi taa li waa;

ki cha bitafal pɔɔ, bi taa bee waaliin aatataa,

ki taa fenn dan uwɔb ke u tii bi laafee."<sup>41</sup>

<sup>41</sup> Aisaya nan len kina; ba pu? u nan kan Yesu aah nyuun sakpen pu na, le ki len waabɔr.

<sup>42</sup> Tɔ, Juu yaab aaninkpiib pam nan gaa Yesu ki kii; Farisii yaab pu, le baa len lipaal ke bi gaa u ki kii. Bi yaa len ke bi gaa u ki kii kan, Farisii yaab ngbaan ga nyan bi mmeen aadiik ni.<sup>43</sup> Nima le mɔk ke Juu yaab aaninkpiib ngbaan gee binib aapak ki jer Uwumbor yaan.

### **Tibor aajim aah ga li bi pu na**

<sup>44</sup> Le Yesu teen ke, "Unii umok gaa mi ki kii na kan, naa ye min baanja le u gaa ki kii, u gaa u tun ni mi na mu ki kii.<sup>45</sup> Unii umok kan mi na kan, u kan

<sup>¶¶</sup>**12:38** : Lik Aisaya 53.1.

<sup>§§</sup>**12:40** : Lik Aisaya 6.10.

Uwumbor u tun ni mi na mu. <sup>46</sup>M ye nwiihn le ki dan dulnyaa ni ke m nan woln binib aanimbil, aan unii umok gaa mi ki kii na kan, waan ki li bi mbombcoon ni. <sup>47</sup>Unii yaa qun maaliin, ki yaa kaa kii i kan, maan ji u tibor; maa dan ke m nan ji dulnyaa ni aanib tibor, m dan ke m gaa bi lii la. <sup>48</sup>Unii umok yii mi, kaa gaa maaliin na kan, tiwan nibaa bi ki ga mok ke waabor bii a. Kookoo aataadaal kan, maaliin le ga mok ke waabor bii, <sup>49</sup>ba pu? maa len mbaa pu. Nte Uwumbor u tun ni mi na, uma le tuk mi maah ga len pu na. <sup>50</sup>M bee ke unii umok kii waaliin na ga li kpa limokl li kaa kpa ndoon na. Nima pu na, waah tuk mi pu na, m len kina la.”

### **Yesu aah finn waadidiliib aataa pu na**

**13** Ni nan ye kitaak ki ga nan ji aan ki woln Lakr-jer aajim<sup>\*</sup> daal na. Le Yesu nyi ke ni qeeri u nya dulnyaa wee ni, ki buen Ute Uwumbor chee. N-yoonn momok u nan gee waanib bi bi dulnyaa ni na. U gee bi mbamom ki ti saa ndoon.

<sup>2</sup>Le ni qeeri bi ji kijook aajikaar. Le kinimbaj dan nan koo Judas Iskariot u ye Simonn aajapcoon na aasui ni ke u kooh Yesu. <sup>3</sup>Yesu nyi ke Ute Uwumbor tii u mpcoon momok, ki nyi ke u nyan ni Uwumbor chee, ki ga ki gir buen u chee la. <sup>4</sup>U ni waadidiliib nan kal ke bi ji tijikaar, le u fii sil, ki chuu peer waawan-peenkaan, ki di linaapuul buu uchaj ni, <sup>5</sup>le ki ban nnyun ja lisambil ni, ki piin ki bi finni waadidiliib aataa, ki joo linaapuul li bi uchaj ni na per bitaa. <sup>6</sup>Waah ti fuu Simonn Piita chee na le Simonn Piita bui u, “Ndindaan, sin le tee labr finn nttaa aa?”

<sup>7</sup>Le Yesu bui u, “Dandana, saa bee maah qani pu na aatataa. N-yoonn choole aa ga nan bee.”

<sup>8</sup>Le Piita bui u, “Saan finn nttaa daalbaadaa.”

Le Yesu bui u, “M yaa kaa finn aataa kan, saan ki li ye maanii.”

<sup>9</sup>Le Simonn Piita bui u, “Ndindaan, kina kan, taa finn nttaa baanja. Finn qjaal ni n-yil mu.”

<sup>10</sup>Le Yesu bui u, “Unii yaa fu nnyun kan, waan ki li ban u finn uwon, see utaa baanja le u ga finn; ba pu? uwon momok bi chain. To, nimi le bi chain; ni mu aa ye ni momok.” <sup>11</sup>Yesu nyi ke udaan u ga kooh u na bi bi ponn ni, nima le cha u len ke naa ye bi momok le bi chain.

<sup>12</sup>Waah finn bitaa ti doo, ki ki peen waawanpeenkaan, ki gir kal waakakaa chee na, le u baa bi, “Ni bee maah qja pu na aatataa aa? <sup>13</sup>Ni yin mi ke Umomokr, ki ki yin mi ke Nidindaan. Ni len mbamom la; ba pu? m ye kina la. <sup>14</sup>To, min u ye Nidindaan ni nimi Aamomokr na aah finn nitaa pu na, ni qjan ke ni mu li finni tjb aataa kina. <sup>15</sup>M momok nimi limokl la, ke ni mu li qani tjb ke maah ja nimi pu na. <sup>16</sup>M tuk nimi mbamom la, unaagbiija ubaa aa jer udindaan. Unii u bi tun ni u na ubaa aa jer unii u tun u na. <sup>17</sup>Ni yaa bee maah len pu na aatataa, ki yaa qani kina kan, ni ga li kpa mpopiin.

<sup>18</sup>“Maa len ni momok pu. M nyi maah nyan bi na aasui ni aah bi pu na, ki nyan nimi ke ni gbiin Uwumbor Aagbaaj aah len pu na ke, ‘M ni unii u kpaan ni ji lisambil ni na, uma le fii sil m pu.’<sup>†</sup> <sup>19</sup>M tuk nimi tiwan ni kaa kee ja na aabor dandana, ke ni yaa nan ja kan, ni ga pak ke m ye maah ye u na. <sup>20</sup>M tuk nimi mbamom la, unii yaa gaa maah ga tun

\*13:1 : Israel yaab nan ji Lakr-jer aajim ke bi teer buyoonn Uwumbor nan nyan bi tinaagbiir ni, Ijipt aatiq ni na. Lik Nnyam 12.1-27.

†13:18 : Lik Ilahn 41.9.

unii u na, u gaa mi le na. Unii yaa gaa mi kan, u gaa Uwumbor u tun ni mi na le na.”

**Yesu aah tuk bi ke bi ponn  
ni ubaa ga kooh u pu na**

(Matiu 26.20-25; Mak  
14.17-21; Luk 22.21-23)

<sup>21</sup> Yesu aah len kina na, le usui bii sakpen. Le u bui bi, “M tuk nimi mbamōn la, ni ponn ni ubaa ga kooh mi.”

<sup>22</sup> Le waadidiliib lik tōb, kaa bee waah len u na. <sup>23</sup> Waadidiliib ponn ni ubaa, u Yesu gee u na nan ka gbok u ki ji tijikaar. <sup>24</sup> Le Simonn Piita di ujaal mōk u ke u baa Yesu ke u len ḥma.

<sup>25</sup> Le udidiir ngbaan foor duun Yesu ki baa u, “Ndindaan, ḥma ye?”

<sup>26</sup> Le Yesu bui u, “M yaa war bisaa, ki di ḥja tikpin ni, ki di tii u na kan, uma le na.” Waah len kina na, le u war bisaa ki di ḥja tikpin ni, ki di tii Judas, u ye Simonn Iskariot aaajapōn na. <sup>27</sup> Judas aah gaa bisaa ngbaan na, le kinimbōj koo usui ni. Le Yesu bui u, “Saah ga ḥja pu na kan, ḥja mala.” <sup>28</sup> Binib bi nan bi ji tijikaar na ponn ni ubaa aa nyi ḥjitaan ḥji pu Yesu tuk u kina na. <sup>29</sup> Judas le joo ḥjimombil aataakor. Nima pu le bibaa dak ke Yesu tuk u ke u buen ti daa baah ban njim aa jikaar ti na la. Le biken mu dak ke Yesu tuk u ke u buen ti tii bigiim le ḥjimombil.

<sup>30</sup> Judas aah gaa bisaa ngbaan na, libuul ngbaan ni le u nyan kidiik ni. Ni nan ye kinyeek la.

**Yesu aah tii bi nkaal pōon pu na**

<sup>31</sup> Judas aah nyan na, le Yesu bui bi, “Dandana, Uwumbor ga nyuŋ min Unibon Aabo. M pu, le binib ga nyuŋ Uwumbor. <sup>32</sup> Bi yaa nyuŋ Uwumbor m pu kan, Uwumbor mu ga nyuŋ mi ubaa chee. U ga nyuŋ mi dandana wee la. <sup>33</sup> Maabim, m ga li bi ni chee ni yunn siib la. Ni ga li ban mi. Maah nan tuk

Juu yaab pu na, kina le m ki tuk ni mu dandana, ke naan ḥjmaa buen maah cha nin chee na. <sup>34</sup> M tii nimi nkaal pōon la, ke ni li gee tōb. Maah gee nimi pu na, ni mu li gee tōb kina. <sup>35</sup> Ni yaa gee tōb kan, nima le ga cha binib mōmōk bee ke ni ye maadidiliib.”

**Yesu aah bui ke Piita ga nee u pu na**

(Matiu 26.31-35; Mak  
14.27-31; Luk 22.31-34)

<sup>36</sup> Le Simonn Piita baa u, “Ndindaan, aa ga buen la chee?”

Le Yesu bui u, “Maah cha nin chee na, saan ḥjmaa dii mi dandana. N-yoonn choo, le aa ga nan buen.”

<sup>37</sup> Le Piita baa u, “Ndindaan, ba pu maan ḥjmaa dii si dandana? M ga ḥjmaa kpo aa pu.”

<sup>38</sup> Le Yesu baa u, “Aa ga sil ḥjmaa kpo m pu uu? M tuk si mbamōn la, aa ga len nfum mutaa ke saa nyi mi, le ukooja nin wii.”

**Yesu le ye nsan mu  
cha Uwumbor chee na**

**14** “Ni taa cha ilandak li muk nimi. <sup>1</sup> Ni gaa Uwumbor ki kii man, ki gaa m mu ki kii man. <sup>2</sup> Tidir wiir Nte Uwumbor do. Ti yaa kaa ba wiir kan, m ba ga tuk nimi. M cha m ti toor nkookoo yaan ki kiir nimi la. <sup>3</sup> M yaa buen ti toor nkookoo yaan ki kiir nimi kan, m ga gir ni, ki nan yoor nimi buen mbaa chee, ni ti li bi maah ga li bi nin chee na. <sup>4</sup> Ni nyi maah cha nin chee na aasan.”

<sup>5</sup> Le Tomas bui u, “Ndindaan, taa nyi saah cha nin chee na. Ti ga ḥja kinye ki li nyi nsan mu cha nima na?”

<sup>6</sup> Le Yesu bui u, “Min le ye nsan ngbaan, ni mbamōn, ni limōfäl. Ubaa aan dan Nte Uwumbor chee, see u dii mi. <sup>7</sup> Ni yaa ba nyi mi kan, ni ba ga li nyi Nte Uwumbor mu. Dandana ni nyi u, ki kan u.”

<sup>8</sup> Le Filip bui u, “Ndindaan, mōk timi Aate. Nima le tinimbil ga gbiin.”

<sup>9</sup> Le Yesu baa u, “Filip, m bi ni chee ni yunn kina, le saa bee mi ii? Unii umōk kan mi na, u kan Nte Uwumbōr mu le na. Ba pu aa bui mi ke m mōk nimi Nte? <sup>10</sup> M bi Nte Uwumbōr ni, Nte Uwumbōr mu bi m ni. Saa pak kina aa? Maah tuk nimi iliin i na, maa len mbaa pu. Nte Uwumbōr u bi m ni na le cha m tun waatuln.

<sup>11</sup> “Ni li pak ke m bi Nte Uwumbōr ni, Nte Uwumbōr mu bi m ni. Ni yaa kaa pak maah len pu na kan, gaa mi ki kii lituln ngbaan pu man. <sup>12</sup> M tuk nimi mbamōn la, unii umōk gaa mi ki kii na kan, u ga tun lituln ke maah tun pu na. U mu ga tun lituln li jer lituln ngbaan na; ba pu? m cha Nte Uwumbōr chee la. <sup>13</sup> Ni yaa mee Uwumbōr tiwan nimo māayimbi pu na kan, m ga ḥa naah ban pu na tii nimi, aan binib nyuj Uwumbōr, min Ujapōon pu. <sup>14</sup> Ni yaa mee mi tiwan māayimbi pu kan, m ga ḥa naah ban pu na tii nimi.”

### Uwumbōr Aafuur Nyaan aah ga fuu ni pu na

<sup>15</sup> “Ni yaa gee mi kan, ni ga kii maamōb, <sup>16</sup> le m ga mee Nte Uwumbōr, le u ga tii nimi Uteter uken, u li bi ni chee n-yoonn mōmōk. <sup>17</sup> Uma le ye Uwumbōr Aafuur Nyaan mu ye mbamōn na. Dulnyaa aanib aa ḥmaa gaa mu; ba pu? baa waa mu, ki mu aa nyi mu. Nimi le nyi mu; ba pu? mu bi ni chee, ki ga li bi ni ni.

<sup>18</sup> “Maan di nimi lii nibaa. M ga gir ni ni chee. <sup>19</sup> Ni gur siib le dulnyaa aanib aan ki kan mi. Nimi le ga kan mi. Maah kpa limōfal na, nima pu le ni mu ga li kpa limōfal. <sup>20</sup> Liyaadaal ngbaan le ni ga bee ke m bi Nte Uwumbōr ni, le ni mu bi m ni, le m mu bi ni ni.

<sup>21</sup> “Unii umōk nyi maakaal ki kii mu na, uma le gee mi. Unii yaa gee mi kan,

Nte Uwumbōr ga li gee udaan ngbaan. M mu ga li gee u, ki ga di mbaa mōk u.”

<sup>22</sup> Le Judas uken na, naa ye Judas Iskariot, baa u, “Ndindaan, ba pu aa ga di aabaa mōk timi, kaan di mōk dulnyaa ni aanib?”

<sup>23</sup> Le Yesu bui u, “Unii yaa gee mi kan, u ga kii maaliin, le Nte Uwumbōr ga li gee u, le ti ga dan u chee, ki ga li bi u chee. <sup>24</sup> Unii yaa kaa gee mi kan, waan kii maaliin. Maah tuk nimi iliin i na aa ye maaliin, i ye Uwumbōr u tun ni mi na aaliin la.

<sup>25</sup> “Maah laa bi ni chee na, le m tuk nimi tibōr timina. <sup>26</sup> Nte Uwumbōr ga tun ni Uteter, maayimbi pu. Uteter ngbaan ye Waafuur Nyaan la. Uma le ga mōk nimi tibōr mōmōk aatataa, ki ga teer nimi maah tuk nimi tibōr timōk na.

<sup>27</sup> “M tii nimi nsuudoon la. Maah kpa nsuudoon pu na, kina le m tii nimi. Dulnyaa aawan aa ḥmaa tii nimi nsuudoon ke maah tii nimi pu na. Ni taa cha ilandak li muk nimi, ki taa san ijawaan man.

<sup>28</sup> Ni ḥjun m len ke m ga buen ki ga ki gir ni, ni chee. Ni yaa gee mi kan, ni ba ga li kpa mpopiin ke m buen Nte Uwumbōr chee; ba pu? Nte jer mi. <sup>29</sup> M tuk nimi tiwan ni kaa kee ḥa na aabor dandana, ke ni yaa nan ḥa kan, ni gaa mi ki kii. <sup>30</sup> Maan ki len ni chee tibōr ni yunn; ba pu? dulnyaa wee aayidaan kinimbi le choo. Ki mu aan ḥmaa ḥa mi nibaa. <sup>31</sup> M ban ke dulnyaa ni aanib bee ke m gee Nte Uwumbōr, nima le m ḥjani waah tuk mi pu na mōmōk.

“Fiin, ti li cha man.”

### Yesu aah ye lisupuul bamōnn pu na

**15** “Min le ye ndaan aasubil aa-  
supuul bamōnn na. Nte Uwumbōr le ye ukpaal u lik busub ngbaan na.  
<sup>2</sup> Ibon imōk bi m pu kaa lu ḥjisubil na, u ga per i lii. Ibon imōk lu ḥjisubil na, u ga toor i, i moo lu ḥjisubil. <sup>3</sup> Maah tuk nimi maaliin na, ima le toor nimi aabimbin.

<sup>4</sup> Ni li kpaan m chee man, m mu kpaan ni chee. Mbon yaa bi mubaa, kaa tuu busub pu kan, mu aan ɣmaa lu ɣjisubil. Kina le ni mu yaa kaa kpaan m chee kan, naan ɣmaa li ɣjani tnyoor tii Uwumbor.

<sup>5</sup> “Min le ye lisupuul ngbaan. Le ni ye ibon. Unii umɔk kpaan m chee, m mu kpaan u chee na, udaan ngbaan ɣjani tnyoor sakpen tii mi; ni mu yaa kaa kpaan m chee kan, naan ɣmaa ja nibaa. <sup>6</sup> Unii yaa kaa kpaan m chee kan, u ga ɣja yɔli ke mbon mu kaa tuu busub pu na aah kuur pu na la. Le Uwumbor ga mee u lii ke binib aah peeibokuun pu ki joo tuur mmii na. <sup>7</sup> Ni yaa kpaan m chee, ki yaa joo maaliin nisui ni kan, mee Uwumbor naah ban pu na man, le u ga ja kina tii nimi. <sup>8</sup> Ni yaa ɣjani tnyoor sakpen tii Nte Uwumbor kan, nima le ga nyuŋ u, ki ga mɔk ke ni sil ye maadidiliib. <sup>9</sup> Nte Uwumbor aah gee mi pu na, kina le m mu gee nimi. Ni li beenin ye maah gee bi na. <sup>10</sup> M ɣjani Nte Uwumbor aah tuk mi pu na, le u beenin gee mi. Ni mu yaa ɣjani maah tuk nimi pu na kan, m mu ga li beenin gee nimi.

<sup>11</sup> “M tuk nimi tibɔr timina ke ni li kpa mpopiin ke maah kpa pu na. M ban ke ni li kpa mpopiin mbamɔm. <sup>12</sup> Maakaal le ye ke ni li gee tɔb ke maah gee nimi pu na. <sup>13</sup> Unii yaa kpo ujɔtiib pu kan, ubaa aa ki bi, ki kpa ngeehm ki ti jer kina. <sup>14</sup> Ni yaa ɣjani maah tuk nimi pu na kan, ni ye njɔtiib la. <sup>15</sup> Maan ki yin nimi ke bitutum; m yin nimi ke njɔtiib la. Ututunn aa nyi udindaan aabɔr mɔmɔk; m tuk nimi tibɔr timɔk m ɣjun Nte Uwumbor chee na. <sup>16</sup> Nimi le aa nyan mi. Min le nyan nimi, ki siin ke ni li ɣjani tnyoor ti ga li bi n-yoonn mu kaa kpa ndoon na, ke ni yaa mee Nte Uwumbor tiwan maayim-bil pu kan, u ga tii nimi. <sup>17</sup> Ni li gee tɔb. Maah tii nimi nkaal mu na le na.”

### Dulnyaa aanib aah ga li nan Yesu aanib pu na

<sup>18</sup> “Dulnyaa aanib yaa nan nimi kan, ni li nyi ke bi puen nan mi la, le ki nin nan ni mu. <sup>19</sup> Ni yaa ba ye dulnyaa yaab kan, dulnyaa yaab ba ga li gee nimi ke baah gee tɔb pu na; ni mu aa ye dulnyaa yaab. M nyan nimi dulnyaa ni aanib akaasisik ni, nima le cha dulnyaa yaab nan nimi. <sup>20</sup> Teer man maah nan tuk nimi pu na ke, ‘Unaagbiija ubaa aa jer udindaan.’ Bi yaa nan ɣja mi falaa kan, bi ga ɣja ni mu falaa. Bi yaa nan kii maaliin kan, bi ga kii nimi aaliin mu. <sup>21</sup> Baa nyi Uwumbor u tun ni mi na. Nima le bi ga ɣja nimi falaa m pu. <sup>22</sup> M yaa kaa ba dan dulnyaa ni ki nan tuk bi maabɔr kan, baa ba ga li kpa taani; naah bi pu na, bi kpa taani; ba pu? maah tuk bi maabɔr na, baan ki ɣmaa len ke baa nyi ti. <sup>23</sup> Unii yaa nan mi kan, naa ye min baanja le u nan, u nan Nte Uwumbor mu la. <sup>24</sup> M tun lijinjiir aatun binimbil ni. Ubaa aa ki bi, ki ga ɣmaa tun lijinjiir aatun kina. M yaa kaa ba tun lijinjiir aatun ngbaan binimbil ni kan, baa ba ga li kpa taani; naah bi pu na, bi kpa taani; ba pu? bi kan maah tun pu na, ki nan m ni Nte Uwumbor mɔk. <sup>25</sup> Bi nan timi kina ke ni gbiin Uwumbor Aagbaŋ aah len pu na ke, ‘Bi po nan mi fam la, naa ye ke m ɣja bi nibaa.’\*

<sup>26</sup> “Tɔ, Uteter na ga fuu ni. Uma le ye Nte Uwumbor Aafuur Nyaan mu ye mbamɔm, ki nyan ni Uwumbor chee na. Min le ga tun ni mu ni chee. Muma le ga nan tuk nimi maabɔr. <sup>27</sup> Ni mu ga tuk binib maabɔr; ba pu? ni nan bi m chee, maah piin maatuln buyoonn ki nan saa dandana na.

**16** “M tuk nimi binib aah ga nan ɣja nimi falaa pu na, ke ni yaa nan ɣja kan, ni taa gir puwɔb. <sup>2</sup> Bi ga nyan nimi mmeen aadir ni; n-yoonn mbaa mu

choo, unii yaa ku nimi kan, u ga li dak ke u tun Uwumbor aatuln le na.<sup>3</sup> Baa nyi Nte Uwumbor, kaa nyi m mu. Nima le ga cha bi ja nimi kina.<sup>4</sup> M tuk nimi baah ga ja nimi pu na, ke n-yaayoonn yaa nan fuu ni kan, ni ga teer ke m nan tuk nimi kina.”

### **Uwumbor Aafuur Nyaan aatuln**

“Maah nan bi ni chee na, nima le cha maa nan puen tuk nimi tibor tee.<sup>5</sup> Dandana, m ga ki gir buen u tun ni mi na chee, le ni ponni ubaa aa baa mi ke m cha la chee.<sup>6</sup> Maah bui ke m ga buen cha nimi na, nima pu le nisui bii sakpen.<sup>7</sup> M tuk nimi mbamōn la, m yaa buen kan, ni ḥjan ki tii nimi; ba pu? m yaa kaa buen kan, Uteter ngbaan aan dan. M yaa buen kan, m ga tun ni u ni chee.<sup>8</sup> U yaa fuu ni kan, u ga mok dulnyaa ni aanib ke bi ye titunwanbirdam, ki ga mok bi ke m ye uninyaan la, ki ga mok bi ke Uwumbor ga ji bi tibor.<sup>9</sup> U ga mok bi ke bi ye titunwanbirdam; ba pu? baa gaa mi ki kii.<sup>10</sup> U ga mok bi ke m ye uninyaan la; ba pu? m ga buen Nte Uwumbor chee, le naan ki kan mi.<sup>11</sup> U ga mok bi ke Uwumbor ga ji bi tibor; ba pu? u jin kinimbɔŋ ki ye dulnyaa wee ni aayidaan na tibor.

<sup>12</sup>“M kpa tibor pam ki ga tuk nimi; ti mu ye nnan aabor la, naan ḥjmaa gaa ti dandana.<sup>13</sup> Uwumbor Aafuur Nyaan mu ye mbamōn na yaa nan fuu ni kan, mu ga tuk nimi mbamōn mɔmɔk; mu aan len mubaa pu; mu aah ḥjun Uwumbor chee ti na, tima le mu ga len, ki ga tuk nimi budabu ga nan ja n-yoonn mu choo na na.<sup>14</sup> Mu ga nyur mi; mu ga di maabor tuk nimi.<sup>15</sup> Nte Uwumbor aabor mɔmɔk ye maabor la. Nima le cha m bui nimi ke mu ga di maabor tuk nimi.”

### **Mpombiin ni mpopiin pu**

<sup>16</sup>“Ni yaa kpee siib kan, naan ki kan mi. Le ni ki kpee siib kan, ni ga ki kan mi.”

<sup>17</sup> Le waadidiliib bibaa baa tɔb, “Waah len pu na aatataa ye kinye? U bui ke ni yaa kpee siib kan, taan ki kan u, ni ki kpee siib kan, ti ga ki kan u, ki bui ke u ga buen Ute Uwumbor chee.<sup>18</sup> Ni kpee siib’ aatataa ye kinye? Taa nyi waah len pu na aatataa.”

<sup>19</sup> Le u bee ke bi ban bi baa u tibor ngbaan aatataa. Le u bui bi, “M len ke ni yaa kpee siib kan, naan ki kan mi, ni ki kpee siib kan, ni ga ki kan mi. Ni baa tɔb maah len pu na aatataa la aa?<sup>20</sup> M tuk nimi mbamōn la, nimi le ga li kaani ki wii; dulnyaa aanib ma ga li kpa mpopiin. Ni ga li kpa mpombiin; nimi aapombiin ngbaan mu ga nan kpальн mpopiin.<sup>21</sup> Upii yaa ban u maa ubo kan, u ga li kpa mpombiin waafalaa pu. U ti ma ubo doo kan, waan ki teer falaa ngbaan aabor, u ga li kpa mpopiin la; ba pu? unipɔɔn koo ni udo.<sup>22</sup> Ni bi kina le ni mu chee. Dandana, ni kpa mpombiin la. M ni nimi ga nan ki kan tɔb, le ni ga li kpa mpopiin. Ubaa aan ḥjmaa nyan mpopiin ngbaan nisui ni.

<sup>23</sup>“Liyaadaal ngbaan, naan ki baa mi tiwan nibaa pu. M tuk nimi mbamōn la, ni yaa mee Nte Uwumbor tiwan nimok maayimbiil pu na kan, u ga tii nimi.<sup>24</sup> Naa kee mee Uwumbor tiwan nibaa maayimbiil pu, ki nan saa din. Ni li mee u, le ni ga kan, ki li kpa mpopiin mbamōm.”

### **Yesu aah nyaŋ dulnyaa pu na**

<sup>25</sup>“M ḥjakl ḥiyataŋak le ki tuk nimi tibor timina. N-yoonn choo, maan ki ḥjakl ḥiyataŋak tuk nimi. M ga di iliin i diin na le tuk nimi Nte Uwumbor aabor.<sup>26</sup> Liyaadaal ngbaan le ni ga mee Uwumbor maayimbiil pu. Maa len ke m ga mee Nte Uwumbor ki tii nimi;<sup>27</sup> uma ubaa le gee nimi; ba pu? ni gee mi, ki pak ke m nyan ni u chee.<sup>28</sup> Tɔ, m nyan ni Nte Uwumbor chee, le ki dan dulnyaa

ni. Dandana, m ga nya dulnyaa ni, ki gir buen Nte Uwumbor chee.”

<sup>29</sup> Le waadidiliib bui u, “Dandana, aa len iliin i diin na. Saa ki ḥakl ḥiyataŋak. <sup>30</sup> Dandana ti bee ke aa nyi tiwan mōmōk. Binib aa kee baa si, le aa bee baah ban bi baa si pu na. Nima le cha ti pak ke aa nyan ni Uwumbor chee.”

<sup>31</sup> Le u baa bi, “Ni sil gaa mi ki kii dandana wee la aa? <sup>32</sup> N-yoonn mbaa choo, ki mu fuu ni a, le ni mōmōk ga yaa, ki kun, ki cha mi mbaa; m mu aa bi mbaa, Nte Uwumbor bi m chee. <sup>33</sup> M tuk nimi tibor timina ke ni li kpa nsuudoon m pu. Ni ga kan falaa dulnyaa ni. Ni li kpa lipobil man; ba pu? m nyaj dulnyaa a.”

### Yesu aah mee Uwumbor tii waadidiliib pu na

**17** Yesu aah len kina na, le u waan lik paacham, ki bui ke, “Nte Uwumbor, n-yoonn fuu ni a. Nyuj min Aajapcoon, le m mu nyuj si Nte; <sup>2</sup> ba pu? aa ḥa mi binib mōmōk Aadindaan ke m di limōfal li kaa kpa ndoon na, ki di tii saah tii mi binib bi na mōmōk. <sup>3</sup> Sin baanja le ye Uwumbor bamōnn. Binib bi nyi si, ki nyi mi Yesu Kristo u aa tun ni u na, bima le kpa limōfal li kaa kpa ndoon na. <sup>4</sup> M nyuj si dulnyaa wee ni; m tun saah tii mi lituln li na ki doo. <sup>5</sup> Nte Uwumbor, dulnyaa aah kaa nan kee bi buyoonn na, m nan bi aa chee, le aa nyuj mi. Nte, ki nyuj mi kina aa chee.

<sup>6</sup> “M mōk bijab bimina saah bi pu na. Aa nyan bi dulnyaa ni aanib ponn ni ki di tii mi la. Bi nan ye saanib la, le aa di bi tii mi, le bi joo saaliin. <sup>7</sup> Dandana bi bee ke saah tii mi tiwan nimōk na, ni nyan ni aa chee la; <sup>8</sup> ba pu? m tuk bi saah tuk mi tibor ti na, le bi gaa ti, ki nyi ke ni ye mbamōn ke m nyan ni aa chee, ki pak ke si le tun ni mi.

<sup>9</sup> “M mee si tii bi. Maa mee si tii dulnyaa aanib. M mee si tii binib bi aa tii mi na la; ba pu? bi ye saanib la. <sup>10</sup> Maanib

mōmōk ye saanib la. Le saanib mu ye maanib. Le bi nyuj mi. <sup>11</sup> Dandana, m choo aa chee la. Maan ki li bi dulnyaa ni; bima le ga li bi dulnyaa ni. Nte Uwumbor u ye chain na, aa tii mi saayimbil. Cha liyimbil ngbaan aapcoon li lik bi, bi li ye unibaan ke m ni si aah ye unibaan pu na. <sup>12</sup> Maah bi bi chee buyoonn na, m lik bi saayimbil li aa tii mi na aapcoon pu la. M lik bi, le bi ponn ni ubaa aa bee yōli, see nifam na baanja. Waah bee fam na, ni gbiin Uwumbor Aagbaj aah len pu na. <sup>13</sup> Dandana m choo aa chee la. Maah laa bi dulnyaa ni na, nima le m len aa chee tibor timina ke bi li kpa mpopiin ke maah kpa pu na. <sup>14</sup> M tuk bi saaliin. Maah kaa ye dulnyaa yoo na, kina le bi mu aa ye dulnyaa yaab. Nima le cha dulnyaa aanib nan bi. <sup>15</sup> Maa mee si ke aa nyan bi dulnyaa ni. M mee si ke aa taa cha kinimbōn ḥa bi nibaa. <sup>16</sup> Maah kaa ye dulnyaa yoo na, kina le bi mu aa ye dulnyaa yaab. <sup>17</sup> ḥa bi chain. Cha saaliin i ye mbamōn na ḥa bi chain. <sup>18</sup> Saah tun ni mi dulnyaa wee ni pu na, kina le m mu tun bi dulnyaa ni. <sup>19</sup> Bi pu le m di mbaa tii si ke bi mu li ye saanib bi bi chain mbamōn na.

<sup>20</sup> “Maa mee si tii bijab bimina baanja. M mee si tii binib bi ga gaa mi ki kii baaliin pu na la. <sup>21</sup> M mee si ke bi mōmōk li ye unibaan. Nte Uwumbor, aa bi m ni, le m mu bi aa ni. Cha bi mu li bi ti ni, aan dulnyaa ni aanib pak ke aa sil tun ni mi. <sup>22</sup> Saah tii mi saabimbinyaan pu na, kina le m mu tii bi, aan bi li ye unibaan ke m ni si aah ye unibaan pu na. <sup>23</sup> M bi bi ni, le aa mu bi m ni, ke bi kpaan unibaan mbamōn, aan dulnyaa ni aanib bee ke aa tun ni mi, ki bee ke aa gee saanib ke saah gee mi pu na.

<sup>24</sup> “Nte Uwumbor, saah tii mi binib bi na, m ban bi mu li bi maah bi nin chee na, ki kan saah nyuj mi pu na; saah kaa nan kee naan dulnyaa buyoonn na, aa nan gee mi. <sup>25</sup> Nte Uwumbor u ḥani ni

ŋjan na, dulnyaa aanib aa nyi si. Min le nyi si. Binib bimina mu bee ke aa tun ni mi la.<sup>26</sup> M mɔk bi saah bi pu na, ki ga li beenin mɔk bi, ke bi mu li gee tob ke saah gee mi pu na, aan m mu li bi bi ni.”

### Baah chuu Yesu pu na

(Matiu 26.47-56; Mak 14.43-50; Luk 22.47-53)

**18** Yesu aah len kina ki ti doo na, le u ni waadidiliib puur nkpen mu bi yin mu ke Kidronn na. Isui i lu ŋjisubil jikee na aasaak kibaa bi nima chee. Le bi koo kisaak ngbaan ni.<sup>2</sup> Le Judas, u ga kooh Yesu na, mu nyi nima chee; Yesu ni waadidiliib nan kuuni nima chee kpala kpala.<sup>3</sup> Le Judas nan di butɔb aajab ni bitutum bi nyan ni Uwumbɔr aatotoorninkpiib ni Farisii yaab chee na, ki buen kisaak ngbaan ni bi ti chuu Yesu. Bi nan joo ni karyaa mam, ni tijawan.<sup>4</sup> Le Yesu nyi budabu ga ŋja u na. Le u tooh bi nsan ni, le ki ti baa bi, “Ni ban ŋjma?”

<sup>5</sup> Le bi bui u, “Ti ban Yesu u ye Nasaref aatiŋ aanii na la.”

Le u bui bi, “Min ye.”

Judas u kooh u na mu nan si butɔb aajab ngbaan chee.<sup>6</sup> Yesu aah len ke uma ye na, le bi sur puwɔb, ki lir kitin.<sup>7</sup> Nima le u ki baa bi, “Ni ban ŋjma?”

Le bi bui ke, “Yesu u ye Nasaref aatiŋ aanii na.”

<sup>8</sup> Le u bui bi, “M tuk nimi ke min ye. Ni yaa ban mi kan, ni cha maadidiliib na li cha.”<sup>9</sup> U len kina ke ni gbiin waah len pu na, ke Uwumbɔr aah tii u binib bi na, waa cha bi ponn ni ubaa bee fam.

<sup>10</sup> Le Simonn Piita joo kijaak aajuk, le ki di gaa per Uwumbɔr aatotoorninkpel aanaagbijja aatafagir. Bi yin unaagbijja ngbaan ke Malkus.<sup>11</sup> Le Yesu bui Piita, “Di saajuk ngbaan fu kijuchook ni. M taa ji falaa u Nte Uwumbɔr siin mi na aa?”

### Baah di Yesu buen uninkpel Anas chee pu na

<sup>12</sup> Le butɔb aajab, ni baaninkpel, ni bitutum ngbaan chuu Yesu ki buu ujaal,<sup>13</sup> le ki pue di u buen Anas chee. Anas nan ye Kayafas aachool la. Kayafas nan ye Uwumbɔr aatotoorninkpel le libiln ngbaan,<sup>14</sup> ki ye uja u nan tuk Juu yaab ke ni ŋjan ke unibaan kpo binib mɔmɔk pu na.

### Piita aah nee Yesu pu na

(Matiu 26.69-70; Mak 14.66-68; Luk 22.55-57)

<sup>15</sup> Baah di Yesu buen na, le Simonn Piita ni Yesu aadidiir ubaa paan u pu. Uwumbɔr aatotoorninkpel nyi Yesu aadidiir ngbaan. Nima le u dii Yesu ki koo ni Uwumbɔr aatotoorninkpel aachiln ni.<sup>16</sup> Le Piita nan sil mbisamɔb chee lipaal. Le Yesu aadidiir u Uwumbɔr aatotoorninkpel nyi u na buen ti len usapɔɔn u si kii mbisamɔb na chee, le ki di Piita koo ni.<sup>17</sup> Le usapɔɔn ngbaan baa Piita, “Aa mu ye uja ngbaan aadidiir ubaa la aa?”

Le u bui u, “Maa ye.”

<sup>18</sup> Tiwoor nan bi. Le Uwumbɔr aatotoorninkpel aatutum, ni Juu yaab aatutum nan di nkoon tuur mmii, ki si wol. Le Piita mu si bi chee, ki si wol mmii.

### Uwumbɔr aatotoorninkpel aah jin Yesu tibɔr pu na

(Matiu 26.59-66; Mak 14.55-64; Luk 22.66-71)

<sup>19</sup> Le Uwumbɔr aatotoorninkpel baa Yesu waadidiliib aabɔr, ki baa u waah mɔk binib pu na aabɔr.<sup>20</sup> Le Yesu bui u, “N-yoonn mɔmɔk, le m len binib mɔmɔk aanimbil ni, ki tuk bi Uwumbɔr aaliin, mmeen aadir ni, ni Uwumbɔr Aadichal ni, Juu yaab mɔmɔk aah kuuni nin chee na. Maa len tibɔr tibaa libɔɔl ni.<sup>21</sup> Ba ŋja aa baa mi? Baa binib bi ŋjun maah len pu

na ke m tuk bi kinye. Bi nyi maah len pu na.”

<sup>22</sup> Yesu aah len kina na, le ututunn u si u chee na di unjaal faa u, le ki baa u, “Uwumbor aatotoorninkpel chee le aa len kina aa?”

<sup>23</sup> Le Yesu bui u, “M yaa len tibor kan, mok binib ngbaan taah bir pu na. Maah len pu na yaa jan kan, ba ja aa faa mi?”

<sup>24</sup> Le Anas di Yesu tun Kayafas u ye Uwumbor aatotoorninkpel na chee. Tikululn beenin buu unjaal.

### Piita aah ki nee Yesu pu na

(*Matiu 26.71-75; Mak 14.69-72; Luk 22.58-62*)

<sup>25</sup> Simonn Piita aah si wol mmii pu na, le bi baa u, “Aa mu ye waadidiliib ponn ni ubaa la aa?”

Le u nee ki bui ke waa ye.

<sup>26</sup> Le Uwumbor aatotoorninkpel aanaagbiib ponn ni ubaa, u ye uja u Piita gaa per utafal na aana aabo ubaa na, baa u, “Maa ba kan si Yesu chee kisaak ngbaan ni ii?”

<sup>27</sup> Le Piita ki nee. Libuul ngbaan ni le ukooja wii.

### Pailat aah jin Yesu tibor pu na

(*Matiu 27.1-2, 11-14;*  
*Mak 15.1-5; Luk 23.1-5*)

<sup>28</sup> Le bi di Yesu nyan Kayafas aadichal ni, ki di u buen kitij ngbaan aaninkpel aadichal ni, bi yin u ke Pailat. Ni nan ye lichakpitaawoln la. Juu yaab aaninkpiib nan ban ke bi li bi chain ki ji Lakr-jer aajim,<sup>¶</sup> nima le baa nan koo ni lidichal ngbaan ni.<sup>29</sup> Nima pu le Pailat nyan li-paal bi chee, ki ti baa bi, “Ni galn uja ngbaan kinye?”

<sup>30</sup> Le bi bui u, “Uja ngbaan yaa kaa ba ye bakadaan kan, taa ba ga chuu u ja aajaal ni.”

<sup>31</sup> Le Pailat bui bi, “Nimi nibaa gaa u ki ti ji u tibor, nimi aakaal aah dii pu na.”

Le bi bui u, “Taa kpa nsan ti ku unii.”

<sup>32</sup> Baah len kina na, ni gbiin Yesu aah nan len pu ki mok binib waah ga nan kpo pu na.

<sup>33</sup> Le Pailat ki labr koo lidichal na ni, le ki yin Yesu, ki nan baa u, “Sin le ye Juu yaab aabor aa?”

<sup>34</sup> Le Yesu baa u, “Saah len pu na, aa len aabaa pu le aan binib le tuk si ke m ye Juu yaab aabor.”

<sup>35</sup> Le Pailat baa u, “M ye Juu yaab aanii la aa? Sin aabaa aanib ni Uwumbor aatotoorninkpiib le di si ja jjaal ni. Aa ja ba?”

<sup>36</sup> Le Yesu bui u, “Maanaan aa ye dulnyaa wee ni aanaan. Maanaan yaa ba ye dulnyaa wee ni aanaan kan, maadidiliib ba ga jan kijaak, Juu yaab taa jmaa chuu mi. Maanaan aa ye dulnyaa wee ni aanaan.”

<sup>37</sup> Le Pailat baa u, “Aa sil ye ubor la aa?”

Le Yesu bui u, “Ni ye saah len pu na. M dan dulnyaa wee ni ke m nan tuk binib mbamom la. Nima le cha bi ma mi. Unii umok ban mbamom na kan, u ga kii maah len pu na.”

<sup>38</sup> Le Pailat baa u, “Mbamom ye kinye?”

### Baah len ke bi ga ku Yesu pu na

(*Matiu 27.15-31; Mak 15.6-20; Luk 23.13-25*)

Pailat aah len kina na, le u ki nyan li-paal Juu yaab chee, ki ti bui bi, “Maa kan waataani ubaa.<sup>39</sup> Nimi aakaal le ye ke m nyan unaagbiija ubaa lii Lakr-jer

<sup>¶</sup>**18:28** : Israel yaab nan ji Lakr-jer aajim ke bi teer buyoonn Uwumbor nan nyan bi tinaagbiir ni, Ijipt aatiij ni na. Lik Nnyam 12.1-27.

aajim yoonn. Ni ban ke m di Yesu, u ye Juu yaab Aabor na lii ii?”

<sup>40</sup> Le bi teen, “Taa di uja ngbaan lii. Di Barabas lii.” Barabas nan ye ufifir la.

**19** Le Pailat di Yesu ja waatob aa-jab aajaal ni ke bi lue u njinaalab. <sup>2</sup> Le bi luu ikokon aayikpupuk ki di chij u, ki di libokumaln peen u, <sup>3</sup> le ki choo ki nan dooni u, ki bui u, “Juu yaab Aabor, aa doon aa?” le ki joo bijaal gbaa u.

<sup>4</sup> Le Pailat ki nyan lipaal, ki ti bui Juu yaab, “M ga di u nyan ni lipaal ni chee, aan ni bee ke maa kan waataani ubaa.” <sup>5</sup> Le Yesu nyan ni lipaal, ki beenin chik ikokon aayikpupuk ki pee libokumaln ngbaan. Le Pailat bui bi, “Lik man, uja ngbaan so.”

<sup>6</sup> Uwumbor aatotoorninkpiib ni baatum aah kan u na, le bi teen ke, “Kpaa u ndɔpuinkoo pu, kpaa u ndɔpuinkoo pu.”

Le Pailat bui bi, “Nimi nibaa kpaa u ndɔpuinkoo pu man. Maa kan waataani ubaa.”

<sup>7</sup> Le bi bui u, “Ti kpa nkaal la. Nkaal ngbaan aah dii pu na, u neer nkun; ba pu? u len ke u ye Uwumbor Aajapcon la.”

<sup>8</sup> Pailat aah ḥun ke Yesu bui ke u ye Uwumbor Aajapcon na, le ijawaan moo chuu u. <sup>9</sup> Le u ki gir koo lidichal ngbaan ni, ki ti baa Yesu, “Aa nyan ni la chee?”

Le Yesu aa len tibaa. <sup>10</sup> Le Pailat baa u, “Saan gar mi tibaa aa? Li nyi. M kpa mpoco, ki ga ḥmaa di si lii, ki kpa mpoco ki ga ḥmaa kpaa si ndɔpuinkoo pu.”

<sup>11</sup> Le Yesu bui u, “Uwumbor yaa kaa tii si mpoco kan, saan ḥmaa li kpa mpoco ki ḥja mi nibaa. Nima pu na, unii u di mi ḥja aajaal ni na, waatunwanbir jer siyaan.”

<sup>12</sup> Waah len kina na, nima le Pailat ban ke u di u lii; le Juu yaab teen ke, “Aa yaa di uja ngbaan lii kan, saa ye Uborkpaan Siisa aajc; unii umok len ke u ye ubor na, u ye Siisa aadin la.”

<sup>13</sup> Pailat aah ḥun kina na, le u ki nyan Yesu lipaal ki ti kal ubojir aajal pu, bi yin nima chee ke “Ntakpateer paab.” Juu

yaab aaliin ponn ni, bi yin nima chee ke “Gabata.” <sup>14</sup> Ni nan ye Lakr-jer aajim yoonn la. Liyaadaal ngbaan nan ye kitaak ki ga ji ki woln Juu yaab aakpaakool daal na la. Ni nan ye kichakpiik ni, ki naahn tikur tiloob yoonn. Le Pailat bui Juu yaab, “Lik man, nimi aabor so.”

<sup>15</sup> Le bi teen, “Nyan u nima, nyan u nima, kpaa u ndɔpuinkoo pu.”

Le Pailat baa bi, “M di nimi aabor kpaa ndɔpuinkoo pu uu?”

Le Uwumbor aatotoorninkpiib bui u, “Taa ki kpa ubor ubaa ki kpee Siisa pu.”

<sup>16</sup> Baah len kina na, le u di Yesu ja bijaal ni, bi ti kpaa u ndɔpuinkoo pu.

### Baah kpaa Yesu ndɔpuinkoo pu pu na

(Matiu 27.32-44; Mak 15.21-32; Luk 23.26-43)

Le bi gaa u, <sup>17</sup>ki cha u voor waadɔpuinkoo, le bi di u nyan kitij ponn ni, ki buen nibaa chee, bi yin nima chee ke “Kiyikpaŋ aapepel.” Juu yaab aaliin ponn ni, bi yin nima chee ke “Golgota.” <sup>18</sup> Le butob aajab ngbaan kpaa u ndɔpuinkoo pu nima chee, le ki kpaa bijab bilee mu idɔpuinkee pu. Bi kpaa ubaa ujangan wɔb, ki kpaa uken ujangii wɔb. Le Yesu nan bi bikaasisik ni. <sup>19</sup> Pailat nan ḥmee ḥmemeen ke, “Yesu u ye Nasaref aatiq aanii, ki ye Juu yaab Aabor na,” le ki di ḥmee ngbaan tam waadɔpuinkoo pu. <sup>20</sup> Ni ḥmee Juu yaab aaliin ponn ni, ni Rom yaab aaliin ponn ni, ni Griik yaab aaliin ponn ni. Baah nan kpaa Yesu ndɔpuinkoo pu nin chee na aa daa kitij ni, nima pu na, Juu yaab pam le nan karn ḥmemeen ngbaan. <sup>21</sup> Le Juu yaab aatotoorninkpiib bui Pailat, “Taa ḥmee ke u ye Juu yaab Aabor. ḥmee ke uma le len ke u ye Juu yaab Aabor.”

<sup>22</sup> Le Pailat bui bi, “Maah ḥmee pu na, ni ḥmee a.”

<sup>23</sup> Le butob aajab bi kpaa u ndɔpuinkoo pu na yakr waawan-

peenkaan nfum munaa, bima binib binaa; le ki yoor waapkalk mu. Kikpalk ngbaan nan ye litamuln, kaa kpa baah jaal nin chee na.<sup>24</sup> Nima pu le bi bui tɔb, “Taa cha ti kar kikpalk ngbaan. Cha ti too inaan, ki lik ke ulau ga ji ki.” Baah ja pu na, ni gbiin Uwumbɔr Aagbaj aah len pu na ke:

“Bi di maawanpeenkaan yakr tii tɔb, ki too inaan maakpalk pu.”<sup>§</sup>

Nima le cha butɔb aajab ngbaan ja kina.

<sup>25</sup> Le Yesu aana, ni unawaa, ni Mari u ye Klopas aapuu na, ni Mari Magdalene, nan si gbɔk Yesu aadɔpuinkoo. <sup>26</sup> Le Yesu kan una ni waadidiir u u gee u na si gbɔk u. Le u bui una, “Nna, lik, aajapɔɔn sɔ,” <sup>27</sup> le ki bui waadidiir ngbaan mu, “Lik, aana sɔ.” Liyaadaal ngbaan, le udidiir ngbaan di Yesu aana koon waachiln ni.

### Yesu aah kpo pu na

(Matiu 27.45-56; Mak 15.33-41; Luk 23.44-49)

<sup>28</sup> Le Yesu bee ke u tun waatuln doo a. Le u bui ke, “Nnyunyuu chuu mi.” Waah len kina na, ni gbiin Uwumbɔr Aagbaj aah len pu na.

<sup>29</sup> Le tiwanyukaan ni mɔɔn na gbii lisambil ki si nima chee. Le bi di nkiisuk bɔɔ ni ni, ki di ja ndɔ pu, ki di ja umɔb ni ke u moor. <sup>30</sup> Waah moor ni na, le u bui ke, “Maatuln doo a,” le ki gaa tiin, ki cha waawiin nyan, le u kpo.

### Baah saa Yesu aasikakl pu na

<sup>31</sup> Ni nan ye kitaak ki ga woln Juu yaab aafuur daal na la. Likpaakool daal ngbaan nan ye nwiin sakpii daal la. Nima le Juu yaab aa ban ke ɔjinikpol li beenin bi idɔpuinkee pu likpaakool daal. Nima le bi bui Pailat ke u cha waajab ti gbaa

kool bitaa, aan bi kpo mala, aan bi chuu nyan bi idɔpuinkee pu.<sup>32</sup> Le waajab dan nan gbaa kool bijab bi lee idɔpuinkee pu Yesu chee na aataa. Bi gbaa kool ubaa aataa, ki ti gbaa koo uken mu aataa. <sup>33</sup> Baah ti fuu Yesu chee na, bi mui u kpo a, nima le baa gbaa kool utaa. <sup>34</sup> Le butɔb aaja ubaa di kigbalk saa Yesu aasikakl. Libuul ngbaan ni, le nsin ni nnyun nyan. <sup>35</sup> Uja u kan kina na tuk binib waah kan pu na, aan ni mu tii naadii. Waah len pu na, ti gbii. U nyi ke u len mbamɔn la. <sup>36</sup> Bi ja Yesu kina ke ni gbiin Uwumbɔr Aagbaj aah len pu na ke, “Waakpab ponn ni libaa aan koo.”\*\* <sup>37</sup> Uwumbɔr Aagbaj ki len ke, “Bi ga lik uja u bi saa u na.”††

### Baah sub Yesu pu na

(Matiu 27.57-61; Mak 15.42-47; Luk 23.50-56)

<sup>38</sup> To, Josef, u nan ye Arimatea aatij aanii na, mu nan bi nima. U nan ye unii u dii Yesu na, ki mu san Juu yaab ijawaan, kaa cha binib nyi. Uja ngbaan nan buen ti mee Pailat ke u cha u nyan Yesu aawon ndɔpuinkoo pu. Le Pailat kii. Le u buen ti nyan u ndɔpuinkoo pu. <sup>39</sup> Nikodemus, u nan dan Yesu chee njan kinyeek na, mu nan fuu ni, ki joo ni tulalee. Ni nan ye tulalee u bi yin u ke mir na, ni tulalee u bi yin u ke alos na, aan bi di ɔjmal tɔb ni la. Tulalee ngbaan aanyunyuun ga pii botɔmɔn. <sup>40</sup> Le bi di likekenyaan ni tulalee ngbaan poo Yesu aawon. Juu yaab yaa ban bi sub linikpol kan, bi ɔjani kina la. <sup>41</sup> Baah kpaa Yesu nin chee na, ɔjisubil aasui aasaak kibaa nan bi nima. Bi nan gbii kitakpaluj kibaa nima chee. Baa nan kee sub unii ubaa ki ponn ni. <sup>42</sup> Kitakpaluj ngbaan aah kaa daa nima chee na, le bi di Yesu aawon ti sub ki

§19:24 : Lik Ilahn 22.18.

\*\*19:36 : Lik Nnyam 12.46; Nkahm 9.12; Ilahn 34.20.

††19:37 : Lik Sekaria 12.10.

ponn ni. Ni nan ye kitaak ki ga woln Juu yaab aakpaakool daal na la.

### Yesu aa ki bi likaakul na ni

(Matiu 28.1-8; Mak 16.1-8; Luk 24.1-12)

**20** Juu yaab aakpaakool daal aah jin ki woln kitaak na, le Mari Magdalene buen likaakul ngbaan chee. Ni nan ye lichakpitaawoln, ki laa boon. Waah ti fuu likaakul chee na, le u kan ke litakpal li bi nan di lej likaakul aamob na, aa ki bi. <sup>2</sup> Le u san buen Simonn Piita ni Yesu aadidiir uken u Yesu gee u na chee, le ki ti bui bi, “Bi nyan Tidindaan aawon likaakul ni a. Taa nyi baah di ti ja nin chee na.”

<sup>3</sup> Le Piita ni Yesu aadidiir uken ngbaan fii san buen likaakul ngbaan chee. <sup>4</sup> Le Yesu aadidiir uken ngbaan san jer Piita ki puen fuu li chee, <sup>5</sup> le ki ti boon ki gbuun lik, ki mui njikeken ngbaan le do. Waa koo likaakul na ni. <sup>6</sup> Le Simonn Piita, u paan ni puwob na mu fuu ni, le ki koo likaakul na ni, ki mui njikeken ngbaan do. <sup>7</sup> U mui likekeln li bi nan di poo uyil na kpab, ki do libaa. <sup>8</sup> Le Yesu aadidiir u puen fuu ni likaakul chee na mu koo, ki kan, le ki tii naadii. <sup>9</sup> Baa nan kee bee Uwumbor Aagban aah len pu na aatataa, ke Yesu ga fikr nkun ni. <sup>10</sup> Le bi gir kun.

### Yesu aah di ubaa mok Mari Magdalene pu na

(Matiu 28.9-10; Mak 16.9-11)

<sup>11</sup> To, Mari nan beenin si likaakul na chee ki wii. Waah si wii na, le u boon ki gbuun lik li ponn ni, <sup>12</sup> le ki kan Uwumbor aatuuntiib bilee bi pee tiwanpiln na ka Yesu aawon aah ba do nin chee na. Ubaa nan ka uyil aah ba bi ni wob na, le uken mu ka utaa aah ba bi ni wob na. <sup>13</sup> Le bi baa u, “Upii, ba ja si aa wii?”

Le u bui bi, “Bi nyan Ndindaan aawon la. Maa nyi baah di ti ja nin chee na.”

<sup>14</sup> Waah len kina na, le u fenn lik upuwob, ki mui Yesu si, kaa nyi ke Yesu ye.

<sup>15</sup> Le Yesu baa u, “Upii, ba ja si aa wii? Aa ban njma?”

Mari nan nyi ke uja u kii kisaak na ye. Le u bui u, “Maaninkpel, aa yaa di waawon ja nin chee na kan, mok mi, m ti yoor.”

<sup>16</sup> Le Yesu bui u ke, “Mari.”

Le u fenn, ki bui u Juu yaab aaliin ni ke, “Raboni.” Naatataa le ye ke “Umomokr.”

<sup>17</sup> Le Yesu bui u, “Taa mee mi. Maa kee buen paacham, Nte Uwumbor chee. Li cha ki ti tuk nnaabitiib ke m cha paacham, Nte u ye Maawumbor na chee la, u ye ni mu Aate, ki ye ni mu Aawumbor na.”

<sup>18</sup> Le Mari Magdalene buen ti tuk bi, “M kan Tidindaan a,” le ki tuk bi Yesu aah tuk u tibor ti na.

### Yesu aah di ubaa mok waadidiliib pu na

(Matiu 28.16-20; Mak 16.14-18; Luk 24.36-49)

<sup>19</sup> To, Juu yaab aakpaakool daal aah jin ki woln kitaak na aajook le Yesu aadidiliib bi kidiik ni, ki lan; ba pu? bi nan san Juu yaab ijawaan. Le Yesu dan nan sil bikaasisik ni, le ki bui bi, “Ni li kpa nsuudoon man.” <sup>20</sup> Waah len kina na, le u taln ujaal ki mok bi baah nan kpaa ujaal ponn ni ipiin pu na, le ki mok bi baah nan saa usikakl kigbalk pu na. Waadidiliib aah kan u na, le bi kpa mpopiin pam. <sup>21</sup> Le u ki bui bi, “Ni li kpa nsuudoon man. Nte Uwumbor aah tun ni mi pu na, kina le m mu tun nimi.”

<sup>22</sup> Waah len kina na, le u fuur lii bi pu, le ki bui bi, “Gaa Uwumbor Aafuur Nyaan man. <sup>23</sup> Ni yaa di cha pinn binib baatunwanbir kan, bi ga kan chapinn. Ni yaa kaa di cha pinn bi kan, baan kan chapinn.”

### Yesu aah tuk Tomas pu na

<sup>24</sup> Tomas, u bi yin u ke Kijaan, aan u ye Yesu aadidiliib kipiik ni bilee ponn ni ubaa na, aa nan bi bikaasisik ni buyoonn Yesu dan na. <sup>25</sup> Le Yesu aadidiliib biken tuk u, “Ti kan Tidindaan a.”

Le u bui bi, “M yaa kaa kan baah nan kpaa unaal ponn ni ipiin pu na aabue, ki di ḥjanbik baan ḥjibue ngbaan ponn ni, ki di ḥjaal baan baah nan saa usikakl kigball pu na aabuer ponn ni kan, maan pak naah len pu na.”

<sup>26</sup> To, le iwiin iniin jer. Le Yesu aadidiliib nan ki bi kidiik ni. Tomas mu nan bi bi chee. Bi nan laj kidiik a. Le Yesu dan nan sil bikaasisik ni, le ki bui ke, “Ni li kpa nsuudoon man,” <sup>27</sup> le ki bui Tomas, “Di aajanbik baan ḥjaal aabue ponn ni, ki di aajanbik baan nsikakl aabuer mu ponn ni, aan ki gaa mi ki kii, aan ki taa ki beeni.”

<sup>28</sup> Tomas nan bui u, “Aa ye Ndindaan ni Maawumbor la.”

<sup>29</sup> Le Yesu bui u, “Saah kan mi na le aa gaa mi ki kii. Uwumbor aanyoor bi binib bi kaa kan mi aan ki gaa mi ki kii na pu.”

### Ḥitaa ḥi pu bi ḥmee kigbañ kee na

<sup>30</sup> To, Yesu nan tun lijinjiir aatun ḥiken pam waadidiliib aanimbil ni. Ni mɔmɔk mu aa bi kigbañ kee ni. <sup>31</sup> Bi ḥmee nimina ke ni pak ke Yesu le ye Kristo u gaa timi lii na, ki ye Uwumbor Aajapɔɔn. Ni yaa gaa u ki kii kan, u pu le ni ga li kpa limɔfal.

### Yesu aah ki di ubaa mɔk waadidiliib pu na

**21** Nee aapuwɔb le Yesu di ubaa mɔk waadidiliib nnyusakpem chee, bi yin mu ke Tiberias (ki ki yin mu ke Galilee). Kina le u nan di ubaa mɔk bi.

<sup>2</sup> Simonn Piita ni Tomas u bi yin u ke Kijaan na, ni Natanael u nyan ni Kana aatin

ki bi Galilee aatin ni na, ni Sebedee aajapɔtiib bilee na, ni Yesu aadidiliib bilee biken nan bi tɔb chee. <sup>3</sup> N-yoonn ngbaan le Simonn Piita bui bi, “M cha m ti chur ijan la.”

Le bi bui u, “Ti mu ga dii si.” Le bi buen ti koo buŋɔb ni, ni di ti woln, baa kan nibaa.

<sup>4</sup> Nwiin aah laa puu ni na, le Yesu sil nnyun aagbaan. Bididiliib ngbaan aa nan nyi ke Yesu ye. <sup>5</sup> Le u baa bi, “Binachipɔm, naa kan ijan aa?”

Le bi bui u, “Taa kan.”

<sup>6</sup> Le u bui bi, “Di kipɔɔk ngbaan di mee buŋɔb aajangii wɔb man, le ni ga kan.” Le bi mee ki chuu ijan pam, le kaa ḥmaa yoor.

<sup>7</sup> Le Yesu aadidiir u Yesu gee u na bui Piita, “Tidindaan ye.” Baah nan bi ban ijan na, bi nan yii ḥikpatambinn baanja la. Simonn Piita aah ḥyun ke Tidindaan ye na, le u voor waabɔkul ki di peen, le ki lir nnyun ni ki cha u chee. <sup>8</sup> Waadidiliib bi gur na nan bi buŋɔb ngbaan ni ki dar kipɔɔk ki gbii ijan na, ki choo nnyun aagbaan. Nnyun aagbaan aa nan daa. Ni naahn ḥisaj ikui ilee la. <sup>9</sup> Baah ti fuu nnyun aagbaan ki nyan buŋɔb ni na, bi mui nkoon aamii bi, ujan pu mu ni, le boroboro mu bi. <sup>10</sup> Le Yesu bui bi, “Li joo ni naah chuu ijan i na ngem.”

<sup>11</sup> Le Simonn Piita ki koo buŋɔb na ni ki ti gbiln kipɔɔk na, ki joo dar cha n-gbaan. Kipɔɔk ngbaan nan gbii ijan sakpiin. Ijan ngbaan nan ye nkub ni piijmu ni itaa. Yaah po wiir kina na, kipɔɔk ngbaan aa nan kar. <sup>12</sup> Le Yesu bui bi, “Dan nan ji man.” Waadidiir ubaa aa nan kaa u baa u, “Si ḥma ye?” ba pu? bi nyi ke Tidindaan ye. <sup>13</sup> Le Yesu dan nan voor boroboro ni ijan ki di tii bi.

<sup>14</sup> Yesu aah nan fikr nkun ni ki joo ubaa mɔk waadidiliib na, nimina le nan ḥja taataa.

### **Yesu aah tuk Piita pu na**

<sup>15</sup>Baah jin tijikaar ngbaan doo na, le Yesu baa Simonn Piita, “Simonn, Jɔnn aajapɔɔn, aa gee mi ki jer tiwan nimina aa?”

Le u bui u, “Ndindaan, een, aa nyi ke m gee si.”

Le Yesu bui u, “Kpiin maapihbi,” <sup>16</sup>le ki ki baa u lelee, “Simonn, Jɔnn aajapɔɔn, aa gee mi ii?”

Le u ki bui u, “Ndindaan, een, aa nyi ke m gee si la.”

Le Yesu bui u, “Li kii maapiih,” <sup>17</sup>le ki ki baa u taataa, “Simonn, Jɔnn aajapɔɔn, aa gee mi ii?”

Le Simonn Piita aasui bii; ba pu? u nan baa u nfum mutaa mɔk, “Aa gee mi ii?” Le u bui u, “Ndindaan, aa nyi tiwan mɔmɔk. Aa nyi ke m gee si.”

Le Yesu bui u, “Kpiin maapiih. <sup>18</sup>M tuk si mbamɔn la, saah nan ye unachipɔɔn na, aa nan peeni saawan-peenkaan, ki chaa saah gee nin chee na. Aa yaa ti por kan, aa ga taln aarpaal, unii ubaa le ga peen si, ki yoor si buen saah kaa gee nin chee na.” <sup>19</sup>U nan bui Piita

kina ke u mɔk u, uma Piita aah ga kpo ki nyuj Uwumbɔr pu na. Waah len kina na, le u bui u, “Li dii mi.”

<sup>20</sup>Le Piita fenn upuwɔb, ki kan Yesu aah gee waadidiir u na paa ni bi pu. Waadidiir ngbaan ye unii u nan foor duun Yesu, baah nan bi ji tijiir buyoonn na, ki nan baa u ke, “Ndindaan, ɔma ga kooh si?” na. <sup>21</sup>Piita aah kan u paani bipuwɔb na, le u baa Yesu, “Ndindaan, ba ga ɔja uja wee?”

<sup>22</sup>Le Yesu bui u, “M yaa gee ke u li bi ki nan saa buyoonn m ga nan gir ni na kan, ti ye saabɔr aa? Li dii mi.”

<sup>23</sup>Nima le Yesu aanib bui ke waadidiir ngbaan aan kpo. Yesu ma aa bui ke waan kpo, u po bui le ke, “M yaa gee ke u li bi ki nan saa buyoonn m ga nan gir ni na kan, ti ye saabɔr aa?”

<sup>24</sup>Waadidiir ngbaan le ye unii u tuk binib tibɔr tee, ki ɔmee ti kigbaŋj kee ni na. Ti bee ke waah len pu na gbii.

<sup>25</sup>Tiwan pam aabɔŋ le Yesu ɔja, bi mu aa ɔmee ni mɔmɔk. Bi yaa ba ɔmee ni mɔmɔk kan, maa dak ke bi ba ga kan mpaan dulnyaa ni ki bil baah ɔmee tigbann ti na.

*Yesu Aakpambalb aah tun*

## LITULN

*pu na*

**1** Njø Teofilus, min Luk nan ñmee njan aagban ke m tuk si Yesu aah nan ña pu na mɔmɔk, ni waah mɔk binib pu na mɔmɔk, n-yoonn mu u nan piin waat-uln<sup>2</sup> ki ti saa n-yoonn mu Uwumbor di u buen paacham na. Waah nan bi dulnyaa wee ni na, le u lee waakpambalb. Uwumbor Aafuur Nyaan aapcoñ pu le u nan tuk waakpambalb ngbaan baah ga ña pu na, le Uwumbor nin di u buen paacham.  
**3** Waah kpo ki fikr nkun ni na, le u di ubaa mɔk bi n-yoonn n-yoonn, le ki ti saa iwiin imonko ilee, ki mɔk bi chain ke u sil kpa limɔfal. Binimbil nan kan u. Le u len bi chee, ki tuk bi Uwumbor aanaan aah bi pu na.  
**4** Waah nan laa bi bi chee na, le u bui bi, “Ni taa nya Jerusalem ni. Ni li bi nima, ki ti saa bundaln Nte Uwumbor ga tii nimi Waafuur Nyaan, waah nan puu tipuur ti na. Ni nan ñun tipuur ngbaan pu m chee la.  
**5** Mbamɔn, Jɔnn nan muin binib nnyun ni. Naan ki yunn, le m ga di Uwumbor Aafuur Nyaan gbiin nimi.”

### Uwumbor aah di Yesu buen paacham pu na

**6** Yesu aakpambalb aah kuun u chee na, le bi baa u, “Tidindaan, dandana wee, aa ga nyan timi Israel yaab timi aadim aajaal ni, ki ki giin timi aanaan tii timi ii?”

**7** Le Yesu tuk bi, “Bundaln Nte Uwumbor ga ña waah ban pu na, aa ye nimi aabɔr. Ti bi u chee la.  
**8** Waafuur Nyaan yaa nan gbiin nimi kan, ni ga li kpa waapcoñ, ki ga li ye maaseer-aadam Jerusalem ponn ni, ni Judea aa-

tim mɔmɔk ni, ni Samaria aatim ni, ni dulnyaa aanaan mɔmɔk ni.”  
**9** Waah len kina na, le Uwumbor di u buen paacham, binimbil ni. Le ntaalangbam biin u pu. Baa ki waa u.

**10** Le bi beenin si lik waah cha paacham pu na. Libuul ngbaan ni, le bijab bilee nan sil bi chee,<sup>\*\*</sup> ki pee ñikekepiipiin,<sup>11</sup> ki baa bi, “Galilee aanib, ba pu ni si lik paacham kina? Yesu, u Uwumbor nyan u ni chee buen paacham na, u ga gir ni. Ni kan waah buen pu na. Kina, le u ga nan ki gir ni.”

### Baah nyan unii ke u lej Judas aalelen pu na

**12** N-yoonn ngbaan, Yesu aakpambalb nan bi lijool libaa paab, bi yin li ke Olif aasui aajool. Naa daa Jerusalem. Ni naahn limalgeln la. Le bi nyan nima, ki gir buen Jerusalem.  
**13** Baah ti fuu Jerusalem na, le bi koo baah koo kidiik ki ponn ni na. Kidiik ngbaan nan ye paacham aadiik la. Le Piita, ni Jɔnn, ni Jems, ni Andru, ni Filip, ni Tomas, ni Bartolomiu, ni Matiu, ni Jems u ye Alfeus aajapcoñ na, ni Simonn u nan ban u kuln waatiij aadim na, ni Judas u ye Jems aajapcoñ na, mɔmɔk nan bi kidiik ngbaan ni.  
**14** Le bi ni Mari u ye Yesu aana na, ni bipiib bibaa, ni Yesu aanaatiib, mɔmɔk kuuni tɔb chee, ki kpaani kimɔbaan, ki mee Uwumbor n-yoonn mɔmɔk.

**15** N-yoonn ngbaan, le binib bi dii Yesu na nan kuun tɔb chee. Bi ga nan li fuu binib nkub ni moninko. Le Piita fii sil bikaasisik ni, ki bui bi,  
**16** “Nnaabitiiib, n-yaayoonn na, Uwumbor Aafuur Nyaan nan cha Ubɔr David len Judas aabɔr. Ni ñmee Uwumbor Aagbañ ponn ni. Naah ñmee pu Uwumbor Aagbañ ponn ni na, see ni ña kina. Judas le nan mɔk binib Yesu aah bi nin chee na, le bi ti chuu u.  
**17** Judas nan ye timi Yesu aakpambalb

<sup>\*\*</sup>1:10 : Bijab bilee ngbaan nan ye Uwumbor aatuuntiib la.

ponn ni ubaa la. Yesu nan nyan u, ke u tun Uwumbor aatuln ti chee.”

<sup>18</sup> U ḥa tiwan ni kaa ḥjan na, le ki kan ḥimombil, ki daa bukpaab. Le u lir kitij bukpaab ngbaan ponn ni, ki kpo. Upuul nan puu, le tineer mɔmɔk nyan.<sup>19</sup> Binib bimɔk bi Jerusalem na nan ḥun waabor. Nima pu na, baaliin ponn ni, bi yin bukpaab ngbaan ke Akeldama aakpaab. Naatataa le ye ke “Nsin aakpaab.”

<sup>20</sup> “N-yaayoonn na, Ubɔr David nan ḥmee Judas aabɔr, Uwumbor aalahn aagban ponn ni ke,

Taa cha tiwan nibaa ki li bi waadichal ni.

Taa cha unii ubaa ki li bi li ponn ni.”<sup>¶¶</sup>

U nan ki ḥmee Judas aabɔr ke,

‘Cha unii uken len waalelej.’”<sup>§§</sup>

<sup>21-22</sup> Piita nan ki len ke, “Nima pu na, ni neer ke unii ubaa ki kpee ti pu, ki li ye seeraadaan, ki tuk binib ke Tidindaan Yesu fikr nkun ni. Ti ban unii u nan chuun nisachun ti ni Tidindaan Yesu chee, n-yoonn mu Jɔnn nan muin Yesu nnyun ni na, ki ti saa bundaln Uwumbor nyan Yesu ti chee ki di u buen paacham na.”

<sup>23</sup> Piita aah len kina na, le bi nyan bijab bilee. Bi yin ubaa ke Josef Basabas Justus ki yin uken ke Matias. <sup>24-25</sup> Le bi mee Uwumbor ke, “Tidindaan, aa nyi binib mɔmɔk aasui ni aah bi pu na. Mɔk timi unii u aa lee u na bijab bilee ngbaan ponn ni aan u li ye saakpambal ki gaa lituln li Judas nan di cha ki buen nin chee neer u na.” <sup>26</sup> Baah mee Uwumbor doo na, le bi di ḥitakpabil tii bi, ke bi lik baah ga lee uja u na. Nimina nan mɔk bi ke bi ga lee Matias la. Le bi di u kpee Yesu aakpambalb kipiik ni ubaa na pu.

## Uwumbor Aafuur Nyaan aah nan fuu ni pu na

**2** Juu yaab aawinyaan mubaa nan saa. Bi yin mu ke Pentekost daal. Le binib bi dii Yesu na mɔmɔk bi kidiik kibaa ni. <sup>2</sup> Libuul ngbaan ni, le bi ḥun kifuuk nyan ni kitaapaak. Ni nan bi ke libuln pɔpɔɔl aah kpa kifuuk pu na, ki nan gbiin lidichal li bi ka li ponn ni na. <sup>3</sup> Le bi kan tiwan nibaa, ni bi ke imiigaal na, ki nan ṭɔŋ bi mɔmɔk aayil paab. <sup>4</sup> Le Uwumbor Aafuur Nyaan gbiin bi mɔmɔk. Le bi len iliin yayan, Uwumbor Aafuur Nyaan aah cha bi len pu na.

<sup>5</sup> N-yoonn ngbaan le Juu yaab nan bi Jerusalem ni. Bi nan ye binib bi pak Uwumbor na, ki nyan ni ḥjinibol mɔmɔk ponn ni dulnyaee wee ponn ni. <sup>6</sup> Le bi ḥun Yesu aanib len iliin yayan. Le bi kuun ni nima, ki wiir. Le bi mɔmɔk ḥun bi len baaliin ibaabaa. Le ni muk bi nima chee, ki gar bi pam. <sup>7</sup> Le bi bui ke, “Bijab bi len kina na mɔmɔk ye Galilee aatiŋ aanib la. <sup>8</sup> Bi ḥa kinye aan ki len timi aaliin aabɔŋ kina? Ti ḥun bi len ti mɔmɔk aaliin ibaabaa la. <sup>9</sup> Timi bibaa nyan ni Patia aatiŋ ni, bibaa mu nyan ni Media aatiŋ ni, bibaa mu nyan ni Elam aatiŋ ni, bibaa mu nyan ni Mesopotamia aatiŋ ni, bibaa mu nyan ni Judea aatiŋ ni, bibaa mu nyan ni Kapadosia aatiŋ ni, bibaa mu nyan ni Pontus aatiŋ ni, bibaa mu nyan ni Asia aatiŋ ni,<sup>10</sup> bibaa mu nyan ni Friaŋia aatiŋ ni, bibaa mu nyan ni Pamfilia aatiŋ ni, bibaa mu nyan ni Ijipt aatiŋ ni, bibaa mu nyan ni Libia aatiŋ mu bi Sairene aatiŋ chee na, bibaa nan ye Juu yaab, ni Biniyayam bi kpeln bibaa ki dii Juu yaab aasan na, ki nyan ni Rom aatiŋ ni na,<sup>11</sup> bibaa mu nyan ni Krete aatiŋ ni, bibaa mu nyan ni Arabia aatiŋ ni. Ti mɔmɔk ḥun bi len timi aaliin ki mooni

<sup>¶¶</sup>1:20 : Lik Ilahn 69.25.

<sup>§§</sup>1:20 : Lik Ilahn 109.8.

Uwumbor aah tun lijinjiir aatun pu na.”  
<sup>12</sup> Le ni gar bi mɔmɔk, ki cha bilan ɔŋmal.  
 Le bi baa tɔb, “Naatataa ye kinye?”

<sup>13</sup> Le bibaa mu ɔŋani bi mbɔnyun ki bui  
 ke bi nyun ndaan le ki gbii.

### Piita aah tuk bi Uwumbor aaliin pu na

<sup>14</sup> Le Piita ni Yesu aakpambalb kipiik  
 ni ubaa na fii sil. Le Piita len mpɔɔn pu,  
 ki tuk kinipaak ngbaan, “Nnaabitiib, Juu  
 yaab, ni nimi bimɔk bi Jerusalem ni na,  
 ni li pel mbamɔm, ki ɔŋun maah ga len  
 pu na.”<sup>15</sup> Ni dak ke binib ngbaan nyun  
 ndaan gbii la. Baa nyun. Dandana, ni ye  
 tikur tiwae kichakpiik ni la. Nima pu na,  
 baa nyun ndaan.<sup>16</sup> Baah len iliin yayan  
 pu na, ni ye Uwumbor aabɔnabr Joel aah  
 nan len pu na la. Joel nan len ke Uwum-  
 bɔr len ke:

<sup>17</sup> ‘N-yoonn mu choo na,  
 m ga di Maafuur Nyaan ɔŋa binib mɔmɔk  
 pu.  
 Nijapɔtiib ni nibisatiib ga nabr min  
 Uwumbor aah len pu na.

Nimi aanachipɔm ga kan lijinjiir aawan.  
 Nimi aaninkpiib ga daj̄ tidaŋ.

<sup>18</sup> N-yoonn ngbaan, m ga nan di Maafuur  
 Nyaan  
 ɔŋa maanaagbiijab ni maanaagbiipiib mu  
 pu,

le bi ga nabr maah len pu na.

<sup>19</sup> M ga ɔŋa lijinjiir aatun kitaapaak ni, ni  
 kitij̄ pu;

nsin, ni mmii, ni ij̄manyuu ga li bi;

<sup>20</sup> nwiin ga bɔln, le uŋmal mann ke nsin  
 ni,  
 waahr aan Uwumbor aawiin daal nin fuu-

Mu ga li ye nwiin sakpiin mu kpa liyim-  
 bil na.

<sup>21</sup> Liyadaal ngbaan, unii umɔk mee  
 Uwumbor na le ga ɔŋmar.”\*

<sup>22</sup> To, Piita ki len ke, “Israel yaab, li  
 pel man. Uwumbor ban ke u mɔk binib  
 ke uma le tun ni Yesu, u ye Nasaref aatiŋ  
 aanii na. Nima pu le u cha u ɔŋani lijinjiir  
 aatun, ni lituln li kpa liyimbil na, nimi  
 ponn ni. Nimi nibaa nyi kina. <sup>23</sup> Uwum-  
 bɔr aageehn pu le bi nan di Yesu ɔŋa  
 ninjaal ni. Uwumbor nan nyi ke bi ga ɔŋa  
 kina. Le ni di u ɔŋa mbiindam aaŋaal ni  
 ke bi ti kpaa u ndɔpuinkoo pu, ki ku u.  
 Nima pu na, nimi le ku u. <sup>24</sup> Uwumbor  
 le fikr u nkun ni ki bii nkun aapoɔn, kaa  
 cha nkun joo u. <sup>25</sup> Ubɔr David nan len  
 Yesu aabɔr ke,

‘M nan kani Tidindaan m chee n-yoonn  
 mɔmɔk.

U bi ɔŋjangii wɔb, ki biin m pu,  
 ke tiwan nibaa taa muk mi.

<sup>26</sup> Nima pu na, m kpa mpopiin, ki len  
 mpopiin aaliin,

<sup>27</sup> le ki kpa limakl ke saan cha maawiin  
 bee kitekpiitiŋ ni.

M ye saabo u ye chain na, le saan cha  
 maawon bur.

Nima le m bi dulnyaa wee ni ki kpa  
 nsuudoon.

<sup>28</sup> Aa nan mɔk mi limɔfal aasan.

Saah bi m chee pu na, le m kpa mpopiin  
 pam.”†

<sup>29</sup> Le Piita ki len ke, “Nnaabitiib, m  
 ban m tuk nimi tiyaaja David aabɔr  
 chain la. U nan kpo, le bi sub u. Din pu  
 na, waakaakul bi do.<sup>30</sup> U nan ye Uwum-  
 bɔr aabɔnabr ubaa la, ki nyi ke Uwumbor  
 puu tipuur ke u ga ɔŋa uma David uyaab-  
 il ubaa ubɔr, ke uma David aah ye ubɔr  
 pu na.<sup>31</sup> David nan nyi Uwumbor aah  
 ga ɔŋa pu na. Nima pu na, u nan len ke  
 Uwumbor ga nan fikr Kristo u gaa timi  
 lii na nkun ni, kaan cha u bee kitekpi-  
 itiŋ ni. Waawon aa bur.<sup>32</sup> Uwumbor fikr  
 Yesu nkun ni. Tinimbil kan u, le ti tuk  
 binib.<sup>33</sup> Uwumbor nyuj Yesu, ki di u

\*2:21 : Lik Joel 2.28-32.

†2:28 : Lik Ilahn 16.8-11.

kaan ujangii wəb. U gaa Nfuur Nyaan Ute Uwumbər chee, uma Uwumbər aah nan puu tipuur ti ke u ga tii u na. Naah kan pu na, ni naah ḷun pu dandana wee na, ye Uwumbər Aafuur Nyaan le u di ḷa ti ni.<sup>34</sup> David aa nan buen paacham. U mu nan len ke,

‘Uwumbər bui Ndindaan ke: Kal ḷjangii wəb,

<sup>35</sup> ki ti saa buyoonn m ga nyan saadim mɔmɔk na.’’‡

<sup>36</sup> Le Piita ki len ke, ‘‘Israel yaab mɔmɔk, m ban ke ni sil bee ke ni ye Yesu aabər le m len. Nimi le kpaau ndɔpuinkoo pu. Uwumbər le mɔk ke uma Yesu le ye Kristo u gaa timi lii na, ki ye Tidindaan.’’

<sup>37</sup> Kinipaak ngbaan aah ḷun Piita aah len pu na, le ni muk bi sakpen. Le bi baa Piita ni Yesu aakpambalb biken na, ‘‘Tinaabitib, ti ga ḷa kinye?’’

<sup>38</sup> Le Piita bui bi, ‘‘Ni mɔmɔk kpeln nimi aabimbin, ki cha ti muin nimi nnyun ni, Yesu Kristo aayimbil pu. Le Uwumbər ga di cha nimi aatunwanbir pinn nimi, ki tii nimi ipiin i ye Waafuur Nyaan na.’’<sup>39</sup> Tidindaan Uwumbər nan puu tipuur ke u ga di Waafuur Nyaan tii nimi, ni nimi aabim, ni binib bi ni daa na: u ga tii binib bi u ga yin bi na mɔmɔk.’’

<sup>40</sup> Le Piita di tibər ti wiir na tuk bi Yesu aabər, le ki sur bi ki bui bi, ‘‘Pɔɔn nibaa man ki ḷmar, ki nya ntafadaan mu ga pii titunwanbirdam ngbaan na ni.’’<sup>41</sup> Le bi muin binib bi gaa Piita aah len pu na nnyun ni. Liyadaal ngbaan le binib ḷichur ḷitaa ḷmar, ki kpee bi pu.<sup>42</sup> Binimbil nan man ke bi bae Yesu aabər, waakpambalb chee. Bi mɔmɔk nan kpaan kimɔbaan, ki ji təb chee tijikaar, ki kpaani təb chee ki mee Uwumbər.

### Yesu aanib aabimbin aah nan bi pu na

<sup>43</sup> Uwumbər nan cha Yesu aakpambalb tun lijinjiir aatun pam. Nima pu na, binib mɔmɔk nan san Uwumbər.<sup>44</sup> Le binib bimɔk gaa Yesu ki kii na kpaan təb chee, ki di baawan yakr təb.<sup>45</sup> Binib nan kooh baah kpa tiwan ni na, ki di ḷimobil ngbaan yakr təb, baah ban pu na.

<sup>46-47</sup> Idaa mɔmɔk bi nan kuuni Uwumbər Aadichal ni, ki kpaani bido ki ji tijikaar, ki pak Uwumbər, ki kpa mpopiin, ni tibulchinn. Le binib mɔmɔk pak bi. Tidindaan nan joo binib bi ḷmar na kpaawaanib pu idaa mɔmɔk la.

### Baah cha uwəb pɔɔk pu na

**3** Daalbaadaal, tikur titaa yoonn, Piita ni Jənn nan buen Uwumbər Aadichal ni. Ni nan ye limeel yoonn la.<sup>2</sup> Uja ubaa nan bi nima ki ye uwəb. Baah nan ma u na, u nan ye uwəb la. Bi nan yoor u kaani Uwumbər Aadichal aabisamɔb chee idaa mɔmɔk. Bi yin mbisamɔb ngbaan ke ‘‘Mbisamɔb Nyaan.’’ Bi nan joo u kaani nima chee ke u li mee binib bi koo ni Uwumbər Aadichal ni na, ke bi tii u ḷimobil.<sup>3</sup> Le u kan Piita ni Jənn bi koo Uwumbər Aadichal ni. Waah kan bi na, le u mee bi ke bi tii u tiwan.<sup>4</sup> Le Piita ni Jənn lik u. Le Piita bui u, ‘‘Lik timi.’’<sup>5</sup> Le u lik bi, ki dak ke bi ga tii u tiwan la.<sup>6</sup> Le Piita bui u, ‘‘Maa kpa ḷimobil. M ga tii si maah kpa ni na la. Yesu Kristo u ye Nasaref aatij aanii na aayimbil pu, m tuk si la, fii chuun.’’<sup>7</sup> Le Piita chuu ujangii, ki fiin u. Le u fii sil. Libuul ngbaan ni, le utaagben pɔɔk.<sup>8</sup> Le u fii yuk, ki sil utaa pu, ki piin ki chuun gonn, le ki dii bi, ki koo Uwumbər Aadichal ni, ki bi chuun, ki yukr, ki pak Uwumbər.<sup>9</sup> Le kinipaak mɔmɔk kan u bi chuun ki pak Uwumbər.<sup>10</sup> Le bi bee ke u ye uwanmeer u nan ka Uwumbər Aadichal aabisamɔb

\*2:35 : Lik Ilahn 110.1.

nyaan chee na. Waah pook na, le ni gar bi pam.

### Piita aah tuk binib Uwumbor Aadichal ni pu na

<sup>11</sup> Uja ngbaan aah laa joo Piita ni Jønn na, le binib ngbaan mɔmɔk san buen bi chee kikaakpaak kibaa ni, bi yin ki ke "Solomonn aakaakpaak." Ni nan gar bi pam. <sup>12</sup> Tɔ, Piita aah kan bi na, le u baa bi, "Israel yaab, ba pu ni gar nimi? Ba pu ni lik timi kina? Ni dak ke ni ye tibaa aapɔɔn le cha uja wee pook aa? Ni dak ke ni ye timi aabimbin mu bi chain na pu uu? Ni mu aa ye kina. <sup>13</sup> Uwumbor le cha u pook. Abraham, ni Aisak, ni Jakob Aawumbor, u ye tiyaajatiib Aawumbor na, nyuŋ Waabo Yesu la. Nimi le nan di Yesu kooh, le ki yii u Pailat chee. Pailat nan ban u di u lii, le naa kii. <sup>14</sup> Yesu le ye unii u Uwumbor nyan u aan u ye uninyaan na. Le ni yii u, ki bui Pailat ke u di unikur lii. <sup>15</sup> Ni ku Yesu u tii timi limofal na. Le Uwumbor fikr u nkun ni. Timi le ye waaseeraadam ke u fikr nkun ni a. <sup>16</sup> Ni kan uja wee, ki bee u. Yesu aayimbil le kpa mpɔɔn, le ki cha u pook. Waah ja Yesu aayimbil naadii pu na, nima le cha u pook. U gaa Yesu ki kii, le uma Yesu tii u laafee ninimbil ni.

<sup>17</sup> "Nnaabitiib, m nyi ke ni ni nimi aaninkpiib aah ku Yesu pu na, naa nyi naah tun lituln li na. <sup>18</sup> N-yaayoonn na, Uwumbor nan cha waabɔnabiib mɔmɔk len ke Waanii Kristo<sup>1</sup> ga nan ji falaa. Baah len pu na, le Uwumbor cha ni ja kina. <sup>19</sup> Nima pu na, kpeln nimi aabimbin man, ki dii Uwumbor aasan. Ni yaa ja kina kan, Uwumbor ga di cha pinn nimi aatunwanbir, ki tii nimi lifuur, <sup>20</sup> ki ki tun ni Yesu ni chee, aan ni ɔmar.

Uma le ye Kristo, u Uwumbor nan puu tipuur ke u ga tii nimi na. <sup>21</sup> Uma Yesu le ga li bi Uwumbor do ki ti saa n-yoonn mu Uwumbor ga toor tiwan mɔmɔk na. N-yaayoonn na, Uwumbor aabɔnabiib bi bi chain na nan len tibɔr timina. <sup>22</sup> Uwumbor aabɔnabr Moses nan len ke, 'Nidindaan Uwumbor ga tun ni ubɔnabr ubaa ni chee, ke waah tun ni mi pu na. U mu ga li ye ninaabitiib ponni ubaa la. Li keei waah ga len tibɔr ti na mɔmɔk man. <sup>23</sup> Unii umɔk kaa kii ubɔnabr ngbaan aah ga len pu na, Uwumbor ga yakru, ki nyan ni u waanib ponni, ki ku u.<sup>8</sup> <sup>24</sup> Uwumbor aabɔnabiib bimɔk nan len tibɔr na, Samuel ni bibɔnabr bi mu nan paan ni u pu na, mu nan len tibɔr timina. <sup>25</sup> Nimi le ye bibɔnabiib ngbaan aayaabitiib. Uwumbor nan puu tipuur tii niyaajatiib. Nimi le yeh tipuur ngbaan. Uwumbor nan tuk Abraham ke u ga ja tinyoor ja ḥinibol ḥimɔk bi dulnyaa wee ni na pu, uma Abraham aayaabil pu. <sup>\*\* 26</sup> Nima pu na, Uwumbor nan nyan Waabo, ki nan tun ni u ni chee njan, ke u nan ja nimi tinyoor; u cha ni di cha nimi aatunwanbir; tinyoor ngbaan le na."

### Juu yaab aaninkpiib aah jin Piita ni Jønn tibɔr pu na

**4** <sup>1-2</sup> Piita ni Jønn nan laa beenin len tibɔr kinipaak ngbaan chee, ki tuk bi ke Yesu fikr nkun ni a, ke waah fikr nkun ni na, binib bi kpo na mu ga nan fikr nkun ni. Le Uwumbor aatotoortiib, ni Uwumbor Aadichal aakikiirb aaninkpel, ni Sajusii yaab mu fuu ni nima, kaa gee Piita ni Jønn aah tuk kinipaak ngbaan pu na, <sup>3</sup> le ki gee lijuul bi pu, ki chuu bi, ki di ja kiyondiik ni. Naah ye kijook na, le

<sup>1</sup>3:18 : Hiibru aaliin ni, bi yin Kristo ke Masiya. Naatataa le ye ke unii u ga gaa binib lii na.

<sup>8</sup>3:23 : Lik Ikaal 18.15, 18, 19.

<sup>\*\*</sup>3:25 : Lik Mpiin 22.18; 26.4.

bi cha bi bi kiyondiik ni, ki ti woln kitaak.<sup>4</sup> Binib bi ḥun Piita ni J̄onn aah len pu na, bi ponn ni pam nan gaa Yesu ki kii. Bijab bi gaa u ki kii na ga nan li fuu njichur ḥijmu.

<sup>5</sup> Naah woln kitaak na, le Juu yaab aayidam, ni bibɔjirb aaninkpiib, ni Uwumb̄or aakaal aamɔmɔkb nan kuun Jerusalem ponn ni.<sup>6</sup> Bi ni Uwumb̄or aatotoorninkpel u bi yin u ke Anas na, ni Kayafas, ni J̄onn, ni Aleksanda, ni uto-toorninkpel do yaab biken, nan kuun t̄b chee.<sup>7</sup> Le bi cha Piita ni J̄onn sil bin-imbiin ni, le ki baa bi, “Ni ḥa kinye aan ki cha uwɔb ngbaan pɔɔk? Ni kpa ba aapɔɔn? Ni di ḥma aayimbil ki tii u laafee?”

<sup>8</sup> Le Uwumb̄or Aafuur Nyaan fir Piita pu. Le u bui bi, “Juu yaab aayidam, ni bibɔjirb aaninkpiib,<sup>9</sup> taah ter uwɔb ngbaan na, le ni ji timi tib̄or din, ki baa timi ke ti ḥa kinye ki cha u pɔɔk.<sup>10</sup> M ban ke nimi ni Juu yaab biken mɔmɔk bee ke Yesu Kristo, u ye Nasaref aatiŋ aanii na, waayimbil aapɔɔn le cha uja wee pɔɔk. Uma Yesu pu, le u kpa laafee mbamɔm, ki si ninimbiin ni. Nimi le kpaa Yesu ndɔpuinkoo pu, le Uwumb̄or filr u nkun ni.<sup>11</sup> Yesu aabɔr ḥmee Uwumb̄or Aagbanj ni ke,

‘Litakpal li bidimaab yii li na,  
lima le ye litakpajal.’††

<sup>12</sup> Uma Yesu pu, le ti ga ḥmar. Uwumb̄or di Yesu aayimbil tii timi, ke ti ḥmar. Ubaa aa bi dulnyaa wee ni ki ga ḥmaa gaa timi lii, see Yesu baanja. Uma baanja pu, le ti ga ḥmar.’

<sup>13</sup> Bininkpiib ngbaan nan bee ke Piita ni J̄onn aa ye binib bi nyuun na, kaa bae mbaem, le ki kpa lipobil ki len. Baah kpa lipobil pu na, le ni gar bininkpiib ngbaan. Bi bee ke bi nan ye Yesu aajɔtiib la.

<sup>14</sup> Bi kan uja u Piita ni J̄onn cha u pɔɔk na si bi chee. Nima pu na, baa nan ki

ḥjmaa kpak bi.<sup>15</sup> Le bi tuk bi ke bi nya kidiik ngbaan ni. Baah nyan kidiik ngbaan ni na, le bininkpiib ngbaan kpokl t̄b baah ga ḥa pu na,<sup>16</sup> ki baa t̄b, “Ti ga ḥa bijab ngbaan kinye? Binib bimɔk bi Jerusalem ni na nyi ke bi tun lijinjiir aatuln li kpa liyimbil na. Taan ḥmaa nee.<sup>17</sup> Ti mu aa ban ke tib̄or ngbaan ki moon. Nima pu na, cha ti faan bijab ngbaan aan bi taa ki tuk binib Yesu aabɔr, ki taa ki pur waayimbil.”

<sup>18</sup> Le bi yin bi ke bi gir koo ni, le ki nan kpaa bi pu ke bi taa ki tuk binib Yesu aabɔr, ki taa ki pur waayimbil.<sup>19</sup> Le Piita ni J̄onn bui bi, “Ti yaa kii nimi aamɔb, bee ti yaa kii Uwumb̄or aamɔb le kan, nilani ḥjan Uwumb̄or chee? Ni dakl ki lik.

<sup>20</sup> Ti ga li beenin tuk binib taah kan pu na, ni taah ḥun pu na. Taan ḥmaa yii.”<sup>21</sup>

Baah len kina na, le bininkpiib ngbaan ki faan bi, le ki di bi lii. Kinipaak ngbaan pu le baa ḥmaa daa bitafal. Kinipaak ngbaan mɔmɔk nan bi nyuŋni Uwumb̄or, lijinjiir aatuln ngbaan pu.<sup>22</sup> Uja u bi cha u pɔɔk na nan jer ḥbin imonko ilee aanii. Nima pu le ni gar kinipaak ngbaan mɔmɔk.

### Yesu aanib aah mee Uwumb̄or ke u tii bi lipobil pu na

<sup>23</sup> Baah di Piita ni J̄onn lii na, le bi gir buen bijɔtiib chee, ki ti tuk bi Uwumb̄or aatotoorninkpiib ni Juu yaab aaninkpiib aah tuk bi pu na mɔmɔk.<sup>24</sup> Baah ḥun kina na, le bi mɔmɔk kpaan kimɔbaan, ki mee Uwumb̄or, ki len ke, “Mpɔɔnsakpi-indaan, sin le nan naan paacham, ni kitin, ni nnyusakpem, ni tiwan nimɔk bi ni mɔmɔk ponn ni na.<sup>25</sup> N-yaayoonn na, aa nan cha tiyaaja Ubɔr David len saabɔr. U nan ye saatutunn la. Saafuur Nyaan aapɔɔn pu le u nan len ke, ‘Binib bi kaa ye Juu yaab na gee lijuul fam la.

††4:11 : Lik Ilahn 118.22.

ŋjinibol mu dakl ilandak i kaa kpa tinyoor na.

<sup>26</sup> Dulnyaa wee ni aabɔrb gor bibaa, binib aayidam kuun tɔb chee, bi ti jan Uwumbɔr ni Waanii Kristo ki jaak.\*<sup>\*\*</sup>

<sup>27</sup> Tɔ, David aah nan len pu na, ni ye mbamɔn la. Ubɔr Herod, ni Pontius Pailat, ni Juu yaab, ni binib bi kaa ye Juu yaab na nan kuun kitij kee ponn ni, ke bi nan ku Saatutunn Yesu u ye chain na. Uma le aa nyan ke u gaa timi lii. <sup>28</sup> Bi nan kuun bi ti ŋa saah nan len ke bi ga ŋa pu na. Saapɔɔn, ni saageehn pu, le aa nan siin ke bi ga ŋa kina. <sup>29</sup> Uwumbɔr, lik baah faani timi nfaan pu na. Ter timi saatutum, ki tii timi lipobil, aan ti di tuk binib saabɔr. <sup>30</sup> Di saapɔɔn tii bibum laafee. Cha ti tun lijinjiir aatun, ki mɔk binib ke Saabo Yesu u ye chain na aayimbil kpa mpɔɔn.”

<sup>31</sup> Baah mee Uwumbɔr doo na, le baah bi kidiik ki ponn ni na deŋ. Le Uwumbɔr Aafuur Nyaan gbiin bi mɔmɔk. Le bi kan lipobil, le ki tuk binib Uwumbɔr aabɔr.

### Yesu aanib aah di baawan yakr tɔb pu na

<sup>32</sup> Binib bimɔk nan gaa Yesu ki kii na nan kpaan kimɔbaan, ni nländakbaan. Ubaa aa len ke waawan nibaa le ye uyaan. Le bi mɔmɔk yakr baawan mɔmɔk, ki di tii tɔb. <sup>33</sup> Le Yesu aakpambalb kpa mpɔɔn ki jin seeraa ke Tidindaan Yesu sil fikr nkun ni. Le Uwumbɔr ter bi mɔmɔk sakpen. <sup>34-35</sup> Binib nan kooh baah kpa tisar ni ŋidichal ŋi na, ki joo ni ŋimombil ŋi bi kan na, ki nan di tii Yesu aakpambalb. Le bi yakr tii bimɔk aah ban pu na. Ubaa aa ki bi bi ponn ni ki lann nibaa.

<sup>36</sup> Uja ubaa nan bi bi ponn ni, bi yin u ke Josef, le Yesu aakpambalb duln u ke Banabas. Naatataa le ye ke, “U sɔŋni

binib aasui na”. U nan ye Liifai yaab aanii ubaa la. Bi nan ma u Saiprus aatiŋ ni la. <sup>37</sup> U nan kpa kisaak, ki kooh, ki di ŋimombil ŋi u kan na, ki nan tii Yesu aakpambalb.

### Ananias ni upuu Safaira aah ŋa pu na

**5** Uja uken nan bi nima, bi nan yin u ke Ananias, ki yin upuu ke Safaira. U nan kpa kisaak, ki kooh ki, ki kan ŋimombil, <sup>2</sup>ki di ngem nan tii Yesu aakpambalb, ki gur ubaa mu ngem. Upuu mu nan nyi waah ŋa pu na. <sup>3</sup>Le Piita baa u, “Ananias, ba ŋa aa cha kinimbɔŋ koo aasui ni, ki cha aa ban ke aa ŋmann Uwumbɔr Aafuur Nyaan, ki gur aabaa ŋimombil ngem? <sup>4</sup>Kisaak ngbaan aah nan bi aa chee na, ki nan ye siyaan la. Saah kooh ki na, ŋimombil ngbaan mu ye siyee la. Ba ŋa aa dak aasui ni ke aa ga ŋa kina? Saa mɔn nnyamɔn ki tuk binib baanja. Uwumbɔr le aa mɔn nnyamɔn tuk u.” <sup>5</sup>Ananias aah ŋun waah len pu na, le u kpo ki lir kitij. Le ijawaan chuu binib bimɔk ŋun tibɔr ngbaan na. <sup>6</sup>Le binachipɔm nan di likekeln poo u, ki yoor u nyan lipaal, ki ti di sub.

<sup>7</sup> Ni nan kpee siib, le upuu mu koo ni, kaa nyi tibɔr ngbaan. <sup>8</sup>Le Piita baa u, “Naah kooh kisaak ngbaan na, ŋimombil ngbaan mɔmɔk le na aa?”

Le u kii ke, “Een, ŋima le na.”

<sup>9</sup> Le Piita baa u, “Ba ŋa aa ni aachal mɔmɔk kpaan kimɔbaan ke ni ga tɔŋ Uwumbɔr Aafuur Nyaan? Lik, binachipɔm bi sub aachal na fuu ni mbisamɔb. Le bi ga yoor aa mu ki nya lipaal.” <sup>10</sup>Libuul ngbaan ni, le u mu kpo, ki lir kitij, unimbiin ni. Le binachipɔm ngbaan koo ni ki kan u kpo a. Le bi yoor u mu, ki ti di sub uchal chee. <sup>11</sup> Le Yesu aanib mɔmɔk, ni binib bimɔk ŋun tibɔr ngbaan na san ijawaan sakpen.

### **Yesu aakpambalb aah tun lijinjiir aatun pu na**

<sup>12</sup> Yesu aakpambalb nan tun lijinjiir aatun pam. Lijinjiir aatun ngbaan le mɔk binib ke Uwumbor bi bi chee. Le binib bimɔk gaa Yesu ki kii na kuun tɔb chee, Solomonn aakaakpaak ni, Uwumbor Aadichal ni. <sup>13</sup> Binib bi kaa gaa Yesu ki kii na aa nan kaar ke bi li kpaani bi chee. Binib mɔmɔk mu nan pak bi. <sup>14</sup> Binib pam nan gaa Tidindaan ki kii, ki kpaе n-yoonn mɔmɔk, ki kpaani bi chee. Bi nan ye bijab ni bipiib mu, ki wiir. <sup>15</sup> Yesu aakpambalb aah tun lijinjiir aatun pu na, le binib yoор bibum paan ikan pu, ni tiwandookaan pu, ki di kaan nsan ni, ki ban ke Piita yaa chuun jer kan, waajunjup pinn jer bi pu, ki cha bi pɔok. <sup>16</sup> Le kinipaak mu nyan ni Jerusalem aatingbaan ni, ki joo ni bibum, ni binib bi tiyayaar joo bi na. Le Yesu aakpambalb cha bi mɔmɔk pɔok.

### **Baah ja Yesu aakpambalb falaa pu na**

<sup>17</sup> Le Uwumbor aatotoorninkpel, ni binib bimɔk dii u ki nan ye Sajusii yaab na, nan kpa lipiipoln Yesu aakpambalb pu, <sup>18</sup> le ki dan nan chuu bi, ki di laj kiyondiik ni. <sup>19</sup> Kinyeek ngbaan le Uwumbor aatuun dan nan chuu piir kiyondiik aajaalej, le ki nyan bi, ki bui bi, <sup>20</sup> “Li cha ti sil Uwumbor Aadichal ni, ki tuk binib limɔfal ngbaan aabor mɔmɔk.” <sup>21</sup> Le bi kii Uwumbor aatuun ngbaan aamɔb. Kichakpinaanyeek ni, le bi koo ni Uwumbor Aadichal ni, ki nan tuk binib limɔfal aabor na.

Le Uwumbor aatotoorninkpel, ni binib bi dii u na dan nan yin bibɔjirb aaninkpiib, ni Juu yaab aaninkpiib mɔmɔk, le ki tun bikikiirb, ke bi buen kiyondiik ni ki ti li joo ni Yesu aakpambalb. <sup>22</sup> Baah ti fuu nima kaa kan bi na, le bi labr ki nan tuk bibɔjirb aaninkpiib, <sup>23</sup> “Ti fuu kiyondiik ni, ki

kan ni lak mbamɔm. Bikikiirb mu si kii jaalej mam chee. Le ti chuu piir kidiik, kaa kan unii ubaa ni ni.” <sup>24</sup> Uwumbor Aadichal aakikiirb aaninkpel, ni Uwumbor aatotoorninkpiib aah njan kina na, le ni muk bi pam. Baa ki nyi baah ga nja pu na. <sup>25</sup> N-yoonn ngbaan le unii ubaa koo ni, ki nan bui bi, “Lik, bijab bi ni di nja kiyondiik ni na bi Uwumbor Aadichal ni, ki bi tuk binib Yesu aabor.” <sup>26</sup> Le Uwumbor Aadichal aakikiirb ni baaninkpel buen ti joo ni Yesu aakpambalb ngbaan. Bi nan joo ni bi suuna, kaa chuu bi mpɔɔn; ba pu? bi san ijawaan ke kinipaak na ga mae bi nɔitakpal.

<sup>27</sup> Baah joo ni Yesu aakpambalb kidiik ponn ni na, le bi di bi siin bibɔjirb aaninkpiib aanimbiin ni. Le Uwumbor aatotoorninkpel bui bi, <sup>28</sup> “Ti tuk nimi ke ni taa ki tuk binib Yesu aabor, ki taa ki pur waayimbil. Le ni beenin mooni waabor Jerusalem mɔmɔk ni, ki len ke waasin bi tijaal ni la.”

<sup>29</sup> Le Piita ni Yesu aakpambalb biken na bui bi, “Ni ye ke ti kii Uwumbor aamɔb la, naa ye binib aamɔb. <sup>30</sup> Nimi le kpaa Yesu ndɔpuinkoo pu, ki ku u. Le tiyaajatiib Aawumbor fikr u nkun ni, <sup>31</sup> ki nyuj u, ki di u kaan ujangii wɔb, u li ye timi Aayidaan u gaal timi lir, ki tii timi Israel yaab nsan ke ti kpeln timi aabimbin na, aan Uwumbor di cha timi aatuunwanbir pinn timi. <sup>32</sup> Timi ni Uwumbor Aafuur Nyaan le ye Yesu aaseeraadam ki tuk binib tibɔr ngbaan. U di Waafuur Nyaan tii binib bi kii waamɔb na.”

<sup>33</sup> Bibɔjirb aaninkpiib aah njan baah len pu na, le bi gee lijuul sakpen, ki ban bi ku bi. <sup>34</sup> Le bibɔjirb aaninkpiib ponn ni ubaa fii sil binimbiin ni. Bi nan yin u ke Gamaliel. U nan ye Farisii yaab aanii ubaa la, ki mu ye Uwumbor aakaal aamɔmɔkb aaninkpel, ki kpa liyimbil Juu yaab mɔmɔk chee. Le u tuk bi

ke bi di Yesu aakpambalb ngbaan nyan lipaal siib.<sup>35</sup> Baah nyan lipaal na, le u bui bi, "Israel yaab, ni li nyi naah ga ja bijab ngbaan pu na.<sup>36</sup> N-yaayoonn na, uja ubaa nan bi, bi yin u ke Tudas. U nan yoor ubaa ke uma le ye uninyuu, le bijab ikui inaa nan dii u. Binib nan ku u, le bijab bimok dii u na nan yaa, ki bee fam.<sup>37</sup> Uja umina aayoonn aah jer na, le Galilee aatiq aanii ubaa nan yoor ubaa paacham, bi yin u ke Judas. U nan bi buyoonn bi nan chuun kahn binib na. Kinipaak nan dii u. Le bijab ku u mu. Waadidiliib bimok dii u na mu yaa.<sup>38</sup> Nima le m tuk nimi, nyan njajaal bijab ngbaan aabor ni, ki taa ja bi nibaa. Baah kpokl pu na, ni baah tun lituln pu na, yaa ye binibom aatuln kan, li ga bee yøli.<sup>39</sup> Ni yaa ye Uwumbor aatuln kan, naan njmaa nyaj bi. Ni yaa jan bi kijaak kan, ni li nyi man, nibaakan, ni ga kan ke ni jan Uwumbor le kijaak."

Bi nan kii Gamaliel aah len pu na.<sup>40</sup> Le bi yin Yesu aakpambalb ngbaan, ke bi gir koo ni, le ki gbaa bi, ki tuk bi ke bi taa ki tuk binib Yesu aabor daalbaadaal, ki taa ki pur waayimbil, le ki di bi lii.<sup>41</sup> Le Yesu aakpambalb ngbaan siir bi chee, ki nan kpa mpopiin; ba pu? Uwumbor pak bi ke bi ye binib bi ga njmaa ji inimcoon Yesu aayimbil pu na.<sup>42</sup> Idaa momok le bi chaa Uwumbor Aadichal ni, ni binib do, ki ti tuk binib Uwumbor aabor ki mooni tibonyaan tee, ke Yesu le ye Kristo u gaa binib lir na.

### Baah nyan biteterb bilole pu na

**6** Binib nan gaal Yesu ki keei idaa momok ki kpaе waadidiliib pu. N-yoonn ngbaan le Juu yaab bi len Griik aaliin na qulni Juu yaab bi len Juu aaliin na pu, le ki bui ke baah yakr tijikaar idaa momok na, bi sulni baakpopiib bør.<sup>2</sup> Le Yesu aakpambalb kipiik ni bilee na yin Yesu aadidiliib momok, ki nan bui bi, "Naa jan ti li yakr tijikaar ki di cha

Uwumbor aaliin.<sup>3</sup> Nnaabitiiib, nima pu na, ni nyan ni ponn ni bijab bilole bi gbiin Uwumbor Aafuur Nyaan, ki kpa nlan mbamom, ki kpa liyimbil na, ki cha bi li ye lituln ngbaan aaninkpiib.<sup>4</sup> Tima aanimbil ga li man limeel, ni Uwumbor aabor aamoon pu la."

<sup>5</sup> Yesu aakpambalb aah len pu na, le ni piir bi momok aasui. Le bi nyan uja ubaa, bi yin u ke Stiifen, u gaa Yesu ki kii mbamom ki gbii Uwumbor Aafuur Nyaan na. Bi nan nyan Filip, ni Prokorus, ni Nikanor, ni Timonn, ni Pamenas, ni Nikolas, u nan ye Antiok aatiq aanii na mu. Nikolas aa nan ye Juu aanii. U nan kpeln le ki dii Juu yaab aasan.<sup>6</sup> Le bi nyan bijab bilole bimina, ki cha bi sil Yesu aakpambalb aanimbiin ni. Le bi mee Uwumbor tii bi, ki di binaal paan bi pu.

<sup>7</sup> Le Uwumbor aabor nan mooni njipepel momok. Le binib moo gaal Yesu ki keei, ki kpaе waadidiliib pu ki wiir, Jerusalem ponn ni. Uwumbor aatotoorb pam mu nan gaa Yesu aabonyaan tee ki kii.

### Baah chuu Stiifen mpcoon pu na

<sup>8</sup> Uwumbor nan ter Stiifen mbamom, ki tii u mpcoon sakpen, ki cha u tun li-jinjiir aatun Juu yaab aakaasisik ni.<sup>9</sup> Le Juu yaab bibaa fii ki kpak u. N-yoonn mubaa, Juu yaab ngbaan nan ye binaagbiib, ki nan gaa bibaa. Bi nyan ni Sairene aatiq ni, ni Aleksandria aatiq ni, ni Silisia aatiq ni, ni Asia aatiq ni. Bijab ngbaan le kpak Stiifen kinikpakkap.<sup>10</sup> Uwumbor Aafuur Nyaan aah tii Stiifen nlan sakpen pu na, baa njmaa len ki nyaq u.<sup>11</sup> Nima pu le bi tii bijab bibaa njimombil ke bi moln inyamom paan u. Le bijab ngbaan len ke bi qun u sii Moses ni Uwumbor.<sup>12</sup> Baah len pu na, le Juu yaab, ni baaninkpiib, ni Uwumbor aakaal aamomokb gee lijuul Stiifen pu. Bi dan nan chuu u mpcoon, ki di u siin

bibojirb aaninkpiib aanimbiin ni,<sup>13</sup> le ki joo ni binib bi ga moln inyamōn paan u na. Le bi len ke, “N-yoonn mōmōk uja wee bii Moses aakaal, ki seei Uwumbōr Aadichal.<sup>14</sup> Ti ḥun u len ke Yesu, u ye Nasaref aatiq aanii na, ga gbaa wii Uwumbōr Aadichal ngbaan, ki kpeln Moses aah nan tii timi ikaal i mōmōk na.”<sup>15</sup> Le bibojirb aaninkpiib mōmōk lik Stiifen ki kan ke unimbil wōb wiin chain ke Uwumbōr aatuun aanimbil wōb na.

### Stiifen aah len pu na

**7** Uwumbōr aatotoorninkpel nan baa Stiifen, “Baah len pu na, ti gbii ii?”

<sup>2</sup> Le Stiifen bui ke, “Ntetiib ni nnaabitiiib, ni li pel man. Uwumbōr u nyuun na nan dan tiyaaja Abraham chee. Waah nan dan u chee na, u nan laa bi Mesopotamia aatiq ni, kaa kee buen Harann aatiq ni, ke u ti kal nima.<sup>3</sup> Le Uwumbōr bui u, ‘Nya aado yaab aatiq ni, ni saanib chee, ki li cha maah ga mōk si kitij ki na ponn ni.’<sup>4</sup> <sup>4</sup>Nima pu le u fii Kaldii yaab aatiq ni, ki buen Harann aatiq ni, ki nan ti bi nima. Waah bi nima na, le ute kpo. Ute aah kpo na, le Uwumbōr nyan u nima chee, ki di u dan taah bi kitij ki ponn ni dandana wee na.<sup>5</sup> N-yoonn ngbaan, Uwumbōr aa nan tii u kitij kibaa do chee na. Waa nan po tii u lisaj libaa. U nan puu tipuur tii u ke u ga di kitij kee tii u ni uyaabitiiib. N-yoonn mu Uwumbōr nan puu tipuur tee tii u na, Abraham aa nan kee kpa ubo.<sup>6</sup> Le Uwumbōr bui u, ‘Aayaabitiiib ga li ye bicham kitiyayañ ponn ni. Kitij ngbaan aanib ga di bi ḥa binaagbiib, ki ḥa bi bakaa ḥibin ikui inaa.<sup>7</sup> Kitij ngbaan aanib aah ga di bi ḥa binaagbiib na, le m ga daa bitafal. N-yoonn ngbaan le aayaabitiiib ga nya kitij ngbaan ni, ki

dan kitij kee ponn ni, ki nan li dooni mi do chee na.”<sup>8</sup> Le Uwumbōr puu tipuur tii Abraham, ki tii u nkaal, ke u ni uyaabitiiib mōmōk gii ḥichakpan, aan ni mōk ke bi kii uma Uwumbōr aah puu tipuur ti na. Le Abraham ma ubijabo, ki yin u ke Aisak, le ki gii uchakpaln, u nan laa ye iwiin iniin aabo la. Le Aisak ma waabo Jakob. Jakob mu ma japotiiib kipiik ni bilee bi ye tiyaajaninkpiib na. Le bi mōmōk gii ḥichakpan.

<sup>9</sup> “Le Jakob aajapotiib nan kpa lipipoln binaal Josef pu, ki di u kooh binib pu, u li ye unaagbiija kitij kibaa ponn ni, bi yin ki ke Ijipt. Le Uwumbōr mu nan bi u chee,<sup>10</sup> ki ter u, ki nyan u waafalaan mōmōk ponn ni. N-yoonn ngbaan Faro nan ye Ijipt aatiq aabōr. Le Uwumbōr tii Josef nlan, ki cha Faro gee waabōr. Le Faro di u ḥa kitij ngbaan aayidaan, ni waachiln aayidaan.<sup>11</sup> N-yoonn ngbaan le nkon lir Ijipt aatiq ni, ni Kanaann aatiq ni. Binib nan kan falaa sakpen. Tiyaajatiib nan bi Kanaann aatiq ni. Baa nan kan tijikaar.<sup>12</sup> Le bite Jakob ḥun ke tijikaar bi Ijipt aatiq ni. Nima pu na, u nan cha ujapotiib buen nima chee bi ti daa tijikaar. Le bi buen ti daa, ki gir ni, ki ki buen lelee.<sup>13</sup> Baah buen lelee na, le Josef ti di ubaa mōk bi, le ki di waamaal mu mōk Ubōr Faro,<sup>14</sup> le ki tun bi ute Jakob chee, ke bi ti yin ni u ni waamaal mōmōk, bi dan u chee Ijipt aatiq ni. Bi nan ye binib imonko itaa ni kipiik ni bijmu la.<sup>15</sup> Le bi mōmōk buen u chee Ijipt aatiq ni, ki nan bi nima kina ki ti kpo.<sup>16</sup> Baah kpo na, le bi yoor bi ki di dan Sekem aatiq ki bi do chee na ni, ki ti di bi sub. Bi nan sub bi nfal mu Abraham nan di ḥimombil daa Hamor yaab chee na ponn ni la.

<sup>17</sup> “To, Uwumbōr nan puu tipuur tii Abraham. Le n-yoonn mu u ga ḥa waah

<sup>13</sup> 7:3 : Lik Mpiin 12.1.

<sup>8</sup> 7:7 : Lik Mpiin 12.7; 15.13-14; 17.8; Nnyam 3.12.

puu tipuur ti na peen ni. N-yoonn ngbaan le Israel yaab too por kpee Ijipt aatiq ni.<sup>18</sup> Ni nan yunn pam, le uborkpaan u kaa nan nyi Josef aabor na jin nnaan Ijipt aatiq ni.<sup>19</sup> Le u nan qmanni tiyaajatiib ki qjani bi bakaa, le ki tuk waanib ke bi di tiyaajatiib aabim mee timoor ni aan bi kpo.<sup>20</sup> N-yoonn ngbaan le bi ma Moses, u nan ye ubo u qjan sakpen na la. Le bi kpiin u ute do ijmal itaa.<sup>21</sup> Waah ja ijmal itaa aabo na, le bi di u bil timoor ni. Le Faro aabisal ti kan u, ki yoor u, ki kpiin u, ki di u ja waabo.<sup>22</sup> Le bi mok u Ijipt yaab aalan aabonj aabonj. Le u kpalm unii u nyi tibor na, ki tun lituln li kpa liyimbil na.

<sup>23</sup> “Waah ja qjibin imonko ilee aaja na, u nan ban ke u mann unaabitib Israel yaab.<sup>24</sup> Le u mann bi, ki kan Ijipt aanii ubaa ja Israel aanii ubaa bakaa. Le u buen ti ter Israel yaab aanii ngbaan, ki gbaa Ijipt aanii ngbaan teen ki ku u.<sup>25</sup> U nan dakl ke unaabitib ga bee ke Uwumbor ga cha u nyan bi baadim aanjaal ni. Le baa bee.<sup>26</sup> Le ni woln le u ti kan Israel yaab bilee bi jaa. U nan ban ke u par bi, le ki bui bi, ‘Njottiib, ni ye naabitib la. Ba ja ni qjani tob bakaa?’<sup>27</sup> Le unii u ja ujeen aataj bakaa na nan tur Moses foor bibaa chee, ki bui u, ‘Qjma ja si timi aayidaan ni ubojir?’<sup>28</sup> Aa ban ke aa ku mi ke saah fe ku Ijipt aaja na pu na la aa?\*<sup>29</sup> Waah len kina na, le Moses san nyan Ijipt aatiq ni, ki buen Midian aatiq ni, ki nan ti ye uchaan nima. Le upuu ma mbijabim bilee nima.

<sup>30</sup> “Qjibin imonko ilee aah jer na, le Uwumbor aatuun di ubaa mok Moses. N-yoonn ngbaan le Moses nan bi nteersakpiin ni, lijool li bi yin li ke Sainai na

chee. Uwumbor aatuun ngbaan nan bi mmii ponn ni, busub bu bi ke bu aah gaal mmii le na pu.<sup>31</sup> Moses aah kan ni na, le ni gar u pam. Le u foor mal mmii ngbaan u ti lik. Waah foor mal mu na, le u qjun Uwumbor aaneel len ke,<sup>32</sup> ‘Min le ye aayaajatiib Abraham, ni Aisak, ni Jakob Aawumbor.’ Ijawaan chuu Moses, le uwon gbaa. Waa ki kaa u ki lik.<sup>†</sup><sup>33</sup> Le Uwumbor bui u, ‘Saah si nin chee na ye kitiq ki bi chain na la. Chuu takl saanaatak ngbaan.<sup>34</sup> M kan maanib Israel yaab aah bi ji falaa sakpen Ijipt aatiq yaab aanjaal ponni pu na, ki qjun baah wii pu na, le m sunn ni ke m nan gaa bi lii. Li pel, m ga tun si Ijipt aatiq ni, aa ti nyan bi nima chee.\*‡

<sup>35</sup> “To, Moses le ye unii u Israel yaab nan yii u, ki bui u ke, ‘Qjma ja si timi aayidaan ni ubojir?’ Uma le Uwumbor nan tun waatuun u chee, busub bu bi ke bu aah gaal mmii le na pu, u ti tuk u ke u buen ti nyan ni waanib tinaagbiir ni, ki li joo ni bi.<sup>36</sup> Uma Moses le nyan bi Ijipt aatiq ni, ki tun lijinjiir aatuun nima chee, ni Limokal Aanyusakpem\* ni, le ki ti nin tun lijinjiir aatuun timoor ni, qjibin imonko ilee.<sup>37</sup> Uma Moses le tuk Israel yaab,<sup>§</sup> ‘Uwumbor ga tun ni ubonabr ubaa ni chee, ke waah tun ni mi pu na. U mu ga li ye ninaabitib ponni ubaa la.’<sup>38</sup> Uma Moses, ni tiyaajatiib, ni Uwumbor aatuun nan bi nteersakpiin ni, Sainai aajool chee, le Uwumbor aatuun len u chee tibor lijool ngbaan paab, ki tuk u limofal aabor ke u nan tuk timi.

<sup>39</sup> “Le tiyaajatiib aa gee ke bi kii waamob. Bi yii u, ki ban ke bi ki labr buen Ijipt aatiq ni,<sup>40</sup> le ki bui Moses aanaal Aaron, ‘Maa qjwaa tii timi, ti li

\*7:28 : Lik Nnyam 2.14.

†7:32 : Lik Nnyam 3.6.

\*7:34 : Lik Nnyam 3.1-10.

\*7:36 : Limokal Aanyusakpem—bi ki yin mu ke Nnyusakpem Mamam la.

§7:37 : Lik Ikaal 18.15, 18.

dii ḥi. Moses u nyan ni timi Ijipt aatiŋ ni na, taa ki nyi waah bi niwob na.”\*\*  
 41 N-yoonn ngbaan le bi di salmaa mɔɔ unaabo, le ki toor kitork tii u. Baah mɔɔ unaabo ngbaan na, le bi jin njim ki mɔɔni sakpen. 42 Le Uwumbor daak bi chee, le ki siir cha bi, le bi dooni ḥijmabil ḥi bi kitaapaak na. Uwumbor aabɔnabr nan ḥmee tibor ngbaan Uwumbor Aag-baj ponn ni, ke Uwumbor len ke, ‘Israel yaab, ni nan kɔr tiwakor ki toor kitork ḥibin imonko ilee timoor ni.

Naah toor kitork na, ni toor tii min aa? Aayii.

43 Ni nan yoor liwaal li bi yin li ke Molek na aabool, ni liwaal Refann†† li ye lijmabil aanaŋ na.

Ni nan mɔɔ ḥiwaa ḥimina, ke ni li dooni ḥi.

Nima pu na, m ga di nimi buen tinaagbiir ni, kitij ki bi Babilon aatiŋ aapuwob na ni.\*\*\*

44 “To, tiyaajatiib nan joo ngban aabol timoor ni. Uwumbor nan joo ubaa mɔɔk bi libool ngbaan ponn ni la. U nan tuk Moses waah ga ḥa pu ki ḥa li libool ngbaan na. Le Moses ḥa li Uwumbor aah mɔɔk u pu na. 45 Tiyaajatiib nan di libool ngbaan tii baabim. Baabim ni baayidaan Josua mu nan yoor libool ngbaan, le ki buen bi ti gaa kitij ki Uwumbor jenn binib nima na. Le libool ngbaan nan bi nima, ki ti saa Ubɔr David aayoonn. 46 Uwumbor nan gee Ubɔr David. Le David nan ban ke u maa lidichal tii Uwumbor, u nan ye uyaaja Jakob Aawumbor na. David

mu aa nan maa lidichal tii Uwumbor.  
 47 Ujapɔɔn Solomon le nan maa lidichal tii Uwumbor.

48 “To, Uwumbor u kaa kpa ḥeen aatɔ na aa bi binib aah maa ḥidichal ḥi na ponn ni baanja. Uwumbor aabɔnabr nan len ke Uwumbor len ke,

49 ‘Kitaapaak le ye maabɔrjal, le kitij ye ntaa aah taa ni pu na: ni ga maa ba aadichal aabol ki tii mi? Ba aapaan ni ga kan tii mi aan m li koo nima?

50 Min mbaa le nan naan tiwan nimina mɔɔmɔk.””¶¶

51 To, Stiifen nan ki len ke, “Nitafal pɔɔ, naa dii Uwumbor aasan nisui ni, kaa pel waaliin. N-yoonn mɔɔmɔk ni ban ni yii Uwumbor Aafuur Nyaan, ke niyaajatiib aah nan yii mu pu na. 52 Niyaajatiib nan muk Uwumbor aabɔnabiib mɔɔmɔk, le ki ku binib bi tuk bi ke Uwumbor Aatutunyaan ga dan na. U fuu ni, le ni kooh u, ki ku u. 53 Uwumbor nan tun ni waatuuntiib bi nan tii nimi waakaal. Le ni yii, kaa kii nkaal ngbaan.”

### Baah mae Stiifen ḥitakpal ki ku u pu na

54 Stiifen aah len kina na, le lijuul chuu binib ngbaan, le bi ḥmɔɔ ḥinyin.

55 Le Stiifen u Uwumbor Aafuur Nyaan gbii u na, waan lik paacham, le ki kan Uwumbor aah wiin chain pu na, le ki kan Yesu si ḥangii wɔb. 56 Le u bui ke, “Lik, m kan kitaapaak chuu piir, ki kan Unibɔn Aabo na si Uwumbor aajangii wɔb.”

57 Waah len kina na, le bi teen mpɔɔn pu, ki di biŋaal ḥeep bitafal, le ki kpaan ber bi ti chuu u, 58 ki nyan u kitij ponn

\*\*7:40 : Lik Nnyam 32.1.

††7:43 : Refann nan ye n-yaayoonn na aawaal li bi nan len ke lima le joo lijmabil li bi yin li ke Saturin na. Binib bi kaa dii Uwumbor na nan dooni liwaal ngbaan.

\*\*\*7:43 : Lik Amos 5.25-27.

¶¶7:50 : Lik Aisaya 66.1-2.

ni, ki di buen n-gbaan, ki ti mae u njitakpal. Le biseeraadam ngbaan chuu peer baabokul, ki di bil unachipcoo ubaa chee, bi yin u ke Soco. <sup>59</sup> Le bi mae Stiif en njitakpal u ti kpo. Baah bi mae u njitakpal na, le u mee Tidindaan ke, "Tidindaan Yesu, gaa maawiin," <sup>60</sup> le ki gbaan utaaŋayil pu, le ki teen mpcoo pu, "Tidindaan, taa teen bi baah ja bakaa u na." Waah len kina na, le u kpo.

### Soco aah ja Yesu aanib falaa pu na

**8** Baah ku u pu na, le Soco kii. Liyadaal ngbaan le bi piin ki bi muk Yesu aanib bi bi Jerusalem ni na, ki ja bi falaa sakpen. Nima pu na, bi momok nan yaa, ki buen Judea ni Samaria aatim momok ponn ni. Yesu aakpambalb baanja le nan gur Jerusalem ponn ni, kaa yaa. <sup>2</sup> Le bijab bi san Uwumbor na sub Stiif en wii mpcoocon pu.

<sup>3</sup> Le Soco pcoo ubaa, u ti bii Yesu aanib ki ja bi fam. U nan koo njidchal njidchal ponn ni ki ban bi, ki chuu nyan bijab ni bipiib mpcoo, ki ti di ja kiyondiik ni.

### Filip aah buen Samaria aatiŋ ni pu na

<sup>4</sup> Tj, binib bi dii Yesu na nan yaa koo ntim momok ni, le ki tuk binib waabonyaan. <sup>5</sup> Le Filip buen Samaria aatiŋ ni ki ti tuk binib Kristo u gaa binib lii na aabor, <sup>6</sup> ki tun lijinjiir aatun. Baah kan lijinjiir aatun ngbaan ki jun waah len pu na, le kinipaak pel waabor ngbaan mbamom. <sup>7</sup> U nan nyan tiyayaar binib pam ponn ni, le ti teen mpcoo pu, ki nyan biwon ni. Le binib bi aawon faan na, ni biwob mu pam kan laafee. <sup>8</sup> Nima pu le Samaria aatiŋ aanib nan kpa mpopiin sakpen.

<sup>9</sup> Le uja ubaa nan bi nima bi nan yin u ke Simonn; u nan ye ubco la, ki tun lijinjiir aatun jti gar Samaria aatiŋ aanib na pam, le ki yoor ubaa ke uma le ye uninyuun. <sup>10</sup> Le binib momok, bigiim ni

bipoondam kii tii u, ki len ke u kpa Uwumbor aapcoo, ki yin u ke Mpcoo Sakpiindaan. <sup>11</sup> U nan tun inyok aatun ni yunn, ki cha ni gar binib pam. Nima pu na, bi nan kii tii u. <sup>12</sup> Le Filip dan nan tuk bi Uwumbor aanaan aabonyaan, ni Yesu Kristo aabonyaan ngbaan. Le bi kii waah len pu na. Baah kii waah len pu na, le u muin bi nnyun ni, bijab ni bipiib momok. <sup>13</sup> Le Simonn, u ye ubco ngbaan na, mu kii Filip aah len pu na. Le Filip muin u nnyun ni. Le u dii Filip idaa momok, ki kan u tun lijinjiir aatun pam. Le ni gar u ki ti nyaj.

<sup>14</sup> Le Yesu aakpambalb bi bi Jerusalem ni na jun ke Samaria aatiŋ aanib gaa Uwumbor aaliin. Baah jun kina na, le bi cha Piita ni Jønn buen bi chee. <sup>15</sup> Le Piita ni Jønn ti fuu nima, ki mee Uwumbor tii binib bi gaa Uwumbor aaliin na, ke u tii bi Waafuur Nyaan. <sup>16</sup> Waafuur Nyaan aa nan kee sunn ni bi ponn ni ubaa pu. Filip nan muin bi nnyun ni baanja, Tidindaan Yesu aayimbil pu la. <sup>17</sup> Nima pu na, Piita ni Jønn nan mee Uwumbor tii bi, le ki di bijaal paan bi pu. Baah ja kina na, le Uwumbor Aafuur Nyaan gbiin binib ngbaan.

<sup>18</sup> Le Simonn kan ke Yesu aakpambalb aah di bijaal paan binib pu na, Uwumbor tii binib ngbaan Waafuur Nyaan. Waah kan kina na, le u ban ke u pa bi njimobil, <sup>19</sup> bi tii u mpcoo mumina, ke u yaa di ujaal paan binib pu kan, bi ga kan Uwumbor Aafuur Nyaan.

<sup>20</sup> Le Piita baa u, "Aa dak ke aa ga jmaa di njimobil daa Uwumbor aapiin aa? Saah dak pu na, naa jan. Aa ni saamobil bee fam. <sup>21</sup> Aasui aa jan Uwumbor chee. Aajaal aa bi waabonyaan ni. <sup>22</sup> Kpeln aapobil, ki di cha saatunwanbir ngbaan, ki mee Uwumbor ke u di cha saalandakbir pinn si. <sup>23</sup> M kan ke aasui to sakpen a. Titunwanbir le joo si."

<sup>24</sup> Le Simonn bui Piita ni Jənn, “Mee Uwumbər tii mi, aan saah len tibər ti na, ti taa pii mi.”

<sup>25</sup> Tɔ, Piita ni Jənn nan tuk Samaria aatiŋ aanib Tidindaan aabor, ki sur bi mbamɔm, le ki nin gir buen Jerusalem. Baah chuun ki cha na, le bi bɔ dii Samaria aatim pam ponn ni, ki tuk binib Yesu aabɔnyaan.

### Itiopia aatiŋ aaninkpel aah gaa Yesu ki kii pu na

<sup>26</sup> N-yoonn ngbaan le Uwumbər aatuun tuk Filip ke u gor ki dii ɲjjangii wɔb, ki dii timoor ni aasan mu nyan Jerusalem ki cha Gasa aatiŋ ni na. Dandana wee, nsan ngbaan ja nsankpok a. <sup>27-28</sup> Le Filip fii ki cha. Uja ubaa nan ka itaan aah dar tɔroku sakpiin u na ponn ni, nsan ni. U nan ye Itiopia aatiŋ aanii la, ki mu ye unii u bi lee nyan njkookpimbil na, ki mu ye uninyuun la. Uma le nan lik Itiopia aatiŋ aamombil mɔmɔk, ki kpa mpɔɔn sakpen, ki tun lituln tii Itiopia aaborpii, u bi yin u ke Kandake na. Uja ngbaan nan dan Jerusalem u nan doon Uwumbər, ki labr cha, ki laa beenin bi nsan ni. Filip aah kan u na, u nan bi waatɔroku sakpiin ponn ni, ki karni kigbaŋ ki Uwumbər aabɔnabr Aisaya nan ȳmee ki na. <sup>29</sup> Le Uwumbər Aafuur Nyaan tuk Filip ke u li cha tɔroku ngbaan chee. <sup>30</sup> Le Filip san buen u chee ki ti ȳjun u bi karni kigbaŋ ki Uwumbər aabɔnabr Aisaya nan ȳmee ki na. Le Filip baa u, “Saah bi karni kigbaŋ ki na, aa bee naatataa aa?”

<sup>31</sup> Le u bui ke, “Unii yaa kaa mɔk mi kan, m ga ȳa kinye ki bee?” le ki tuk Filip ke u koo ni u chee ki nan kal tɔroku na ponn ni. <sup>32</sup> Tɔ, waah bi karni Uwumbər Aagbaŋ ponn ni nin chee na ȳmee ke, “Bi yaa chuu upiih bi ti kɔr u kan, waa wii.

Bi yaa chee upiibho aakokor pu kan, u mu aa wii.

U mu bi kina la.

Baah chuu u mpɔɔn pu na, waa len tibaa ke u nyan ubaa tibər ngbaan ni.

<sup>33</sup> Bi nan di u ȳa bibɔjirb chee, ki mɔln inyamɔn paan u, ki jinn u inimɔɔn.

Bi nan ku u, le unii ubaa aan ȳmaa len uyaabitiib pu.”<sup>§§</sup>

<sup>34</sup> Tɔ, le uja ngbaan baa Filip, “Uwumbər aabɔnabr aah nan len pu na, u len ȳma aabor? U len ubaa aabor le aan u len uken aabor la?” <sup>35</sup> Le Filip tuk u ȳjmeen ngbaan aatataa, ke ni ye Yesu aabor la, le ki tuk u tibɔnyaan na. <sup>36</sup> Baah bi tɔroku na ponn ni ki cha na, le bi ti fuu nkpen mubaa ni, le ki kan nnyun dɔ. Le uja ngbaan bui Filip, “Lik, nnyun sɔ. Aa ga ȳmaa muin mi nnyun ni dandana wee ee?”

[<sup>37</sup> Le Filip baa u, “Aa yaa gaa Yesu ki kii mbamɔm kan, m ga ȳmaa muin si nnyun ni.”]

Le u bui u, “M pak ke Yesu Kristo ye Uwumbər Aajapɔɔn la.”]

<sup>38</sup> Le u cha waatɔroku sil. Le u ni Filip mɔmɔk bilee sunn sil ni kitij, ki koo nnyun ni. Le Filip muin u nnyun ngbaan ni. <sup>39</sup> Le bi nyan ni nnyun ni. Baah nyan ni nnyun ni na, le Uwumbər Aafuur Nyaan yoor Filip, ki di u buen. Uja ngbaan aa ki kan u. Le u ki koo waatɔroku ponn ni, ki cha, ki nan kpa mpopiin pam. <sup>40</sup> Binib nan kan Filip kitij kibaa ni, bi yin ki ke Asotus. Le u bɔ dii ntim mɔmɔk ni, nima chee, ki tuk binib Yesu aabɔnyaan, le ki ti fuu Siisarea aatiŋ ni.

### Sɔɔl aah gaa Yesu ki kii pu na

(Lituln 22.6-16; 26.12-18)

**9** <sup>1-2</sup> Sɔɔl ma nan beenin kpa lijuul Tidindaan aadidiliib pu, ki ban ke u

chuu bi ki ku bi. U nan ban ke u buen Damaskus aatiq ni, ki ti ban bi, bijab ni bipiib mɔmɔk, ki chuu bi mpɔɔn, ki di tikululn buu bi, ki di gir dan Jerusalem. Le u buen Uwumbor aatotoorninkpel chee, ke u ŋmee kigbaŋ tii u. U yaa ti fuu Damaskus aatiq ni kan, u ga di kigbaŋ ngbaan mɔk mmeen aadir aaninkpiib, ke bi cha u chuu binib bi dii Yesu aasan na.

<sup>3</sup>Tɔ, le u siir ki cha. Waah laa bi nsan ni ki ti peen Damaskus aatiq ni na, libuul ngbaan ni le nwiihn nyan ni paacham, ki woln ki mann gonn u. <sup>4</sup>Le u lir kitiq, ki ŋjun nneel len ke, “Sɔɔl, Sɔɔl, ba ŋa aa ŋjani mi falaa?”

<sup>5</sup>Le Sɔɔl baa u, “Ndindaan, ŋma ye?”

Le u bui u, “Min le ye Yesu, u aa ŋa u falaa na. <sup>6</sup>Fii sil, ki li cha kitiq ngbaan ni. Aa yaa ti fuu kan, bi ga tuk si saah ga ŋa pu na.”

<sup>7</sup>Binib bi nan dii Sɔɔl na si ŋmin, kaa ŋmaa len tibaa. Bi ŋjun nneel len, kaa waa unii. <sup>8</sup>Le Sɔɔl fii sil, ki likr unimbiil, kaa ki waa. Le bi chuu ŋjaal, ki dar u cha Damaskus aatiq ni. <sup>9</sup>Waa nan waa ki ti saa iwiin itaa, kaa ki ji, kaa ki nyu mu.

<sup>10</sup>Le Yesu aadidiir ubaa nan bi Damaskus aatiq ni, bi nan yin u ke Ananias. Le Tidindaan len u chee tidaan ponn ni, ki bui u, “Ananias.”

Le u bui ke, “Ndindaan, m sɔ.”

<sup>11</sup>Le Tidindaan bui u, “Fiin, ki li cha nsan mu bi yin mu ke Nsan Mu Tok na ni, ki li cha Judas do, ki li ban uja u bi yin u ke Sɔɔl, aan u ye Tasus aatiq aani na. U bi mee Uwumbor, <sup>12</sup>le ki dan tidaan ki kan uja u bi yin u ke Ananias na koo ni u chee, ki nan di ŋjaal paan u pu, ke unimbiil ki likr.”

<sup>13</sup>Le Ananias bui ke, “Ndindaan, binib pam tuk mi uja ngbaan aabor, ke u ŋjani saanib bakaa sakpen Jerusalem ponn ni.

<sup>14</sup>U fuu ni do, ki kpa nsan mu Uwumbor

aatotoorninkpiib tii u ke u chuu saanib mɔmɔk, ki buu bi tikululn na.”

<sup>15</sup>Le Tidindaan bui u, “Li cha u chee. M nyan u la, u ti li joo maabor tuk bibɔrb, ni Juu yaab, ni binib bi kaa ye Juu yaab na, ki cha bi bee mbɔr. <sup>16</sup>Min mbaa ga mɔk u waah ga ji falaa u mɔmɔk maayimbiil pu na.”\*

<sup>17</sup>Le Ananias fii ki buen Judas do, ki ti koo Sɔɔl chee, ki di ŋjaal paan u pu, le ki bui u, “Nna aabo Sɔɔl, Tidindaan le tun ni mi aa chee. Yesu u di ubaa mɔk si, saah bi nsan ponn ni ki choo na, uma le tun ni mi, ke m cha aa ki likr, ki gbiin Uwumbor Aafuur Nyaan.” <sup>18</sup>Waah len kina na, libuul ngbaan ni le tiwan ni naahn tijanpɔkr na nyan Sɔɔl aanimbiil ni. Le unimbiil ki likr, le u fii sil. Le bi muin u nnyun ni. <sup>19</sup>Le u jin tijikaar, ki ki kan mpɔɔn.

### Sɔɔl aah moon Uwumbor aabor Damaskus aatiq ni pu na

Sɔɔl nan laa bi Yesu aadidiliib chee iwiin ilee, Damaskus aatiq ni. <sup>20</sup>Libuul ngbaan ni le u koo mmeen aadir ni, ki ti tuk binib Yesu aabor, ke u ye Uwumbor Ajapɔɔn la.

<sup>21</sup>Le ni gar binib bimɔk ŋun waah len pu na. Le bi baa tɔb, “Naa ye uja ngbaan le nan ŋa Yesu aanib falaa Jerusalem ponn ni ii? U dan do, ke u nan chuu bi, ki di tikululn buu bi, ki di bi buen Jerusalem, ki ti di bi ŋa Uwumbor aatotoorninkpiib aajaal ni.”

<sup>22</sup>Sɔɔl nan moo kani mpɔɔn u di tuk binib Yesu aabor, le ki len ki nyaŋ Juu yaab bi bi Damaskus aatiq ni na, ki mɔk bi ke Yesu sil ye Kristo u gaa binib lii na.

<sup>23</sup>Ni nan ŋa iwiin ilee, le Juu yaab kuun tɔb, ki kpokl baah ga ŋa pu ki ku Sɔɔl na. <sup>24</sup>Idaa mɔmɔk, kinyeek ni nwiin pu, le bi ka kii kitiq ngbaan aagoln aabisamɔb chee, ke Sɔɔl yaa nan nyan ni

\*9:16 : Lik Kolose Yaab 1.24.

kan, bi chuu u ki ti ku u. Le Sɔɔl ɔnun baah kpokl pu na.<sup>25</sup> Kitij ngbaan aagoln nan kpa takolu mam. Le Sɔɔl aadidiliib yoor u ɔna kibɔɔkuuk sakpen ponn ni, ki di u dii takolu nyan.

### Baah nan muk Sɔɔl Jerusalem ni pu na

<sup>26</sup> Le Sɔɔl buen Jerusalem. Waah ti fuu nima na, le u ban u kpaan Yesu aadidiliib chee. Le bi san u ijawaan, kaa pak ke u ye Yesu aadidiir ubaa.<sup>27</sup> Le Banabas dan nan di u buen Yesu aakpambalb chee, ki ti tuk bi ke Sɔɔl nan kan Tidindaan nsan ni, ke Tidindaan nan len u chee, ke Sɔɔl nan kpa lipobil ki di Yesu aabor tuk binib bi bi Damaskus aatiŋ ni na.<sup>28</sup> Banabas aah tuk bi kina na, le bi cha Sɔɔl kpaan bi chee. Le u dii bi baah cha nin chee na Jerusalem ponn ni, ki kpa lipobil u tuk binib Tidindaan aabor.<sup>29</sup> N-yoonn, n-yoonn le u ni Juu yaab bi len Griik aaliin na kpak tɔb kinikpakpak, le bi ban bi ku u.<sup>30</sup> Le Yesu aanib ɔnun ke bi ban bi ku u. Baah ɔnun kina na, le bi yoor u buen Siisarea aatiŋ ni, ki cha u kun Tasus aatiŋ ni.

<sup>31</sup> Nima pu na, Yesu aanib bi nan bi Judea aatim ni, ni Galilee aatim ni, ni Samaria aatim ni na nan gaa bibaa. Unii ubaa aa ki muk bi. Le bi moo bae Tidindaan aaliin n-yoonn mɔmɔk, ki pak u. Le Uwumbɔr Aafuur Nyaan ter bi, ki cha binib moo kpee bi pu.

### Piita aah tun lijinjiir aatun pu na

<sup>32</sup> Tɔ, Piita nan bɔ dii ntim mɔmɔk ponn ni nima chee. U nan buen Lida aatiŋ mu ni, ki mann Uwumbɔr aanib bi bi nima na.<sup>33</sup> Waah bi nima na, le u kan uja ubaa, bi yin u ke Eneas, u nan ye uja u aawon faan na la. ɔnbin ɔnjiin u po dɔ kidiik ni la, kaa ɔnmaa fii.<sup>34</sup> Le Piita bui u, “Eneas, Yesu Kristo tii si laafee dandana wee. Fii sil, ki kpab saawan-dookaan.” Libuul ngbaan ni, le u kpaan

fii sil.<sup>35</sup> Le binib bimɔk bi Lida aatiŋ ni, ni Saronn aatiŋ ni na kan u, ki kpeln baabimbin, ki dii Tidindaan aasan.

<sup>36</sup> Kitij kibaa mu bi, ki bi gbɔk nima chee, bi yin ki ke Jɔpa. Upii u dii Yesu aasan na nan bi nima, bi yin u ke Tabita. Griik aaliin ponn ni, bi yin u ke Dokas. Waayimbil aataata le ye ke upeeyun. U nan ye litunyaandaan la.<sup>37</sup> N-yoonn ngbaan le u bunj, ki kpo. Le bi fu linikpol ngbaan nnyun, ki di u ti bil paacham aadiik ni.<sup>38</sup> Jɔpa aatiŋ, ni Lida aatiŋ aa daa tɔb. Le Yesu aadidiliib bi bi Jɔpa aatiŋ ni na ɔnun ke Piita bi Lida aatiŋ ni. Le bi tun bijab bilee, ke bi ti yin ni Piita, ke u pɔɔn ubaa ki dan mala.<sup>39</sup> Le Piita fii dii bi. Waah ti fuu ni nima na, le bi di u buen paacham aadiik ngbaan ni. Le bikpopiib kuun nima, ki si Piita chee, ki wii, le ki mɔk u ɔnjibokul ɔni Dokas nan ɔna tii bi, waah nan bi na.<sup>40</sup> Le Piita jenn ɔnyan bi mɔmɔk kidiik ngbaan ni, le ki gbaan utaajaayil pu, ki mee Uwumbɔr, le ki lik linikpol ngbaan ki len ke, “Tabita, fii sil.” Le u likr unimbil. Waah kan Piita na, le u fii kal.<sup>41</sup> Le Piita chuu ujaal, ki ter u, u fii sil, le ki yin Uwumbɔr aanib ni bikpopiib ngbaan, ki di u mɔk bi, ke u fikr a.<sup>42</sup> Le binib bimɔk bi Jɔpa aatiŋ ni na ɔnun tibɔr ngbaan. Nima pu na, binib pam nan gaa Tidindaan ki kii.<sup>43</sup> Piita nan bi Jɔpa aatiŋ ni, ki yunn. U nan koo uja u bi yin u ke Simonn, aan u ye ugbanjab na do la.

### Uninkpel Konelius aah yin Piita pu na

**10** Tɔ, uja ubaa nan bi Siisarea aatiŋ ni, bi nan yin u ke Konelius. U nan ye butɔb aajab nkub aaninkpel la. Bi yin butɔb aajab ngbaan ke “Itali aatiŋ aajab.”<sup>2</sup> Konelius nan ye uminyaan la. U ni waachiln ni aanib mɔmɔk pak Uwumbɔr. U nan ɔnani Juu yaab aagiim tijann sakpen, ki mee Uwumbɔr idaa mɔmɔk la.<sup>3</sup> Le kijook wɔb, tikur titaa aayoonn, u

daj tidaq ki kan Uwumbor aatuun koo ni u chee ki nan bui ke, "Konelius."

<sup>4</sup>Waah kan Uwumbor aatuun ngbaan na, le u san ijawaan, ki baa u, "Maaninkpel, aa ban ba?"

Le Uwumbor aatuun ngbaan bui u, "Uwumbor j̄un saameen, ki nyi saah ter bigiim pu na, ki teer aa b̄or." <sup>5</sup>U ban ke aa cha bijab bibaa buen J̄opa aatiq ni, ki ti yin ni uja ubaa, bi yin u ke Simonn Piita. <sup>6</sup>U koo ugbanjab ubaa aadichal ni, bi yin u ke Simonn. Waadichal bi nnyusakpem na aagbaan." <sup>7</sup>Le Uwumbor aatuun ngbaan ki gir buen. Waah buen na, le Konelius yin waatutum ponn ni bilee, ni butob aaja u ye uninyaan ki bi u chee idaa m̄om̄ok ki tun lituln tii u na. <sup>8</sup>Konelius nan tuk bi waah kan pu na m̄om̄ok, le ki tun bi, ke bi buen J̄opa aatiq ni.

<sup>9</sup>Naah woln kitaak na, le bi bi nsan ni, ki peen J̄opa aatiq ni. Nwiin kaasisik ni, le Piita jon kidiik paab<sup>†</sup> u ti mee Uwumbor. <sup>10</sup>Le nkon chuu u, le u ban u ji tijikaar. Baah bi m̄on bisaa ke bi tii u na, <sup>11</sup>le u daj tidaq ki kan kitaapaak chuu piir, ki kan tiwan nibaa sunn ni kitij. Ni nan naahn likekeln ki pee. Le bi joo ikekefeen inaa pu, ki sunn ni kitij. <sup>12</sup>Ipeel, ni iwaa, ni tiwan nimok baar kitij na, ni inyoon m̄om̄ok aaboj nan bi likekeln ngbaan pu. <sup>13</sup>Le nneel len ke, "Piita, fii, ki ku ki j̄mo."

<sup>14</sup>Le Piita bui ke, "Ndindaan, aayii. Maa kee j̄man tiwan ni k̄o ke nee na."

<sup>15</sup>Le nneel ngbaan ki len ke, "Uwumbor yaa len ke aa ga j̄maa ji tiwan ni na kan, aa taa bui ke ni k̄o." <sup>16</sup>Le ni ja kina nfum mutaa. Le tiwan ngbaan gir buen paacham.

<sup>17</sup>Le Piita dakl lik ke u bee lijinjiir aawan ngbaan aatataa. Ni nan ja u ilandak. N-yoonn ngbaan binib bi nyan ni

Konelius do na baa binib, ki bee Simonn do, ki si mbisamob chee,<sup>18</sup> le ki teen ke, "Simonn Piita bi do oo?"

<sup>19</sup>Le Piita laa beenin bi kidiik paab, ki bi dak lijinjiir aawan ngbaan aatataa. Le Uwumbor Aafuur Nyaan bui u, "Lik, bijab bitaa fuu ni do, ki ban si. Min le tun ni bi." <sup>20</sup>Fii ki sunn ni, ki dii bi, ki taa joo beeni." <sup>21</sup>Le Piita sunn ni kitij, ki bui bijab ngbaan, "Min le ye unii u ni ban na. Ni chuun kinye?"

<sup>22</sup>Le bi bui u, "Konelius, u ye butob aajab nkub aaninkpel na le tun ni timi. U ye unibamonn u pak Uwumbor na. Juu yaab m̄om̄ok pak u sakpen. Le Uwumbor aatuun mubaa tuk u ke u yin si, ke aa dan udo, u nan pel saah ga len pu na." <sup>23</sup>Le Piita bui bi ke bi koo ni, le ki chann bi tichann. Le bi doon udo.

Naah woln kitaak na, le u gor ki dii bi. Le Yesu aanib bi nan bi J̄opa aatiq ni na bibaa mu dii u. <sup>24</sup>Ki woln kitaak, le bi fuu Siisarea aatiq ni. Le Konelius nan yin waamaal, ni uj̄otiib dan udo, ki nan ka kii Piita. Le Piita ti fuu ki koo bi chee. <sup>25</sup>Waah koo ni na, le Konelius dan nan gbaan unimbiini ni, ki doon u. <sup>26</sup>Le Piita fiin u, ki bui u, "Fii sil. M po ye unibon la." <sup>27</sup>Piita nan beenin bi len u chee le ki ti koo kidiik ni, ki kan binib pam kuun nima chee. <sup>28</sup>Le Piita bui bi, "Ni nyi ke timi Juu yaab aakaal aa kii ke ti mann binib bi kaa ye Juu yaab na, kaa kii ke ti kpaan bi chee. Le Uwumbor mu m̄ok mi ke m taa li dak ke unii ubaa k̄o. <sup>29</sup>Nima pu na, naah yin mi pu na, le m dan, kaa yii. Ni yin mi ba pu?"

<sup>30</sup>Le Konelius bui u, "Daanab na, tikur titaa kijook w̄ob, kinakokoona, le m nan bi maadiik ni, ki bi mee Uwumbor. Maah bi mee Uwumbor na, le m kan uja u pee likekeln li wiin chain na si nnimbiin ni <sup>31</sup>ki bui ke, 'Konelius, Uwumbor

<sup>†</sup>10:9 : Bi yaa maa kidiik kan, baa di timoor pinn ki, kaa maa lidikokoln. Bi nan di id̄o paan puln tidir paab, le ki di titan por biin. Bi nan maa j̄ibimbin le ki taa joi kidiik aapaacham.

ŋun saameel, ki teer saah ter bigiim pu na.<sup>32</sup> U ban ke aa cha binib buen Jɔpa aatiŋ ni, bi ti yin ni uja u bi nima aan bi yin u ke Simonn Piita na, ke u koo ugbanjab ubaa do, bi yin u ke Simonn na. Waadichal bi nnyusakpem na aagbaan.'

<sup>33</sup> Waah tuk mi kina na, libuul ngbaan ni le m tun binib bi ti yin si. Saah dan pu na, ni ŋan. Dandana wee, ti mɔmɔk bi do, Uwumbɔr aanimbiin ni. Ti ban ti ŋun tibɔr ti Tidindaan tuk si ke aa tuk timi na."

### Piita aah tuk Konelius mam Uwumbɔr aabɔr pu na

<sup>34</sup> Le Piita bui bi, "M bee ke ni ye mbamɔm ke Uwumbɔr aa pak ubaa ki jer uken. U po pak ti mɔmɔk la.<sup>35</sup> ɻinibol mɔmɔk ponni, unii yaa bi, ki pak Uwumbɔr ki tun lituln li ŋan na kan, u piir Uwumbɔr aasui.<sup>36</sup> Ni nyi ke Uwumbɔr tuk Israel yaab tibɔnyaan. Tibɔnyaan tee le ye ke Uwumbɔr ga tii bi nsuudoon Yesu Kristo pu. Uma le ye ti mɔmɔk Aadindaan.<sup>37</sup> Jɔnn nan tuk binib ke bi yaa kpeln baabimbin kan, u ga muin bi nnyun ni. N-yoonn ngbaan aah jer na, le Yesu u ye Nasaref aatiŋ aanii na piin ki bi tun waatuln Galilee aatim ni, ki bɔ dii Judea aatim mɔmɔk ni.<sup>38</sup> Ni nyi waabɔr. Uwumbɔr nan nyan u, ki di Waafuur Nyaan gbiin u ki tii u mpɔɔn, ki nan bi u chee. Uwumbɔr aah bi u chee na, le u buen ɻipepel mɔmɔk, ki tun lituln li ŋan na, ki cha binib bimɔk nan bi kinimboŋ aarpaal ni na pɔɔk.<sup>39</sup> Ti kan waah ɻani tiwan nimɔk Jerusalem ni Juu yaab aatim mɔmɔk ponni na. Le bi kpaa u ndɔpuinkoo pu, ki ku u.<sup>40</sup> Iwiin itaa daal, le Uwumbɔr fikr u nkun ni, ki cha binib kan u.<sup>41</sup> Naa ye binib mɔmɔk le kan u. Uwumbɔr nyan timi le ke ti kan u, ki li ye waaseeraadam. Waah fikr nkun ni na, ti ni u kpaan jin tijikaar, ki kpaan ki nyu nnyun.<sup>42</sup> U tuk timi ke ti buen ɻipepel mɔmɔk, ki ti tuk binib waabɔr, ki

ji seeraa ke Uwumbɔr nyan u, u ti ji bini-fuub ni bitekpiib tibɔr.<sup>43</sup> N-yaayoonn na, Uwumbɔr aabɔnabtiib mɔmɔk nan len Yesu aabɔr, ke unii umɔk gaa u ki kii na, Uwumbɔr ga di cha pinn u, uma Yesu aayimbil pu."

<sup>44</sup> Tɔ, Piita aah laa bi len kina na, le Uwumbɔr Aafuur Nyaan sunn ni ki nan gbiin binib bimɔk ŋun waah len pu na.<sup>45</sup> Yesu aanib bi nyan Jopa ki dii Piita na nan ye Juu yaab, le ni gar bi pam, ba pu? Uwumbɔr di Waafuur Nyaan tii binib bi kaa ye Juu yaab na mu,<sup>46</sup> le bi ŋun bi len iluin yayan ki nyuŋni Uwumbɔr.<sup>47</sup> Tɔ, Piita bui ke, "Uwumbɔr di Waafuur Nyaan tii binib bimina, ke waah tii timi pu na. Ubaa ga ɻmaa len ke ti taa muin bi nnyun ni ii?"<sup>48</sup> Waah len kina na, le u bui bi ke bi muin bi nnyun ni, Yesu Kristo aayimbil pu. Tɔ, Konelius mam nan gaŋ Piita ke u ɻa bi chee iwiin ilee.

### Piita aah tuk Yesu aanib tibɔr ngbaan pu na

**11** Yesu aakpambalb ni Judea aatiŋ aanib bi nan gaa Yesu ki kii na, nan ŋun ke binib bi kaa ye Juu yaab na mu gaa Uwumbɔr aabɔr.<sup>2</sup> Le Juu yaab bibaa len ke binib bi kaa ye Juu yaab na yaa gaa Uwumbɔr aabɔr kan, ni ŋan ke bi gii ɻichakpan. Le Piita ki gir buen Jerusalem. Waah ti fuu nima na, le Juu yaab ngbaan kpak u kinikpakpak,<sup>3</sup> ke ba ɻa u mann binib bi kaa ye Juu yaab na, ki jin bi chee tijiir, Juu yaab aah kɔ pu na.

<sup>4</sup> Le Piita neer tibɔr mɔmɔk aah piin ki ti saa pu na, ki tuk bi:

<sup>5</sup> "M nan bi Jɔpa aatiŋ ni, ki bi mee Uwumbɔr, le ni ɻa mi ke tidaŋ pu na, le m kan tiwan nibaa nyan ni paacham. Ni naahn likekeln, ki pee. Le bi joo ikeke-feen inaa pu, ki sunn ni kitij m chee.

<sup>6</sup> Le m lik ni mbamɔm, ki kan tiwakor, ni ipeel, ni iwaa, ni tiwan nimɔk baar kitin

na, ni inyoon, ni pu. <sup>7</sup>Le m ḥjun nneel len ke, ‘Piita, fii, ki ku ki ḥmo.’ <sup>8</sup>Le m len ke, ‘Ndindaan, aayii. Maa kee ḥman tiwan ni ko ke nee na.’ <sup>9</sup>Le nneel ngbaan ki len paacham ke, ‘Uwumbor yaa len ke aa ga ḥmaa ji tiwan ni na kan, aa taa bui ke ni ko.’ <sup>10</sup>Le ni ḥja kina nfum mutaa. Le tiwan ngbaan ki gir buen paacham. <sup>11</sup>Libuul ngbaan ni le bijab bitaa fuu ni maah bi lidichal li ni na aabisamɔb chee. Bi nan nyan ni Siisarea aatiŋ ni la. Konelius le tun ni bi, ke bi nan yin mi. <sup>12</sup>Le Uwumbor Aafuur Nyaan bui mi, ‘Dii bi, ki taa joo beeni.’ Le m dii bi. Le Yesu aanib biloob bimina mu dii mi, le ti buen Siisarea aatiŋ ni, ki ti fuu ki koo Konelius do. <sup>13</sup>Le Konelius tuk timi ke u nan kan Uwumbor aatuun si udo ki tuk u ke u cha binib buen Jɔpa aatiŋ ni, ki ti yin uja ubaa, bi yin u ke Simonn Piita, <sup>14</sup>u ga tuk u tibɔr ti ga cha u ni waachiln ponn ni aanib mɔmɔk ḥmar na. <sup>15</sup>Le m piin ki bi tuk bi Yesu aabɔr. Maah laa bi tuk bi na, le Uwumbor Aafuur Nyaan sunn ni bi pu, ke mu aah nan sunn ni ti pu njan pu na. <sup>16</sup>Le m teer ke Tidindaan nan tuk timi ke, ‘Jɔnn nan muin binib nnyun ni. Mma ga gbiin nimi Uwumbor Aafuur Nyaan.’ <sup>17</sup>Tɔ, Uwumbor di Waafuur Nyaan tii timi bi gaa Tidindaan Yesu Kristo ki kii na, le ki tii binib bi kaa ye Juu yaab na mu, ke waah tii timi pu na. M mu ye ḥmaa ki ga ḥmaa yii Uwumbor?’

<sup>18</sup>Juu yaab ngbaan aah ḥjun Piita aah len pu na, le baa ki kpak u. Bi nan nyuŋ Uwumbor, le ki bui ke, “Kina pu na, Uwumbor cha binib bi kaa ye Juu yaab na mu kpeln baabimbin ki kan limɔfal.”

### Binib aah gaa Yesu ki kii Antiok aatiŋ ni pu na

<sup>19</sup>Tɔ, binib bi ku Stiifen na nan muk Yesu aanib ki ḥjani bi falaa. Le bi yaa,

ki buen ntim mɔmɔk ni, ki ti saa Fonisia aatiŋ ni, ni Saiprus aatiŋ ni, ni Antiok aatiŋ ni, ki joo Yesu aabɔr tuk Juu yaab baanja. <sup>20</sup>Le Yesu aanib bibaa, bi nyan ni Saiprus aatiŋ ni, ni Sairene aatiŋ ni na mu buen Antiok aatiŋ ni, ki ti tuk binib bi kaa ye Juu yaab na mu Tidindaan Yesu aabɔnyaan. <sup>21</sup>Tidindaan aapɔɔn nan bi bi chee, le binib pam gaa Tidindaan ki kii, ki kpeln baabimbin, ki dii waasan.

<sup>22</sup>Yesu aanib bi nan bi Jerusalem na ḥjun bi pu. Nima pu le bi tun Banabas ke u buen Antiok aatiŋ ni. <sup>23-24</sup>U nan ye unibamɔnn, ki gaa Yesu ki kii mbamɔm, ki gbii Uwumbor Aafuur Nyaan. Le u di ti fuu nima. Waah ti fuu nima, ki kan Uwumbor aah san binib ngbaan kinimbaak pu pu na, le ni ḥja u mpopiin. Le u sur bi mɔmɔk ke bi cha binimbil li man bi dii Tidindaan aasan mbamɔm. Le binib pam gaa Tidindaan ki kii ki kpee waanib pu.

<sup>25</sup>Le Banabas buen Tasus aatiŋ ni, u ti ban Sɔɔl, <sup>26</sup>le ki ti kan u, ki di u dan Antiok aatiŋ ni. Libimɔln le Banabas, ni Sɔɔl, ni Yesu aanib nan kuuni nima chee; le bi tuk binib pam Uwumbor aabɔr, Antiok aatiŋ ni, le bi naan Yesu aadidiliib liyimbil lee, ke Kristo Yaab.

<sup>27</sup>N-yoonn ngbaan le Uwumbor aabɔnabiib bibaa nyan ni Jerusalem, ki dan Antiok aatiŋ ni. <sup>28</sup>Bi yin ubaa ke Agabus. Le Uwumbor Aafuur Nyaan cha u len ke nkɔn sakpem ga lir dulnyaa wee ponn ni. Ubɔrkpaan Klɔdius aayoonn le mu nan lir. <sup>29</sup>Agabus aah len kina na, le Yesu aadidiliib len ke bi mɔmɔk ga tii ḥjimombil, baah ga ḥmaa tii pu na, ki di tii Yesu aanib bi bi Judea aatiŋ ni na. <sup>30</sup>Le bi mɔmɔk tii kina. Le Banabas ni Sɔɔl di ḥjimombil ngbaan buen Judea, ti di tii Yesu aanib aaninkpiib.

**Ubør Herod aah ḥa  
Yesu aanib falaa pu na**

**12** N-yoonn ngbaan le Ubør Herod piin ki bi ḥani Yesu aanib bibaa falaa.<sup>2</sup> U cha binib di kijaak aajuk ku Jems u ye Jønn aakpel na.<sup>3</sup> Waah ḥa kina na, le ni piir Juu yaab aasui. Nima pu le u cha binib chuu Piita mu. Ni nan ye n-yoonn mu Juu yaab ji Lakr-jer aajim<sup>‡</sup> ki ḥymɔ boroboro u kaa kpa nnyɔk na.<sup>4</sup> Baah chuu Piita na, le bi di u ḥa kiyondiik ni. Le butɔb aajab kipiik ni biloob si kii u. Binaa yaa kiir ki ti saa tikur titaa kan, le binaa mu nan gaa. Ubør Herod nan len ke Lakr-jer aajim ngbaan yoonn yaa jer kan, u ga nyan Piita kiyondiik ni, ki di u siin Juu yaab aanimbiin ni, ki ji u tibør.<sup>5</sup> Piita aah laa bi kiyondiik ni na, le Yesu aanib mu nan bi mee Uwumbør linimaln, ki tii u.

**Uwumbør aatuun aah nyan Piita  
kiyondiik ni pu na**

<sup>6</sup> Kinyeek ngbaan yaa woln kan, Ubør Herod ga nyan Piita ki ji u tibør. Le Piita dɔ̄ geen bikikiirb bilee akaasisik ni. Bi nan di tikululn buu unjaal momɔk ilee, ki di tibaa gbin dar ukikiir wee, ki di tiken gbin dar uken. Le bikikiirb biken si kii mbisamɔb chee.<sup>7</sup> Kinyeek ngbaan, le Tidindaan aatuun dan ki nan sil u chee. Le nwiihn woln kidiik ponn ni. Le u gbaa finn Piita, ki bui u ke, “Fii sil mala mala.” Waah len kina na, le tikululn ngbaan chuu leer lir.<sup>8</sup> Le Tidindaan aatuun ngbaan bui u, “Di saagbapapaln buu aachaj, ki di saanaatak tan.” Le Piita ḥa kina. Le u ki bui u, “Di saakekeln peen, ki dii mi.”<sup>9</sup> Le Piita dii u ki buen, ki dak ke ni ye tidaq la. Waa dak ke ni sil ye ibamɔn.<sup>10</sup> Baah cha na, le bi jer ukikiir ubaa, ki ki foor, le ki ki jer

uken, ki ti fuu tikur aajaalej u lek lipaal aabisamɔb na. Le jaalej ngbaan piir ubaa pu. Le bi nyan, ki bɔ̄ dii nsan mubaa. Libuul ngbaan ni le Tidindaan aatuun ngbaan buen, ki cha Piita.

<sup>11</sup> Le Piita aanimbil woln. Le u len ke, “M bee ke ni sil ḥa kina. Tidindaan tun ni waatuun ke u nan nyan mi Ubør Herod aanjaal ni, ki nyan mi Juu yaab aah ban bi ḥa mi pu na ni.”

<sup>12</sup> To, Piita nan bee waabor aah bi pu na, le ki buen Mari, u ye Jønn Mak aana na do. Kinipaak nan bi nima, ki bi mee Uwumbør.<sup>13</sup> Le Piita kpaar lipaal aajaalej. Le ututunn u ye upii aan bi yin u ke Roda na, dan nan lik udaan u kpaar jaalej na,<sup>14</sup> le ki bee Piita aaneel. Le ni ḥa u mpopiin sakpen. Le u gir buen biken chee, kaa piir jaalej, ki ti tuk bi ke Piita si lipaal.<sup>15</sup> Le bi tuk u ke u waar la. Le u beenin len ke ni ye mbamɔn. Le bi bui u ke ni ga li ye Piita aawiin la.

<sup>16</sup> Le Piita beenin si kpaar jaalej. Le bi piir jaalej, ki kan u. Baah kan u na, le ni gar bi sakpen.<sup>17</sup> Le Piita yoor ujaal ki nyii bi pu, ke bi ḥymin, le ki tuk bi Tidindaan aah ḥa pu ki nyan u kiyondiik ni na, ki bui bi ke bi tuk Jems ni Yesu aanib biken. Piita aah len kina na, le u siir buen nibaa chee.

<sup>18</sup> Kitaak aah woln na, le bikikiirb ngbaan aapobil yuk. Le bi baa tɔb budabu ḥa Piita na.<sup>19</sup> Le Ubør Herod bui bi ke bi ban u. Le bi ban u, kaa kan u. Le Herod yin bikikiirb ngbaan, ki nan baa bi tibør ngbaan, le ki len ke baabor bii, ki ku bi.

To, Herod nan nyan Judea aatiŋ ni, ki buen Siisarea aatiŋ ni, ki ti yunn nima siib.

**Ubør Herod aah kpo pu na**

<sup>20</sup> Herod nan gee linjuul ki ḥa Taya aatiŋ aanib, ni Saidonn aatiŋ aanib pu.

---

\*12:3 : Israel yaab nan ji Lakr-jer aajim ke bi teer buyoonn Uwumbør nan nyan bi tinaagbiir ni, Ijipt aatiŋ ni na. Lik Nnyam 12.1-27.

Le bi mɔmɔk kuun ki buen u chee. Bi nan puuen buen uja ubaa chee la. Bi yin u ke Blastus, u ye Herod aatutum aaninkpel la. Le Taya aanib ni Saidonn aanib buen u chee bi ti jɔnn u kijɔtiik, le ki nin buen Ubɔr Herod chee, ki ti mee u ke u taa cha bi li kpa kijaak. Bi gaal baajikaar Ubɔr Herod aatiŋ ni la. Nima pu na, baa ban ke bi li kpa kijaak.

<sup>21</sup> Le Herod siin nwiin mundaln bi ga kuun tɔb na. Liyaadaal le u di waabɔrkekeln peen, ki kal waabɔrjal pu, le ki len bi chee tibɔr. <sup>22</sup> Waah len tibɔr pu na, le bi mɔmɔk tar ke, “Ni ye Uwumbɔr aaneel la, naa ye unibɔn.” <sup>23</sup> Tɔ, libuul ngbaan ni le Tidindaan aatuun cha iween chuu u; ba pu? waa tii Uwumbɔr lisil. Le ɔnikpaambil ɔjman u, le u kpo.

<sup>24</sup> Tɔ, Uwumbɔr aabor nan moo mooni ɔnipepel mɔmɔk. Le binib too kpaε ki gaal i.

<sup>25</sup> Banabas ni Sɔɔl ma kan, baah nan di ɔnjimobil tii Yesu aanib aaninkpiib na, le bi di Jɔnn Mak nyan Jerusalem ni, ki labr buen Antiok aatiŋ ni.

### Uwumbɔr Aafuur Nyaan aah nyan Banabas ni Sɔɔl pu na

**13** Yesu aanib bibaa nan bi Antiok aatiŋ ni. Bi ponn ni bibaa nan ye Uwumbɔr aabɔnabtiib, bibaa mu nan ye Yesu aabor aamɔmɔkb. Bi yin ubaa ke Banabas, ki yin uken ke Simeonn, ki ki yin u ke Unibɔmbɔn,<sup>1</sup> ki yin uken ke Lusiis, u nan ye Sairene aatiŋ aanii na, ki yin uken ke Manaenn u Ubɔr Herod aate nan kpiin u na, ki yin uken ke Sɔɔl. <sup>2</sup> Le bi mɔmɔk dooni Uwumbɔr ki lul bumɔb. Baah ɔjani kina na, le Uwumbɔr Aafuur Nyaan tuk bi ke bi nya Banabas ni Sɔɔl bi ti tun waah siin bi lituln li na.

<sup>3</sup> Le Yesu aanib lul bumɔb, ki mee Uwumbɔr, ki di bijaal paan bi pu, le ki cha bi buen.

### Banabas ni Sɔɔl aah ɔja pu Saiprus aatiŋ ni na

<sup>4</sup> Tɔ, Uwumbɔr Aafuur Nyaan aah tun Banabas ni Sɔɔl pu na, le bi buen, ki ti fuu kitij kibaa ni, bi yin ki ke Selusia, le ki koo buɔɔb ni, ki puur ki ti fuu lidikl pu, bi yin lidikl ngbaan ke Saiprus,<sup>5</sup> le ki fuu kitij ki bi lidikl ngbaan paab na, bi yin ki ke Salamis. Baah fuu nima na, le bi koo Juu yaab aameen aadir ni, ki tuk binib Uwumbɔr aabor. Jɔnn Mak mu nan dii bi, ki ter bi.

<sup>6</sup> Le bi ki buen lidikl ngbaan aaapel liken wɔb, ki ti fuu kitij kibaa ni, bi yin ki ke Pafos. Baah ti fuu nima na, le bi kan ubɔɔ ubaa, bi yin u ke Bariyesu. U nan ye Juu yaab aanii le ki ɔjmann ke u ye Uwumbɔr aabɔnabr la. <sup>7</sup> Lidikl ngbaan aatim aaninkpel mu nan bi nima, bi yin u ke Sejius Pɔɔlus. U nan ye unii u kpa nlan na la. Ubɔɔ ngbaan aaɔj le nan bi na. Le uninkpel ngbaan yin Banabas ni Sɔɔl ke bi dan u chee, ki ban u ɔjun Uwumbɔr aabor. <sup>8</sup> Ubɔɔ ngbaan aayimbil leler nan ye Elimas la. Elimas aatataa le ye ke ubɔɔ. Le u kpak Banabas ni Sɔɔl kinikpakpak, ki pɔɔni ubaa ke uninkpel ngbaan taa gaa Yesu ki kii. <sup>9</sup> Le Uwumbɔr Aafuur Nyaan fir Sɔɔl, u bi duln u ke Pɔɔl na pu, le u lik Elimas mbamɔm,<sup>10</sup> le ki bui u, “Sin u ye kinimbɔɔ aa-japɔɔn na, aa ye litunyaan mɔmɔk aadin la, ki ɔjmanni binib n-yoonn mɔmɔk, ki kpa mbiin sakpen, ki ban aa bii Tidindaan aasan mu tok na. <sup>11</sup> Uwumbɔr ga daa aatafal, ki cha aa jɔb, kaan ki li waa, ki ti saa n-yoonn mu Uwumbɔr gee na.”

Libuul ngbaan ni le likpakpal bɔmbɔln biin unimbil pu, le u jɔb, ki chuun mann gonni ki ban unii u ga chuu unjaal ki dar u na. <sup>12</sup> Uninkpel ngbaan aah kan kina, ki bae Tidindaan aah bi pu na, le ni gar u pam. Le u gaa Yesu ki kii.

<sup>1</sup>13:1 : Baaliin ni, bi yin Unibɔmbɔn ke Niger.

**Poɔl aah moon Uwumbor  
aabɔr Antiok aatiŋ ni pu na**

<sup>13</sup> Poɔl mam nan nyan Pafos aatiŋ ni, le ki koo buŋɔb ni, ki ti puur, ki ti fuu kitin kibaa ni, bi yin ki ke Pega, ki bi Pamfilia aapepel ni la. Baah ti fuu nima na, le Jɔnn Mak gir buen Jerusalem ki cha bi. <sup>14</sup> Le bi nyan Pega aatiŋ ni, ki buen ti fuu Antiok aatiŋ ki bi Pisidia aapepel ni na. Juu yaab aakpaakool daal, le bi koo kal mmeen aadiik ni. <sup>15</sup> Le unii ubaa karn Uwumbor Aagbaŋ ponn ni. U karn Moses ni Uwumbor aabɔnabtiib aah nan ŋmee pu na. Waah karn doo na, le mmeen aadiik aaninkpiib tun unii bi chee, ke u ti tuk bi ke bi yaa ban bi tuk binib tibɔr ti ga poɔk bitaakpab na kan, bi tuk bi.

<sup>16</sup> Le Poɔl fii sil ki yoor uŋjaal ki len ke, “Israel yaab, ni nimi bi kaa ye Israel yaab ki pak Uwumbor na, li pel man: <sup>17</sup> Timi Israel yaab Aawumbor nan nyan tiyaajatiib. Bi nan ye bicham le Ijipt aatiŋ ni. Baah bi nima na, le Uwumbor ter bi, ki cha bi pɔr. Le Uwumbor nyan bi Ijipt aatiŋ ni, ki mɔk Ijipt aatiŋ aanib waapɔɔn sakpiin. <sup>18</sup> ɻibin imonko ilee le Uwumbor kpiin tiyaajatiib timoor ni, <sup>19</sup> le ki nin jenn nyan ɻinibol ɻilole Kanaann aatiŋ ni, ki di kitin ngbaan yakr ke lifaal na tii bi. Buyoonn bi nan koo Ijipt aatiŋ ni na, ki ti saa bundaln bi nan gaa Kanaann aatiŋ na, nan ye ɻibin ikui inaa ni piiŋmu la.

<sup>20</sup> “N-yoonn ngbaan le u tii bi bibɔjirb, bi li joo bi, ki ti saa waabɔnabr Samuel aayoonn. <sup>21</sup> N-yoonn ngbaan le bi len ke bi ban ubɔr, u li joo bi. Baah len kina na, le Uwumbor nyan Sɔɔl, u nan ye Kis aa-japɔɔn na, u li ye baabɔr. U nan ye Benjamin aanibol ponn ni aanii, ki nan joo bi ɻibin imonko ilee la. <sup>22</sup> Nee aapuwɔb le Uwumbor nyan u bi chee, ki di David ɻa baabɔr, ki len ke, ‘David u ye Jese aa-japɔɔn na bi maah gee pu na. U ga li ɻani

maah gee pu na mɔmɔk.’ <sup>23</sup> Tɔ, Uwumbor nan puu tipuur ke u ga tun unii Israel yaab chee, ke u gaa bi lii. Yesu le u tun ni u bi chee, ke u gaa bi lii. Uma le ye Ubɔr David aayaabil ubaa. <sup>24</sup> Jɔnn u nan muini binib nnyun ni na nan loln nsan ki fuu ni, le Yesu nin paan ni. Yesu aah kaa nan kee piin waatuln na, le Jɔnn tuk Israel yaab ke bi yaa kpeln baabim-bin kan, u ga muin bi nnyun ni. <sup>25</sup> Jɔnn aah kaa nan kee tun waatuln doo na, le u baa bi, ‘Ni dak ke m ye ɻma? Maa ye Kristo u ga gaa binib lii na. Uma le paan ni mpuwɔb. Maa ɻeer m chuu gbiln waanaataak aajmin.”

<sup>26</sup> Tɔ, Poɔl nan ki bui bi, “Nnaabitiiib, Abraham aayaabitiiib, ni binib bi kaa ye Juu yaab ki pak Uwumbor na, timi chee le Uwumbor nan tun ni tibɔnyaan ke u ga gaa timi lii. <sup>27</sup> Binib bi bi Jerusalem ni na, ni baaninkpiib aa nyi ke Yesu le ga gaa bi lii. Likpaakool mɔmɔk daal, bi karni Uwumbor Aagbaŋ ponn ni, Uwumbor aabɔnabtiib aah nan len pu na, kaa bee naataataa. Le bi jin Yesu tibɔr ki len ke waabor bii. Uwumbor aabɔnabtiib nan len ke bi ga ɻa kina. <sup>28</sup> Juu yaab nan mee Pailat nsan ke bi ku Yesu. Bi mu aa kan waataani ki ga ɻmaa len ke u ɻeer bi ku u. <sup>29</sup> Ni ɻmee Uwumbor Aagbaŋ ponn ni baah ga nan ɻa Yesu pu ki ku u na. Le bi nan ɻani naah ɻmee pu na mɔmɔk, le ki nyan u ndɔpuinkoo pu, ki di u sub kitakpaluj ni. <sup>30</sup> Le Uwumbor fikr u nkun ni. <sup>31</sup> Le u di ubaa mɔk binib bi nan dii u Galilee ki nan saa Jerusalem na. Le bi kan u iwiin pam. Dandana wee, bima le ye waaseeraadam, ki tuk Juu yaab waabɔr. <sup>32-33</sup> Timi le joo ni tibɔnyaan ngbaan nan tuk nimi. Uwumbor nan puu tipuur tii tiyaajatiib. Timi le ye tiyaajatiib aayaabitiiib. Waah puu tipuur ti tii tiyaajatiib na, u gbiin tipuur ngbaan dandana wee tii timi, ki fikr Yesu nkun ni. Uwumbor aalahn aagbaŋ ponn

ni, ḥiyil ḥilee, le Uwumbor len Yesu chee ke,

‘Sin le ye Maabo, din wee le m ma si.’<sup>8</sup>  
<sup>34-35</sup>To, Uwumbor ki bui ke:

‘M ga sil ḥa tinyoor ti bi chain na ḥa ni pu,  
ke maah puu tipuur tii Ubør David pu na.’<sup>\*\*</sup>

Uwumbor ki len kigbaŋ kibaa ponn ni:  
‘Maan cha maabo u ye chain na aawon bur.’<sup>††</sup>

To, Poɔl nan ki len ke, “Uwumbor aah len pu na, naatataa le ye ke u fikr Yesu nkun ni. Waan ki kpo. Waawon aan bur.  
<sup>36</sup>Ubør David aah nan bi na, u nan tun Uwumbor aatuln, le ki ti kpo. Le bi sub u uyaajatiib chee, le u bur.  
<sup>37</sup>Yesu u Uwumbor fikr u nkun ni na, uma aawon aa bur.  
<sup>38-39</sup>Tijotiib, ti tuk nimi ke Uwumbor ga di cha nimi aatunwanbir pinn nimi Yesu pu. Binib bimok gaa Yesu ki kii na, Uwumbor ga di cha pinn bi, ki nyan bi baatunwanbir ni. Moses aakaal aa ḥmaa di cha pinn binib, kaa ḥmaa nyan bi baatunwanbir ni. Ti ban ke ni li nyi tibor timina mbamɔm.  
<sup>40-41</sup>Uwumbor aabɔnabiib nan len ke Uwumbor len ke:

‘Mbɔnyundam, lik, m bi tun lituln libaa nimi aayoonn.

Unii yaa tuk nimi ke m tun lituln limina kan,

naan tii naadii la.

Cha ni gar nimi man, aan ki bee yɔli.’<sup>\*\*\*</sup>

To, Poɔl nan ki tuk bi, “Ni li nyi aan Uwumbor aabɔnabiib aah len pu na, ni taa ḥa nimi.”

<sup>42</sup>Poɔl aah len doo na, le u ni Banabas nyan ni mmeen aadiik ni. Baah nyan ni na, le binib bui bi ke likpaakool li choo

na daal bi ki gir ni, ki nan ki tuk bi tibor ngbaan.  
<sup>43</sup>Binib mɔmɔk aah nyan mmeen aadiik ni na, le Juu yaab, ni binib bi nan kpeln ki dii Juu yaab aasan na pam nan dii Poɔl ni Banabas. Le Poɔl ni Banabas len bi chee ki tuk bi ke Uwumbor aah san bi kinimbaak pu na, bi li beenin dii waasan.

<sup>44</sup>To, likpaakool li paan ni na daal, le binib bimok bi kitij ngbaan ni na nan kuun ni bi nan ḥjun Tidindaan aabor. Ubaabaa baanja le nan gur linampal.  
<sup>45</sup>Juu yaab aah kan kinipaak ngbaan kuun kina na, le bi kpa lipiipoln sakpen, ki kpak Poɔl kinikpakpak, ki seei u.  
<sup>46</sup>Le Poɔl ni Banabas kpa lipobil ki bui Juu yaab ngbaan, “Ni ḥjan ke ti puen tuk nimi Uwumbor aabor. Le ni yii, kaa kii, kaa dak ke ni ḥeer ni kan limɔfal li kaa kpa ndoon na. Kina pu na, ti ga di cha nimi, ki tuk binib bi kaa ye Juu yaab na Uwumbor aabor.  
<sup>47</sup>Uwumbor tuk timi waagbaŋ ponn ni ke ti ḥa kina. U nan len ke,

‘M nyan si la, ke aa woln binib bi kaa ye Juu yaab na aanimbil, ki tii dulnyaa wee ni aanib mɔmɔk nsan ke bi ḥjmar.’<sup>¶¶</sup>

<sup>48</sup>To, binib bi kaa ye Juu yaab na aah ḥjun baah len pu na, le bi kpa mpopiin sakpen, le ki bui ke Uwumbor aabor ḥjan sakpen a. Le binib bi Uwumbor nyan bi ke bi kan limɔfal li kaa kpa ndoon na gaa Yesu ki kii.

<sup>49</sup>Le Uwumbor aabor moon itingbaan mɔmɔk ni.  
<sup>50</sup>Le bipiib bi kpa mpɔɔn ki pak Uwumbor na bi kitij ngbaan ponn ni. Kitij ngbaan aaninkpiib mu nan bi. Le Juu yaab ḥa, ki cha bi ḥmaa tijar Poɔl ni Banabas pu, ki ḥa bi falaa, ki nyan

<sup>§13:32-33</sup> : Lik Ilahn 2.7.

<sup>\*\*13:34-35</sup> : Lik Aisaya 55.3.

<sup>††13:34-35</sup> : Lik Ilahn 16.10.

<sup>##13:40-41</sup> : Lik Habakuk 1.5.

<sup>¶¶13:47</sup> : Lik Aisaya 49.6.

bi baatiq ni. <sup>51</sup> Le Pœol ni Banabas kpaar bitaa aatatan lii nima, ni ye nsurm le ki tii bi, ki nyan ni nima, ki buen kitij kibaa ni, bi yin ki ke Ikonium. <sup>52</sup> Le Uwumbor Aafuur Nyaan gbiin binib bi gaa Yesu ki kii Antiok aatiq ni na. Le bi nan kpa mpopiin pam.

**Pœol mam aah buen  
Ikonium aatiq ni pu na**

**14** Pœol ni Banabas nan ti fuu Ikonium aatiq ni, ki koo mmeen aadiik ni, ki kpa mpcœn ki tuk binib Uwumbor aabør. Nima pu na, binib pam nan gaa Yesu ki kii, bi ye Juu yaab, ni bi kaa ye Juu yaab na mu. <sup>2</sup>Le Juu yaab bibaa yii Uwumbor aabør, ki bii Yesu aanib, ki cha binib bi kaa ye Juu yaab na bibaa gee lijuul bi pu. <sup>3</sup>Le Pœol ni Banabas nan bi nima ki yunn, ki nan kpa lipobil ki tuk binib Tidindaan aabør, ke u gee bi. Le Tidindaan cha bi tun lijinjiir aatun, ki mok ke baah len pu na, ti gbii. <sup>4</sup>Le kitij ngbaan aanib aa kpa kimbaan. Bibaa nan si Juu yaab aapuwob, biken mu si Yesu aakpambalb aapuwob.

<sup>5</sup> Le Juu yaab ni baaninkpiib, ni binib bi kaa ye Juu yaab na bibaa kpokl ke bi ga ja Yesu aakpambalb bakaa ki mae bi qitakpal. <sup>6</sup>Le Yesu aakpambalb qun baah ban bi ja bi pu na, ki san qmar, ki buen Listra aatiq ni, ni Debe aatiq ni, ni itingbaan i bi nima na. Listra aatiq, ni Debe aatiq momok bi Likonia aapepel ni la. <sup>7</sup>Le bi tuk nima chee aanib tibonyaan ngbaan.

**Baah mae Pœol qitakpal  
Listra aatiq ni pu na**

<sup>8</sup> Uja ubaa nan bi Listra aatiq ni, le utaafar faan. Una aah nan ma u na, u nan ye uwob la. Waa nan chuun. <sup>9</sup>U nan ka pel Pœol aah len pu na, le Pœol bee ke

u gaa Yesu ki kii, nima le u ga qjmaa tii u laafee. Le Pœol lik u sulm, <sup>10</sup>ki len mpœon pu, "Fii sil aataa pu." Le uja ngbaan fii yuk sil, le ki chuun gonn. <sup>11</sup>Le kinipaak ngbaan kan Pœol aah ja pu na. Le bi teen Likonia aatiq aanib aaliin ponn ni, "Qj-waa le kpalm binib ki dan ti chee do." <sup>12</sup>Le bi yin Banabas ke Seus. <sup>§§</sup> Pœol nan len tibor jer Banabas. Nima pu le bi yin u ke Hemes. <sup>\*</sup> <sup>13</sup>Liwaal Seus aadichal nan bi kitij ngbaan aagoln aabisamob chee la. Le unii u toor kitork tii liwaal ngbaan na joo ni inaaja ni nsupuun ki di dan kitij ngbaan aagoln aabisamob chee. U ni kinipaak ngbaan nan ban ke bi toor kitork tii Uwumbor aakpambalb Banabas ni Pœol la.

<sup>14</sup> Le Banabas ni Pœol qun baah ban bi ja pu na. Baah qun kina na, le bi chuu kar baabokur, le ki san koo kinipaak ngbaan aakaasisik ni, ki tar ke, <sup>15</sup>"Njotiib, ba pu ni qjani kina? Ti po ye binibom ke naah ye pu na la. Ti dan ti nan tuk nimi tibonyaan la. Di cha man, ki taa ki dili qjwaa man. Qj ye fam la. Ni li dili Uwumbor u fu na. Uma le nan naan paacham ni kitij, ni nnyusakpem, ni tiwan momok. <sup>16</sup>N-yaayoonn na, u nan cha qjinibol momok qjani baah gee pu na. <sup>17</sup>N-yoonn momok u mu qjani nimi tijann, ki tii nimi utaal, ki cha tijikaar qjani, ki kpiini nimi, ki cha ni kpa mpopiin, u mok nimi ke u bi." <sup>18</sup>Le Pœol ni Banabas len kina ki pooni bibaa ke bi taa cha kinipaak ngbaan toor kitork ngbaan tii bi, le baa ki toor ki tii bi.

<sup>19</sup> Le Juu yaab bibaa nyan ni Antiok aatiq ni, ni Ikonium aatiq ni, ki dan Listra aatiq ni, bi nan bii Pœol ni Banabas ki cha binib gee lijuul bi pu. Le bi mae Pœol qitakpal, ki dar fuul u nyan kitij ni, ki ti di bil, ki dak ke u kpo, le ki siir cha u. <sup>20</sup>Le Yesu aadidiliib dan nan sil gob

<sup>§§</sup>14:12 : Seus nan ye liwaal sakpeln libaa la.

\*14:12 : Hemes nan ye liwaal li bi bui ke li len tibor sakpen na la.

u. Baah sil gob u na, le u fii sil, ki labr buen kitij ngbaan ni.

### Poɔ̄l mam aah labr buen Antiok aatij ni pu na

Kitaak aah woln na, le Poɔ̄l ni Banabas siir buen Debe aatij ni,<sup>21</sup> ki ti tuk nima chee aanib tibonyaan ngbaan. Le binib pam gaa ti, ki dii Yesu aasan. Le Poɔ̄l ni Banabas nyan nima ki ki labr buen Listra aatij ni, ni Ikonium aatij ni, ni Antiok aatij ki bi Pisidia aapepel ni na.<sup>22</sup> Baah dii ntim ngbaan ni na, le bi poɔ̄k Yesu aanib aatakpab, ki toor tuk bi Uwumbor aabor, le ki tuk bi ke bi sil Yesu aachaŋ ni, ke binib yaa ban bi koo Uwumbor aanaan ni kan, bi ga ji falaa sakpen le ki nin koo ni.<sup>23</sup> Ntim mɔ̄mok ni, bi nan leer Yesu aanib ponn ni bininkpiib ke bi li joo bi, le ki lul bumob, ki mee Uwumbor tii bi. Baah gaa Tidindaan ki kii na, le bi di bi ja ujaal ponn ni, ke u li lik bi.

<sup>24</sup> Le bi bɔ̄ dii Pisidia aatim ponn ni, ki ti ki fuu Pamfilia aapepel ni,<sup>25</sup> le ki ti fuu Pega aatij ni, ki tuk binib Yesu aabor, le ki buen Atalia aatij ni.<sup>26</sup> Baah ti fuu nima na, le bi koo bujobj ni, ki puur nnyusakpem ki gir buen Antiok aatij ni, kitij ki bi nan nyan ni ki ni na. Baah nan ban bi nyan kitij ngbaan ponn ni na, Yesu aanib nan mee Uwumbor tii bi, ki di bi ja ujaal ni, ke u ter bi waatuln ponn ni. Baah ti tun lituln ngbaan doo na, le bi ki gir ni nima.

<sup>27</sup> Baah fuu ni na, le bi yin Yesu aanib ke bi kuun ni, le ki tuk bi tiwan nimok Uwumbor cha bi ja na, ki tuk bi waah ja pu ki tii binib bi kaa ye Juu yaab na nsan ke bi gaa Yesu ki kii na.<sup>28</sup> Poɔ̄l ni Banabas nan ti bi nima, Yesu aadidiliib chee, ki yunn.

### Baah kuun Jerusalem ponn ni pu na

**15** Tɔ̄, bijab bibaa nan nyan ni Judea aatij ni, ki dan Antiok aatij ni, le ki nan tuk Yesu aanib ke bi yaa kaa

gii njichakpan, Moses aakaal aah mɔ̄k pu na kan, baan jmar.<sup>2</sup> Le bijab ngbaan kpak Banabas ni Poɔ̄l kinikpak-pak sakpen tibor ngbaan pu. Nima pu na, bi mɔ̄mok nan kii ke bi ga tun Poɔ̄l ni Banabas ni binib bibaa aan bi buen Jerusalem, ki ti baa Yesu aakpambalb ni Yesu aanib aaninkpiib bi bi nima na, ki lik.

<sup>3</sup> Yesu aanib nan ter bi, le bi gor ki buen. Baah cha na, le bi bɔ̄ dii Fonia aatim ni, ni Samaria aatim ni, ke bi ti mann Yesu aanib, ki tuk bi ke binib bi kaa ye Juu yaab na mu gaa Yesu ki kii. Le ni tii bi mɔ̄mok mpopiin sakpen.<sup>4</sup> Le Poɔ̄l ni Banabas ti fuu Jerusalem. Baah ti fuu nima na, le Yesu aanib ni baaninkpiib ni Yesu aakpambalb doon bi ni mpopiin. Le Poɔ̄l ni Banabas tuk bi tiwan nimok Uwumbor cha bi ja na, ki tuk bi waah ter bi pu na.<sup>5</sup> Le Farisii yaab bibaa, bi dii Yesu na, fii sil, le ki len ke binib bi kaa ye Juu yaab na yaa dii Yesu kan, ni jan ke bi gii njichakpan, ki kii Moses aakaal.

<sup>6</sup> Le Yesu aakpambalb ni Yesu aanib aaninkpiib kuun tɔ̄b chee, ke bi kpokl tibor ngbaan.<sup>7</sup> Baah kpokl ki ti yunn na, le Piita fii sil ki bui ke, "Nnaabitii, ni nyi ke n-yoonn mu jer na Uwumbor nan lee mi ni ponn ni, ke m buen binib bi kaa ye Juu yaab na chee, ki ti tuk bi tibonyaan ngbaan, aan bi jyun ki gaa Yesu ki kii.<sup>8</sup> Uwumbor u nyi binib mɔ̄mok aasui ni aah bi pu na nan di Waafuur Nyaan tii binib bi kaa ye Juu yaab na, ke waah tii timi pu na.<sup>9</sup> Waah ja kina na, u mɔ̄k ke u pak binib bi kaa ye Juu yaab na mu. Waa yagr timi. U po dak ke binib mɔ̄mok ye tiwanbaan la. Baah gaa u ki kii na, le u finn bisui ni titunwanbir.<sup>10</sup> Nima pu na, ba pu ni muk bi, ki tɔ̄jni Uwumbor? Timi ni tiyajatiib aah nan ban ti dii Moses aakaal na, ni nan poɔ̄ ti chee. Taa jmaa dii. Ni bi ke lituln li nyuun na la. Ba pu ni ban ke Yesu aadidiliib ngbaan dii kina?<sup>11</sup> Binib

bi kaa ye Juu yaab na yaa gaa Tidindaan Yesu ki kii kan, waanimbaasaln pu le u ga gaa bi lii. Kina le u ga gaa ti mu lii.”

<sup>12</sup> Piita aah len kina na, le bi mɔmɔk ɲmin, ki pel Banabas ni Pɔɔl aah len pu na. Le bi tuk bi Uwumbɔr aah ɲa pu ki cha bi tun lijinjiir aatun binib bi kaa ye Juu yaab na aakaasisik ni na. <sup>13</sup> Banabas ni Pɔɔl aah len ti doo na, le Jems bui ke, “Nnaabitiiib, li pel man. <sup>14</sup> Dandana wee, Simonn Piita tuk timi Uwumbɔr aah ɲa pu njan na, ki mɔk ke utafal bi binib bi kaa ye Juu yaab na ni, ki lee bi ponn ni binib bibaa, ke bi li ye waanib. <sup>15</sup> Uwumbɔr aabɔnabiib nan len ke u ga ɲa kina. Ni ɲmee Uwumbɔr Aagbaŋ ponn ni ke

<sup>16</sup> ‘Uwumbɔr len ke: Ubɔr David aanaan aah lir na,

m ga gir ni aan ki nan fiin waanaan ngbaan.

M ga ɲa mu nnaanpɔm, ki cha mu sil mbamɔm.

<sup>17</sup> Nima pu na, binib bi gur na ga li ban min Uwumbɔr.

ɻinibol ɲimok ye maanib na ga li ban mi.

<sup>18</sup> Uwumbɔr le len kina.

N-yaayoonn na ki joo cha,  
u nan tuk binib tibɔr timina.”<sup>†</sup>

<sup>19</sup> Jems nan ki bui ke, “M dak ke ti taa ki muk binib bi kaa ye Juu yaab ki kpeln baabimbin ki dii Uwumbɔr aasan na. <sup>20</sup> Cha ti ɲmee kigbaŋ tii bi, ki tuk bi ke bi taa ki ɲmɔ kitork aanann, ki taa ki gɔr kidagook, ki taa ki ɲmɔ tiwan ni bi tab ku ni na, ki taa ki ɲmɔ nsin.

<sup>21</sup> Tiyaajatiib yoonn ki di nan saa din, bi tuk binib Moses aakaal ntim mɔmɔk ponn ni. Likpaakool daal mɔmɔk bi po karni Moses aakaal mmeen aadir ni.”

### Baah ɲmee kigbaŋ ngbaan pu na

<sup>22</sup> Jems aah len ti doo na, le Yesu aakpambalb, ni Yesu aanib mɔmɔk, ni baaninkpiib kpokl ke bi ga nya bi ponn

ni bijab bibaa, ki di kpee Pɔɔl ni Banabas pu, ki tun bi Antiok aatiŋ ni, bi ti di kigbaŋ ngbaan tii bi. Le bi nyan bijab bilee. Bi yin ubaa ke Judas Basabas, ki yin uken ke Sailas. Bijab bilee ngbaan nan ye biyidam le Yesu aanib ponn ni. <sup>23</sup> Le bi ɲmee kigbaŋ ki di tun bi, bi di buen ti tii binib bi kaa ye Juu yaab na. Bi ɲmee ke:

“Tinaabitiib bi kaa ye Juu yaab ki bi Antiok aatiŋ ni, ni Siria aatiŋ ni, ni Silisia aatiŋ ni na, ti dooni nimi. Timi Yesu aakpambalb, ni Yesu aanib aaminkpiib dooni nimi.

<sup>24</sup> Ti ɲun ke bijab bibaa nyan ti ponn ni, ki dan ni chee, ki ti tuk nimi tibɔr ti muk nimi ki ɲa nimi ilandak na. Taa nan tuk bi ke bi tuk nimi kina. <sup>25</sup> Nima pu na, ti kuun tɔb ki kpaan kimɔbaan, ki nyan ti ponn ni bijab bilee, ke ti tun ni bi ni chee. Bi ni tijɔtiib Banabas ni Pɔɔl, bi ti gee bi na, le ti ga tun ni bi ni chee.

<sup>26</sup> Banabas ni Pɔɔl nan di baamɔfal paan talmaa Tidindaan Yesu Kristo pu. <sup>27</sup> Bijab bi ti nyan bi na le ye Judas ni Sailas. Bi mu ga tuk nimi tibɔr ngbaan aah ɲmee pu na. <sup>28</sup> Ti ni Uwumbɔr Aafuur Nyaan kpaan kimɔbaan, kaa ban ti di nkaal mu pɔɔ na kpee nimi. <sup>29</sup> Ni ɲan ke ni taa ki ɲmɔ kitork aanann, ki taa ki ɲmɔ nsin, ki taa ki ɲmɔ tiwan ni bi tab ku ni na, ki taa ki gɔr kidagook. Ni yaa kii kina kan, nima le ɲan. Uwumbɔr ter nimi.”

<sup>30</sup> Le bi di kigbaŋ ngbaan tii Banabas mam, ke bi di buen Antiok aatiŋ ni. Baah ti fuu nima na, bi nan kuun ni Yesu aanib mɔmɔk, ki di kigbaŋ ngbaan tii bi. <sup>31</sup> Baah karn kigbaŋ ngbaan ponn ni na, le ni ɲa bi mpopiin. Ni nan ye tibɔr ti pɔɔk bitaakpab na la. <sup>32</sup> Le Judas ni Sailas, bi ye Uwumbɔr aabɔnabiib na, tuk bi Uwumbɔr aabɔr pam ki pɔɔk

<sup>†</sup>15:18 : Lik Amos 9.11-12.

bitaakpab, ki ter bi, bi li dii mbamɔm. <sup>33</sup> Bi nan yunn nima siib. Baah nan yunn nima siib na, le bi Choi bi, ki gir buen Yesu aakpambalb chee. <sup>[34]</sup> Sailas ma nan gaar Antiok aatiŋ ni.]

<sup>35</sup> Pɔɔl ni Banabas nan ti bi Antiok aatiŋ ni, ni yunn siib. Le bi ni binib pam tuk binib Tidindaan aabɔnyaan, ki mɔk bi baah ga dii u mbamɔm pu na.

### Pɔɔl ni Banabas aah yakr tɔb chee pu na

<sup>36</sup> Naah yunn siib na, le Pɔɔl bui Banabas, "Cha ti gir buen taah nan tuk binib Tidindaan aabor ntim mu mɔmɔk ni na, ki ti mann Yesu aanib ki lik ke bi joo Yesu aabor kinye?" <sup>37</sup> Le Banabas ban ke Jɔnn Mak dii bi. <sup>38</sup> Le Pɔɔl aa kii; ba pu? baah nan bi Pamfilia aatiŋ ni na, Jɔnn Mak nan labr kun ki cha bi, kaa ki ter bi lituln na ponn ni. Nima pu na, Pɔɔl aa nan kii ke u ki dii bi. <sup>39</sup> Le Pɔɔl ni Banabas kpak kinikpakpak ki yakr tɔb chee, kaa ki dii tɔb. Le Banabas ni Jɔnn Mak koo buŋɔb ni, ki buen lidikl libaa pu, bi yin li ke Saiprus. <sup>40</sup> Le Pɔɔl nyan Sailas ke u dii u. Le Yesu aanib mee Uwumbɔr tii bi, ki di bi ja Uwumbɔr aanjaal ni, u ter bi. Le bi buen, <sup>41</sup> ki bɔ dii Siria aatim ni, ni Silisia aatim ni, ki pɔɔk Yesu aanib aatakpab, ki toor tuk bi Uwumbɔr aaliin.

### Timoti aah dii Pɔɔl ni Sailas pu na

**16** Pɔɔl mam nan ti fuu Debe aatiŋ ni, ni Listra aatiŋ ni. Le Yesu aadiir ubaa nan bi nima. Bi yin u ke Timoti. Una nan ye Juu yaab aabo la, ki mu gaa Yesu ki kii. Ute nan ye Griik aani la. <sup>2</sup> Yesu aanib bimɔk bi Listra aatiŋ ni, ni Ikonium aatiŋ ni na mɔmɔk nan pak Timoti. <sup>3</sup> Le Pɔɔl ban ke Timoti li dii u. Juu yaab bimɔk bi nima na nan nyi ke Timoti aate ye Griik aani la. Nima pu na, Pɔɔl nan gii Timoti aachakpaln ke Juu yaab aah geei pu na, le ki cha u dii

bi. <sup>4</sup> Le bi bɔ dii ntim ngbaan ponn ni, ki mann Yesu aanib. Pɔɔl mam aah nan bi Jerusalem ni na, le Yesu aakpambalb, ni Yesu aanib aaninkpiib bi nan bi nima na nan kpokl, binib bi kaa ye Juu yaab ki dii Yesu na aah ga ja pu na. Le Pɔɔl tuk bi baah nan kpokl ki len pu na, ke bi kii kina. <sup>5</sup> Nima pu na, Yesu aanib aatakpab nan pɔɔk waasan ni. Idaa mɔmɔk le binib biken mu gaal u ki kii, ki kpae waanib pu.

### Pɔɔl aah daŋ tidaŋ Troas aatiŋ ni pu na

<sup>6</sup> Uwumbɔr Aafuur Nyaan aa nan kii ke Pɔɔl mam buen Asia aatiŋ ni ki ti tuk binib Yesu aabor. Le bi bɔ dii Frijia aatim ni, ni Galasia aatim ni, <sup>7</sup> ki ti fuu Misia aatiŋ mɔk, ki ban bi buen Bitinia aatim ni. Le Yesu Aafuur Nyaan aa kii. <sup>8</sup> Le bi bɔ dii Misia aatim ni, ki ti fuu Troas aatiŋ ni. <sup>9</sup> Kinyeek ngbaan le Pɔɔl daŋ tidaŋ ki kan Masedonia aatiŋ aanii ubaa si u chee ki gaŋni u ke u dan Masedonia aatim ni ki nan ter bi. <sup>10</sup> Pɔɔl aah daŋ tidaŋ ngbaan kina na, le min Luk ni Pɔɔl mam gor ke ti buen Masedonia aatim ni. Ti nan bee ke Uwumbɔr le yin timi ke ti buen ki ti tuk kitij ngbaan aanib tibɔnyaan na.

### Upii Lidia aah gaa Yesu ki kii pu na

<sup>11</sup> Ti nan koo buŋɔb, Troas aatiŋ ni, ki puur nnyusakpem na ki ti jer lidikl libaa, bi yin li ke Samotres. Naah woln kitaak na, le ti fuu Neapolis aatiŋ ni. <sup>12</sup> Le ti nyan buŋɔb ni, ki chuun kitij ki ti fuu Filipi aatiŋ ni. Ki ye Masedonia aatiŋ kibaa, ki ye kitisakpeŋ. Rom yaab nan bi nima, ki joo kitij ngbaan. Ti nan bi kitij ngbaan ponn ni, ki pii iwiin ilee. <sup>13</sup> Juu yaab aakpaakool daal, le ti nyan kitij ngbaan ponn ni, ki buen limɔɔl aagbaan. Ti nan dak ke likpaakool daal mɔmɔk Juu yaab kuuni nima ke bi mee Uwumbɔr. Le ti kan bipiib kuun nima. Le ti kal ki tuk bi Uwumbɔr aaliin. <sup>14</sup> Upii ubaa

nan bi nima ki ḷun taah len pu na. Bi nan yin u ke Lidia. U nan ye Tiataira aatiq aapii la, ki chuun kooh ḷitanyaan aakeken ḷi kpa kidaak na. U nan ye upii u pak Uwumbor na la. Le Tidindaan piir usui ke u pel mbamom, ki gaa P̄oɔl aah len pu na.<sup>15</sup> Le bi muin u ni waachiln ni aanib nnyun ni. Le u tuk timi, “Ni yaa dak ke m sil gaa Tidindaan ki kii kan, ni dan nan mann mi, ki li bi ndo.” Le u gaŋ timi, le ti buen.

### Baah di P̄oɔl mam ḷa kiyondiik ni pu na

<sup>16</sup> Ti nan ki buen baah mee Uwumbor nin chee na. Taah cha na, le usapoɔɔn ubaa ton timi nsan ni. U nan ye unaagbiibo la. Bininkpiib nan dii u, ki cha u tuk binib tiwan ni choo ki ga nan ḷa na aabɔr. Waah ḷani kina na, le u kan ḷimombil pam ki tii udindatiib.  
<sup>17</sup> Le u paan ni ti ni P̄oɔl aapuwɔb, ki tar ke, “Bijab bimina le ye Uwumbor u kaa kpa ḷeen aato na aanaagbiibo. Bi tuk nimi naah ga ḷa pu ki ḷmar na.”  
<sup>18</sup> Usapoɔɔn ngbaan nan ḷani kina iwiin momɔk. Waah ḷani kina na, le P̄oɔl gee lijuul, ki fenn lik u, ki tuk bininkpiib bi dii u na, “M tuk nimi Yesu Kristo aayimbiil pu, nya u ni man.” Libuul ngbaan ni le bininkpiib ngbaan nyan u ni.<sup>19</sup> Tɔ, bininkpiib ngbaan aah nyan u ni na, le udindatiib gee lijuul. Bi bee ke waan ki kan ḷimombil tii bi. Le bi chuu P̄oɔl ni Sailas ki dar bi mpɔɔn, ki di buen kitiq ngbaan aabɔjirb aanimbiin ni,<sup>20</sup> ki ti len ke, “Bijab bimina ye Juu yaab, ki muk do aanib,”<sup>21</sup> ki tuk bi nkaal mubaa. Taah ye Rom yaab na, naa ḷan ke ti gaa nkaal mue ki dii mu.”<sup>22</sup> Baah len kina na, le kinipaak ngbaan mu gee lijuul P̄oɔl ni Sailas pu.

Le bibɔjirb ngbaan chuu peer baawan, ki tuk baatutum ke bi di ḷidabil gbaa bi.<sup>23</sup> Le bi gbaa bi pam, ki tur bi ti ḷa kiyondiik ni, ki tuk kiyondiik aaninkpel

ke u li kii bi mbamom.<sup>24</sup> Baah tuk u kina na, le u tur bi ḷa ponn ni aadiik ni, kiyondiik ni, ki baa bi ḷiba.

<sup>25</sup> Kinyetaasiik le P̄oɔl ni Sailas bi mee Uwumbor, ki gaa ilahn ki pak u. Le binaagbiib biken ka pel.<sup>26</sup> Libuul ngbaan ni le kitiq deŋ sakpen, ki cha kiyondiik aadinyikl mu deŋ. Libuul ngbaan ni le kiyondiik aajaalej mam momɔk chuu piir. Le binaagbiib momɔk aakululn chuu gbiln lir.<sup>27</sup> Le kiyondiik aaninkpel finn, ki kan ke jaalej mam momɔk piir a. U nan dak ke binaagbiib momɔk nyan a. Le u voor waajaak aajuk ke u ku ubaa.<sup>28</sup> Le P̄oɔl teen ke, “Taa ku aabaa. Ti momɔk bi do.”

<sup>29</sup> Le kiyondiik aaninkpel teen ke, “Li joo ni karyaa,” ki san koo ni, le ki nan gbaan P̄oɔl ni Sailas aanimbiin ni, le uwon gbaa.<sup>30</sup> Le u nyan bi lipaal, ki baa bi, “Ndindatiib, m ga ḷa kinye aan ki ḷmar?”

<sup>31</sup> Le bi bui u, “Aa yaa gaa Tidindaan Yesu ki kii kan, aa ga ḷmar, le saachiln ponn ni aanib mu ga ḷmar.”<sup>32</sup> Le bi tuk u ni waachiln ni aanib momɔk Tidindaan aabɔr.<sup>33</sup> N-yoonn ngbaan le u di nnyun char baabuun ngbaan, baah fe gbaa laki bi pu na. Le bi muin u ni waachiln ni aanib momɔk nnyun ni.<sup>34</sup> Le u di P̄oɔl ni Sailas buen waadichal ni, ki ti tii bi tijikaar ke bi ji. U ni waachiln ni aanib aah nan gaa Uwumbor ki kii na, ni ḷa bi mpopiin pam.

<sup>35</sup> Naah woln kitaak na, le bibɔjirb ngbaan tun baatutum ke bi buen ti tuk kiyondiik ni aaninkpel ke u di bijab na lii aan bi li cha.

<sup>36</sup> Le kiyondiik aaninkpel tuk P̄oɔl, “Bibɔjirb ngbaan len ke m di aa ni Sailas lii, ni li cha. Ni nya suuna ki li cha.”

<sup>37</sup> Le P̄oɔl aa kii kina. U nan bui bitutum ngbaan, “Bibɔjirb ngbaan aah ḷa pu na, naa ḷan. Timi tibaa mu po ye Rom yaab la. Baa jin timi tibɔr, kaa kan timi ataani, le ki gbaa timi binib aanimbil

ni, ki di timi laj kiyondiik ni. Baah ḥa timi Rom yaab kina na, naa ḥan. Dandan wee, bi ban ke ti li cha, ubaa taa li nyi. Taan kii kina. Cha bibojirb ngbaan bibaa dan nan nyan timi.”

<sup>38</sup> Le bitutum ngbaan buen ti tuk bibojirb ngbaan P̄oɔl aah len pu na. Baah ḥun ke P̄oɔl ni Sailas ye Rom yaab na, le ijawaan chuu bi. <sup>39</sup> Le bi buen P̄oɔl ni Sailas chee ki ti sɔŋ bisui, ki nyan bi kiyondiik ni, le ki gaŋ bi ke bi nya kitij ngbaan ni. <sup>40</sup> Le P̄oɔl ni Sailas siir nima chee, ki buen Lidia aadichal ni, ki ti doon Yesu aanib, ki len bi chee ki p̄oɔk bitaak-pab, le ki nin siir nima.

### Binib aah ḥjma tijar Tesalonika aatiŋ ni pu na

**17** Baah siir nima na, le bi bɔ̄ dii Amfipolis aatiŋ ni, ni Apolonia aatiŋ ni, le ki ti fuu Tesalonika aatiŋ ni. Juu yaab aameen aadiik nan bi nima. <sup>2</sup> Le P̄oɔl ti koo mmeen aadiik ngbaan ni, waah ti ḥjani pu ḥjikpaakoo mɔmɔk na. U nan di ḥjikpaakoo ḥjita le tuk bi Uwumbor Aagbaŋ aah len pu na aatataa, <sup>3</sup> ki mɔk bi ke ni ye Kristo u gaa binib lii na aabɔr, ke Uwumbor Aagbaŋ len ke see Kristo na jin falaa, ki kpo, ki fikr nkun ni, le ki len ke waah tuk bi Yesu u aabɔr na, uma le ye Kristo ngbaan. <sup>4</sup> Le Juu yaab bibaa, ni Griik yaab bi pak Uwumbor na ponn ni pam, ni bipoɔib bi ye mpoɔondam na kii tii P̄oɔl aah len pu na, ki kpaan u ni Sailas chee.

<sup>5</sup> Le Juu yaab bi kaa kii tii u na nan kpa lipiopoln u pu, ki kuun ni binib bi kaa ḥan, kaa bi tibɔr tibaa ni na, ki cha kitij ngbaan aanib mɔmɔk gee lijuul, ki kpa kifuuk, ki ḥjma tijar, le ki buen uja u bi yin u ke Jasonn na do, ki ban bi koo ni. Le waa kii. Le bi koo mpoɔon, ki ti bi ban P̄oɔl ni Sailas, ke bi nyan bi buen kinipaak ngbaan chee, <sup>6</sup> le kaa kan bi. Baah kaa kan bi na, le bi chuu Jasonn ni Yesu aanib bibaa mpoɔon, ki di buen ki-

tin ngbaan aaninkpiib chee, le ki ti teen ke, “P̄oɔl mam bi muk binib ntim mɔmɔk ponn ni na dan do mu,” <sup>7</sup> le Jasonn cha bi bi udo. Bi bii Ubɔrkpaan Siisa aakaal mɔmɔk ki len ke ubɔr uken bi, bi yin u ke Yesu.” <sup>8</sup> Juu yaab aah len kina na, le kinipaak, ni kitij ngbaan aaninkpiib gee lijuul P̄oɔl ni Sailas pu. <sup>9</sup> Le bi cha Jasonn mam pan ḥjimombil ke bi di bi lii. Le bi pan, le bi di bi lii.

### Berea aatiŋ aanib aah gaa Yesu aabɔr pu na

<sup>10</sup> Kinyeek ngbaan le Yesu aanib cha P̄oɔl ni Sailas siir buen Berea aatiŋ ni. Baah ti fuu na, le bi buen Juu yaab aameen aadiik ni. <sup>11</sup> Le binib bi bi nima na pel P̄oɔl aah len pu na. Binib ngbaan ye binib ki jer Tesalonika aatiŋ ni yaab. Le binimbil man P̄oɔl aah len pu na pu. Idaa mɔmɔk bi nan kpar Uwumbor Aagbaŋ ponn ni, ki karni ke bi lik ke ti gbii aan taa gbii. <sup>12</sup> Nima pu na, bi ponn ni pam nan gaa Yesu ki kii. Griik yaab bi nan ye bininyuum na, bijab ni bipoɔib, mu gaa u ki kii ki wiir. <sup>13</sup> Le Juu yaab bi bi Tesalonika aatiŋ ni na ḥun ke P̄oɔl bi Berea aatiŋ ni ki bi tuk binib Uwumbor aabɔr. Le bi mu buen nima ki ti cha kinipaak na ḥjma tijar P̄oɔl pu. <sup>14</sup> Libuul ngbaan ni, le Yesu aanib cha P̄oɔl siir buen ki dii nsan mu cha nnyusakpem aagbaan na. Sailas ni Timoti ma nan bee Berea aatiŋ ni. <sup>15</sup> Le Yesu aanib bi cheen P̄oɔl na nan cheen u ti saa Atens aatiŋ ni. Le P̄oɔl tuk bi ke bi ti tuk Sailas ni Timoti ke bi chuun mala ki dan u chee. Waah tuk bi kina na, le binib bi cheen u na gir buen Berea aatiŋ ni.

### P̄oɔl aah moon Yesu aabɔr Atens aatiŋ ni pu na

<sup>16</sup> Le P̄oɔl ti bi Atens aatiŋ ni, ki ka kii Sailas ni Timoti. Waah bi nima na, le u kan ḥjiwaa pam kitij ngbaan ponn ni. Le ni bii usui sakpen. <sup>17</sup> Likpaakool daal le

u koo mmeen aadiik ni, ki tuk Juu yaab, ni binib bi pak Uwumbor na Yesu aabor. Le bi gbaa təb chee tibor ngbaan. Idaa məmək u nan chaa kinyaj ni, ki ti tuk binib bi bi nima na Yesu aabor. Le u ni bi gbaa təb chee tibor ngbaan.<sup>18</sup> Binib bibaa mu nan bi kitij ngbaan ponn ni. Bi yin bibaa ke Epikurus<sup>‡</sup> aanib, ki yin bibaa mu ke Stoik<sup>¶</sup> aanib. Baah ɻun Pɔɔl aah len pu na, le bibaa baa təb, “Ulam-bidaan ngbaan len kinye?”

Le bibaa mu bui ke bi dak ke u len ɻi-waa yayan ɻibaa aabor la. Pɔɔl ma nan bi len Yesu aabɔnyaan, ke u fikr nkun ni.<sup>19</sup> Bi nan yin kitij ngbaan aaninkpiib ke Areopagus<sup>§</sup> aanib. Le bi di Pɔɔl buen bininkpiib ngbaan chee, le ki ti bui u ke waah tuk binib tibɔchann ti na, bi ban ke u tuk bi mu, bi bee,<sup>20</sup> ke waah len pu na, ni gar bi, bi ban ke u tuk bi mu taatataa.<sup>21</sup> Atens aatiij aanib, ni bicham bi nan bi nima na, nan gee ke bi li kuun ni ki gbaa təb chee tibɔchann n-yoonn məmək. Nima pu le bi ban bi ɻun Pɔɔl yaar mu.

<sup>22</sup> Le Pɔɔl sil bikaasisik ni, ki len ke, “Atens aatiij aanib, m bee ke nitafal bi ɻi-waa aabor ni pam.<sup>23</sup> M chuun nimi aatiij ponn ni ki kan naah dooni ɻi-waa pu na, le ki kan bi nan ɻymee ɻymeen naah toor kitork nin chee na. Bi ɻymee ke, ‘Taah kaa nyi Uwumbor u na.’ Ni dooni Uwumbor, ki mu aa nyi u. Waabor le m ban m tuk nimi dandana wee.<sup>24</sup> Uwumbor nan naan dulnyaa wee, ni tiwan nimok bi ni ponn ni na. Uma le ye paacham ni taab Aadindaan. Waa bi li-waal aadiik ni.<sup>25</sup> Uma ubaa le tii binib məmək limɔfal, ni libuln li ti fuur na, ni

tiwan məmək. Waah ban pu na, u kpa. Unii yaa tun lituln tii uma Uwumbor kan, naa kpa Uwumbor nibaa.<sup>26</sup> Njan u nan naan uja ubaa, uma le ye ɻinibol məmək aayaaja. Uma Uwumbor le cha ɻinibol məmək bi dulnyaa wee məmək ponn ni. U nan siin n-yoonn mu binib məmək ga li bi na, ki siin nin chee bi məmək ga li bi na.<sup>27</sup> Waah nan naan binib na, u ban ke bi li ban u. U dak ke nibaakan bi ga baa ki ban u, ki kan u. Waa daa unii ubaa chee. U po mal timi la.<sup>28</sup> Uma pu le ti fu, ki chuun, ki bi. N-yaayoonn na, nimi aalankpalb bibaa nan len ke,

‘Ti ye Uwumbor aabim la.’

Baah len pu na, ti gbii.<sup>29</sup> Taah ye Uwumbor aabim na, taa cha ti li dak ke Uwumbor aabimbin bi ke ɻiwaan na. ɻiwaan po ye ɻitakpal le bi kpii ɻi, bee salmaa, bee tikunabr le bi di mɔɔ ɻi.<sup>30</sup> Binib aah kaa nan kee nyi Uwumbor aasan buyoonn na, waa nan gar baah ɻani pu na. Dandana wee le u len ke u ban ke binib bimək bi dulnyaa wee məmək ponn ni na kpeln baabimbin ki dii waasan.<sup>31</sup> Ba pu? u siin nwiin bundaln u ga ji binib məmək tibor na, ki ti saa baah ɻa ki neer pu na. U nyan uja u ga ji binib tibor na. U nan fikr uja ngbaan nkun ni, nima le ye limɔkl tii binib məmək.”

<sup>32</sup> Binib ngbaan aah ɻun Pɔɔl len ke Uwumbor fikr unii nkun ni na, le bibaa ɻani u mbɔnyun. Le bibaa mu len ke bi ban bi ki ɻun tibor ngbaan.<sup>33</sup> Le Pɔɔl siir nima ki buen.<sup>34</sup> Le bijab bibaa gaa Yesu ki kii, ki kpaan Pɔɔl chee. Bi yin ubaa ke Dionisius, u nan ye Areopagus aanii ubaa na. Uken mu nan ye upii u bi yin u

<sup>\*17:18</sup> : Epikurus yaab nan ye binib bi dii Griik aalandaan ubaa aamɔkm na la. Uma le nan mɔk ke mpopiin ye limɔfal aawanyaan kpaan la.

<sup>†17:18</sup> : Stoik aanib nan dii Griik yaab aalandaan u nan bi n-yaayoonn na aamɔkm na la. U nan mɔk ke aa yaa ban mpopiin kan, aatafal taa li bi mmɔɔn, ni iween ni.

<sup>§17:19</sup> : Areopagus ye ligongoln libaa, le ki bi Atens aatiij ni. Nima chee le kitij ngbaan ni aaninkpiib nan kaa ki ɻani baakuun. Kina pu na, bi nan yin bininkpiib ngbaan ke Areopagus aanib la.

ke Damaris na. Binib biken mu nan gaa  
Yesu ki kii.

**Pool aah moon Yesu aabor  
Korint aatij ni pu na**

**18** Pool nan siir Atens aatij ni, ki di  
buen Korint aatij ni. <sup>2</sup> Waah bi  
nima na, le u kan Juu yaab aaja ubaa,  
bi yin u ke Akuila. Bi nan ma u Pon-  
tus aatij ni la. Bi yin upuu ke Prisila. Bi  
nan bi Itali aatisakpej Rom ni. Le Ubork-  
paan Klodius nan siin nkaal ke Juu yaab  
momok nya Rom aatij ponn ni. Nima pu  
le Akuila ni Prisila nan nyan nima, ki  
dan Korint aatij ni. Bi nan fuu ni naa  
yunn, le Pool nan ti kan bi. <sup>3</sup> Uja ngbaan  
ni upuu nan jab igban le ki gaal njboo.  
Baatuln le nan bi na. Pool aatuln ni baat-  
uln kpaa la. Nima pu le u nan ti bi bido.  
Le bi tun lituln ngbaan tob chee. <sup>4</sup> Lik-  
paakool daal momok kan, Pool nan chaa  
mmeen aadiik ni. Juu yaab ni Griik yaab  
mu nan bi nima. Le u ni bi gbaa tob chee  
Yesu aabor. Le u pooni ubaa ki ban ke bi  
gaa Yesu ki kii.

<sup>5</sup> Sailas ni Timoti nan nyan ni Mase-  
donia aatim ni, ki fuu ni Pool chee. Baah  
fuu ni na, le Pool mooni Yesu aabor lini-  
maln, kaa ki tun lituln liken. U nan neer  
tuk Juu yaab ke Yesu le ye Kristo u gaa  
binib lii na. <sup>6</sup> Le bi kpak u kinikpakpak,  
ki seei u. Baah ja kina na, le Pool chuu  
waakekeln gbuk ki nyan kitangbaak, ni  
ye nsurm le ki tii bi, le ki bui bi, “Ni yaa  
kaa njmar kan, nimi aasin ga li bi nimi  
nibaa aanjaal ni la, naa ye maataani. M  
ga di cha nimi, ki tuk binib bi kaa ye  
Juu yaab na le Yesu aabor.” <sup>7</sup> Le u siir  
cha bi, ki buen unii ubaa do, bi yin u ke  
Titius Justus, u nan ye unii u pak Uwum-  
bor na. Udo ni mmeen aadiik si gbok tob  
la. <sup>8</sup> Mmeen aadiik aaninkpel u bi yin  
u ke Krispus na, ni waachiln ni aanib  
momok gaa Tidindaan ki kii. Le Korint  
aatij aanib pam mu un Yesu aabor, ki  
gaa u ki kii. Le bi muin bi nnyun ni.

<sup>9</sup> Kinyeek kibaa daal, le Pool dan tidaj,  
le Tidindaan bui u, “Taa ki san ijawaan.  
Aa li beenin tuk binib tibonyaan ngbaan.  
Taa di cha. <sup>10</sup> M bi aa chee. Ubaa aan  
njmaa ja si nibaa. Kitij kee ponn ni,  
binib pam ye maanib la.” <sup>11</sup> Kina pu na,  
Pool nan bi nima ki ti saa libiln libaa ni  
ligeln, ki tuk binib Uwumbor aabor.

<sup>12</sup> Korint aatij nan bi Akaya aaapel  
ni la. Akaya ngbaan momok aaninkpel  
nan ye uja u bi yin u ke Galio na. Waay-  
oonn ngbaan le Juu yaab kuun ki nan  
chuu Pool, ki di u buen uma Galio aan-  
imbiin ni, <sup>13</sup> ki len ke Pool tuk bi baah ga  
ja pu ki doon Uwumbor na, kaa tuk bi  
mbamom, ke u bii baatij aakaal la.

<sup>14</sup> Pool aah ban ke u len na, le Galio tuk  
Juu yaab, “U yaa ba ja bakaa ni kinimbor  
kibaa kan, m ba ga ji u tibor. U mu  
aa ja nibaa. <sup>15</sup> Nimi Juu yaab, ni kpak  
tob iliin pu, ni binib aabor pu, ni nimi  
aakaal pu la. Ni bi ni chee la, naa ye  
maabor. Maan ji tibor ngbaan.” <sup>16</sup> Le u  
jenn nyan bi bibojirb aadiik ni. <sup>17</sup> Le bi  
momok chuu mmeen aadiik aaninkpel u  
bi yin u ke Sosenes na, le ki gbaa u libojil  
aadiik chee. Le Galio aatafal aa nan bi ni  
ponn ni.

**Pool mam aah gir buen  
Antiok aatij ni pu na**

<sup>18</sup> Pool nan bi Korint aatij ni ki yunn.  
Waah bi nima ki yunn na, le u Choi Yesu  
aanib. Le u ni Prisila ni Akuila buen  
Senkrea aatij ni. Pool aah ti bi nima na,  
le u kuu uyikpir lii. Ni mok ke waah  
nan puu tipuur ti tii Uwumbor na le na.  
Le bi nan ti koo bujob ni, ke bi puur  
nnyusakpem na ki buen Siria aatim ponn  
ni. <sup>19</sup> Le bi ti fuu Efesus aatij ni, ki nyan  
bujob na ni. Le Pool buen mmeen aadiik  
ni. Le u ni Juu yaab ti gbaa tob chee Yesu  
aabor. <sup>20</sup> Le bi ban ke u yunn bi chee.  
Le waa kii, <sup>21</sup> le ki Choi bi, ki tuk bi ke  
Uwumbor yaa kii kan, u ga ki gir ni bi  
chee. Le u ki labr ti koo bujob ni, ki cha

Prisila ni Akuila nima, ki buen, ki ti fuu Siisarea aatiq ni.

<sup>22</sup>Waah ti fuu nima na, le u nyan buñob na ni, ki buen Jerusalem, ki ti doon Yesu aanib bi nan bi nima na, le ki nyan buen Antiok aatiq ni, <sup>23</sup>ki ti yunn nima siib, le ki bɔ̄ dii Galasia aatim ni, ni Frijia aatim ni, ki mann Yesu aanib, ki pɔ̄ok bitaakpab.

### Uja u bi yin u ke Apolos na aabor

<sup>24</sup>Juu yaab aanii ubaa nan bi, bi yin u ke Apolos. Bi nan ma u Aleksandria aatiq ni la. Le u dan Efesus aatiq ni. U nan ye unii u nyi tibor aalem na, ki nyi tibor ti ɻmee Uwumbor Aagbanj ni na mbamɔ̄m. <sup>25</sup>Binib nan tuk u Tidindaan Yesu aasan aabor, le unimbil man tibor ngbaan pu. U nan len binib chee, ki tuk bi Yesu aabor mbamɔ̄m. U mu aa nyi Yesu aah gbiini binib Uwumbor Aafuur Nyaan pu na. U po nyi Jɔ̄nn aah nan muini binib nnyun ni pu na la. <sup>26</sup>Le Apolos koo mmeen aadiik ni, ki tuk binib Yesu aabor ni lipobil. Le Prisila ni Akuila ɻjun waah tuk bi pu na. Baah ɻjun na, le bi di u di buen bido, ki ti toor tuk u Uwumbor aasan aabor mbamɔ̄m. <sup>27-28</sup>Tɔ̄, Apolos nan ban ke u buen Akaya aatim ni. Le Yesu aanib bi bi Efesus aatiq ni na ter u, ke u buen, le ki ɻmee kigbaŋ tii u ke u ti tii Yesu aanib bi bi Akaya aatim ni na, ke bi chann u tichann. Waah ti fuu nima na, le Juu yaab bi bi nima na nan kpak u kinikpakpak. Le u len tibor nyaj bi, ki mɔ̄k bi binib aanimbil ni ke Uwumbor Aagbanj len ke Yesu sil ye Kristo u gaa binib lii na. Apolos aah ɻa kina na, u nan ter binib bi kan Uwumbor aanimbaasaln ki gaa Yesu ki kii na.

### Pɔ̄ol aah moon Yesu aabor Efesus aatiq ni pu na

**19** N-yoonn mu Apolos nan laa bi Korint aatiq ni na, le Pɔ̄ol bɔ̄ dii ɻijoo aatiq ni, ki ti fuu Efesus aatiq ni.

Waah ti fuu nima na, le u kan Yesu aanib bibaa. <sup>2</sup>Le u baa bi, “Naah gaa Yesu ki kii na, ni gbii Uwumbor Aafuur Nyaan aa?”

Le bi bui u, “Taa kan, ki mu aa ɻjun ke Uwumbor Aafuur Nyaan bi.”

<sup>3</sup>Le Pɔ̄ol baa bi, “Ni yaa ye kina kan, bi muin nimi nnyun ni kinye?”

Le bi bui u, “Bi muin timi nnyun ni ke Jɔ̄nn aah nan ɻjani pu na la.”

<sup>4</sup>Le Pɔ̄ol bui bi, “Jɔ̄nn nan muin binib bi kpeln baabimbin na nnyun ni, ki tuk bi ke bi gaa unii u ga paan ni upuwɔ̄b na ki kii. Uma le bi yin u ke Yesu.”

<sup>5</sup>Pɔ̄ol aah tuk bi kina na, le bi cha u muin bi nnyun ni, Tidindaan Yesu aayimbil pu. <sup>6</sup>Le u di ɻujaal paan bi pu. Le Uwumbor Aafuur Nyaan sunn ni bi pu. Le bi len iliin yayan, le ki nabr Uwumbor aah len pu na. <sup>7</sup>Bi ga nan li fuu bijab kipiik ni bilee.

<sup>8</sup>Likpaakool mɔ̄mɔ̄k daal kan, Pɔ̄ol nan chaa mmeen aadiik ni, ki ti saa ijmal itaa, ki len binib chee ni lipobil, le ki tuk bi Uwumbor aanaan aabor. Le bi ni Pɔ̄ol gbaa tɔ̄b chee tibor ngbaan. Pɔ̄ol nan pɔ̄oni ubaa ke u mɔ̄k bi ke waah len ti na gbi. <sup>9</sup>Le bi ponn ni bibaa aatafal pɔ̄o. Baa kii tii waaliin, le ki len tibor ti kaa ɻjan na Tidindaan aasan pu, kini-paak aanimbil ni. Kina pu le Pɔ̄ol siir cha bi, ki di binib bi dii Yesu aasan na buen uja u bi yin u ke Tiranus na aadisakpen ki ponn ni binib ɻmaa kuun ni na. Idaa mɔ̄mɔ̄k le u ni binib gbaa tɔ̄b chee Yesu aabor nima. <sup>10</sup>U nan ɻjani kina ki ti saa ɻjibin ɻjilee. Waah ɻa kina ɻjibin ɻjilee ngbaan pu na, le Asia aatiq aanib mɔ̄mɔ̄k, bi ye Juu yaab na, ni bi kaa ye Juu yaab na mɔ̄mɔ̄k ɻjun Tidindaan aabor.

### Skefa aajapɔ̄tiib aabor

<sup>11</sup>Uwumbor nan cha Pɔ̄ol tun lijinjiir aatun ki ti nyaj. Binib aa nan kee kan kina. <sup>12</sup>Le bi yoor Pɔ̄ol aakekengen ɻi u joo per unimbil wɔ̄b na, ni ɻikeken ɻi

u joo biini unimbiin ni na, ki ti di paan bibum pu, ni tiyayaar aah joo bi na mu pu. Baah ɣjani kina na, libuul ngbaan ni le bi poɔk. <sup>13-14</sup>Tɔ, Juu yaab aanii ubaa mu nan bi nima. Bi yin u ke Skefa. U nan ye Uwumbɔr aatotoorninkpel ubaa la, ki nan kpa japɔtiib bilole. Ujapɔtiib nan chuun chaa ntim ntim ponn ni, ki nyani tiyayaar binib ni. Le bi ban ke bi di Tidindaan Yesu aayimbil nyan tiyayaar uja ubaa ni, le ki bui tiyayaar ngbaan, "M tuk nimi Yesu u Poɔl mooni waabor na aayimbil pu, nya li cha man."

<sup>15</sup> Le tiyayaar ngbaan bui bi, "M nyi Yesu, ki nyi Poɔl. Nimi ma kan, ɣjma ye nimi?"

<sup>16</sup> Le uja u tiyayaar joo u na nan chuu bi, ki gbaa lakhir bi, ki gaa baawan-peenkaan ki nyaj bi. Le bi mɔmɔk san bijmeen ki nyan udo. <sup>17</sup> Le Efesus aatiŋ aanib bi ye Juu yaab na, ni bi kaa ye Juu yaab na mɔmɔk ɣjun tibɔr ngbaan. Le ijawaan chuu bi mɔmɔk. Le bi nyuŋ Tidindaan Yesu. <sup>18-19</sup> Le binib bi gaa Yesu ki kii na pam nan dan Poɔl chee, ki nan kpiir ki tuk u binib aanimbil ni, baah nan ɣjani inyɔk pu na. Bi ponn ni pam nan kpa inyɔk aagbann. Le bi di inyɔk aagbann ngbaan see mmii ni, binib mɔmɔk aanimbil ni. Le bi kahn inyɔk aagbann ngbaan aadaak, le ni ye iwiin ɣjichur piiŋmu aapal. <sup>20</sup> Le Tidindaan aaliin moo moon ɣipepel mɔmɔk, ki moo kan mpɔɔn.

### Binib aah ɣjma tijar Efesus aatiŋ ni pu na

<sup>21</sup> Nee aapuwɔb, le Poɔl nan ban ke u bɔ dii Masedonia aatim ni, ni Akaya aatim ni, ki nin buen Jerusalem. Le u ɣjanlandak ke u yaa buen Jerusalem aatiŋ ni kan, u ga ti buen Rom aatiŋ mu ni. <sup>22</sup> Le u nyan binib bi ter u na ponn ni bilee, bi yin ubaa ke Timoti, ki yin uken ke Erastus, le ki cha bi loln u pu nsan ki

cha Masedonia aatiŋ ni. Uma Poɔl nan laa beenin bi Asia aatiŋ ni, ki yunn siib.

<sup>23</sup> N-yoɔnn ngbaan, le Efesus aatiŋ aanib ɣjma tijar Tidindaan aasan pu. <sup>24</sup> Unii ubaa nan bi nima, bi yin u ke Demetrius. U nan di tikunabr le mɔɔ ɣjidchal waatiir ɣji bi ke liwaal li bi yin li ke Atemis na aadichal na, aan ki joo kooh binib pu. Le binib pam mu tun lituln ngbaan, ki kan tinyoor pam. <sup>25</sup> Le Demetrius kuun binib bimɔk tun lituln ngbaan na, ki bui bi ke, "Njɔtiib, ni nyi ke timi aatuln kpa tinyoor pam. <sup>26</sup> Poɔl mu bi bii timi aatuln la. Ni kan aa? Ni ɣjun waah len pu na. U len ke ɣjwaa ɣji binib mɔɔ ɣji na aa ye nibaa. Binib bi bi Efesus aatiŋ ni do, ni Asia aapepel mɔmɔk ponn ni na pam pak waah len pu na, kaa ki dii ɣjwaa. <sup>27</sup> U yaa beenin ɣjani kina kan, u ga bii timi aatuln. Atemis, li ye liwaal sakpeln na aadichal ga bee fam. Atemis li Asia aatim aanib, ni dulnyaa ni aanib mɔmɔk dooni li na, mu ga ɣja fam, kaan ki li bi tibɔr tibaa ni."

<sup>28</sup> Binib ngbaan aah ɣjun kina na, le bi gee liŋjuul sakpen, ki tar ke, "Atemis li ye Efesus aatiŋ aanib aawaal na ye liwaal sakpeln la." <sup>29</sup> Le kitij ngbaan aanib mɔmɔk kpa kifuuk ki ɣjma tijar, le ki chuu Poɔl aajɔtiib bilee, Gayus ni Aristakus, ki di san mala buen binib aah kuuni nin chee na, mpaan sakpiin ni. Gayus ni Aristakus nan ye Masedonia aatiŋ aanib bilee bi dii Poɔl waasachuln ponn ni na la. <sup>30</sup> Le Poɔl ubaa nan ban ke u buen kinipaak na aah kuun nin chee na, u ti len bi chee. Le Yesu aanib aa cha u buen. <sup>31</sup> Kitij ngbaan aankipeliib ponn ni bibaa nan ye Poɔl aajɔtiib la. Bi mu nan tun unii Poɔl chee ke u ti tuk u ke u taa buen kinipaak ngbaan aah kuun nin chee na. <sup>32</sup> Kinipaak ngbaan nan kpa kifuuk sakpen; bibaa nan tar ki len tibaa, bibaa mu nan tar ki len tiken. Baa nyi budabu pu bi kuun ni nima chee na. <sup>33</sup> Le Juu yaab bi nan bi nima na nan nyan uja

ubaa bi yin u ke Aleksanda, ke u sil kini-paak ngbaan aanimbiin ni. Nima pu na, binib bibaa mu nan dak ke ni ye uma Aleksanda aabor la. Le u yoor unjaal ki nyii bi pu, ki ban ke u tuk bi ke naa ye Juu yaab aabor.<sup>34</sup> Kinipaak ngbaan aah bee ke u ye Juu yaab aanii na, le bi kpaan ki teen nfumbaa ke, “Atemis li ye Efesus aatiij aanib aawaal na ye liwaal sakpeln la.” Bi nan tar kina ki ti saa tikur tilee.

<sup>35</sup> Le kitij ngbaan aaninkpel ubaa dan nan nyii bi pu, ke bi di cha kifuuk. Baah di cha na, le u len ke, “Efesus yaab, binib mɔmɔk nyi ke nimi Efesus yaab lik Atemis ni laadichal pu la, ki nyi ke Atemis ye liwaal sakpeln li nyan ni kitaapaak ki sunn ni kitij na.”<sup>36</sup> Ubaa aan ŋmaa nee ke taa gbii. Sɔŋ nisui man, ki taa tun lituln fam.<sup>37</sup> Nimi le joo ni bijab ngbaan do chee na. Baa sun tiwan liwaal aadichal ponn ni, kaa sii timi aawaal.<sup>38</sup> Demetrius mam ni unii ubaa yaa kpa tibɔr kan, bibɔjirb bi, libɔjil daal mu bi. Cha bi buen nima ki ti len.<sup>39</sup> Nimi aaninkpiib mu yin binib ki kuun bi, ke bi nan ji tibɔr. Ni yaa kpa tibɔr kpee kan, bi ga len ti mu.<sup>40</sup> Ni kpa kifuuk ki ŋma tijar din. Nibaakan, timi aatiij aaninkpiib ga ji timi tibɔr kifuuk ngbaan pu. Nibaa aa bi ni ponn ni, ni po kpa kifuuk fam la. Bi yaa baa timi kifuuk ngbaan pu kan, taa nyi taah ga len pu na.”<sup>41</sup> Waah len kina na, le u cha bi mɔmɔk siir.

### Pɔɔl aah buen Masedonia ni Griis aapepel ni pu na

**20** Kifuuk ngbaan aah ti ŋmin na, le Pɔɔl yin Yesu aanib ke bi dan u chee, ki nan len bi chee tibɔr, ki pɔɔk bitaakpab, ki chɔi bi, le ki buen Masedonia aatiij ni.<sup>2</sup> Le u bɔ̄ dii ntim mu bi nima na ni, ki mann Yesu aanib bi bi nima na, ki len bi chee tibɔr pam, ki pɔɔk bitaakpab, ki ti fuu Griis aatiij ni,<sup>3</sup> ki nan bi nima ki pii ijmal itaa, le ki ban u koo buŋɔb ni, ki buen Siria aatiij ni. Le u ŋjun

ke Juu yaab kpokl ke u yaa koo buŋɔb na ni kan, bi ga ku u. Waah ŋjun kina na, le waa buen, ki len ke u ga labr jer Masedonia aatim.<sup>4</sup> Le binib bibaa nan dii u. Binib bi nan dii u na aayimbil nan ye Sopata, u nan ye Berea aatiij aanii, ki nan ye Pirus aajapɔɔn na; ni Aristakus, ni Sekundus, bi nan ye Tesalonika aatiij aanib na; ni Gayus, u nan ye Debe aatiij aanii na; ni Tikkus, ni Trofimus, bi nan ye Asia aatiij aanib na; ni Timoti.<sup>5</sup> Le bi mɔmɔk loln nsan ki buen Troas aatiij ni, ki ti kii timi nima.<sup>6</sup> Le ti nan bi Filipi aatiij ni, ki ti saa bundaln Juu yaab ji njim ki ŋmɔ̄ boroboro u kaa kpa nnyɔk na. Liyaadaal ngbaan aah jer na, le ti koo buŋɔb ni ki buen. Ti di iwiin ijmu le fuu Troas aatiij ni, ki ti pii tijɔtiib nima. Le ti nan bi nima ki ti saa iwiin ilole.

### Pɔɔl aah buen Troas aatiij ni kookoo yaan pu na

<sup>7</sup> Likpaakool ponn ni, njan aawiin daal, le ti kuun tɔb chee ke ti nan ji Tidindaan aajikaar. Le Pɔɔl len bi chee Uwumbɔr aabor le kitaak ti siir. U nan ban ke kitaak yaa woln kan, u buen cha bi. Nima le cha u len bi chee tibɔr kitaak ti siir.<sup>8</sup> Taah kuun paacham aadiik ni na, karyaa mam nan wiir ki ponn ni.<sup>9</sup> Unachipɔɔn ubaa nan bi nima, bi yin u ke Yutikus. U nan ka kiditatar aatakolu pu, le ngeen chuu u. Pɔɔl aah bi len tibɔr ki yunn na, le u geen, ki ker lir kitij. Le bi mɔmɔk nyan ni, ki sunn ti yoor u. U mu kpo a.<sup>10</sup> Le Pɔɔl mu nyan ni, ki sunn buen bi chee, ki ti doon paan u pu, le ki di unjaal kpal u, le ki bui bi, “Chuu nibaa man. Waa kpo. U bi.”<sup>11</sup> Le Pɔɔl gir koo paacham aadiik ngbaan ni, ki ti jin bi chee tijikaar, ki ki len bi chee tibɔr ki yunn, hali ki ti woln kitaak. Naah woln na, le u buen cha bi.<sup>12</sup> Le bi yoor unachipɔɔn ngbaan di buen udo. Waah fikr na, le bisui sɔŋ mbamɔm.

### Taah buen Miletus aatiŋ ni pu na

<sup>13</sup> Le ti loln nsan ki koo buŋjəb ni, ki puur buen Asos aatiŋ ni. Pɔɔl ma nan chuun kitij, ki mu buen nima, le ti ti keln tɔ̄b. Pɔɔl nan tuk timi ke u mu ga koo buŋjəb na ni nima. <sup>14</sup> Waah ti pii timi Asos aatiŋ ni na, le ti yoor u ḥa buŋjəb na ni, le ti di buen Mitilene aatiŋ ni. <sup>15</sup> Ti nan nyan nima ki nabr buen. Naah woln kitaak na, le ti fuu lidikl libaa chee, bi yin li ke Kios, ki ki woln kitaak, le ti fuu lidikl liken chee, bi yin li ke Samos, ki ki woln kitaak le ti nan fuu Miletus aatiŋ ni. <sup>16</sup> Le Pɔɔl ban u fuu Jerusalem mala. U nan ban ke u pɔɔn ubaa ki fuu nima Pentekost aawiindaal. Nima pu na, waa nan ban ke u yunn Asia aatiŋ ni. Le u bui ke u ga gɔ̄ln Efesus aatiŋ, waan dii nima.

### Pɔɔl aah choi Yesu aanib aaninkpiib pu na

<sup>17</sup> Le Pɔɔl tun unii ke u buen Efe-sus aatiŋ ni ki ti yin ni Yesu aanib aaninkpiib, ke bi dan u chee Miletus aatiŋ ni. <sup>18</sup> Baah fuu ni u chee na, le u bui bi, “Maah nan fuu Asia aatiŋ ni, ki nan bi ni chee na, ni nan bee maabimbin aah nan bi pu n-yoonn ngbaan mɔ̄mɔ̄k na. <sup>19</sup> Ni nan bee ke m sunn mbaa taab, ki tun Tidindaan aatuln ni tinyunyunn, ki kan falaa Juu yaab chee, baah kpokl n-yoonn mɔ̄mɔ̄k ke bi ḥa mi bakaa pu na. <sup>20</sup> M buen binib aah kuuni nin chee na, ki buen nido mu, ki tuk nimi Yesu aabor. M tuk nimi tibɔ̄r timɔ̄k ga ter nimi na, kaa gur tibaa. <sup>21</sup> M sur Juu yaab ni binib bi kaa ye Juu yaab na mu, ke bi kpeln baabimbin ki dii Uwumbɔ̄r aasan ki gaa Tidindaan Yesu ki kii. <sup>22</sup> Dandana wee m kii Uwumbɔ̄r Aafuur Nyaan aamɔ̄b le ki cha Jerusalem ni, kaa nyi baah ga ti ḥa mi nima chee pu na. <sup>23</sup> M po nyi ke ntim mɔ̄mɔ̄k ponn ni, Uwumbɔ̄r Aafuur Nyaan sur mi ke bi ga di mi ḥa kiyondiik ni, ki ḥa mi falaa. <sup>24</sup> Tɔ̄, m yaa kpo, bee

m yaa bi kan, ntafal aa bi ni ni. Tidindaan Yesu tii mi lituln, ke m tuk binib tibɔ̄nyaan ngbaan, ke Uwumbɔ̄r gee bi. Ntafal bi lituln ngbaan ponn ni, ke m tun li ti doo.

<sup>25</sup> “Maah nan bi ni chee na, m nan chuun tuk nimi Uwumbɔ̄r aanaan aabor. M nyi ke ni ponn ni ubaa aan ki kan mi. <sup>26</sup> Din, m tuk nimi mbamɔ̄n la, unii ubaa ni ponn ni yaa kaa kan limɔ̄fɔ̄l li kaa kpa ndoon na kan, naa ye maataanai. <sup>27</sup> M tuk nimi Uwumbɔ̄r aabor mɔ̄mɔ̄k, kaa gur tibaa. <sup>28</sup> Ni li nyi man, ki taa cha unii ubaa ḥmann nimi. Ni li ter Yesu aanib, ki taa cha unii ubaa ḥmann bi mu. Uwumbɔ̄r Aafuur Nyaan nan ḥa nimi waanib aaninkpiib. Ni li joo waanib ngbaan mbamɔ̄m. Waabo nan dan nan kpo bi pu, ke bi kpalm waanib la. <sup>29</sup> M nyi ke m yaa kaa ki bi ni chee kan, binib ga dan nan bii nimi, ke njisapol aah chuun chur ipiih pu na. <sup>30</sup> Binib bibaa mu bi ni ponn ni, ki ga bii Uwumbɔ̄r aaliin ke bi ḥmann Yesu aanib, bi taa ki li dii waasan. Bi ga li ban ke bi dii bima la. <sup>31</sup> Nima pu na, ni li nyi man, ki li teer ke ḥibin ḥitaa le na, m nan bi ni chee ki sur nimi ni tinyunyunn, nwiin pu ni kinyeek.

<sup>32</sup> “Nnaabitiib, m di nimi ḥa Uwumbɔ̄r aajaal ni, ke u li lik nimi. M tuk nimi waaliin i mɔ̄k timi waah gee timi pu na. Waaliin ngbaan ga ter nimi, ke ni dii waasan mbamɔ̄m. U ga di lifaal tii nimi, ni binib bimɔ̄k bi chain na. <sup>33</sup> Maah nan bi ni chee na, maa nan ban unii ubaa aamombil, kaa ban unii ubaa aawan-peenkaan. <sup>34</sup> M ni njɔ̄tiib yaa nan ban tiwan ni na kan, min mbaa le nan tun lituln, le ki kan taah ban tiwan ni na. Nimi nibaa nyi kina. <sup>35</sup> Maah tun lituln kina na, m mɔ̄k nimi ke ni mu li tun kina, ki ter bibum, ki li teer ke Tidindaan Yesu ubaa nan len ke, ‘Uwumbɔ̄r aanyoor bi unii u tii na pu ki jer u gaa na pu.’”

<sup>36</sup> Pɔɔl aah len doo na, le bi mɔ̄mɔ̄k gbaan bitajaayil pu, ki mee Uwumbɔ̄r.

<sup>37</sup> Le bi mɔmɔk ubaabaa chaa ki ti joo bijaal kpalmi Pɔɔl, ki joo bumɔb moor utakpiln,<sup>\*\*</sup> ki wii. <sup>38</sup> Waah tuk bi ke baan ki kan u na, le ni bii bisui sakpen. Le bi cheen u buen u ti gir koo buŋɔb ngbaan ni.

### Pɔɔl aah buen Jerusalem pu na

**21** Tɔ, ti nan chɔi bi, le ki koo buŋɔb ngbaan ni, le ki puur ki ti fuu lidikl libaa chee, bi yin li ke Kos; ki woln kitaak, le ti fuu Rodes aatiŋ ni, ki nyan nima, ki buen Patara aatiŋ ni, <sup>2</sup>le ki ti kan buŋɔb bu ga buen Fonisia aatiŋ ni na. Le ti nyan ti koo bu ponn ni, ki cha. <sup>3</sup>Taah cha na, le ti jer lidikl libaa bi yin li ke Saiprus, li bi njangan wɔb na, le ki ti fuu Taya, kitij ki bi Siria aatiŋ ni na. Taah ti fuu nima na, le bi ban bi bi nima ni yunn siib, bi ti nyan njitun. <sup>4</sup>Le ti nyan buŋɔb na ni, ki buen kitij ponn ni, ti ti ban Yesu aanib. Ti nan ti kan bi, ki nan bi bi chee ki ti saa iwiin ilole. Taah bi bi chee na, le Uwumbɔr Aafuur Nyaan cha bi tuk Pɔɔl ke u taa buen Jerusalem. <sup>5</sup>Iwiin ilole ngbaan aah jer na, le ni ɲeer ti gir koo buŋɔb na ni. Taah gir cha ti ti koo buŋɔb ni na, le bi mɔmɔk, ni bipuutiib, ni baabim cheen timi, ki nyan ni kitij ngbaan ni. Le ti mɔmɔk gbaan nnyusakpem na aagbaan, ki mee Uwumbɔr, <sup>6</sup>ki chɔi tɔb. Le bi gir kun.

Le ti mu koo buŋɔb na ni, <sup>7</sup>ki ti nyan Taya aatiŋ ni, ki puur buen Tolemais aatiŋ ni. Taah ti fuu nima na, le ti nyan buŋɔb na ni, ki buen ti doon Yesu aanib bi bi nima na, ki nan bi bi chee nwiin mubaa. <sup>8</sup>Naah woln kitaak na, le ti nyan kitij ngbaan ni, ki ti fuu Siisarea aatiŋ ni. Taah ti fuu nima na, ti nan buen Filip do, ki ti koo udo. U nan ye unii u tuk binib Yesu aabɔnyaan na la. Baah nan nyan bijab bilole bi Jerusalem ponn ni,

ke bi li yakr tijikaar tii Yesu aanib na, u nan ye bijab bilole ngbaan ponn ni ubaa. <sup>9</sup>Ubisatiib nan ye binaa, kaa kpa chatiib. Le Uwumbɔr Aafuur Nyaan cha bi nabr Uwumbɔr aah len pu na. <sup>10</sup>Ti nan bi nima ki yunn siib. Le Uwumbɔr aabɔnabr ubaa nyan ni Judea ki fuu ni ti chee nima, bi yin u ke Agabus. <sup>11</sup>Le u gaa Pɔɔl aagbapapaln, ki di buu ubaa aataa ni uŋaal, ki tuk Pɔɔl ke Uwumbɔr Aafuur Nyaan bui ke Juu yaab bi bi Jerusalem na ga nan di udaan u yeh ligbapapaln ngbaan na buu utaa ni uŋaal kina, ki di u ɲa binib bi kaa ye Juu yaab na aanjaal ni.

<sup>12</sup>Taah ɲun kina na, le ti ni binib bi bi nima na nan gaj Pɔɔl ke u taa buen Jerusalem. <sup>13</sup>Le Pɔɔl baa bi, “Ni ɲani ba kina, ki wii, ki bii nsui? Bi yaa ga ti buu mi Jerusalem ni, bee bi yaa ga ti ku mi nima Tidindaan Yesu pu kan, m ga buen. Maan di cha.”

<sup>14</sup>Taa nan ɲmaa chuu u ke u taa buen, le ki len ke, “Cha Tidindaan ɲa waah gee pu na,” le ki ɲmin, kaa ki len tibaa.

<sup>15</sup>Ti nan bi nima ki yunn siib, le ki gor ke ti buen Jerusalem. <sup>16</sup>Le Yesu aanib bi nyan ni Siisarea aatiŋ ni na bibaa mu dii timi, ki di buen Jerusalem, uja ubaa do, ki ti koo nima. Bi nan yin u ke Menasonn, u ye Saiprus aatiŋ aanii, ki nan dii Yesu ni yunn.

### Pɔɔl aah buen ti mann Jems pu na

<sup>17</sup>Taah ti fuu Jerusalem na, Yesu aanib nan gaa timi ki nan kpa mpopiin. <sup>18</sup>Naah woln kitaak na, ti ni Pɔɔl nan buen ti ti doon Jems. Yesu aanib aaninkpiib mɔmɔk mu nan bi nima.

<sup>19</sup>Le Pɔɔl doon bi, ki ɲeer tuk bi Uwumbɔr aah ɲa tiwan nimok na, binib bi kaa ye Juu yaab na aakaasisik ni, uma Pɔɔl aatuln pu. <sup>20</sup>Baah ɲun kina na, le bi mɔmɔk nyuŋ Uwumbɔr, ki bui Pɔɔl,

<sup>\*\*</sup>20:37 : Bi moor utakpiln: Israel yaab nan doon binaabitib kina le ki mɔk ngeehn.

"Tina aabo, aa nyi ke Juu yaab njichur pam le gaa Yesu ki kii. Bi mɔmɔk aanimbil man Moses aakaal pu.<sup>21</sup> Le bi ḥun ke aa mɔk Juu yaab bimɔk bi Biniyayam aatim ni na ke bi taa ki dii Moses aakaal, ki taa ki geei baabim aachakpan, ki taa ki dii Juu yaab aakaal.<sup>22</sup> Bi ga ḥun ke aa fuu ni. Ti ga ḥa kinye?<sup>23</sup> Ti ga tuk si saah ga ḥa pu na. Bijab binaa bibaa bi do. Bi nan puu tipuur tii Uwumbor.<sup>24</sup> Bi ga buen Uwumbor Aadichal ni, bi ti ḥa bibaa chain. Aa mu li dii bi cha, ki mu ti ḥa aabaa chain, ki tii bi njimobil, aan bi ti daa tiwan ki nan toor kitork tii Uwumbor, ki kuu baayikpir. Aa yaa ḥa kina kan, binib mɔmɔk ga bee ke aa mu dii Moses aakaal. Bi ga bee ke binib bi len ke saa dii Moses aakaal na aa len mbamɔn.<sup>25</sup> Tɔ, binib bi kaa ye Juu yaab ki gaa Yesu ki kii na ma kan, ti nan ḥmee kigbaŋ tii bi, ki tuk bi taah kpokl pu na, ke bi taa ki ḥmɔ kitork aanann, ki taa ki ḥmɔ nsin, ki taa ki ḥmɔ tiwan ni bi tab ku ni na, ki taa ki gɔr kidagook."

<sup>26</sup> Tɔ, Pɔɔl nan kii baah tuk u pu na. Ki woln kitaak le u voor bijab binaa ngbaan, le u ni bi ti ḥa bibaa chain. Le u koo Uwumbor Aadichal ni, ki ti tuk Uwumbor aatotoor bundaln bi ga ḥa chain doo aan ki toor kitork tii Uwumbor na. Iwiin ilole daal, le bi ga ḥa chain doo.

### Binib aah chuu Pɔɔl Uwumbor Aadichal ni pu na

<sup>27</sup> Tɔ, iwiin ilole ngbaan aa nan kee fuu, le Juu yaab bibaa, bi nyan ni Asia aatim ni na, kan Pɔɔl Uwumbor Aadichal ni. Le bi cha kinipaak ḥma tijar Pɔɔl pu, ki chuu u mpɔɔn, ki tar ke,<sup>28</sup> "Israel yaab, ter timi man. Uja wee ye unii u buen njipepel mɔmɔk na, ki tuk binib mɔmɔk ke bi taa li pak timi Juu yaab, ki taa li pak Moses aakaal, ki taa li pak Uwumbor Aadichal. U mu joo ni binib bi kaa ye Juu yaab na, ki di bi koo ni Uwumbor Aadichal li ye chain na ni, ki

bii li."<sup>29</sup> Bi nan kan Pɔɔl ni Trofimus, u ye Efesus aatij aanii na chuun dii kitij ngbaan ponn ni. Le bi dak ke Pɔɔl di u koo ni Uwumbor Aadichal ni. Nima pu le bi len ke u joo ni binib bi kaa ye Juu yaab na koo ni Uwumbor Aadichal ni.

<sup>30</sup> Le kitij ngbaan aanib mɔmɔk ḥma tijar, ki san kuuni tɔb chee, ki chuu Pɔɔl ki dar nyan ni u Uwumbor Aadichal ni. Libuul ngbaan ni le Uwumbor Aadichal aakikiirb piin jaalerj mam.<sup>31</sup> Le kinipaak na poɔn bibaa bi gbaa ku Pɔɔl. Le unii ubaa buen Rom aatɔb aajab aapol chee, le ki tuk u ke Jerusalem aanib mɔmɔk bi ḥmɔ tijar la.<sup>32</sup> Libuul ngbaan ni le upol ngbaan di butɔb aajab bibaa ni baaninkpiib, ki san buen kinipaak ngbaan chee. Baah kan butɔb aajab ngbaan ni baapol na, le bi di cha Pɔɔl, kaa ki gbaa u.<sup>33</sup> Le upol ngbaan buen Pɔɔl chee, ki ti chuu u, ki tuk waajab ke bi di tikululn tilee buu u, le ki baa ke, "Ḥma ye uja wee? U ḥa kinye?"<sup>34</sup> Le bibaa tar baah gee pu na, le biken mu tar baah gee pu na. Kifuuk ngbaan pu, le upol ngbaan aa ḥmaa bee budabu ḥa na. Le u tuk waajab ke bi di Pɔɔl buen butɔb aajab Aadichal ni.<sup>35</sup> Le bi di u buen ti fuu ḥibimbin ḥi bi maa tam lidichal ngbaan na. Baah joo u cha na, le kinipaak ngbaan naa naa ke bi ti chuu nyan u. Nima pu na, baah ti fuu ḥibimbin taab na, le butɔb aajab ngbaan voor u paacham, le binib aa ki pii u.<sup>36</sup> Le bi mɔmɔk paa bipuwɔb ki tar, "Ku u man."

### Pɔɔl aah len waabamɔn pu na

<sup>37</sup> Le bi ti fuu lidichal ngbaan aabisamɔb chee, ki ban bi koo. Le Pɔɔl bui upol ngbaan Griik aaliin ponn ni, "Cha m tuk si tibɔr tibaa."

Le upol ngbaan baa u, "Aa ḥun Griik aaliin aa?"<sup>38</sup> M nyi ke aa ye Ijipt aatij aanii u nan cha kinipaak tukni timi aatij aaninkpiib, ki di binikurb njichur ḥinaa buen nteersakpiin ni na la."

<sup>39</sup> Le Pɔɔl bui u, “M ye Juu yaab aanii la. Bi nan ma mi Tasus aatiŋ ki bi Silisia aatiŋ ni na; ki ye kitij ki kpa liyimbil na la. Pɔɔk aabaa ki cha m len kinipaak ngbaan chee.”

<sup>40</sup> Le u kii ke u len. Le Pɔɔl sil njibimbin paab, ki di urjaal nyii bi pu. Baah ŋmin na, le u len bi chee bima Juu yaab aaliin ponn ni.<sup>††</sup>

**22** U nan len ke, “Ntetiib ni nnaabitiib, li pel man, ki cha m tuk nimi maabamɔ̄n.” <sup>2</sup>Baah ŋjun ke u len bima bibaa aaliin na, le bi sil chii.

Le Pɔɔl len ke, <sup>3</sup>“M ye Juu yaab aanii la. Bi nan ma mi Tasus aatiŋ ki bi Silisia aatiŋ ponn ni na la. M nan bae mbaem Jerusalem ni, do chee na la. Gamaliel le nan mɔ̄k mi. M nan bae tiyaajatiib aakaal mbamɔ̄m. Nnimbil nan man Uwumbɔ̄r aatuln pu, ke ni mɔ̄mɔ̄k aah bi pu dandana wee na. <sup>4</sup>M nan ja binib bi dii Yesu aasan na falaa, ki ban m ku bi. M nan chuu bijab ni bipiib mpɔ̄ɔn, ki di tikululn buu bi, ki di bi ja tiyondir ni. <sup>5</sup>Uwumbɔ̄r aatotoorninkpel ni Juu yaab aaninkpiib ga ŋmaa tuk nimi ke m len mbamɔ̄n la. Bi nan ŋmee kigban tii Juu yaab bi bi Damaskus aatiŋ ni na, ke bi tii mi nsan m ti chuu Yesu aanib bi bi nima na, ki di tikululn buu bi, ki di bi dan Jerusalem, ke m nan daa bitafal. Le m nan buen.”

### Pɔɔl aah tuk bi waah nan gaa Yesu ki kii pu na

(Lituln 9.1-19; 26.12-18)

<sup>6</sup>“M nan bi nsan ni ki ti peen Damaskus aatiŋ. Nwiin kaasisik ni, le nwiihn nyan ni paacham, ki nan woln ki mann gonn mi, ki wiin chain. <sup>7</sup>Le m lir kitij, ki ŋjun nneel len ke, ‘Sɔɔl, Sɔɔl, ba ja aa ja mi falaa?’ <sup>8</sup>Le m baa u, ‘Ndindaan, ŋma ye?’ Le u bui mi, ‘Min le ye Yesu u ye Nasaref aatiŋ aanii na. Aa ŋjani mi le falaa.’ <sup>9</sup>Bijab bi nan si m chee na

nan kan nwiihn ngbaan, kaa ŋjun udaan u len m chee na aaneel. <sup>10</sup>Le m baa u, ‘Ndindaan, m ga ja kinye?’ Le u bui mi, ‘Fii sil ki li cha Damaskus aatiŋ ni. Unii ubaa bi nima, ki ga ti tuk si tiwan nimɔ̄k Uwumbɔ̄r ban ke aa ja na.’ <sup>11</sup>Nwiihn ngbaan aah nan deer nnimbil na, le m jɔ̄b, kaa ki waa. Le binib bi dii mi na dar mi di buen Damaskus aatiŋ ni.

<sup>12</sup>“Uja ubaa nan bi nima, bi nan yin u ke Ananias. U dii Uwumbɔ̄r aasan mbamɔ̄m, ki kii timi aakaal. Juu yaab bimɔ̄k bi nima na pak u. <sup>13</sup>Le u dan nan sil m chee ki bui mi, ‘Nna aabo Sɔɔl, likr.’ Libuul ngbaan ni, le nnimbil kpaan likr, le m kan u, kaa ki ye ujoon. <sup>14</sup>Le u bui mi, ‘Tiyaajatiib Aawumbɔ̄r nyan si, ke aa bee waageehn, ki kan Waabonyaan, ki ŋjun waaneel len aa chee. <sup>15</sup>Aa ga li ye waaseeraadaan, ki tuk binib mɔ̄mɔ̄k saah kan pu na, ni saah ŋjun pu na. <sup>16</sup>Taa taan. Fiin, ki yin waayimbil ki mee u, ki cha m muin si nnyun ni, ki finn aapobil saatunwanbir pu.”

<sup>17</sup>“Nimina aah jer na, le m nan gir buen Jerusalem, ki ti koo Uwumbɔ̄r Aadichal ni, ki mee Uwumbɔ̄r. Maah mee Uwumbɔ̄r na, <sup>18</sup>le m kan lijinjiir aawan; m kan Tidindaan, ki ŋjun u bui mi ke, ‘Fiin, ki nya Jerusalem ni mala. Aa yaa tuk do chee na aanib maabɔ̄r kan, bi ga yii, kaan gaa ti.’ <sup>19</sup>Le m bui u, ‘Ndindaan, bi nyi ke m nan buen mmeen aadir ni, ki chur binib bi gaa si ki kii na, ki gbaa bi. <sup>20</sup>Binib aah nan ku saaseeraadaan Stiifen na, m mu nan bi nima, ki kii ke ni ŋjan, ki joo binib bi ku u na aabɔ̄kul.’ <sup>21</sup>Le Tidindaan bui mi, ‘Li cha. M ga tun si ni daa na, binib bi kaa ye Juu yaab na chee.’”

<sup>22</sup>Pɔɔl aah len kina na, le kinipaak ngbaan aa ki pel. Le bi mɔ̄mɔ̄k teen mpɔ̄ɔn pu, “Ku u man. Naa ŋjan ke u ki li bi dulnyaa wee ni.” <sup>23</sup>Le bi mɔ̄mɔ̄k tar, ki

<sup>††</sup>21:40 : Juu yaab aaliin ye Hiibru aaliin la.

joo baabokul feeni paacham, ki leer titan mae paacham, le kitangbaak feei.<sup>24</sup> Le butob aajab aapol ngbaan tuk waajab ke bi di Poco koon ni kidiik ponn ni, ki ti gbaa u njinaalab, aan ki nin baa u waah ja budabu na, ke bi bee budabu ja aan Juu yaab njma tijar u pu na.<sup>25</sup> Le bi di tikululn buu u, bi ti gbaa u njinaalab. Le Poco bui butob aajab aaninkpel u si u chee na, "Naah ban ni gbaa mi na, nkaal kii kina aa? Naa jin mi tibor, ki mu aa kan maataani. M ye Rom aanii la."<sup>\*\*</sup>

<sup>26</sup> Uninkpel ngbaan aah njun kina na, le u buen upol ngbaan chee, ki ti bui u, "Li nyi saah ga ja pu na. Uja ngbaan ye Rom aanii la."

<sup>27</sup> Le upol ngbaan buen Poco chee, ki ti baa u, "Aa ye Rom aanii la aa?"

Le Poco kii ke u ye.

<sup>28</sup> Le upol ngbaan bui u, "M nan pan njimobil pam, le ki kpalm Rom aanii."

Le Poco bui u, "M ye Rom aabo la."

<sup>29</sup> Poco aah len kina na, le bijab bi ban bi gbaa u na aa ki kaa u, le ki sur bipuwob. Upol ngbaan aah bee ke Poco ye Rom aanii na, le u mu san ijawaan. U bee ke waah di tikululn buu u na, naa jan.

### Baah jin Poco tibor pu na

<sup>30</sup> To, upol ngbaan nan ban u bee mbamom Juu yaab aah len Poco aah ja pu na. Ki woln kitaak, le u chuu buur tikululn ti bi di buu Poco na, le ki tuk Uwumbor aatotoorninkpiib, ni bibojirb aaninkpiib momok ke bi kuun ni, le ki di Poco nan siin binimbiin ni.

**23** Le Poco lik bi, ki len ke, "Nnaabitiib, m bee nsui ni ke maabimbin le jan Uwumbor chee ki nan saa din."<sup>2</sup> Waah len kina na, le Uwumbor aatotoorninkpel Ananias tuk

binib bi si Poco chee na ke bi faa umob. <sup>3</sup> Le Poco bui u, "Uwumbor ga faa si. Aa bi ke ligoln li kaa jan, aan bi di pente pipiin pente li na la. Aa ka do, ke aa ji mi tibor, nkaal aah dii pu na. Saah tuk binib ke bi faa mi na, sin le bii nkaal ngbaan."

<sup>4</sup> Le binib bi si Poco chee na baa u, "Aa sii Uwumbor aatotoorninkpel la aa?"

<sup>5</sup> Le Poco len ke, "Nnaabitiib, maa nyi ke u ye Uwumbor aatotoorninkpel. M yaa ba nyi kan, maa ba ga len kina; ba pu? ni njmee Uwumbor Aagbaj ni ke, 'Taa len saanib aaninkpel tibobir.'"<sup>\*\*</sup>

<sup>6</sup> To, Poco nan bee ke bi ponn ni bibaa ye binib bi dii Sajusii yaab aamokm na, bibaa mu ye binib bi dii Farisii yaab aamokm na. Le u teen ke, "Nnaabitiib, m ye unii u dii Farisii yaab aamokm na la. Nte mu nan ye unii u dii Farisii yaab aamokm na la. M kpa limakl ke binib bi kpo na ga fikr nkun ni. Limakl ngbaan pu, le bi ji mi tibor."

<sup>7</sup> Waah len kina na, le binib bi dii Farisii yaab aamokm na, ni binib bi dii Sajusii yaab aamokm na yakr tob chee, ki kpack tob kinikpakpak. <sup>8</sup> Sajusii yaab len ke binib aan fikr nkun ni, ke Uwumbor aatuuntiib aa bi, ke unii aawiin mu aa bi. Farisii yaab mu len ke binib ga fikr nkun ni, Uwumbor aatuuntiib bi, unii aawiin mu bi. <sup>9</sup> Le bi kpack tob kinikpakpak, ki tar mpcoen pu, ki kpa kifuuk. Le Uwumbor aakaal aamomokb ponn ni bibaa, bi ye Farisii yaab na fii sil, ki kpack sakpen, le ki len ke, "Taa kan uja wee aataani. Nibaakan, Uwumbor aatuun, bee unii aawiin le sil len u chee."

<sup>10</sup> Le Farisii yaab ni Sajusii yaab kpack tob kinikpakpak sakpen, ki njma tijar. Le butob aajab aapol ngbaan dak ke bi ga chuu daa par Poco. Le u tuk waajab ke bi

<sup>\*\*22:25</sup> : Unii yaa ye Rom aanii kan, baakaal aa kii ke bi daa utafal see bi puen jin u tibor ki kan waataani.

<sup>\*\*23:5</sup> : Lik Nnyam 22.28.

buen ti gaa ni P̄oɔl, ki nyan u bi chee, ki nan di u ḷa baadichal ni.

<sup>11</sup> Kinyeek ngbaan, le Tidindaan dan nan sil P̄oɔl chee, ki nan bui u, “Chuu aabaa, ki taa san ijawaan. Saah tuk binib maabɔr Jerusalem ponn ni pu na, kina le aa ga tuk bi maabɔr Rom aatiŋ mu ni.”

### Juu yaab aah kpokl ke bi ga ku P̄oɔl pu na

<sup>12</sup> Naah woln kitaak kichakpiik ni na, le Juu yaab bibaa kuun t̄ob chee, ki kpokl, le ki puu ke baan ji tijikaar, kaan nyu nnyun mu see bi ku P̄oɔl. <sup>13</sup> Binib bi nan kpokl kina na jer bijab imonko ilee. <sup>14</sup> Bi nan buen Uwumbɔr aatotoorninkpiib ni Juu yaab aaninkpiib chee, ki ti bui bi, “Ti puu ke taan ji nibaa see ti ku P̄oɔl. <sup>15</sup> Ti ban ke ni ni bibɔjirb aaninkpiib tun unii ke u buen butɔb aajab aaninkpel chee, ki ti tuk u ke u li joo ni P̄oɔl ni chee, ke ni ban ni nan ki baa u tibɔr tiken kpee la. Bi yaa joo u choo kan, waan fuu ni do. Ti ga ku u nsan ponn ni.”

<sup>16</sup> Le P̄oɔl aaninkpan aajapcoɔn ḷun baah kpokl pu na. Le u koo butɔb aajab aadichal ni, ki ti tuk P̄oɔl. <sup>17</sup> Le P̄oɔl yin butɔb aajab aaninkpel ubaa, ki tuk u ke u di unachipcoɔn na buen butɔb aajab aapol chee, aan u ti tuk u tibɔr tibaa. <sup>18</sup> Le uninkpel ngbaan di u buen butɔb aajab aapol chee, ki ti bui u, “Unaagbija P̄oɔl le yin mi, ke m dan u chee, le ki ti tuk mi ke m di unachipcoɔn wee dan aa chee, u nan tuk si tibɔr tibaa.”

<sup>19</sup> Le upol ngbaan chuu unjaal ki dar u buen n-gbaan, ki ti baa u, “Aa ban aa tuk mi bayaar?”

<sup>20</sup> Le u bui u, “Juu yaab na kpokl ke bi ga tuk si ke aa fe li joo ni P̄oɔl bibɔjirb aaninkpiib chee, ke bi nan baa u tibɔr tiken kpee. <sup>21</sup> Bi yaa bui si kina kan, aa taa kii. Bijab bi jer imonko ilee na ga bɔr ki kiir P̄oɔl bi nan ku u. Bi mɔmɔk puu ke baan ji tijikaar kaan nyu nnyun mu,

see bi ku u. Dandana wee bi gor ke bi ku u, ki kiir ke bi ḷun saah ga len pu na.”

<sup>22</sup> Le butɔb aajab aapol bui unachipcoɔn ngbaan, “Taa ki tuk unii ke aa tuk mi tibɔr ngbaan,” le ki cha u buen.

### Baah di P̄oɔl buen Ubɔr Feliks chee pu na

<sup>23</sup> Le upol ngbaan yin waajab aaninkpiib ponn ni bilee, ke bi dan u chee, le ki nan tuk bi ke bi ban butɔb aajab ikui ilee, ni bitandam imonko itaa ni kipiik, ni butɔb aajab bi joo tikpaatunn na ikui ilee, aan bi gor ki nan buen kinyeek ngbaan tikur tiwae Siisarea aatiŋ ni, <sup>24</sup> ki ban itaan tii P̄oɔl aan u li dig ni, ki di u buen Ubɔr Feliks chee, u nyan chakb, nibaa taa ḷa u. <sup>25</sup> Upol ngbaan nan ḷmee kigbaŋ ke bi tii Ubɔr Feliks. U nan ḷmee ke:

<sup>26</sup> “Min Klodius Laisias, m doon si Ubɔrkpaan Feliks. <sup>27</sup> Juu yaab nan chuu uja wee, ki gbaa u ki ti ban bi ku u. M ḷun ke u ye Rom aani la. Maah ḷun kina na, le m di butɔb aajab buen aan ti ti nyan ni u, <sup>28</sup> ki kpaan di u buen Juu yaab aabɔjirb aaninkpiib chee. M nan ban ke m ti bee baah len ke u ḷa pu na. <sup>29</sup> Baah jin u tibɔr na, le m bee ke waah ḷa pu na, naa neer ti ku u, kaa neer ti di u ḷa kiyondiik ni. Baakaal pu, le bi galn u. Bi len ke u bii baakaal. <sup>30</sup> Le unii ubaa tuk mi ke Juu yaab kpokl ke bi ti ku u. Maah ḷun kina na, libuul ngbaan ni le m di u tun ni aa chee, ki tuk binib bi galn u na, ke bi mu dan aa chee ki nan tuk si waah ḷa pu na.”

<sup>31</sup> T̄ɔ, butɔb aajab ngbaan nan ḷa baopol aah tuk bi pu na. Kinyeek ngbaan, le bi nan di P̄oɔl buen Antipatris aatiŋ ni. <sup>32</sup> Naah woln kitaak na, le butɔb aajab bi chuun kitij na labr kun baadichal ni, Jerusalem ponn ni. Le bitandam ngbaan cheen P̄oɔl buen Siisarea

aatiq ni.<sup>33</sup> Baah ti fuu nima na, le bi di kigbañ ngbaan tii Ubør Feliks, ki di Pœol kaan u chee.<sup>34</sup> Ubør ngbaan nan karn kigbañ ngbaan, le ki baa Pœol, "Aa nyan ni kilatiq ni?" Le Pœol mu bui u, "M nyan ni Silisia aatiq ni la." Waah qjun ke u nyan ni Silisia aatiq ni na,<sup>35</sup> le u bui u, "Binib bi galn si na yaa fuu ni kan, m ga ji si tibør," le ki tuk waatɔb aajab ke bi di Pœol ja lidichal li Ubør Herod nan maa li na ni, ki cha bi li kii u.

### Juu yaab aah bii Pœol pu na

**24** Iwiin ijmu nan jer, le Uwumbør aatotoorninkpel Ananias dan Sisarea aatiq ni. Le Juu yaab aaninkpiib bibaa ni lɔya ubaa dii u. Bi yin lɔya ngbaan ke Tetulus. Bi nan sil Ubør Feliks aanimbiin ni, ki bii Pœol.<sup>2</sup> Le bi yin Pœol ke u dan. Waah fuu ni na, le Tetulus piin ki bi bii u, le ki bui Ubør Feliks:

"Timi aaninkpel, ti pak si. Aa joo timi tiqann, ki cha timi aatiq kee mɔ. Aa kpa nlan, ki ter timi aanib sakpen.<sup>3</sup> Ti mɔmɔk nyi saah qjani pu na, ki dooni si mbamɔm.<sup>4</sup> Maan len tibør ti li wiir. Maa ban ke ni qjun si. Pœon aabaa, ki li pel maah ban m len pu na.<sup>5</sup> Ti nyi ke Pœol muk binib sakpen. U muk Juu yaab bi bi dulnyaa wee mɔmɔk ni na, ki cha bi qjmo tijar. Binib bibaa bi, ki dii Yesu u ye Nasaref aatiq aanii na aasan. Pœol ye bi ponn ni aaninkpel ubaa la.<sup>6</sup> U nan ban u bii Uwumbør Aadichal. Nima pu le ti chuu u. [Ti nan ban ti ji u tibør, timi aakaal aah dii pu na.<sup>7</sup> Le butɔb aajab aapol Laisias dan nan nyan u mpɔɔn ti chee,<sup>8</sup> ki tuk binib bi galn u na, ke bi li choo aa chee ki nan len waah ja pu na.] Aa yaa jin u tibør ngbaan kan, sin aabaa ga bee tibør ngbaan aah bi pu na."<sup>9</sup> Tetulus aah len pu na, le Juu yaab kpaan kii, ke ti gbii.

### Pœol aah tuk Ubør Feliks waabamɔn pu na

<sup>10</sup> Le Feliks yoor ujaal ki tii Pœol nsan ke u len.

Le Pœol bui ke, "M nyi ke aa joo maanib ngbaan qjibin pam. Kina pu na, m kpa mpopiin ke m tuk si maabamɔn.<sup>11</sup> M nan buen Jerusalem m ti doon Uwumbør. Naa jer iwiin kipiik ni ilee. Aa ga qjmaa baa binib ke ti gbii aan taa gbii.<sup>12</sup> Maah nan bi Uwumbør Aadichal ni, ni mmeen aadir ni, ni kitin ni na, Juu yaab aa kan mi m kpak unii ubaa kinikpkapk, kaa kan mi m muk unii ubaa.<sup>13</sup> Bi bii mi la, ki mu aa qjmaa mɔk ke baah len pu na gbii.<sup>14</sup> M kii ke ti gbii ke maah dooni tiyajatiib Aawumbør pu na, m dii Yesu aasan la. Juu yaab len ke nsan ngbaan aa ye mbamɔn. M kii Moses aakaal mɔmɔk mu, ki kii tii Uwumbør aabɔɔnabiib aah nan qjmees pu na mɔmɔk.<sup>15</sup> M kpa limakl ke Uwumbør ga fikr binib bi qjan na, ni bi kaa qjan na mɔmɔk nkun ni. Juu yaab mu kpa limakl kina la.<sup>16</sup> N-yoonn mɔmɔk m pɔɔni mbaa ke m taa li kpa taani Uwumbør ni binib chee.

<sup>17</sup> "Qjibin qjibaa le maa nan bi Jerusalem. M nan ki buen nima m ti tii maanib bi ye bigiim na qjimobil, ki toor kitork tii Uwumbør.<sup>18</sup> M nan buen Uwumbør Aadichal ni, m ti ja mbaa chain, aan ki toor kitork tii Uwumbør. Maah ja kina na, le Juu yaab kan mi Uwumbør Aadichal ni. Kinipaak aa nan bi m chee. Kifuuk mu aa nan bi m chee.<sup>19</sup> Le Juu yaab bibaa, bi nyan ni Asia aatim ni na mu nan bi nima. Bi yaa kaa gee maah ja pu na kan, ni qjan ke bima bibaa dan aa chee, ki nan tuk si maah ja pu na.<sup>20</sup> Bibɔjirb aaninkpiib jin mi tibør Jerusalem ponn ni. Bi yaa kan maataani kan, cha binib ngbaan tuk si.<sup>21</sup> Maah nan si bi chee na, le m teen ke, 'M pak ke Uwumbør ga fikr bi kpo na nkun ni. Nima pu le ni ji mi tibør din.'

Maah len kina na, nibaakan bi dak ke naa ḥjan.”

<sup>22</sup> Feliks nan nyi Yesu aasan aabɔr. Le u bui bi, “M ga di cha kina la. Butɔb aa-jab aapol Laisias yaa fuu ni kan, m ga lik maah ga ḥja tibɔr ngbaan pu na.” <sup>23</sup> U tuk butɔb aa-jab nkub aaninkpel ke u cha waajab li kii Pɔɔl, ki taa joo u mpɔɔn, ki cha ujɔtiib li ter u ki tii u waah ban pu na.

<sup>24</sup> Iwiin ilee aah jer na, le Ubɔr Feliks ni upuu Drusila fuu ni. Upuu nan ye Juu aabo la. Le Feliks tun unii ke u ti yin ni Pɔɔl ke u dan nan len tibɔr ngbaan aan bi pel. Le Pɔɔl tuk bi baah ga ḥja pu ki gaa Yesu Kristo ki kii, <sup>25</sup> ki ḥja bininyaam, ki li chur bibaa, ki taa tun titunwanbir na; ba pu? Uwumbɔr ga ji binib mɔmɔk tibɔr. Pɔɔl aah len kina na, le ijawaan chuu Feliks. Le u bui Pɔɔl, “Ni neer aa di cha kina. M yaa kan nfaawom kan, m ga yin si.” <sup>26</sup> Le Feliks dak ke nibaakan Pɔɔl ga tii u njimobil, aan u piir u lii. Nima pu na, n-yoonn mɔmɔk kan, u ti yin ni u ki nan len u chee tibɔr.

<sup>27</sup> ḅibin ḅilee nan jer. Le ubɔr u bi yin u ke Posius Festus na dan nan lej Feliks aalelen. Feliks nan ban ke u piir Juu yaab aasui. Nima pu na, waa nan nyan Pɔɔl kiyondiik ni. U nan cha u beenin pii, le ki buen.

### Pɔɔl aah len ke u ban ke Ubɔrkpaan Siisa ji waabɔr pu na

**25** Ubɔr Festus nan fuu Siisarea aatiŋ ni, u nan lej Ubɔr Feliks aalelen. Waah bi nima iwiin itaa na, le u buen Jerusalem. <sup>2</sup> Waah ti bi nima na, le Uwumbɔr aatotoorninkpiib ni Juu yaab aaninkpiib dan u chee, ki nan bii Pɔɔl, ki gan Ubɔr Festus <sup>3</sup> ke u pɔɔn ubaa ki tun binib bi ti yoor ni Pɔɔl ki di dan Jerusalem. Bi nan puen kpokl ke u yaa choo kan, bi ga ku u nsan ponn ni. <sup>4</sup> Le Festus bui bi, “Ti laa beenin joo u Siisarea aatiŋ ni. Ni yaa kpee siib kan, m mu

ga ki labr buen nima. <sup>5</sup> U yaa kpa taani kan, cha nimi aaninkpiib dii mi nima, aan ki ti galn u.”

<sup>6</sup> Festus nan bi bi chee ki ti saa iwiin kipiik, bee iniin, le ki gir cha Siisarea aatiŋ ni, ki ti fuu nima. Naah woln kitaak na, le u koo libɔjil aadiik ni, ki ti kal ubɔjir aa-jal pu, le ki tun ke bi ti li joo ni Pɔɔl. <sup>7</sup> Juu yaab bi nyan ni Jerusalem na mu nan bi nima. Pɔɔl aah fuu ni na, le bi sil goln u, ki bii u ki ti nyaj. Le baa ḅmaa mɔk ke baah len pu na gbii. <sup>8</sup> Le Pɔɔl bui ke, “Maa bii Juu yaab aakaal, kaa bii Uwumbɔr Aadichal, kaa bii Rom yaab Aabɔrkpaan Siisa.”

<sup>9</sup> Le Festus ban ke u piir Juu yaab aasui. Nima pu le u baa Pɔɔl, “Aa ga li gee ke aa buen Jerusalem m ti ji si tibɔr nima aa?”

<sup>10</sup> Le Pɔɔl bui u, “M bi Ubɔrkpaan Siisa aabɔjir aadiik ni, nin chee ni ḅneer bi ji mi tibɔr na. Sin aabaa nyi ke maa ḥja Juu yaab bakaa. <sup>11</sup> M yaa ba ḥja bakaa, bee m yaa ti ki ḥja tiwan ni ḅneer nkun na kan, maa ba ga ban ke m ḅmar. Baah bii mi pu na yaa kaa gbii kan, ubaa aan ḅmaa di mi ḥja biŋaal ni. M ban ke Ubɔrkpaan Siisa ji mi tibɔr.”

<sup>12</sup> Le Ubɔr Festus len waakpambalb chee ke u lik waah ga ḥja pu na, nee aapuɔb le u tuk Pɔɔl, “Aa len ke aa ban ke Siisa ji si tibɔr. Aa ga buen u chee, ni ti len ti.”

### Ubɔr Festus aah tuk Ubɔr Agripa pu na

<sup>13</sup> Naah ḥja iwiin ilee na, le Ubɔr Agripa ni uninkpan Beniis dii ni, ki dan Siisarea aatiŋ ni, bi nan doon Ubɔr Festus. <sup>14</sup> Baah bi nima iwiin ilee na, le Festus tuk u Pɔɔl aabɔr ke, “Uja ubaa bi do. Feliks nan buen le ki cha u beenin pii kiyondiik ni. <sup>15</sup> M nan buen Jerusalem. Maah nan bi nima na, le Uwumbɔr aatotoorninkpiib, ni Juu yaab aaninkpiib dan nan galn uja ngbaan. Bi ban ke m

len ke waabor bii.<sup>16</sup> Le m tuk bi ke timi Rom yaab aa ḥjani kina. Binib yaa galn unii kan, ti cha bi kuun ni t̄b la, aan u ti ḥjun baah galn u pu na, ki cha u mu len waabam̄n aah bi pu na. Taan daa unii aatafal see ti puen jin u tib̄r kina.<sup>17</sup> Maah tuk bi kina na, le bi nan dan do. Baah fuu ni na, maa taan. Naah woln kitaak na, m nan buen lib̄ojil aadiik ni, ki ti kal ub̄ojir aajal pu, ki tun binib ke bi ti li joo ni P̄oɔl.<sup>18</sup> Waah fuu ni na, le binib bi galn u na fii ke bi bii u. M nan dak ke bi ga len ke u ḥja bakaa ki ti nyān la. Ni mu aa ye kina.<sup>19</sup> Baah kpak u pu na, ni ye baakaal aabor, ki mu ye uja u bi yin u ke Yesu na aabor pu la. Bi len ke u kpo. P̄oɔl mu beenin len ke u bi.<sup>20</sup> Maa nan nyi maah ga ḥja pu ki bee tib̄r nḡbaan na. Le m baa P̄oɔl ke u kii ke u buen Jerusalem aan bi ti ji u tib̄r nima aan waa kii?<sup>21</sup> Le u len ke u ban ke Ub̄orkpaan Siisa ji u tib̄r. Nima pu le m cha but̄b aajab kii u, ke ni saa bundaln m ga cha bi di u buen Ub̄orkpaan chee na.”

<sup>22</sup> Le Ub̄or Agripa bui Festus, “M ban ke m ḥjun uja nḡbaan aah ga len pu na.”

Le Festus bui u, “Aa ga fe ḥjun fen.”

### Baah di P̄oɔl siin Ub̄or Agripa aanimbiin ni pu na

<sup>23</sup> Naah woln kitaak na, le Ub̄or Agripa ni uninkpan Beniis dan ke bininyuum na. Le but̄b aajab aaninkpiib, ni kitig ni aaninkpiib dii bi, ki nyuñni bi. Le bi m̄om̄ok koo kidisakpej kibaa ni. Kidiik nḡbaan ni, le bi ji binib tib̄r. Baah fuu ni na, le Festus tuk binib ke bi li joo ni P̄oɔl. Le bi joo ni u.<sup>24</sup> Le Festus bui ke, “Ub̄or Agripa ni nimi bim̄ok bi do na, ti m̄om̄ok kan uja wee. Juu yaab nan dan m chee Jerusalem ponn ni, ki ki dan m chee do chee na mu, ki nan tar ke ni neer ti ku u.<sup>25</sup> Le m jin u tib̄r. Maah jin u tib̄r na, le m bee ke waa ḥja tiwan ni neer ke ti ku u na. Le uma ubaa len ke u ban ke Ub̄orkpaan na ji u tib̄r. Nima pu le m ga

cha u buen.<sup>26</sup> Le m ban ke m ḥjmee kiḡbañ tii maaninkpel ki tuk u P̄oɔl aabor. M mu aa nyi maah ga ḥjmee pu na. Nima pu le m joo ni u, u nan tuk nimi waabor. Ub̄or Agripa, m ban ke aa lik waabor nḡbaan aah bi pu na, aan ki tuk mi maah ga ḥjmee pu na.<sup>27</sup> M yaa cha bi di unaagbiija buen Ub̄orkpaan na chee, ki yaa kaa tuk u baah galn u pu na kan, naa ḥjan.”

### P̄oɔl aah tuk Ub̄or Agripa waabam̄n pu na

**26** T̄o, Ub̄or Agripa nan bui P̄oɔl, “Aa ga ḥjmaa tuk timi saab̄or aah ye pu na.”

Le P̄oɔl yoor ujaal ki doon u, ki bui ke,<sup>2</sup> “Ub̄or Agripa, maah bi do din ke m tuk si maabam̄n na, m kpa mpopiin pam. Juu yaab galn mi sakpen a.<sup>3</sup> M nyi ke aa nyi Juu yaab aakaal aah bi pu na. Aa nyi baah kpak t̄b budabu pu baakaal pu na. Kina pu na, maah kpa nsan m tuk si maabam̄n pu na, le m kpa mpopiin. M gañ si ke aa li kpa lim̄or ki li pel maah ga len pu na.

<sup>4</sup> “Maah nan ye unachip̄oɔn na, m nan bi maanib ponn ni, ni Jerusalem ponn ni.<sup>5</sup> Juu yaab m̄om̄ok nan nyi maabimbin n-yoonn nḡbaan. Bi nyi ke n-yoonn nḡbaan m̄om̄ok m nan dii Farisii yaab aasan. M nan ye binib bi dii Moses aakaal mbam̄m na ponn ni ubaa la. Bi yaa gee kan, bi ga ḥjmaa tuk si kina.<sup>6</sup> M kpa limakl ke Uwumb̄or ga gbiin tipuur ti u nan puu tii tiyaajatiib na. Nima le cha ni ji mi tib̄r din.<sup>7</sup> Timi Juu yaab aanibol kipiik ni ḥjilee dooni Uwumb̄or nwiin pu ni kinyeek, ki mu kpa limakl ke bi ga kan tipuur nḡbaan. Ub̄or Agripa, m mu kpa limakl nḡbaan, nima le cha Juu yaab galn mi.<sup>8</sup> Ba ḥja ni dak ke Uwumb̄or aan ḥjmaa fikr binib nkun ni?

<sup>9</sup> “N-yoonn mubaa, min mbaa nan dak ke ni ḥjan ke m p̄oɔk mbaa ki bii Yesu u ye Nasaref aatiq aanii na aayimbil.<sup>10</sup> Le m nan ḥja kina Jerusalem ponn ni.

M nan buen Uwumbor aatotoorninkpiib chee, ke bi tii mi nsan ke m chur Uwumbor aanib ki di ja tiyondir ni. Juu yaab yaa nan len ke bi ga ku bi kan, m mu nan keei la.<sup>11</sup> N-yoonn momok m nan chaa mmeen aadir ni ki ti dar bitafal, ki mukr bi ke bi sii Yesu. M nan gee lijuul sakpen bi pu; nima pu na, m nan buen ntim muken ponn ni, ki ti ja bi falaa.”

**Pcool aah tuk bi waah nan  
gaa Yesu ki kii pu na**  
(Lituln 9.1-19; 22.6-16)

<sup>12</sup> “Le Uwumbor aatotoorninkpiib nan tii mi nsan ke m ti chuu Yesu aanib bi nan bi Damaskus aatiij ni na. Le m nan buen nima.<sup>13</sup> Ubør Agripa, maah nan bi Damaskus aasan pu ki cha nima na, le nwiin kaasisik ni, nwiihn nyan ni paacham, ki wiin jer nwiin, ki woln ki mann gonn m ni bijab bi dii na.<sup>14</sup> Le ti momok lir kitij. Le m jyun nneel len Juu yaab aaliin ponn ni ke, ‘Scool, Scool, ba ja aa ja mi falaa? Ni pocaa di aataal lee ikokon.’<sup>15</sup> Le m baa u, ‘Ndindaan, njma ye?’ Le u bui mi, ‘Min le ye Yesu u aa ja u falaa na.<sup>16</sup> Fii sil. M dan aa chee, ke m lee si aan aa tun maatuln, ki ji seeraa, ki tuk binib saah kan mi pu na, ki tuk bi maah ga mok si n-yoonn mu choo na pu na.<sup>17</sup> M ga nyan si Juu yaab aajaal ni, ni binib bi kaa ye Juu yaab na aajaal ni, ki cha aa buen bi chee,<sup>18</sup> aan ki ti tuk bi maaliin, ki cha binimbil woln, ki nyan bi mbombocoon ni, ki cha bi li bi nwiihn ni, ki nyan bi kinimbuj aajaal ni, ki di bi ja Uwumbor aajaal ni, aan ki cha bi gaa min Yesu ki kii, aan Uwumbor di cha pinn bi baatunwanbir, ki ja bi waanib ponn ni bibaa, baah gaa min Yesu ki kii pu na pu.”

**Pcool tuk bi waatuln aah bi pu na**

<sup>19</sup> “Ubør Agripa, maah kan lijinjiir aawan paacham pu na, le m kii Yesu aamob.<sup>20</sup> Njan, m tuk binib bi nan

bi Damaskus aatiij ni na, ke bi kpeln baabimbin ki dii Uwumbor aasan, ki tun lituln li ga mok ke bi sil kpeln baabimbin na. Njan, m nan tuk bi kina Damaskus aatiij ni, le ki nin buen Jerusalem, ki nin bo dii Judea aatim momok ponn ni, le ki nin buen binib bi kaa ye Juu yaab na aatim ponn ni, ki ti tuk bi mu kina.<sup>21</sup> Nima pu le Juu yaab chuu mi Uwumbor Aadichal ni, ki ban bi ku mi.<sup>22</sup> Le Uwumbor mu ter mi n-yoonn momok ki nan saa din, ki cha m si do, ki ye waaseeraadaan, ki tuk binib aabon momok waabor. M po tuk bi Uwumbor aabonabtiib ni Moses aah nan len pu na. Bi nan len tiwan ni ga nan ja na,<sup>23</sup> ke Kristo u ga gaa binib lii na ga nan ji falaa, ki li ye unii u ga puen fikr nkun ni na, ki tuk Juu yaab ni binib bi kaa ye Juu yaab na tibor ti ga woln binimbil na.”

<sup>24</sup> Pcool aah len kina na, le Festus teen ke, “Pcool, aa ye uwaar la. Saah bae mbaem sakpen na le cha aa waarr.”

<sup>25</sup> Le Pcool bui u, “Ubør Festus, maa ye uwaar. Maah len pu na, ni ye mbamon la. Naa ye uwaar aaliin.<sup>26</sup> Ubør Agripa nyi tibor ngbaan. Nima pu le m di lipobil len unimbiin ni, m nyi ke u nyi tibor timina, tibaa aa bør u. Tibor ngbaan nan ja binib aanimbil ni la.<sup>27</sup> Ubør Agripa, aa gaa Uwumbor aabonabtiib aah nan len pu na ki kii ii? M nyi ke aa gaa kii.”

<sup>28</sup> Le Agripa baa Pcool, “Aa dak ke naa pocoo m ja Kristo yoo la aa?”

<sup>29</sup> Le Pcool bui u, “M mee Uwumbor ke ni pocoye naa pocoye, aa ni binib bimok pel maah len pu dandana wee na, ja Kristo yaab ke min na. M mu aa ban ke bi buu nimi tikululn, ke min na.”

<sup>30</sup> Le Ubør Agripa, ni Ubør Festus, ni Beniis, ni binib bi ka bi chee na, fii nyan lipaal.<sup>31</sup> Baah nyan lipaal na, le bi ti bui tob, “Uja ngbaan aah ja pu na, naa neer ti ku u, kaa neer ti di u ja kiyondiik ni.”

<sup>32</sup> Le Agripa bui Festus, “Uja ngbaan yaa

kaa ba len ke u ban ke Ubɔrkpaan Siisa ji u tibɔr kan, ti ba ga ŋmaa di u lii."

### Pɔɔl aah buen Rom aatiŋ ni pu na

**27** Tɔ, bi nan len ke ti ga buen Ubɔrkpaan Siisa chee, Itali aatiŋ ni. Le bi di Pɔɔl ni binaagbiib biken tii butɔb aajab aaninkpel u bi yin u ke Julius na. Butɔb aajab ngbaan aayimbił nan ye ke "Ubɔrkpaan aajab." <sup>2</sup> Le ti koo buŋɔb ni. Buŋɔb ngbaan nyan ni kitin kibaa ni, bi yin ki ke Adramitium. Bi nan gor ke bi di bu buen Asia aatiŋ ni la. Le ti koo ki buen. Uja ubaa mu nan dii timi, bi yin u ke Aristakus. U nan ye Masedonia aatiŋ aanii, ki nyan ni Tesalonika aatiŋ ni. <sup>3</sup> Naah woln kitaak na, le ti fuu kitin kibaa ni, bi yin ki ke Saidonn. Le butɔb aajab aaninkpel Julius gee Pɔɔl aabɔr, ki cha u buen ujɔtiib chee nima, u ti kan waah ban pu na. <sup>4</sup> Tɔ, ti nan nyan nima, le libuln daar took timi. Nima pu le ti peŋ lidikl libaa, bi yin li ke Saiprus, le libuln aa ki pii timi. <sup>5</sup> Le ti jer Silia aatiŋ, ni Pamfilia aatiŋ, ki ti fuu Mira aatiŋ ki bi Lisia aatiŋ ni na. <sup>6</sup> Taah ti fuu nima na, le butɔb aajab aaninkpel ngbaan kan buŋɔb bu nyan ni Aleksandria aatiŋ ni, ki ga buen Itali aatiŋ ni na. Le u cha ti mɔmɔk koo buŋɔb ngbaan ponn ni.

<sup>7</sup> Buŋɔb ngbaan aa nan chuun mala. Ni nan pɔɔ la. Bu nan yunn nsan ni siib, le ki ti fuu Kenaidus aatiŋ chee. Libuln aa nan kii le ti nan ti bee nsan ponn ni. Nima pu na, ti nan ti peŋ lidikl libaa, bi yin li ke Krete. Le ti jer Salmone aatiŋ, <sup>8</sup> ki kpak nnyusakpem na aagbaan. Ni nan pɔɔ sakpen a. Le ti nan ti fuu kiloloŋ kibaa ni, bi yin ki ke Kiloloŋ Nyaan. Nima chee aa daa Lasea aatiŋ ni.

<sup>9</sup> Ti nan yunn nsan ngbaan ponn ni, ki ti pii Juu yaab aamɔlul daal, buyoonn kibuu ga ŋmaa fii na. Naa ba nan ŋjan ke ti ki li joo buŋɔb. Ni nan kpa linimaln sakpen. Le Pɔɔl sur bi ke, <sup>10</sup> "Njɔtiib, ti yaa ki joo buŋɔb kan, m nyi ke ti ga kan

linimaln. ɿitun ni buŋɔb na ga bii. Binib pam mu ga kpo ti ponn ni." <sup>11</sup> Le butɔb aajab aaninkpel aa kii Pɔɔl aah len pu na. U kii սյօծան ni բիշօյաբ aaninkpel aah len pu na la. <sup>12</sup> Libuln ni ստացած aayoonn yaa ti fuu ni ն-յօնն mu na kan, naa լյան ti li bi kiloloŋ ngbaan ponn ni. Nima le ti ponn ni binib pam bui ke ni լյան ti նյան kiloloŋ ngbaan ponn ni, ki pɔɔk tibaa ke ti fuu Fiiniks, կիւյ կի bi Krete aadikl paab na. Kiloloŋ bi nima mu. Libuln ni ստացած yaa fuu ni ն-յօնն mu na kan, ni լյան ke ժամանակ li bi ki ponn ni. Kiloloŋ ngbaan aah bi liwilir wɔb pu na, nima le libuln aan ŋmaa pii timi nima.

### Libupօքօվ aah muk timi buŋɔb ni pu na

<sup>13</sup> Le libuln li kaa pɔɔ na nyan ni լյանցի wɔb. Le bi bui ke ni յեր կ տի նյան kiloloŋ ngbaan ponn ni. Le bi chuu gbiln buŋɔb na, le ki di siir. Bi nan joo bu kpak Krete aadikl ngbaan chee la.

<sup>14</sup> Naah kpee siib na, le libupօքօվ nyan ni լյանցան wɔb ki daar choo, <sup>15</sup> ki daar յերնi buŋɔb na, ki cha bu sil. Libuln daar tooh bu la. Nima pu na, bu aa nan ŋmaa chuun. Le ti cha bu յօնն libuln.

<sup>16</sup> Le ti ti fuu lidikl libaa chee, bi yin li ke Koda, li bi լյանցան wɔb. Ti nan peŋ lidikl ngbaan, le libuln aa ki pii timi ki pɔɔ. Le timi այսակպem dar buŋɔb waatiib bubaa. Taah peŋ lidikl ngbaan na, le ti chuu yoor buŋɔb waatiib na յա busakpem ni. <sup>17</sup> Bi nan di ijmin gbin punn punn busakpem na. Litambol nan ծո nnyun ni, Libia aatiŋ chee, le bi dak ke nibaakan buŋɔb na ga dii litambol ngbaan paab. Nima pu na, bi nan chuu gbiln buŋɔb aakekeln li nan bi paacham na, ki cha bu յօնն libuln. <sup>18</sup> Libuln nan beenin daar ki pɔɔ, le buŋɔb na յերնi. Naah woln kitaak na, le bi chuu nyan ni լյիտուն na ki di mee lii nnyun ni; <sup>19</sup> ki ki woln kitaak, le ti chuu nyan buŋɔb

aawan mu ki di lii nnyun ni.<sup>20</sup> Taah nan bi bu ponn ni na, ni nan yunn le taa njmaa kan nwiin, kaa waa njmabil mu, ntaalangbam pu. Libuln mu nan beenin daar, ki p̄oɔl. Taa nan ki dak ke ti ga njmar.

<sup>21</sup>T̄ɔl, baa nan ki ji tijikaar, ni ti yunn. Baah kaa ki ji tijikaar ni yunn na, le P̄oɔl fii sil binimbiin ni, ki bui bi, “Nj̄tiib, ni yaa ba pel maah nan len pu na, ki yaa kaa ba nyan ni Krete aadikl ni kan, ni ba ga li ñan. Timi aawan aa ba ga bii.”<sup>22</sup>T̄ɔl, m gan nimi la, chuu nibaa man. Ti ponn ni unii ubaa aan kpo. Buŋj̄ob ngbaan baanja le ga bii.<sup>23</sup>M ye Uwumbor aanii, le ki dooni u. Kinyeek na, le waatuun ubaa dan nan sil m chee,<sup>24</sup>ki bui mi, ‘P̄oɔl, taa san ijawaan. Aa ga sil Ub̄orkpaan Siisa aanimbiin ni. Uwumbor ga cha binib bimok bi buŋj̄ob bue ponn ni na njmar, saanimbaak pu.’<sup>25</sup>Nj̄tiib, nima pu na, chuu nibaa man. M pak ke Uwumbor ga ña waah tuk mi pu na.<sup>26</sup>Libuln mu ga daa buŋj̄ob na ti tam lidikl libaa, ki bii bu.”

<sup>27</sup>T̄ɔl, libupɔɔɔl ngbaan nan daar iwiin kipiik ni inaa. Kinyeek, le libuln nan buenin joo timi nnyusakpem na ponn ni. Bi yin nnyusakpem ngbaan ke Adria. Kinyetaasiik, le bijɔɔjaab dak ke ti yak kitij kibaa ni.<sup>28</sup>Le bi ban bi tɔŋ lik nnyun aah nyoo pu na. Bi nan di nj̄min di gbin tikur ti nyuun na, ki di lli nnyun ni, ki tɔŋ lik, ki ñaq ñitaa nkub ni moninko. Le bi too foor kpee, le ki ki tɔŋ lik, ki ñaq ñitaa imonko inaa ni kipiik.<sup>29</sup>Le bi dak ke nibaakan buŋj̄ob ngbaan ga duur ñitakpal ki bii. Nima pu na, bi nan di tikur tinaa gbin ijmin inaa pu, ki di gbin liŋɔɔjuul, le ti doon tam kitij, ki joo bu. Bu aan ki njmaa chuun. Baah ña kina na, le bi mee Uwumbor ke u cha kitaak woln.<sup>30</sup>Le bijɔɔjaab ban ke bi loon nyan buŋj̄ob na ni. Le bi chuu nyan buŋj̄ob waatiib na di deen nnyun pu, ki njmann ke bi chuu nyan tikur tibaa le liŋɔɔyil pu.

<sup>31</sup>T̄ɔl, P̄oɔl nan bee baah ban bi ña pu na, le ki bui butɔb aajab ni baaninkpel, “Bijɔɔjaab ngbaan yaa nyan buŋj̄ob ngbaan ponn ni kan, naan njmaa njmar.”<sup>32</sup>Waah len kina na, le butɔb aajab chuu buŋj̄ob waatiib na aajmin gii, ki di bu lii, ki cha busakpem na.

<sup>33</sup>Kichakpinaanyeek ni le P̄oɔl gaŋ bi mɔmɔk ke bi pɔɔk bibaa ki ji tijikaar, ki bui bi, “Iwiin kipiik ni inaa le na, nimi aalandak muk nimi, le ni lul bumɔb.<sup>34</sup>Ni pɔɔk nibaa ki ji pɔkaa man. Ni ga ter nimi, ni kan mpɔɔn. Nibaa aan ña unii ubaa do ponn ni.”<sup>35</sup>P̄oɔl aah len kina na, le u voor boroboro, ki doon Uwumbor bi mɔmɔk aanimbil ni, ki gii ki njman.<sup>36</sup>Waah ña kina na, le bi mɔmɔk chuu bibaa, ki mu jin tijikaar.<sup>37</sup>Ti nan ye binib ikui ilee ni imonko itaa ni kipiik ni biloob le buŋj̄ob ngbaan ponn ni.<sup>38</sup>Le bi mɔmɔk njman ti bab. Baah njman bab na, le bi di tijikaar ti gur na di mee nnyun ni. Bi nan ban ke buŋj̄ob ngbaan yook la.

### Timi aajɔɔb aah bii pu na

<sup>39</sup>Kitaak aah woln na, le ti kan kitij. Le bijɔɔjaab aa nyi kitij ngbaan ni. Le bi kan kilolɔŋ. Litambol mu dɔ kilolɔŋ ngbaan aagbaan. Le bi len ke bi ga pɔɔn bibaa ki cha buŋj̄ob na ti nyal litambol ngbaan paab.<sup>40</sup>Le bi chuu geei tikur na aajmin, le ti bee nnyun ni. Le bi chuu gbiln tiŋɔɔpann aajmin, ki nan di likekeln gbin liŋɔɔyil ndɔ pu paacham. Libuln aah daar na, le bi ban ke likekeln ngbaan li joo buŋj̄ob chuun cha nnyun aagbaan. Le bu chuu buen.<sup>41</sup>Litambol libaa nan dɔ nnyun ponn ni, le baa waa li, ki di dii lipaab. Le liŋɔɔyil chɔb lipaab, kaan ki njmaa chuun. Tinyunkpenn nan gbaa buŋj̄ob na le liŋɔɔjuul ti wii.

<sup>42</sup>T̄ɔl, butɔb aajab nan dak ke nibaakan binaagbiib na ga yuk lir nnyun ni, ki wo nyan, aan ki san njmar. Kina pu na, bi nan ban bi ku bi mɔmɔk.<sup>43</sup>Butɔb aajab aaninkpel aa nan ban ke bi ku P̄oɔl, nima

pu le waa kii. U nan tuk bi ke binib bi ḥmaa wo nnyun na puen yuk lir nnyun ponn ni, ki wo buen nnyun aagbaan, ki ti nyan;<sup>44</sup> ke binib bi kaa ḥmaa wo nnyun na nyoon ḥikpan, ni ḥiṣbok, ki li cha nnyun aagbaan, ki ti nyan. Le ti ḥa kina. Le ti mɔmɔk ti nyan.

### Taah fuu Malta aatiq ni pu na

**28** Taah nyan nnyun ngbaan ni na, le bi tuk timi ke bi yin lidikl ngbaan ke Malta. <sup>2</sup>Le kitij ngbaan aanib gaa timi ki ḥa timi tijann pam. Le uteal piin ki bi nu, le tiwoor bi. Le bi tuur mmii tii timi. <sup>3</sup>Le Pɔɔl ti peei ni idɔ nan di ḥa mmii ni. Waah di i ḥa mmii ni na, le i top. Le uwaa nyan i ni, ki juu dab ujaal, ki jɔn. <sup>4</sup>Waah juu dab ujaal ki jɔn na, le kitij ngbaan ponn ni aanib kan, ki bui tɔb ke uja ngbaan ye unikur, le ki nyan ni nnyusakpem ni; Uwumbɔr mu aan cha u ḥmar. <sup>5</sup>Tɔ, Pɔɔl nan gbok ujaal, le uwaa na lir mmii ni. Naa ḥa u nibaa. <sup>6</sup>Bi dak ke ni ga duun la, ni yaa kaa ye kina kan, u ga kpo. Bi nan lik le ni ti yunn, ki mu aa kan nibaa ḥa u. Le bi ki dak ke u ye liwaal la, le ki kpalm unii.

<sup>7</sup>Tɔ, kitij ngbaan aanib aaninkpel mu nan bi. Bi yin u ke Publius. Waasaak aa nan daa taah bi nin chee na. Le u gaa timi, ki chann timi tichann ki ḥa timi tibulchinn iwiin itaa. <sup>8</sup>Ute nan bun, ki dɔ kidiik ni. Uwon nan ton, le u peel nsin. Pɔɔl nan koo u chee kidiik ni, ki ti mee Uwumbɔr tii u, ki ti di ujaal paan u pu, le u pɔɔk. <sup>9</sup>Pɔɔl aah ḥa kina na, le bibum biken bi bi lidikl ngbaan aatiq ni na mu dan Pɔɔl chee, le u cha bi mu pɔɔk. <sup>10</sup>Le bi tii timi ipiin pam. Taah nan ban ti buen na, bi nan ki tii timi, timi aasachuln aapiin.

### Taah nyan Malta aadikl pu ki buen Rom aatiq ni pu na

<sup>11</sup>Ti nan bi nima ijmal itaa, le bujɔb bubaa nan bi nima tiwoor ni libuln

yoonn. Bu nyan ni kitij kibaa ni, bi yin ki ke Aleksandria. Bi nan yin bujɔb ngbaan ke “Bijaam.” Le ti koo bu ni, ki buen. <sup>12</sup>Ti nan ti fuu kitij kibaa ni, bi yin ki ke Sirakus, ki nan bi nima iwiin itaa, <sup>13</sup>le ki nyan nima, ki buen ki ti fuu kitij kibaa ni, bi yin ki ke Regium. Naah woln kitaak na, le libuln nyan ni tipuwɔb, ki daar choo. Le ti nyan nima, ki buen. Iwiin ilee le ti nan ti fuu kitij kibaa ni, bi yin ki ke Puteoli. <sup>14</sup>Ti nan kan Yesu aanib bibaa nima. Le bi ganj timi ke ti li bi bi chee ki ti saa iwiin ilole. Iwiin ilole ngbaan aah jer na, le ti chuun kitij ki buen Rom aatiq ni. <sup>15</sup>Yesu aanib bi nan bi Rom aatiq ni na nan ḥun ke ti choo. Le bi tooh ni timi nsan pu. Bibaa nan tooh ni timi Apius Aanyaq ponn ni, le bibaa mu tooh ni timi Tidir Daakaan Titaa na chee. Pɔɔl aah kan bi na, le u doon Uwumbɔr, ki kan lipobil.

### Pɔɔl aah moon Yesu aabor Rom aatiq ni pu na

<sup>16</sup>Tɔ, ti nan ti fuu Rom aatiq ni. Taah fuu nima na, le bi cha Pɔɔl koo kidiik kibaa ni, le butɔb aaja ubaa si kii u.

<sup>17</sup>Iwiin itaa aah jer na, le Pɔɔl yin Juu yaab aaninkpiib ke bi kuun ni u chee. Baah kuun ni u chee na, le u bui bi, “Nnaabitib, maa ḥa timi aanib bakaa, kaa bii tiyaajatiib aakaal. Bi po chuu mi Jerusalem ni ki di mi ḥa Rom yaab aanyaal ni. <sup>18</sup>Bi nan jin mi tibɔr, le ki bee ke maa ḥa bakaa, naa neer bi ku mi. Le bi ban ke bi di cha mi. <sup>19</sup>Le Juu yaab aa kii ke bi di cha mi. Nima pu na, m len ke m ban ke Ubɔrkpaan Siisa le ji mi tibɔr ngbaan. Naa ye ke m ban ke m galn maanib u chee. <sup>20</sup>Nima pu le m yin nimi ke ni dan m chee, aan ti nan len tɔb chee tibɔr. Timi Israel yaab kpa limakl ke unii u ga gaa timi lii na ga dan. Limakl ngbaan pu, le bi buu mi tikululn tee.”

<sup>21</sup>Le bi bui u, “Judea aatiq aanib aa ḥmee saabɔr kigbañ ni tii ni timi. Tina

aabo ubaa aa nyan ni nima, ki nan tuk timi saabør, kaa len tibøbir aa pu. <sup>22</sup>Ti nyi ke bi len ntim mɔmɔk ponn ni ke saah dii nsan mu na aa ḥjan. Nima pu na, ti ban ti ḥjun tibør ti bi aamøb ni na.”

<sup>23</sup>Le bi siin bundaln bi ga ki kuun Pɔɔl chee na. Liyaadaal aah fuu ni na, bi nan ki kuun ni waadiik ni, ki wiir pam. U nan len bi chee tibør kichakpiik ni ki nan saa kijook, ki tuk bi Uwumbør aanaan aabør, ke Moses ni Uwumbør aabɔnabtiib nan ḥjamee Yesu aabør, Uwumbør Aagbaŋ ponn ni. Pɔɔl nan pɔɔni ubaa ke bi gaa Yesu ki kii. <sup>24</sup>Juu yaab bibaa kii tii waah len pu na, bibaa mu aa kii tii. <sup>25</sup>Le bi kpak tɔb kinikpakpak. Baah ban bi nyan Pɔɔl aadiiik ni na, le u bui bi, “Uwumbør Aafuur Nyaan nan cha waabɔnabr Aisaya tuk niyaa-jatiib mbamɔn. <sup>26</sup>U nan tuk Aisaya ke, ‘Li cha ti tuk binib ngbaan ke Uwumbør len ke:

Ni ga pel ki pel, kaan bee maaliin aatataa.

Ni ga lik ki lik, kaan li waa.

<sup>27</sup>Binib ngbaan aasui aa bi nibaa ni.

Bitafal kpaa la.

Bi ḥjub binimbil, kaa ban ke binimbil woln,  
kaa ban ke bitafal ḥjun,  
kaa ban ke bisui bee maaliin aatataa,  
kaa ban ke bi kpeln baabimbin ki dii  
maasan,  
aan m tii bi laafee.”<sup>§§</sup>

<sup>28</sup>Pɔɔl nan ki bui bi, “M ban ke ni bee ke Uwumbør tun mi ke m buen binib bi kaa ye Juu yaab na chee, ki ti tuk bi waabør, aan bi mu ḥjmar. Bima le ga ḥjun.”

[<sup>29</sup>Pɔɔl aah len kina na, le Juu yaab ngbaan nyan waadiik ni, ki beenin kpak tɔb kinikpakpak sakpen.]

<sup>30</sup>Pɔɔl nan bi kidiik ngbaan ponn ni ḥjibin ḥjilee. U nan pan ki pu, le ki bi ki ni. Le binib choo nan manni u nima. Le u gaa bi mɔmɔk ni mpopiin. <sup>31</sup>U nan beenin tuk binib Uwumbør aanaan aabør, ni Tidindaan Yesu Kristo aabør, ki nan kpa lipobil ki len. Ubaa mu aa bui ke u di cha.

*Kigbaŋ ki Pɔɔl ŋmee ki tii*

## ROM YAAB

*na*

**1** Min Pɔɔl le ŋmee kigbaŋ kee. M ye Yesu Kristo aatutunn la. Uwumbor nan yin mi ke m li ye Yesu aakpambal, ki nyan mi ke m moon waabɔnyaan tee.

**2** N-yaayoonn na, Uwumbor nan puu tipuur ke u ga tii timi tibɔnyaan tee. Le waabɔnabtiib ŋmee ti waagbaŋ ki ye chain na ponn ni. **3** Tibɔnyaan ngbaan le ye Ujapɔɔn aabɔr. Uma le ye Tidindaan Yesu Kristo. Waah nan kpalm unibɔn na, bi nan ma u Ubɔr David aamaal ponn ni.

**4** Uwumbor nan fikr u nkun ni, le Waa-fuur Nyaan mɔk ke u ye uma Uwumbor Aajapɔɔn u kpa mpɔɔn na. **5** U pu le Uwumbor ja tinyoor ja m pu, le ki ja mi waakpambal, ke m tuk ʃinibol mɔmɔk ke ni ʃjan ke bi tii u naadii, ki kii waamɔb. **6** Nimi bi bi Rom aatiŋ ni na, Uwumbor yin ni mu, ke ni li ye Yesu Kristo aanib.

**7** Nima le m ŋmee kigbaŋ kee m tii nimi bimɔk bi Rom aatiŋ ni na. Uwumbor gee nimi ki yin nimi ke ni li ye waanib.

Tite Uwumbor ni Tidindaan Yesu Kristo ja tinyoor ja ni pu, ki tii nimi nsuudoon.

### Idoon aameel

**8** Yesu Kristo pu, le m dooni Maawumbor ni mɔmɔk pu; ba pu? binib bimɔk bi dulnyaa ni na ʃun naah gaa Yesu Kristo ki kii pu na. **9** M di nsui mɔmɔk tun lituln tii Uwumbor, ki tuk binib Ujapɔɔn Yesu Kristo aabɔnyaan ngbaan. Uma Uwumbor le nyi ke ni ye mbamɔn, m teer nibɔr maameen mɔmɔk ponn ni, **10** ki mee u n-yoonn mɔmɔk ke ni yaa ye waageehn kan, u tii mi nsan ke m dan nan mann

nimi dandana wee. **11** M ban ke m kan nimi, ki ter nimi aan ni kan Uwumbor Aafuur Nyaan aapiin i ga pɔɔk nitaakpab na. **12** Maah len pu na le ye ke m ni nimi aah gaa Yesu Kristo ki kii pu na, ti ga pɔɔk tɔb aataakpab.

**13** Nnaabitib, m ban ke ni bee ke n-yoonn mɔmɔk m nan ban ke m dan ni chee, le kaa kee ŋmaa dan. M ban ke m cha binib gaa Yesu ki kii Rom aatiŋ ni, ke maah ja pu ntim muken ponn ni na. **14** Ni ye limulk le ke m di tibɔnyaan tee tuk binib mɔmɔk, bi aanimbil woln na, ni bi aanimbil kaa woln na, ni bi bae mbaem na, ni bi kaa bae mbaem na. **15** Nima le m ban ke m tuk nimi bi bi Rom aatiŋ ni na mu tibɔnyaan ngbaan.

### Tibɔnyaan ngbaan aapɔɔn

**16** Maa san inimɔɔn Yesu aabɔnyaan tee pu. Tibɔnyaan ngbaan kpa Uwumbor aapɔɔn. Binib bimɔk ʃun ti ki gaa Yesu Kristo ki kii na ga ŋmar; ʃjan, bi ye Juu yaab na ga ŋmar, le bi kaa ye Juu yaab na mu ga ŋmar. **17** Tibɔnyaan ngbaan mɔk timi ke unii yaa gaa Yesu Kristo ki kii kan, Uwumbor ga len ke waabɔr jaŋ. Ni ŋmee Uwumbor Aagbaŋ ni ke, “Uninyaan aah gaa Uwumbor ki kii na, u ga li kpa limɔfal.”\*

### Unibɔn aataani

**18** Uwumbor mɔk binib ke u gee lijuul titunwanbirdam pu; bi tun lituln li kaa jaŋ na, kaa dii u. Baabiin pu le bi yii mbamɔn. **19** Uwumbor gee lijuul bi pu la; ba pu? waabɔr ti binib ga ŋmaa bee ti na bi mpaan pu. Uwumbor le di ti mɔk bi. **20** Buyoonn Uwumbor nan naan dulnyaa wee ki nan saa dandana wee na, binib kani waabimbin aah bi pu na. Naa ye ke binimbil le kan u. Bi kan tiwan ni u naan ni na, ki kan ke u kpa mpɔɔn mu kaan doo na, ki sil ye Uwumbor. Nima le

\***1:17** : Lik Habakuk 2.4.

baan ḥmaa len ke baa nyi.<sup>21</sup> Bi nyi ke u bi, ki mu aa nyuŋni u waah ḥneer pu na, ki mu aa dooni u waaterm pu. Nima le baalandak bee fam. Bisui ni bɔɔn la, kaa kpa nlan.<sup>22</sup> Bi len ke bi ye bilankpalb, le ki tee ye bijɔrb.<sup>23</sup> Baa ki dooni Uwumbor u nyuun ki bi n-yoonn mu kaa kpa ndoon na. Bi ḥna binibɔm aanaŋ, ni inyoon aanaŋ, ni iwaa aanaŋ, ki dooni ḥn-waa ngbaa.

<sup>24</sup>Nima le Uwumbor di cha bi, le bi dii bisui aah ban pu na, ki tun tijɔŋ aatuln, ki tun lituln li jinni biwon inimɔɔn na. Bi yii Uwumbor u ye mbamɔn na, ki dii ḥjiwa. <sup>25</sup>Bi dooni tiwan ni Uwumbor naan ni na, ki dii ni, kaa dooni Uwumbor u naan tiwan mɔmɔk na, kaa dii u. Uma Uwumbor le yeh mpakm n-yoonn mu kaa kpa ndoon na. Amii.

<sup>26</sup>Baah yii Uwumbor na, nima le u siir cha bi. Le bi tun inimɔɔn aatuln, bisui aah ban pu na. Bipiib di bijeen aatɔtiib kpalm bijab, ki doo bi chee.<sup>27</sup> Bi-jab mu yii bipiib, ki chuun ban bijab, ki di bijeen aatɔtiib kpalm bipoib ki tun inimɔɔn aatuln, le Uwumbor daa bitafal, baatunwanbir aah ḥneer pu na.

<sup>28</sup>Baah kaa gee ke bi li nyi Uwumbor na, le u siir cha bi. Le bi dak ilandak i ye fam na, ki tun lituln li kaa ḥjan na,<sup>29</sup> ki gbii titunwanbir aabɔŋ mɔmɔk. Bi gɔr kidagook ki tun baka baka, ki kpa iniman, kaa gee tɔb, ki kpa lipiipoln, ki jaa kijaak, ki ku tɔb, ki ḥmanni tɔb, ki nan tɔb, ki bii tɔb libɔɔl ni,<sup>30</sup> ni mpaan pu. Bi nan Uwumbor, le ki seei tɔb, ki kpa kalmbaani, ki puk kipupuk. Bi po dak baah ga ḥna pu ki moo tun titunwanbir na la. Bi yii bite ni bina aamɔi.<sup>31</sup> Baa kpa nlan. Bi yaa puu tipuur kan, baa gbiini ti. Baa gee baamaal aanib, kaa cha pinni binib, kaa san binib kinimbaak.<sup>32</sup> Bi nyi ke Uwumbor len ke binib bi ḥjani kina na

neer nkun, le bi tee beenin ḥjani kina, ki len ke binib yaa ḥjani kina kan, naa bir.

### Uwumbor aah ji binib tibor pu na

**2** Tɔ, si u galni binib biken na, saan ḥmaa len tibaa ki nyan aabaa tibor ni Uwumbor chee; ba pu? aa mu ḥjani kina la. Saah galni bi na, le ni mɔk ke saabor mu bii; ba pu? si u galni bi na, aa mu ḥjani ke baah ḥjani pu na la. <sup>2</sup>Ti nyi ke Uwumbor yaa daa binib bi ḥjani kina na aatafal kan, ni ḥjan. <sup>3</sup>Si u ḥjani kina na, ki galni biken bi ḥjani kina na, aa dak ke Uwumbor aan daa aatafal aa?<sup>4</sup> U ḥna si tibulchinn sakpen, ki kpa limɔr ni suklaa aa pu. Ba ḥna aa lik u fam? Saa nyi ke Uwumbor ban ke aa kpeln saabimbin aa? Nima le cha u ḥna si tibulchinn. <sup>5</sup>Le aatafal pɔɔ. Saa ban ke aa kpeln aasui. Nima le Uwumbor ga moo daa aatafal, bundaln u ga gee lijuul binib aanimbil ni ki ji bi tibor mbamɔn na. <sup>6</sup>U ga ḥna binib mɔmɔk baatuln aah ḥneer pu na.<sup>†</sup> <sup>7</sup>Binib bi kpa limɔr ki tun lituln li ḥjan na, ki ban mpakm, ni nnyur, ni limɔfal li kaa kpa ndoon na, bima le Uwumbor ga tii bi limɔfal li kaa kpa ndoon na. <sup>8</sup>Binib bi ban tibor, ki yii mbamɔn, ki dii nsan mu kaa ḥjan na, bima le Uwumbor gee lijuul sakpen bi pu. <sup>9</sup>Binib bimɔk tun titunwanbir na ga kan falaa ni limukl. Njan, Juu yaab ga kan, le binib bi kaa ye Juu yaab na mu ga kan. <sup>10</sup>Binib bimɔk tun lituln li ḥjan na, Uwumbor ga nyuŋ bi, ki pak bi, ki tii bi nsuudoon. Njan, u ga tii Juu yaab, le ki ga tii binib bi kaa ye Juu yaab na mu;<sup>11</sup> ba pu? Uwumbor aa pak ubaa ki jer uken.

<sup>12</sup>Binib bimɔk kaa nyi Moses aakaal ki tun titunwanbir na aan kan limɔfal li kaa kpa ndoon na. Uwumbor aan baa bi ke bi dii Moses aakaal aan baa dii. Binib bimɔk nyi Moses aakaal ki tun titunwanbir na, Uwumbor ga baa bi tibor

<sup>†2:6</sup> : Lik Ilahn 62.12; ḥNiyataŋak 24.12.

nkaal ngbaan aah dii pu na, ki ga daa bitafal.<sup>13</sup> Uwumbor aan len ke binib bi nyi waakaal kaa dii mu na aabor jan. U ga len ke binib bi dii waakaal na le aabor jan.<sup>14</sup> Binib bi kaa ye Juu yaab na aa nyi Moses aakaal. Bi yaa jan Moses aakaal aah len pu na baageehn pu, ki mu aa nyi nkaal ngbaan kan, baalandak le mok bi baah ga dii pu na.<sup>15</sup> Baah jan pu na, nima le mok ke Moses aakaal aah len pu na bi bisui ni. Bisui ponn ni, bi nyi ni jan na, ni ni kaa jan na. Nima le baalandak bii bi n-yoonn mubaa, ki pak bi n-yoonn mubaa mu.<sup>16</sup> Ni ga li bi kina le bundaln Uwumbor ga cha Yesu Kristo ji binib tibor, ki baa bi tiboborkaan ti bi bisui ni na aabor. Maah tuk binib tibonyaan ti na le mok kina.

### Juu yaab ni nkaal na

<sup>17</sup>Tɔ, aa len ke aa ye Juu aanii la, ki dak ke saah nyi Moses aakaal na, nima le ga cha aa jan; aa kpa kipupuk ke aa nyi Uwumbor,<sup>18</sup> ki nyi waah gee pu na, ki bae Moses aakaal, ki nyi lituln li jan na, ni li kaa jan na,<sup>19</sup> ki dak ke aa ye usanmokr le ki tii bijoom, ki ga jmaa wohn binib bi kaa waa na aanimbil,<sup>20</sup> ki ga jmaa mok bijorb nlan, ki ga jmaa mok mbim mmokm. Saah nyi Moses aakaal mu na, aa dak ke aa nyi tiwan momok, ki dak ke saah len pu na momok ye mbamom.<sup>21</sup> Tɔ, si u mok biken na, ba ja saa mok aabaa? Si u tuk binib ke bi taa su kinaayuk na, ba ja aa su?<sup>22</sup> Si u len ke binib taa gor kidagoon na, ba ja aa gor? Si u yii njiaa na, ba ja aa su njadir ni aawan?<sup>23</sup> Si u kpa kipupuk Uwumbor aakaal pu ki bii nkaal ngbaan na, aa jinn u inimoon la.<sup>24</sup> Ni njmee Uwumbor Aagban ponn ni ke, "Nimi Juu yaab aah jan titunwanbir pu

na, nima le cha binib bi kaa ye Juu yaab na len Uwumbor tibobir."<sup>25</sup>

<sup>25</sup>Tɔ, aa yaa joo Moses aakaal kan, lichakpangeei kpa tinyoor. Aa mu yaa gii lichakpaln ki bii Moses aakaal kan, ni mok ke saa gii le na.<sup>26</sup> Binib bi kaa gii njichakpan na yaa joo Uwumbor aakaal kan, Uwumbor aan yii bi, ke baa gii njichakpan.<sup>27</sup> Binib bi kaa gii njichakpan na yaa joo Uwumbor aakaal kan, bi jan jer nimi Juu yaab bi gii njichakpan Moses aakaal aah mok pu na, ki bii nkaal muken na.<sup>28</sup> Unii u ye Juu aanii mpaan pu baanja na aa ye Juu aanibamom. Unii u gii lichakpaln kaa kpeln waabimbin na, naa ye lichakpangeei bamom.<sup>29</sup> Unii u gii lichakpaln, kaa kpeln waabimbin na aa piir Uwumbor aasui. Unii u dii Uwumbor usui ni na, uma le ye Juu aanibamom. Unii u Uwumbor Aafuur Nyaaan bi u ni na, nima le ye lichakpangeei bamom. Uwumbor le ga pak udaan, naa ye binib.

**3** Lichakpangeei aanyoor ye ba? Juu yaab jer binib bi kaa ye Juu yaab na aa?<sup>2</sup> Een, bi jer bi tiwan aaboj ni la. Ni jer tiwan momok na le ye ke Uwumbor nan di waabor ja bima le aajaal ni.<sup>3</sup> Bi ponn ni bibaa yaa kaa gaa Uwumbor ki kii kan, ni ye ba? Baah kaa gaa u ki kii na, Uwumbor aan gbiin waa puu tipuur ti na aa?<sup>4</sup> U ga gbiin ti. Binib momok yaa ye binyamondam kan, Uwumbor ma ye mbamondaan la. Ni njmee waagban ni ke, "Bi ga kan ke saah len pu na ye mbamom, Aa yaa jin binib tibor kan, aa kpa mbamom la."<sup>5</sup>

<sup>5</sup> Timi aatunwanbir yaa mok ke Uwumbor jan ni jan na kan, ti ga len ke Uwumbor yaa daa titafal kan, u ja ni kaa jan na aa? Binib bi kaa dii Uwumbor na le baa kina.<sup>6</sup> U ja ni jan

<sup>#2:24</sup> : Lik Aisaya 52.5; Esekiel 36.20-22.

<sup>#3:4</sup> : Lik Ilahn 51.4.

na la; ba pu? ni yaa kaa ḥjan kan, u ga ḥja kinye ki ji dulnyaa ni aanib tibor?

<sup>7</sup> Ubaa ga baa ke, “Maah gee nnyamɔn na yaa mɔk ke Uwumbor ye mbamɔndaan ki ga cha binib nyuŋ u kan, ba ḥja u daa ntafal ke m ye titunwanbirdaan?”

<sup>8</sup> Ti ga tun titunwanbir aan ni kpalm tiwan ni ḥjan na aa? Taan ḥja kina kpala. Binib bibaa seei timi ki bui ke ti len kina la. Binib ngbaan ga kan ntafadaan mu ḥjeer bi na.

### Ubaa aa ḥjan Uwumbor chee

<sup>9</sup> Tɔ̄, timi Juu yaab ḥjan ki jer binib bi kaa ye Juu yaab na aa? Taa jer bi. M nan mɔk nimi ke binib bi ye Juu yaab na, ni bi kaa ye Juu yaab na mɔmɔk ye titunwanbirdam la. <sup>10</sup> Ni ḥjmee kina le Uwumbor Aagbaŋ ni ke,

“Unii ubaa aa ye uninyaan,

<sup>11</sup> ubaa aa kpa nlan, ubaa aa ban Uwumbor,

<sup>12</sup> bi mɔmɔk di cha waasan, bi mɔmɔk bee fam la.

Ubaa aa bi ki tun lituln li ḥjan na, ubaa baanja aa bi.<sup>§</sup>

<sup>13</sup> Baaliin po ye iliin i bir na la.

Bi geei inyamɔn ki ḥjmanni binib.

Baaliin bii binib ke ujagen

aaluul aah bii binib pu na la.<sup>\*\*</sup>

<sup>14</sup> Baamɔi gbii ḥjisibil ni kinanaŋ la.<sup>††</sup>

<sup>15</sup> Bi yaa ban bi ku binib kan, naa pɔ̄o.

<sup>16</sup> Bi muk binib ki ḥjani bi falaa n-yoonn mɔmɔk la.

<sup>17</sup> Bi chiuun ban tibor la.

<sup>18</sup> Baa san Uwumbor.<sup>\*\*\*</sup>

<sup>19</sup> Tɔ̄, ti nyi ke nkaal aah len pu na mɔmɔk len binib bi bi mu chee na la. Nima le dulnyaa wee ni aanib mɔmɔk aabor bii Uwumbor chee. Ubaa aan ḥjmaa len tibaa ke u nyan ubaa tibor ni Uwum-

bɔr chee. <sup>20</sup> Ubaa aan ḥjmaa len ke waah joo Uwumbor aakaal mbamɔm pu na, waabor ḥjan Uwumbor chee. Uwumbor aakaal le mɔk binib ke bi ye titunwanbirdam la.

### Uwumbor aah cha ti ni uma tuuk pu na

<sup>21</sup> Dandana wee, Uwumbor mɔk timi waah ga ḥja pu ki len ke timi aabor ḥjan na. Waakaal ni waabɔnabitib aaliin le bi waagbaŋ ponn ni, ki mu tuk timi kina la. Naa ye ke ti dii waakaal mbamɔm le cha u len. <sup>22</sup> Binib bimɔk gaa Yesu Kristo ki kii na, bima le Uwumbor len ke baabor ḥjan. Baah gaa Yesu Kristo ki kii na, nima le cha Uwumbor len ke baabor ḥjan. Ubaa aa bi ubaa, ki cha biken; <sup>23</sup> binib mɔmɔk tun titunwanbir la, kaa gbiin Uwumbor aanimbil. <sup>24</sup> Le Yesu Kristo daa timi, ki gaa timi lii. Timi bi kpaan u chee na, le Uwumbor len ke timi aabor ḥjan. Waabulchinn pu le u len, naa ye ke ti ḥjan la. <sup>25</sup> U nan di Yesu siin binib aanimbil ni, ke u nan kpo, aan uma Uwumbor taa ki gee lijuul ti pu. Ti yaa gaa Yesu ki kii kan, waasin pu le Uwumbor ga di cha pinn timi. Nima le mɔk ke Uwumbor ḥjani ni ḥjan na; ba pu? u nan kpa limɔr, kaa bii binib bi tun titunwanbir buyoonn Yesu Kristo aa kee dan dulnyaa wee ni na. <sup>26</sup> Tɔ̄, dandana wee, u len titunwanbir aabor ki bui ke binib bi gaa Yesu ki kii na aabor ḥjan u chee. Nimina le mɔk ke uma Uwumbor si chob.

<sup>27</sup> Tɔ̄, ba pu aan ti ga li kpa kipupuk? Taan li kpa kipupuk nibaa pu. Ba pu? Naa ye ke ti dii Uwumbor aakaal mbamɔm le cha u gaa timi lii, taah gaa Yesu ki kii na, nima le cha u gaa timi lii. <sup>28</sup> Nima pu na, ti bee ke ti yaa gaa Yesu

<sup>§3:12</sup> : Lik Ilahn 14.1-3; 53.1-3; Ulandaan 7.20.

<sup>\*\*3:13</sup> : Lik Ilahn 5.9; 140.3.

<sup>††3:14</sup> : Lik Ilahn 10.7.

<sup>\*\*\*3:18</sup> : Lik Ilahn 36.1.

ki kii kan, Uwumbor ga len ke timi aabor jan. Naa ye ke ti joo waakaal mbamom le cha u len kina. <sup>29</sup>Uwumbor ye Juu yaab baanja Aawumbor la aa? Waa ye binib bi kaa ye Juu yaab na mu Aawumbor aa? Mbamom, u ye. <sup>30</sup>Uwumbor ye Uwumborbaan la. Juu yaab yaa gaa Yesu ki kii kan, Uwumbor ga len ke baabor jan. Bi mu kaa ye Juu yaab na yaa gaa Yesu ki kii kan, Uwumbor ga len ke bi mu aabor jan. <sup>31</sup>Ti yaa len ke binib yaa gaa Yesu ki kii ki ga qumar kan, ti yii Uwumbor aakaal aa? Naa bi kina kpala. Ti ja mu tibokpaan la.

### Abraham aah ye limokl pu na

**4** To, cha ti lik tiyaaja Abraham aabor aah nan bi pu na: <sup>2</sup>Ni yaa ba ye waatunyaan pu le cha Uwumbor len ke waabor jan kan, u ba ga qmaa li kpa kipupuk. U mu aa qmaa li kpa kipupuk Uwumbor chee. <sup>3</sup>Uwumbor Aagbar len ke, “Abraham nan gaa Uwumbor aamoboln ki kii, kina pu na le Uwumbor gaa u ke u ye uninyaan u chee.”<sup>¶¶</sup> <sup>4</sup>Unii u tun lituln ki kan tipar na, tipar ngbaan aa ye ipiin, ni ye waa-par la. <sup>5</sup>To, unii u kaa joo nkaal na yaa gaa Uwumbor u di cha pinn titunwan-birdam na ki kii kan, waah gaa Uwumbor ki kii na, nima le Uwumbor ga len ke waabor jan. <sup>6</sup>Ubør David mu nan len ke binib bi Uwumbor len ke baabor jan na le kpa mpopiin. Bi gaa Uwumbor ki kii, nima le cha u len ke baabor jan, naa ye ke bi tun litunyaan le cha u len kina. Ubør David nan len ke,

<sup>7</sup>“Binib bi Uwumbor di cha baatunwan-bir pinn bi na  
le kpa mpopiin.

Uwumbor aah di cha binib bi aataani pinn bi na  
le kpa mpopiin.

<sup>8</sup>Binib bi Uwumbor aan len ke baabor bii na,  
bima le kpa mpopiin.”<sup>§§</sup>

<sup>9</sup>U len ke Juu yaab baanja le kpa mpopiin ngbaan aa? Waa len kina. Binib bi kaa ye Juu yaab na mu kpa. Ti len ke Abraham nan gaa Uwumbor aamoboln ki kii, nima le cha Uwumbor gaa u ke u ye uninyaan u chee. <sup>10</sup>Bayoonn Uwumbor len ke waabor jan? Buyoonn u nan gii lichakpaln na le aan buyoonn waa nan kee gii na? Buyoonn waa nan kee gii na. <sup>11</sup>Waah gii lichakpaln na, nima le nan ye limokl ki mok ke u gaa Uwumbor ki kii, nima le Uwumbor gaa u ke u ye uninyaan u chee, buyoonn waa nan kee gii lichakpaln na. Nima pu le Abraham ye binib bimok gaa Uwumbor ki kii, kaa gii qichakpan na aate. Baah gaa Uwumbor ki kii na, nima le Uwumbor gaa bi ke bi ye bininyaam u chee. <sup>12</sup>Binib bi gii qichakpan, ki tak Abraham aataabuu ponni, ki gaa Uwumbor ki kii ke Abraham aah nan gaa u ki kii pu, buyoonn waa nan kee gii lichakpaln na, bima mu le Abraham ye bite.

### Gaakii pu le ti ga kan Uwumbor aah puu tipuur ti na

<sup>13</sup>Uwumbor nan puu tipuur tii Abraham ni uyaabitiib, ke bima le ga li yeh dulnyaa. Naa ye ke bi joo Uwumbor aakaal le ga cha bi kan tipuur ngbaan. Bi gaa Uwumbor ki kii la, le u len ke baabor jan. Nima le ga cha bi kan tipuur ngbaan. <sup>14</sup>Uwumbor yaa ba puu tipuur ke binib bi joo waakaal na le ga li yeh dulnyaa kan, naadii aa ba ga li kpa tinyoor. Tipuur ngbaan mu aa ba ga gbiin; ba pu? ubaa aan qmaa joo nkaal momok mbamom. <sup>15</sup>Binib aah bii nkaal na, le Uwumbor gee lijuul bi pu. Nkaal aah kaa bi nin chee na, binib aa bii nkaal.

<sup>¶¶</sup>4:3 : Lik Mpiin 15.6; Galasia yaab 3.6.

<sup>§§</sup>4:8 : Lik Ilahn 32.1-2.

<sup>16</sup>Nima le Uwumbor puu tipuur tii binib bi gaa u ki kii na. Uwumbor aah gee binib pu na, nima le u tii Abraham aayaabitiib mɔmɔk waah nan puu tipuur ti na. U ga tii Abraham aayaabitiib bi ye Juu yaab ki gaa u ki kii na, ni binib bi kaa ye Juu yaab ki mu gaa u ki kii na ke Abraham aah nan gaa u ki kii pu na. Abraham ye timi bimak gaa Uwumbor ki kii na aayaaja la. <sup>17</sup>Ni ɣmee Uwumbor Aagbaŋ ponn ni ke Uwumbor bui Abraham, "M ɣa si ɣinibol pam aayaaja la." \*Abraham le ye tite Uwumbor chee. U nan tii Uwumbor naadii. Uma Uwumbor le fikr binib bi kpo na nkun ni, le ki yin binib bi kaa kee bi na, ke baah bi le na. <sup>18</sup>U nan puu tipuur tii Abraham ke u ga ɣa u ɣinibol pam aayaaja, ke uyaabitiib ga li wiir ke ijmabi aah wiir pu na. Ni nan bi ke tipuur ngbaan aah kaan ɣmaa gbiin le na. Abraham mu nan tee kpa limakl ke ti ga nan gbiin.<sup>†</sup> <sup>19</sup>Ni nan gur siib u pii ɣibin nkub. Waah nan por pu na, ni nan naahn ke waan ki ɣmaa maa ubo. Upuu Sara mu nan jer timar. Le Abraham pak Uwumbor aah tuk u pu na, kaa joo beeni. <sup>20</sup>Uwumbor aah puu tipuur ti tii u na, tima le gur ye waalandak. Le u pak tipuur ngbaan mbamɔm, kaa joo beeni ke ti ga gbiin bee taan gbiin? U nan moo gaa Uwumbor ki kii le ki nyuj u, <sup>21</sup>ki sil nyi ke Uwumbor aah puu tipuur ti na, u ga ɣmaa ɣa kina. <sup>22</sup>Waah nan gaa Uwumbor aamɔboln ki kii kina na, nima le Uwumbor gaa u ke u ye uninyaan u chee. <sup>23-24</sup>Ni ɣmee kina le Uwumbor Aagbaŋ ni. Timi pu le bi nan ɣmee kina, naa ye Abraham baanja pu; ba pu? timi bi gaa Uwumbor u nan fikr Tidindaan Yesu nkun ni ki kii na, le u ga len ke timi aabɔr ɣan. <sup>25</sup>Yesu nan kpo

timi aatunwanbir pu, le ki fikr nkun ni. Nima le Uwumbor len ke timi aabɔr ɣan.

### Saah ga li bi pu ki li ɣan Uwumbor chee na

**5** Taah gaa Uwumbor ki kii pu na, nima le u len ke timi aabɔr ɣan. Tidindaan Yesu Kristo pu le ti ni Uwumbor kpaan kijɔtiik. <sup>2</sup>Yesu Kristo pu, le Uwumbor len ke timi aabɔr ɣan. Le ti mɔɔni ki kpa limakl ke ti ga yakr u chee Uwumbor aamɔɔn. <sup>3</sup>Naa ye nima baanja pu le ti mɔɔni. Falaa mu pu le ti mɔɔni. Ba pu? falaa le tii timi suklaa. <sup>4</sup>Suklaa mu tii timi mbimbinyaan. Mbimbinyaan mu tii timi limakl. <sup>5</sup>Limakl ngbaan aan jinn timi inimɔɔn. Ba pu? Uwumbor aah tii timi Waafuur Nyaan na, Nfuur Nyaan ngbaan le cha ti bee tisui ni waah gee timi sakpen pu na.

<sup>6</sup>Naah nan ɣeer na, le Kristo nan kpo timi bi ye titunwanbirdam na pu, taah kaa kpa mpɔɔn buyoonn na. <sup>7</sup>Ni pɔɔ ke unii kpo ke u nyan unii u dii mbamɔm na nkun ni. Nibaakan, unii ubaa ga kaa ki kpo uninyaan pu. <sup>8</sup>Tima kan, buyoonn ti nan laa ye titunwanbirdam na le Kristo nan kpo ti pu. Nima le mɔk timi Uwumbor aah gee timi sakpen pu na. <sup>9</sup>Kristo aasin pu le Uwumbor len ke timi aabɔr ɣan. ɣmaninkabaa taah ga nya ntafadaan mu ponn ni u pu na? <sup>10</sup>Buyoonn ti nan ye Uwumbor aadim na, le Ujapɔɔn nan kpo ti pu. U pu, le ti ni Uwumbor kpaan kijɔtiik. Ti ni Uwumbor aah kpaan kijɔtiik na, ɣmaninkabaa taah ga ɣmar waamɔfal pu pu na? <sup>11</sup>Naa ye nima baanja pu le ti mɔɔni. Tidindaan Yesu Kristo pu le ti bee Uwumbor aah ɣan pu na, le ki mɔɔni. U pu le ti ni Uwumbor kpaan kijɔtiik.

\*4:17 : Lik Mpiin 17.5.

†4:18 : Lik Mpiin 15.5.

**Adam pu le ti kpo, Kristo  
pu le ti kpa limɔfal**

<sup>12</sup> Unibaan<sup>‡</sup> le nan joo ni titunwanbir dulnyaa ni, le titunwanbir ngbaan joo ni nkun. Binib mɔmɔk aah tun titunwanbir na, le nkun yaa gaa dulnyaa mɔmɔk ni.<sup>¶</sup> <sup>13</sup> Buyoonn Moses aa nan kee tuk binib Uwumbor aakaal na, titunwanbir nan bi. Nkaal aah kaa bi nin chee na, Uwumbor aan len ke bi bii mu. <sup>14</sup> Adam aayoonn ki ti saa Moses aayoonn le nkun pii binib. Bi nan tun titunwanbir la. Baatunwanbir ni Adam u nan yii Uwumbor aamɔb na aatunwanbir aa kpaan. Nkun mu pii bi la.

Ti mɔmɔk kan Adam aatunwanbir aatafadaan. Kina le ti mɔmɔk yakr Kristo aatunyaan aanyoor mu. <sup>15</sup> Uwumbor aah tii timi ipiin i na aa bi ke Adam aatunwanbir na. Ni ye mbamon ke unibaan aatunwanbir pu le nkun pii binib mɔmɔk. Yesu Kristo aanimbaasaln pu, le Uwumbor san binib mɔmɔk kinimbaak, ki tii bi ipiin i ye limɔfal na. <sup>16</sup> Uwumbor aapiin aah ḥa timi pu na aa bi ke Adam aatunwanbir aah ḥa timi pu na. Adam aatunwanbirbaan pu, le binib aabɔr bii. Uninyaan ubaa u ye Yesu na pu, le Uwumbor di cha pinn titunwanbirdam pam, ki len ke baabɔr ḥan. Waapiin le na. <sup>17</sup> Unibaan u bi yin u Adam na aatunwanbir pu, le nkun pii binib mɔmɔk. Unibaan Yesu Kristo na pu, le binib ga kan Uwumbor aaterm sakpen. U ga len ke baabɔr ḥan. Nima le ye waapiin. Bi ga li kpa limɔfal li kaa kpa ndoon na, ki kan linyaj.

<sup>18</sup> Unibaan aatunwanbir pu, le binib mɔmɔk aabɔr bii. Yesu aatunyaan pu, le Uwumbor ga len ke binib bimɔk gaa Yesu ki kii na aabɔr ḥan, ki ga tii bi limɔfal li kaa kpa ndoon na. <sup>19</sup> Unibaan Adam

aah nan yii Uwumbor aamɔb na, nima le binib mɔmɔk aabɔr bii Uwumbor chee. Yesu aah nan kii Uwumbor aamɔb na, nima le binib bimɔk gaa uma Yesu ki kii na aabɔr ḥan Uwumbor chee.

<sup>20</sup> Moses nan tuk binib Uwumbor aakaal. Nkaal ngbaan mɔk bi ke baatunwanbir wiir sakpen. Le titunwanbir aah wiir nin chee na Uwumbor aanimbaasaln wiir ki jer titunwanbir. <sup>21</sup> Titunwanbir pu le binib kpo. Tidindaan Yesu Kristo pu, le Uwumbor san timi kinimbaak, ki len ke timi aabɔr ḥan, le ti kan limɔfal li kaa kpa ndoon na.

**Taa ki tun titunwanbir man**

**6** Kina pu na, ti ga len kinye? Ti ga li beenin tun titunwanbir aan Uwumbor aanimbaasaln kpee ee? Taan li ḥani kina kpala. <sup>2</sup> Ti kpo ke titunwanbir taa ki li joo timi la. Ti yaa beenin tun titunwanbir kan, naa ḥan. <sup>3</sup> Baah muin timi nnyun ni, Yesu Kristo aayimbil pu na, nima le mɔk ke ti ni Yesu Kristo kpaan la. Nima pu na, waah nan kpo na, ti mu kpo u chee la. Naa bee kina aa? <sup>4</sup> Baah muin timi nnyun ni na, nima le mɔk ke ti kpo, le bi sub timi u chee. Uwumbor aapɔɔn pu le u fikr Kristo nkun ni. Waapɔɔn mu pu le ti kpa mbimbipɔm ki ḥani ni ḥan na.

<sup>5</sup> Ti ni u aah kpaan pu na, ti kpo ke waah kpo pu na. Ti mu ga fikr nkun ni, ke waah fikr pu na. <sup>6</sup> Ti bee ke baah kpaan u ndɔpuinkoo pu na, bi kpaan timi aabimbikpok mu u chee, ke mbimbikpok mu kaa ḥan na taa ki li bi, aan ti taa ki li ye titunwanbir aanaagbiib. <sup>7</sup> Unii u kpo na nyan titunwanbir ni. <sup>8</sup> Taah kpo Kristo chee na, ti ḥa naadii ke ti ga li kpa limɔfal u chee. <sup>9</sup> Ti nyi ke waah fikr nkun ni na, waan ki kpo. Nkun aa ki kpa mpɔɔn u chee. <sup>10</sup> Waah kpo na, u kpo ke u kuln

<sup>‡</sup>5:12 : Unibaan ngbaan nan ye Adam la.

<sup>¶</sup>5:12 : Lik Mpiin 3.6.

titunwanbir nfum mubaa, aan titunwanbir taa ki li joo timi. Waah kpa limɔfal dandana wee na, u bi ke u nyuj Uwumbor la.<sup>11</sup> Kina pu na, ni mu li nyi ke ni kpo ke titunwanbir taa ki li joo nimi la. Naah kpaan Yesu Kristo chee pu na, le ni mu kpa limɔfal ke ni nyuj Uwumbor.

<sup>12</sup> Nima pu na, ni taa ki cha titunwanbir li joo nimi aawon ti ga kpo na, ki taa ki kii tii tiwon aah ban pu na.<sup>13</sup> Ni taa di nimi aawon tii titunwanbir, ki taa tun lituln li kaa ḷan na. Ni di nibaa tii Uwumbor, ke binib bi fikr nkun ni na, ki di nimi aawon tii Uwumbor, ke ni tun lituln li ḷan na ki tii u.<sup>14</sup> Nkaal aa ki joo nimi. Uwumbor aanimbaasaln le joo nimi. Nima le titunwanbir aan ki li ye nimi aadindaan.

### Li ye mbimbinyaan aanaagbiib man

<sup>15</sup> Nkaal aah kaa ki joo timi aan Uwumbor aanimbaasaln joo timi na, ti ga tun titunwanbir aa? Taan ḷa kina kpala.<sup>16</sup> Aa yaa di aabaa tii unii aan ki kii waamɔb kan, aa ye waanaagbiija la. Naa bee kina aa? Aa yaa kii tii titunwanbir kan, aa ye titunwanbir aanaagbiija la, le ki ga kpo. Aa yaa kii Uwumbor aamɔb kan, u ga bui ke saabɔr ḷan.<sup>17</sup> N-yoonn mubaa, ni nan ye titunwanbir aanaagbiib la. Ti dooni Uwumbor sakpen, ke baah mɔk nimi waasan pu na, ni dii nsan ngbaan nisui mɔmɔk ni,<sup>18</sup> ki nya ni titunwanbir aanaagbiir ni, ki ḷa litunyaan aanaagbiib.<sup>19</sup> M di binibom aabimbin ḷaj Uwumbor aabɔr ke ni bee maah len pu na aatataa mbamɔm la. Ni nan joo nimi aawon tun tijɔj aatuln, ni titunwanbir aabɔj mɔmɔk la. Dandana wee, ni di nimi aawon tun lituln li ḷan na man, aan ki ḷa binib bi bi chain na.

<sup>20</sup> Naah nan ye titunwanbir aanaagbiib na, nitafal aa nan bi litunyaan ni.<sup>21</sup> Ni yaa teer naah tun titunwanbir ti na kan, ni jinni nimi inimɔɔn dandana wee la. Tinyoor nan bi titunwanbir ng-

baan ni ii? Aayii. Titunwanbir ngbaan aadoon ye nkun la.<sup>22</sup> Uwumbor nyan nimi titunwanbir aanaagbiir ni la. Dandana wee, ni ye uma Uwumbor aanaagbiib la. Nimi aanyoor ye mbimbin mu bi chain na la. Naadoon ga li ye limɔfal li kaa kpa ndoon na.<sup>23</sup> Titunwanbir aapar ye nkun la. Tidindaan Yesu Kristo pu le Uwumbor aapiin ye limɔfal li kaa kpa ndoon na.

### Lichamɔln aamɔkl

**7** Nnaabitiiib, ni mɔmɔk nyi nkaal aah bi pu na. Nima le ga cha ni bee maah ga len pu na aatataa. Nkaal dii unii buyoonn u bi na baanja la. U yaa kpo kan, nkaal aa ki dii u.<sup>2</sup> Nkaal pu le upii u kpa chal na ye uchal yoo n-yoonn mumɔk uchal bi na. Uchal yaa kpo kan, nkaal mu len ke u ye uchal yoo na aa ki dii u.<sup>3</sup> Upii yaa ban uja uken buyoonn uchal bi na kan, bi ga len ke u ye upiidaagoor la. Uchal yaa kpo kan, nkaal ngbaan aa ki dii u. U yaa mɔn uja uken kan, waa ye upiidaagoor.<sup>4</sup> Nnaabitiiib, nimi aabɔr mu bi kina la. Kristo aah nan kpo ndɔpuinkoo pu na, ni mu nan kpo; nkaal aa ki dii nimi. Ni kpaan Kristo u fikr nkun ni na chee la, le ki dii Uwumbor aasan.<sup>5</sup> Taah kaa nan dii Uwumbor buyoonn na, tisui nan gee Uwumbor aakaal aah kɔ pu na, ki cha ti tun titunwanbir ki dii nkun aasan.<sup>6</sup> Dandana wee, taah kpo na, nkaal na aa ki dii timi, ki mu aa ki joo timi tinaagbiir. Le Uwumbor Aafuur Nyaan tii timi mbimbipɔm, ke ti tun lituln tii Uwumbor. Nkaal na aa ki joo timi.

### Nkaal ni titunwanbir

<sup>7</sup> Nima pu na, ti ga len ke Moses aakaal aa ḷan aa? Mu ḷan. Nkaal na yaa kaa ba bi kan, maa ba ga bee titunwanbir. Nkaal na yaa kaa ba len ke “Taa li kpa iniman” kan, maa ba ga bee ke iniman ye titunwanbir.<sup>8</sup> Nkaal aah len kina na, le titunwanbir ti bi nsui ni na yii nkaal ng-

baan, ki cha m kpa iniman aabɔŋ aabɔŋ. Nkaal yaa kaa bi kan, titunwanbir aa fu. <sup>9</sup> N-yoonn mubaa m nan bi, kaa nyi nkaal aatataa mbamɔm. Buyoonn m bee nkaal aatataa mbamɔm na, le titunwanbir fikr nsui ni. Le m bee ke m ɲeer nkun. <sup>10</sup> Uwumbor nan tii timi waakaal ke ti dii mu, aan ki kan limɔfal. Le m bee ke maah kaa ɣmaa joo waakaal mɔmɔk na, m ɲeer nkun. <sup>11</sup> Nkaal pu le titunwanbir ti bi nsui ni na nan kpa nsan ki ɣmann mi, ki cha m ɲeer nkun.

<sup>12</sup> Uwumbor aakaal bi chain la. Uwumbor aah tuk timi ke ti ɣa pu na le bi chain, ki bi mbamɔm, ki ɣan. <sup>13</sup> Waakaal mu ɣan na le ku mi ii? Aayii. Titunwanbir le ku mi. Nkaal mu ɣan na pu, le titunwanbir ku mi, ki cha ti bee ke titunwanbir aa ɣan. Nkaal na le mɔk timi titunwanbir aah bir sakpen pu na.

<sup>14</sup> Ti bee ke Uwumbor aakaal mɔk timi Uwumbor aah ban pu na. M mu aa ɣani kina; ba pu? m ye titunwanbir aanaagbiija la. <sup>15</sup> Maah ɣani pu na, maa kii kina nsui ni. Maah kaa gee ke m li ɣani tiwan ni na, m ɣani nima la. Maah nan tiwan ni na, nima le m tee ɣani. <sup>16</sup> M yaa ɣani maah kaa gee ke m li ɣani tiwan ni na kan, nima le mɔk ke m kii ke Uwumbor aakaal ɣan. <sup>17</sup> Naa ye ke min le ɣani kina, titunwanbir ti bi nsui ni na le cha m ɣani. <sup>18</sup> M bee ke tiwan ni ɣan na aa bi maabimbikpok ni; m ban ke m tun lituln li ɣan na, kaa ɣmaa tun. <sup>19</sup> Maah ban m tun litunyaan li na, maa tun kina. Maah kaa ban m tun titunwanbir ti na, m tun tima la. <sup>20</sup> M yaa tun maah kaa gee m tun pu na kan, naa ye ke min le tun kina, titunwanbir ti bi nsui ni na le cha m tun.

<sup>21</sup> Naah ye pu na, m yaa ban m tun lituln li ɣan na kan, titunwanbir bi m chee la. <sup>22</sup> M gee Uwumbor aakaal nsui ni. <sup>23</sup> M mu kan nkaal muken maawon ni. Nkaal ngbaan jaa Uwumbor aakaal mu bi nsui ni na kijaak la. Nima le titunwanbir aakaal i bi maawon ni na joo mi

tinaagbiir. <sup>24</sup> M kpa kinimbaak. Titunwanbir bi tiwon tee ni, ki ga ku mi. ɣma ga nyan mi titunwanbir ngbaan ni? <sup>25</sup> M dooni Uwumbor u nyan mi titunwanbir ngbaan ni, Tidindaan Yesu Kristo pu na.

Mma kan, maalandak baanja le dii Uwumbor aakaal. Maabimbikpok dii titunwanbir aakaal la.

### Uwumbor Aafuur Nyaan aapɔɔn pu le ti bi

**8** Nima pu na, Uwumbor aan len ke binib bi kpaan Yesu Kristo chee na aabɔr bii. <sup>2</sup> Taah kpaan Yesu Kristo chee na, le Uwumbor Aafuur Nyaan aapɔɔn tii timi limɔfal; Nfuur Nyaan aapɔɔn ngbaan le nyan mi titunwanbir ni nkun aapɔɔn ni. <sup>3</sup> Nkaal aan ɣmaa ɣa kina; ba pu? binib aa kpa mpɔɔn ke bi joo nkaal ngbaan. Le Uwumbor ɣa waakaal aah kaa ɣmaa ɣa pu na; timi aatunwanbir pu le u nan tun ni Ujapɔɔn Yesu dulnyaa wee ni, ke u di tiwon ti naahn timi titunwanbirdam aawon na bii titunwanbir ti bi tisui ni na aapɔɔn, <sup>4</sup> ki tii timi bi dii Waafuur Nyaan kaa ki dii mbimbikpok na mpɔɔn ke ti li dii waakaal mbamɔm. <sup>5</sup> Binib bi dii mbimbikpok na, bitafal bi mbimbikpok aabɔr ni la. Binib bi dii Uwumbor Aafuur Nyaan na, bitafal bi Nfuur Nyaan aabɔr ni la. <sup>6</sup> Binib bi aatafal bi mbimbikpok aabɔr ni na ga kpo la. Binib bi aatafal bi Uwumbor Aafuur Nyaan aabɔr ni na ga kan limɔfal, ni nsuudoon. <sup>7</sup> Binib bi aatafal bi mbimbikpok aabɔr ni na, bi ye Uwumbor aadim la; ba pu? baa dii waakaal, ki mu aa ɣmaa dii mu. <sup>8</sup> Binib bi dii mbimbikpok aah ban pu na aan ɣmaa piir Uwumbor aasui.

<sup>9</sup> To, Uwumbor Aafuur Nyaan yaa bi ni ni kan, naa dii mbimbikpok aah ban pu na, ni dii Nfuur Nyaan aah ban pu na la. Kristo Aafuur Nyaan yaa kaa bi unii ni kan, udaan ngbaan aa ye Kristo yoo. <sup>10</sup> Titunwanbir pu, le nimi aawon

ga kpo. Kristo yaa bi ni ni kan, Uwumbor Aafuur Nyaan tii nimi limɔfal; ba pu? u len ke nimi aabɔr ḥjan. <sup>11</sup>Uwumbor nan fikr Yesu nkun ni. Uwumbor u fikr Yesu nkun ni na Aafuur Nyaan yaa bi ni ni kan, uma Uwumbor u fikr Yesu Kristo nkun ni na ga fikr nimi aawon ti ga kpo na mu. Waafuur Nyaan mu bi ni ni na aapɔɔn pu, le u ga fikr nimi nkun ni.

<sup>12</sup>Nnaabitib, nima pu na, ni ḥjan ke ti dii Uwumbor Aafuur Nyaan aah ban pu na, ki taa dii unibɔn aabimbin aah ban pu na. <sup>13</sup>Ni yaa dii unibɔn aabimbin aah ban pu na kan, ni ga kpo la. Ni yaa kuln nimi aawon aatunwanbir, Uwumbor Aafuur Nyaan aapɔɔn pu kan, ni ga li kpa limɔfal li kaa kpa ndoon na. <sup>14</sup>Binib bimɔk dii Uwumbor Aafuur Nyaan aah ban pu na, bima le ye Uwumbor aabim. <sup>15</sup>Nfuur Nyaan mu Uwumbor tii nimi na, mu aa joo nimi tinaagbii ke ni san ijawaan. Waafuur Nyaan le ḥja nimi waabim, le ki cha ti yin u ke “Nte.” <sup>16</sup>Waafuur Nyaan le kpaan timi aawiin chee, le ki ji seeraa ke ti ye Uwumbor aabim. <sup>17</sup>Taah ye Uwumbor aabim na, ti ga kan Uwumbor aah di tiwanyaan ni bil kiir timi paacham na. Ti ni Kristo ga kpaan kan tiwanyaan ngbaan. Ti yaa ji falaa u pu kan, ti ni u ga nan kpaan ji mmɔɔn paacham.

### N-yoonn mu choo na aanyuj

<sup>18</sup>M nyi ke dandana aafalaa aan ḥjmaa ḥjan mpopiin mu ti ga nan kan mu paacham na. <sup>19</sup>Tiwan ni Uwumbor naan ni na mɔmɔk aanimbil man ke ni kan bundaln Uwumbor ga nyan waabim mpaan pu na. <sup>20</sup>Buyoonn Adam nan tun titunwanbir na, Uwumbor nan len ke tiwan ni u naan ni na, ni ga li bi, ki bi fam la. Waageehn pu, le u len kina. Naa ye tiwan ni u naan ni na aageehn. <sup>21</sup>Uwumbor mu tii tiwan ni u naan ni na limakl ke ni ga ḥja tiwan ni kaan bur na, ki kan lifuur nyaan ke Uwumbor aabim aah

kan pu na. <sup>22</sup>Ti nyi ke Uwumbor aah naan tiwan nimɔk na wu ke imalween aah wu pu na, ki du ki nan saa dandana. <sup>23</sup>Naa ye tiwannaankaan baanja le wu; timi bi Uwumbor puen tii timi Waafuur Nyaan na, ti mu du tisui ni, ki kii bundaln Uwumbor ga mɔk ke ti sil ye waabim, ki ga tii timi tiwon ti kaan kpo na. <sup>24</sup>Taah ḥjmar pu na, le ti kpa limakl. Unii yaa kpa limakl ke u ga kan tiwan kan, ni mɔk ke waa kee kan la. U yaa kan ni kan, waan ki li kpa limakl ni pu. <sup>25</sup>Tɔ, ti yaa kpa limakl ke ti ga kan tiwan ni tinimbil aa waa ni na kan, le ti ga li kpa limɔr ki kii bundaln ti ga kan ni na.

<sup>26</sup>Le Uwumbor Aafuur Nyaan ter timi, timi aadabur ni. Taa nyi taah ga mee u mbamɔm pu na, le Waafuur Nyaan mee u tii timi, ki du, ubaa aah kaa ḥjmaa len pu na. <sup>27</sup>Uwumbor u lik binib aasui ni aah bi pu na nyi Waafuur Nyaan aalandak aah bi pu na; ba pu? Nfuur Nyaan mee u tii waanib waah ban pu na.

<sup>28</sup>Ti nyi ke tiwan nimɔk pii timi na, Uwumbor le cha ni mɔmɔk kpalm tiwan ni ḥjan na ki tii binib bi gee u na. Waageehn pu le u nan yin bi. <sup>29</sup>U nan nyi binib bimɔk ga kii tii u na, le ki nan nyan bi, ke bi kpalm Ujapɔɔn Yesu Kristo aah bi pu na, aan u li ye ḥjan aabo, naabitib pam ponn ni. <sup>30</sup>Binib bi Uwumbor nyan bi na, le u yin bi. Binib bi u yin bi na, le u len ke baabor ḥjan, ki nyuj bi.

### Uwumbor aah gee timi pu na

<sup>31</sup>Uwumbor aah ḥja kina mɔmɔk na, ti ga len kinye? Uwumbor aah si tichan ni na, ubaa aan ḥjmaa ḥja timi nibaa.

<sup>32</sup>Uwumbor aa yii ke waan tii timi Ujapɔɔn. U nan di Ujapɔɔn ḥja binib aanyaal ni ke u ti kpo ti mɔmɔk aatunwanbir pu la. Waah tii timi Ujapɔɔn na, u ga ki tii timi tiwan mɔmɔk ki kpee.

<sup>33</sup>Ḥjma ga ḥjmaa galn binib bi Uwumbor nyan bi na? Uwumbor ubaa len ke

baabør ḥjan. <sup>34</sup>Nima le ubaa aan ḥjmaa galn timi. Yesu Kristo nan kpo ti pu, ki fikr nkun ni, ki bi Uwumbør aajangii wɔb, ki mee u ki tii timi. <sup>35</sup>Ba ga ḥjmaa nyan timi Kristo u gee timi na aajaal ni? Falaa aa? Tibør aa? Limukl aa? Nkon aa? Igiin aa? Linimaln aa? Nkun aa? Aayii. <sup>36</sup>Ni ḥjmee Uwumbør Aagbaŋ ni ke, “Sin pu le bi ku timi iwiin mɔmɔk, le ti naahn ipihi i bi ban bi ti kɔr i na la.”<sup>§</sup>

<sup>37</sup>Tɔ, Yesu Kristo u gee timi na aapɔɔn pu, le ti kan linyan kookoo. <sup>38-39</sup>Tidindaan Yesu Kristo pu, le Uwumbør gee timi. M sil bee ke nibaa aa bi ki ga ḥjmaa yakr ti ni waageehm. Nkun, limɔfal, Uwumbør aatuuntiib, kinimbɔŋ aapɔɔn, dandana aabør, daalbaadaal aabør, mpɔɔn, paacham aawan, taab aawan, tiwan nimɔk bi na, ni mɔmɔk aan ḥjmaa yakr ti ni Uwumbør aageehm.

### Uwumbør ni waanib Israel yaab

**9** Tɔ, maah ye Kristo aani na, m len mbamɔn la. Maa gee nnyamɔn. Maalandak ni Uwumbør Aafuur Nyaan ji seeraa ke m len mbamɔn la. <sup>2</sup>M kpa mpombiin sakpen. Nsui bii n-yoonn mɔmɔk, mmaal aanaabitiib Juu yaab pu la. <sup>3</sup>M ga li ḥjmaa ban ke m bee fam Kristo chee, bima taa bee. <sup>4</sup>Bi ye Israel yaab la. Uwumbør nan ḥja bi waabim, ki nyuŋ bi, ki puu tipuur tii bi, ki tii bi waakaal, ki mɔk bi baah ga li dooni u pu na, ki bui bi waah ga ḥja tinyoor pu ki ḥja bi pu na. <sup>5</sup>Biyaajatiib ye tiyaajaninkpiib la. Kristo\*\* aah nan ḥja unibɔn na, u nan ye bi ponn ni ubaa la. Uma le yeh mpɔɔn

<sup>§8:36</sup> : Lik Ilahn 44.22.

<sup>\*\*9:5</sup> : Hiibru aaliin ni, bi yin Kristo ke Masiya. Naatataa le ye ke unii u ga gaa binib lii na.

<sup>††9:7</sup> : Lik Mpiin 21.12.

<sup>‡‡9:9</sup> : Lik Mpiin 18.10, 14.

<sup>¶¶9:11-12</sup> : Lik Mpiin 25.23.

<sup>§§9:13</sup> : Lik Malakai 1.2-3.

<sup>\*9:15</sup> : Lik Nnyam 33.19.

mɔmɔk. Cha ti pak Uwumbør n-yoonn mu kaa kpa ndoon na. Amii.

<sup>6</sup>Uwumbør aah puu tipuur ti tii Israel yaab na, maa len ke waa gbiin tipuur ngbaan. Bi ye Israel aayaabitiib la. Ni mu aa ye bi mɔmɔk le ye Israel yaab bamɔm. <sup>7</sup>Bi ye Abraham aayaabitiib la. Ni mu aa ye bi mɔmɔk le ye uyaabitiib bamɔm. Uwumbør nan tuk Abraham ke waabo Aisak aayaabitiib baanja le ga li ye uyaabitiib bamɔm.<sup>††</sup> <sup>8</sup>Nima le mɔk ke Abraham aayaabitiib ngem aa ye Uwumbør aabim. Mbim bi Uwumbør nan puu tipuur ke Abraham ga maa na, bima le ye uyaabitiib bamɔm. <sup>9</sup>Uwumbør nan puu tipuur tii u ke ni yaa nan neer kan, u ga dan u chee, le upuu Sara ga maa ubijabo.<sup>‡‡</sup>

<sup>10</sup>Naa ye nimina baanja. Rebeka aabijabim mulee nan kpa te ubaa, u ye tiyaaja Aisak la. <sup>11-12</sup>Le Uwumbør nan bui Rebeka ke ubo u ye uwaatiir na ga jer ukpel.<sup>¶¶</sup> Buyoonn Uwumbør bui u kina na, waa nan kee ma mbim ngbaan. Baa nan kee ḥja ni ḥjan na, bee ni kaa ḥjan na. Uwumbør nyan mbim mulee ngbaan ponn ni ubaa, waageehn pu, naa ye baatuln pu. Nima le mɔk ke Uwumbør aageehn pu le u nyan waah ban unii u na. <sup>13</sup>Ni ḥjmee Uwumbør Aagbaŋ ponn ni ke u len ke u gee Jakob ki jer Eso.<sup>§§</sup>

<sup>14</sup>Kina kan, ti ga len kinye? Ti ga len ke Uwumbør ḥja ni kaa ḥjan aa? Taan len kina kpala. <sup>15</sup>U nan bui Moses ke binib bi u ban u san bi kinimbaak na, u ga san bi kinimbaak la.\* <sup>16</sup>Naa ye binib aageehn pu, kaa ye baatuln pu; Uwumbør aanimbaasaln pu, le u san bi kinim-

baak.<sup>17</sup> Ni ɻmee Uwumbor Aagbaŋ ni ke Uwumbor nan bui Ubɔr Faro, “M ɻa si ubɔr ke m mɔk binib maah kpa mpɔɔn ki chiin si pu na, aan maayimbil nya paacham, dulnyaa aapepel mɔmɔk ni.”<sup>†</sup>  
<sup>18</sup> Nima le binib bi u ban u san bi kinimbaak na, u san bi kinimbaak. Binib bi u ban ke u cha bi gaa biyil na, u cha bi gaa la.

### Uwumbor aaŋjuul, ni waanimbaasaln

<sup>19</sup> Nibaakan, aa ga baa mi, “Ni yaa ye kina kan, ba pu Uwumbor galn binib? ɻma ga ɻmaa yii waageehn?”  
<sup>20</sup> Njɔ, aa ye ɻma ki kpak Uwumbor? Ti-wanaankaan aan baa unii u naan ni na, “Ba ɻa aa naan mi kina?”<sup>‡</sup> <sup>21</sup> Uyakmaal ga ɻmaa yagr tiyakr waageehn pu, ki di tibaa ti maa lisil aasambil, ki di tiken maa lisambil li kaa ye lisil aasambil na.

<sup>22</sup> Uwumbor aah ɻa pu na, ni bi kina la. U nan ban ke u mɔk binib ke u gee lijuul titunwanbir pu, ki ban ke bi bee waah kpa mpɔɔn pu na. Nima le u ji limɔr pam binib bi ɻa u lijuul ki neer ntafadaan na pu. <sup>23</sup> U mu ban ke binib bee waah ɻan sakpen pu na, ki san timi kinimbaak, ki ɻa timi mpopiin pam. U nan naan timi ke u ɻa timi kina la, <sup>24</sup> ki yin timi bi ye Juu yaab na, ni binib bi kaa ye Juu yaab na mu. <sup>25</sup> Ni ɻmee Hosea aagbaŋ ni ke Uwumbor bui ke,

“Binib bi kaa nan ye maanib na, m ga yin bi maanib.

ɻinibol ɻi maa nan gee ɻi na, m ga yin ɻi maanigeehm la.”<sup>¶</sup>

<sup>26</sup> Baah nan tuk bi ke baa ye maanib nin chee na,

nima chee le bi ga yin bi ke min Uwumbor u fu na aabim.”<sup>§</sup>

<sup>27</sup> Tɔ, Uwumbor aabɔnabr Aisaya nan len Israel yaab aabɔr; u nan len ke Israel yaab wiir ke nnyusakpem aatambol aah wiir pu na, le bi ponn ni, binib siib baanja ga ɻmar; <sup>28</sup> ba pu? Uwumbor ga daa dulnyaa aanib aatafal, waah nan len pu na, kaan taan.<sup>\*\*</sup> <sup>29</sup> Ni bi ke Aisaya aah nan ki len pu na ke, “Uwumbor Mpɔɔnsakiindaan yaa kaa ba gur timi yaabitiib siib kan, ti mɔmɔk ba ga kuln ke Sodom aatiŋ aanib ni Gomora aatiŋ aanib aah nan kuln pu na la.”<sup>††</sup>

### Israel yaab ni tibɔnyaan ngbaan

<sup>30</sup> Nima pu na, ti ga len kinye? Binib bi kaa ye Juu yaab na aanimbil aa nan man ke Uwumbor len ke baabɔr ɻjan. Dandana wee, baah gaa Yesu ki kii na, nima le Uwumbor len ke baabɔr ɻjan. <sup>31</sup> Israel yaab aanimbil nan man ke bi li joo nkaal, aan Uwumbor len ke baabɔr ɻjan. Bi mu aa nan ɻmaa joo mu; <sup>32</sup> ba pu? baa gaa Uwumbor ki kii. Bi dak ke baatuln pu le Uwumbor ga len ke baabɔr ɻjan. Bi yii Yesu Kristo le ki lir; <sup>33</sup> bi gbeer lifaakuul li Uwumbor Aagbaŋ len laabɔr na ke, “U di lifaakuul bil Sionn aatiŋ ni.

Binib ga gbeer li ki lir.

Le unii umɔk gaa u ki kii na aan ji inimɔɔn.”<sup>\*\*\*</sup>

**10** Nnaabitiib, m mee Uwumbor tii maanib Israel yaab ke bi ɻmar. M ban kina le nsui mɔmɔk. <sup>2</sup> M ga ɻmaa ɻa bi seeraa ke binimbil man Uwumbor aatuln pu. Bi mu aa bee u mbamɔm. <sup>3</sup> Baa nyi Uwumbor aah ɻa pu aan ki len ke

<sup>†9:17</sup> : Lik Nnyam 9.16.

<sup>‡9:20</sup> : Lik Aisaya 29.16; 45.9.

<sup>¶9:25</sup> : Lik Hosea 2.23.

<sup>§9:26</sup> : Lik Hosea 1.10.

<sup>\*\*9:28</sup> : Lik Aisaya 10.22-23.

<sup>††9:29</sup> : Lik Aisaya 1.9.

<sup>\*\*\*9:33</sup> : Lik Aisaya 8.14; 28.16.

binib aabor ḥjan u chee na. Bi nan ban ke bi dii nkaal aan ki ḥmar, ki yii Uwumbor aah ḥja pu ki cha binib aabor ḥjan u chee na.<sup>4</sup> Kristo fuu ni ke binib bi gaa u ki kii na aabor li ḥjan. Naa ye ke baah dii nkaal pu na le cha baabor ḥjan.

### **Uwumbor ban ke u gaa binib mɔmɔk lii**

<sup>5</sup> Moses nan ḥmee ke unii yaa kii nkaal aah mɔk pu na kan, Uwumbor ga len ke waabor ḥjan. U nan ḥmee ke “Unii yaa ḥja nkaal aah mɔk pu na kan, u ga kan limɔfal.”<sup>¶</sup> <sup>6</sup> Timi bi gaa Yesu ki kii na, Uwumbor len ke timi aabor ḥjan. Nima pu le ti len ke, “Taa baa aabaa aasui ni ke, ‘Ijma ga buen paacham u ti li joo ni Kristo?’ <sup>7</sup> ki taa baa ke, ‘Ijma ga buen bitekpiib do ki ti fikr Kristo nkun ni?’” <sup>8</sup> Ti len ke, “Uwumbor aaliin aa daa aa chee. I bi aamɔb ni, ni aasui ni.” Iliin ngbaan le ti mooni ke aa gaa Yesu ki kii.<sup>§§</sup> <sup>9</sup> Aa yaa len binib aanimbil ni ke Yesu le ye Aadindaan, ki yaa ḥja naadii aasui ni ke Uwumbor fikr u nkun ni kan, aa ga ḥmar. <sup>10</sup> Ti gaa u ki kii tisui ni la, nima le Uwumbor len ke timi aabor ḥjan. Ti len binib aanimbil ni ke ti gaa u ki kii, nima le ti ḥmar. <sup>11</sup> Uwumbor Aagbaŋ len ke unii umɔk gaa u ki kii na aan ji inimɔɔn.\* <sup>12</sup> Binib bi ye Juu yaab na, ni binib bi kaa ye Juu yaab na mɔmɔk kpaan la. Uwumbor le ye bi mɔmɔk Aadindaan, ki ḥja tinyoor sakpen ḥja binib bimɔk mee u ke bi ḥmar na pu. <sup>13</sup> Waagbaŋ len ke unii umɔk mee Uwumbor ke u gaa bi lii na kan ga ḥmar.<sup>†</sup>

<sup>14</sup> Bi yaa kaa gaa u ki kii kan, bi ga ḥja kinye aan ki mee u ke u gaa bi lii? Bi yaa kaa ḥjun waaliin kan, bi ga ḥja kinye aan ki gaa u ki kii? Unii yaa kaa mooni waaliin kan, bi ga ḥja kinye aan ki ḥjun?<sup>15</sup> Uwumbor yaa kaa tun bi ke bi ti moon waaliin kan, bi ga ḥja kinye aan ki moon i? Ni ḥmee Uwumbor Aagbaŋ ni ke, “Binib bi joo ni tibɔnyaan ti tii timi nsuu-doon na, bi tii timi mpopiin pam.”‡ <sup>16</sup> To, naa ye binib mɔmɔk le kii tii tibɔnyaan ngbaan. Uwumbor aabɔnabr Aisaya nan baa ke, “Uwumbor, ḥjma pak taah len pu na?”<sup>¶</sup> <sup>17</sup> To, unii u gaa Kristo ki kii na, u ḥjun waabor, nima le u gaa u ki kii. Unii u ḥjun Kristo aabor na, unii ubaa le moon tibɔr ngbaan, nima le cha u ḥjun.

<sup>18</sup> Le m baa ke, “Israel yaab aa nan ḥjun aa?” Mbamɔn, bi ḥjun. Ni ḥmee Uwumbor Aagbaŋ ni ke, “Bineel mu tee chaa dulnyaa wee mɔmɔk ni, le kitij kee mɔmɔk pu ḥjun.”§ <sup>19</sup> M ki baa ke, “Israel yaab aa nan bee ee?” Bi bee. Njan Moses nan len ke Uwumbor len ke, “M ga ḥja litimbol li kaa ye tibaa na tinyoor, le ki cha nimi Israel yaab li kpa lipiipoln li pu. M ga ḥja litimbol li aanib ye bijɔrb na tinyoor, le ki cha ni gee lijuul bi pu.”\*\* <sup>20</sup> Aisaya mu nan kpa lipobil pam ki len ke Uwumbor len ke, “Binib bi kaa chuun ban mi na kan mi la.

¶¶10:5 : Lik Liifai Yaab 18.5.

§§10:8 : Lik Ikaal 30.12-14.

\*10:11 : Lik Aisaya 28.16.

†10:13 : Lik Joel 2.32.

\*10:15 : Lik Aisaya 52.7.

¶10:16 : Lik Aisaya 53.1.

§10:18 : Lik Ilahn 19.4.

\*\*10:19 : Lik Ikaal 32.21.

M di mbaa mɔk binib bi kaa baa maabor na.”††

<sup>21</sup> Israel yaab ma kan, Uwumbor len baabor ke, “Iwiin momɔk m kai ɔnjaal ki yin binib bi yii mi kaa kii maamɔb na.”‡‡

### Uwumbor aah ga san Israel yaab kinimbaak pu na

**11** Nima pu le m baa ke, “Uwumbor yii waanib Israel yaab aa?” Naa bi kina kpala. Min Pɔɔl mbaa ye Israel yaab aanii la. M ye Abraham aayaabil, ki ye Benjaminn aanibol aanii la. <sup>2</sup>Uwumbor aa yii waanib bi u nan lee bi njan na. Ni bee Uwumbor Aagbanj aah len Elaija aabɔr pu na. Elaija nan galn Israel yaab Uwumbor chee, <sup>3</sup>le ki bui ke, “Uwumbor, bi ku saabɔnabtiib, ki gbaa wii saatork aabimbin. Min baanja le gur saabɔnabtiib ponn ni. Le bi ban bi ku m mu.” <sup>4</sup>Uwumbor nan bui u kinye? U nan bui u, “M gur mbaa bijab ɔnjchur ɔnilole bi kaa gbaan ki doon liwaal Baal na.” <sup>5</sup>Ni bi kina le dandana wee. Israel yaab ponn ni, binib siib baanja le ɔnmar. Uwumbor lee bi waanimbaasaln pu. <sup>6</sup>Waah lee bi waanimbaasaln pu na kan, naa ye baatuln pu le u lee bi. Ni yaa ye baatuln pu kan, waanimbaasaln aan ki li ye linimbaasaln bamɔnn.

<sup>7</sup>Kina kan, ni bi kinye? Israel yaab aah ban pu na, baa kan. Binib bi Uwumbor nyan bi na le kan. Bi gur na gaa biyil. <sup>8</sup>Ni ɔnjmee Uwumbor Aagbanj ni ke, “Uwumbor chuu nyan nlan biyil ni ke binimbil taa woln, bitafal mu taa ɔnun, ki nan saa dandana wee.”

<sup>9</sup>Ubɔr David mu nan len ke,  
“Cha baajikaar aajim kpalm gaawɔb,  
cha bi kan ntafadaan ki lir.

<sup>10</sup>Cha binimbil li bɔɔn, aan bi taa li waa,  
ki cha bi kan falaa sakpen.”

<sup>11</sup> Nima pu le m baa ke: Juu yaab lir ke bi taa ki fii ii? Naa bi kina kpala. Baah lir na, nima le cha binib bi kaa ye Juu yaab na ɔnmar, aan Juu yaab li kpa lipiipoln bi pu. <sup>12</sup>Juu yaab nan yii Yesu, kaa ɔnmar, nima le dulnyaa ni aanib bi kaa ye Juu yaab na kan tinyoor ki ɔnmar. Juu yaab yaa nan ɔnmar doo kan, nima le binib bi kaa ye Juu yaab na ga kan tinyoor ki jer baah nan kan pu na.

### Binib bi kaa ye Juu yaab na aah ɔnmar pu na

<sup>13</sup>Tɔ, m ga len nimi bi kaa ye Juu yaab na chee tibɔr. Uwumbor aah tun mi ke m tuk nimi waabor na, le m pak lituln ngabaan; <sup>14</sup>ba pu? m ban ke maanibol Juu yaab kan naah ɔnmar pu na, aan ki li ban ke bi mu ɔnmar. <sup>15</sup>Uwumbor aah yii Juu yaab na, le u ni binib bi kaa ye Juu yaab na kpaan kijɔtik. U yaa ki gaa Juu yaab kan, ni ga li ye limɔfal le ki tii binib. Nkun aan ki li joo bi.

<sup>16</sup>Tɔ, bi yaa di njan aaboroboro tii Uwumbor kan, ni mɔk ke boroboro umɔk gur na mu ye uyoo la. Bi yaa di busub aanyaan tii Uwumbor kan, ni mɔk ke ibon mu ye uyaan la. <sup>17</sup>Uwumbor nan gaa gii busunyaan aabon ibaa, le ki di timoor ni aasub aabon ki di toj bu pu. Juu yaab bi ke busunyaan na la. Nimi bi kaa ye Juu yaab na bi ke timoor ni aasub aabon na. Le Uwumbor chuu nyan ni binib bibaa Juu yaab ponn ni, ki di nimi koon Juu yaab ponn ni, ke ni yakr baanyoor, ni baawanyaan. <sup>18</sup>Nima pu na, ni taa li kpa kipupuk ke ni jer bi. Ni ga ɔnmar kinye ki li kpa kipupuk? Ni po ye ibon la. Naa joo inyaan, inyaan le joo nimi. Juu yaab pu le ni ɔnmar, naa ye nimi pu le cha Juu yaab ɔnmar.

<sup>19</sup>Nibaakan, ni ga len ke, “Uwumbor chuu nyan ni binib bibaa Juu yaab ponn

††**10:20** : Lik Aisaya 65.1.

‡‡**10:21** : Lik Aisaya 65.2.

ni, ke u di timi koon bi ponn ni.”<sup>20</sup> Ni ye mbamōn, Juu yaab aah kaa gaa Yesu Kristo ki kii na, nima le cha Uwumbor di bi lii. Nimi le gaa u ki kii. Nima le ni lej baalelen. Ni taa li kpa kalmbaani. Ni li san Uwumbor.<sup>21</sup> U nan daa Juu yaab aatafafal. Ni li nyi ke u ga ḥjmaa daa ni mu aatafafal.<sup>22</sup> Ni kan Uwumbor aah ḥjan pu na, ki kan waah dar binib aatafafal pu na. U dar binib bi kaa kii tii u na aatafafal la, le ki ḥja nimi tijann. Ni yaa beenin dii u kan, u ga li beenin ḥjani nimi tijann. Ni yaa kaa beenin dii u kan, u ga di ni mu lii la.<sup>23</sup> Juu yaab mu yaa kpeln ki yaa gaa Yesu Kristo ki kii kan, Uwumbor ga ki di bi toj waanib pu; u ga ḥjmaa ḥja kina.<sup>24</sup> Nimi bi kaa ye Juu yaab na, ni bi ke timoor ni aasub aabon na, le Uwumbor gaa gii nimi ki di toj busunyaan pu, binib aah kaa ḥjani pu na. Nima le naa pcc u di Juu yaab, bi bi ke busunyaan aabon na, ki ki di toj busunyaan ngbaan pu.

### Uwumbor aanimbaasaln

<sup>25</sup> Nnaabitib, m ban ke ni bee tibōrkaan tibaa, aan ki taa li dak ke ni kpa nlan sakpen. Juu yaab bibaa kpak tibonyaan tee la, ki ga kpak ti ki nan saa buyoonn binib bi kaa ye Juu yaab aan Uwumbor lee bi na ga ḥjmar na.<sup>26</sup> N-yoonn ngbaan le Juu yaab mōmōk mu ga ḥjmar. Ni ḥjme Uwumbor Aagbañ ni ke, “U gaal binib lir na ga nyan ni Sionn paacham, ki nyan Jakob aayaabitib aatunwanbir.<sup>27</sup> Maah puu tipuur ti tii bi na le ye ke m ga nyan baatunwanbir bi chee.”

<sup>28</sup> Tɔ, baah yii Yesu aabonyaan tee na, bi ye Uwumbor aadim la. Nima le ni kan tinyoor ki ḥjmar. Uwumbor mu nan lee bi; waah lee bi na, biyaajatiib pu le u gee bi.<sup>29</sup> Uwumbor yaa lee binib ki ḥja tinyoor ḥja bi pu kan, waan kpeln

waalandak.<sup>30</sup> Nimi bi kaa ye Juu yaab na, n-yaayoonn na, ni nan yii Uwumbor aamōb. Le dandana wee u san nimi kinimbaak, Juu yaab aah yii u na pu.<sup>31</sup> Uwumbor aah san nimi kinimbaak pu na, nima le ga cha u san Juu yaab bi kaa gaa Yesu ki kii dandana wee na kinimbaak.<sup>32</sup> U len ke Juu yaab ni binib bi kaa ye Juu yaab na mōmōk ye titunwanbirdam, aan u san bi mōmōk kinimbaak.

<sup>33</sup> Uwumbor kpa nlan ni mbaem sakpen. Ubaa aan ḥjmaa bee waah kpa sakpen pu na. Waah siin pu na, ubaa aan ḥjmaa bee ḥjtaa ḥji pu u siin kina na. Ubaa aan ḥjmaa bee waah ḥjani pu na.<sup>34</sup> Ni ḥjme Uwumbor Aagbañ ni ke, “Ḥjma nyi Uwumbor aalandak?

Ḥjma ga ḥjmaa tuk u waah ga ḥja pu na?

<sup>35</sup> Ḥjma tii u nibaa aan u giin tii u?”

<sup>36</sup> Tiwan nimok bi na, ni nyan ni u chee la. U cha tiwan mōmōk beenin bi. Tiwan mōmōk bi, ke ni pak u. Uma le yeh mpakm n-yoonn mu kaa kpa ndoon na. Amii.

### Taah ga tun Uwumbor aatuln pu na

**12** Nima pu na, nnaabitib, Uwumbor aanimbaasaln pu le m gan nimi, ni di nimi aawon tii Uwumbor, ki ḥja kitork ki fu, ki bi chain, ki ga piir usui na. Nimina le ye naah ga li dooni u mbamōn pu na.<sup>2</sup> Ni taa ki li bi ke dulnyaa wee aanib aah bi pu na. Kpeln nimi aalandak man aan ki kpeln nimi aabimbin. Nima le ni ga bee Uwumbor aah gee pu na. Ni ga bee naah ga ḥja pu ki li bi mbamōn ki tun litunyaan ki piir usui na.

<sup>3</sup> Tɔ, Uwumbor aah tii mi tininkpir pu na, nima le m bui unii umōk bi ni ponn ni na, ke u taa li dak ke u ḥjan jer waah ḥjan pu na. U li dak suuna, Uwumbor aah cha unii mōmōk tii u naadii pu na.

<sup>4</sup> Ti kpa tiwon aawan ni wiir na tiwombaan ponn ni la. Tiwon aawan mōmōk aatuln bi libaa libaa la.<sup>5</sup> Ti mu bi kina la. Ti wiir, le taah kpaan Kristo chee na,

ti kpaan tiwonbaan. Ti mɔmɔk toŋ tɔb pu ke tiwon aawan aah toŋ tɔb pu pu na la.<sup>6</sup> Uwumbɔr tii timi Waafuur Nyaan aapiin ibaabaa ke i cha ti tun waatuln libaabaa na. Waah tii timi pu na, cha ti tun kina man. Unii aapiin yaa ye ke u nabr Uwumbɔr aah len pu na kan, u len iliin ngbaan waah ḥa naadii pu na.<sup>7</sup> Uken aapiin yaa ye Uwumbɔr aatuln kan, u li tun lituln ngbaan. Uken yaa ḥmaa mɔk binib Uwumbɔr aabɔr kan, u li mɔk bi.<sup>8</sup> Uken yaa ḥmaa poɔni binib aataakpab kan, u poɔk bitaakpab. Uken mu yaa ḥmaa tii bigiim kan, u li tii bi ki li kpa tibulchinn. Uken mu yaa ye Yesu aanib aaninkpel kan, utafal li bi bi ponn ni. Uken mu yaa ter binib baamukl ni kan, u li ter bi ki li kpa mpopiin.

<sup>9</sup>Tɔ, ni li gee binib nisui ni. Ni li nan lituln li kaa ḥjan na, ki li gee lituln li ḥjan na.<sup>10</sup> Ni li gee tɔb mbamɔm, ke mmaalbaan ni aanib aah gee tɔb pu na, ki li pak biken ki jer nibaa.<sup>11</sup> Ni taa li san ligbanyakl man. Cha ninimbil li man Tidindaan aatuln pu,<sup>12</sup> ki li kpa mpopiin nimi aamakl pu, ki li kpa limɔr falaa ponn ni, ki li mee Uwumbɔr n-yoonn mɔmɔk,<sup>13</sup> ki yakr nimi aawan tii Uwumbɔr aanib bilann ni na, ki chann bicham tichann.

<sup>14</sup> Ni mee Uwumbɔr ke u ḥja tinyoor ḥja binib bi ḥjani nimi falaa na pu. Ni bui bi ke, “Uwumbɔr ḥja tinyoor ḥja ni pu.” Ni taa sii bi.<sup>15</sup> Ni li kpa mpopiin binib bi kpa mpopiin na chee, ki li wii binib bi wii na chee.<sup>16</sup> Ni li kpaa kimɔbaan man. Ni li ḥjonne bigiim man, ki taa li kpa kalmbaani. Ni taa li dak ke ni kpa nlan sakpen.

<sup>17</sup> Unii yaa ḥja si bakaa kan, taa teen u. Ni li ḥjani ni ḥjan na binib mɔmɔk aanimbil ni.<sup>18</sup> Ni li poɔni nibaan man, ki li bi suuna binib mɔmɔk chee.<sup>19</sup> Maanigeekaab, binib yaa ḥja nimi bakaa kan, ni taa teen bi. Cha Uwumbɔr le daa bitafal. Ni ḥmee Uwumbɔr Aagbaŋ ni ke Uwumbɔr len ke, “Min

baanja le kpa nsan ke m daa binib aatafal. Min le ga teen bi.”<sup>20</sup> Ni ki ḥmee Uwumbɔr Aagbaŋ ni ke, “Nkon yaa joo saadin kan, tii u tijikaar u ji. Nnyunyuu yaa joo u kan, tii u nnyun u nyu. Aa yaa ḥja kina kan, inimɔɔn ga ku u.”<sup>21</sup> Unii yaa ḥja si bakaa kan, taa cha bakaa ngbaan nyaj si. Cha tijann le nyaj bakaa.

### Kii bitinjoob aamɔb

**13** Ni ḥjan ke binib mɔmɔk li keei baatiq aayidam aamɔb. Uyidaan ubaa aa bi ubaa pu see Uwumbɔr le cha u bi. Biyidam bi bi na, Uwumbɔr le nyan bi siin.<sup>2</sup> Nima pu na, unii yaa yii waatiq aayidam kan, u yii Uwumbɔr aah siin pu na la. Binib bi yii bi na ga kan ntafadaan.<sup>3</sup> Biyidam aa bi ke bi li faani binib bi tun lituln li ḥjan na. Bi bi ke bi li faani binib bi tun lituln li kaa ḥjan na la. Aa ban ke aa li kaar biyidam aa? Tun lituln li ḥjan na, nima le bi ga pak si.<sup>4</sup> Bi ye Uwumbɔr aatutum ke bi biin aa pu la. Aa mu yaa tun lituln li kaa ḥjan na kan, li san ijawaan. Bi kpa mpoɔɔn ke bi daa aatafal. Bi ye Uwumbɔr aatutum ke bi daa binib bi tun lituln li kaa ḥjan na aatafal.<sup>5</sup> Nima pu na, ni li keei nimi aatiq aayidam aamɔi, ki taa kan ntafadaan; nimi aalan-dak mu taa bii nimi.

<sup>6</sup> Nima pu na, ni ḥjan ke ni li pa lampoo mu. Bi ye Uwumbɔr aatutum bi u nan siin bi ke bi tun lituln ngbaan na la.<sup>7</sup> Nima pu na, ni li tii nimi aayidam baah neer pu na. Ni li pa lampoo tii bilam-poogaab. Ni li pak binib bi ḥjeer mpakm na, ki li nyujni binib bi ḥjeer nnyuj na.

### Ngeehm

<sup>8</sup> Ni taa li joo unii ubaa aapɔln. Naah joo tɔb aapɔln li na le ye ke ni li gee tɔb. Unii u gee binib na, u gbiin Uwumbɔr aakaal mɔmɔk la.<sup>9</sup> Ba pu? ikaal mɔmɔk nyan ni nkaal mu len ke, “Aa li gee binib biken ke saah gee aabaa pu na” ni la. Ikaal i len ke, “Taa gɔr kidagook, taa ku

binib, taa su kinaayuk, taa gee nnyamɔn paani binib, taa li ban biken aawan” na, ikaal ngbaan, ni ikaal i gur na mɔmɔk nyan ni nkaal ngbaan ponn ni la.<sup>10</sup> Unii u gee binib na aa ɔjani bi bakaa ubaa. Nima pu na, unii u gee binib na gbiin Uwumbɔr aakaal mɔmɔk aah len pu na la.

<sup>11</sup> Ni li ɔjani kina man. Ba pu? n-yoonn mumina ye linimaln aayoonn la. Ni neer ke ni finn ngeen pu ki taa ki san ligbanyakl. Tidindaan aah ga gir ni bунdaln na aan ki yunn. Le u ga nyan timi falaa mɔmɔk ponn ni.<sup>12</sup> Naan yunn, kinyeek ga doo. Kitaak aawoln aa ki daa. Nima pu na, cha ti di cha mbɔmbɔɔn ni aatuln, aan ki li kpa mbimbinyaan mu neer nwiihn na.<sup>13</sup> Cha ti li bi mbamɔm, ke binib bi bi nwiihn ni na aah bi pu na, ki taa li ye bidanyurb, ki taa nyu ndaan ki gbii, ki taa gor kidagook, ki taa ɔjani yɔl yɔl aatuln, ki taa jaa kijaak, ki taa li kpa lipiipoln.<sup>14</sup> Ni li bi ke Tidindaan Yesu Kristo aah bi pu na, ki taa ki li ɔjani nimi aabimbikpok aah ban pu na.

### Taa galn aajeen aat

**14** Tɔ̄, unii u gaa Yesu ki kii, ki mu aa bee waasan mbamɔm na, ni gaa u man. Ni mu taa kpak u kinikpak-pak waah joo beeni pu na pu.<sup>2</sup> Ubaa ga pak ke tijikaar tibaa aa kɔ. Unii u kaa kee bee Yesu aasan mbamɔm na ga li kɔ tinann.<sup>3</sup> Unii u kaa kɔ tijikaar tibaa na, u taa lik unii u kɔ tinann na fam. Unii u kɔ tinann na mu taa galn unii u kaa kɔ tijikaar tibaa na; ba pu? Uwumbɔr gaa u mu la.<sup>4</sup> Aa ye ɔjma ki galn uken aatutunn? U yaa sil kan, u sil ki tii uma ubaa Aadindaan la. U yaa ti ki lir kan, u lir ki tii uma ubaa Aadindaan la. Ni ye mbamɔm, u ga sil; ba pu? Uwumbɔr ga ɔjmaa cha u sil.

<sup>5</sup> Unii ubaa pak nwiin mubaa ki jer iken la. Ubaa mu len ke iwiin mɔmɔk kpaan la. Cha unii mɔmɔk li nyi waah

dak pu na, ki li ɔjani kina.<sup>6</sup> Unii u pak nwiin mubaa ki jer iken na, u pak mu ki tii Tidindaan la. Unii u kaa pak nwiin mubaa ki jer iken na, u ɔjani kina ki tii Tidindaan la. Unii u kaa kɔ tijikaar tibaa na, u ji ti ki tii Tidindaan la; ba pu? u dooni Uwumbɔr le ki nin ji. Unii u kɔ tijikaar tibaa na, waa ji ti, ki tii Tidindaan, ki mu dooni Uwumbɔr.<sup>7</sup> Unii ubaa aa bi ubaa baanja pu, ubaa mu aakun aa ye uma baanja aabor.<sup>8</sup> Ti yaa bi kan, ti bi ke ti li pak Tidindaan la. Ti yaa kpo kan, ti kpo ke ti li pak Tidindaan la. Nima pu na, ti yaa bi, bee ti yaa kpo kan, ti ye Tidindaan yaab la.<sup>9</sup> Kristo nan kpo ki fikr nkun ni, ke u li ye binib bi kpo na, ni binib bi fu na mu Aadindaan la.<sup>10</sup> Sin, ba ɔjani aa galn aana aabo? Sin, ba ɔjani aa lik aana aabo fam? Ti mɔmɔk ga sil Uwumbɔr aanimbiin ni, le u ji timi tibɔr.<sup>11</sup> Ni ɔjme Uwumbɔr Aagbaŋ ni ke uma Uwumbɔr len ke, “Ni ye mbamɔm, binib mɔmɔk ga dan nan gbaan nnimbiin ni,

ki pak mi, ke min le ye Uwumbɔr.”<sup>12</sup>

Nima pu na, ti mɔmɔk ga tuk Uwumbɔr taah ɔjani pu na.

### Taa gbii aana aabo pu libuul

<sup>13</sup> Nima pu na, ti taa ki galni tɔ̄b. Ni li nyi ki taa lej nina aabo Uwumbɔr aasan ni.<sup>14</sup> Maah kpaan Tidindaan Yesu chee na, le m sil bee ke tiwan nibaa aa kɔ nibaa pu. Unii mu yaa dak ke tiwan nibaa kɔ kan, ni kɔ u chee la.<sup>15</sup> Aa yaa ji tijikaar ti kɔ aana aabo chee na, ki bii usui kan, naa ye ke aa gee u le cha aa ɔjani kina. Kristo le nan kpo u pu. Aa taa ɔjani u fam saajikaar pu.<sup>16</sup> Ni taa ɔjani tiwan ni ga cha binib bii nimi aasanyaan na.<sup>17</sup> Uwumbɔr aanaan aa ye tijikaar ni tiwanyukaan. Mu ye mbimbinyaan, ni nsuudoon, ni mpopiin, Waafuur Nyaaan aah tii timi pu na la.<sup>18</sup> Unii u dii Kristo ki bi kina na, u ga piir Uwumbɔr aasui. Binib mu ga pak u.

<sup>19</sup> Nima pu na, ni li pɔɔni nibaa aan ki li kpaan kimɔbaan, aan ki ter tɔb ke ni dii Uwumbor aasan mbamɔm. <sup>20</sup> Ni taa bii Uwumbor aatuln tijikaar pu. Tijikaar tibaa aa ko. Aa mu yaa ji tijikaar ti ga bii uken aasui na kan, nima le aa ḥjan. <sup>21</sup> Ni ḥjan ke aa taa kiir aana aabo Uwumbor aasan ni; ni taa ḥmɔ kitork aanann, ki taa nyu ndaan, ki taa ḥa tiwan nibaa ni ga cha aana aabo tun titunwanbir ki lir na. <sup>22</sup> Aa yaa ko tijikaar tibaa, bee aa yaa kaa ko tibaa kan, cha ni li bi aa ni Uwumbor chee. Unii u ji tijikaar ti ḥjan u chee na, kaa galni ubaa na, u kpa mpopiin la. <sup>23</sup> Unii u ji tijikaar, kaa pak ke ti ḥjan na, waabor bii la; ba pu? waa ḥa naadii ke ni ḥjan. Unii yaa kaa pak ke tiwan ḥjan, ki ḥa ni kan, ni ye titunwanbir la.

### Li pak aanjeen aato ki jer aabaa

**15** Timi bi gaa Yesu ki kii mbamɔm na, ni ḥjan ke ti li ji limɔr, ki ter binib bi kaa gaa u mbamɔm na, ki taa ḥjani tibaa aageehn baanja. <sup>2</sup> Cha ti mɔmɔk aatafal li bi tinaabitib ponni ni, aan ki ter bi, bi dii Uwumbor aasan mbamɔm. <sup>3</sup> Kristo aa nan ban ke u li ḥjani uma ubaa aageehn. Ni ḥmee Uwumbor Aagbaŋ ni ke, “Hisiibil ḥi ye sin yee na choo min chee la.” <sup>4</sup> Tiwan nimi ḥmee Uwumbor Aagbaŋ ponni ni na, ni ḥmee ke ti bae ni la. Waagbaŋ pɔɔni timi aataakpab, ki ter timi ti li kpa limɔr, ki tii timi limakl. <sup>5</sup> Uwumbor u tii timi limɔr, ki pɔɔk timi aataakpab na tii nimi kimɔbaan Yesu Kristo aah ban pu na, <sup>6</sup> aan ni mɔmɔk li kpaan kimɔbaan ki nyuŋ Uwumbor, u ye Tidindaan Yesu Kristo aate na.

### Binib bi kaa ye Juu yaab na mu ḥyun tibɔnyaan ngbaan

<sup>7</sup> Ni gaa tɔb ke Kristo aah nan gaa nimi pu na, aan ki nyuŋ Uwumbor man. <sup>8</sup> M tuk nimi la, Kristo nan ter Juu yaab ki gbiin Uwumbor aah nan puu tipuur tii

biyaajatiib pu na, ki mɔk ke Uwumbor len mbamɔn la, <sup>9</sup> ki cha binib bi kaa ye Juu yaab na mu nyuŋ Uwumbor waanimbaasaln pu, ke naah ḥmee waagban ponni ni ke,

“M ga doon si binib bi kaa ye Juu yaab na aakaasisik ni,  
ki gaa ilahn ki pak si.”

<sup>10</sup> Uwumbor ki len ke,  
“Nimi bi kaa ye Juu yaab na,  
ni li kpa mpopiin Uwumbor aanib chee,”  
<sup>11</sup> ki ki len ke,

“Nimi bi kaa ye Juu yaab na,  
ni mɔmɔk pak Uwumbor man.

Hjinibol mɔmɔk, li pak u mbamɔm.”

<sup>12</sup> Uwumbor aabɔnabr Aisaya mu nan len ke,

“Jese aayaabil ga fuu ni.

Uwumbor ga tii u mpopɔn u li ye  
binib bi kaa ye Juu yaab na aayidaan.  
Le bi gaa u ki kii.”

<sup>13</sup> Uwumbor tii timi limakl la. Naah gaa u ki kii pu na, u gbiin nimi mpopiin ni nsuudoon mɔmɔk. Nima le ni ga li kpa limakl sakpen, Waafuur Nyaan aapɔɔn pu.

### Naah ḥa pu aan Pɔɔl ḥmee kina na

<sup>14</sup> Nnaabitib, m nyi nsui ni ke nimi aabimbin ḥjan pam. Ni bee Uwumbor aaliin mbamɔm, ki ga ḥmaa sur tɔb.

<sup>15</sup> To, m mu aah ḥmee kigbaŋ kimina tii nimi na, m kpa lipobil ki teer nimi tibɔr tibaa pu; ba pu? Uwumbor san mi kinimbaak, <sup>16</sup> ki ḥa mi Yesu Kristo aatutunn ke m tuk binib bi kaa ye Juu yaab na Uwumbor aabɔnyaan, ki di bi tii Uwumbor, ke kitork na. Waafuur Nyaan le ḥa bi chain ke bi piir usui. <sup>17</sup> Maah tun lituln tii Uwumbor na, le m ga ḥmaa li kpa kipupuk Yesu Kristo pu. <sup>18</sup> M ban m tuk nimi Kristo aah cha m tun lituln pu na la. Maan len biken aatuln pu. U cha m tuk binib bi kaa ye Juu yaab na waabor ki tun lijinjiir aatun, ke bi kii waamɔb.

<sup>19</sup> Uwumbor Aafuur Nyaan aapɔɔn pu le

m tun lijinjiir aatun, ke bi bee waah kpa mpcoen pu na. Kina le m mooni Kristo aabonyaan mɔmɔk Jerusalem ponn ni, ki di ti saa Ilirikum aatiŋ ni.<sup>20</sup> Nnimbil nan man ke m moon Kristo aabonyaan tee, binib aah kaa kee jun ti pu nin chee na. Maa nan ban m buen biken aah puen moon ti nin chee na.<sup>21</sup> Ba pu? ni ŋmee Uwumbor Aagbaŋ ponn ni ke, “Binib bi kaa kee jun waabor na, bi ga jun, ki bee taatataa.”<sup>22</sup>

### Pɔɔl aah ŋa nlandak ke u mann Rom yaab pu na

<sup>22</sup>Tɔ, maah ban m moon tibɔnyaan tee nima chee na, nima pu le maa kee kan nsan ke m dan ni chee. <sup>23</sup> ŋibin pam aakaasisik ni, le nnimbil man ke m dan ni chee. Maah kaa ki kpa lituln do chee na na, m ban ke m dan ni chee dandana wee la. <sup>24</sup> M yaa cha Speenn aatiŋ ni kan, m ban ke m dii ni chee, ki nan mann nimi, ki yunn ni chee sib, aan ki li kpa mpopiin. Nima kan, ni ga ŋmaa ter mi m buen Speenn aatiŋ ni.<sup>25</sup> Dandana wee, m cha Jerusalem m ti tii Uwumbor aanib bi nima na ŋimobil la. <sup>26</sup> Ba pu? Yesu aanib bi Masedonia aatim ni, ni Akaya aatim ni na, nan too ŋimobil baageehn pu ki di ŋa ŋjaal ni, ke m ti di tii Uwumbor aanib bi ye bigiim na Jerusalem ponn ni.<sup>27</sup> Ni ye mbamɔn la, baageehn pu le bi nan tii bi. Ni ŋan ke bi tii bi; ba pu? tibɔnyaan tee nan nyan ni Jerusalem aanib chee le ki fuu ni bi chee. Nima le ni ŋan ke bi mu tii bi ipiin.<sup>28</sup> M yaa fuu Jerusalem ki ti tii bi ipiin ngbaan kan, m ga nyan nima chee, ki dii ni chee, le ki nin buen Speenn aatiŋ ni.<sup>29</sup> M nyi ke m yaa fuu ni ni chee kan, Kristo ga ŋa tinyoor sakpen ki ŋa ti pu.

<sup>30</sup> Nnaabitiib, Tidindaan Yesu Kristo pu, ni Uwumbor Aafuur Nyaan aageehn pu, m gaŋ nimi ke ni li mee Uwumbor

linimaln ki tii mi,<sup>31</sup> ke u biin m pu, aan Judea aatiŋ aanib bi kaa gaa Yesu ki kii na taa ku mi, ki mee u ke maah ga tii Uwumbor aanib ipiin i na, i ga li mo bi.<sup>32</sup> Ni yaa mee Uwumbor kina tii mi aan u yaa kii kan, m ga fuu ni ni chee, ki ga li kpa mpopiin. Le m ni nimi aataakpab ga pɔɔk.<sup>33</sup> Uwumbor u tii timi nsuudoon na li bi ni mɔmɔk chee. Amii.

### Pɔɔl ubaa aadoon

**16** Tɔ, m ban ke ni gaa tina aabo Fibibi. U ye upii u ter Yesu aanib bi bi Senkrea aatiŋ ni na la.<sup>2</sup> U nan ter binib pam ki ter m mu. Nima na, ni mu gaa u Tidindaan pu, naah neer Uwumbor aanib pu na, ki li ter u waah ga li ban pu na.

<sup>3</sup> Ni doon Prisila ni uchal Akuila tii mi. Bi ye maatutujeer tiib Yesu Kristo aatuln ponn ni la.<sup>4</sup> M pu le bi mɔmɔk ba ga kpo. Nima le m dooni bi. Naa ye mi baanja le dooni bi. Yesu aanib bi kaa ye Juu yaab na mɔmɔk mu dooni bi.<sup>5</sup> Ni doon Yesu aanib bi kuuni bido na.

Ni doon njɔ Epanetus, u m gee u na, ki tii mi. Uma le puen gaa Kristo ki kii, Asia aatiŋ ni.<sup>6</sup> Ni doon Mari tii mi. U nan tun lituln pam ki ter nimi.<sup>7</sup> Ni doon nnaabitiib Andronikus ni Junia. Bi nan bi kiyondiik ni m chee. Bi kpa liyimbil Yesu aakpambalb chee, ki nan puen mi ki gaa Kristo ki kii.

<sup>8</sup> Ni doon njɔ Ampliatus tii mi. M gee u sakpen Tidindaan pu la.<sup>9</sup> Ni doon njɔ Ubanus tii mi, u ye timi aatutujeer Kristo aatuln ponn ni. Ni doon Stakis u m gee u na ki tii mi,<sup>10</sup> ki doon Apeles, u nyaŋ ntɔŋ Kristo pu na, ki doon Aristobulus aachiln ni aanib,<sup>11</sup> ki doon nna aabo Herodionn, ki doon Nasisus aachiln ni aanib bi dii Tidindaan na.

<sup>12</sup> Ni doon Traifina ni Traifosa bi tun lituln tii Tidindaan na, ki doon tina

aabogeehn Pesis u tun lituln pam tii Tidindaan na,<sup>13</sup> ki doon Tidindaan aani-bamɔ̄n Rufus, ni una u kpalm m mu aana na,<sup>14</sup> ki doon Asinkritus ni Fle-gonn, ni Hemes, ni Patrobas, ni Hemas, ni tinaabitib bi bi bi chee na,<sup>15</sup> ki doon Filologus, ni Julia, ni Nereus ni uninkpan, ni Olimpas, ni Uwumbɔ̄r aanib bimɔ̄k bi bi chee na.

<sup>16</sup> Ni li dooni tɔ̄b mbamɔ̄m.<sup>§§</sup> Yesu Kristo aanib bi bi ɻipepel mɔ̄mɔ̄k ni na dooni nimi.

### Kookoo aasurm

<sup>17</sup> Nnaabitib, m gajni nimi ke ni li nyi binib bi jaani nimi ki cha ni lir, ki kpak naah nan bae Uwumbɔ̄r aabor ti na. Ni nya bi chee man. <sup>18</sup> Binib bi bi kina na aa dii Tidindaan Yesu Kristo. Bi dii bima bibaa aasui aah ban pu na la. Bi kpa mmɔ̄mɔ̄n ki ɻemanninanyaam. <sup>19</sup> Nimi ma kan, binib mɔ̄mɔ̄k nyi naah kii Yesu Kristo aamɔ̄b pu na. Nima le m kpa ni pu mpopiin sakpen. M ban ke ni li kpa nlan ki li tun lituln li ɻan na, ki li bi chain, ki taa li tun lituln li kaa ɻan na. <sup>20</sup> Naan yunn, le Uwumbɔ̄r u tii timi nsuudoon na, ga cha ni di nitaa taa kinimbɔ̄n pu.

Tidindaan Yesu Kristo ɻa tinyoor ɻa ni pu.

<sup>21</sup> Timoti, u ye maatutujeer na dooni nimi. Nnaabitib Lusius, ni Jasonn, ni Sosipata mu dooni nimi.

<sup>22</sup> Min Tesius u ɻmee kigbaŋ kee tii Pɔ̄ol na, m mu dooni nimi Tidindaan pu.

<sup>23</sup> Gayus u chann m ni Yesu aanib mɔ̄mɔ̄k tichann na, u mu dooni nimi. Erastus, u joo kitij kee aamombil na, u mu dooni nimi. Tina aabo Kɔ̄ctus mu dooni nimi.

[<sup>24</sup> Tidindaan Yesu Kristo ɻa tinyoor ɻa ni mɔ̄mɔ̄k pu. Amii.]

### Kookoo aapak aameel

<sup>25</sup> Cha ti nyuŋ Uwumbɔ̄r. U kpa mpɔ̄on ke u cha ni sil mbamɔ̄m. Maah mooni Yesu Kristo aabɔ̄nyaan ti na le len kina. Ti ye tibɔ̄bɔ̄kaan ti kpiir na la. N-yaayoonn na ti nan bɔ̄r la. <sup>26</sup> Dandana wee, ti nyan mpaan pu. Uwumbɔ̄r aabɔ̄n-abtiib nan ɻmee ti waagbaŋ ni. Uwumbɔ̄r, u bi n-yoonn mu kaa kpa ndoon na le siin ke ɻinibol mɔ̄mɔ̄k ɻun tibɔ̄nyaan ngbaan, aan ki bee, ki tii u naadii, ki kii waamɔ̄b.

<sup>27</sup> Uwumbɔ̄r baanja le kpa nlan. Ubaa aa ki bi. Uma le yeh mpakm Yesu Kristo pu, n-yoonn mu kaa kpa ndoon na. Amii.

---

<sup>§§</sup>16:16 : Bi nan ɻmee ke: Moor tɔ̄b aatakpan ni mbimbin mu bi chain na.

*Njan aagbanj ki Pɔɔl ŋmee ki tii*

## KORINT YAAB

*na*

**1** Min Pɔɔl u Yesu Kristo yin mi ke m le ye waakpambal, Uwumbɔr aageehn pu na, m ni tina aabo Sosenes le ŋmee kigbanj kee <sup>2</sup> tii Uwumbɔr aanib bi bi Korint aatij ni na. Uwumbɔr Aafuur Nyaan ja nimi bininyaam Yesu Kristo pu, ki yin nimi ke ni li ye waaninyaam, ni binib bimɔk yin Tidindaan Yesu Kristo aayimbil ntim mɔmɔk ni na. U ye Bidindaan, ni ti mu Aadindaan.

<sup>3</sup>Tite Uwumbɔr ni Tidindaan Yesu Kristo ja tinyoor ja ni pu ki tii nimi nsuudoon.

### Tinyoor ti bi Yesu Kristo ni na

<sup>4</sup>N-yoonn mɔmɔk m dooni Maawum-bɔr ni pu. Waah ja nimi tijann Yesu Kristo pu na, le m dooni u. <sup>5</sup>U pu, ni kan Uwumbɔr aanyoor tiwan mɔmɔk ponn ni, ki nyi waabɔr, ki ŋmaa len ti mbamɔm. <sup>6</sup>Ba pu? taah nan tuk nimi Kristo aabɔr na, ni gaa ti mbamɔm. <sup>7</sup>Nima pu na, naa lann Uwumbɔr Aafuur Nyaan aapiin mubaa, ki bi ki kii bundaln Tidindaan Yesu Kristo ga gir ni na. <sup>8</sup>U mu ga pɔɔ nimi aataakpab waasan wɔb, ni taa li kpa taani Tidindaan Yesu Kristo aataak daal. <sup>9</sup>Uwumbɔr jaani waah len pu na la. U yin nimi ke ni ni Ujapɔɔn Tidindaan Yesu Kristo li kpaan kijɔtiik ni tɔb.

### N-yakr mu bi Yesu Kristo aadidiliib ponn ni na

<sup>10</sup>Nnaabitib, m gaŋ nimi Tidindaan Yesu Kristo aayimbil pu ke ni mɔmɔk li ŋun tii tɔb, aan kinikpakpak taa li bi nikaasisik ni; ni li kpa kimɔbaan, ki

li kpaan nlandak mubaa. <sup>11</sup>Nnaabitib, Kloe aachiln ni aanib tuk mi ke kinikpak-pak bi nikaasisik ni. <sup>12</sup>Maah len pu na le ye ke ubaa len ke u dii Pɔɔl la, uken mu len ke u dii Apolos la, uken mu len ke u dii Piita la, uken mu len ke u dii Kristo la. <sup>13</sup>Kristo yakr la aa? Bi kpaa min Pɔɔl ndɔpuinkoo pu ki tii nimi ii? Bi muin nimi nnyun ni Pɔɔl aayimbil ni la aa?

<sup>14</sup>M dooni Uwumbɔr ke maa muin ni ponn ni ubaa nnyun ni, see Krispus ni Gayus baanja. <sup>15</sup>Nima pu na, ubaa aan ŋmaa len ke bi muin nimi nnyun ni maayimbil ni.

<sup>16</sup>M muin Stefanas aachiln ni aanib mu nnyun ni. M mu aa ki teer ke m muin unii uken kpee. <sup>17</sup>Ba pu? Kristo aa tun ni mi ke m nan muin binib nnyun ni. U tun ni mi ke m nan tuk bi waabɔnyaan ngbaan la. Naa ye ke m di binib aalan le tuk bi. M yaa ba ja kina kan, ni ba ga cha Kristo aah kpo ndɔpuinkoo pu na ja yɔli.

### Yesu Kristo le ye Uwumbɔr aapɔɔn, ni waalan

<sup>18</sup>Binib bi ga kuln na, ti yaa tuk bi ke Kristo nan kpo ndɔpuinkoo pu ki tii bi kan, ni bi ke kijɔrk aaliin na le ki tii bi. Ni mu ye Uwumbɔr aapɔɔn le ki tii timi bi ŋmar na. <sup>19</sup>Ni ŋmee Uwumbɔr Aagbanj ponn ni ke uma Uwumbɔr bui ke,\* “M ga cha bilankpalb aalan bee yɔli, m ga yii binibiwlom aalan.”

<sup>20</sup>Bilankpalb bi la? Binibiwlom mu bi la? Dandana aanib bi kpak kinikpakpak na mu bi la? Uwumbɔr cha dulnyaa wee aalan ja yɔli.

<sup>21</sup>Uwumbɔr u kpa nlan na len ke dulnyaa wee aalan aa ŋmaa cha binib bee u. Nima pu na, u gaa binib bi gaa Yesu ki kii na lii, kijɔrk aabɔr ti ti joo tuk binib na pu. Waageehn le na. <sup>22</sup>Juu yaab ban ke

\***1:19** : Lik Aisaya 29.14.

bi kan lijinjiir aawan, le ki nin gaa Yesu ki kii, Griik yaab mu ban nlan. <sup>23</sup> Le ti tuk bi Kristo aah kpo ndɔpuinkoo pu ki tii bi pu na. Ni ye lijuul aabor le ki Juu yaab, ki ye kijɔrk aabor ki tii binib bi kaa ye Juu yaab na mu. <sup>24</sup> Tɔ, Kristo le ye Uwumbɔr aapɔɔn ni waalan ki tii binib bi u yin bi na, bi ye Juu yaab na, ni bi kaa ye Juu yaab na mu. <sup>25</sup> Ba pu? Uwumbɔr aajɔrk kpa nlan jer binib aalan, le waagiin mu kpa mpɔɔn jer binib aapɔɔn.

<sup>26</sup> Nnaabitib, teer naah nan bi pu buyoonn Uwumbɔr yin nimi na. Ni ponn ni, naa ye binib pam le nan kpa nlan, naa ye binib pam le nan ye mpɔɔndam, naa ye binib pam le nan ye mpɔɔn aa-maal ni aanib. <sup>27</sup> Uwumbɔr nyan binib bi ye bijɔrb dulnyaa ni aanib aanimbil ni na, le ki tee cha binib bi kpa nlan na ji inimɔɔn. U nyan binib bi ye bigiim dulnyaa ni aanib aanimbil ni na, le ki tee cha bipɔɔndam ji inimɔɔn. <sup>28</sup> U nyan bigiim, ki nyan binib bi ye fam binib aanimbil ni na, ki nyan binib bi kaa ye nibaa binib aanimbil ni na mu, aan ki ḥa binib bi kpa ipɔɔn na yeli. <sup>29</sup> U ḥa kina ke unii ubaa taa li kpa kipupuk ubaa pu uma Uwumbɔr chee. <sup>30</sup> Uwumbɔr cha ni ni Yesu Kristo kpaan la, ki cha u ye timi aalan. Yesu pu, le u len ke timi aabor ḥjan, ki ḥa timi waaninyaam, ki gaa timi lii. <sup>31</sup> Nima pu na, ni li ḥjani naah ḥmee Uwumbɔr Aagbaŋ ponni pu na ke, “Unii umɔk ban u li kpa kipupuk na, u li kpa kipupuk Uwumbɔr pu.”†

### Baah kpaa Yesu Kristo ndɔpuinkoo pu pu na aabor

**2** Nnaabitib, nima pu na, maah nan dan nan tuk nimi Uwumbɔr aabor na, maa nan di mmɔɔmɔɔn ni binib aalan le tuk nimi. <sup>2</sup> Ba pu? maa nan ban m dakl tibɔr tibaa nikaasisik ni see Yesu

Kristo aabor, ni waah kpo ndɔpuinkoo pu pu na aabor. <sup>3</sup> Maah nan bi ni chee na, m nan ye udabur la. Ijawaan pu, le nwon nan gbaa. <sup>4</sup> M nan joo Uwumbɔr aaliin tuk nimi, kaa nan joo mmɔɔmɔɔn ni binib aalan tuk nimi. M nan tuk nimi Uwumbɔr aaliin ki mɔk nimi Waafuur Nyaan aah kpa mpɔɔn pu na; <sup>5</sup> ba pu? m nan ban ke ni gaa Yesu ki kii Uwumbɔr aapɔɔn pu, ki taa li ye binib aalan pu.

### Uwumbɔr aalan

<sup>6</sup> Tɔ, ti len nlan aabor ki tuk binib bi chikr Uwumbɔr aabor wɔb na. Nlan ngbaan mu aa ye dulnyaa aalan, ki mu aa ye dulnyaa wee ni aaborb aalan. Dulnyaa wee ni aaborb aapɔɔn bi bar la. <sup>7</sup> Ti len Uwumbɔr aabɔɔrkaan aalan mu nan bɔr na aabor la. Uwumbɔr aah kaa nan kee naan dulnyaa wee na, u nan dakl nlan mue, ke ti mu ji waamɔɔn. <sup>8</sup> Dulnyaa wee ni aabor ubaa aa nyi nlan ngbaan. Bi yaa ba nyi kan, baa ba ga kpaa Tidindaan u yeh tiwan mɔmɔk na ndɔpuinkoo pu. <sup>9</sup> Ni ḥmee Uwumbɔr Aagbaŋ ni ke,  
“Tiwan ni binib aanimbil aa kee kan ni, bitafal mu aa kee ḥjun ni pu,  
aan baalandak aa kee dakl naabor na,  
nima le Uwumbɔr ḥa tii binib bi gee u na.”‡

<sup>10</sup> Le Uwumbɔr cha Waafuur Nyaan kpiir tiwan ngbaan mɔk timi. Ba pu? Nfuur Nyaan ngbaan nyi tiwan mɔmɔk, ki nyi Uwumbɔr aasui ni aabor mu. <sup>11</sup> Unibon ma kan, ubaa aa nyi usui ni aabor. Waawiin mu bi u ni na baanja le nyi. Kina pu na, ubaa aa nyi Uwumbɔr aasui ni aabor, Uwumbɔr Aafuur Nyaan baanja le nyi. <sup>12</sup> Naa ye dulnyaa wee aabimbin le ti gaa. Uwumbɔr Aafuur Nyaan le ti gaa, aan ki bee tiwan ni Uwumbɔr tii timi, waabulchinn pu na.

†1:31 : Lik Jeremia 9.24.

‡2:9 : Lik Aisaya 64.4.

<sup>13</sup>Tibor ngbaan le ti joo tuk binib. Naa ye iliin i binib aalan mok timi na, le ti joo tuk bi. Ti joo iliin i Uwumbor Aafuur Nyaan mok timi na la. Ti joo Uwumbor Aafuur Nyaan aaliin le tuk binib Waafuur Nyaan aabor. <sup>14</sup>Unii u kaa kpa Uwumbor Aafuur Nyaan na, u yii Nfuur Nyaan aabor, ki dak ke Nfuur Nyaan aabor ye kijork aabor la. Uwumbor Aafuur Nyaan le cha binib bee mu aabor. Nima pu na, unii u kaa kpa Uwumbor Aafuur Nyaan na aa ɣmaa bee mu aabor. <sup>15</sup>Unii u kpa Uwumbor Aafuur Nyaan na nyi tibor momok, le unii ubaa aan bee udaan ngbaan aabimbin. <sup>16</sup>Ʉma nyi Uwumbor aalandak? Ʉma ga Ʉmaa mok u waah ga Ʉa pu na? Timi le kpa Kristo aalandak.

### Uwumbor aatutum aabimbin

**3** Nnaabitib, maa Ʉmaa len ni chee ke maah ga len binib bi kpa Uwumbor Aafuur Nyaan na chee pu na. M len ni chee ke maah ga len binib bi dii dulnyaa aasan na chee pu na la. Ni laa ye mbipom le Kristo aasan ponn ni. <sup>2</sup>Mbipom Ʉaa libiil la. Baa Ʉmaa Ʉmo tinann. Kina le cha m nan tuk nimi iliin i diin na. Ba pu? naa nan kee Ʉmaa beer iliin i poɔ na. Dandana wee naa kee nin bee. <sup>3</sup>Ba pu? ni laa beenin bi ke binib bi dii dulnyaa aasan na la. Ni ponn ni bibaa kpa lipiipoln ki kpak tɔb kinikpakpak. Nima le mok ke ni dii ke dulnyaa aanib aah dii pu na, ki Ʉjani ke dulnyaa yaab na. <sup>4</sup>Ubaa yaa len ke u dii Poɔl, le uken mu yaa len ke u dii Apolos kan, naa naahn dulnyaa yaab aa?

<sup>5</sup>Ʉma ye Apolos? Ʉma ye Poɔl? Ti po ye Uwumbor aatutum bi ter nimi ke ni gaa Yesu ki kii na la. Ti momok tun lituln li Uwumbor tii timi ke ti tun na la. <sup>6</sup>Min le bun tijikaar, le Apolos Ʉjani nnyun; Uwumbor le cha ti punni ki muuni. <sup>7</sup>Nima na, unii u bun na, ni unii u Ʉjani nnyun na, aa ye nibaa. Uwumbor

u cha ti punni ki muuni na, uma le ye u nnyun na. <sup>8</sup>Unii u bun na, ni unii u Ʉjani nnyun na kpaan la. Uwumbor ga tii unii momok waapar, waatuln aah Ʉneer pu na. <sup>9</sup>Ba pu? ti ni Uwumbor kpaan le ki tun lituln. Ni bi le ke Uwumbor aasaak na. Ni bi le ke Uwumbor aadiik na.

<sup>10</sup>Uwumbor aah ter mi pu na, le m ye kidiik aatotoor aaninkpel u kpa nlan, ki maa kidiik ngbaan aadinyikl na. Le bi mu paa na maa li pu. Unii momok li nyi waah ga Ʉa pu ki maa lidinyikl ngbaan paab na. <sup>11</sup>Yesu Kristo le ye lidinyikl li bi maa na. Ubaa aa Ʉmaa maa lidinyikl liken. <sup>12</sup>Bibaa ga di salmaa, bibaa tikunabr, bibaa Ʉitakpanyaan maa kidiik ngbaan; bibaa mu ga di idɔ, bibaa timoor, bibaa Ʉnikak, ki maa. <sup>13</sup>Binib momok aatuln ga nan nya mpaan pu. Bundaln Uwumbor ga ji binib tibor na, liyaadaal ngbaan ga mok baatuln aah ye pu na. Liyaadaal ngbaan mmii aataak daal le na. Mmii ngbaan ga tɔŋ lik binib momok aatuln aah bi pu na. <sup>14</sup>Binib momok aah maa lidinyikl paab pu na, mmii yaa kaa gaa kan, bi ga kan baatuln aapar. <sup>15</sup>Mmii ngbaan yaa gaa unii aah maa pu na kan, waan kan waatuln aapar. Uma ubaa ga Ʉmar, ki ga li bi ke unii u Ʉmar mmii ni na.

<sup>16</sup>Naa nyi ke ni ye Uwumbor aadiik aa? Naa nyi ke Uwumbor Aafuur Nyaan bi ni ni ii? <sup>17</sup>Unii yaa bii Uwumbor aadiik kan, Uwumbor ga bii udaan ngbaan. Ba pu? Uwumbor aadiik bi chain la. Nimi le ye kidiik ngbaan.

<sup>18</sup>Ni taa Ʉmanni nibaa. Unii yaa bi nikaasisik ni ki dak ke u kpa dulnyaa wee ni aalan kan, cha u di nlan ngbaan lii, aan ki kan Uwumbor aalan. <sup>19</sup>Ba pu? dulnyaa wee ni aalan ye kijork le Uwumbor chee. Ni Ʉmee Uwumbor Aagbaŋ ni ke, "U chur bilankpalb baalan ni," <sup>20</sup>ki ki Ʉmee ke, "U nyi bilankpalb aalandak,

ke i ye yɔli la.”<sup>¶</sup> 21 Nima pu na, ubaa taa li kpa kipupuk binib pu. Tiwan mɔmɔk ye nimi yaan la. 22 Min Pɔɔl, ni Apolos, ni Siifas,<sup>§</sup> ni dulnyaa wee, ni limɔfal, ni nkun, ni tiwan ni bi dandana na, ni tiwan ni ga li bi n-yoonn mu choo na mɔmɔk ye nimi yaan la. Ni mu ye Kristo yaab la. 23 Kristo mu ye Uwumbɔr yoo la.

### Yesu Kristo aatutum aabimbin

**4** Ni ɔjan ke ni bee ke ti ye Kristo aatutum la. Uwumbɔr di waabɔbɔrkaan ja tijaal ni ke ti di tuk binib. 2 Bi yaa di tiwan ja unii aajaal ni kan, ni ɔjan ke u ja ni mbamɔm. 3 Mma kan, nimi, bee dulnyaa ni aanib yaa ji mi tibɔr kan, ntafal aa bi ni ni. M mu aa ji mbaa tibɔr. 4 Maa nyi tiwan nibaa nsui ni aan naa ɔjan. Nimina mu aa mɔk ke maabɔr ɔjan Uwumbɔr chee. Tidindaan le ye u ji mi tibɔr na. 5 Nima pu na, ni yaa kaa kee neer kan, ni taa ji unii ubaa tibɔr, see Tidindaan nan gir ni. Uma le ga kpiir tiwan ni bɔɔ mbɔmbɔɔn ni na, ki kpiir unibɔn mɔmɔk aalandak. Liyaadaal ngbaan kan, Uwumbɔr ga pak binibamɔm mɔmɔk.

6 Nnaabitiiib, maah len pu na, m len ɔjaŋ m ni Apolos aabɔr, ke m ter nimi la. M ban ke ni dii Uwumbɔr Aagbanj aah len pu na. Ni taa li kpa kipupuk ubaa pu ki lik ukən fam. 7 ɔjma ja si le aa jer ukən? Saah kpa ni na, naa ye Uwumbɔr le tii si ii? Uwumbɔr aah tii si na, ba ja aa kpa kipupuk ke uma le aah kaa tii si na?

8 Ni dak ke ni puun kan tiwan bab a, ki ye bipɔɔndam, ki kpalm bibɔrb, ki cha timi a. Ni yaa ba sil ye bibɔrb aan ti mu li ye bibɔrb ni chee kan, ni ba ga li mo timi. 9 Ba pu? m dak ke Uwumbɔr ja timi waakpambalb puwɔb yaab. Ti naahn bijab bi, bi ga ku bi binib aanimbil ni na

la. Ti ye lijinjiir aawan le dulnyaa wee ni. Ti ye lijinjiir aawan, binib ni Uwumbɔr aatuuntiib aanimbil ni. 10 Kristo pu, ti ye bijɔrb la; le nimi ye bilankpalb Kristo aasan ni. Ti ye bigiim la; le nimi ye bipɔɔndam. Ni kan nnyuy binib chee; le tima ye fam bi chee. 11 Nkon le joo timi, nnyunyuu mu joo timi, le ki nan saa dandana wee. Ti peeni tiwanchar la. Le binib gbaa timi. Taa kpa taah ga li koo nin chee na. 12 Ti tun lituln linimaln, ki joo timi aanjaal imina le ki tun. Binib seei timi la, le ti bui bi ke, “Uwumbɔr ja tinyoor ja ni pu.” Bi ɔjani timi falaa la, le ti ji limɔr. 13 Bi bii timi la, le ti len bi imɔliinyaan. Bi ɔjani timi ke dulnyaa aajɔŋ, ni litapuln pu aabir na la, le ki nan saa din.

14 Maa ɔjmee tibɔr ngbaan m jinn nimi inimɔɔn. M ban m sur nimi ke maabigeehm na la. 15 Ba pu? ni yaa kpa bimɔmɔkb ɔnjichur kipiik Kristo aasan ni kan, ni kpa te ubaa baanja la. Min le ye nite. Kinye? maah nan tuk nimi tibɔnyaan tee na, le m kpalm nite Yesu Kristo aasan ni. 16 Nima pu na, m ganji nimi, ni li dii ke maah dii pu na. 17 Nima le m ga cha Timoti dan ni chee. U ye maabogeehn Tidindaan aasan ni, ki bi mbamɔm. U ga teer nimi maah dii Kristo aasan pu na, ki ga teer nimi ke m tuk Kristo aanib bi bi ɔnipepel mɔmɔk ni na ke bi mu dii kina.

18 Ni ponni bibaa kpa kalmbaani, ki dak ke maan dan ni chee. 19 Tidindaan yaa kii kan, m ga dan ni chee dandana wee, ki nan bee binib bi kpa kalmbaani na aabimbin. Maan lik baaliin. M ga lik ke Uwumbɔr aapɔɔn bi bi chee aan mu aa bi. 20 Uwumbɔr aanaan aa ye iliin. Mu ye mpɔɔn la. 21 Ni ban ke m dan ki li joo ni ngeehm aaliin ni nsuudoon la?

<sup>¶</sup>3:20 : Lik Ilahn 94.11.

<sup>§</sup>3:22 : Siifas ye Piita aayimbil liken la.

### Kininsuŋ ki bi nikaasisik ni na

**5** To, bi tee len ke kininsuŋ aatuln bi nikaasisik ni, ke ni ponn ni ubaa gaa ute aapuu. Hali binib bi kaa dii Uwumbor aasan na aa ḷjani kina. <sup>2</sup>Nimi ḷjani kina la, ki mu kpa kalmbaani. Ba ḷja naa bii nisui? Ni ḷjan ke ni nyan unii u ḷja kina na nikaasisik ni. <sup>3</sup>Mma kan, nwon aa bi ni chee, maalandak mu tee bi ni ni. Nima pu na, m puun siin unii u ḷja kina na ntafadaan, ke maah bi ni chee le na. <sup>4</sup>Ni yaa kuun t̄b chee kan, maawiin, ni Tidindaan Yesu aapcoŋ mu bi ni chee, Tidindaan Yesu aayimbil ni, <sup>5</sup>ni di udaan ngbaan ḷja kinimboŋ aarpaal ni, ke ki cha uwon ji falaa dulnyaa wee ponn ni. Nima le waawiin ga ḷjmar bunaln Tidindaan ga ji binib tibor na.

<sup>6</sup>Naa ḷjan ke ni li kpa kipupuk. Naa nyi ke boroboro aanyoŋ siib le cha boroborom̄ duuni ii? <sup>7</sup>Ni ḷjan ke ni nyan boroboro aanyoŋpok, aan ki li ye boroboro u kaa kpa nnyoŋ na. Ni sil ye boroboro u kaa kpa nnyoŋ na la. Maah len pu na le ye ke titunwanbir siib ga bii ni mom̄. Nima pu na, ni nyan titunwanbir mom̄ nikaasisik ni. Ni ye bininyaam la. Ni li ḷjani ke bininyaam na. Ba pu? Kristo nan di ubaa toor kitork tii Uwumbor, timi aatunwanbir pu. <sup>8</sup>Nima pu na, cha ti li ji Lakr-jer aajim, \*\* ki ḷjmo boroboro u kaa kpa nnyoŋ na, ki di boroboro aanyoŋpok lii. Maah len pu na le ye ke ti li dak ilandak i ḷjan na, ki li ḷjani mbam̄om, ki di bakaa ni titunwanbir lii.

<sup>9</sup>To, m nan ḷmee kigbaŋ ki tuk nimi ke ni ni bidagoob taa kpaan t̄b chee. <sup>10</sup>Maa len dulnyaa aaniib pu; dulnyaa aaniib bi ye bidagoob, ni binimandam, ni binib bi ji biken pempe na, ni bi-waadam na, naa ḷjmaa nya bi chee, see

ni nyan dulnyaa wee ni. <sup>11</sup>Maah len pu na le ye ke unii u len ke u dii Kristo aasan na, u yaa ye udagoor, bee unimandaan, bee uwaadaan, bee ḷjisiibil daan, bee udagbiir, bee unii u ji binib pempe na kan, ni ni udaan ngbaan taa kpaan. Hali ni taa ji u chee tijikaar.

<sup>12-13</sup>Binib bi kaa ye Yesu aaniib na, maan siin bi ntafadaan. Naa ye maabor. Uwumbor le ga siin bi ntafadaan. Binib bi ye Yesu aaniib na yaa ḷjani ni kaa ḷjan na kan, nimi nibaa siin bi ntafadaan man. Nima pu na, ni nya utunwanbirdaan ngbaan nikaasisik ni.

### Naah joo biken chaa libɔjil ni pu na

**6** To, ni ponn ni ubaa ni ujeen aato yaa kpa tibor kan, ba ḷja ni chaa bibɔjirb chee, binib bi kaa dii Uwumbor aasan na aanimbiin ni, bi ti len tibor ngbaan, kaa cha Uwumbor aaniib len ti? <sup>2</sup>Naa nyi ke Uwumbor aaniib ga ji dulnyaa yaab tibor aa? Ni yaa ga ji dulnyaa yaab tibor kan, naa ḷjmaa toor tibor waatiir aa? <sup>3</sup>Naa nyi ke ti ga ji Uwumbor aatuuntiib tibor aa? ḷjmaninkabaa dandana wee aabor? <sup>4</sup>Nima pu na, tibor yaa bi nikaasisik ni kan, cha binib bi ye biwaatiib nikaasisik ni na len ti. <sup>5</sup>M len ke m jinn nimi inimcoŋ la. Ulankpal ubaa aa bi nikaasisik ni ii? Ni ponn ni ubaa aan ḷjmaa len tibor tii nimi ii? <sup>6</sup>le ki cha ubaa ni una aabo cha bibɔjirb chee, ki ti cha binib bi kaa gaa Yesu ki kii na len baabor.

<sup>7</sup>Ni yaa po kpa tibor nikaasisik ni, ki di ḷja bibɔjirb aarpaal ni kan, naa dii Yesu aasan mbam̄om. Aana aabo yaa ḷja si bakaa, bee u ji saawan kan, taa gar u. Aa yaa kaa gar u kan, ni soor ni aa di ti buen bibɔjirb chee. <sup>8</sup>Ni ye naabitiib la; le nimi nibaa ḷjani t̄b bakaa, ki su t̄b kinaayuk. <sup>9</sup>Naa nyi ke binib bi aabimbin kaa ḷjan na aan kan Uwumbor aanaan

\*\*5:8 : Israel yaab nan ji Lakr-jer aajim ke bi teer buyoonn Uwumbor nan nyan bi tinaagbiir ni, Ijipt aatij ni na. Lik Nnyam 12.1-27.

aa? Ni taa ḷmanni nibaa man; bibonbɔnn, ni biwaadam, ni bidagoob, ni bijab bi di bijeen aatɔtiib kpalm bipiib ki doo bi chee na, ni bijab bi mu di bibaa ḷja bipiib ki cha bijab ḷneen aatɔtiib doo bi chee na,<sup>10</sup> ni binaayukb, ni biniman-dam, ni bidagbiirb, ni ḷisiibildam, ni binib bi ji biken pempem na, aan kan Uwumbɔr aanaan.<sup>11</sup> Ni ponn ni bibaa nan bi kina la; le Uwumbɔr finn niplobil, ki ḷja nimi binib bi bi chain na, ki len ke nimi aabor ḷjan, Tidindaan Yesu Kristo aayimbil pu, ni timi Aawumbɔr Aafuur Nyaan pu.

### **Cha Uwumbɔr kan nnyuŋ saawon pu**

<sup>12</sup> Nimi bibaa bui ke tiwan nibaa aa kɔ. Tɔ, ni mu aa ye tiwan mɔmɔk le ga ter nimi. Tiwan nibaa aa kɔ; m mu aan cha tiwan nibaa chuu mi tinaagbiir.<sup>13</sup> Bibaa len ke lipuul pu le tijikaar bi, le tijikaar mu pu, lipuul bi. Tɔ, Uwumbɔr ga cha ni mɔmɔk nilee ḷja yɔli. Timi aawon tee aa bi kidagook aatuln pu, ti bi Tidindaan aatuln pu la. Tiwon mu ye Tidindaan yaan la.<sup>14</sup> Uwumbɔr nan fikr Tidindaan nkun ni. Waapɔɔn pu, u ga fikr timi mu nkun ni.

<sup>15</sup> Naa nyi ke nimi aawon ye Kristo aawon aawan aa? M ga di nwon tee, ti ye Kristo aawan na, ki di kpaan upiida-goor aawon ni ii? Maan ḷja kina kpala.<sup>16</sup> Naa nyi ke unii u doon upiida-goor chee na, bi kpaan tiwon tibaa la aa? Ba pu? Uwumbɔr Aagbaŋ len ke, “Upii ni uja yaa nyi tɔb kan, bi kpaan tiwon tibaa la.”<sup>17</sup> Tɔ, unii u kpaan Tidindaan chee na, bi kpaan nwiinbaan la.

<sup>18</sup> Ni di cha kidagook aatuln. Unii yaa tun titunwanbir kan, naa bi tiwon ponn ni, see kidagook aatuln. Unii u gɔr kidagook na, u ḷja uma ubaa aawon bakaa la.<sup>19</sup> Naa nyi ke nimi aawon ye Uwumbɔr Aafuur Nyaan aadiik la aa? Uwumbɔr tii nimi Waafuur Nyaan, le mu bi ni ni.<sup>20</sup> Uwumbɔr daa nimi le ki pan. Naa

yeh nibaa, Uwumbɔr le yeh nimi. Nima pu na, ni di nimi aawon tun lituln li ga nyuŋ Uwumbɔr na.

### **Lichamɔln aabaan**

**7** Naah ḷmee mi kigbaŋ tibɔr ti pu na, ni ḷjan ke uja taa li nyi upii.<sup>2</sup> Tɔ, kidagook aatuln pu, ni ḷjan ke uja mɔmɔk li kpa uma ubaa aapuu, upii mɔmɔk li kpa uma ubaa aachal.<sup>3</sup> Upii yaa ban uchal kan, u taa yii, uja mu yaa ban upuu kan, u taa yii.<sup>4</sup> Upii aa joo uwon, uchal le joo ti. Uja mu aa joo uwon, upii le joo ti.<sup>5</sup> Ubaa taa yii uken, see ni puen kii tii tɔb ki laa di cha siib, aan ki li kpa n-yoonn ki mee Uwumbɔr, [ki lul bumɔb,] le ki ki kpaan tɔb chee. Ni yaa kaa ki kpaan tɔb chee kan, kinimbɔŋ ga tɔŋ nimi ni tun kidagook aatuln. Ba pu? naan ḷmaa chuu nibaa.

<sup>6</sup> Maah ga len tibɔr ti na le ye ke m ga cha ni ḷja kina, maa len ke see ni ḷja kina.<sup>7</sup> Maageehn le ye ke ni mɔmɔk li bi ke maah bi pu na. Uwumbɔr mu tii unii mɔmɔk uma ubaa aapiin. Ti mɔmɔk aapiin aa kpaa. U tii ti mɔmɔk mbaabaa la.

<sup>8</sup> Bijaakpaab, ni bisapɔm, ni bikpopiib, m tuk nimi la, ni ḷjan ke ni li bi kina, ke maah bi pu na.<sup>9</sup> Ni mu yaa kaa ḷmaa chuu nibaa kan, cha bijab din bipiib, bipiib mu mɔn. Bijab ni bipiib yaa yoor tɔb kan, ni soor ni binimbil li man tɔb pu, kaa kan.

<sup>10</sup> Bipijoob ni bichadam, m ga tuk nimi naah ga ḷja pu na, naa ye min le tuk nimi, Tidindaan le tuk nimi, ke upii taa di uchal lii.<sup>11</sup> U yaa di uchal lii kan, u li bi ubaa, see u ki gir buen uchal chee, bi ti took. Uja mu taa jenn upuu.

<sup>12</sup> Binib bi gur na, Tidindaan aa len baabɔr. Min le tuk bi ke uja u ye Yesu aanii na yaa kpa puu u kaa ye Yesu aanii na kan, upii ngbaan yaa kii ke u li bi u chee kan, u taa jenn u.<sup>13</sup> Upii u mu ye Yesu aanii na yaa kpa chal u kaa ye Yesu

aanii na kan, uja ngbaan yaa kii ke u li bi u chee kan, u taa di uchal lii.<sup>14</sup> Uja u kaa ye Yesu aanii na, Uwumbor ga ŋja u ke waanib ponn ni ubaa na, upuu u ye Yesu aanii na pu la. Upii u mu kaa ye Yesu aanii na, Uwumbor ga ŋja u ke waanib ponn ni ubaa na, uchal u ye Yesu aanii na pu la. Ni yaa kaa ba ye kina kan, baabim ba ga li bi ke binib bi kaa dii Uwumbor aasan na aabim la. Tɔ, naah ye kina na, Uwumbor gaal bi ke bi ye waabim.

<sup>15</sup> Unii u kaa ye Yesu aanii na yaa ban u di upuu, bee uchal u ye Yesu aanii na lii kan, cha u li cha. Naa ye limukl. Uwumbor yin timi ke ti li kpa nsuudoon. <sup>16</sup> Upii, aa nyi ke sin pu aachal ga ŋmar aan waan ŋmar? Uja, aa nyi ke sin pu aapuu ga ŋmar aan waan ŋmar?

### Tibokpaan le ye ke aa kii Uwumbor aamob

<sup>17</sup> Tɔ, Tidindaan aah tii unii mɔmɔk pu na, u li bi kina. Unii mɔmɔk aah nan bi pu aan Uwumbor nan yin u na, u li bi kina. Maah ga tuk nimi pu na, kina le m tuk Yesu aanib bi bi ŋipepel mɔmɔk ni na. <sup>18</sup> Ubua yaa nan ye uchakpangendaan aan Uwumbor nan yin u na kan, u li bi kina, u taa toor li. U mu kaa ye uchakpangendaan aan Uwumbor nan yin u na kan, u taa ki gii. <sup>19</sup> Lichakpangeel aa kpa tinyoor. Unii yaa kaa gii kan, ni mu aa kpa tinyoor. Ti yaa kii Uwumbor aamob kan, nima le kpa tinyoor. <sup>20</sup> Unii mɔmɔk aah nan bi pu aan Uwumbor nan yin u na, u li bi kina. <sup>21</sup> Uwumbor aah nan yin si na, aa yaa ye unaagbiija kan, taa cha ni li wu si. Aa mu yaa ga ŋmaa nya tinaagbiir ngbaan ni kan, nya ki li bi aabaa. <sup>22</sup> Tidindaan mu yaa yin unii u ye unaagbiija na kan, u ye Tidindaan aanii u gaa u lii na la. Kina le ni ye ke Tidindaan yaa yin unii u kaa ye unaagbiija na kan, u ye Kristo aanaagbiija la. <sup>23</sup> Yesu daa nimi le ki pan. Nima pu na, ni taa li ye binib aanaagbiib. <sup>24</sup> Nnaabitiib, unii

mɔmɔk aah nan bi pu aan Uwumbor nan yin u na, u li bi kina Uwumbor chee.

### Bijaakpaab aabɔr

<sup>25</sup> Binachipɔm ni bisapɔm aabɔr kan, Tidindaan aa tuk mi; waanimbaasaln pu, le m ye unibamɔnn, ki ga tuk nimi maah dak pu na.

<sup>26</sup> Dandana aafalaa pu, m dak ke ni jan ke unii li bi ke waah bi pu na. <sup>27</sup> Aa yaa kpa puu kan, taa li ban ke aa jenn u. Aa yaa kaa kpa puu kan, taa ki ban. <sup>28</sup> Uja mu yaa din upii kan, naa bir. Usapɔɔn mu yaa mɔn uja kan, naa bir. Bipijoob ni bichadam mu ga kan falaa dulnyaa wee ni. Le maa ban ke ni kan falaa ngbaan.

<sup>29</sup> Nnaabitiib, maah len pu na le ye ke n-yoonn mu gur na, mu par a. Nima pu na, binib bi kpa puutiib na, bi li bi ke baah kaa kpa le na; <sup>30</sup> binib bi wii na mu li bi ke baah kaa wii le na, binib bi kpa mpopiin na mu, bi li bi ke baah kaa kpa mpopiin le na, binib bi daa ki tiir na mu, bi li bi ke baah kaa kpa nibaa na. <sup>31</sup> Binib bi kpa dulnyaa ni aawan ki joo tun baatuln na, bi taa cha binimbil li man ni pu; ba pu? dulnyaa wee, ni waawan bi jer la.

<sup>32</sup> Maa ban ke nibaa li muk nimi nisui ni. Uja u kaa kpa puu na, utafal bi Tidindaan aabɔr ni la. U dakl waah ga ŋja pu ki piir Tidindaan aasui na la. <sup>33</sup> Uja u kpa puu na, utafal bi dulnyaa wee ni aabɔr ni la, u dakl waah ga ŋja pu ki piir upuu aasui na la, <sup>34</sup> le waalandak yakr mfum mulee. Upii u kaa kpa chal na, bee usapɔɔn u kaa nyi uja na, utafal bi Tidindaan aabɔr ni la; u ban ke uwon ni waawiin li bi chain. Upii u kpa chal na, utafal bi dulnyaa wee ni aabɔr ni la, u dakl waah ga ŋja pu ki piir uchal aasui na la.

<sup>35</sup> M ban m ter nimi la. Nima le cha m len kina. Naa ye ke m ban m lej nimi la. M ban ke ni li ŋjani tiwan

mɔmɔk mbamɔm, ninimbil li man Tidindaan aabor pu, nibaa taa lej nimi.

<sup>36</sup> Uja yaa kpa bisal u jer lichamɔn na, ki yaa dak ke u jinn ubisal inimɔɔn aan ni yaa muk u kan, cha u ḥa waah ban pu na, cha u kunn ubisal ngbaan uchal do. Naa bir. <sup>37</sup> Nibaakan, uja ubaa bi ki kpa nsan ki ga ḥmaa ḥa waah gee pu na, unii ubaa aa chuu u mpɔɔn, waalandak mu aa kpelni, le u di ḥa usui ni ke waan di ubisal kunn uchal do, udaan ngbaan ḥa ni ḥjan na la. <sup>38</sup> Nima pu na, uja u kunn ubisal uchal do na, u ḥa ni ḥjan na la. Uja u mu kaa kunn ubisal uchal do na, u ḥa ni ḥjan na ki jer uja u kunn ubisal uchal do na.

<sup>39</sup> N-yoonn mumɔk upii ni uchal bi na, upii ye uchal yoo la. Uchal yaa kpo kan, u ga ḥmaa mɔn uja u dii Tidindaan aasan na aan u gee u na. <sup>40</sup> M mu dak ke u yaa bi ke waah bi pu na kan, u ga li kpa mpopiin ki jer u yaa ki mɔn kan. M dak ke m kpa Uwumbɔr Aafuur Nyaan le ki len kina.

### Ijiwaa aatork aajikaar aabor

**8** To, joo cha kitork aanann aabor wɔb na, ti nyi ke ti mɔmɔk kpa nnyim. Nnyim cha binib kpa kipupuk la. Ngeehm le ter binib ke bi dii Uwumbɔr aasan mbamɔm. <sup>2</sup> Unii yaa dak ke u nyi tiwan kan, waa kee nyi waah ba ga li nyi pu na. <sup>3</sup> Unii mu yaa gee Uwumbɔr kan, Uwumbɔr beer udaan ngbaan.

<sup>4</sup> Joo cha kitork aanann aajim aabor na, ti nyi ke ijiwaa njimɔk bi dulnyaa wee ni na aa ye nibaa. Ti nyi ke Uwumbɔr ubaa baanja le bi. <sup>5</sup> Ijiwaa ni tiwan ni binib dooni ni na bi paacham ni taab, ki wiir. <sup>6</sup> Tima kan, ti kpa Uwumbɔrbaan, u ye Tite na. Uma le nan naan tiwan mɔmɔk. Ti bi ke ti li ḥjani waageehn la. Ti kpa Tidindaan ubaa mu la. Uma le ye Yesu Kristo. Uma le Uwumbɔr nan cha u naan tiwan mɔmɔk. Uma pu le ti bi.

<sup>7</sup> Binib bibaa mu aa nyi kina. Bi nan dii ḥjiwaa ni yunn. Nima pu na, bi yaa ḥman kitork aanann kan, ti ye kitork aanann le bi chee, le ni ḥa bi ilandak. <sup>8</sup> To, tijikaar aan ḥjmaa cha ti piir Uwumbɔr aasui; ti yaa jin, bee ti yaa kaa jin kan, naa kpa taani.

<sup>9</sup> Aa mu yaa nyi ke ḥjiwaa aa ye ni-baa kan, li nyi ki taa cha unii u kaa kee nyi Uwumbɔr aasan mbamɔm na tun titunwanbir. <sup>10</sup> Unii u kaa nyi Uwumbɔr aasan mbamɔm na yaa kan si, u kpa nnyim na, ji tijikaar ḥjiwaa aadical ni kan, u mu ga li kpa lipobil ki ḥjmo kitork aanann, ki lir. <sup>11</sup> Saanyim ngbaan pu le ga cha aana aabo u kaa nyi Uwumbɔr aasan mbamɔm na bee yɔli. Aana aabo ngbaan pu, le Kristo nan kpo. <sup>12</sup> Nima pu na, aa yaa kiir tinaabitib bi kaa kee nyi Uwumbɔr aasan mbamɔm na kan, aa ḥa bi bakaa le na. Naa ye bima baanja le aa ḥa bakaa, Kristo le aa ḥa bakaa. <sup>13</sup> Nima pu na, tijikaar tibaa yaa kiir nna aabo, Uwumbɔr aasan ni kan, maan ki ji tijikaar ngbaan kpala, aan ki taa kiir nna aabo, Uwumbɔr aasan aadiim.

### Yesu Kristo aatutunn aah kpa nsan mu na

**9** To, maa ye Yesu aakpambal aa? Maa yeh mbaa aa? Maa kan Tidindaan Yesu uu? Naah gaa Yesu ki kii na, maatuln le na Tidindaan pu. <sup>2</sup> Biken yaa dak ke maa ye Yesu aakpambal kan, ni nyi ke m ye. Naah gaa Tidindaan ki kii na, nima le mɔk ke m ye waakpambal. <sup>3</sup> Kina le m tuk binib bi ban bi baa mi na.

<sup>4</sup> Maah tuk binib Uwumbɔr aabor na, maa ḥjeer bi tii mi tijikaar ni ti-wanyukaan aa? <sup>5</sup> Maa ḥjeer m mu li ḥjani ke bikpambalb biken, ni Tidindaan aanaatiib, ni Siifas aah ḥjani pu na, ki li joo upii ubaa u mu li dii mi lisachuln ni ii? <sup>6</sup> M ni Banabas baanja le ye binib bi mooni Uwumbɔr aaliin ki tun lituln liken kpee ke ti ji ii? <sup>7</sup> Unii yaa ye butɔb aaja

kan, baa pa u lipal aa? Unii yaa ko kisaak kan, waan ji tijikaar ti bi ki ni na aa? Unii yaa kpaa inaa kan, waan wub nnaabiin aa?

<sup>8</sup> Maah len pu na aa ye unibon aalan baanja. Moses aakaal mu len kina la. <sup>9</sup> Ni ȳmee nkaal ngbaan ni, Uwumbor Aag-baj ni ke, “Aa yaa joo unaaja poi idi kan, aa taa buu umɔb.”<sup>††</sup> Uwumbor aatafal bi inaaja aabɔr baanja ponn ni la aa? <sup>10</sup> Waah len pu na, waa len ke u ter ti mu la aa? Mbamɔn, timi pu le ni ȳmee kina. Ba pu? ni ȳjan ke unii u ko kisaak na, ni unii u poi njikaabim na li kpa li-makl ke bi ga kan ni ponn ni ki ji. <sup>11</sup> Ti nan tuk nimi Uwumbor aabɔr la. Ti yaa gaa ni chee dulnyaa ni aawan kan, naa ye sakpen.

<sup>12</sup> Binib biken yaa kpa nsan ke bi gaa tiwan ni chee kan, taa kpa nsan ki jer bi ii? Ti kpa nsan, ti mu aa nan gaa; ba pu? taa ban ti lej Kristo aabɔnyaan. Nima pu, le ti nan ji falaa mɔmɔk. <sup>13</sup> Naa nyi ke binib bi tun lituln Uwumbor Aadichal ni na ji nima la aa? Binib bi toor kitork tii Uwumbor na, bi mu ji nima la. <sup>14</sup> Kina le Tidindaan nan len ke binib bi mooni tibɔnyaan tee na, bi mu li ji ti ponn ni.

<sup>15</sup> M mu kpa nsan m mu li ji kina; le maa ȳja kina. Maah ȳmee pu na, maa ȳmee ke binib ȳja kina ki tii mi. Maah kaa gaal nibaa binib chee na, nima le m kpa kipupuk. Maa ban ke m li kpa kipupuk yɔli. <sup>16</sup> M yaa tuk binib tibɔnyaan tee kan, maan ȳmaa li kpa kipupuk ti pu. Ni muk mi ke m tuk bi. M yaa kaa tuk binib tibɔnyaan tee kan, tibɔbir ga li bi m pu. <sup>17</sup> M yaa tuk binib tibɔnyaan tee maageehn pu kan, m ba ga li ban lipal. Ni yaa kaa ye maageehn kan, ni ye lit-uln li Uwumbor tii mi ke m li tun na la. <sup>18</sup> Nima pu na, maapar ye ba? Ni ye ke m li mooni tibɔnyaan tee aan binib ȳjun

ki taa pa nibaa. M kpa nsan ke m li gaal tiwan bi chee, ki mu aa gaal.

<sup>19</sup> Maa ye unii ubaa aanaagbija. M mu di mbaa ȳja binib mɔmɔk aanaagbija, aan ki moo kan binib tii Kristo. <sup>20</sup> Juu yaab chee, m bi ke Juu yaab na, aan ki kan Juu yaab ki tii Kristo. Binib bi dii Moses aakaal na chee, m mu bi ke baah bi pu na, aan ki kan binib bi kaa dii Moses aakaal na, ki tii Kristo. Mma aa bi Moses aakaal taab. <sup>21</sup> Binib bi kaa dii Moses aakaal na chee, m mu bi ke baah bi pu na, aan ki kan binib bi kaa dii Moses aakaal na, ki tii Kristo. Maa len ke maa dii Uwumbor aakaal. M dii Kristo aakaal la. <sup>22</sup> Binib bi ye bidaburb Kristo aasan ni na, m bi ke baah bi pu na la, aan ki kan bi mu ki tii Kristo. Binib mɔmɔk aabɔr chee, m po bi ke baah bi pu na la. M ȳjani tiwan mɔmɔk maah ga ȳmaa ȳja pu na, aan ki cha binib bibaa ȳmar.

<sup>23</sup> Tibɔnyaan tee pu le m ȳjani tiwan mɔmɔk, aan m ni binib biken mu kpaan ki kan tinyoor ti ponn ni. <sup>24</sup> Ni nyi ke binib yaa kpak ki san litaasaln kan, bi mɔmɔk san; le unibaan u ji na, uma le kani ipiin. Kina pu na, ni mɔmɔk li san ke unii u ji na aah san pu na, aan ki kan ipiin ngbaan. <sup>25</sup> Unii umɔk ban u kpak ngbiir ni na kan, u chur ubaa la, kaa ȳjani tiwan ni ga bii tiwon na. U ȳjani kina ke u kan ipiin i ga bii na. Tima kan, ti kpak ki ban ipiin i kaan bii na la. <sup>26</sup> Nima pu na, maa san ke unii u san kaa nyi budabu pu u san na. Maa gbaa ke unii u gbaa fam na; <sup>27</sup> m muk maawon le ti kii maamɔb. Ni yaa kaa ye kina kan, m ga tuk biken tibɔnyaan tee, le min mbaa ga nan bee yɔli.

### Ijwaa aabɔr

**10** Nnaabitiib, m ban ke ni bee ke ntaalangbam nan sunn ni ki mɔk tiyaajatiib nsan. Le Uwumbor nan tii bi

<sup>††</sup>9:9 : Lik Ikaal 25.4; 1 Timoti 5.18.

nsan nnyusakpem aakaasisik ni, bi puur.  
<sup>2</sup>Baah puur nnyusakpem ngbaan ki dii ntaalangbam ngbaan aah mɔk bi pu na, ni naahn ke bi muin bi nnyun ni ki ja bi Moses aadidiliib la. <sup>3-4</sup>Bi mɔmɔk nan ji tijikaabaan ki nyu nnyunbaan la. Uwumbor Aafuur Nyaan le nan tii bi tijikaar ni nnyun ngbaan. Nfuur Nyaan ngbaan nan cha nnyun nyan ni litakpal ni, le bi nyu. Nima le nan ye limɔkl ki mɔk ke Kristo dii bi. <sup>5</sup>Le bi ponn ni binib pam mu aa nan piir Uwumbor aasui. Kina pu na, bi nan kpo ki bee kipoɔk ni.

<sup>6</sup>Tibor timina ye nsurm le ki tii timi, ke ti taa ban tiwan ni kaa ḥjan na, ke baah nan ban pu na. <sup>7</sup>Ni mu taa dii ḥjiwa, ke bi ponn ni bibaa aah nan dii pu na; ni ḥmee Uwumbor Aagbaŋ ni ke, “Binib ngbaan nan kal ki ḥjman kitork aanann, ki nyu ndaan gbii, le ki fii ki tun kininsur aatun.”\*\* <sup>8</sup>Ni mu taa tun kidagook aatuln ke bi ponn ni bibaa aah nan tun pu ki cha binib ḥjichur moninko ni ḥjita kpo liwinbaal na. <sup>9</sup>Ni mu taa ṭɔŋ Tidindaan ke bi ponn ni bibaa aah nan ṭɔŋ u pu ki cha iwaajunn ku bi na. <sup>10</sup>Ni mu taa ḥjulni ke bi ponn ni bibaa aah nan ḥjulni pu ki cha Uwumbor aakun aatuun ku bi na.

<sup>11</sup>Tibor ngbaan nan ja bi kina ki ye limɔkl le ki mɔk binib. Bi nan ḥmee Uwumbor Aagbaŋ ni, ke ni li ye nsurm le ki tii timi bi bi kookoo aayoonna.

<sup>12</sup>Nima pu na, unii u dak ke u si chob na, u li nyi ki taa lir. <sup>13</sup>Naa kee kan ntɔŋ mu pɔɔ ki jer unibɔn mɔk aah kani pu na. Uwumbor ye mbamondaan, kaan cha ni kan ntɔŋ mu jer nimi na. Ni yaa kan ntɔŋ kan, u ga toor nsan tii nimi, ni nyaj ntɔŋ ngbaan. Nima le ni ga li kpa limɔr ntɔŋ ponn ni.

<sup>14</sup>Njɔtiib, nima pu na, di ḥjiwa lii ki di cha ḥaabɔr. <sup>15</sup>M len ni chee ke maah

ba ga len bilankpalb chee pu na la. Maah ga len pu na, ni dakl ki lik naatataa. <sup>16</sup>Ti yaa yoor Uwumbor aayinyook ki doon u ki pu, ki nyu kan, ni ye Kristo aasin le ti kpaan nyu. Taah gii boroboro ki ḥjman na mu, ni ye Kristo aawon le ti kpaan ḥjman. <sup>17</sup>Boroboro ngbaan ye boroboro kpiln libaa la. Nima le mɔk ke ti kpaan tiwon tibaa la; ba pu? ti mɔmɔk kpaan ḥjman boroboro kpiln libaa la.

<sup>18</sup>Dakl lik man Juu yaab aah ḥjani pu na. Binib bi toor kitork tii Uwumbor ki ji na, bi ni u kpaan la. <sup>19</sup>Maah len pu na le ye ke liwaal ye nibaa aa? Tijikaar ti bi di tii li na ye nibaa aa? Naa ye. <sup>20</sup>Maah len pu na le ye ke binib bi kaa dii Uwumbor aasan na yaa toor kitork kan, bi toor ki tii tiwan ni kaa ye Uwumbor na la, kinimbɔŋ le bi toor tii. Maa ban ke ni ni kinimbɔŋ li kpaan. <sup>21</sup>Naan ḥjmaa yoor Tidindaan aayinyook ki nyu, ki gir ki ti nyu kinimbɔŋ aayinyook ni. Naan ḥjmaa ḥjmo Tidindaan aaboroboro, ki gir ti ḥjmo kinimbɔŋ aanann mu. <sup>22</sup>Ti ban Tidindaan li kpa lipiipoln ti pu uu? Ti kpa mpoɔn jer u uu?

### Ni li nyuŋni Uwumbor n-yoonn mɔmɔk

<sup>23</sup>Tɔ, binib bibaa ga bui ke tiwan nibaa aa kɔ. Ni mu aa ye tiwan mɔmɔk le ḥjan. Tiwan nibaa aa kɔ. Ni mu aa ye tiwan mɔmɔk le ga ter timi aan ti dii Uwumbor aasan mbamɔm. <sup>24</sup>Ubaa taa li lik ki ban ubaa aanyoor baanja. U li lik ki ban ureen aatɔtiib aanyoor mu.

<sup>25</sup>Tinann ti bi kooh kinyaj ni na, ni ga ḥjmaa daa ti ki ḥjmo, ki taa baa ke ti ye ba aanann, ki taa cha nimi aalandak li muk nimi ti pu. <sup>26</sup>Ni ḥmee Uwumbor Aagbaŋ ni ke, “Uwumbor le yeh dulnyaan ni tiwan nimɔk bi u ponn ni na.”\*\*

##10:7 : Lik Nnyam 32.6.

“10:26 : Lik Ilahn 24.1.

<sup>27</sup> Unii u kaa gaa Yesu ki kii na yaa ḥaa tijikaar ki yin nimi kan, ni yaa buen kan, waah di tijikaar ti siin nimi na, jim man, ki taa baa ke ti ye kitork aanann la aa? ki taa cha nimi aalandak li muk nimi. <sup>28</sup> Unii ubaa mu yaa bui nimi ke ti ye kitork aanann le kan, ni taa ji; waah tuk nimi na pu, ni taa ji, aan waalandak taa li muk u. <sup>29</sup> Maah len pu na le ye ke aa yaa jin kan, u mu ga ji, le waalandak ga muk u, ke waah ḥaa pu na aa ḥan. <sup>30</sup> Tɔ, nibaakan, unii ubaa ga baa ke ba ḥaa waan ḥmaa ḥaa waah ban pu na, unii uken aalandak pu, ke u yaa doon Uwumbor tijikaar ti u ji na pu kan, bi ga ḥaa kinye ki bii u ti pu?

<sup>31</sup> Maah len pu na le ye ke ni yaa jin kan, jim ke ni nyuŋ Uwumbor; ni yaa nyun kan, nyum ke ni nyuŋ Uwumbor; ni yaa ḥani tiwan nimok na kan, ni li ḥani ke ni nyuŋ Uwumbor. <sup>32</sup> Ni taa ḥaa tiwan ni ga kiir Juu yaab Uwumbor aasan ni na, ki taa kiir binib bi kaa ye Juu yaab na mu, ki taa kiir Uwumbor aanib mu. <sup>33</sup> Ni li ḥani ke maah ḥani pu na. M piir binib momok aasui tiwan momok ni, ke bi ḥmar. Maa ban mi baanja aanyoor. M ban bi momok kan tinyoor, aan ki ḥmar la.

**11** Ni li dii maataabuu man, ke maah dii Kristo aataabuu pu na.

### Uwumbor aadoon aakaal

<sup>2</sup> M pak nimi; ba pu? ni teer mi tiwan momok ponn ni, ki ḥani maah momok nimi pu na la. <sup>3</sup> Tɔ, m ban ke ni bee ke uja momok aayidaan le ye Kristo; upii momok mu aayidaan le ye uchal; Kristo aayidaan le ye Uwumbor. <sup>4</sup> Uja yaa mee Uwumbor, bee u yaa nabr Uwumbor aah len pu na, ki laa chik kiyikpupuk kan, u jinn uyidaan inimɔɔn a. <sup>5</sup> Upii mu yaa mee Uwumbor, bee u yaa nabr Uwumbor aah len pu na, kaa buu kiyibuuuk kan, u jinn uyidaan inimɔɔn. Ni bi ke waah kuu tiyikpir le na. <sup>6</sup> Upii yaa kaa buu

kiyibuuuk kan, ni kpa inimɔɔn ke waah chee tiyikpir le na. Upii u chee tiyikpir, bee u chuu kuu tiyikpir na, ni kpa inimɔɔn. U yaa kaa buu kiyibuuuk kan, ni mu kpa inimɔɔn. Nima pu na, ni ḥan ke u buu kiyibuuuk. <sup>7</sup> Uja yaa mee Uwumbor kan, u taa chih kiyikpupuk uyil pu; ba pu? u naahn Uwumbor, ki ye waasil la. Upii mu ye uja aasil la. <sup>8</sup> Uwumbor aah nan naan uja na, u nan nyan uja aasikaakpab le ki di naan upii, naa ye upii aasikaakpab le u nan nyan di naan uja. <sup>9</sup> Uja pu, le u nan naan upii. Naa ye upii pu le u nan naan uja. <sup>10</sup> Nima pu na, Uwumbor aatuuntiib mu pu, ni ḥan upii buu kiyibuuuk uyil pu, ki momok ke u bi kichadiik ni. <sup>11</sup> Tɔ, Tidindaan aasan ni, upii ni uja ban tob aaterm la. Upii yaa kaa bi kan, uja aan ḥmaa li bi. Uja yaa kaa bi kan, upii mu aan ḥmaa li bi. <sup>12</sup> Upii nan nyan ni uja ni. Uja mu nyan ni upii ni. Le bi momok nyan ni Uwumbor chee.

<sup>13</sup> Ni dakl lik man. Upii yaa mee Uwumbor ki yaa kaa buu kiyibuuuk kan, naa ḥan. <sup>14</sup> Tiwan momok aah bi pu na le momok nimi ke uja yaa kpa tiyikpir fofok kan, ni kpa inimɔɔn la. <sup>15</sup> Upii mu yaa kpa tiyikpir fofok kan, waanyaan le na. Ba pu? Uwumbor tii bipiib tiyikpir fofok ti li bii bi pu la. <sup>16</sup> Unii ubaa yaa kaa kii kina ki ban u kpak kinikpakpak kan, m tuk nimi la, taa ki kpa nkaal muken. Uwumbor aanib mu aa kpa nkaal muken.

### Tidindaan aajim

(Matiu 26.26-29; Mak 14.22-25; Luk 22.14-20)

<sup>17</sup> Tɔ, maah ban m tuk nimi pu na, maan ḥmaa pak nimi. Ni kuuni tob chee, kaa ḥani tiwan ni ga ter nimi na, le ki tee ḥani tiwan ni kaa ḥan na. Nimina pu, maan ḥmaa pak nimi. <sup>18</sup> Njan aabor le ye ke m ḥun ke naah kuuni tob chee na, ni kpak tob kinikpakpak, ki yakr tob. Le m pak maah ḥun pu na tibaa, ke ni sil

ŋjani kina la. <sup>19</sup>Nnyamɔn aamɔmɔkb ga li bi ni ponn ni ki cha ni bee binib bi ye mbamɔndam na. <sup>20</sup>Naah kuuni nan ji ti-jikaar ti na, naa ye Tidindaan aajim le ni ji. <sup>21</sup>Nimi bibaa puen ji nimi yaan ni-baabaa. Le ni ponn ni bibaa aa ji babr. Bibaa mu nyu gbii. <sup>22</sup>Naan ŋjmaa ji ki nyu nimi aadichal ni ii? Ni lik Uwumbɔr aanib fam ki jinn bigiim inimɔɔn la aa? M ga len kinye? M ga pak nimi nimina pu uu? Maan pak nimi.

<sup>23</sup>Tidindaan le nan tuk mi, le m mu tuk nimi kina, ke kinyeek ki Judas nan kooh u na, kinyeek ngbaan le Tidindaan Yesu nan yoor boroboro <sup>24</sup>le ki doon Uwumbɔr, le ki gii, ki bui bi, “[Gaa man ki ŋjmo.] Nwon le na. Nimi aatunwanbir pu, le m tii tiwon tee. Ni li ŋjmo kina aan ki li teer mbɔr.” <sup>25</sup>Baah jin tijikaar ti doo na, le u yoor kiyinyook ki doon Uwumbɔr, le ki bui bi, “Tiwanyukaan ngbaan ye tipuupoln ti Uwumbɔr puu tii nimi na, maasin pu. N-yoonn mumɔk ni ga ti nyu tiwanyukaan ngbaan na, ni li ŋjani kina ki teer mbɔr.” <sup>26</sup>Ba pu? n-yoonn mumɔk ni ga ŋjmo boroboro ngbaan, ki nyu tiwanyukaan ngbaan na, ni mooni ke Tidindaan nan kpo ni pu la, ki ti saa bundaln u ga gir ni na.

<sup>27</sup>Nima pu na, unii yaa ŋjman Tidindaan aaboroboro ngbaan, ki nyu waawanyukaan ngbaan, kaa tii u lisil kan, u sii Tidindaan aawon ni waasin. <sup>28</sup>Nima pu na, cha unii mɔmɔk lik waabimbin aah bi pu na aan ki nin ŋjmo boroboro ngbaan ki nyu tiwanyukaan ngbaan. <sup>29</sup>Unii yaa ŋjman ki yaa nyun, ki yaa kaa bee Tidindaan aawon aatataa kan, u ga cha Uwumbɔr daa utafal. <sup>30</sup>Nima le cha ni ponn ni pam ye bidaburb, pam mu aa kpa laafee, pam mu kpo. <sup>31</sup>Ti yaa puen lik timi aabimbin aah bi pu na, aan ki nin ji ki nyun kan, Tidindaan aan daa titafal. <sup>32</sup>U mu yaa daa titafal kan, u chiini

timi ke u taa bii timi bundaln u ga ji dulnyaa aanib tibɔr na la.

<sup>33</sup>Nnaabitiiib, nima pu na, ni yaa kuun tɔb chee ki ti ji kan, ni mɔmɔk li kii tɔb ki kpaan ji. <sup>34</sup>Nkon yaa chuu u na kan, cha u ji udo aan ki nin dan. Nima na, ni yaa nan kuun tɔb chee kina kan, ni taa kan ntafadaan ni pu. Tibɔr ti gur na, m yaa nan dan kan, m ga toor ti mu.

## Uwumbɔr Aafuur Nyaan aapiin aabɔj

**12** Nnaabitiiib, m ban ke ni bee tibɔr ti joo cha Uwumbɔr Aafuur Nyaan aapiin wɔb na la. <sup>2</sup>Ni nyi ke naah kaa nan kee dii Uwumbɔr aasan na, ni nan dii ŋjwaa ŋji ye bibirb na. ɿji nan cha ni yenni n-yoonn mɔmɔk la. <sup>3</sup>Nima pu na, m ban ke ni bee ke Uwumbɔr Aafuur Nyaan aapɔɔn yaa cha unii len tibɔr kan, waan ŋjmaa sii Yesu. Unii ubaa mu aan ŋjmaa len ke Yesu le ye Udindaan see Uwumbɔr Aafuur Nyaan le ga cha u len kina.

<sup>4</sup>Uwumbɔr Aafuur Nyaan aapiin aabɔj aabɔj le bi; Nfuur Nyaanbaan ngbaan le tii timi ipiin ngbaan mɔmɔk.

<sup>5</sup>Lituln aabɔj aabɔj mu bi; Tɔ, Dindaan baan mu le ti tun tii. <sup>6</sup>Uwumbɔr aapɔɔn le cha binib tun lituln aabɔj. Le Uwumbɔr u cha unii mɔmɔk tun lituln ngbaan mɔmɔk na, u ye ubaa. <sup>7</sup>Uwumbɔr Aafuur Nyaan tii unii mɔmɔk waapiin, ke u di ter Uwumbɔr aanib biken. <sup>8</sup>Mu cha ubaa len nlan aaliin. Muma muchachaan ngbaan cha ubaa mu beer tibɔr ki len. <sup>9</sup>Muma muchachaan le cha ubaa mu gaa Uwumbɔr ki kii mbamɔm. Muma muchachaan ngbaan le tii ubaa mu mpɔɔn mu cha bibum pɔɔk. <sup>10</sup>Mu tii ubaa mu mpɔɔn u tun lijinjiir aatun. Mu cha ubaa mu nabr Uwumbɔr aah len pu na. Mu cha ubaa mu beer mu ye Uwumbɔr Aafuur Nyaan na, ni mu kaa ye na. Mu cha ubaa mu len iliin yayan. Mu cha ubaa mu nabr iliin yayan

ngbaan. <sup>11</sup>Uwumbor Aafuur Nyaan muchachaan ngbaan le cha unii mɔmɔk tun lituln ngbaan mɔmɔk. Mu tii unii mɔmɔk ipiin aabɔŋ aabɔŋ mu aah ban pu na la.

### Tiwon aawan aabor

<sup>12</sup>Tiwon kpa tiwan pam, ki tee ye tiwonbaan la. Kristo aanib mu bi kina la. Bi wiir, ki mu ye unibaan la. <sup>13</sup>Ti ponn ni bibaa ye Juu yaab, bibaa mu ye binib bi kaa ye Juu yaab na, bibaa mu ye binaagbiib, bibaa mu ye bimalb, le Yesu gbiin ti mɔmɔk Nfuur Nyaan baan, ki ḥa timi unibaan. U cha ti mɔmɔk kan Nfuur Nyaan baan la.

<sup>14</sup>Tɔ, tiwon aa kpa tiwan nibaabanja. Ti kpa tiwan kipaak la. <sup>15</sup>Kitaafaak yaa bui ke, "Maah kaa ye kiŋaal-faak na, maa ye tiwon aawan" kan, naa ye tiwon aawan aa? <sup>16</sup>Litafal mu yaa bui ke, "Maah kaa ye linimbil na, maa ye tiwon aawan" kan, naa ye tiwon aawan aa? <sup>17</sup>Tiwonmɔn yaa ba ye linimbil ḥmeen kan, ti ba ga ḥa kinye ki ḥun? Ti yaa ba ki ye litafal ḥmeen kan, ti ba ga ḥa kinye ki ḥun nnun? <sup>18</sup>Naah ye pu na, Uwumbor le di tiwon aawan mɔmɔk saŋ tɔb ponn ni, waah ban pu na. <sup>19</sup>Tiwonmɔn yaa ba ye liwanbaal kan, ni ba ga li ye tiwon aa? <sup>20</sup>Naah ye pu na, tiwon kpa tiwan aabɔŋ aabɔŋ, le ki ye tiwonbaan.

<sup>21</sup>Nima pu na, linimbil aan ḥmaa tuk kiŋalfaak, "Maa ban si." Liyil mu aan ḥmaa tuk tittaafar, "Maa ban nimi." <sup>22</sup>Tiwon nin chee kaa kpa mpɔɔn ke nikena, see ni mu li bi. <sup>23</sup>Tiwon nin chee lann lisil na, ti ga tii nima chee lisil ki jer nikena. Le tiwon nin chee kaa ḥjan na, ti ga ḥa nima chee ni ḥjan. <sup>24</sup>Le tiwon nin chee ḥjan na, naa ki ban nterm. Uwumbor le di tiwon aawan saŋ tɔb ni, ki di lisil tii nin chee ni lann lisil na. <sup>25</sup>Nima na, tiwon aawan aan li kpak tɔb kinikpapkak, ni ga li ter tɔb ke naah ter nibaa pu na la. <sup>26</sup>Tiwon nibaa chee yaa ji falaa kan,

ni mɔmɔk ga kpaan ji falaa kina. Nibaa chee mu yaa kan nnyuŋ kan, ni mɔmɔk ga li kpa mpopiin.

<sup>27</sup>Nimi le ye Kristo aawon. Unii mɔmɔk ye waawon aawan nibaabaa la.

<sup>28</sup>Uwumbor di timi ḥa waanib ponn ni la; njan, bibaa ye Yesu aakpambalb; lelee, bibaa mu ye Uwumbor aabɔŋabtiib; taataa, bibaa mu ye bimɔmɔkb; le u tii bibaa mu mpɔɔn bi tun lijinjiir aatun; ki tii bibaa mu mpɔɔn ke bi cha bibum poɔk; bibaa mu ye biteterb; bibaa mu ye biyidam; bibaa mu len iliin yayan. <sup>29</sup>Ti mɔmɔk ye Yesu aakpambalb aa? Ti mɔmɔk ye Uwumbor aabɔŋabtiib aa? Ti mɔmɔk ye bimɔmɔkb aa? Ti mɔmɔk kpa mpɔɔn ki tun lijinjiir aatun aa? <sup>30</sup>Ti mɔmɔk ḥmaa tii bibum laafee ee? Ti mɔmɔk len iliin yayan aa? Ti mɔmɔk ḥmaa nabr iliin yayan ngbaan aa? <sup>31</sup>Tɔ, cha ninimbil li man ipiin i ḥjan ki jer iken na pu.

Cha m mɔk nimi nsan mu ḥjan ki jer muken na.

### Ngeehm aabor

**13** Unii yaa ḥmaa len binib aaliin ni Uwumbor aatuuntiib aaliin, ki yaa kaa gee binib kan, u bi ke tiwangbaakaan ni libɔluln na la. <sup>2</sup>U yaa ḥmaa nabr Uwumbor aah len pu na, ki yaa bee tibɔr ti bɔɔ na mɔmɔk, ki yaa bee mbeen mɔmɔk, ki yaa kpa naadii u ga ḥmaa foor ḥjoo na, ki yaa kaa gee binib kan, waa ye nibaa. <sup>3</sup>U yaa di waawan mɔmɔk kpiin bigiim, ki yaa cha binib di u pun mmii ni Yesu pu, ki yaa kaa gee binib kan, naa kpa tinyoor Uwumbor chee.

<sup>4</sup>Unii u gee binib na, u kpa limɔr bi pu, ki kpa tibulchinn. Waa kpa lipiipoln, kaa kpa kipupuk, kaa kpa kalmabaani, <sup>5</sup>kaa kpa inimpoo, kaa ye ukumɔndaan, kaa ye uŋuudaan, kaa dak tilandakbir binib pu, <sup>6</sup>kaa kpa mpopiin uŋeен aats aatunwanbir pu; u kpa mpopiin mbamɔn pu. <sup>7</sup>Unii u gee binib na kpa suklaa

n-yoonn mɔmɔk, ki dakl ilandak nyaan unjeen aatɔtiib pu, ki kpa limakl n-yoonn mɔmɔk, ki kpa limɔr falaa mɔmɔk ni.

<sup>8</sup> Ngeehm ga li bi n-yoonn mu kaa kpa ndoon na. Uwumbɔr aabɔnabr aaliin ma kan, i ga doo. Iliin yayan ma kan, i mu ga doo. Mbeem ma kan, mu ga doo. <sup>9</sup> Dandana wee ti nyi ligeln, ki nabr Uwumbɔr aah len pu na ligeln, <sup>10</sup> le buyoonn ti ga kan tiwamɔn na kan, ti ga di ligeln lii.

<sup>11</sup> Maah nan ye ubo na, m nan len ibiliin la, ki nan beer tiwan mbim aah beer pu na, ki dak mbim aah dak pu na. Maah ja unii na, le m di cha mbim aabɔr. <sup>12</sup> Dandana, ni bi ke ti lik kinimbilikr, ki lik puu na la; n-yoonn mu choo na, tiwan nibaa aan nan ki li bi tinimbiin ni ki doŋ timi tiwan nibaa chee. Ti ga li waa tiwan mɔmɔk chain. Dandana m nyi ngem. N-yoonn mu choo na, m ga nan li nyi ni mɔmɔk, ke Uwumbɔr aah nyi maabɔr mɔmɔk pu na.

<sup>13</sup> Tɔ, naadii, ni limakl, ni ngeehm, ni mɔmɔk nitaa le bi; ngeehm mu le jer ni mɔmɔk.

### Uwumbɔr Aafuur

#### Nyaan aapiin aabɔr tiken

**14** Pɔɔk nibaa man ki li gee binib, ki cha ninimbil li man Uwumbɔr Aafuur Nyaan aapiin pu; ni mu tee li ban ipiin i ga cha ni nabr Uwumbɔr aah len pu na, ki jer naah ban ipiin iken mɔmɔk pu na. <sup>2</sup> Ba pu? unii u len iliin yayan na, waa len binib chee, Uwumbɔr chee le u len; ubaa aa ḷun waah len pu na. Uwumbɔr Aafuur Nyaan cha u len tibɔr ti bɔɔ na la. <sup>3</sup> Unii u nabr Uwumbɔr aah len pu na, u len binib chee, ki ter bi ke bi dii Uwumbɔr aasan mbamɔm, ki pɔɔk bitaakpab, ki sɔŋni bisui. <sup>4</sup> Unii u len iliin yayan na, u ter ubaa ke u dii Uwumbɔr aasan mbamɔm la. Unii u nabr Uwumbɔr aah len pu na, u ter Yesu aanib ke bi dii Uwumbɔr aasan mbamɔm la.

<sup>5</sup> Ni mɔmɔk yaa len iliin yayan kan, ni ga li mɔ mi; ni mɔmɔk mu yaa nabr Uwumbɔr aah len pu na kan, ni ga li mɔ mi ki jer kina. Unii u nabr Uwumbɔr aah len pu na, u jer unii u len iliin yayan na, see unii u ga nabr iliin yayan ngbaan na bi. U yaa nabr iliin yayan ngbaan kan, u ga ter Yesu aanib ke bi dii Uwumbɔr aasan mbamɔm. <sup>6</sup> Nnaabitib, m yaa dan ni chee ki nan len iliin yayan baanja kan, ni ga ter nimi ii? Aayii. Naan ter nimi, see m tuk nimi Uwumbɔr aah kpiir tibɔr ti tuk mi na, bee m tuk nimi mbeen mu nyan ni Uwumbɔr chee na, bee m nabr Uwumbɔr aah len pu na, bee m mɔk nimi Uwumbɔr aabɔr.

<sup>7</sup> Tɔ, tiwangbaakaan mu yaa kaa wii mbamɔm kan, ni ye fam la. Ni yaa ye liwul, bee ni yaa ye kibeek kan, ni yaa kaa wii mbamɔm kan, ubaa aan bee naah wii pu na. <sup>8</sup> Unii yaa pii ukpiin, kaa pii mbamɔm kan, baan kuun tɔb chee ke bi ti to butɔb. <sup>9</sup> Ni mu bi kina la. Nilambil yaa kaa len iliin i si mbamɔm na kan, binib ga ḷa kinye ki ḷun naah len pu na? Ni len tii libuln la. <sup>10</sup> M nyi ke iliin aabɔŋ aabɔŋ le bi dulnyaa wee ni, le i mɔmɔk mu kpa yaatataa. <sup>11</sup> M mu yaa kaa ḷun unii ubaa aaliin kan, m ga li ye uwɔwɔŋja le u chee, u mu ga li ye uwɔwɔŋja le m chee. <sup>12</sup> Nimi, ninimbil aah man Uwumbɔr Aafuur Nyaan aapiin pu na, ni li ban ipiin i ga ter Yesu aanib ke bi dii waasan mbamɔm na. Ni li ban ipiin ngbaan ki jer naah ban ipiin iken pu na.

<sup>13</sup> Nima pu na, unii yaa len iliin yayan kan, u li mee Uwumbɔr ke u cha u nabr iliin yayan ngbaan. <sup>14</sup> Ba pu? m yaa mee Uwumbɔr ki len iliin yayan kan, Uwumbɔr Aafuur Nyaan le cha m mee kina, nlandak aa dak. <sup>15</sup> Kina pu na, ni ḷjan ke m ḷa kinye? M ga mee Uwumbɔr, Waafuur Nyaan aah ga cha m mee pu na, ki mee maalandak mu aah ga cha m mee pu na. M ga gaa ilahn Waafuur Nyaan

aah ga cha m gaa pu na, ki gaa ilahn maalandak mu aah ga cha m gaa pu na.<sup>16</sup> Aa yaa doon Uwumbor, Waafuur Nyaan aah cha aa doon u pu na kan, unii yaa bi nikaasisik ni, kaa nyi Uwumbor aasan kan, u ga ḥa kinye ki len ke saah doon Uwumbor pu na ye mbamɔn; ba pu? waa ḥun saah len pu na.<sup>17</sup> Mbamɔn, saah doon Uwumbor pu na, ni ḥan, ni mu aa ter udaan ngbaan ke u dii Uwumbor aasan.

<sup>18</sup> M dooni Uwumbor ke m len iliin yayan ki jer ni mɔmɔk. <sup>19</sup> M mu yaa bi Yesu aanib aakaasisik ni, ki yaa len maalandak aaliin ijmu baanja, aan ki mɔk bi Uwumbor aabɔr kan, ni soor ni m len iliin yayan ḥichur kipiik.

<sup>20</sup> Nnaabitiib, ni taa ki li dak ke mbim aah dak pu na. Ni li dak ke binib bi chikr na aah dak pu na. To, bakaa wɔb ma kan, ni li bi ke mbipom na. <sup>21</sup> Ni ḥmee Uwumbor Aagban ni ke Uwumbor len ke, “M ga di biwɔwɔm bi len ḥitimbol yayan aaliin na len binib ngbaan chee, hali m yaa ḥa kina kan, baan pel.”<sup>22</sup>

<sup>22</sup> Nima pu na, iliin yayan aa ye limɔkl ki tii binib bi gaa Yesu ki kii na; i ye limɔkl ki tii binib bi kaa gaa u ki kii na la. Uwumbor aabɔnabr aaliin mu aa ye limɔkl ki tii binib bi kaa gaa Yesu ki kii na; i ye limɔkl ki tii binib bi gaa u ki kii na la.

<sup>23</sup> Nima pu na, Yesu aanib mɔmɔk yaa kuun tɔb chee, aan bi mɔmɔk yaa len iliin yayan kan, binib bi kaa nyi Yesu aasan na, bee binib bi kaa gaa u ki kii na, bi yaa koo ni kan, baan len ke ni waarr la aa?<sup>24</sup> Le ni mɔmɔk yaa nbr Uwumbor aah len pu na kan, unii u kaa gaa Yesu ki kii na, bee unii u kaa nyi Yesu aasan na yaa koo ni kan, ni mɔmɔk aah len pu na le ga cha waalandak li muk u, ki cha u bee waatunwanbir aah bi pu na,<sup>25</sup> ki cha usui ni aabɔr nya mpaan pu. Nima

pu le u ga gbaan kitij, ki pak Uwumbor, ki len ke ni ye mbamɔn, Uwumbor sil bi nikaasisik ni.

### Naah ga li dooni Uwumbor pu na

<sup>26</sup> Nnaabitiib, maah len pu na ye kinye? Ni yaa nan kuun tob chee kan, ubaa ga li ban ke u gaa nlahn, uken mu ga li kpa mmɔkm, ubaa mu ga li kpa Uwumbor aah kpiir pu ki tuk u na, uken mu ga li kpa iliin yayan, ubaa mu ga ḥmaa nbr iliin yayan ngbaan. Naah ga ḥa tiwan ni mɔmɔk na, ni li ḥan tiwan ni ga ter Uwumbor aanib ke bi dii waasan mbamɔm na.<sup>27</sup> Ni ponn ni bibaa yaa ban bi len iliin yayan kan, cha binib bilee, bee bitaa len. Binib bi len na taa jer bitaa. Cha bi len ubaabaa, ki cha ubaa mu nbr baah len pu na.<sup>28</sup> Unii u ga ḥmaa nbr iliin yayan ngbaan na yaa kaa bi kan, cha bi ḥmin Uwumbor aadiik ni, ki li len bibaa ni Uwumbor chee.<sup>29</sup> Cha Uwumbor aabɔnabtiib bilee bee bitaa mu len, ki cha biken lik baah len pu na.<sup>30</sup> Uwumbor yaa kpiir tibɔr ki mɔk unii u mu ka nikaasisik ni na kan, cha unii u puen len na ḥmin waahr aan uleler mu len.<sup>31</sup> Le ni mɔmɔk ga ḥmaa nbr Uwumbor aah len pu na ubaabaa. Ni yaa ḥa kina kan, ni mɔmɔk ga ḥmaa bae Uwumbor aabɔr, le ni ga poɔk ni mɔmɔk aataakpab.<sup>32</sup> Nfuur Nyaan yaa cha unii nbr Uwumbor aah len pu na kan, u ga ḥmaa chuu ubaa ki li kii n-yoonn mubaa.<sup>33</sup> Uwumbor aa ban kifuuk, u ban suuna la.

<sup>34</sup> Bipiib li ḥmin Yesu aanib aakuun ponn ni na. Baa kpa nsan ke bi len. Ni bi kina Yesu aanib aakuun mɔmɔk ponn ni la. Ni ḥan bi li keei bichatiib aamɔi. Uwumbor Aagban mu len kina la.<sup>35</sup> Bi yaa ban bi bee tiwan kan, cha bi baa bichatiib linampal. Ba pu? upii yaa len

Yesu aanib aakuun ni kan, ni kpa inimɔɔn la.

<sup>36</sup> Uwumbor aabɔr puen nyan ni nimi le chee ee? Tibɔr ngbaan pii nimi baanja la aa? <sup>37</sup> Tɔ, unii yaa dak ke u ye Uwumbor aabɔnbr kan, bee u yaa dak ke u kpa Uwumbor Aafuur Nyaan aapiin kan, cha u bee ke maah ɔmee pu tii nimi na, ni ye Tidindaan aah len pu na la. <sup>38</sup> Unii yaa kaa gar maah ɔmee pu na kan, ni mu taa gar u.

<sup>39</sup> Nnaabitiib, nima pu na, cha ninimbil li man ke ni nabr Uwumbor aah len pu na, ki taa bui unii ubaa ke u taa len iliin yayan. <sup>40</sup> Ni mu li ɔjani tiwan mɔmɔk, ni li dii nsan.

### Yesu Kristo aah fikr nkun ni pu na

**15** Nnaabitiib, m ban m teer nimi maah nan tuk nimi tibɔnyaan ti na la. Ni nan gaa tibɔnyaan ngbaan, ki sil ti pu. <sup>2</sup> Tibɔnyaan ngbaan mu pu le ni ɔmar. Ni yaa joo maah tuk nimi ti na mbamɔm, ki yaa kaa gaa ti ki kii fam kan, ni ɔmar a.

<sup>3</sup> Maah nan gaa tibɔnyaan ngbaan na, tima le m nan di tuk ni mu. Ti ye tibɔ-paan ki jer tibɔ mɔmɔk. Tibɔnyaan ngbaan le ye ke Kristo nan kpo timi aatunwanbir pu. Ni ɔmee kina Uwumbor Aagbaŋ ni. <sup>4</sup> Le bi nan di u di sub. Iwiin itaa daal le Uwumbor fikr u nkun ni. Ni ɔmee kina Uwumbor Aagbaŋ ni. <sup>5</sup> Waah fikr nkun ni na, le Piita kan u. Le waakpambalb kipiik ni bilee mu kan u. <sup>6</sup> Le waa-didiliib bi jer ikui iŋmu na mu nan kpaan kan u. Bi ponn ni pam beenin bi, le bibaa mu kpo. <sup>7</sup> Jems mu nan kan u, le bikpambalb mɔmɔk mu kan u.

<sup>8</sup> Gbelngbeln yaan le m mu kan u. Min u bi ke baah ker ubo u lii na, m mu kan u.

<sup>9</sup> Yesu aakpambalb mɔmɔk jer mi. Maa ɔjeer ke bi yin mi ke Yesu aakpambal; ba pu? m nan ɔja waanib falaa. <sup>10</sup> Le Uwumbor aah ter mi pu na, m bi ke maah bi pu dandana na. Waah ter mi pu na, waa

ter mi ɔyli. M tun lituln ki jer Yesu aakpambalb mɔmɔk. Ni mu aa ye min le tun lituln ngbaan. Uwumbor aaterm mu bi m chee na le cha m tun. <sup>11</sup> Nima pu na, min le yaa nan tuk nimi tibɔnyaan ngbaan, bee bima le yaa nan tuk nimi kan, ti mɔmɔk tuk nimi kina la, ni mu gaa ti ki kii kina.

### Uwumbor aanib aah ga fikr nkun ni pu na

<sup>12</sup> Tɔ, taah nan tuk nimi ke Uwumbor fikr Kristo nkun ni na, ni ɔja kinye aan ni ponn ni bibaa ki len ke binib bi kpo na aan fikr nkun ni. <sup>13</sup> Bi yaa len ke binib bi kpo na aan fikr nkun ni kan, ni mɔk ke Uwumbor aa fikr Kristo nkun ni. <sup>14</sup> Uwumbor yaa kaa nan fikr Kristo nkun ni kan, taah tuk nimi tibɔnyaan ti na mu ye ɔyli la. Ni mu gaa ti ki kii ɔyli la; <sup>15</sup> ni mu mɔk ke ti mɔn nnyamɔn paan Uwumbor; ba pu? ti len ke u fikr Kristo nkun ni. Ni yaa ye mbamɔn ke binib bi kpo na aan fikr nkun ni kan, ni mɔk ke Uwumbor aa fikr Yesu mu nkun ni. <sup>16</sup> Ba pu? Bi yaa len ke binib bi kpo na aan fikr nkun ni kan, ni mɔk ke Uwumbor aa fikr Kristo mu nkun ni. <sup>17</sup> Uwumbor yaa kaa nan fikr Kristo nkun ni kan, ni gaa u ki kii ɔyli, ki beenin bi nimi aatunwanbir aapɔɔn ni. <sup>18</sup> Binib bi nan dii Yesu ki kpo na mu, ni mɔk ke bi mu bee ɔyli. <sup>19</sup> Ti yaa kpa limakl Kristo pu dulnyaa wee ponn ni baanja kan, ti kpa kinimbaak ki jer binib mɔmɔk.

<sup>20</sup> Tɔ, ni ye mbamɔn la, Uwumbor sil fikr Kristo nkun ni. Uma le ye njan aanii u puen fikr nkun ni na, le ki mɔk ke binib bimɔk kpo na mu ga nan fikr nkun ni.

<sup>21</sup> Uja ubaa pu, le nkun bi. Uja ubaa mu pu, le binib bi kpo na mu ga fikr nkun ni. <sup>22</sup> Adam pu, le binib mɔmɔk kpu. Kristo pu, le binib mɔmɔk ga kan limɔ-fal. <sup>23</sup> Kina le bi ga li paa tɔb pu. Kristo le ye njan aanii u puen fikr nkun ni na. U yaa gir ni kan, binib bi ye uyaab na mu

ga fikr nkun ni.<sup>24</sup> Tiwan nimina mɔmɔk yaa ti ŋa kan, le tiwan mɔmɔk ga doo. N-yoonn ngbaan le u ga kuhn waadim aabɔŋ mɔmɔk aapɔɔn, ki di nnaan na tii Ute Uwumbɔr,<sup>25</sup> ki ga li joo tiwan mɔmɔk ki nan saa buyoonn Uwumbɔr di waadim mɔmɔk ŋa utaaptan ni na.<sup>26</sup> Kookoo aadin u u ga bii u na le ye nkun.<sup>27</sup> Uwumbɔr Aagbaŋ le len ke u di tiwan mɔmɔk di ŋa Kristo aataaptan ni ke ni kii waamɔb. Uwumbɔr Aagbaŋ aah len ke u cha tiwan mɔmɔk kii Kristo aamɔb na, nima le aa mɔk ke Uwumbɔr ubaa mu ga kii waamɔb.<sup>28</sup> Uwumbɔr yaa cha tiwan mɔmɔk kii Kristo aamɔb kan, le Kristo, u ye Uwumbɔr Aajapɔɔn na, u mu ga kii Uwumbɔr u nan cha tiwan mɔmɔk kii waamɔb na aamɔb. Nima kan, Uwumbɔr le ga li joo tiwan mɔmɔk pel pel.

<sup>29</sup>Tɔ, ni muin binib bibaa nnyun ni, ke bi sil binib bi kpo na aasisiyyaan la. Bibaa yaa bui ke binib bi kpo na aan fikr nkun ni kan, ba pu ni muin binib nnyun ni baasisiyyaan?<sup>30</sup> Binib yaa kaan fikr nkun ni kan, ba pu ti kani linimaln n-yoonn mɔmɔk?<sup>31</sup> Nnaabitib, idaa mɔmɔk m chuun nkun ni la. M kpa kipupuk ni pu Tidindaan Yesu Kristo aasan ni, nima le cha m len kina.<sup>32</sup> Ipeel nan tak mi Efe-sus aatiŋ ni. M yaa po ye unibɔn u kaan fikr nkun ni kan, m kan tinyoor ni pu uu? Aayii. Binib bi kpo na yaa kaan fikr nkun ni kan, “Cha ti li ji ki li nyu; ba pu? ti ga fe kpo fen.” Tɔ, ni ye mbamɔn, binib bi kpo na ga sil fikr nkun ni.

<sup>33</sup> Ni taa cha unii ubaa ŋmann nimi man. “Ni yaa dii binib bi kaa ŋjan na kan, nimi aabimbinyaan ga bii.”<sup>34</sup> Finn ngeen pu man, ki tun lituln li ŋjan na, ki taa ki tun titunwanbir. Ni ponn ni bibaa aa nyi Uwumbɔr. M len kina ke m jinn nimi inimɔɔn la.

### Tiwon ti fikr nkun ni na aabor

<sup>35</sup> Le unii ubaa ga baa ke, “Binib bi kpo na ga ŋa kinye ki fikr nkun ni? Bi yaa fikr nkun ni kan, tiwon ngbaan aaboln ga li bi kinye?”<sup>36</sup> Ujɔr, aa yaa di lijiakaabuul bun kan, li yaa kaa kpo kan, laan punn.<sup>37</sup> Lijikaabuul li aa di bun na aa bi ke li ga lu na aah ga li bi pu na. Ni po ye lijiakaabuul la, nibaakan idi, nibaakan tijikaar tiken.<sup>38</sup> Le Uwumbɔr tii lijiakaabuul ngbaan tiwon, waah gee pu na. U tii lijiakaabuul mɔmɔk aawon aabɔŋ aabɔŋ la.

<sup>39</sup> Tiwan mɔmɔk aawon aa kpaan. Binib aawon bi tibaa, tiwakor mu aawon bi tibaa, inyoon mu aawon bi tibaa, ijan mu aawon bi tibaa.

<sup>40</sup> Paacham aawan mu bi la, le ki cha kitij aawan. Paacham aawan kpa kinyaan, kitij aawan mu kpa kinyaan. Naanyaan mu aa kpaan.<sup>41</sup> Nwiin, ni upjimal, ni ŋijmabil kpa kinyaan; ni mu aanyaan aa kpaan; ŋijmabil mɔmɔk aanyaan mu aa kpaan.

<sup>42</sup> Binib yaa nan fikr nkun ni kan, ni ga nan li bi kina la. Tiwon ti bi di sub na, ni ye tiwan ni ga bur na la. Ni yaa fikr nkun ni kan, ni ga nan li ye tiwon ti kaan ŋmaa bur na la.<sup>43</sup> Tiwon ti bi di sub na, aa ye lisil aawon. Tiwon ti ga nan fikr nkun ni na, tima le ga li ye lisil aawon. Tiwon ti bi di sub na aa kpa mpɔɔn. Tiwon ti ga nan fikr nkun ni na, tima le ga li kpa mpɔɔn.<sup>44</sup> Tiwon ti bi di sub na, ti ye dulnyaa ni aawon la. Tiwon ti ga nan fikr nkun ni na ga nan ŋneer Uwumbɔr Aafuur Nyaan aah ban pu na la. Dulnyaa wee ponn ni aawon aah bi na, tiwon ti ga ŋneer Uwumbɔr Aafuur Nyaan aah ban pu na mu bi la.<sup>45</sup> Ni ŋmee Uwumbɔr Aagbaŋ ni ke Uwumbɔr nan naan ŋjan aanii Adam, ki tii u limɔ-fal.\* Kookoo yoo le ye Nfuur Nyaan mu

ti timi limɔfal li kaa kpa ndoon na. Uma le ye Kristo.<sup>46</sup> Njan, ti kpa dulnyaa wee ni aawon. Lelee le ti ga kan tiwon ti ga neer Uwumbɔr Aafuur Nyaan aah ban pu na paacham.<sup>47</sup> Uwumbɔr nan di titan le naan njan aanii Adam. U nyan ni kitij la. Lelee aanii, u ye Kristo na, uma le nyan ni Uwumbɔr do.<sup>48</sup> Binib bi ye kitij yaab na bi ke unii u Uwumbɔr nan di titan ki naan u na aah bi pu na la. Binib bi ye Uwumbɔr do yaab na, bi mu bi le ke unii u nyan ni paacham na aah bi pu na.<sup>49</sup> Ti naahn unii u Uwumbɔr nan di titan ki naan u na la. Kina le ti ga li naahn unii u nyan ni Uwumbɔr do na mu.

<sup>50</sup> Nnaabitib, maah len pu na le ye ke tiwon ti ye tinann ni nsin na aan ɔjmaa koo Uwumbɔr aanaan ni paacham. Ni ga bur na mu aan ɔjmaa le ye ni kaan bur na.

<sup>51</sup> Li pel man, m ga tuk nimi tibɔr ti bɔɔ na. Timi bibaa ga kpo, bibaa mu ga pii Kristo aah ga gir ni bundaln na. Le ti mɔmɔk aawon ga kpeln.<sup>52</sup> Kakaan yaa wii kookoo yaan kan, libuul ngbaan ni le ti ga kpeln. Naan pii linimbil aah ga kab pu na. Kakaan ga nan wii, le binib bi kpo na ga fikr nkun ni, kaan ki bur. Le Uwumbɔr ga kpeln timi aawon.<sup>53</sup> See tiwon ti ga bur na kpalm tiwon ti kaan ki bur na, tiwon ti ga kpo na mu kpalm ti kaan kpo na.<sup>54</sup> Tiwon ti ga bur na yaa nan kpalm ti kaan bur na, aan tiwon ti ga kpo na yaa nan kpalm tiwon ti kaan ki kpo na kan, liyaadaal ngbaan le Uwumbɔr Aagban aah len pu na ga gbiin ke, "Uwumbɔr nyaŋ nkun, ki kuln mu."<sup>†</sup>

<sup>55</sup> Nkun aapɔɔn bi la chee?

Nkun aaween ki bi la chee?"<sup>‡</sup>

<sup>56</sup> Titunwanbir le ye nkun aaween. Uwumbɔr aakaal le ye titunwanbir aapɔɔn.<sup>57</sup> Le ti dooni Uwumbɔr; ba pu? Tidindaan Yesu Kristo pu le u tii timi bunyaj.

<sup>58</sup> Nnaabigeehm, nima pu na, n-yoonn mɔmɔk ni li tun Tidindaan aatuln sakpen, ki taa cha nibaa lej nimi. Ni li bi li ni; ba pu? ni nyi ke ni yaa tun lituln tii Tidindaan kan, naa tun fam.

Ipiin i ni ga di tii Uwumbɔr aanib na

**16** Tɔ, tibɔr ti bi ki joo cha ipiin i ni ga too ki tii Yesu aanib bi bi Judea aatiŋ ni na, ni li ɔjani maah tuk Yesu aanib Galasia aatiŋ ponn ni ke bi li ɔjani pu na.<sup>2</sup> Likpaakool daal mɔmɔk, ni mɔmɔk aah kan tinyoor pu na, ni di ngem bil, ki li kii buyoonn m ga labr ni na. Nima kan, m yaa nan fuu ni kan, naan ki piin ki li too ɔjimobil.<sup>3</sup> Ni lee ni ponn ni bibaa. M yaa nan fuu ni kan, m ga tii bi tigbann, ki tun bi, ke bi di naah too ipiin i na ki di buen ti tii Yesu aanib bi bi Jerusalem na.<sup>4</sup> Ni yaa neer m mu buen nima chee kan, m mu ga dii bi.

### Pool aalandak

<sup>5</sup> M ban m bɔ dii Masedonia aatim ni. M yaa bɔ dii nima chee kan, m ga dii ni ni chee.<sup>6</sup> Nibaakan, m ga li bi ni chee ki yunn, nibaakan, kakab yoonn ga ti jer. Nima kan, ni ga ter mi m gor ki ki buen maah cha nin chee na.<sup>7</sup> M yaa nan fuu ni ni chee kan, maa ban m nan li bi ni chee iwiin siib. Tidindaan yaa kii kan, m ban ke m nan li bi ni chee ki yunn la.

<sup>8</sup> Tɔ, m ga li bi Efesus aatiŋ ni do ki ti saa Pentekost daal;<sup>9</sup> ba pu? m kpa nsan sakpen ke m tuk binib Yesu aabɔnyaan tee. Le maadim mu wiir.

<sup>10</sup> Timoti yaa nan fuu ni ni chee kan, ni taa ɔaab ulan; ba pu? u mu tun Tidindaan aatuln ke maah tun pu na la.

<sup>11</sup> Nima pu na, ubaa taa lik u fam. Ni ter u man aan u gor ki ki chuun buen nibaa

<sup>†</sup>15:54 : Lik Aisaya 25.8.

<sup>‡</sup>15:55 : Lik Hosea 13.14.

chee ni mpopiin, aan ki ki gir ni m chee; m nyi ubor ke u ni tinaabitiib ga fuu ni.

<sup>12</sup>Tina aabo Apolos ma kan, m ganj u sakpen ke u dii tinaabitiib ki dan ni chee, le waa ban ke u dan dandana wee. U yaa kan nsan kan, u ga dan ni chee.

### Kookoo aabɔr

<sup>13</sup>Ni li nyi man, ki li dii Yesu mbamɔm, ki taa di cha waasan. Ni li kpa lipobil man, ki li kpa mpɔɔn mu Uwumbɔr tii nimi na. <sup>14</sup>Naah tun lituln limɔk na, ni li gee tɔb man.

<sup>15</sup>Ni nyi Stefanas ni waachiln ni aanib aabɔr, ke bima li puen Akaya aatiŋ aanib mɔmɔk ki dii Yesu aasan. N-yoonn mɔmɔk bi kpa liyabr ki ter Yesu aanib. <sup>16</sup>Nnaabitiib, m ganj nimi, ni dii binib bimɔk bi kina na, ni binib bimɔk kpaan ti chee ki tun Uwumbɔr aatuln linimaln na aasan.

<sup>17</sup>Stefanas, ni Fotunatus, ni Akaikus aah fuu ni na, le m kpa mpopiin. Naah kaa bi m chee na, le bi leŋ nimi aaleleŋ. <sup>18</sup>Baah fuu ni na, bi pɔɔk ntaakpab, ni ni mu aataakpab. Ni li pak binib bi bi kina na.

<sup>19</sup>Uwumbɔr aanib bi bi Asia aatim ni na dooni nimi. Akuila ni upuu Prisila, ni Tidindaan Yesu aanib bi kuuni bido na mu dooni nimi mbamɔm waayimbil pu. <sup>20</sup>Tinaabitiib mɔmɔk dooni nimi.

Ni mu doon tɔb ke naabitiib aah gee tɔb pu na.

<sup>21</sup>Min Pɔɔl le ŋmee maajmeen ki dooni nimi.

<sup>22</sup>Unii yaa kaa gee Tidindaan kan, Uwumbɔr aabɔbir li bi u pu.

Tidindaan, dan.

<sup>23</sup>Tidindaan Yesu ŋa tinyoor ŋa ni pu.

<sup>24</sup>M gee ni mɔmɔk Yesu Kristo pu.

*Lelee aagbaŋ ki Pɔɔl ɻmee ki tii*

## KORINT YAAB

*na*

**1** Min Pɔɔl u ye Yesu aakpambal Uwumbor aageehn pu na, m ni tina aabo Timoti le ɻmee kigbaŋ kee tii nimi Uwumbor aanib bi bi Korint aatiŋ ni na, ni waanib bimɔk bi Griis aatim mɔmɔk ni na. <sup>2</sup>Tite Uwumbor ni Tidindaan Yesu Kristo ḥa tinyoor ḥa ni pu, ki tii nimi nsuudoon.

### Pɔɔl di idoon tii Uwumbor

<sup>3</sup> Cha ti pak Uwumbor u ye Tidindaan Yesu Kristo Aate na. U ye Tite u san timi kinimbaak sakpen ki sɔŋ tisui na.

<sup>4</sup> Timi aafalaa mɔmɔk ponn ni u sɔŋni tisui, ke ti mu ga ɻmaa sɔŋ binib bi bifalaa mɔmɔk aabɔŋ ni na aasui. Ti mu ga sɔŋ bisui ke Uwumbor aah sɔŋ tisui pu na. <sup>5</sup>Kristo pu, le ti ji falaa sakpen. Kristo pu, le Uwumbor sɔŋ tisui sakpen. <sup>6</sup>Taah ji falaa pu na, ni pu le ti ji falaa, ke ti sɔŋ nisui ki ter nimi, ni ɻmar. Uwumbor yaa sɔŋ tisui kan, ni pu le u sɔŋ tisui, ke ti mu sɔŋ nisui, ke ni li kpa limɔr ki jifalaa ke ti mu aah ji falaa pu na. <sup>7</sup>Nima pu na, ti dak ke naan gir puwɔb. Ba pu? ti nyi ke ni yaa ji falaa ke taah ji falaa pu na kan, Uwumbor ga sɔŋ nisui, ke waah sɔŋ tisui pu na.

<sup>8</sup>Tinaabitib, ti ban ke ni bee taah nan ji falaa pu Asia aatiŋ ni na. Falaa ngbaan nan muk timi ki ti chaar jer. Taa nan dak ke ti ga ki li bi. <sup>9</sup>Timi tibaa nan len ke ti ga kpo. Ni ḥa kina ke ti bee ke taan ɻmaa ter tibaa. Uwumbor u fikr binib nkun ni na baanja le ga ɻmaa ter timi. <sup>10</sup>U nyan timi ijawaan aakun ni, ki beenin nyani timi. Ti pak ke u ga ki nyan timi. <sup>11</sup>Ni mu aah mee Uwumbor tii timi pu na, ni ter timi la. Binib aah mee Uwumbor tii timi ki wiir pu na, le u ga ḥa tinyoor ḥa ti pu.

Nima le binib pam ga doon Uwumbor tii timi.

### Pɔɔl aalandak aah kpeln pu na

<sup>12</sup>Ti kpa kipupuk; ba pu? ti nyi tisui ni ke ti bi chain. Timi aabimbin bi mbamɔm Uwumbor aah ban pu na. Binib aalan le aa cha ti bi mbamɔm, Uwumbor aaterm pu, le cha ti bi mbamɔm joo cha dulnyaa wee ni aanib wɔb, ki moo bi mbamɔm joo cha niwɔb. <sup>13</sup>Ti yaa ɻmee kigbaŋ tii nimi kan, ti ɻmee tibɔr ti gbii na baanja la. Ni ga ɻmaa karn ti, ki bee ti mɔmɔk aatataa. M kpa limakl ke ni ga bee ti mɔmɔk doo. <sup>14</sup>Dandana ni bee timi aabimbin ngem aah bi pu na. M kpa limakl ke bundaln Tidindaan Yesu ga gir ni na, ni ga sil bee ke ni ga li ɻmaa kpa kipupuk ti pu, ke ti mu aah ga li kpa kipupuk ni pu pu na.

<sup>15-16</sup>Maah nyi kina na, le m nan ban ke m puen mann nimi. Maah nan cha Masedonia aatiŋ ni na, m nan ban ke m dii ni ki nan mann nimi, le ki nin buen nima; m yaa ti ki gir ni kan, m ki dii ni ki nan mann nimi, ki ter nimi nfum mulee, aan ni mu ter mi m buen Judea aatiŋ ni. <sup>17</sup>Maah nan len ke m ga dan na, maa len fam la; maah dak ke m ga ḥa pu na, ni ye ke m dii binib aalan la aa? Ni dak ke m ye unii u aalandak kpeln yɔl yɔl na la aa? <sup>18</sup>Uwumbor aah ye mbamɔndaan na, ti mu aa kpeln timi aalandak yɔl yɔl.

<sup>19</sup>M ni Silfanus ni Timoti nan tuk nimi Uwumbor Aajapɔɔn Yesu Kristo aabor. Uma le aa ye unii u aalandak kpeln yɔl yɔl na. U ɻjani waah len pu na n-yoonn mɔmɔk. <sup>20</sup>U pu, le Uwumbor gbiin waah puu tipuur ti wiir na mɔmɔk. Nima pu na, u pu le ti bui ke, “Amii,” le ki nyuŋ Uwumbor. <sup>21</sup>Uwumbor le ter ti ni nimi ke ti dii Kristo mbamɔm, ki lee timi ke ti tun waatuln. <sup>22</sup>U daan timi ke uma le yeh timi, ki di Waafuur Nyaan ḥa tisui ni, ke u mɔk timi waah ga tii timi pu na n-yoonn mu choo na.

<sup>23</sup> M puu Uwumbor ke m len mbamɔn la; maa nan ban ke m kae nimi, nima le cha m nan len ke maan dan ni chee Korint aatiŋ ni n-yoonn ngbaan. <sup>24</sup> Taa joo nimi mpɔɔn; naah gaa Yesu ki kii mbamɔm na, le ti ban ti ter nimi ni li kpa mpopiin. Timi aatuln le na.

**2** M nan di ḥa nsui ni, ke maan ki dan ni chee ki nan tii nimi mpom̄biin. <sup>2</sup> Ba pu? nimi le ye binib bi tii mi mpopiin na. M yaa bii nisui kan, naan ki ḥmaa tii mi mpopiin. <sup>3</sup> Nima le cha m nan ḥmee kigbaŋ ngbaan tii ni nimi. Maa ban m dan ki nan li kpa mpombiin ni pu. Ni ye binib bi ba ga ḥmaa ḥa mi mpopiin na la. M nyi nimi aabimbin, ke m yaa kpa mpopiin kan, ni mu ga li kpa mpopiin. <sup>4</sup> Maah nan ḥmee kigbaŋ ngbaan m tii nimi na, nsui nan bii sakpen. M nan wii pam. Maa nan ḥmee kigbaŋ ngbaan ke m tii nimi mpombiin, m nan ban ke ni bee maah gee nimi sakpen pu na la.

### Di cha pinn unii u tun si taani na

<sup>5</sup> Ni ponn ni ubaa yaa tun titunwanbir ki bii nsui kan, naa ye nsui baanja le u bii, ni mɔmɔk aasui le u bii. M mu aa ban ke m len tibɔr ngbaan ki ti chaar jer. <sup>6</sup> Ni ponn ni pam aah kii ki daa utafal pu na, nima le ḥeer. <sup>7</sup> Dandana ni ḥjan ke ni di cha pinn u, ki sɔŋ usui, u taa li kpa mpombiin ki ti chaar jer. <sup>8</sup> Nima pu na, m gaŋ nimi, ni cha u sil bee naah gee u pu na. <sup>9</sup> M nan ban m bee nimi aabimbin aah bi pu na, ke ni ga kii maamɔb mɔmɔk aan naan kii. Nima le cha m nan ḥmee kigbaŋ ngbaan tii nimi. <sup>10</sup> Ni yaa di cha pinn unii kan, m mu ga di cha pinn u. Maah di cha pinn u pu na, ni pu le m di cha pinn u, ki si Kristo aasisiyyaan. <sup>11</sup> M di cha pinn u, ke kinimbɔŋ taa nyaj timi; ba pu? ti nyi kaah ban ki bii timi pu na.

### Ilandak aah nan joo Pɔɔl pu na

<sup>12</sup> M nan buen Troas aatiŋ ni, m ti moon Kristo aabonyaan. Maah fuu ni na,

le Tidindaan tii mi nsan ke m tun waat-uln ngbaan. <sup>13</sup> Le maah kaa kan nna aabo Taitus nima chee na, maa ḥmaa fuur lii nsui ni. Nima le m Choi nima chee aanib, le ki siir buen Masedonia aatiŋ ni.

### Yesu Kristo pu le ti nyaŋni

<sup>14</sup> To, cha ti doon Uwumbor mbamɔm. N-yoonn mɔmɔk u cha ti nyaŋni kinimbɔŋ, Kristo aapɔɔn pu, ki cha ti buen ni kookoo, ki tuk binib waabor ke bi bee u. Waabor mɔ ke tulalee aah nu mɔ pu na. <sup>15-16</sup> Ti mu bi Uwumbor chee ke tulalee aayon mu nu mɔ na la; ba pu? Kristo bi tisui ni. Binib bi ḥmar na ḥjun waah nu mɔ pu na, ki kan limɔfal; ba pu? bi gaa u ki kii. Binib bi kaa ḥmar na mu ḥjun ki kan nkun; ba pu? baa gaa u ki kii. Ubaa ga ḥmaa tun Uwumbor aatuln ubaa pu uu? Aayii. <sup>17</sup> Ti mu aa mooni Uwumbor aabor ḥjimobil pu ke binib pam aah ḥjani pu na. Uwumbor le tun timi ke ti moon waabor. Nima pu le ti ye binib bi len mbamɔn na, ki mooni Uwumbor aabor unimbił ni, Kristo aapɔɔn pu.

### Ti ye tipuupɔln aatutum la

**3** Ni dak ke ti piin ke ti ki nyuŋ tibaa aa? Taa bi ke binib bibaa aah bi pu na, ki ban ke binib ḥmee kigbaŋ ki pak timi na, ti tii nimi. Ti ban ke ni ḥmee kigbaŋ ki pak timi ii? Aayii. <sup>2</sup> Nimi nibaa le ye kigbaŋ ki pak timi na ki ḥmee tisui ni. Ba pu? binib yaa lik nimi aabimbin aah bi pu na kan, bi ga bee ke ti mɔk nimi nsanyaan la. <sup>3</sup> Bi ga bee ke ni ye kigbaŋ ki ḥyan ni Kristo ni na, le u cha ti ḥmee ki. Taa nan di ngbammeemoon le ḥmee ki. Uwumbor u ye limɔfadaan na Aafuur Nyaaan le ḥmee ki. Ḫḥyameen ngbaan aa

ŋmee ŋitakpal pu,<sup>4</sup> ni ŋmee binib aasui ni la.

<sup>4</sup>Kristo pu, le ti kpa limakl kina, Uwumbor aanimbiin ni, nima le cha ti len kina. <sup>5</sup>Taa len ke ti ga ŋmaa ŋa ni-baa tibaa aapcōn pu. Timi aapcōn nyan ni Uwumbor chee la. <sup>6</sup>Uma le tii timi mpōon ke ti tuk binib waah puu tipu-upōln ti na. Taa tuk bi ke bi yaa kaa kii Moses aakaal mōmōk kan, bi ga kpo. Ti tuk bi ke Uwumbor Aafuur Nyaan le ga tii bi limofal. Ba pu? Moses aakaal mōk timi ke ti ŋeer nkun, Uwumbor Aafuur Nyaan le tii timi limofal.

<sup>7</sup>Moses aakaal nan ŋmee ŋitakpapan pu, ki nan fuu ni ni mpōon aafuuun la. Uwumbor aah nan cha Moses tii Israel yaab nkaal mu bi door na, Moses aanimbil wōb nan wiin chain, le binib aanimbil aa ŋmaa lik u. To, nkaal mu mōk timi ke ti ŋeer nkun na aah nan joo ni nwiihn kina na, <sup>8</sup>Uwumbor yaa tii timi Waafuur Nyaan kan, Nfuur Nyaan ngbaan ga li joo ni nwiihn ki ti jer kina. <sup>9</sup>Waah nan tii binib nkaal mu mōk bi ke baabor bii na, bi nan kan nwiihn mu deer binimbil na, le waah tii timi tibonyaan ti mōk timi ke timi aabōr ŋjan u chee na, tibonyaan ngbaan ga tii timi nwiihn ki ti jer kina. <sup>10</sup>Moses aakaal mu nan joo ni nwiihn na aa ki kpa nwiihn; ba pu? tibonyaan ngbaan aawiihn jer nwiihn ngbaan la. <sup>11</sup>Moses aakaal mu jer na yaa nan kpa nwiihn kan, tibonyaan ti ga li bi n-yoonn mōmōk na le kpa nwiihn ki ti jer kina.

<sup>12</sup>Taah kpa limakl tibonyaan tee pu na, nima le ti kpa lipobil ki len. <sup>13</sup>Taa bi ke Moses na. U nan di likekeln biin unimabil wōb, ke Israel yaab taa kan nkaal mu nan bi door na aah nan cha unimabil wōb wiin chain pu na. <sup>14</sup>Bitafal nan pōo. Bi yaa karn Uwumbor aagbakpok kan, baa beer naatataa ki nan saa dandana. Ba

pu? unii aan ŋmaa bee naatataa see u gaa Kristo ki kii. <sup>15</sup>Bi yaa karn Moses aakaal kan, baa beer naatataa ki nan saa dandana. <sup>16</sup>Unii yaa fenn ki dii Tidindaan kan, u ga bee naatataa. <sup>17</sup>Tidindaan ni Nfuur Nyaan ye Unibaan la. Nfuur Nyaan aah bi nin chee na, lifuur bi nima. <sup>18</sup>Ti mōmōk waa Tidindaan aah wiin chain pu na. Nibaa aa bi ki dok timi ke ti taa li waa u. Tidindaan u ye Nfuur Nyaan na le cha ti bi kpelni, ki naŋni u, ki moo wolni n-yoonn mōmōk, ke waah wiin chain pu na.

### Tibonyaan ti kpa mpōon na bi timi bi kaa kpa mpōon na aanjaal ni la

**4** To, Uwumbor aanimbaasaln pu, le u tii timi waatuln ke ti tun. Nima le timi aataakpab aa yōl. <sup>2</sup>Ti yii inimcōon aatuln, ni mbōmbōon aatuln, kaa ŋmanni binib, kaa kpelni Uwumbor aabōr. Ti bi Uwumbor aanimbil ni la. Nima le cha ti tuk binib waabōr mbamōm, aan bi mōmōk bee ke ti len mbamōm. <sup>3</sup>Binib bi kaa ŋmar na baanja le aa bee tibonyaan tee aatataa. <sup>4</sup>Kinimbōj ki joo dulnyaa aanib na le jōb binib bi kaa gaa Yesu ki kii na aanimbil, ke tibonyaan tee taa woln binimbil. Tibonyaan tee tuk timi Kristo aah ŋjan sakpen pu na. U ye Uwumbor aanaŋ la. <sup>5</sup>Taa mooni timi tibaa aabōr. Ti mooni Yesu Kristo aabōr la, ke uma le ye binib mōmōk Aadindaan. U pu le ti ye nimi aatutum. <sup>6</sup>Uwumbor u nan len ke “Cha nwiihn woln mbōmbōon ni” na,<sup>8</sup> uma le woln tinimbil, ke ti bee waah ŋjan sakpen pu na. Yesu Kristo aabimbin aah bi pu na le mōk timi Uwumbor aah ŋjan sakpen pu na.

<sup>7</sup>Timi bi kaa kpa mpōon na, Uwumbor di tibonyaan ti kpa mpōon sakpen na ŋa tinjaal ni, aan binib bee ke tibonyaan ngbaan aapcōn nyan Uwumbor chee, naa

<sup>4:3:3</sup> : Moses aakaal nan ŋmee ŋitakpal pu la. Lik Nnyam 24.12.

<sup>4:6</sup> : Lik Mpiin 1.3.

ye ti chee. <sup>8</sup> Limukl aabɔŋ le pii timi, ki mu aa nyaj timi. N-yoonn mbaa le timi aalan ŋmal, le ti tee kpa limakl. <sup>9</sup> Binib ŋjani timi falaa, le Uwumbor aa di cha timi. Bi lii timi kitij, ki mu aa ku timi.

<sup>10</sup> N-yoonn mɔmɔk binib dii timi ke bi ti ku timi, ke baah nan dii Yesu bi ti ku u pu na. Baah kaa ku timi na, nima le mɔk ke Yesu aamɔfal aapɔɔn bi ti ni. <sup>11</sup> Yesu pu, le binib ban bi ku timi n-yoonn mɔmɔk. Baah kaa ku timi na, nima le mɔk ke Yesu aamɔfal aapɔɔn bi timi bi ga kpo na ni. <sup>12</sup> Nkun dii timi la, le ni kan limɔfal.

<sup>13</sup> Tɔ, unii u nan ŋmee Uwumbor aalahnaa aagbaŋ na ŋmee ke u gaa Uwumbor ki kii, le ki len.

Uwumbor Aafuur Nyaan le cha ti mu gaa u ki kii kina, le ki len. <sup>\*\*</sup> <sup>14</sup> Ti bee ke Uwumbor u nan fikr Tidindaan Yesu nkun ni na, ga fikr timi bi mu kpaan Yesu chee na nkun ni, ki ga li joo timi ni nimi ki di buen ubaa chee. <sup>15</sup> Ni pu, le ti ji falaa ngbaan mɔmɔk. Binib bi gaa Uwumbor na yaa kpae kan, binib bi ga li dooni Uwumbor na mu ga li wiir, ki ga nyuŋ u.

### N-yoonn mu choo na aabor

<sup>16</sup> Nima le cha tiwon aa yɔl. Tiwon timina bi diŋni iwiin mɔmɔk la. Timi aawiin aapɔɔn kpae iwiin mɔmɔk la.

<sup>17</sup> Dandana aafalaa aan yunn, kaa wiir. Falaa ngbaan pu, le ti ga kan mpopiin ki ti nyaj, n-yoonn mu kaa kpa ndoon na. <sup>18</sup> Titafal aa bi tiwan ni ti waa ni na ni, titafal bi taah kaa waa tiwan ni na le ni. Taah waa tiwan ni na aan li bi n-yoonn mɔmɔk. Taah kaa waa tiwan ni na, nima le ga li bi n-yoonn mu kaa kpa ndoon na.

**5** Tɔ, ti nyi ke tiwon timina yaa kpo kan, tiwon ti ga li bi n-yoonn mu kaa kpa ndoon na bi paacham. Uwumbor le

toor tiwon ngbaan ki tii timi. <sup>2</sup> Taah bi dulnyaa wee ni na, le ti ji falaa, ki du. Tinimbil man ke ti kan timi aawon ti bi paacham na. <sup>3</sup> Ti yaa kan tiwon ngbaan kan, timi aawiin aan chuun mu ŋmeeen. <sup>4</sup> Ni ye mbamɔn, timi bi bi dulnyaa wee ni na, falaa muk timi, le ti du. Naa ye ke ti ban ke timi aawiin li chuun mujmeen. Ti ban ke ti kan tiwon ti bi paacham na. Ti ban ke ti di tiwon ti ga kpo na lii, ki kan tiwon ti ga li bi n-yoonn mu kaa kpa ndoon na. <sup>5</sup> Uwumbor le toor tiwon ngbaan tii timi, ki tii timi Waafuur Nyaan ke u mɔk timi ke u ga tii timi waah nan puu tipuur ti na.

<sup>6</sup> Nima le cha ti kpa lipobil n-yoonn mɔmɔk. Ti nyi ke taah laa bi dulnyaa wee ni buyoonn na, taa bi Tidindaan do paacham. <sup>7</sup> Ti dii gaakii aasan, <sup>††</sup> taa dii tiwan ni tinimbil waa ni na. <sup>8</sup> Le ti kpa lipobil. Ti yaa di tiwon timina lii, ki kun Tidindaan do paacham kan, ni ga li mɔ timi. <sup>9</sup> Ti yaa bi kitij do, bee ti yaa bi paacham kan, ti ban ke ti piir usui la. <sup>10</sup> Ba pu? ti mɔmɔk ga nan sil Kristo aanimbiin ni, aan u lik timi aabimbin aah bi pu na, ki bee ke ti tun ni ŋjan na, bee ni kaa ŋjan na dulnyaa wee ni, ki ga tii ti mɔmɔk taah tun pu na aapal.

### Yesu Kristo pu le ti ni Uwumbor kpaan

<sup>11</sup> Nima le cha ti san Tidindaan, ki sur binib ke bi li dii u. Uwumbor nyi timi aabimbin aah bi pu na. M dak ke ni mu nyi timi aabimbin. <sup>12</sup> Naa ye ke ti bi pak tibaa la. Ti ban ke ti tii nimi ŋjitaaj ŋji pu ni ga li kpa kipupuk ti pu na, aan ni bee naah ga kii pu ki len tii binib bi lik biken paacham, ki kpa kipupuk bi pu, kaa lik bisui ni na. <sup>13</sup> Bi yaa len ke ti waar kan, Uwumbor pu le ti bi kina. Ti yaa kpa laasaab kan, ni pu le ti kpa, ke ti ter nimi.

<sup>\*\*</sup>4:13 : Lik Ilahn 116.10.

<sup>††</sup>5:7 : Naatataa le ye ke: Ti ŋja naadii ke u bi, le ki dii waasan.

<sup>14</sup>Kristo aah gee timi pu na le junni ti-won ni, ki cha ti bi kina. Ti nyi ke uni-baan nan sil binib mɔmɔk aasisiiyaan ki gaa baakun ki kpo, nima le bi mɔmɔk kpo. <sup>15</sup>U nan kpo binib mɔmɔk pu, ke binib bi laa bi na taa ki ɣjani baageehn, bi li ɣjani waageehn; ba pu? u nan kpo bi pu ki fikr nkun ni.

<sup>16</sup>Taan ki lik unii ubaa paacham ke dulnyaa ni aanib aah lik pu na. N-yoonn mubaa ti nan lik Kristo kina la. Ti mu aa ki lik u kina. <sup>17</sup>Nima pu na, unii umɔk kpaan Kristo chee na, u ye unipoɔɔn la. Udaan aabimbipok jer a, ki kpeln mbimbipoɔɔn. <sup>18</sup>Mbimbipoɔɔn ng-baan nyan ni Uwumbɔr chee la. Kristo pu, le Uwumbɔr di timi kpaan ubaa chee, ke ti taa ki li ye waadim, ki tii timi lituln ke ti kpaan binib u chee. <sup>19</sup>Maah len pu na le ye ke Kristo aah nan kpo na, nima le tii Uwumbɔr nsan ke u di dulnyaa ni aanib kpaan ubaa chee, ki di cha baatunwanbir pinn bi. U di tichandaan aaliin imina ɣja tijaal ni, ke ti tuk binib.

<sup>20</sup>Ti sil Kristo aasisiiyaan, le ki gaŋni nimi. Ni bi ke Uwumbɔr ubaa le aah gaŋni nimi na. Ti gaŋni nimi ki tii Kristo, ke ni gir ni Uwumbɔr chee man. <sup>21</sup>Kristo aa nan tun titunwanbir tibaa. Timi aatunwanbir pu, le Uwumbɔr nan daa utafal. Timi bimɔk kpaan Kristo chee na, Uwumbɔr len ke timi aabɔr ɣjan.

**6** Timi bi kpaan Uwumbɔr chee ki tun waatuln na le gaŋni nimi, ni taa gaa Uwumbɔr aaterm yoli. <sup>2</sup>Uma Uwumbɔr le len ke,

“Naah ɣeer pu na, le m pel saameen. Bundaln ni ɣeer ke m gaa si lii na, le m ter si.”

Li pel man, din le ni ɣeer. Din le ye n-yoonn mu u ga gaa si lii na.<sup>##</sup>

<sup>3</sup>Taa ɣjani tiwan ni ga leŋ unii ubaa Uwumbɔr aasan ni na, aan ubaa taa len ke timi aatuln kpa taani. <sup>4</sup>Timi aabim-

bin aah bi pu na, nima le mɔk binib ke ti ye Uwumbɔr aatutum. Kinye pu? ti kan falaa, ni limukl, ni tibɔr, ki ji limɔr, ni mɔmɔk ponni. <sup>5</sup>Binib lue timi ɣjinaalab, ki laj timi tiyondir ponni, ki ɣjma tijar ti pu. Ti tun lituln linimaln, kaa geeni kinyeek, ki lann tijikaar. <sup>6</sup>Timi aabimbin bi chain la. Ti bee Uwumbɔr aabɔr, ki kpa limɔr, ni tibulchinn, ki gbii Uwumbɔr Aafuur Nyaan, ki gee binib mbamɔɔn, <sup>7</sup>ki tuk bi Uwumbɔr aabɔr ti ye mbamɔɔn na. Ti kpa Uwumbɔr aapoɔɔn. U len ke timi aabɔr ɣjan, nima le ye tijawan ti bi tijangii ni tijangan ni na. <sup>8</sup>Binib bibaa nyuŋni timi, bibaa mu seei timi. Bibaa bii timi, bibaa mu pak timi. Bibaa len ke ti ɣjmanni binib la. Le ti tee len ibamɔɔn. <sup>9</sup>Taa kpa liyimbil binib chee. Ti kpa liyimbil Uwumbɔr chee la. Nkun dii timi, le ti beenin bi. Uwumbɔr cha falaa pii timi, ki mu aa cha u ku timi. <sup>10</sup>Tisui bii la. Yesu pu, le ti kpa mpopiin n-yoonn mɔmɔk. Ti ye bigiim la, le ki ɣja binib pam biwankpadam Uwumbɔr chee. Taa kpa dulnyaa wee ni aawan nibaa, ti kpa paacham aawan mɔmɔk. Nimina mɔmɔk le mɔk ke ti sil ye Uwumbɔr aatutum.

<sup>11</sup>Nimi Korint aatiŋ aanib, ti tuk nimi tiponn ni aabɔr mɔmɔk. Ti gee nimi sakpen. <sup>12</sup>Naa ye ke timi le aa gee nimi. Ni ye ke nimi le aa gee timi. <sup>13</sup>M len nimi ke uja aah ga len waabim pu na. Ni li gee mi man, ke maah gee nimi pu na.

### Ni taa dii binib bi kaa dii Yesu Kristo na aasan

<sup>14</sup>Ni taa kpaan binib bi kaa gaa Yesu ki kii na chee man. Binib bi ɣjan na, ni binib bi kaa ɣjan na ga ɣjmaa kpaan tɔb chee ee? Nwiihn ni mbɔmbɔɔn ga li ɣjmaa kpaan bi ii? <sup>15</sup>Kristo ni kinimbɔɔn ga li ɣjmaa kpaan kimɔbaan aa? Unii u dii Yesu aasan na, ni unii u kaa dii na

aabimbin kpaan aa? <sup>16</sup>Uwumbor aadiik ni ɻiwa kaan aa? Naa kpaan. Timi le ye Uwumbor u ye limofadaan na aadiik. Uma ubaa le nan len ke,  
“M ga li bi maanib aasui ni, ki chuun bikaasisik ni.

M ga li ye Baawumbor, bi mu ga li ye maanib.”<sup>¶¶</sup>

<sup>17</sup>Nima le cha Uwumbor ki bui ke, “Nya binib bi kaa dii mi na ponn ni man, ki li bi nibaa,

ki di cha titunwanbir, le m ga gaa nimi.<sup>§§</sup>

<sup>18</sup>M ga li ye Nite; ni mu ga li ye njapotiib ni mbisatiib.\* Min Uwumbor u kpa mpcoon momok na, le len kina.”

**7** Maanigeekaab, Uwumbor aah puu tipuur tee ki tii timi na, cha ti di cha lituln li kaa ɻjan na momok, ni ilandak i kaa ɻjan na momok, ki li san u, ki li ye binib bi bi chain ki doo na.

### Pooł aapopiin

<sup>2</sup>Ni li gee timi man. Taa ɻja ubaa bakaa, ki mu aa bii ubaa, ki mu aa ji unii ubaa aawan. <sup>3</sup>Maa len kina ke m galn nimi. Maah tuk nimi pu na, ti gee nimi la. Ti yaa kpo, bee ti yaa bi kan, ti po gee nimi la. <sup>4</sup>M kpa lipobil sakpen le ki len nimi. M kpa kipupuk sakpen ni pu. Nsui ɻoŋ mbamɔm la. Timi aafalaa momok ponn ni, m kpa mpopiin ni pu ki ti nyarj.

<sup>5</sup>Tɔ, taah nan fuu Masedonia aatiŋ ni na, taa ɻjmaa fuur. Ti nan kan limulk, ɻjipepel momok ni. Binib nan kpak timi kinikpakpak. Nimi aabɔr mu pu le ilandak nan joo timi. <sup>6</sup>Uwumbor u ɻoŋni binib bi kpa mpombiin na aasui na, uma le cha Taitus fuu ni ti chee ki nan ɻoŋ tisui. Waah fuu ni na, nima le cha tisui ɻoŋ. <sup>7</sup>Naa ye nima baanja le ɻoŋ tisui. U

tuk timi nimi aabimbin aah ɻjan pu na. Nima le cha tisui ɻoŋ. U tuk timi ke ninimbil man ke ni ki kan mi, ke ni kpa mpombiin nimi aatunwanbir pu, ke ninimbil man ke ni kii maamɔb. Nima le cha m moo kpa mpopiin.

<sup>8</sup>Maah nan ɻmee kigbaŋ tii nimi na, kigbaŋ ngbaan nan bii nisui ni yunn pɔkaa. Nisui aah nan bii na, le ni gar mi. Dandana, naa ki gar mi. <sup>9</sup>M kpa mpopiin la. Naa ye ke nisui aah bii na le cha m kpa mpopiin. Nimi aapombiin le cha ni kpeln nimi aabimbin, nima le cha m kpa mpopiin. Uwumbor nan cha ni kpa mpombiin nimi aatunwanbir pu. Nima le kigbaŋ ki nan bii nisui na nan ɻja nimi tinyoor. <sup>10</sup>Ba pu? Uwumbor yaa cha unii kpa mpombiin waatunwanbir pu kan, nima le ga cha u kpeln waabimbin ki ɻjmar. Naan ki gar u. Tɔ, dulnyaa wee ni aapombiin joo ni nkun la. <sup>11</sup>Uwumbor aah cha ni kpa mpombiin pu na, ni kan naah ɻja nimi tinyoor pu na. Nitafal bi waabɔr ni. Ni gee linjuul titunwanbir pu, ki ban ni nyan nibaa tibɔr ngbaan ni, ki san Uwumbor ijawaan, ki ban ni ki kan mi, ki ban ni ɻja Uwumbor aageehn, ki ban ni daa unii u tun titunwanbir na aatafal. Naah ɻja kina na, ni mɔk ke naa kpa taani ubaa tibɔr ngbaan ponn ni.

<sup>12</sup>Maah nan ɻmee kigbaŋ ngbaan tii nimi na, naa ye unii u tun titunwanbir na pu le m nan ɻmee ki, kaa ye bakaa aah kan u na pu le m ɻmee ki. M nan ban ke Uwumbor mɔk nimi naah gee timi mbamɔm pu na. Nima le cha m ɻmee ki, <sup>13</sup>le tisui ɻoŋ ni pu.

Taitus aah nan bi ni chee na, le usui ɻoŋ nimi aabimbinaan pu, le ni ɻja u mpopiin. Nima le cha ti mu kpa mpopiin sakpen. <sup>14</sup>M nan pak nimi u chee, le naa jinn mi inimɔɔn. Taah tuk nimi tibɔr ti na

\*<sup>6:16</sup> : Lik Liifai Yaab 26.12; Jeremia 32.38; Esekiel 37.27.

\*\*<sup>6:17</sup> : Lik Aisaya 52.11.

\*<sup>6:18</sup> : Lik 2 Samuel 7.14; 1 Bibɔrb Aabor 17.13.

mɔmɔk, ti len mbamɔn la. Kina le taah nan pak nimi Taitus chee pu na, ti len mbamɔn. <sup>15</sup> U teer naah nan gaa u pu na, ki teer naah san u, ki pak waah len pu na, ki kii waamɔb. Nima le cha u moo gee nimi. <sup>16</sup> M bee ke ni ga li beenin ɔjani tiwan mɔmɔk mbamɔm. Nima le m kpa mpopiin ni pu.

### Naah ga tii Uwumbɔr ipiin pu na

**8** Tinaabitiib, ti ban ke ni bee Uwumbɔr aah ɔja tinyoor ɔja Yesu aanib bi bi Masedonia aatim ni pu na. <sup>2</sup> Bi nan kan falaa, ni ntɔŋ, ni igiin sakpen a. Le bi mu nan kpa mpopiin ki ti nyaj. Baagiin ponn ni, le bi nan kpa tibulchinn, ki tii Uwumbɔr ipiin sakpen. <sup>3</sup> M ga ɔjmaa ji seeraa ki tii bi, ke baah kpa tiwan ni na, bi tii u, ki jer kina. Baageehn pu, le bi tii, <sup>4</sup> ki gan timi ke ti gaa ipiin ngbaan, aan ki di tii Yesu aanib bi lann na. Ni mɔbi ke bi ter bi la. <sup>5</sup> Bi tii ki jer taah nan dak pu na. Njan, le bi di bibaa tii Tidindaan, le ki nin di bibaa tii ti mu, Uwumbɔr aageehn pu. <sup>6</sup> Nima pu na, Taitus aah nan cha ni piin ki bi too ɔjimobil ke ni tii Uwumbɔr na, le ti bui u ke u pɔɔn ubaa ki cha ni too ɔjimobil ngbaan ki doo. <sup>7</sup> Ni ɔja Yesu naadii, le ki bee waabɔr, ki ga ɔjmaa tuk biken. Ninimbil man waatuln pu. Le ni gee timi. Naah ɔjani tiwan nimina mɔmɔk ki ti chaar jer na, ni li nyi ki tii ipiin mu ki ti jer kina.

<sup>8</sup> Maah len pu na, naa ye ke m muk nimi ke ni tii. M tuk nimi ke Yesu aanib biken aanimbil man ke bi tii u ipiin, ke m bee ni mu aah gee u pu na. <sup>9</sup> Ni nyi Tidindaan Yesu Kristo aah kpa tibulchinn pu na. U nan ye uwankpadaan la. Nimi pu le u ɔja ugiin. Waah ɔja ugiin na, nima le cha ni mu ɔja biwankpadam.

<sup>10</sup> Cha m tuk nimi maalandak. Naah nan piin ki bi too ɔjimobil ɔji giina na, ni ɔjan ke ni too ɔji ki doo libiln lee. Ni

nan puen biken ki ban ke ni tii Uwumbɔr ipiin, ki nan puen piin ki bi too ipiin ngbaan. Pɔɔn nibaa man ki too i doo. Ninimbil nan man ke ni piin ki too ipiin ngbaan. <sup>11</sup> Cha ninimbil li man ke ni tii naah ga ɔjmaa tii pu na, aan ki too ipiin ngbaan doo. <sup>12</sup> Unii yaa gee ke u tii Uwumbɔr ipiin ki yaa tii u waah kpa pu na kan, Uwumbɔr ga gaa la. Uwumbɔr aa ban ke unii tii ki jer waah kpa pu na.

<sup>13</sup> Maa ban ke m ɔja nimi falaa ke m ter biken. M ban ke ni mɔmɔk ɔjan la.

<sup>14</sup> Maah len pu na le ye ke naah kpa sakpen pu dandana na, ni ɔjan ke ni ter binib bi kaa kpa na. Ni mu yaa nan lann daalbaadaal kan, bi yaa nan kpa sakpen kan, bi mu ga ter nimi. Kina le ni mɔmɔk ga ɔjan. <sup>15</sup> Ni ɔjme Uwumbɔr Aagbaŋ ni ke,

“Unii u nan kan sakpen na aa nan ji ki gur.

Unii u mu nan kan siib na aa nan lann.”<sup>†</sup>

### Taitus ni ɔjjeen aatɔtiib

<sup>16</sup> Ti, m doon Uwumbɔr u cha Taitus ban u ter nimi na ke ti mu aah ban ti ter nimi pu na. <sup>17</sup> Ti bui u ke u pɔɔn ubaa ki dan ni chee, le u kii. Unimbil man ke u dan, waageehn pu le u ga dan. <sup>18</sup> Le ti ga cha tina aabo ubaa mu dii u dan ni chee. Tina aabo ngbaan aah mooni Yesu aabɔnyaan pu na le cha Yesu aanib mɔmɔk pak u sakpen. <sup>19</sup> Bi mu ɔyan u ke u dii timi ke ti buen ti ter Uwumbɔr aanib bi ye bigiim na. Nima le ga nyuj Tidindaan, ki mɔk bi ke ti ban ti ter tɔb la.

<sup>20</sup> Ti ga li joo ɔjimobil sakpen ke ti tii bi. Taa ban ke unii ubaa bii timi ke ti gur tibaa ngem. <sup>21</sup> Tidindaan nyi ke ti ɔjani mbamɔm la. Ti ban ke binib mu bee ke ti ɔjani mbamɔm.

<sup>22</sup> Nima le ti ga tun tina aabo uken u mu dii Taitus mam ki dan ni chee.

<sup>†</sup>8:15 : Lik Nnyam 16.18.

N-yoonn mɔmɔk ti nan lik tina aabo ngbaan aabimbin aah bi pu na, ki kan ke unimbil man Uwumbɔr aatuln pu. U pak nimi ke ni ga ḥa maah ban pu na, nima le cha u moo ban ke u dan ni chee. <sup>23</sup> Binib yaa baa nimi Taitus aabor kan, ni tuk bi ke u ye maatutujeer u ter mi m tuk nimi Yesu aabɔnyaan na la. Ubaa yaa baa nimi tinaabitiib bi dii Taitus na aabor kan, ni tuk u ke bi ye Yesu aanib aatutum la. Baabimbinyaan pu, le binib nyujni Kristo. <sup>24</sup> Ni li mɔk bi ni Yesu aanib mɔmɔk naah gee Uwumbɔr aanib pu na, ki ter bi, ke taah nan pak nimi pu na.

### **Naah ga ter Yesu Kristo aadidiliib biken pu na**

**9** Maa ki ban m ḥmee kigbaŋ ki tuk nimi naah ga ter Yesu aanib bi bi Jerusalem ni pu na. <sup>2</sup> M nyi ke ni ban ni ter bi. M nan pak nimi Masedonia aanib chee, ki bui bi ke nimi bi bi Griis aatiŋ ni na nan ban ni ter Yesu aanib gi-na. Ninimbil aah man ke ni ter Uwumbɔr aanib pu na, nima le cha bi ponn ni pam mu ban bi ter bi. <sup>3</sup> Le m ban m cha tinaabitiib bimina buen ni chee, aan bi ti kan ke taah nan pak nimi pu na, ti gbii la. Ni ga li bi ke maah nan len pu na, ki gor ke ni too ḥimombil ngbaan. <sup>4</sup> Ni yaa kaa ye kina kan, Masedonia aatiŋ aanib bibaa yaa dii mi ki fuu ni ni chee, ki kan ke naa kee gor kan, ni ga jinn mi inimɔɔn, naa ye mi baanja aanimɔɔn, ti mɔmɔk aanimɔɔn. Ba pu? ti nan pak nimi bi chee. <sup>5</sup> Nima le m dak ke ni ḥan m gaj tinaabitiib bimina ke bi loln m pu nsan ki buen ni chee, ki ter nimi ni too ḥimombil ngbaan, naah nan puu tipuur ti na. M yaa fuu ni kan, m ga nan mui ni too ḥi ki doo. Nima le ga mɔk ke ni too ḥi, nimi aageehn pu, naa ye ke bi nan muk nimi le ni too ḥi.

<sup>6</sup> M tuk nimi la, unii u bun tijikaar siib na ga nan chee siib la. Unii u mu bun tijikaar sakpen na ga nan chee sakpen la. <sup>7</sup> Unii mɔmɔk aah di pu ḥa usui ni ke u ga tii ni na, cha u tii kina. U taa tii ni mpombiin, ki taa tii limukl aatiin. Ba pu? Uwumbɔr gee unii u tii ni mpopiin na la. <sup>8</sup> Uwumbɔr ga ḥmaa ḥa tinyoor mɔmɔk ḥa ni pu, aan ni taa lann nibaa. Ni ga li kpa ki gur, ki ga ḥmaa tii binib bimok lann na. <sup>9</sup> Ni ḥmee Uwumbɔr Aagbanj ni ke,

“Ubulchindaan tii bigiim sakpen,  
waaranjaa aa kpa ndoon.”‡

<sup>10</sup> Uwumbɔr u di ḥijikaabil di tii unii u bu tijikaar na, ki tii binib tijikaar bi ji na, uma le ga tii nimi naah ban pu na mɔmɔk, ki jer kina, aan ni moo ter binib biken. <sup>11</sup> Ni yaa moo ter binib kan, Uwumbɔr le ga moo tii nimi. Naah ga tii timi ipiin ke ti tii biken na, nima le binib pam ga doon Uwumbɔr ipiin ngbaan pu. <sup>12</sup> Ni yaa ter Yesu aanib ki tii bi baah lann pu na kan, nima le binib pam ga doon Uwumbɔr mbamɔɔm. <sup>13</sup> Ni yaa ter bi kan, nima le ga mɔk bi ke ni gaa Kristo aabɔnyaan ki kii, ki kpa tibulchinn, ki yakr naah kpa tiwan ni na tii bima, ni biken mɔmɔk. Nima le ga cha bi nyuj Uwumbɔr, <sup>14</sup> ki mee u tii nimi, ki li gee nimi, Uwumbɔr aah cha ni kpa tibulchinn sakpen pu na. <sup>15</sup> Cha ti doon Uwumbɔr u tii timi Ujapɔɔn u jer ipiin mɔmɔk na man.

### **Pɔɔl aah len waatuln aabor pu na**

**10** Min Pɔɔl mbaa gajni nimi la. Ni ponn ni bibaa len ke maah nan bi ni chee na, maa kaar nimi, ke m yaa bi nibaa chee kan, m kpa lipobil ki ḥmee kigbaŋ ki sur nimi. Min Pɔɔl bi suuna ke Kristo aah bi pu na, ki gajni nimi ke ni toor nimi aabimbin man, <sup>2</sup> aan m yaa fuu ni ni chee kan, m taa chiin ni ponn

‡9:9 : Lik Ilahn 112.9.

ni bibaa. M nyi ke m yaa fuu ni ni chee kan, m ga ɣmaa li kpa lipobil ki chiin binib bi len ke ti dii dulnyaa ni aanib aah dii pu na.<sup>3</sup> Ni ye mbamɔɔn ke ti po ye binib la. Ni mu aa ye binib aajaak le ti jaa,<sup>4</sup> ki mu aa di binib aapɔɔn le jan kijaak ngbaan. Ti di Uwumbɔr aapɔɔn mu bii kinimboj aapɔɔn mɔmɔk na le jan ki. Ti len ki nyaj binib bi kpak Uwumbɔr aabɔr kinikpapkak na,<sup>5</sup> ki nyaj binib bi kpa kalmbaani ki dak ke bi kpa nlan ki jer Uwumbɔr na. Ti cha ilandak mɔmɔk kii Kristo aamɔb.<sup>6</sup> Ti yaa bee ni ponn ni binib bi ga kii Uwumbɔr aaməboln na, le ti ga ɣmaa daa binib bi gur kaa kii na aatafal.

<sup>7</sup> Tɔ, ni lik binib paacham la aa? Ubaa yaa bi ni ponn ni ki len ke u ye Kristo aanii kan, cha u teer ke ti mu ye Kristo aanib ke waah ye pu na la.<sup>8</sup> Tidindaan tii mi tininkpir ke m ter nimi ni dii u mbamɔɔn, waa tii mi tininkpir ngbaan ke m bii nimi. M yaa puk kipupuk ki jer maah ba ga puk pu na kan, maan ji inimɔɔn.<sup>9</sup> Ni taa li dak ke m ban m ɣmee kigbaŋ ki ga li kpa nimi ijawaan na.<sup>10</sup> Bibaa len ke m ɣmee tigbann ke mpoɔndaan na, ke m yaa bi ni chee kan, maa pɔɔ, maaliin aa bi tibɔr tibaa ni.<sup>11</sup> Cha binib ngbaan aaboln bee ke ti yaa ɣmee kigbaŋ ponn ni taah ga ḥa pu na kan, ti yaa fuu ni kan, ti ga ḥa kina la.

<sup>12</sup> Taa ban ke ti di tibaa ḥaj binib bi voor bibaa paacham na, kaa ban ke ti len ke ti ye bi ponn ni bibaa. Baa kpa nlan. Bi lik tɔb aabimbin aah bi pu na, ki ḥajnji bibaa la.<sup>13</sup> Tima kan, taan li kpa kipupuk ki ladr taah tun lituln pu na. Ti ga li kpa kipupuk Uwumbɔr aah siin lituln li ki tii timi na pu. Taah nan tuk nimi waaliin na, nima le ye lituln ngbaan ponn ni ngem.<sup>14</sup> Ti nan puen biken ki fuu ni ni chee ki tuk nimi Kristo aabɔnyaan tee. Taah ḥani kina na, ti po

tun lituln li Uwumbɔr siin timi na la.<sup>15</sup> Taa ban mpakm biken aatuln pu. Ti kpa limakl ke ni ga moo dii Yesu aasan mbamɔɔn, ki ga ter timi ke ti tun Uwumbɔr aatuln sakpen, waah siin li pu ki tii timi na.<sup>16</sup> Le ti ga ɣmaa buen ntim mu daa ki jer nimi aatiŋ na, ki ti tuk binib tibɔnyaan tee. Taan buen biken aah tun lituln nin chee na, kaa ban ke bi pak timi biken aatuln pu.

<sup>17</sup> Uwumbɔr Aagbaŋ len ke, “Unii umɔk ban ke u puk kipupuk na, cha u puk kipupuk Uwumbɔr pu.”<sup>18</sup> Unii yaa pak ubaa kan, nima le aa mɔk ke Uwumbɔr aanimbil gbiin u. Uwumbɔr yaa pak unii kan, nima le mɔk ke Uwumbɔr aanimbil sil gbiin u.

### Binib bi ban ke bi ɣmann Yesu aanib na aabɔr

**11** Tɔ, m yaa len kijɔrk aaliin siib kan, ni pɔɔn nibaa man ki li kpa limɔr m pu.<sup>2</sup> M gee nimi sakpen ke Uwumbɔr aah gee nimi pu na. Ni bi ke usapoɔn u kaa nyi uja na aah bi pu na, le m ban m di nimi tii Kristo, ni li dii uma baanja.<sup>3</sup> M san ijawaan ke binib ga ɣmann nimi, ni taa ki dii Kristo mbamɔɔn, ke kinimboj aah nan ɣmann Adam aapuu lif pu na.<sup>4</sup> Unii yaa fuu ni ni chee ki yaa tuk nimi tibɔr yayan ti kaa ye taah nan tuk nimi Yesu aabɔr ti na kan, ba ḥa ni ji limɔr u pu? Ba ḥa ni gaa tibɔr ti kaa ye Yesu aabɔnyaan, kaan cha ni kan Uwumbɔr Aafuur Nyaan na? Taah nan tuk nimi Yesu aabɔnyaan tee na, tibɔr ngbaan le nan cha ni kan Uwumbɔr Aafuur Nyaan.

<sup>5</sup> Binib bi ɣmanni ke bi ye Yesu aak-pambalb na, maa dak ke bi jer mi.<sup>6</sup> Nibaakan, maan ɣmaa len ke unii u bae mbaem sakpen na aah len pu na. M mu nyi Yesu aabɔr mbamɔɔn, ki ḥeer ti mɔmɔk tuk nimi, binib aanimbil ni.

<sup>10:17</sup> : Lik Jeremia 9.24.

<sup>7</sup> M nan sunn mbaa taab ke m yoor nimi paacham; kinye pu? m nan tuk nimi Uwumbor aabonyaan, kaa jin nimi kidaak. Maah ja kina na, ni kpa taani ii?

<sup>8</sup> Maah nan tuk nimi Uwumbor aabor na, Yesu aanib biken nan pa mi la. Ni naahn ke m nan yoor baamobil ngbaan ke m li joo ter nimi le na. <sup>9</sup> Buyoonn m nan bi ni chee ki lann maah ban pu na, maa muk nimi ke ni ter mi. Tinaabitib bi nyan Masedonia aatiij ni na nan joo ni maah ban tiwan ni na momok. Maah nan bi pu n-yoonn ngbaan na, m ga li beenin bi kina la, kaan muk nimi ke ni ter mi. <sup>10</sup> Kristo pu le m len mbamom, maan muk unii ubaa nibaa chee Griis aatiij ponn ni ke u ter mi. <sup>11</sup> Ba pu? Ni ye ke maa gee nimi le ki len kina aa? Uwumbor nyi ke m gee nimi la.

<sup>12</sup> M ga li beenin tuk nimi Yesu aabor, kaan ji nimi kidaak. Biŋmajmannim bi ji nimi kidaak na aan ɻmaa pak bibaa ki len ke bi bi ke taah bi pu na. <sup>13</sup> Binib ngbaan ɻmanni nimi la. Baa ye Kristo aakpambalb. Bi ɻmanni nimi ke bi tun waatuln, ki mu aa tun. <sup>14</sup> Baah ɻani kina na, ni taa cha ni gar nimi. Kinimbɔŋ kibaa ɻmanni ke ki ye Uwumbor aatuun u wiin chain na. <sup>15</sup> Kinimbɔŋ aatutum yaa ɻmanni ke bi ye bininyaam kan, ni taa cha ni gar nimi. Uwumbor ga daa bitafal baatuln aah ɻneer pu na.

### Pɔɔl aah ji falaa Yesu Kristo pu pu na

<sup>16</sup> M ki tuk nimi la, ni taa dak ke m ye ujɔr. Ni mu yaa dak ke m ye ujɔr kan, ni li kpa limɔr m pu, ki cha m mu pak mbaa siib. <sup>17</sup> Maah ga len pu na aa ye Tidindaan aabor aaboln. Maah ga pak mbaa pu na, m ga len ke ujɔr na la. <sup>18</sup> Binib pam le bi ki pak bibaa dulnyaa ni aawan pu. Nima le m mu ga pak mbaa. <sup>19</sup> Ni dak ke ni kpa nlan. Ba ja ni ji limɔr bijɔrb pu ki kpa mpopiin? <sup>20</sup> Maah len pu na le ye ke unii yaa chuu nimi tinaagbiir, bee u ji nimi aawan, bee u ɻmann nimi,

bee u kpa kalmbaani, bee u faa nimi kitapak kan, le ni kpa limɔr u pu. <sup>21</sup> Taah kaa muk nimi kina na, le ni bii timi, ke taa kpa mpɔɔn aa?

Unii ubaa yaa kaar ke u pak ubaa kan, m mu kaar kina la. M len ke ujɔr na la. <sup>22</sup> Biŋmajmannim ngbaan ye Hiibru yaab la aa? M mu ye. Bi ye Israel yaab la aa? M mu ye. Bi ye Abraham aayaabitib la aa? M mu ye. <sup>23</sup> Bi ye Kristo aatutum la aa? M mu ye ki jer bi. M ja nimi gafara la, m len ke ujɔr na la. M nan tun Kristo aatuln ki jer bi, ki koo tiyondir ponn ni ki jer bi. Kristo pu, binib nan gbaa mi ɻjinaalab ki ti chaar jer. M nan kani linimaln, naa nan pɔɔ ke m kpo. <sup>24</sup> Nfum mujmu le Juu yaab gbaa mi linaalab nfum piitaa ni muwae. <sup>25</sup> Rom yaab nan gbaa mi ɻjidabil nfum mutaa la. Binib nan mae mi ɻjatakpal nfum mbaa la. Nfum mutaa le iŋɔi liin nnyusakpem ni ki cha mi. Kinyeek kibaa ni nwimɔn le m nan bi likpaln pu nnyusakpem ni. <sup>26</sup> M nan chuun ɻjisachun n-yoonn momok, ki kani linimaln nnyun ni, le ki kani linimaln bififiirb chee, le ki kani linimaln maanib Juu yaab chee, le ki kani linimaln binib bi ɻmann ke bi ye Yesu Kristo aanib na chee. <sup>27</sup> M tun Yesu Kristo aatuln linimaln, ki kani falaa, kaa geeni kinyeek. Nkon ni nnyunyuu mɔk nan joo mi. M nan lann tijikaar. Tiwoor nan joo mi. Maawanpeenkaan aa nan fuu tiwoor ngbaan. <sup>28</sup> Naa ye falaa umina baanja le m kan. Ilandak joo mi iwiin momok Yesu aanib momok pu. <sup>29</sup> Ubaa yaa kaa kpa mpɔɔn kan, ni yɔl m mu aawon la. Ubaa yaa tɔŋ uken ke u tun titunwanbir kan, ni fiini maajuuul la.

<sup>30</sup> To, m yaa puk kipupuk kan, m ga puk kipupuk maadabur aabor pu la.

<sup>31</sup> Tidindaan Yesu Aate Uwumbor, u yeh mpakm n-yoonn mu kaa kpa ndoon na,

uma le nyi ke m len mbamɔn la. <sup>32</sup> Maah nan bi Damaskus aatiŋ ni, Ubɔr Aretas aayoomn na, le kitij ngbaan aaninkpel nan ban u chuu mi, le ki cha waatɔb aa-jab si kii kitij na aabisamɔb chee, ke bi nan chuu mi. <sup>33</sup> Le njɔtiib di mi ḥa kibɔɔkuuk sakpeŋ ni, ki ti di mi laan takolu u bi kitij ngbaan aagoln pu na, le m nyan unjaal ni.

### Pɔɔl aah kan tibɔkpiirkaan ti na

**12** See m puk kipupuk. Ni mu aa kpa tinyoor. M ga tuk nimi Tidindaan aah mɔk mi lijinjiir aawan pu ki kpiir tibɔr ti tuk mi na. <sup>2</sup> ḥibin kipiik ni ḥin-naa le Uwumbɔr nan yoor mi buen udo paacham. M nyi u di maawiin baanja le buen aan u di maawiin ni nwon mɔk le di buen. Uma le nyi. <sup>3</sup> M po nyi ke Uwumbɔr yoor mi buen paacham, Paradais<sup>§</sup> ni. <sup>4</sup> Le m jun tibɔr ti maan ḥamaa tuk unii ubaa na. Uwumbɔr aa kii ke m len ti. <sup>5</sup> Lijinjiir aawan ngbaan pu, le m ga puk kipupuk. Maan pak mbaa, m ga puk kipupuk maadabur aabor pu la. <sup>6</sup> M yaa ban m puk kipupuk kan, maan le ye ujɔr; ba pu? m ga len mbamɔn la. M mu aan puk kipupuk. Ba pu? maa ban ke unii ubaa pak mi ki jer maah neer pu na. M ban ke bi lik maabimbin aah bi pu na, ki pel maah len pu na, le ki bee maah bi pu na.

<sup>7</sup> Tɔ, Uwumbɔr aah nan mɔk mi lijinjiir aawan sakpen pu na, waa ban ke m yoor mbaa paacham lijinjiir aawan ngbaan pu. Nima le u cha limukl li nyan ni kinimbɔŋ chee na muk mi. Limukl ngbaan wu mi ke nkokon aah saa tiwon kan, ni wu pu na. <sup>8</sup> Le m mee Tidindaan nfum mutaa ke u nyan mi limukl ngbaan ni. <sup>9</sup> Le waa kii, le ki bui mi ke waaterm le ga cha m nyaj limukl ngbaan; ba pu? unii u kaa kpa mpɔɔn na ga li kpa waapɔɔn mbamɔm. Le m kpa

mpoppiin ki kpa kipupuk maadabur aabor pu, aan ki li kpa Kristo aapɔɔn. <sup>10</sup> M yaa kan idabur, ni ḥisiibil, ni falaa, ni limukl, ni tibɔr, Kristo pu kan, le ni mo mi; ba pu? maah kaa kpa mbaa aapɔɔn buyoonn na, le m kpa Kristo aapɔɔn.

### Pɔɔl aatafal aah bi Korint aatiŋ aanib ni pu na

<sup>11</sup> Ni yaa ba pak mi kan, ni ba ga li ḥjan. Naah kaa pak mi na, nima le cha m pak mbaa ke ujɔr na. M yaa kaa bi tibɔr tibaa ni kan, binib bi ḥmanni ke bi ye Yesu aakpambalb na aa jer mi. <sup>12</sup> Maah nan bi ni chee na, m nan tun lijinjiir aatun Uwumbɔr aapɔɔn pu, ki nan kpa limɔr n-yoonn momok. Nima le mɔk ke m ye Yesu aakpambalb mbamɔm. <sup>13</sup> Yesu aanib biken jer nimi kinye? Maah kaa muk nimi ke ni tii mi nibaa na le cha bi jer nimi ii? Nimina yaa kpa taani kan, m ḥa nimi gafara la.

<sup>14</sup> Tɔ, dandana wee, m gor ke m dan ni chee taataa. Maan li ban nibaa ni chee. M ban nimi la, naa ye nimi aamombil. Mbim aa kpiini tetiib, tetiib le kpiini mbim. Ni bi ke maabim na la. <sup>15</sup> Nima le ni mo mi ke m di mbaa tii nimi, ki tun lituln linimaln ke m ter nimi. M yaa moo gee nimi kan, nimi aageehm bar la aa?

<sup>16</sup> Ni ye mbamɔn, maa nan ḥani nimi falaa ke ni tii mi nibaa. Le ni ponn ni bibaa len ke m nan ḥmanni nimi, ki jin nimi aawan. M jin nimi aawan kinye? <sup>17</sup> Maah nan cha binib buen ni chee na, bi ponn ni ubaa nan jin nimi aawan ki tii mi ii? Aayii. <sup>18</sup> M nan gaŋ Taitus ke u buen ni chee, le ki cha tina aabo uken mu dii u. Taitus jin nimi aawan nibaa aa? Aayii. Ti kpaan nlandak mubaa la. Maah ḥani pu na, u mu ḥani kina la. Ti momɔk dii kitaabuk kibaa la.

<sup>19</sup> Ni dak ke ti len ke ti nyan tibaa tibɔr ni la aa? Taa ḥani kina kpala. Ti

<sup>§</sup>12:3 : Paradais ye Uwumbɔr do paacham la.

bi Uwumbor aanimbiin ni, ki len Kristo aah ban pu na. Maanigeekaab, ti ban ke ti ter nimi ke ni moo dii Uwumbor aasan mbamom. Nima le cha ti len.<sup>20</sup> M san ijawaan ke m yaa fuu ni ni chee kan, naah bi pu na aan li mo mi, m mu aah ga li bi pu na aan li mo nimi mu. M san ijawaan ke m ga nan mui ni bi kpak tób kinikpakpak, ki kpa lipiipoln tób pu, ki gee lipiul tób pu, ki yakr tób, ki sii tób, ki bii tób, ki kpa kalmbaani, ki njma tijar,<sup>21</sup> ke m yaa fuu ni ni chee ki kan ke ni ponn ni pam tun titunwanbir, ni tijøj aatuln, ki gør kidagook, ki njani tiwan ni kaa ñjan na, kaa kpeln nimi aabimbin kan, ni ga bii nsui sakpen. Le Maawumbor ga cha m ji inimcoen ni pu.

### Kookoo aasurm ni idoon

**13** Tø, m ga dan nan mann nimi taataa la. Ni yaa galn unii ubaan, maan gar nimi, see biseeraadam bilee, bee bitaa len.<sup>\*\* 2</sup> Maah nan mann nimi lelee na, m nan sur ni ponn ni bimok tun titunwanbir na. Dandana wee, maah kaa bi ni chee na, m ki sur bi ke maah nan sur bi njan pu na, ke m yaa fuu ni kan, m ga daa bitafal.<sup>3</sup> Nima le ga mok nimi ke Kristo le cha m len. Waa ye udabur ni chee, u kpa mpcoen ni chee.<sup>4</sup> U nan di waapcoen lii ki cha bi kpaa u ndøpuinkoo pu. Dandana, u fu Uwumbor aapcoen pu la. Timi bi mu kpaan u chee na aa kpa mpcoen. Ti mu aah kpaan u chee na, ti mu fu Uwumbor aapcoen pu, ki ga njmaa mok nimi mpcoen ngbaan.

<sup>5</sup> Ni lik nimi aabimbin aah bi pu na man, ke ni sil tii Yesu Kristo naadii aan

naa tii. Ni taa lik maabimbin aah bi pu na man, ni li lik nimi nibaa aabimbin aah bi pu na. Naa bee ke Yesu Kristo bi ni ni ii? U bi ni ni la; u yaa kaa bi ni ni kan, naa ye waanib mbamom.<sup>6</sup> M kpa limakl ke ni ga bee ke timi le ye waanib mbamom.<sup>7</sup> Ti mee Uwumbor tii nimi, ke ni taa tun titunwanbir. Naa ye ke ti ban ti mok nimi timi aabamom la. Ni yaa po dak ke taa ye Yesu aaniib mbamom kan, ti po ban ke ni tun lituln li ñjan na la.<sup>8</sup> Ba pu? taan njmaa di mpcoen mu Uwumbor tii timi na, ki leq tibonyaan tee. Ti ban ke tibonyaan ngbaan loln nsan la.<sup>9</sup> Ti yaa kaa kpa mpcoen, le nimi le kpa mpcoen kan, ni mo timi la. Le ti mee Uwumbor tii nimi ke ni toor nimi aabimbin.<sup>10</sup> M njmee kigbanj kee, ke maah kaa bi ni chee na, m yaa nan fuu ni ni chee kan, m taa chiin nimi, ki mok nimi maapcoen. Nima le cha m njmee ki. Tidindaan le tii mi tininkpir ke m ter nimi ni dii waasan mbamom. Waa tii mi tininkpir ngbaan ke m di bii nimi.

<sup>11</sup> Nnaabitib, tibor ti gur na le ye ke m ban m chøi nimi la. Toor nimi aabimbin man. Søj tób aasui man. Ni li kpa kimøbaan ni nsuudoon man, le Uwumbor u gee timi ki tii timi nsuudoon na ga li bi ni chee.

<sup>12</sup> Ni li dooni tób mbamom man.

Uwumbor aanib bimok bi do na dooni nimi.

<sup>13</sup> Tidindaan Yesu Kristo aanimbaasaln, ni Uwumbor aageehm, ni Waafuur Nyaan aamøbaan li bi ni momok chee.

---

<sup>\*\*13:1</sup> : Lik Ikaal 17.6; 19.15.

*Kigbaŋ ki Pɔɔl ŋmee ki tii*

## GALASIA YAAB

*na*

**1** <sup>1-2</sup> Min Pɔɔl ni nnaabitib bimɔk bi m chee na dooni nimi Yesu aanib bi bi Galasia aatim ni na. Yesu Kristo ni Tite Uwumbor u fikr u nkun ni na le ŋa mi waakpambal. Naa ye unibɔn le ŋa mi, kaa ye binib le di lituln ngbaan tii mi.

<sup>3</sup> Tite Uwumbor ni Tidindaan Yesu Kristo ŋa tinyoor ŋa ni pu, ki tii nimi nsuudoon.

<sup>4</sup> Tite Uwumbor aageehn pu, le Kristo nan kpo timi aatunwanbir pu, ke u nyan timi dulnyaa wee aatunwanbir ni. <sup>5</sup> Uwumbor le yeh mpakm n-yoonn mu kaa kpa ndoon na. Amii.

### Tibɔnyaan baan baanja le bi

<sup>6</sup> Kristo aanimbaasaln pu, le Uwumbor yin nimi ke ni dii u. Ni tee gar mi pam; ba pu? ni ban ni di Uwumbor lii mala, ki gaa tibɔyayan, <sup>7</sup> ti kaa ye tibɔnyaan na. Binib bibaa bi, ki muk nimi, ki ban bi kpeln Kristo aabɔnyaan tee. <sup>8</sup> Timi le yaa tuk nimi tibɔr ti kaa ye taah nan tuk nimi tibɔnyaan ti na, bee ni ti ki ye Uwumbor aatuun u nyan ni Uwumbor do na le tuk nimi tibɔyayan tee kan, cha Uwumbor puun lii u pu. <sup>9</sup> Taah nan tuk nimi pu na, m ki tuk nimi dandana wee, ke unii ubaa yaa tuk nimi tibɔyayan ti kaa ye naah nan gaa tibɔnyaan ti na kan, cha Uwumbor puun lii u pu.

<sup>10</sup> M ban m piir binib aasui le aan Uwumbor aasui? M ban ke binib pak mi ii? Aayii. M yaa ban ke binib pak mi kan, maa ba ga li ye Kristo aatutunn.

### Pɔɔl aah ŋa Yesu Kristo aatutunn pu na

<sup>11</sup> Nnaabitib, m ban ke ni bee ke maah nan tuk nimi tibɔnyaan ti na, taa nyan ni

binib chee. <sup>12</sup> Maa nan gaa ti binib chee. Unii ubaa aa di ti tuk mi. Yesu Kristo ubaa le kpiir ti tuk mi.

<sup>13</sup> Ni nan ŋjun maabimbin aah nan ye pu buyoonn m nan dii Juu yaab aasan na. M nan ŋa Uwumbor aanib falaa sakpen a, ki ban ke m kuln bi. <sup>14</sup> M nan dii Juu yaab aasan ki jer ŋjeen aatɔtiib ponn ni pam aah dii pu na. Nnimbil nan man tiyajatiib aakaal pu.

<sup>15</sup> Uwumbor aanimbaasaln pu, le u lee mi buyoonn baa nan kee ma mi na, le ki yin mi ke m dii u. <sup>16</sup> Waageehn pu le u kpiir Ujapɔɔn aah bi pu na mɔk mi, ke m buen ti tuk binib bi kaa ye Juu yaab na waabor. Waah ŋa kina na, le maa buen unii ubaa chee ki ti kpokl maah ga ŋa pu na, <sup>17</sup> kaa buen Jerusalem ki ti kpokl binib bi puen ye Yesu aakpambalb na chee. M nan buen Arabia aatiŋ ni ki ti bi nima mbaa ki mee Uwumbor, le ki nin gir buen Damaskus aatiŋ ni. <sup>18</sup> Ŋjin ŋjataa aah jer na, le m buen Jerusalem m ti mann Piita, ki nan bi u chee iwiin kipiik ni ijmu. <sup>19</sup> Maa nan ki kan Yesu aakpambal ubaa kpee, see Jems u ye Tidindaan aanaal na baanja.

<sup>20</sup> Maah ŋmee pu tii nimi na, Uwumbor nyi ke maa mɔn nnyamɔn.

<sup>21</sup> To, le m nyan Jerusalem, ki buen Siria aatiŋ ni, ni Silisia aatiŋ ni.

<sup>22</sup> N-yoonn ngbaan Kristo aanib bi nan bi Judea aatim ni na aa nan kee kan mi, kaa nyi mi. <sup>23</sup> Bi po ŋjun ke uja u nan ŋjani bi falaa na, dandana wee u chuun mooni tibɔnyaan ti u nan ban u bii ti na. <sup>24</sup> Nima le cha bi nyuj Uwumbor m pu.

### Pɔɔl ni Yesu Kristo aakpambalb biken

**2** Ŋjin kipiik ni ŋjinaa aah jer na, le m ni Banabas gir buen Jerusalem. Taitus mu nan dii timi. <sup>2</sup> Uwumbor nan tuk mi ke m buen Jerusalem. Nima le cha m buen. Le m ni Yesu aanib aaninkpiib kuun tob chee tibaa, le m neer tuk bi tibɔnyaan ti m mooni binib bi kaa ye

Juu yaab chee na; ba pu? m nan ban ke bininkpiib ngbaan kii maah tun Uwumbor aatuln pu na, maatuln taa bee fam.<sup>3</sup> Tɔ, Taitus u nan bi m chee na ye Griik aanii la. Le Yesu aanib aaninkpiib ngbaan aa muk u ke u gii uchakpaln.<sup>4</sup> Binib bibaa bi, ki ḥmanni ke bi dii Yesu Kristo, ki kpaan ti chee; bima le nan ban ke bi gii u. Bi kpaan ti chee ke bi lik taah gaa tibaa pu ki dii Yesu aasan kaa ki dii Moses aakaal na. Le bi nan ban ke bi muk timi ti ki dii Moses aakaal.<sup>5</sup> Le taa kii baah ban pu na kpala. Taa nan ban unii ubaa kpeln Yesu aabɔnyaan tee ki tuk nimi tibɔyayan.

<sup>6</sup> Yesu aanib aaninkpiib bi kpa liyimbil na, baah bi pu na, naa ye nibaa m chee; ba pu? Uwumbor aa pak ubaa kijer uken, binib ngbaan aa len ke m di tibor tibaa ki kpee maah mooni tibor ti na pu.<sup>7</sup> Bi bee ke Uwumbor lee mi ke m di Yesu aabɔnyaan tuk binib bi kaa ye Juu yaab na, ke waah nan lee Piita u ti tuk Juu yaab pu na.<sup>8</sup> Uwumbor u tii Piita mpɔɔn ke u ti tuk Juu yaab Yesu aabɔnyaan na, uma le tii m mu mpɔɔn ke m tuk binib bi kaa ye Juu yaab na.<sup>9</sup> Le Jems, ni Piita, ni Jɔnn, bi ye Yesu aanib aaninkpiib na, bee Uwumbor aah ter mi waatuln ponn ni pu na, le bi di bijaal tii m ni Banabas ke naabitiiib pu na, ki kii ke ni ḥjan ke ti buen binib bi kaa ye Juu yaab na chee, aan bi mu buen Juu yaab chee.<sup>10</sup> Bi nan ban ke ti li teer ki ter binib bi ye bigiim bi ponn ni na. M mu aanimbil man ke m ter bi.

### Pɔɔl aah kae Piita pu na

<sup>11</sup> Tɔ, Piita aah fuu ni Antiok aatiŋ ni na, le m kpak u; ba pu? u nan kpa taani la.<sup>12</sup> Bijab bi nan nyan ni Jems chee na aah kaa nan kee fuu ni buyoonn na, u nan ji binib bi kaa ye Juu yaab na chee tijikaar. Bijab ngbaan aah nan fuu ni na, le u nyan binib bi kaa ye Juu yaab na chee, kaa ki ji bi chee tijikaar; ba pu? u

nan san Juu yaab bi nyan ni Jems chee na ijawaan.<sup>13</sup> Le Juu yaab bi nan bi Antiok aatiŋ ni na mu ḥjan Piita aah ḥja pu na. Bi nyi tiwan ni ḥjan na, le kaa ḥjan ni. Hali bi nan cha Banabas mu yenn.<sup>14</sup> M nan kan ke baa dii Yesu aabɔnyaan mbamɔm. Le m tuk Piita bi mɔmɔk aanimbil ni ke, “Aa ye Juu aanii la. Aa yaa dii binib bi kaa ye Juu yaab na aah dii pu na, kaa ki dii Juu yaab aasan kan, ba ḥja aa muk binib bi kaa ye Juu yaab na ke bi dii Juu yaab aasan?”

### Gaakii pu le Uwumbor ga gaa binib lii

<sup>15</sup> Tɔ, ti ye Juu aamaal ni la. Taa ye binib bi kaa ye Juu yaab bi ye titunwanbirdam na;<sup>16</sup> le ti mu nyi ke unii yaa dii Moses aakaal kan, nima le aan cha Uwumbor len ke waabor ḥjan. Unii yaa gaa Yesu Kristo ki kii kan, nima le ga cha Uwumbor len ke waabor ḥjan. Le ti gaa Yesu Kristo ki kii; ba pu? taah gaa u ki kii pu na, nima le cha Uwumbor len ke timi aabor ḥjan, naa ye ke ti dii Moses aakaal mbamɔm le cha u len; ba pu? Uwumbor aan len ke unii ubaa aah dii nkaal ngbaan pu na le cha waabor ḥjan.<sup>17</sup> Taah kpaan Kristo chee ke ti ḥmar pu na, nima le mɔk ke timi Juu yaab ye titunwanbirdam ke binib bi kaa ye Juu yaab na mu aah ye pu na. Nimina mɔk ke Kristo ban titunwanbir aa? Aayii.<sup>18</sup> M nan yii Moses aakaal ki dii Yesu aasan la. M yaa ki dii nkaal ngbaan kan, nima le ga ḥja mi utunwanbirdaan.<sup>19</sup> Maa ki dii nkaal ngbaan ke unii u kpo na aah kaa ki dii pu na la. Ni naahn ke nkaal ngbaan aah ku mi le na. M yii nkaal ngbaan ke m li bi Uwumbor aah ban pu na la.<sup>20</sup> M nan kpo Kristo chee ndɔpuinkoo pu, le m mu beenin fu; naa ki ye min Pɔɔl le fu. Kristo le fu m ni. Uma Uwumbor Aajapɔɔn u gee mi ki nan kpo m pu na, uma le m gaa u ki kii, nima pu le m bi.<sup>21</sup> Maa yii Uwumbor aanimbaasaln. Maah len pu na le ye ke unii yaa bui ke waah dii Moses

aakaal na, nima le ga gaa u lii kan, u bui ke Yesu nan kpo fam le na.

### Nkaal bee gaakii

**3** Galasia aatiŋ aanib, bijɔrb, ŋma ŋmann nimi ke ni taa ki dii mbamɔn? Ti nan tuk nimi Yesu Kristo aah nan kpo ndɔpuinkoo pu pu na. Ni bi ke ninimbil aah kan le na.<sup>2</sup> Cha m baa nimi mbaan mbaa. Naah dii Moses aakaal na le cha ni gaa Uwumbor Aafuur Nyaan aan naah ŋun Yesu aabɔnyaan tee ki gaa u ki kii na le cha ni gaa?<sup>3</sup> Uwumbor Aafuur Nyaan aapɔɔn pu, le ni nan piin ki dii waasan. Ni ye bijɔrb ki dak ke ni ga ŋmaa dii u nimi nibaa aapɔɔn pu uu?<sup>4</sup> Uwumbor aah tun litukpaan ki tii nimi na, ni ye fam la aa? M mak ke laa ye fam.<sup>5</sup> Uwumbor nan tii nimi Waafuur Nyaan ki tun lijinjiir aatun nikaasisik ni. Naah dii Moses aakaal na le cha u ŋani kina aan naah ŋun Yesu aabɔnyaan tee ki gaa u ki kii na le cha u ŋani kina?

<sup>6</sup> Ni ŋmee Uwumbor Aagbaŋ ni ke, "Abraham nan gaa Uwumbor aamɔboln ki kii, kina pu na le Uwumbor gaa u ke u ye uninyaan u chee."<sup>††</sup> <sup>7</sup> Nimina mɔk timi ke binib bi gaa Uwumbor ki kii na, bima le ye Abraham aayaabitib.<sup>8</sup> Ni ki ŋmee Uwumbor Aagbaŋ ni ke Uwumbor nan bee ke binib bi kaa ye Juu yaab na ga nan gaa u ki kii ki ŋmar. Baah kaa nan kee gaa u ki kii buyoonn na, le u nan puen tuk Abraham tibɔnyaan tee, ki bui u, "Aa pu, le m ga ja tinyoor ja jinibol mɔmɔk pu."<sup>‡‡</sup> <sup>9</sup> Nima pu na, Uwumbor ga ja tinyoor ja binib bi gaa u ki kii na pu, ke waah nan ja tinyoor ja Abraham u nan gaa u ki kii na pu na.

<sup>10</sup> To, binib bimɔk dii Moses aakaal ke bi ŋmar na, Uwumbor aamɔpuur bi bi pu la. Ba pu? ni ŋmee Uwumbor Aagbaŋ ni ke, "Uwumbor aamɔpuur bi unii umɔk yii, kaa dii ikaal ni mmɔkmumɔk bi Nkaal aagbaŋ ni na pu la."<sup>¶¶</sup> <sup>11</sup> Ni ye mbamɔn la, unii yaa dii Moses aakaal kan, nima le aan cha Uwumbor len ke waabor ŋan. Ni ŋmee Uwumbor Aagbaŋ ni ke, "Unii yaa gaa Uwumbor ki kii kan, Uwumbor ga len ke udaan ngbaan aabor le ŋan, uma le ga kan limɔfal li kaa kpa ndoon na."<sup>§§</sup> <sup>12</sup> Moses aakaal bi, le ki cha naadii mu bi. Nkaal ngbaan len ke unii u dii mu mbamɔn na ga li kpa limɔfal.\*

<sup>13</sup> Ti bii nkaal ngbaan la, nima le Uwumbor aamɔpuur bi ti pu. Le Kristo nyan timi mmɔpuur ngbaan ni; kinye pu? u nan kpo ndɔpuinkoo pu ki di mmɔpuur ngbaan di tun uma ubaa aayil pu, ke baah nan ŋmee Uwumbor Aagbaŋ ni pu na ke,<sup>†</sup> "Unii umɔk bi kpaa u ndɔpuinkoo pu na, Uwumbor aamɔpuur bi u pu la."<sup>14</sup> Uwumbor nan ja tinyoor ja Abraham pu. Le Yesu Kristo nan kpo ti pu ke binib bi kaa ye Juu yaab na mu kan tinyoor ngbaan. Le ti yaa gaa Yesu ki kii kan, ti ga gaa Uwumbor Aafuur Nyaan, waah nan puu tipuur ti ke u ga tii timi na.

### Nkaal na, ni tipuur ngbaan

<sup>15</sup> Nnaabitib, m ga di binib aabor ki di jaŋ Uwumbor aabor aah bi pu na la. Unii yaa puu tipuur, ki ŋmee waayimbil ti pu kan, ubaa aan ŋmaa kpeln ti, kaan ŋmaa ja ti fam.<sup>16</sup> Uwumbor nan puu tipuur tii Abraham ni uyaabil la. Waa len ke uyaabitib, kaa len ke kinipaak,

<sup>††3:6</sup> : Lik Mpiin 15.6; Rom Yaab 4.3.

<sup>‡‡3:8</sup> : Lik Mpiin 12.3.

<sup>¶¶3:10</sup> : Lik Ikaal 27.26.

<sup>§§3:11</sup> : Lik Habakuk 2.4.

<sup>\*3:12</sup> : Lik Liifai Yaab 18.5.

<sup>†3:13</sup> : Lik Ikaal 21.23.

u len ke unibaan la. U nan len ke uyaabil la.<sup>‡</sup> Uma le ye Kristo. <sup>17</sup> Maah len pu na le ye ke Uwumbor nan puu tipuur, ki puu ke u ga sil ja kina [Kristo pu]. Njibin ikui inaa ni njibin piitaa aah jer na, le u tii binib nkaal. Nkaal ngbaan aa ja tipuur ngbaan fam. <sup>18</sup> Tipuur ngbaan pu le Uwumbor nan ja tinyoor ja Abraham pu. Nima le mok ke u ga ja tinyoor ja ti mu pu, tipuur ngbaan pu. Naa ye ke ti dii nkaal ngbaan le ga cha u ja tinyoor ja ti pu.

<sup>19</sup> Ni yaa ye kina kan, ba pu Uwumbor nan tii binib nkaal ngbaan? U nan tii bi nkaal ngbaan ke bi bee titunwanbir aah ye pu na. U ban ke nkaal ngbaan li bi ki nan saa buyoonn Abraham aayaabil<sup>¶</sup> ga fuu ni na. Abraham aayaabil ngbaan le Uwumbor nan puu tipuur ngbaan tii u. Uwumbor nan cha waatuuntiib di nkaal ngbaan tii Moses, ke u dii binib. <sup>20</sup> Uwumbor nan cha waatuuntiib ni Moses le tii binib nkaal ngbaan. Uwumbor ubaa le nan puu tipuur na ki tii Abraham.

### Nkaal ngbaan aatuln

<sup>21</sup> Moses aakaal kpak Uwumbor aah puu tipuur ti na aa? Aayii. Nkaal ngbaan yaa ba jmaa tii timi limofal kan, nkaal ngbaan pu le ti ba ga jmar. <sup>22</sup> To, Uwumbor Aagban len ke dulnyaa ni aanib mɔmɔk ye titunwanbirdam la, ke Uwumbor aah nan puu tipuur ti na, u ga ja tinyoor ja binib bi gaa Yesu Kristo ki kii na pu. Binib bi gaa u ki kii na, bima le u ja tinyoor ja bi pu.

<sup>23</sup> Buyoonn Yesu aa nan kee fuu ni na, Moses aakaal nan dii timi ki nan saa buyoonn Yesu nan dan dulnyaa ni na ke ti gaa u ki kii. <sup>24</sup> Nkaal ngbaan nan ye ukikiir ki kii timi, ki nan saa buyoonn Yesu fuu ni na, aan ti gaa u ki kii le ki

jmar. <sup>25</sup> Dandana wee Yesu le ti gaa ki kii. Moses aakaal aa ki joo timi.

<sup>26</sup> Nimi bimok gaa Yesu Kristo ki kii na, u pu le ni ye Uwumbor aabim. <sup>27</sup> Baah nan muin nimi nnyun ni, Kristo aayimbil pu na, ni gaa Kristo aabimbin la. <sup>28</sup> Naah kpaan Yesu Kristo ni na, ni mɔmɔk ye unibaan la. Juu yaab ni binib bi kaa ye Juu yaab na, ni binaagbiib ni mmaal aabim, ni bijab ni bipiib, ni mɔmɔk ye unibaan la. <sup>29</sup> Ni ye Kristo aanib la. Nima le ni ye Abraham aayaabitib. Le ni ni u ga kan tiwanyaan ni Uwumbor nan puu tipuur ke u ga tii nimi paacham na.

**4** Maah len pu na le ye ke ubo u ga ji lifaal na le yeh ute aawan mɔmɔk; le waah laa ye ubo buyoonn na, waa jer unaagbijja. <sup>2</sup> U bi waaninkpiib ni bimɔmɔkb aanjaal ni, ki nan saa nwiiin mu ute siin na. <sup>3</sup> Ti mu bi kina la. Buyoonn taa nan kee nyi Yesu aabɔr na, dulnyaa aawanbir nan joo timi tinaagbiir la. <sup>4</sup> Naah nan neer n-yoonn mu na, le Uwumbor nan tun ni Ujapɔɔn. Upii le nan ma u. Juu yaab aakaal le nan joo u, <sup>5</sup> ke u gaa binib bi dii nkaal ngbaan na lii, aan Uwumbor ja timi waabim.

<sup>6</sup> Taah ye Uwumbor aabim na, le Uwumbor tun ni Ujapɔɔn Aafuur Nyaaan tisui ni. Muma le cha ti yin Uwumbor ke Tite. <sup>7</sup> Nima pu na, saa ki ye unaagbijja. Aa ye Uwumbor aabo la. Saah ye waabo na, aa ga kan waah puu tipuur ti na [Kristo pu].

### Pɔɔl aatafal aah bi Galasia yaab ni pu na

<sup>8</sup> Buyoonn naa nan kee nyi Uwumbor na, jiwaa ji kaa ye Uwumbor na nan joo nimi tinaagbiir la. <sup>9</sup> Dandana wee, ni nyi Uwumbor, le u mu nyi nimi. Ba ja ni ban ni labr ki ki dii dulnyaa aawanbir mu kaa

<sup>‡</sup>3:16 : Lik Mpiin 12.7.

<sup>¶</sup>3:19 : Abraham aayaabil ngbaan ye Yesu la.

kpa mpɔɔn, kaa ḷmaa ter nimi na? Ba ḷna ni ban ke tiwanbir ngbaan ki li joo nimi tinaagbiir? <sup>10</sup> Ni joo nwiiñ aakpaakool, ki joo uŋmal mu aakpaakool, ki joo libiln mu aakpaakool la. <sup>11</sup> M nan tun Uwumbor aatuln linimaln nikaasisik ni. Le ni muk mi nsui ni, ke nibaakan maatuln ga nan ḷja yoli la.

<sup>12</sup> Nnaabitiib, m nan di ḷikoobil ngbaan mɔɔmɔk lii, ke m li bi ke naah bi pu na. M ganji nimi ke ni mu li bi ke maah bi pu na, ki taa ki dii ḷikoobil ngbaan. Ni ye mbamɔn la, naa ḷja mi bakaa ubaa. <sup>13</sup> Idabur nan joo mi. Ni nyi ke idabur ngbaan nan tii mi nsan ḷjan ke m dan nan tuk nimi Yesu aabɔnyaan. <sup>14</sup> Le ni ḷja mi tibulchinn, kaa lik mi fam, kaa yii mi ke m ye iween aanii. Ni nan gaa mi ke naah ba ga gaa Uwumbor aatuun, bee Yesu Kristo pu na. <sup>15</sup> Ni nan kpa mpopiin m pu la. Mpopiin ngbaan ki bi la chee dandana wee? M nyi ke ni yaa ba ga ḷmaa lokr nimi aanimbil ngbaan ki di tii mi kan, ni ba ga lokr ḷji tii mi. <sup>16</sup> Dandana wee, maah sur nimi ki tuk nimi mbamɔn na, nima le cha m kpalm nimi aadin aa?

<sup>17</sup> Binib bi tuk nimi tibɔyayan na, binimbil man ni pu la. Baabɔr mu aa ḷjan. Bi ban ke bi nyan nimi Yesu aasan ni. Bi ban ke ninimbil li man bi pu, aan ni dii bi. <sup>18</sup> Binib aanimbil yaa man nsanyaan pu kan, nima le ḷjan. Ni ḷjan, maah bi ni chee buyoonn na, ki ḷjan maah kaa bi ni chee buyoonn na mu. <sup>19</sup> Maabim, ni wu mi ke imalween aah chuu upii kan, ni wu pu na, ki nan saa buyoonn ni ga chikr Kristo aasan ni na. <sup>20</sup> M ban ke m li bi ni chee dandana wee, ki kpeln maamɔboln; ba pu? nlan ḷmal nimi aabɔr pu la.

### Sara ni unaagbiipii Hagar aamɔkl

<sup>21</sup> Nimi bi ban ni dii Moses aakaal na, naa nyi nkaal ngbaan aah len pu na

aa? <sup>22</sup> Uwumbor Aagbañ len ke Abraham nan kpa japɔtiib bilee. Unaagbiipii nan ma ubaa, mmaal aabo mu ma uken. <sup>23</sup> Unaagbiipii ngbaan ma kan, u po ma ubijabo binib aah ma pu na la. Mmaal aabo ma kan, Uwumbor le nan puu tipuur tii u ke u ga maa ubijabo, le u ma u. <sup>24</sup> Bipiiib bilee ngbaan aabɔr kpa ḷjita la. Unaagbiipii u bi nan yin u ke Hagar na nan ma nnaagbiibim la. Hagar aabɔr ḷjan Moses aakaal la; ba pu? Moses aakaal joo binib tinaagbiir la. Uwumbor nan tii Moses nkaal ngbaan Sainai aajool paab. <sup>25</sup> Sainai aajool bi Arabia aatiq ni la. Hagar aabim mu nan bi nima la. Jerusalem aatiq ki bi dulnyaa ni na naahn unaagbiipii Hagar la; ba pu? Jerusalem aanib ye binaagbiib la. Moses aakaal le joo bi tinaagbiir. <sup>26</sup> Le Jerusalem aatiq ki bi paacham na aanib ye mmaal aabim. Timi le ye waabim. <sup>27</sup> Ni ḷmee Uwumbor Aagbañ ni ke, “Upii u kaa ma mbim na, u li kpa mpopiin.

Imalween aah kaa chuu upii u na, u li tar mpopiin ngbaan pu; ba pu? upii u aachal yii u na aabim wiir ki jer upii u kpa chal na aabim.”<sup>§</sup>

<sup>28</sup> Nnaabitiib, ti bi ke mmaal aabijabo Aisak aah nan bi pu na la; ba pu? Uwumbor aah puu tipuur ti na le cha ti ye waabim. <sup>29</sup> N-yoonn ngbaan unaagbiipii aabijabo nan muk mmaal aabijabo Aisak u bi nan ma u Uwumbor Aafuur Nyaan aapɔɔn pu na. Dandana wee, ni bi kina la. Binib bi dii Juu yaab aakaal na muk timi bi ye Uwumbor aabim Waafuur Nyaan aapɔɔn pu na la. <sup>30</sup> Uwumbor Aagbañ len kinye? Ki len ke Uwumbor nan bui Abraham, “Nyan unaagbiipii na ni waabo; unaagbiipii aabo na aa kpa nsan u ji lifaal mmaal aabo na chee.”\*\* <sup>31</sup> Nnaabitiib, maah len pu na le ye ke taa

§4:27 : Lik Aisaya 54.1.

\*\*4:30 : Lik Mpiin 21.10.

ye unaagbiipii aabim, ti ye mmaal aabim la.

### **Yesu Kristo aah gaa timi lii pu na**

**5** Kristo nan gaa timi lii, ke ti taa ki li bi tinaagbiir ni. Nima pu na, ni li si mbamom, ki taa cha tiwan nibaa ki li joo nimi tinaagbiir.

<sup>2</sup> Ni li pel mbamom, min Poo le tuk nimi ke ni yaa gii lichakpaln ke ni ɻamar kan, Kristo aan ɻa nimi tinyoor. <sup>3</sup> Unii umok gii uchakpaln ke u ɻamar na, m ban m ki sur u ke Moses aakaal momok dii u la. <sup>4</sup> Nimi bi ban ke ni dii Moses aakaal ke ni ɻamar na, ni yakr Kristo chee la, ki di Uwumbor aaterm lii a. <sup>5</sup> Uwumbor Aafuur Nyaan bi ti ni. Le ti gaa Yesu ki kii. Nima le cha ti kii bundaln Uwumbor ga nan len ke timi aabor ɻan na. <sup>6</sup> Ti yaa kpaan Yesu Kristo ni kan, lichakpangeei aa ye tibokpaan. Unii yaa kaa gii kan, ni mu aa ye tibokpaan. Ti yaa gaa Yesu ki kii, ki mu yaa gee binib kan, nima le ye tibokpaan.

<sup>7</sup> Ni nan dii Yesu mbamom la. ɻoma kiir nimi ke ni taa ki kii waabor ti ye mbamom na? <sup>8</sup> Binib bi kiir nimi na aabor aa nyan ni Uwumbor u yin nimi na chee. <sup>9</sup> Boroboro aanyok siib le cha boroboro momok duuni. <sup>10</sup> To, naah ye Tidindaan aanib na le m bee ke naan dii nnyamom aamokm. Ntafadaan ga pii binib bi muk nimi na.

<sup>11</sup> Nnaabitib, binib bibaa len ke m tuk binib ke bi li geei ɻichakpan aan ki ɻamar. Ti yaa gbii kan, ba pu Juu yaab beenin ɻani mi falaa? Ti yaa gbii ke m tuk binib ke bi li geei ɻichakpan aan ki ɻamar kan, Yesu aadpoinkoo aabor aa ba ga cha Juu yaab gee lijuul. <sup>12</sup> Cha binib bi muk nimi lichakpangeei pu na lee nyan bibaa ajawan.

<sup>13</sup> Nnaabitib, Uwumbor yin nimi ke u nan gaa nimi lii la. Waah gaa nimi lii

na, ni taa ki li ɻani nimi aabimbikpok aah ban pu na. Ni li gee tɔb ki li ter tɔb. <sup>14</sup> Uwumbor aakaal mbaa len ke, “Aa li gee aana aabo ke saah gee aabaa pu na.”<sup>††</sup> Aa yaa joo nkaal ngbaan kan, Uwumbor aakaal momok le aa joo.

<sup>15</sup> Ni mu yaa kpa lipiipoln ki kpak tɔb kinikpakpak kan, ni li nyi, ni ga kuln tɔb.

### **Nfuur Nyaan ni unibon aabimbin**

<sup>16</sup> M tuk nimi la, cha Uwumbor Aafuur Nyaan le joo nimi man, ki taa ɻani nimi aabimbikpok aah gee pu na. <sup>17</sup> Timi aabimbikpok aah ban pu na le kpak Uwumbor Aafuur Nyaan aah ban pu na. Uwumbor Aafuur Nyaan aah ban pu na mu kpak timi aabimbikpok aah ban pu na. Timi aabimbikpok ni Uwumbor Aafuur Nyaan ye tɔb aadim la. Nima le cha ni pɔɔ ke ni dii mbamom naah ban pu na. <sup>18</sup> Ni yaa dii Uwumbor Aafuur Nyaan aah ban pu na kan, Moses aakaal aa dii nimi.

<sup>19</sup> Mbimbikpok aatuln bi lipaal la. Binib bi dii kina na le gor kidagook, ki tun tijɔŋ aatuln, ni inimɔɔn aatuln, <sup>20</sup> ki dii ɻiwaa, ki chuun ji inyɔk, ki nan binib, ki ban tibor, ki kpa lipiipoln, ki kpa lijuul, ki kpa kukumɔŋ, ki kpak tɔb kinikpakpak, ki yakr tɔb, <sup>21</sup> ki kpa ini-man, ki ku binib, ki nyu ndaan gbii, ki gbiir bidagbiib aagbiir, ki tun lituln limina mok aaboln. M ki sur nimi ke maah nan sur nimi n-yoonn mu jer na pu na, ke binib bi ɻani kina na aan koo Uwumbor aanaan ni.

<sup>22</sup> Uwumbor Aafuur Nyaan le cha binib gee tɔb, ki kpa mpopiin, ni nsuudoon, ni limɔr, ni tibulchinn, ni mbimbinyaan, ni ibamɔn, <sup>23</sup> ki bi suuna, ki chur bibaa. Nkaal aa bi ki ga kpak binib bi ɻani kina na. <sup>24</sup> Binib bi ye Yesu Kristo aanib na, bi yii baabimbikpok aah ban pu na momok, ki di mbimbikpok ngbaan kpaa Yesu aadpoinkoo pu.

<sup>††</sup>5:14 : Lik Liifai Yaab 19.18.

<sup>25</sup>Ti kpa limɔfal Uwumbɔr Aafuur Nyaan pu. Nima pu na, cha Nfuur Nyaan ngbaan le joo timi. <sup>26</sup>Ti taa li kpa kalm̄baani, ki taa muk tɔb, ki taa li kpa lipi poln tɔb pu.

### Ni li ye tɔb aatutum

**6** Nnaabitiiib, bi yaa pii unii titunwan-  
bir ni kan, nimi bi nyi Uwumbɔr  
aasan mbamɔm na, ni li bi suuna ki ter u  
ke u ki dii mbamɔm, ki li lik aabaa, kin-  
imbor taa tɔŋ aa mu. <sup>2</sup>Kii Kristo aakaal  
mbamɔm man, ki li ter tɔb nimi aamuk  
ponn ni. <sup>3</sup>Unii u kaa bi tibɔr tibaa ni na  
yaa dak ke u ye uninyuun kan, u ɔmanni  
ubaa la. <sup>4</sup>Cha unii mɔmɔk dakl lik ke  
waatuln ɔnan aan laa ɔjan. Li yaa ɔjan kan,  
u ga li kpa mpopiin uma ubaa aatuln pu.  
U taa li kpa kipupuk ke waatuln ɔjan ki  
jer una aabo yaan. <sup>5</sup>Ba pu? unii mɔmɔk  
kpa uma ubaa aatuln la.

<sup>6</sup>Tɔ, binib bi bae Yesu aabɔnyaan na,  
cha bi yakr baah kpa ni na tii unii u mɔk  
bi tibɔnyaan ngbaan na.

<sup>7</sup>Tɔ, ni taa ɔmanni nibaa; ni taa dak  
ke ni ga ɔmaa ɔmann Uwumbɔr; tiwan  
ni aa bun na, nima le aa ga nan chee.  
<sup>8</sup>Maah len pu na le ye ke unii yaa ɔjani  
unibɔn aabimbin aah ban pu na kan, u ga  
kan nkun. Unii yaa ɔjani Uwumbɔr  
Aafuur Nyaan aah ban pu na kan, u ga  
kan limɔfal li kaa kpa ndoon na. <sup>9</sup>Cha ti  
tun litunyaan ki taa di cha; ba pu? ti yaa

kaa di cha kan, ni nan saa naayoonn kan,  
ti ga kan lituln ngbaan aanyoor. <sup>10</sup>Nima  
na, ti yaa kan nsan kan, ti li ɔjani binib  
mɔmɔk tijann. Binib bi gaa Yesu ki kii  
na, ti li ɔjani bima le tijann sakpen.

### Kookoo aasurm ni idoon

<sup>11</sup>Lik man, m di mbaa aajaal ɔjmee ke  
ni filk ki tii nimi. <sup>12</sup>Binib bi muk nimi  
ke ni li geei ɔjichakpan na, bi ban ke bi  
piir Juu yaab aasui, aan bi taa ɔja bi falaa  
Kristo aadɔpuinkoo aabor pu la. <sup>13</sup>Tɔ,  
binib ngbaan geei ɔjichakpan la; bima  
bibaa aa dii Moses aakaal mɔmɔk. Bi po  
ban ni li geei ɔjichakpan, aan bi li kpa  
kipupuk ke ni ɔja kina. <sup>14</sup>Mma kan, m  
ga li kpa kipupuk tiwan nibaa baanja le  
pu, nima le ye ke Tidindaan Yesu Kristo  
nan kpo ndɔpuinkoo pu. Waadɔpuinkoo  
pu, le dulnyaa wee ni aawan aa ki mɔ  
m chee, ntafal aa ki bi dulnyaa wee ni  
aawan ni. <sup>15</sup>Unii yaa dii Yesu Kristo  
aasan kan, lichakpangeei aa ye tibɔk-  
paan, unii yaa kaa gii kan, ni mu aa ye  
tibɔkpaan. Mbimbipoɔn le ye tibɔkpaan.  
<sup>16</sup>Binib bimɔk kii kina na le ye Uwumbɔr  
aanib, ki ye Israel yaab bamɔm. Uwum-  
bɔr tii bi nsuudoon ki san bi kinimbaak.

<sup>17</sup>Tɔ, ubaa taa ki muk mi; ba pu? binib  
aah gbaa mi na aabue bi nwon pu, ki mɔk  
ke m ye Yesu yoo.

<sup>18</sup>Nnaabitiiib, Tidindaan Yesu Kristo  
aaŋann li bi nisui ni. Amii.

*Kigbaŋ ki Pɔɔl ḷmee ki tii*

## EFESUS YAAB

*na*

**1** Min Pɔɔl, u ye Yesu Kristo aakpambal Uwumbor aageehn pu na, le ḷmee kigbaŋ kee tii Uwumbor aaninyaam bi bi Efesus aatiŋ ni, ki joo waasan mbamɔm, ki kpaan Yesu Kristo chee na.

**2** Tite Uwumbor ni Tidindaan Yesu Kristo ḷa tinyoor ḷa ni pu, ki tii nimi nsuudoon.

### **Uwumbor aah tii timi Waafuur Nyaan aanyoor pu na**

**3** Cha ti pak Uwumbor, u ye Tidindaan Yesu Kristo Aate na. Taah kpaan Kristo ni na, le Uwumbor ḷa tinyoor ḷa ti pu, ki tii timi Waafuur Nyaan aapiin mɔmɔk paacham. **4** Uwumbor aah kaa nan kee naan dulnyaa wee buyoonn na, le u nan nyan timi, Kristo pu, ke ti li ye waanib, ki li bi chain, ki taa li kpa taani ubaa unimbiin ni. U gee timi la. **5** Taah kpaan Yesu Kristo chee na, le Uwumbor ḷa timi waabim. N-yaayoonn na, u nan nyan timi ke ti li ye waabim. Nima le ye waageehn, ki ye waah ban pu na. **6** Waabogeehn pu le u ḷa tinyoor sakpen ḷa ti pu, nima le ti pak u ki nyuŋni u waabulchinn sakpenn pu.

**7** Kristo aasin pu, le Uwumbor gaa timi lii, ki di cha pinn timi, ki ḷa timi tibulchinn sakpen, **8** ki ḷa tinyoor sakpen ḷa ti pu, ki tii timi nlan mɔmɔk, ni mbeen mɔmɔk, **9** ki kpiir tibɔbɔrkaan ti u nan dak usui ni ke u ga ḷa ti na mɔk timi. Kristo pu le u kpiir ti. Waageehn le na. **10** Tibɔbɔrkaan ngbaan le ye ke ni yaa nan neer kan, u ga di tiwan nimɔk bi paacham ni taab na kpaan tɔb chee, ki ḷa ni kimobaan, ki ḷa Kristo ni mɔmɔk aayidaan.

**11** Uwumbor aah ḷjani tiwan mɔmɔk pu na, u ḷjani waageehn, waah dak pu na la. Taah kpaan Kristo ni na, le Uwumbor ḷa timi waanib. N-yaayoonn na, le u nan nyan timi ke ti li ye waanib. **12** U nyan timi bi puen kpa limakl Kristo pu na, ke ti li mɔk binib waah ḷjan sakpen pu na, aan bi pak u.

**13** Ni mu gaa Kristo ki kii la. Naah ḷjun Uwumbor aabor ti ye mbamɔn, ki ye tibɔnyaan ti cha ni ḷmar na, le ni gaa Kristo ki kii. Naah kpaan u ni na, le Uwumbor tii nimi Waafuur Nyaan, ke waah nan puu tipuur ti na, ki mɔk ke ni ye waanib la. **14** Waah tii timi Waafuur Nyaan na, nima le mɔk ke u ga tii timi waah puu tipuur ti na mɔmɔk, ki ga gaa timi bimɔk ye waanib na lii. Nima pu na, cha ti li pak u, waah ḷjan sakpen pu na.

### **Pɔɔl aah mee Uwumbor pu na**

**15** M ḷjun naah gaa Tidindaan Yesu ki kii, ki gee waanib mɔmɔk pu na, **16** nima le m dooni Uwumbor ni pu n-yoonn mɔmɔk, **17-18** ki teer nimi maameel ponn ni. Tite Uwumbor, u ye Tidindaan Yesu Kristo Aawumbor, ki yeh lisil mɔmɔk na aah woln ninimbil pu na, m mee u ke u tii nimi Waafuur Nyaan mu ga tii nimi nlan, ki kpiir Uwumbor aah bi pu na mɔk nimi na, aan ni bee u mbamɔm, ki bee waah yin nimi ki tii nimi limakl pu na, ki bee waah ga tii waanib paacham aawan ni mɔ sakpen na pu na, **19** ki bee ke u kpa mpɔɔn sakpen ki ti nyaj, ki tii timi bi gaa u ki kii na. Mpɔɔn ngbaan le ye mpɔɔn sakpiin **20** mu u nan di fikr Kristo nkun ni, ki di u kaan ujjangii wɔb paacham na. **21** Uma Kristo bi nima ki kpa mpɔɔn mu jer mpɔɔn mɔmɔk na: u kpa mpɔɔn jer inyɔk, ni ḷj-waa, ni bipɔníb aapɔɔn, ki kpa tininkpir jer tininkpir mɔmɔk, ki kpa mpɔɔn jer dindatiib aapɔɔn mɔmɔk. Waayimbil jer ḷiyimbil ḷjimɔk bi dandana wee na, ni ḷjimɔk ga li bi n-yoonn mu choo

na. <sup>22</sup>Uwumbor di tiwan mɔmɔk di ḥa uma Kristo aataapɔtan taab, ki ḥa u tiwan mɔmɔk aayidaan ki tii waanib. <sup>23</sup>Waanib le ye uma Kristo aawon, le u gbii bi, ki mu bi tiwan nimɔk bi ḥipepel mɔmɔk na ni.

### **Naah nyan nkun ni ki kan limɔfal pu na**

**2** U tii nimi limɔfal la. Ni nan tun titunwanbir, kaa nan kii Uwumbor aamɔb, nima le naa nan kpa limɔfal. <sup>2</sup>Ni nan dii dulnyaa aasan mu kaa ḥjan na, ki kii kinimboj ki ye tiwanbir mɔmɔk aayidaan na aamɔb. Kima le joo binib bi yi Uwumbor aamɔb na. <sup>3</sup>Ti mɔmɔk mu nan bi bi ponn ni, ki mu dii taah ban tiwan ni kaa ḥjan na pu na, ki ḥjani tisui ni tiwon aah gee pu na. Taah nan bi pu na le nan cha Uwumbor gee lijuul ti pu, ke waah gee lijuul titunwanbirdam biken pu pu na.

<sup>4</sup>Tɔ, Uwumbor mu kpa linimbaasaln sakpen, ki gee timi sakpen. <sup>5</sup>Taah nan tun titunwanbir na, taa nan kpa limɔfal. Taah kpaan Kristo ni na, le Uwumbor tii timi limɔfal. Waanimbaasaln pu le u gaa nimi lii. <sup>6</sup>Taah kpaan Yesu Kristo ni na, le Uwumbor kpaan yoor timi ni uma Kristo, ki cha ti ti kal u chee paacham. <sup>7</sup>N-yoonn mu choo na, nima le ga mɔk ke Uwumbor kpa linimbaasaln sakpen, ki gee timi ki ti nyaj, Yesu Kristo pu. <sup>8</sup>Naah gaa Yesu ki kii pu na, le ni ḥmar, Uwumbor aanimbaasaln pu. Naa ye nimi nibaa pu le ni ḥmar. Ni ye Uwumbor aapiin la. <sup>9</sup>Naa ye nimi aatunyaan pu le ti ḥmar, ubaa taa li kpa kipupuk. <sup>10</sup>Ti ye Uwumbor aawanaankaan la. Taah kpaan Yesu Kristo ni na, le Uwumbor ḥa timi binipɔm, ke ti li tun lituln li ḥjan na. U nan di lituln ngbaan siin kiir timi, ke ti nan tun li.

### **Nimi ni Yesu Kristo kpaan la**

<sup>11</sup>Nimi bi kaa ye Juu yaab na, Juu yaab yin nimi binib bi kaa geei ḥichakpan na, ki yin bibaa bichakpangeeb; ba pu? bi geei ḥichakpan. Ni teer man, naah nan bi pu n-yoonn mu jer na. <sup>12</sup>N-yoonn ngbaan, naa nan kpaan Kristo chee, kaa nan ye binib bi Uwumbor nyan bi na ponn ni bibaa, kaa nan bi tipuur ti Uwumbor nan puu tii bi na ni. Ni nan bi dulnyaa wee ni, kaa nan kpa limakl, kaa nan nyi Uwumbor. <sup>13</sup>Le dandana wee, naah kpaan Yesu Kristo ni na, nimi bi nan daa Uwumbor chee na duun u chee dandana wee, Kristo aasin pu. <sup>14</sup>Uma pu le kimɔbaan bi. U nan di timi Juu yaab, ni binib bi kaa ye Juu yaab na kpaan unibaan, ki gbaa wii ligoln li nan bi tikaasisik ni na. <sup>15</sup>Waah kpo na, u kuln kiduj ki nan bi ti ni bikaasisik ni na. U kuln Juu yaab aakaal ni baakoobil, ki di timi Juu yaab, ni binib bi kaa ye Juu yaab na kpaan ḥa linibopoln libaa, bi kpaan u ni na, nima le ti ḥa kimɔbaan. <sup>16</sup>Waah kpo ndɔpuinkoo pu na, u di timi ni bima, ki kpaan linibol libaa, ki giin bi Uwumbor chee, bi ni Uwumbor ti kpaan ki ḥa kijɔtiik. Waah ḥa kina na, le u kuln kiduj ki nan bi ti ni bikaasisik ni na. <sup>17</sup>Kristo nan dan ki nan tuk nimi bi nan daa Uwumbor chee na, ni Juu yaab bi duun u chee na, ke u ga ḥa nimi, ni Juu yaab, ni Uwumbor kijɔtiik. <sup>18</sup>Kristo pu, le binib bi ye Juu yaab na, ni binib bi kaa ye Juu yaab na mɔmɔk kpaani Uwumbor Aafuur Nyaan baan ni, ki dan Tite Uwumbor chee.

<sup>19</sup>Nima pu na, nimi bi kaa ye Juu yaab na aa ki ye biwɔwɔm ni bicham Uwumbor aanimbaasaln pu. Ni ye Uwumbor aanimbaasaln pu le ti li tun lituln li ḥjan na. U nan di lituln ngbaan siin kiir timi, ke ti nan tun li. <sup>20</sup>Nimi Yesu aanimbaasaln pu le ti li tun lituln li ḥjan na. Ni ye Uwumbor aanimbaasaln pu le ti li tun lituln li ḥjan na. U nan di lituln ngbaan siin kiir timi, ke ti nan tun li.

baan aatakpakpaan. <sup>21</sup> Uma pu le kidiik aawan mɔmɔk tɔŋ tɔb pu, ki ḥa kidiik ki bi chain na, ki tii u. <sup>22</sup> Naah kpaan u ni na, ni mu ye kidiik ngbaan aawan ponn ni nibaa, ki ḥa kidiik ki Uwumbor Aafuur Nyaan bi ki ponn ni na.

### Pɔɔl aah tuk binib bi kaa ye Juu yaab na tibɔnyaan pu na

**3** Nima pu na, min Pɔɔl mee Uwumbor tii nimi la. M ye Yesu Kristo aayom, nimi bi kaa ye Juu yaab na pu. <sup>2</sup> M dak ke ni ga li ḥun Uwumbor aah san mi kinimbaak pu ki cha m tuk nimi waah gee nimi pu na. <sup>3</sup> U nan kpiir tibɔbɔrkaan mɔk mi. M puun ḥmee ti kigbaŋ kee ponn ni siib. <sup>4</sup> Ni yaa karn maah ḥmee pu na kan, ni ga bee maah nyi Kristo aabɔbɔrkaan pu na. <sup>5</sup> Uwumbor aa nan kpiir tibɔbɔrkaan ngbaan mɔk n-yaayoonn na aanib. Dandana wee le Waafuur Nyaan kpiir ti, ki mɔk Yesu aakpambalb ni waabɔnabtiib bi bi chain na. <sup>6</sup> Tibɔbɔrkaan ngbaan le ye ke timi Juu yaab, ni nimi bi kaa ye Juu yaab ki gaa Yesu aabɔnyaan tee na, ga kpaan ki yakr Uwumbor aawanyaan, ki kpaan ki li ye Yesu Kristo aanib, ki kpaan ki li bi Uwumbor aah nan puu tipuur ti na ni, Yesu Kristo pu.

<sup>7</sup> Uwumbor aanimbaasaln pu, le u san mi kinimbaak ki ḥa mi tibɔnyaan tee aatutunn, ki tii mi mpɔɔn ke m tun lituln ngbaan. <sup>8</sup> Maa pii Uwumbor aaniwaatiir ubaa, le u mu tee tii mi litunyaan limina, ke m buen binib bi kaa ye Juu yaab na chee, ki ti moon tibɔnyaan tee, ki tuk bi Kristo aah ḥjan sakpen pu na, <sup>9</sup> ki kpiir tibɔbɔrkaan mɔk binib mɔmɔk, ke binib bi kaa ye Juu yaab na mu ga ḥmar. Uwumbor u nan naan tiwan mɔmɔk na le nan bɔr tibɔbɔrkaan ngbaan ki nan saa dandana. <sup>10</sup> U ḥa kina ke waatuuntiib bi bi paacham na yaa kan Juu yaab ni bi kaa ye Juu yaab na aah kpaan tɔb chee ki ḥa Yesu aanib pu na kan, bi ga bee uma Uwumbor aah kpa nlan mɔk aabɔŋ

pu na. <sup>11</sup> N-yaayoonn na le u nan len ke u ga ḥa kina Tidindaan Yesu Kristo pu.

<sup>12</sup> Taah gaa Yesu ki kii ki kpaan u ni na, nima le ti kpa lipobil ke ti dan Uwumbor chee ki nan doon u, ki taa li san ijawaan.

<sup>13</sup> Nima pu na, m gaŋ nimi, ke ni taa cha nitaakpab yɔl maah ji falaa ni pu pu na. Maafalaal le ye nimi aaterm.

### Yesu Kristo aah gee timi pu na

<sup>14</sup> Nima pu le m gbaan Tite Uwumbor aanimbiin ni. <sup>15</sup> Waah ye Tite na, nima le mɔk timi te aabimbin bamɔnn aah bi pu na. <sup>16</sup> Waah kpa mpɔɔn sakpen pu na, le m mee u ke u tii nimi mpɔɔn nisui ni, Waafuur Nyaan pu, <sup>17</sup> ki ki mee u ke Kristo li bi nisui ni, naah gaa u ki kii pu na, ki ki mee u ke ngeehm li bi ni chee mbamɔm, <sup>18</sup> ki ki mee u ke ni ni waanib mɔmɔk ḥmaa bee Kristo aah gee nimi sakpen ki ti ḥyan pu na. <sup>19</sup> Waah gee timi pu na jer unii aah ga ḥmaa bee pu na. M ban ke ni bee waah gee nimi pu na aan nimi aabimbin li bi ke waah bi pu na mbamɔm.

<sup>20</sup> Waapɔɔn aah bi tisui ni ki tun lituln pu na, u ga ḥmaa ḥja sakpen tii timi ki jer taah dak pu na bee taah ga mee u pu na. <sup>21</sup> Yesu Kristo aanib aah kpaan u ni na, bi li nyuŋni Uwumbor n-yoonn mɔmɔk ki ti saa dulnyaa wee aadoon, ki li nyuŋni u n-yoonn mu kaa kpa ndoon na. Amii.

### Tiwon aah kpaan pu na

**4** Min Pɔɔl, u bi kiyondii ki Tidindaan pu na, m gaŋni nimi, ni li dii mbamɔm. Uwumbor aah yin nimi ke ni li dii u pu na, ni li dii u kina. <sup>2</sup> Ni li sunni nibaa taab man, ki li bi suuna, ki li kpa suklaa n-yoonn mɔmɔk, ki li gee tɔb, ki li kpa limɔr tɔb pu. <sup>3</sup> Uwumbor Aafuur Nyaan aah kpaan nimi unibaan pu na, ni li pɔɔni nibaa man, ki li kpaan kimɔbaan, ki li beenin ye unibaan. <sup>4</sup> Timi Yesu aanib mɔmɔk kpaan ki ye tiwonbaan ti ye waawon na la. Uwum-

bɔr Aafuur Nyaan baan le bi. Uwumbɔr yin nimi ki tii nimi limakl libaa ke ni ga ŋmar.<sup>5</sup> Ti kpa Dindaan ubaa la, ki dii naadii aasan mubaa la. Bi muin nimi nnyun ni Dindaan ubaa aayimbil pu la.<sup>6</sup> Uwumbɔr ubaa u ye ti mɔmɔk Aate na mu bi. U ye ti mɔmɔk Aayidaan ki cha ti mɔmɔk tun waatuln la, ki bi ti mɔmɔk ni.

<sup>7</sup> Kristo yakr ipiin tii ti mɔmɔk waah ban pu na la.<sup>8</sup> Ni ŋmee Uwumbɔr Agbaŋ ni ke,  
“Waah buen paacham na u joo binaag-  
biib pam,

ki di ipiin tii binib.”\*\*

<sup>9</sup> Naah ŋmee ke u buen paacham na, ni mɔk ke u puen nyan ni paacham le ki sunn ni kitij kee pu, le ki nin ki gir buen paacham.<sup>10</sup> U sunn ni kitij kee pu na mu ye u buen paacham na, ki bi ŋjepel mɔmɔk, ki ye dul-nyaa wee mɔmɔk, ni paacham mɔmɔk Aayidaan.<sup>11</sup> Uma le tii binib ipiin. U nan nyan bibaa bi li ye waakpambalb, bibaa mu li ye waabɔnabiib, bibaa mu li mooni tibɔnyaan tee na, bibaa mu li ye waanib aaninkpiib, bibaa mu li ye waabɔr aamɔmɔkb.<sup>12</sup> Kristo le di binib ngbaan mɔmɔk tii timi waanib, ke bi toor timi aabimbin, ti ti tun waatuln, ki ter tɔb, aan ti mɔmɔk li dii u mbamɔm,<sup>13</sup> ki li kpaan kimɔbaan, uma u ye Uwumbɔr Aajapɔɔn na aasan ni, ki bee u mbamɔm, ki chikr waasan ni, ki li kpa mbimbinyaan ki ti doo, uma Kristo aah tii timi pu na.<sup>14</sup> Ti taa ki li ye mbim. Biŋmaj-mannim bi kpa nnyamɔn aalan ke bi di ŋmann binib na yaa tuk nimi tibɔyayan ti kaa ye Kristo aabɔr na kan, ni taa dii bi.<sup>15</sup> Ti li kpa ngeehm ki li len ibamɔn man, aan timi aabimbin mɔmɔk li moo naahn Kristo u ye timi Aayidaan na.<sup>16</sup> Kristo aah joo timi pu na, le ti mɔmɔk kpaan tɔb

chee, le ki tun ter tɔb waah tii ti mɔmɔk lituln pu na, aan ti mɔmɔk li moo dii u mbamɔm, ki li gee tɔb.

### Limɔfapɔln li bi Yesu Kristo ni na

<sup>17</sup> Ni taa li dii ke binib bi kaa nyi Uwumbɔr na aah dii pu na. Tidindaan aayimbil pu, le m len tibɔr timina. Baalandak mɔmɔk ye ilandak yɔli la.<sup>18</sup> Binimbil aa woln. Bitafal aah pɔɔ pu na, le baa nyi Uwumbɔr. Nima le baa kpa limɔfal li Uwumbɔr tii timi na.<sup>19</sup> Binimbil man kidagook ni tijɔŋ aatuln pu la. Baalandak aa ki muk bi titunwanbir pu.

<sup>20</sup> Kristo aa mɔk nimi ke ni dii kina.<sup>21</sup> M nyi ke ni ŋjun waabɔr ki bae waaliin i ye mbamɔn na.<sup>22</sup> Nima pu na, ni di cha nimi aabimbipok mu kaa ŋjan na. Mbimbipok ngbaan nan cha ni ban tiwan ni kaa ŋjan ki ŋmanni nimi na la. Ni taa ki li dii naah nan dii pu na man.<sup>23</sup> Cha Uwumbɔr kpeln nimi aasui aan ki ja nimi nsuupɔɔn,<sup>24</sup> ki yoor mbimbipok mu Uwumbɔr naan mu ki di tii nimi na. Mu ye mbimbinyaan, ki bi chain mbamɔm, ki naahn Uwumbɔr aabimbin la.

<sup>25</sup> Nima pu na, ni taa ki mɔni inyamɔn. Ni mɔmɔk li len ibamɔn tɔb chee. Ti yaa ŋmanni tɔb kan, ni naahn ke tiwon aawan nibaa le aah ŋmanni niken na.<sup>26</sup> Ni yaa gee lijuul kan, ni taa cha nimi aŋjuul ngbaan tun titunwanbir. Ni taa li beenin joo lijuul ngbaan nwiin ti lir,<sup>27</sup> ki taa tii kinimbɔŋ nsan.<sup>28</sup> Binaayukb taa ki su. Cha bi di biŋaal tun lituln li ŋjan na linimaln, aan ki kan baah ban pu na, ki tii bigiim mu.<sup>29</sup> Ni taa cha iliin i kaa ŋjan na nyan nimi aamɔi ni. Ni li len iliin i ŋjan na, i ga ter binib bi ŋjun na ke bi dii Uwumbɔr aasan mbamɔm.<sup>30</sup> Ni taa ŋjani tiwan ni ga tii Uwumbɔr Aafuur Nyaan mpombiin. Nfuur Nyaan ngbaan ye ki-

\*\*4:8 : Lik Ilahn 68.18.

¶4:26 : Lik Ilahn 4.4.

daan, le Uwumbor di daan nimi, ki mōk ke uma le yeh nimi. N-yoonn mbaa bi ki choo, u ga nan gaa nimi lii kookoo.<sup>31</sup> Ni taa cha niponn ni li to tōb pu; ni li nyani lijuul nisui ni; ni taa li ḥmōc tōb pu tijar; ni taa li seei tōb; ni taa cha kinanaq kibaa ki li bi ni chee.<sup>32</sup> Ni li ḥjani tōb tijann, ki li san tōb kinimbaak, ki di cha pinn tōb ke Uwumbor aah di cha pinn nimi, Kristo pu pu na.

### **Uwumbor aanib aabimbin**

**5** Naah ye Uwumbor aabigeehm na, pōok nibaa man, ki li bi ke waah bi pu na.<sup>2</sup> Cha ngeehm li bi ni chee man, ke Kristo aah gee timi pu, ki kpo ti pu, ki ḥja kitork ki piir Uwumbor aasui, ki ḥja ti ni Uwumbor kijɔtiik na.

<sup>3</sup> Naah ye Uwumbor aanib na, ni taa gor kidagoon, ki taa tun tijɔn aatuln libaa, ki taa li kpa iniman. Ni taa po len lituln limina aaboln aabor.<sup>4</sup> Ni taa len iliin i kaa ḥjan na, ni kijɔrk aaliin, ni yaasaraapoɔl aaliin. Iliin imina aaboln aa ye Yesu aanib aah len i na. Ni taa len kina. Ni li dooni Uwumbor man.<sup>5</sup> Ni po nyi ke unii umōk ye udagoor na, ni unii umōk ye tijɔndaan na, ni unii umōk ye unimandaan na, aan koo ni Kristo ni Uwumbor aanaan ni. Unii yaa kpa ini man kan, liwangol ye liwaal la, le u dii.

<sup>6</sup> Titunwanbir timina aaboln pu, le Uwumbor gee lijuul binib bi kaa kii waamōb na pu. Ni taa cha unii ubaa ḥmann nimi ki tuk nimi ke naa bir.<sup>7</sup> Ni taa dii binib bi tun kina na.<sup>8</sup> N-yoonn mbaa, ni mu nan bi mbombōon ni la. Dandana, naah kpaan Tidindaan ni na, ni bi nwiihn ni la. Naah bi nwiihn ni na, ni li bi mbamōm, ke nwiihn ni aanib aah bi pu na.<sup>9</sup> Binib bi bi nwiihn ni na, bi kpa mbimbinyaan, ki tun lituln li ḥjan na mōmōk, ki dii Uwumbor aabor ti ye mbamōn na la.<sup>10</sup> Pōok nibaa man, aan ki bee tiwan ni ga piir Tidindaan aasui na.<sup>11</sup> Ni taa kpaan binib bi bi mbombōon ni

ki tun yɔl yɔl na chee man. Ni tee li sur bi man.<sup>12</sup> Ti yaa po len baah tun lituln li libɔɔl ni na aabor kan, ni ye inimōon la.<sup>13</sup> Tɔ, tiwan mōmōk yaa nyan ni mpaan pu kan, le naabimbin ga kpiir chain; nwiihn le nyan ni tiwan mōmōk mpaan pu.<sup>14</sup> Nima pu le ti gaa ilahn ke, “Si u dɔ geen na, finn aan ki fikr nkun ni, le Kristo ga li wiin aa pu.”

<sup>15</sup> Nima pu na, ni li nyi man, ki li bi mbamōm. Ni taa li bi ke bijɔrb aah bi pu na. Ni li kpa laasaab man.<sup>16</sup> Ni li tun Uwumbor aatuln n-yoonn mōmōk, ki taa li ka fam; ba pu? titunwanbir wiir dandana wee la.<sup>17</sup> Nima pu na, ni taa li ye bijɔrb man. Pōok nibaa man ki bee Tidindaan aah ban ke ni ḥja pu na.

<sup>18</sup> Ni taa nyu ndaan ki gbii man. Ndaan ga bii nimi la. Cha Uwumbor Aafuur Nyaan li gbii nimi n-yoonn mōmōk,<sup>19</sup> ki li gaa Uwumbor aalahni ilahn i bi waagban ni na tōb chee man, ki li yikr tiwanyikrkaan, ki gaa ilahn tii Tidindaan, ki pak u nisui ni.<sup>20</sup> Ni li dooni Tite Uwumbor n-yoonn mōmōk, tiwan mōmōk pu, Tidindaan Yesu Kristo aayimbiil pu.<sup>21</sup> Tɔ, naah san Uwumbor pu na, ni li keei tōb aamōi.

### **Puutiib ni chatiib aabor**

<sup>22</sup> Bipiib, ni li keei nichatiib aamōi, ke naah kii Tidindaan aamōb pu na;<sup>23</sup> ba pu? uja le ye upuu aayidaan ke Kristo aah ye waanib Aayidaan pu na. Kristo aanib ye waawon la. U mu gaal bi lir la.<sup>24</sup> Bipiib, ni li keei nichatiib aamōi tiwan mōmōk ponni, ke Kristo aanib aah kii waamōb pu na.

<sup>25</sup> Bijab, ni li gee nippuutiib, ke Kristo aah gee waanib ki nan kpo bi pu pu na.<sup>26</sup> U nan kpo bi pu, ke u ḥja bi chain. Baah ḥjun waabor na, le u nyan titunwanbir bisui ni, le bi muin bi nnyun ni,<sup>27</sup> ke u di bi tii uma ubaa, bi li bi u chee, ki li ḥjan sakpen, ki li bi chain, ki taa li kpa tijɔn

tibaa, ki taa li kpa taani ubaa. <sup>28</sup>Kina le ni ḥjan ke bijab li gee bipuutiib ke baah gee bibaa aawon pu na. Uja u gee upuu na, u gee ubaa la. <sup>29</sup>Unii ubaa aa kee nan uma ubaa aawon. U kpiini ti, ki joo ti tijann, ke Kristo aah joo waanib pu na; <sup>30</sup>ba pu? timi Kristo aanib le ye waa-won. <sup>31</sup>Ni ḥjmee Uwumbor Aagbaŋ ni ke, "Nima le cha uja ni upii nya cha bitetiib ni binatiib, ki ti kpaan tɔb chee, ki ḥja unibaan."<sup>§§</sup> <sup>32</sup>Tibor timina le ye tibɔk-paan ti ye mbamɔn na, le m di tibor ng-baan ḥjan Kristo ni waanib. <sup>33</sup>Nima pu na, uja mɔk aah gee ubaa pu na, u li gee upuu mu kina. Upii mɔk mu li pak uchal.

### Mbim ni tetiib ni natiib aabor

**6** Mbim, ni li keei nitetiib ni ninatiib aamɔi Tidindaan pu; ba pu? nima le ḥjan. <sup>2</sup>Li pak aate ni aana. Nkaal ngbaan ye nkaal kpaan la. Uwumbor puu tipuur ke ni yaa kii mu kan, <sup>3</sup>u ga ḥja tinyoor ḥja ni pu, ki tii nimi limɔfɔfɔŋ dulnyaa wee ni.\*

<sup>4</sup> Tetiib, ni taa fiini nimi aabim aajuuil. Ni li joo bi mbamɔm, ki sur bi, ki tuk bi Tidindaan aabor.

### Binaagbiib ni dindatiib aabor

<sup>5</sup> Binaagbiib, ni li keei nidindatiib bi bi dulnyaa wee ni na aamɔi, ki li san bi, ki tun lituln mbamɔm, ke naah tun lituln pu ki tii Kristo na. <sup>6</sup>Bi yaa bi ni chee, bee bi yaa kaa bi kan, ni li tun lituln mbamɔm, ke naah ga tun tii Kristo pu na, ki taa ban ke binib pak nimi. Naah ye Kristo aanaagbiib na, ni li joo nisui mɔmɔk ḥjani Uwumbor aageehn, <sup>7</sup>ki li kpa mpopiin ki tun lituln tii nidindatiib, ke naah ga tun pu tii Tidindaan na, naa ye binib. <sup>8</sup>Teer man ke unii umɔk tun litunyaan na, u yaa ye unaagbiija, bee u

yaa kaa ye kan, Tidindaan ga tii u waat-uln aapar.

<sup>9</sup> Dindatiib, ni mu li ḥjani nimi aanaagbiib mbamɔm, ki taa faani bi, ki li nyi ke ni ni nimi aanaagbiib kpaan Dindaan baan le paacham. Uma aa pak ubaa ki jer uken.

### Tijawan ti Uwumbor tii timi na

<sup>10</sup> Nnaabitiib, gbelngbeln yaan le ye ke Tidindaan aah kpa mpɔɔn sakpen pu na, ni li kpa mpɔɔn mu u tii nimi na.

<sup>11</sup> Yoor man tijawan timɔk Uwumbor tii timi na. Nima le ga cha ni ḥjmaa yii kinimboŋ aanyamɔn aalan. <sup>12</sup> Naa ye binib le ti jaa kijaak. Ti jaa kinimboŋ aankipiwanbir ti bi paacham ki kpa mpɔɔn ki joo dulnyaa aanib bi bi mbɔmbɔɔn ni na le kijaak. <sup>13</sup> Nima pu na, ni yoor tijawan timɔk Uwumbor tii timi na. Nima le ga cha ni yii kinimboŋ, ki nyaj ki, ki li beenin si bundaln ki ga jan nimi kijaak na.

<sup>14</sup> Nima pu na, gor nibaa man ki ti jan kijaak. Ni li joo Uwumbor aabor ti ye mbamɔn ki naahn ligbapapaln na; ki li kpa mbimbinyaan mu bi ke tikur ti bii kibij pu na; <sup>15</sup>ki li tak ḥjinaatak ḥji ye tibɔnyaan ti tii timi nsuudoon na; <sup>16</sup>ki li ḥjani Yesu Kristo naadii, naadii bi ke kipeln ki ga kiir kinimboŋ aapiin i wu ke mmii na; <sup>17</sup>ki li chik tikur aayikpupuk ki ye Uwumbor aapɔɔn mu gaa nimi lii na; ki yoor Uwumbor aabor ti naahn kijaak aajuk ki Waafuur Nyaan di tii timi na; <sup>18</sup>ki li mee Uwumbor ki gaŋni u ke u ter nimi. N-yoonn mɔmɔk ni li mee u mbim-bin mɔmɔk pu. Waafuur Nyaan aah mɔk nimi pu na, ni li mee u kina, ki taa geeni man, ki taa di cha man. Ni li mee u n-yoonn mɔmɔk ki tii waanib mɔmɔk, <sup>19</sup>ki li mee u ki tii m mu, ke u mɔk mi maah ga len pu na, ki tii mi lipobil ke

<sup>§§</sup>5:31 : Lik Mpiin 2.24.

\*6:3 : Lik Nnyam 20.12; Ikaal 5.16.

m waar mmɔb ki tuk binib tibɔnyaan tee aabɔbɔrkaan. <sup>20</sup> M si Yesu aasisiyyaan, ki bi kiyondiik ni, tibɔnyaan ngbaan pu la. Nima pu na, ni li mee Uwumbɔr ke u tii mi lipobil, ke m tuk binib tibɔnyaan ngbaan, maah ba ga tuk bi pu na.

### Kookoo aadoon

<sup>21</sup> Tinaabogeehn Tikikus u ye Tidindaan aatutunn bamɔnn na le ga tuk nimi

maabɔr mɔmɔk, le ni bee maah bi pu na.  
<sup>22</sup> Nima le m cha u dan ni chee, ke u nan tuk nimi taah bi pu na, aan ki sɔŋ nisui.

<sup>23</sup> Tite Uwumbɔr ni Tidindaan Yesu Kristo tii tinaabitiib nsuudoon, ki cha ni li gee tɔb ki gaa u ki kii mbamɔm.  
<sup>24</sup> Tidindaan Yesu Kristo ja tinyoor ja binib bimɔk gee u n-yoonn mu kaa kpa ndoon na pu.

*Kigbaŋ ki Pɔɔl ŋmee ki tii*

## FILIPI YAAB

*na*

**1** Min Pɔɔl ni Timoti bi ye Yesu Kristo aanaagbiib na dooni waaninyaam bimok bi Filipi aatiŋ ni na, ni baaninkpiib ni baateterb mu. <sup>2</sup>Tite Uwumbor ni Tidindaan Yesu Kristo ḥaa tinyoor ḥaa ni pu, ki tii nimi nsuudoon.

### Pɔɔl aah mee Uwumbor pu na

<sup>3</sup>Maah teer nibor n-yoonn mɔmɔk pu na, m dooni Uwumbor u m dii u na, ni pu la. <sup>4</sup>Maah mee Uwumbor tii ni mɔmɔk n-yoonn mɔmɔk pu na, m mee u ni mpopiin la, ba pu? <sup>5</sup>bundaln ni nan gaa Yesu aabor ki nan saa din na, ni ter mi ke m tuk binib waabɔnyaan tee la. <sup>6</sup>M bee ke Uwumbor u nan piin ki bi toor nimi aabimbin na, u ga li beenin ḥani kina ki toor nimi aabimbin ti doo bundaln Yesu Kristo ga gir ni na. <sup>7</sup>Maah ḥani na, ni ḥan; ba pu? m gee nimi la. Ni mɔmɔk nan ter mi kiyondiik ni, ki nan ter mi buyoonn m nan bi bibɔjirb aambilni ni na ke m ti len Yesu aabɔnyaan tee aabamɔn. <sup>8</sup>Uwumbor nyi ke nnimbil man ke m ki kan nimi; ba pu? m gee nimi, Kristo aah tii mi ngeehm pu na.

<sup>9</sup>M mee Uwumbor ke ni li moo gee tɔb ki li moo nyi Uwumbor aabor, ki li kpa nlan nyaan, <sup>10</sup>aan ki lee nsan mu ḥan na, aan ki li bi chain, ki taa li kpa taani ubaa bundaln Kristo ga gir ni na. <sup>11</sup>M ban ke ni li kpa mbimbinyaan ki li tun lituln li ḥan na n-yoonn mɔmɔk, Yesu Kristo aapɔɔn pu, aan binib nyuŋ Uwumbor ki pak u.

### Yesu Kristo pu le ti bi

<sup>12</sup>Nnaabitib, m ban ke ni bee ke maah bi kiyondiik ni na, nima le cha binib pam ḥun Yesu aabɔnyaan tee. <sup>13</sup>Ubɔrkpaan

na aajab, ni binib bimok bi do na nyi ke Kristo pu le m bi kiyondiik ni. <sup>14</sup>Maah bi kiyondiik ni na, nima le pɔɔk nnaabitib aataakpab Tidindaan aasan ni, ki tii bi lipobil ke bi tuk binib Yesu aabor ki taa san ijawaan.

<sup>15-17</sup>Binib bibaa kpa lipiipoln m pu, ki ban baayimbil. Nima le cha bi mooni Kristo aabor. Bi ban ke binib nyuŋ bi la. Binimbil aa man Kristo aabor pu. Maah bi kiyondiik ni Yesu aabor pu na, le bi ban ke m ji falaa ki kpee. Nima le cha bi mooni Yesu aabor. Bibaa mu bi, ki mu gee mi ki mooni Kristo aabor ke bi ter mi; ba pu? bi bee ke Uwumbor le cha m bi do ke m len Yesu aabɔnyaan tee aabamɔn.

<sup>18</sup>M ga len kinye? Bi yaa mooni Kristo aabor lipiipoln pu, bee bi yaa mooni waabor ngeehm pu kan, naa muk mi. Bi mɔmɔk aah mooni waabor pu na le cha m kpa mpopiin. Ni ye mbamɔn la, m ga li beenin kpa mpopiin, ba pu? <sup>19</sup>ni mee Uwumbor tii mi la, Yesu Kristo Aafuur Nyaan mu ter mi, le m bee ke nima le ga cha m nya kiyondiik ni. <sup>20</sup>Nnimbil man ke binib nyuŋ Kristo m pu. M yaa kpo u pu, bee m yaa kaa kpo u pu kan, m ban ke m li kpa lipobil dandana wee, ke maah kpa n-yoonn mɔmɔk pu na, ki li len ki taa li san binib inimɔɔn. <sup>21</sup>M yaa bi limɔfal ni kan, Kristo pu le m bi. M yaa kpo kan, m ga kan tinyoor. <sup>22</sup>M yaa bi kan, m ga tun Uwumbor aatuln, le u ga ḥaa tinyoor ḥaa li pu. Maa nyi maah ga lee pu na; <sup>23</sup>nkun ni limɔfal mɔmɔk ḥan la. M ban ke m nya dulnyaa ni, ki ti li bi Kristo chee; ba pu? nima le ga li ḥan sakpen ki jer naah ḥan pu dulnyaa wee ni na. <sup>24</sup>M mu yaa kaa kpo kan, ni mu ḥan; ba pu? m ga li ḥmaa beenin ter nimi. <sup>25</sup>Nima pu le m bee ke maan kpo dandana wee. M ga li beenin bi ni chee, ki ter nimi, ni moo gaa Yesu ki kii mbamɔn, ki li kpa mpopiin. <sup>26</sup>M yaa ki gir ni ni chee kan, m pu le ni ga nyuŋ Yesu Kristo sakpen.

<sup>27</sup> Tibokpaan le ye ke nimiaabimbin li bi Kristo aabɔnyaan tee aah mɔk nimi pu na, aan m yaa dan nan mann nimi, bee m yaa kaa dan kan, m ga ḷun nimi aabor, ke ni si Yesu aachaj ni, ki kpa kimɔbaan, ki kpaan tuk binib Yesu aabɔnyaan, ke bi gaa u ki kii. <sup>28</sup> Ni taa san nimi aadim ijawaan man. Nima le ga mɔk bi ke bi ga kan ntafadaan mu kaa kpa ndoon na, ki ga mɔk nimi ke Uwumbɔr ga gaa nimi lii. <sup>29</sup> Uwumbɔr cha ni gaa Kristo ki kii la, ki cha ni ji falaa mu u pu. <sup>30</sup> Ni nan kan maah jin falaa Yesu pu pu na, ki ḷun maah ji falaa u pu dandana wee pu na. Le ni mu bi ji falaa ke maah ji pu na.

### Mpɔɔndaan Yesu Kristo aah nan sunn ubaa pu na

**2** Tɔ, Kristo pɔɔni nitaakpab, le waah gee nimi pu na sɔŋni nisui, ni ni Uwumbɔr Aafuur Nyaan mu kpaan kijotiik, le ni kpa tibulchinn ki san tɔb kinimbaak, <sup>2</sup>nima pu na, ni li kpaan kimɔbaan, ki li gee tɔb, ki li kpaan nlandal mbaa. Ni yaa ḷa kina kan, m ga li kpa mpopiin mbamɔm. <sup>3</sup>Ni taa li kpa lipiipoln tɔb pu, ki taa li ban ke binib li pak nimi. Ni sunn nibaa taab man, ki li nyuŋni tɔb ki jer nibaa. <sup>4</sup>Ubaa taa li ban uma ubaa aanyoor baanja. Aa li ban ke ni mɔmɔk kan tinyoor. <sup>5</sup>Ni sunn nibaa taab man ke Yesu Kristo aah sunn ubaa taab pu na. <sup>6</sup>U bi ke Uwumbɔr aah bi pu na. U mu aa dak ke ni ye limulk ke u ni Uwumbɔr li ḷak. <sup>7</sup>Waageehn pu le u di cha tiwanyaan nimɔk bi Uwumbɔr do na, ki ḷa ubaa ke unaagbijja na. U kpalm unibɔn, <sup>8</sup>ki sunn ubaa taab, ki kii Uwumbɔr aamɔb, hali ki ti kpo ndɔpuinkoo pu. <sup>9</sup>Nima pu le Uwumbɔr nyuŋ u sakpen ki yoor u paacham, le ki tii u liyimbil li jer ḷiyimbil mɔmɔk na, <sup>10</sup>ke binib ni tiwan nimɔk bi paacham na, ni binib ni tiwan nimɔk bi kitij do na, ni binib ni tiwan nimɔk bi kitij aataab na, bi mɔmɔk yaa ḷun Yesu

aayimbil pu kan, bi li gbaani unimbiin ni. <sup>11</sup>Bi mɔmɔk pel pel ga len binib ni, ke Yesu Kristo le ye tiwan ni binib mɔmɔk Aadindaan. Nima le ga nyuŋ Tite Uwumbɔr.

### Ni li wiin ke nwiihn na dulnyaa ni

<sup>12</sup> Nima pu na, nnaabitiib bi m gee bi na, maah kaa bi ni chee na, m ban ke ni kii maamɔb ki jer naah nan kii maamɔb buyoonn m nan bi ni chee pu na. Naah ḷmar pu na, ni li tun Uwumbɔr aatuln ke binib bi ḷmar na aah ba ga tun pu na, ki li san Uwumbɔr n-yoonn mɔmɔk; <sup>13</sup>ba pu? Uwumbɔr bi tun lituln nisui ni, ke ni li neen ke ni kii waamɔb, ki li ḷani waageehn.

<sup>14</sup> Naah ḷani tiwan nimɔk na, ni taa li ḷulni, ki taa kpak kinikpakpak, <sup>15</sup>aan ki li ye Uwumbɔr aabim bi kaa kpa taani, kaa kpa ngalm na. Ni bi titunwanbirdam akaasisik ni la. Ni li bi ke nwiihn na le dulnyaa wee ni ki wiin bikaasisik ni, <sup>16</sup>ki joo ni Uwumbɔr aabor ti tii binib limɔfal na. Ni yaa bi kina kan, le m ga li kpa kipupuk ni pu bundaln Kristo ga gir ni na, ke maah tun lituln linimaln ki tuk nimi Uwumbɔr aabor na, naa ye fam.

<sup>17</sup> Ni yaa gaa Yesu ki kii ki tun waatuln mbamɔm kan, m kpa mpopiin ni pu. Bi yaa po ku mi kan, m kpa mpopiin. <sup>18</sup> Ni mu li kpa mpopiin sakpen ke maah kpa pu na.

### Uwumbɔr aatutum Timoti ni Epafroditus

<sup>19</sup> Tɔ, Tidindaan Yesu pu le m kpa limakl ke m ga cha Timoti dan ni chee dandana wee. U yaa nan tuk mi nimi aabor aah bi pu na kan, nsui ga sɔŋ. <sup>20</sup> Utafal bi ni ni la. Maa ki kpa unii u aatafal bi ni ni, ke utafal aah bi ni ni pu na. <sup>21</sup> Biken na mɔmɔk aatafal bi bibaa ni la. Bitafal aa bi Yesu Kristo aatuln ni. <sup>22</sup> Ni nyi Timoti aabimbin aah ḷan pu na, ki nyi ke u tun lituln m chee ke ubo aah

tun lituln ute chee pu na, ki ti tuk binib Yesu aabɔnyaan tee.<sup>23</sup> Nima pu na, m yaa kan maabɔr aah ga doo pu na kan, m ga cha u dan ni chee.<sup>24</sup> Tidindaan pu le m nyi ke ni yaa kpee siib kan, m mu ga dan ni chee.

<sup>25</sup> M dak ke ni ɔjan ke m cha tina aabo Epafrodaitus ki gir ni ni chee. U ye maatutujeer ni maajanjeer Tidindaan aasan ni, ki ye nimi aatutunn u dan nan tii mi maah ban pu na.<sup>26</sup> Unimbil man ke u ki kan nimi. Naah ɔjun ke u bun na, nima le usui bii.<sup>27</sup> Ni ye mbamɔn, u nan bun ki ti ban u kpo, le Uwumbɔr san u kinimbaak ki cha u pɔɔk. Waah cha u pɔɔk na, u san m mu kinimbaak, m taa li kpa mpombiin ki kpee mpombiin pu.<sup>28</sup> Le m ban ke m cha u gir ni ni chee mala, ni yaa nan kan u kan, ni ga li kpa mpopiin. Le nsui ga sɔɔj.<sup>29</sup> Nima pu na, ni gaa u tijann Tidindaan pu, ki li kpa mpopiin sakpen, ki nyuŋ u ni binib bimɔk bi ke waah bi pu na;<sup>30</sup> ba pu? Kristo aatuln pu, waa nan daa nkun. Waah nan ban u ter mi, naah kaa nan ɔmmaa ter mi pu na pu, le u nan kan linimaln.

### Mbimbinyaan bamɔm

**3** Nnaabitib, kookoo aabɔr le ye ke ne li kpa mpopiin Tidindaan pu. M yaa ki ɔmee ke maah nan ɔmee pu tii nimi na kan, naan muk mi; ba pu? ni ɔjan ke ni ki ɔjun maah ga ɔmee pu tii nimi na.

<sup>2</sup>Tɔ, ni li nyi binib bi tun lituln li kaa ɔjan na, ki bi ke ibɔ na, ki len ke ni yaa kaa gii lichakpaln kan naan ɔmar na.<sup>3</sup> Timi bi kpaan Uwumbɔr Aafuur Nyaan chee ki pak u, ki kpa kipupuk Yesu Kristo pu, ki bee ke taan ɔmar tibaa aapɔɔn pu na, timi le kpa lichakpanggee bamɔnn.<sup>4</sup> Min mbaa ba ga li kpa nsan ki ga ɔmaa len ke m ga ɔmmaa ɔmar mbaa pu. Unii ubaa yaa len ke u kpa nsan ke u ga ɔmmaa ɔmar ubaa pu kan, m kpa nsan ki jer u.

<sup>5</sup> Maah nan ye iwiin iniin aabo na, bi nan

gii nchakpaln. M ye Juu yaab aabo, ki ye Benjaminn aanibol ponni aanii ubaa la. M ye Hiibru yaab aabo bamɔnn la. M nan dii Moses aakaal, Farisii yaab aah dii pu na.<sup>6</sup> Nnimbil man ke m ja Yesu aanib falaa. M nan dii Moses aakaal mbamɔm, kaa yii nkaal mbaa.<sup>7</sup> Nimina mɔmɔk nan ye tinyoor le ki tii mi. Le m yii ni mɔmɔk Kristo pu, ke naa ye nibaa.<sup>8</sup> Ni ye mbamɔn la, m yii tiwan mɔmɔk ke naa ye nibaa, ke m li nyi Yesu Kristo u ye Ndindaan na. Maah nyi u pu na, nima le jer tiwan mɔmɔk. U pu le m di tiwan mɔmɔk lii, ke ni ye timoor la, ke m gaa uma,<sup>9</sup> ki kpaan u ni. M yaa dii Moses aakaal kan, nima le aan cha Uwumbɔr len ke maabɔr ɔjan. Maah gaa Kristo ki kii na, nima le cha Uwumbɔr len ke maabɔr ɔjan; m gaa Yesu Kristo ki kii le ki ɔjan Uwumbɔr chee.<sup>10</sup> M ban ke m bee Kristo, ni mpopiin mu fikr u nkun ni na, ki ji falaa u pu. M ban ke maabimbikpok kpo ke waah nan kpo pu na,<sup>11</sup> aan m mu nan fikr nkun ni.

### Pɔɔl aanimbil aah man Yesu Kristo aasan pu pu na

<sup>12</sup> Maa len ke m fuu Yesu aah ban pu na, kaa len ke m ye unii u ɔjan ti doo na. M pɔɔni mbaa ke m li bi Yesu Kristo aah ban ke m li bi pu na; ba pu? u gaa mi ki ja mi waanii la.<sup>13</sup> Nnaabitib, maa len ke m fuu waah ban pu na. Nnimbil man tiwan nibaa le pu. M suln tiwan ni bi mpuwɔb na, ki pɔɔni mbaa ke m pii tiwan ni bi nnimbiin ni na.<sup>14</sup> Yesu Kristo pu le Uwumbɔr yin mi ke m dii nsan mu cha paacham na. Nima le nnimbil man ke m fuu nima, ki ti kan tinyoor ti Uwumbɔr ga tii mi na.

<sup>15</sup> Nimi bi dii Uwumbɔr aasan mbamɔm na, cha ni mu aanimbil li man kina man. Ni yaa kaa bee waabɔr tibaa mbamɔm kan, u ga mɔk nimi.<sup>16</sup> Ti mu aah nyi Uwumbɔr aabɔr mɔmɔk pu na, cha ti li dii kina man.

<sup>17</sup> Nnaabitiib, ni li kpaan kimɔbaan ki dii maataabuu, ki lik binib bi dii ke taah dii pu na. <sup>18</sup> Tɔ, binib pam aah dii pu na, bi ye Yesu aadɔpuinkoo aadim la. M nan tuk nimi baabor n-yoonn mɔmɔk, ki ki tuk nimi dandana wee, ni tinyunyunn la. <sup>19</sup> Baadoon le ga li ye ntafadaan mu kaa kpa ndoon na. Baawumbɔr le ye bipuul. Bi kpa kipupuk inimɔɔn aatuln pu. Baa-landak bi dulnyaa wee ni aawan ni la.

<sup>20</sup> Tima kan, Uwumbɔr do le ye tido, le ti kii bundaln Tidindaan Yesu Kristo u ga gaa timi lii na ga nya ni nima na. <sup>21</sup> U kpa mpɔɔn ki ga ŋmaa nyaŋ tiwan mɔmɔk, ki cha ni mɔmɔk kii waamɔb. Waah kpa mpɔɔn kina na, le u ga di timi aawon ti kaa ye lisil aawon na ja tiwonpɔnn ti naahn uyaar ti ye lisil aawon na.

### Nsurm

**4** Nnaabitiib, Tidindaan aah ga ŋmaa ja kina ki tii nimi na, ni li si uchaŋ ni. M gee nimi la. Le nimi aabor bi nsui ni. Le mponn piin ni pu. Nimi le ye maat-uln aanyoor.

<sup>2</sup> Yuwodia ni Sintiki, m gan nimi, ni li kpaan kimɔbaan Tidindaan pu. <sup>3</sup> Maatu-tujeer bamɔnn, m mee aa mu, ter bipiib ngbaan; ba pu? bi ni Klement ni maatu-tujeerb biken nan tun lituln linimaln m chee, ki ter mi m tuk binib Yesu aabɔnyaan tee. Baayimbil ŋmee limɔfal aagbar ki bi paacham na ni.

<sup>4</sup> Ni li kpa mpopiin Tidindaan pu, n-yoonn mɔmɔk. M ki tuk nimi la, ni li kpa mpopiin man.

<sup>5</sup> Ni li bi suuna binib mɔmɔk chee man. Tidindaan ga gir ni dandana wee. <sup>6</sup> Ni taa cha ilandak li muk nimi tiwan nibaa pu. Ni li mee Uwumbɔr tiwan mɔmɔk pu, ki gaŋni u, ki dooni u ki tuk u naah ban pu na mɔmɔk. <sup>7</sup> Ni yaa ŋani kina kan, Uwumbɔr ga tii nimi nsuudoon mu jer taah nyi pu na. Nisui, ni nimi aalandak ga doon; ba pu? ni kpaan Yesu Kristo chee.

<sup>8</sup> Nnaabitiib, kookoo yaan le ye ke ni li dak ilandak i ye mbamɔn na, ni i kpa laasaab na, ni i tok na, ni i ye chain na, ni i ŋjan na, ni i kpa lisil na. Ni cha ilandak imɔk ŋjan ki neer mpakm na li joo nimi. <sup>9</sup> Ni nan bae Uwumbɔr aabor m chee, ki gaa ti, ki ŋjun maah len pu na, ki kan maah ŋjani pu na. Ni li dii kina, le Uwumbɔr u tii timi nsuudoon na ga li bi ni chee.

### Ipiin pu aadoon

<sup>10</sup> Ni yunn le naa ki kan mi; le nitafal mu beenin bi m ni. Nima le m kpa mpopiin sakpen Tidindaan pu. M bee ke nitafal bi m ni n-yoonn mɔmɔk; le ni mu aa nan kpa nsan ni ter mi. <sup>11</sup> Maa len igiin pu. M yaa kpa sakpen, bee m yaa kpa siib kan, m bae maah ga ja pu aan nnimbil gbiin kina na. <sup>12</sup> M nyi igiin, ki nyi liwankpal mu. Ni yaa mɔ, bee ni yaa kaa mɔ kan, m yaa ji bab, bee nkɔn yaa pii mi kan, m yaa kpa sakpen, bee m yaa kaa kpa nibaa kan, m bae maah ga ja pu aan nnimbil gbiin kina na. <sup>13</sup> Kristo aah tii mi mpɔɔn mu na, m ga ŋmaa ja tiwan mɔmɔk.

<sup>14</sup> Tɔ, naah ter mi maafalaan ni pu na, ni ja mbamɔn la. <sup>15</sup> Nimi Filipi aatiŋ aanib nyi ke maah nan tuk nimi Yesu aabɔnyaan tee ŋjan ki nin nyan Macedonia aatiŋ ni na, Uwumbɔr aanib ponn ni ubaa aa tii mi ipiin, see nimi baanja. M nan tuk nimi Uwumbɔr aabor, le ni mu nan tii mi ipiin. <sup>16</sup> Maah nan bi Tesalonika aatiŋ ni na, ni nan tun ni unii nfum mulee u nan tii mi maah ban pu na. <sup>17</sup> Naa ye ke m ban ipiin la. Naah tii mi ipiin pu na, nima le ni ga li moo kpa tinoor. Nima le m ban. <sup>18</sup> Naah tii mi tiwan ni na, m gaa ni mɔmɔk ki kpa sakpen. Naah tun ni Epafrodaitus ke u nan tii mi ipiin i na, u nan tii mi i. Naah tii mi ipiin i na, ni naahn kitork ki ŋjan na le ki tii Uwumbɔr, le usui piir, le u gaa i. <sup>19</sup> Uma Uwumbɔr u m dii u na le ga tii

nimi naah lann pu na mɔmɔk; waah kpa liwankpal sakpen paacham pu na, kina le u ga tii nimi, Yesu Kristo pu.<sup>20</sup> Cha ti li nyuŋni Tite Uwumbor n-yoonn mu kaa kpa ndoon na. Amii.

### Kookoo aadoon

<sup>21</sup> Ni doon Yesu Kristo aaninyaam mɔmɔk tii mi. Tinaabitib bi bi m chee na

dooni nimi. <sup>22</sup>Uwumbor aanib mɔmɔk dooni nimi. Ubɔrkpaan Siisa aatutum bi ye Uwumbor aanib na mu dooni nimi mbamɔm.

<sup>23</sup>Tidindaan Yesu Kristo aajann li bi nisui ni. [Amii.]

*Kigbaŋ ki Pɔɔl ŋmee ki tii*

## KOLOSE YAAB

*na*

**1** Min Pɔɔl u ye Yesu Kristo aakpam-bal Uwumbor aageehn pu na, m ni tina aabo Timoti <sup>2</sup>le ŋmee kigbaŋ kee ti tii nimi Uwumbor aanib bi ye tinaabitib ki gaa Kristo ki kii, ki bi Kolose aatiŋ ni na. Tite Uwumbor [ni Tidindaan Yesu Kristo] ŋa tinyoor ŋa ni pu, ki tii nimi nsuudoon.

### **Idoon aameel**

<sup>3</sup>N-yoonn mumɔk ti mee Uwumbor u ye Tidindaan Yesu Kristo Aate na tii nimi na, ti dooni u ni pu; <sup>4</sup>ba pu? ti ŋjun ke ni gaa Yesu Kristo ki kii mbamɔm, ki gee Uwumbor aanib mɔmɔk; <sup>5</sup>ba pu? ni kpa limakl ke ni ga nan kan Uwumbor aah di tiwan ni siin nimi paacham na. Ni ŋjun ni pu buyoonn ni ŋjun tibɔnyaan ti fuu ni ni chee ki ye mbamɔn na chee la. <sup>6</sup>Tibɔnyaan ngbaan le cha nimi ni binib bi bi ŋipepel mɔmɔk na tun litun-yaan. Binib moo gaal tibɔnyaan ngbaan ki keei, nikaasisik ni, ni ŋipepel mɔmɔk. Naah ŋjun ti, ki bee mbamɔm Uwumbor aah ŋjani nimi tijann pu na, le binib moo gaal tibɔnyaan ngbaan ki keei nikaasisik ni, ki nan saa dandana. <sup>7</sup>Timi aatu-tujeer Epafras u ti gee u na le nan tuk nimi Uwumbor aanimbaasaln pu. Uma Epafras le si timi aasisiyyaan ki tun Kristo aatuln mbamɔm ki ter nimi. <sup>8</sup>U tuk timi Uwumbor Aafuur Nyaan aah cha ni gee binib pu na.

<sup>9</sup>Nima pu le ti mee Uwumbor tii nimi, kaa di cha. Buyoonn ti nan ŋjun ni pu ki nan saa dandana wee na, le ti mee Uwumbor tii nimi, ke ni ga bee waah ban ke ni li ŋjani pu na. Ti mee u ke u tii nimi nlan ni bee Waafuur Nyaan aabor, <sup>10</sup>aan ki li dii Tidindaan waah ban pu

na, aan ki gbiin unimbil, ki tun litun-yaan aabɔŋ mɔmɔk, ki moo bee waabor. <sup>11</sup>Ti mee u tii nimi ke waah kpa mpɔɔn sakpen pu na, u tii ni mu mpɔɔn, aan ni li kpa limɔr falaa ponn ni n-yoonn mɔmɔk, ki li kpa mpopiin, <sup>12</sup>ki li dooni u; ba pu? uma le ŋa nimi binib bi ŋeer ke bi kan tiwan ni u ga tii waanib, nwiihn aanaan ni na. <sup>13</sup>Uma le nan nyan timi mbɔɔmbɔɔn aanaan ni, ki nabr timi di buen Ujapɔgeehn aanaan ni. <sup>14</sup>Uma le gaa timi lii, le Uwumbor di cha pinn timi aatunwanbir, [Ujapɔɔn aasin pu].

### **Yesu Kristo aabimbin, ni waatuln**

<sup>15</sup>U ye Uwumbor u taa waa u na aanaŋ, ki ye tiwan nimɔk Uwumbor naan ni na Aayidaan; <sup>16</sup>ba pu? Uwumbor nan cha u naan tiwan mɔmɔk, ni bi paacham, ni ni bi kitij na, ni taah waa ni na, ni taah kaa waa ni na; ni yaa ye nnaan, bee ipɔɔn, bee bitinjoob, bee tininkpir, uma le nan naan ni mɔmɔk ke ni li nyuŋni u. <sup>17</sup>Uma Yesu le puen tiwan mɔmɔk bi. Uma pu le tiwan mɔmɔk beenin bi. <sup>18</sup>Uma le ye waanib Aayidaan. Le waanib mu ye waawon, le u tii bi limɔ-fal. Uma le puen fikr nkun ni, ki ye tiwan mɔmɔk Aayidaan; <sup>19</sup>ba pu? ni mɔ Uwumbor ke waah bi pu na, Yesu mu bi kina la. <sup>20</sup>Uma Yesu pu, le ni mɔ Uwumbor ke u di tiwan ni mɔmɔk bi paacham, ni tiwan ni mɔmɔk bi kitij na tooh ki-jɔtiik ubaa chee. Waasin nan nyan uwon ni, ndɔpuinkoo pu; waasin ngbaan pu le Uwumbor cha tiwan ngbaan mɔmɔk ni uma ŋa kijɔtiik.

<sup>21</sup>N-yoonn mbaa ni nan ye biwɔwɔm le Uwumbor chee. Ni nan dak ilandak i kaa ŋjan na, ki tun lituln li kaa ŋjan na, nima le ni nan ye Uwumbor aadim, <sup>22</sup>le dandana wee u cha ni ni uma ŋa kijɔtiik; ba pu? Ujapɔɔn nan kpo ni pu la. U nan kpo ni pu, ke ni li bi chain, ki li ye bininyaam, ki taa li kpa ngalm mubaa, bundaln u ga di nimi siin Uwum-

bør aanimbiin ni na.<sup>23</sup> Ni ḥjan ke ni li dii u mbamɔm, ki taa di cha waasan, ki taa cha nibaa lej nimi. Naah ḥjun tibɔnyaan tee na, tibør ngbaan tii nimi limakl la. Ni taa di cha limakl ngbaan. Bi moon tibɔnyaan tee, ki tuk binib bimɔk bi dulnyaa wee ni na la. Min Pɔɔl mu ḥja unii u mooni ti na la.

### Pɔɔl aah ye Yesu Kristo aanib aatutunn pu na

<sup>24</sup>Tɔ, maah jin falaa u ni pu na, nima le m kpa mpopiin. Kristo nan tuk mi maah ga ji falaa waanib pu pu na, le maah ji falaa tiwon tee ni na, falaa ngbaan u gur na le m ji.<sup>†</sup> Waanib bi m ji falaa bi pu na le ye waawon.<sup>25</sup> Uwumbørnan ḥja mi waanib aatutunn, ki di lituln siin mi, ke m tun ki ter nimi. Lituln ngbaan le ye ke m tuk nimi waabor mɔmɔk pel pel.<sup>26</sup> Ti ye tibɔbɔrkaan la. Uwumbørnan bør ti n-yaayoonn na aanib, le ki kpiir ti tuk waanib dandana wee.<sup>27</sup> U ban ke bi bee tibør ngbaan aah ḥjan sakpen ki ter ḥjtimbol mɔmɔk pu na la. Tibɔbɔrkaan ngbaan le ye ke Kristo bi ni ni. Waah bi ni ni na, nima le ni kpa limakl ke ni ga ji waamɔon.<sup>28</sup> Kristo aabor ngbaan le ti mooni, ki sur binib mɔmɔk, ki tuk bi waabor, waah tii timi nlan pu na. Ti ban ke bi mɔmɔk li kpaan Kristo ni, ki li ye binib bi ḥjan doo na. Ti ban ke ti di bi ki mɔk Uwumbør la.<sup>29</sup> Nima le cha m tun lituln linimaln. M tun lituln ngbaan waapɔon sakpiin pu la.

**2** M ban ke ni bee ke m tun lituln linimaln nimi pu, ni Laodisea aatij aanib pu, ni binib bimɔk kaa kee kan mi na pu,<sup>2</sup> ke m pɔɔk bitaakpab. M ban ke ni mɔmɔk li kpaan kimɔbaan, ki li gee tɔb, ki bee Uwumbør aabor mbamɔm, aan ki li pak ti mbamɔm, ki taa joo beeni. M ban ke ni bee Uwumbør aabɔbɔrkaan, ti ye Kristo aabor na.<sup>3</sup> Uma baanja le ga

ŋmaa tii timi nlan mu ye nlan bamɔnn na. Uma baanja le ga ŋmaa mɔk timi nnyim mɔmɔk.

<sup>4</sup>M tuk nimi kina ke ubaa taa ŋmann nimi la. Unii yaa mɔln inyamɔn i mɔ na ki tuk nimi kan, ni taa kii.<sup>5</sup> Maawon aa bi ni chee, le maalandak bi ni ni. Naah gaa Kristo ki kii mbamɔm ki dii waasan mu mbamɔm na, nima le m kpa mpopiin sakpen.

### Cha Yesu Kristo aabimbin li gbii si

<sup>6</sup> Ni nan gaa Yesu Kristo, ki kii ke u ye Nidindaan. Nima pu na, ni li kpaan u ni, ki li dii u man,<sup>7</sup> ki too chuu u ke busub aanyaan aah koo kitij pu na, ki li bae waabor n-yoonn mɔmɔk, ki gaa ti ki kii mbamɔm, taah nan tuk nimi pu na, ki li dooni u n-yoonn mɔmɔk.

<sup>8</sup> Unii yaa tuk nimi nnyamɔn aalan mu ye fam na kan, ni li nyi man ki taa dii u; nlan ngbaan ye binib aalan mu nyan ni kinimbɔŋ ki joo dulnyaa wee na, naa ye Kristo aabor.<sup>9</sup> Uwumbør aabimbin mɔmɔk bi Yesu Kristo aawon ni.<sup>10</sup> Naah kpaan u ni na, le ni kpa limɔfal bamɔln. Uma le ye tininkpir ni ipɔɔn mɔmɔk aayidaan.

<sup>11</sup> Naah kpaan Kristo ni na, le ni bi ke binib bi gii ḥjchakpan na; ni mu aa ye ḥjchakpan le ni gii, ni ye nimi aabimbikpok le ni gii lii. Ni ye Kristo aah gii pu na la.<sup>12</sup> Baah muin nimi nnyun ni na, ni mɔk ke bi di nimi sub Kristo chee la. Baah nyan nimi nnyun ni na, le ni mɔk ke ni ki fikr u chee; ba pu? ni pak ke Uwumbør kpa mpɔɔn ki fikr Kristo nkun ni.<sup>13</sup> N-yoonn mbaa, ni nan tun titunwanbir, kaa nan dii Uwumbør aakaal. Nima le naa nan kpa limɔfal li kaa kpa ndoon na. Naah kpaan Kristo ni dandana wee na, nima le Uwumbør fikr nimi. U di cha timi aatunwanbir mɔmɔk pinn timi.<sup>14</sup> Taah ba ga ḥja pu na le

<sup>†</sup>1:24 : Lik Lituln 9.16.

ŋmee kigbaŋ pu. Taah kaa ŋa kina na, nima le timi aabɔr bii. Le Kristo aah nan kpo ndɔpuinkoo pu na, nima le Uwumbɔr aa ki len ke timi aabɔr bii.<sup>15</sup> Waah kpo ndɔpuinkoo pu na, le u ŋa kinimbɔŋ aapɔɔn mɔmɔk fam, le ki nyaŋ ki, ki jinn ki inimɔɔn, binib aanimbil ni.

<sup>16</sup> Nima pu na, ni taa cha ubaa galn nimi tijikaar aakoobil pu, bee ti-wanyukaan aakoobil pu, bee likpaakool daal aakoobil pu.<sup>17</sup> ɻikoobil mɔmɔk po ye tiwan ni choo na aajunjuŋ la. U bi na le ye Kristo.<sup>18</sup> Binib bibaa bi ki sunni bibaa taab, ki pak Uwumbɔr aatuuntiib, ki bui ke bi daŋ tidaŋ ki kan lijinjiir aawan, ki kpa kalmbaani, ki dak dulnyaa aalandak i ye fam na. Ni taa cha binib ngbaan bii nimi.<sup>19</sup> Baa joo timi aayidaan Kristo. Uma aapɔɔn pu, le ti muun waasan ni, Uwumbɔr aah ban pu na. Uma le kpaan timi kimbaan, ke ti li tuk tɔb pu, ke ɻituk ni ɻigir aah cha tiwon aawan mɔmɔk tuk tɔb pu pu na.

### Ni naahn ke ni kpo ki beenin fu Yesu Kristo pu

<sup>20</sup> Ni nan kpo Kristo chee la, nima le ni nyan kinimbɔŋ ki joo dulnyaa na aapɔɔn ni. Nima pu na, ba ŋa nimi aabimbin bi ke naah beenin ye dulnyaa yaab le na? Ba ŋa ni kii nkaal mu len ke,<sup>21</sup> “Taa ji nee,” “Taa laml nee,” “Taa meeh nee” na?<sup>22</sup> Binib yaa jin timina mɔmɔk kan, ti doo la. ɻikoobil ɻimina po ye binib aakaal, ni baamɔkm la.<sup>23</sup> Ni naahn nlan la, ki mu aa ye nlan. Bi dooni bisui aah gee tiwan ni na la, ki sunn bibaa taab, ki muk tiwon. Le baah ɻani pu na, naa ter bi ke bi chuu bibaa.

**3** Ni kpaan fikr Kristo chee la. Nima pu na, cha nitafal li bi paacham aawan ni. Kristo bi nima ki ka Uwumbɔr aajangii wɔb.<sup>2</sup> Ni li dakl tiwan ni bi paacham na aabɔr, ki di cha tiwan ni bi kitij do na.<sup>3</sup> Ba pu? ni naahn ke ni kpo; le nimi aamɔfal kpaan Kristo ni, ki

bi Uwumbɔr chee paacham, le u biin li pu.<sup>4</sup> Kristo, u ye timi aamɔfal na yaa nan gir ni kan, ti mu ga li bi u chee, ki kan nnyuŋ.

### Mbimbikpok ni mbimbipɔm

<sup>5</sup> Nima pu na, kulin man tiwon aah ban pu na, ki taa gor kidagook, ki taa tun ti-jɔŋ aatuln, ki taa li ban tiwan ni kaa ŋjan na, ki taa li kpa iniman. Unii u kpa ini-man na aa dii Uwumbɔr, u dii liwankpal la.<sup>6</sup> Binib bi yii Uwumbɔr aamɔb ki tun titunwanbir timina na, u ga daa bitafal.<sup>7</sup> N-yoonn mbaa, ni mu nan bi bikaasisik ni, ki tun titunwanbir ngbaan.

<sup>8</sup> Le naah ye Yesu aanib dandana wee na, ni di titunwanbir ngbaan mɔmɔk lii. Ni taa ki gee lijuul ki li tar binib pu, ki taa ki li kpa kinanaŋ, ki taa ki seei ɻisiibil, ki taa ki len iliin i kaa ŋjan na.<sup>9</sup> Ni taa mɔln inyamɔn ki tuk tɔb; ba pu? ni nan di nimi aabimbikpok aatuln lii a,<sup>10</sup> ki voor mbimbipɔm la. Uwumbɔr le tii nimi mbimbipɔm ngbaan, ki bi toor mu, ke ni moo bee u, ki li naahn u.<sup>11</sup> Naah kpa mbimbipɔm na, naa ki yakr Juu yaab, ni binib bi kaa ye Juu yaab na, ni binib bi gii ɻichakpan na, ni binib bi kaa gii na, ni biwɔwɔm, ni timoor ni aanib, ni binaagbiib, ni bimalb. Ni mɔmɔk kpaan la. Kristo le jer tiwan ngbaan mɔmɔk, ki bi waanib mɔmɔk ni.

<sup>12</sup> Uwumbɔr nan nyan nimi, ki ŋa nimi waaninyaam, ki gee nimi. Nima pu na, ni li kpa linimbaasaln, ni tibulchinn, ki sunn nibaa taab, ki li bi suuna, ki li kpa suklaa,<sup>13</sup> ki li kpa limɔr tɔb chee. Ni ponn ni ubaa ni ureen aato yaa kpa tibɔr kan, ni di cha pinn tɔb. Tidindaan aah di cha pinn nimi pu na, ni mu di cha pinn tɔb kina.<sup>14</sup> Tibɔr ti jer ti mɔmɔk na le ye ke ni li gee tɔb; ba pu? ngeehm di ni mɔmɔk kpaan tɔb chee la, ni li kpaan kimbaan mbamɔm.<sup>15</sup> Kristo yin nimi ke ni li kpaan tiwonbaan ni, ki li kpa nsudoon mu u tii nimi na. Nima pu na,

cha nsuudoon ngbaan li joo nisui man,  
ki li dooni Uwumbor, waabulchinn pu.

<sup>16</sup> Cha Kristo aabor li bi nisui ni sakpen,  
ki tii nimi nlan. Ni li tuk təb waabor,  
ki li sur təb, ki li gaa ilahn i bi Uwumbor  
Aagban ni na, ni waanib aalahn, ni  
ilahn i Waafuur Nyaan mok nimi na. Ni  
li gaa ilahn ngbaan, ki li dooni Uwumbor  
nisui ni. <sup>17</sup> Ni yaa len kan, ni len Tidindaan  
Yesu aayimbil pu; ni yaa tun lituln  
kan, ni li tun waayimbil pu, ki li ḥjani  
tiwan mɔmɔk waayimbil pu, ki li dooni  
Tite Uwumbor u pu.

### Naah ga li bi pu Tidindaan aasan ni na

<sup>18</sup> Tɔ, bipoob, ni li keei nichatiib aamɔi.  
Naah dii Tidindaan na, ni ḥjani ke ni li  
ḥjani kina.

<sup>19</sup> Chatiib, ni li gee nippuutiib, ki taa  
muk bi.

<sup>20</sup> Mbim, ni li keei nitetiib ni ninatiib  
aamɔi tiwan mɔmɔk ni, Tidindaan aah  
ban pu na; ba pu? nima le piir Uwumbor  
aasui.

<sup>21</sup> Tetiib, ni taa fiini nimi aabim  
aajuul, aan bitaakpab taa yɔl.

<sup>22</sup> Binaagbiib, ni li keei nidindatiib bi  
bi dulnyaa ni na aamɔi tiwan mɔmɔk ni.  
Bi yaa bi ni chee, bee bi yaa kaa bi kan,  
ni li tun lituln mbamɔm. Ni taa ban binib  
li pak nimi. Naah san Uwumbor na, ni  
li tun lituln mbamɔm nima pu. <sup>23</sup> Naah  
ḥjani tiwan nimɔk na, ni cha nitafal li bi  
ni ni, ki tun lituln ke naah ba ga tun tii  
Tidindaan pu na, naa ye binib. <sup>24</sup> Tidindaan  
Kristo le ni tun lituln tii u. Nima  
le ni bee ke uma le ga pa nimi tipar,  
waah nan puu tipuur ti ke u ga tii nimi  
na. <sup>25</sup> Unii umɔk tun lituln li kaa ḥjani na,  
Uwumbor ga daa utafal waah ḫeer pu na.  
Uwumbor aa pak ubaa ki jer uken.

**4** Dindatiib, ni li ḥjani nimi aanaagbiib  
mbamɔm; ba pu? ni nyi ke ni mu kpa  
Dindaan paacham.

### Nsurm

<sup>2</sup> Tɔ, ni mɔmɔk li beenin mee Uwumbor  
linimaln, ki li nyi ki taa geeni, ki li  
dooni u mmeen ponn ni, <sup>3</sup> ki li mee u tii ti  
mu, ke u tii timi nsan ti moon waabor ki  
tuk binib tibɔbɔrkaan ti ye Kristo aabor  
na. Waabɔnyaan ngbaan pu, le m bi  
kiyondiik ni. <sup>4</sup> Ni ḥjani ke m tuk binib  
waabɔnyaan ngbaan aatataa mbamɔm.  
Ni mee Uwumbor tii mi ke u ter mi, m  
tuk bi kina.

<sup>5</sup> Ni li kpa nlan ki li bi mbamɔm joo  
cha binib bi kaa dii Uwumbor aasan na  
wɔb. Naah kan nsan buyoonn na, ni li  
tun Uwumbor aatuln n-yoonn mɔmɔk.  
<sup>6</sup> Ni li len ibulchiliin n-yoonn mɔmɔk, ki  
li len Uwumbor aalambil aah ye pu na.  
Ni yaa len kina kan, ni ga bee naah ga  
giin pu ki kii unii mɔmɔk na.

### Kookoo aadoon

<sup>7</sup> Tina aabo Tikikus u ti gee u na ga  
tuk nimi maabor mɔmɔk aah bi pu na. U  
ye timi aatutunjeer le Tidindaan aatuln  
ponn ni, ki tun lituln ngbaan mbamɔm.  
<sup>8</sup> M cha u dan ni chee ke u nan tuk nimi,  
timi aabor aah bi pu na, aan ki sɔŋ nsuui.  
Nima le m cha u dan ni chee. <sup>9</sup> Onesimus  
ni uma le dii ni. Onesimus mu ye tina  
aabo u ti gee u na la. U ter timi mbamɔm,  
ki ye ni ponn ni aanii ubaa la. Bima le ga  
tuk nimi do chee na aabor mɔmɔk.

<sup>10</sup> Aristakus u bi kiyondiik ni m chee  
na dooni nimi. Mak, u ye Banabas  
aaninkpan aajapɔɔn na, u mu dooni  
nimi. M nan tuk nimi naah ga ḥja u pu  
na. U yaa dan ni chee kan, ni gaa u iŋaal  
ilee. <sup>11</sup> Josua Justus mu dooni nimi. Bi-  
jab bitaa ngbaan ye Juu yaab la. Juu  
yaab ponn ni, bima baanja le ye maatu-  
tuunjeerb ki tun Uwumbor aanaan aatuln.  
Bijab ngbaan sɔŋ nsui la.

<sup>12</sup> Epafras mu dooni nimi. U ye ni ponn  
ni aanii ubaa la, ki ye Yesu Kristo aatu-  
tunn. U mee Uwumbor n-yoonn mɔmɔk

linimaln le ki tii nimi, ke ni li dii Uwumbor mbamɔm, ki taa di cha, ki kii Uwumbor aah gee pu na mɔmɔk.<sup>13</sup> M tuk nimi la, Epafras tun lituln linimaln, ki tii nimi, ni Laodisea aatiŋ aaniib, ni Hierapolis aatiŋ aaniib. <sup>14</sup> Luk u ye dɔkta, u ti gee u na mu dooni nimi. Demas mu dooni nimi.

<sup>15</sup> Ni li dooni tinaabitiib bi bi Laodisea aatiŋ ni na tii timi, ki li dooni Nimfa ni Yesu aaniib bi kuuni udo na, tii timi. <sup>16</sup> Bi

yaa karn kigbaŋ kee tii nimi kan, ni cha bi karn ki tii Yesu aaniib bi bi Laodisea aatiŋ ni na mu. Maah ŋmee kigbaŋ ki tii Laodisea aatiŋ aaniib na, ni mu karn ki. <sup>17</sup> Tuk Akipus ke Tidindaan aah tii u lituln li ke u tun na, u li nyi ki tun li mbamɔm.

<sup>18</sup> Min Pɔɔl le di ŋŋaal ŋmee idoon imina. Ni teer ke m bi kiyondiik ni la.

Uwumbor ŋa tinyoor ŋa ni pu. [Amii.]

*Njan aagbaŋ ki Poɔl ŋmee ki tii*

## **TESALONIKA YAAB**

*na*

**1** Min Poɔl, ni Silfanus, ni Timoti le ŋmee kigbaŋ kee ti tii Yesu aanib bi bi Tesalonika aatiŋ ni ki ye Tite Uwumbor ni Tidindaan Yesu Kristo aanib na. Uwumbor ja tinyoor ja ni pu, ki tii nimi nsuudoon.

### **Tesalonika yaab aabimbin**

<sup>2</sup> N-yoonn momok ti mee Uwumbor na, ti mee u tii nimi, ki dooni u ni momok pu. <sup>3</sup> Ti teer nimi Tite Uwumbor aanimbiin ni n-yoonn momok, ki teer ke naah ŋjani pu na, nima le mok ke ni gaa u ki kii; naah tun lituln pu na, nima le mok ke ni gee u; naah kpa limor pu na, nima le mok ke ni kpa limakl Tidindaan Yesu Kristo pu. <sup>4</sup> Tinaabitib bi Uwumbor gee bi na, ti nyi ke u lee nimi la; <sup>5</sup> ba pu? taah tuk nimi waabonyaan na, tibonyaan ngbaan aa nan ye iliin baanja, Uwumbor Aafuur Nyaan aapoon nan bi ti ni la, ki cha ni bee ke ti sil gbii. Taah nan bi nikaasisik ni buyoonn na, ni nan bee timi aabimbin aah nan bi pu na. Ti nan bi kina ke ti ter nimi la. <sup>6</sup> Le ni nan ŋakni timi ni Tidindaan; ba pu? ni gaa Yesu aabor ki kan falaa sakpen tibor ngbaan pu, ki mu nan kpa mpopiin mu Uwumbor Aafuur Nyaan tii nimi na. <sup>7</sup> Naah nan bi pu na, nima le mok Yesu aanib bimok bi Masedonia ni Akaya aatim ni na, bi mu aah ga li ŋjani pu na; <sup>8</sup> ba pu? ni nan chuun mooni Tidindaan aabor, ki tuk Masedonia ni Akaya aatim aanib. Naa ye nima yaab baanja, ntim momok aanib ŋjun ke ni gaa Uwumbor ki kii la. Nima pu na, taa ki ban ke ti tuk bi nimi aabor. Bi puun nyi. <sup>9</sup> Ba pu? binib ngbaan len ke taah nan dan ni chee na, ni nan gaa timi, ki di ŋjwaa lii, ki fenn ki dii Uwumbor, u ye

limofadaan ki ye Uwumbor bamonn na, <sup>10</sup> le ni kii bundaln Ujapoon Yesu ga nyan ni paacham ki gir ni na. Uma le Uwumbor nan fikr u nkun ni. Uma le nyan timi ntafadaan mu choo na ni.

### **Poɔl aah tuk Tesalonika yaab tibonyaan pu na**

**2** Tinaabitib, nimi nibaa nnyi ke taah nan dan ni chee na, naa ye fam. Ni nnyi ke taah nan bi Filipi aatiŋ ni na, <sup>2</sup> le nima yaab nan ja timi falaa, ki yook timi, le ti nin dan ni chee. Binib pam nan kpak timi kinikpakpak, le timi Aawumbor tii timi lipobil ke ti tuk nimi waabonyaan. <sup>3</sup> Taah tuk nimi waabonyaan ngbaan na, tibor ngbaan aa ye nnyamn. Taa ŋmann nimi. Ti nan bi chain la. <sup>4</sup> N-yoonn momok ti nan len Uwumbor aah ban ke ti len pu na; ba pu? u nan lik taah bi pu na, le ki di waabonyaan ngbaan ja tijaal ni, ke ti tuk binib. Nima pu le ti ban ke ti piir Uwumbor aasui, naa ye binib aasui. Uma Uwumbor le lik timi aasui ni aah bi pu na. <sup>5</sup> Ni nnyi ke taa nan gbaa nimi mmɔmɔɔn aabor. Uwumbor nnyi ke taa nan ye inimandam bi ŋmanni, ke binib taa bee ke ti ye na. <sup>6</sup> Taa nan ban ke ni nyuj timi, kaa nan ban ke binib biken nyuj timi. <sup>7</sup> Taah ye Kristo aakpambalb na, ti ba ga li ban ke ni nyuj timi. Le taa nan ban kina. Ti nan bi suuna ni chee ke upii aah bi pu waabim chee ki lik bi na la. <sup>8</sup> Ti gee nimi la. Nima pu na, ti nan kpa mpopiin ti tuk nimi Uwumbor aabonyaan. Naa ye tibonyaan baanja le ti nan tii nimi, ti nan di tibaa mu tii nimi; ba pu? ti gee nimi pam. <sup>9</sup> Nnaabitib, ni teer taah nan tun lituln linimaln pu na. Ti tuk nimi Uwumbor aabonyaan, ki tun lituln nwiin pu ni kinyeek mok, ke ti ji. Ba pu? taa nan ban ni ji ti pu falaa.

<sup>10</sup> Nimi bi gaa Yesu ki kii na, ti ja nimi mbamɔɔn la, ki nan bi chain, kaa nan kpa taani ubaa joo cha ni wɔb. Ni ni Uwum-

bør nyi ke ni ye mbamɔn la.<sup>11</sup> Ni nyi ke uja aah ḥjani waabim pu na, ti nan ḥjani nimi ubaabaa kina la;<sup>12</sup> ti sur nimi, ki nan ṣeŋni nisui, ki gaŋni nimi ke ni li dii Uwumbør waah ban pu na. Uma le yin nimi ke ni koo waanaan ni ki nan ji waamɔɔn.

<sup>13</sup> Ti dooni Uwumbør ni pu n-yoonn mɔmɔk la; ba pu? taah nan tuk nimi Uwumbør aabor na, ni nan gaa tibør ngbaan, ki bee ke naa ye binib aabor, ni ye Uwumbør aabor la. Mbamɔn, ni ye Uwumbør aabor la, ki kpelni nimi bi gaa u ki kii na aabimbin.<sup>14</sup> Nnaabitiib, ni ḥjakni Uwumbør aanib bi bi Judea aatim ni ki kuuni Yesu Kristo aayimbil pu na; kinye pu? nido yaab aah ḥja nimi falaa pu na, Juu yaab ḥja bi mu falaa kina la.<sup>15</sup> Bima Juu yaab nan ku Uwumbør aabɔnabtiib ni Tidindaan Yesu mu, ki jenn nyan timi mu. Baa piir Uwumbør aasui. Bi ye binib mɔmɔk aadim la,<sup>16</sup> ki kiir timi, kaa ban ke ti tuk binib bi kaa ye Juu yaab na tibɔnyaan tee, aan bi ḥmar. Juu yaab ngbaan aah ḥjani kina na, bi too kpae baatunwanbir pu n-yoonn mɔmɔk la. Uwumbør aarjuul pii bi kookoo.

### Pɔɔl aah neen ke u ki gir mann bi pu na

<sup>17</sup> Nnaabitiib, taah kaa kan nimi ni yunn siib na, naa mɔ timi. Taa nan bi ni chee, timi aalandak ma nan bi ni ni; tinimbił nan man ni pu, le ti nan pɔɔni tibaa ke ti ki kan nimi.<sup>18</sup> Ti nan ban ti gir dan ni chee. Min Pɔɔl, n-yoonn mɔmɔk m ban ke m gir dan ni chee. Le kinimbɔŋ kiir timi ke ti taa dan.<sup>19</sup> Tidindaan Yesu yaa nan gir ni kan, bilabi pu ti ga li kpa limakl, ni mpopiin, ni kipupuk unimbiin ni?<sup>20</sup> Naa ye nimi pu uu? Mbamɔn, ti kpa kipupuk ni mpopiin ni pu.

**3** Taah kaa bi ni chee na, taa ki ḥjmaa mɔr, nima le ti len ke ni ḥjan ti cha Timoti dan ni chee. Timi baanja le gur Atens aatiŋ ni.<sup>21</sup> Tina aabo Timoti ye

Uwumbør aatutunn u tuk binib Kristo aabɔnyaan na la. Ti cha u dan ni chee ke u pɔɔk nitaakpab Uwumbør aasan ni,<sup>3</sup> ubaa taa gir puwɔb falaa ngbaan pu. Nimi nibaa nyi ke falaa ngbaan ye Uwumbør aah siin timi pu na la.<sup>4</sup> Taah nan bi ni chee na ti nan tuk nimi ke ti ga ji falaa, le ni bee ke ni sil ḥja kina.<sup>5</sup> Le maa ki ḥjmaa mɔr. Nima le cha m tun ni Timoti ni chee, ke u nan lik ke ni beenin dii Yesu mbamɔn aan naa dii. Ni muk mi la, m dak ke nibaakan kinimbɔŋ ṣeŋ nimi, ki timi aatuln yɔli.

<sup>6</sup> Le Timoti ki nyan ni ni chee; dandana u ki fuu ni ti chee, ki tuk timi tibɔnyaan ke ni beenin tii Yesu naadii mbamɔn, ki gee tɔb. U tuk timi ke ti bi nisui ni n-yoonn mɔmɔk, le ni ban ke ni ki kan timi, ke ti mu aah ban ke ti kan nimi pu na.<sup>7</sup> Tinaabitiib, ti bi limukl ni ki ji falaa la; le ti ḥjun naah tii Yesu naadii pu na, nima le tisui ṣeŋ.<sup>8</sup> Ni yaa dii Tidindaan aasani, kaa di cha kan, nima le ti fuur.<sup>9</sup> Nima pu na, taa ki nyi taah ga ki pak Uwumbør ni pu pu na; ba pu? ti kpa mpopiin sakpen ki mɔɔni ni pu, Uwumbør aanimbiin ni.<sup>10</sup> Ti mee u linimaln nwiin pu ni kinyeek mɔk ke u cha ti ki kan nimi ki tuk nimi naah kaa kee bee waabor pu na.

<sup>11</sup> M mee Tite Uwumbør ni Tidindaan Yesu ke bi tii timi nsan aan ti dan ni chee.<sup>12</sup> Tidindaan cha ni li moo gee tɔb ni binib mɔmɔk, ke taah gee nimi pu na.<sup>13</sup> U tii nimi mpɔɔn ke ni li bi chain ki taa li kpa taani ubaa Tite Uwumbør aanimbiin ni, bundaln Tidindaan Yesu ni waanib mɔmɔk ga gir ni na.

### Mbimbin mu piir Uwumbør aasui na

**4** Tinaabitiib, ti nan mɔk nimi naah ga ḥja pu ki piir Uwumbør aasui na. Le ni ḥjani kina. Ti gaŋni nimi, ki sur nimi Tidindaan Yesu aayimbil pu ke ni li moo ḥjani kina.<sup>2</sup> Ni bee taah nan sur nimi pu Tidindaan Yesu aayimbil pu na.<sup>3</sup> Uwum-

bɔr aageehn le ye ke ni li bi chain, ki taa gɔr kidagook.<sup>4</sup> Ni ɔjan ke ni mɔmɔk bee naah ga ja pu ki li joo tiwon mbamɔm aan ti li bi chain, ki tun lituln li ɔjan na.<sup>5</sup> Ubaa taa cha bipiib aakpeek li bi u ni, ke binib bi kaa nyi Uwumbɔr na aah bi pu na.<sup>6</sup> Uja ubaa taa li ban una aabɔ aapuu ki tun titunwanbir timina. Ti nan tuk nimi ki sur nimi mbamɔm ke Tidindaan dar binib aatafal titunwanbir ngbaan mɔmɔk pu.<sup>7</sup> Uwumbɔr yin timi ke ti li bi chain. Waa yin timi ke ti li gɔr kidagook.<sup>8</sup> Unii umɔk yii mmɔkm ngbaan na, naa ye binib aamɔkm le u yii, u yii Uwumbɔr u tii nimi Waafuur Nyaan na aamɔkm la.

<sup>9</sup> Uwumbɔr mɔk nimi naah ga li gee tɔb pu na. Nima pu na, naa ki ban ke m ɔmee kigbaŋ ki tuk nimi naah ga li gee ninaabitiib pu na.<sup>10</sup> Ni ye mbamɔn la, ni gee tinaabitiib bimɔk bi Masedonia aatim mɔmɔk ni na. Ti gaŋni nimi, ni li moo gee bi.<sup>11</sup> Cha ninimbil li man ke ni li bi suuna, ki li tun nimi aatuln, ki di nimi aŋŋaal tun lituln, ke taah nan tuk nimi pu na.<sup>12</sup> Ni yaa ɔjani kina kan, naan lann nibaa; binib bi kaa dii Uwumbɔr aasan na mu ga pak nimi.

### Tidindaan aah ga nan gir ni pu na

<sup>13</sup> Tinaabitiib, ti ban ke ni bee binib bi kpo na aabɔr, aan ki taa li kpa mpombiin, ke binib bi kaa kpa limakl na aah kpa mpombiin pu na.<sup>14</sup> Ti pak ke Yesu nan kpo, ki ki fikr nkun ni. Nima pu le ti pak ke Uwumbɔr ga fikr Yesu aanib bi kpo na mu, ki cha bi li dii u bundaln u ga gir ni na.

<sup>15</sup> Taah ban ti tuk nimi tibɔr ti na, ti ye Tidindaan aabɔr la. Tidindaan aanib bi ga li bi dulnyaa wee ni bundaln u ga gir ni na aan puen binib bi kpo na ki buen paacham.<sup>16</sup> Ba pu? Tidindaan ubaa ga nyān ni paacham ki sunn ni. U yaa sunn ni kan, le ti ga ɔyun nneel sakpiin, ni Uwumbɔr aatuuntiib aaninkpel aaneel,

ni Uwumbɔr aakakaan aawiil.<sup>17</sup> Njan, Yesu aanib bi kpo na le ga fikr nkun ni, le Uwumbɔr nin kpaan yoor bi ni waanib bi mu ga li bi n-yoonn ngbaan na, le bi ti tooh Tidindaan ntaalangbam ni, paacham. Kina le ti ga li bi Tidindaan chee n-yoonn mu kaa kpa ndoon na.<sup>18</sup> Nima pu na, ni li tuk tɔb kina, aan ki sɔŋ tɔb aasui.

### Gor ki li kii Tidindaan aagirndaal

**5** Nnaabitiib, naa ki ban ke m ɔmee ki tuk nimi bundaln tiwan nimina mɔmɔk ga ja na.<sup>2</sup> Ba pu? nimi nibaa nyi mbamɔm ke Tidindaan aawiindaal ga fuu ni ke unaayuk aah fuur ni kinyeek pu na la.<sup>3</sup> Buyoonn binib ga len ke bi bi bibaa pu, nibaa aan ja bi nibaa na, libuul ngbaan ni le tibɔbir ga lir bi pu. Ni ga li bi ke imalween aah chuu upii pu na la. Baan ɔmmaa nyan ti.<sup>4</sup> Nnaabitiib, nima aa bi mbɔmbɔɔn ni. Nima pu na, ni taa cha Tidindaan aawiindaal ja nimi lijinjiir ke unaayuk aah fuur ni pu na.<sup>5</sup> Ba pu? ni mɔmɔk ye nwiihn ni aabim la. Ni ye nwiin pu aabim la. Taa ye kinyeek yaab, kaa ye mbɔmbɔɔn ni yaab.<sup>6</sup> Nima pu na, ti taa li geeni, ke biken aah geeni pu na. Cha ti li kii, ki chuu tibaa man.<sup>7</sup> Binib bi dɔ geen na, kinyeek le bi dɔ geen. Binib bi nyu ndaan gbii na, kinyeek le bi gbii.<sup>8</sup> Tima ye nwiin pu aabim la, nima pu na, cha ti chuu tibaa man. Cha ti tii Yesu naadii, ki li gee tɔb. Ti yaa ɔjani kina kan, nima le ga biin ti pu, ke tikur ti bii kibij pu na. Le ti yaa kpa limakl ke ti ga sil ɔmar kan, ni ga li bi ke tikur aayikpupuk ki bii tiyil na.<sup>9</sup> Uwumbɔr aah lee timi na, waa lee timi ke u gee lijuul ti pu, u lee timi ke ti ɔmar Tidindaan Yesu Kristo pu la.<sup>10</sup> Uma le nan kpo ti pu. Nima pu na, ti yaa bi, bee ti yaa kpo bundaln u ga gir ni na kan, ti ga buen ti li bi u chee.<sup>11</sup> Nima pu na, ni li pɔɔni tɔb aataakpab, ki li ter tɔb, ni

li moo dii Uwumbor aasan mbamɔm, ke naah ɻani pu dandana wee na.

### Kookoo aasurm ni idoon

<sup>12</sup>Tinaabitiib, ti gaŋ nimi, ke ni li pak nimi aaninkpiib bi tun Tidindaan aat-uln nikaasisik ni, ki sur nimi waasan ni na. <sup>13</sup>Ni li pak bi mbamɔm, ki li gee bi baatuln pu. Ni mɔmɔk li kpaan kimɔbaan man.

<sup>14</sup>Tinaabitiib, ti gaŋ nimi, ke ni sur binib bi kaa ban bi tun lituln na, ki li pɔɔni binib bi aataakpab yɔl na aataak-pab, ki ter binib bi kaa pɔɔ na, ki li kpa limɔr binib mɔmɔk pu. <sup>15</sup>Ni taa cha unii ubaa teen uken waah ɻa bakaa u na pu. Pɔɔn nibaa man ki li ɻani tɔb, ni binib mɔmɔk tibulchinn, n-yoonn mɔmɔk.

<sup>16</sup>Ni li kpa mpopiin n-yoonn mɔmɔk, <sup>17</sup>ki li mee Uwumbor n-yoonn mɔmɔk, <sup>18</sup>ki li dooni u tiwan mɔmɔk pu. Uwumbor aageehn le ye ke ni li ɻani kina; ba pu? ni ye Yesu Kristo aanib la.

<sup>19</sup>Ni taa yi Uwumbor Aafuur Nyaan aah ban pu na. <sup>20</sup>Unii yaa len Uwumbor Aafuur Nyaan aah tii u iluin i na kan, ni taa lik iluin ngbaan fam. <sup>21</sup>Ni li lik tibɔr mɔmɔk aah bi pu na, ke ti ɻan aan taa ɻan, ki li joo ti ɻan na mbamɔm. <sup>22</sup>Ni yi man isan i kaa ɻan na mɔmɔk aabɔj.

<sup>23</sup>Uwumbor u tii timi nsuudoon na, ɻa nimi aabimbin mɔmɔk chain, ki li joo nimi aawiin, ni nisui, ni nimi aawon mbamɔm, ni taa li kpa taani ubaa bundaln Tidindaan Yesu Kristo ga gir ni na. <sup>24</sup>Uwumbor u yin nimi na ye mbamɔndaan la, ki ga ɻa nimina mɔmɔk.

<sup>25</sup>Tinaabitiib, ni mee Uwumbor tii timi.

<sup>26</sup>Ni doon tinaabitiib mɔmɔk mbamɔm.

<sup>27</sup>M gaŋ nimi Tidindaan aayimbil pu ke ni cha bi karn kigbaŋ kee tii tinaabitiib mɔmɔk.

<sup>28</sup>Tidindaan Yesu Kristo ɻa tinyoor ɻa ni pu. [Amii.]

*Lelee aagbaŋ ki Poɔl ɻmee ki tii*

## TESALONIKA YAAB

*na*

**1** Min Poɔl, ni Silfanus, ni Timoti le ɻmee kigbaŋ kee ti tii Yesu aanib bi bi Tesalonika aatiŋ ni ki ye Tite Uwumbor ni Tidindaan Yesu Kristo aanib na. <sup>2</sup>Tite Uwumbor ni Tidindaan Yesu Kristo ɻja tinyoor ɻja ni pu ki tii nimi nsuudoon.

### Uwumbor aah ga daa binib aatafal pu na

<sup>3</sup>Tinaabitiiib, ni ɻjan ke ti li dooni Uwumbor ni pu n-yoonn mɔmɔk; ba pu? ni moo gaal Yesu ki kii mbamɔm ki moo gee tɔb la. <sup>4</sup>Nima pu le ti puk kipupuk ni pu Uwumbor aanib chee, ki tuk bi naah gaa Yesu ki kii ki kpa limɔr, falaa ni limukl mɔmɔk ponn ni pu na.

<sup>5</sup>Binib aah ɻjani nimi falaa pu na, nima le mɔk ke Uwumbor yaa daa bitafal kan, ni ɻjan. Naah ji falaa pu na, Uwumbor aanaan pu le ni ji. Nima le Uwumbor ga len ke ni ɻneer ke ni koo waanaan ngbaan ni. <sup>6</sup>Ni ye mbamɔn, Uwumbor len ke ni ɻjan ke binib bi ɻjani nimi falaa na, u mu ɻja bi falaa, <sup>7</sup>ki tii timi ni nimi bi ji falaa na lifuur. Ti ga kan lifuur ngbaan bundaln Tidindaan Yesu ga nyan ni paacham ki mɔk waah bi pu na. U ni waatuuntiib ga nyan ni paacham ni mpɔɔn, <sup>8</sup>ki li joo ni mmiigaal u nan daa binib aatafal. Binib bi yii Uwumbor na, ni binib bi kaa kii Tidindaan Yesu aabɔnyaan tee na, u ga daa bima le aatafal. <sup>9</sup>Tidindaan ga nyan bi unimbiin ni, waapɔɔn ni waawiihn sakpiin chee. U ga daa bitafal, ki cha bi ji falaa n-yoonn mu kaa kpa ndoon na. <sup>10</sup>Bi ga kan ntafadaan ngbaan bundaln Tidindaan ga gir ni na. Liyaadaal ngbaan le waanib bi mɔmɔk gaa u ki kii na ga nyuj u, ki pak u. Ni mu ga li bi waanib ngbaan

ponn ni; ba pu? taah tuk nimi Yesu aabor na, ni gaa ti ki kii la.

<sup>11</sup>Nima pu le ti mee timi Aawumbor tii nimi n-yoonn mɔmɔk ke u len ke ni ye binib bi ɻneer waayim na, ki ter nimi ke ni li ban ni ɻja tiwan ni ɻjan na, ki tii nimi mpɔɔn ke ni li ɻjani kina, ki tun lituln li ga mɔk ke ni gaa Yesu ki kii mbamɔm na. <sup>12</sup>Ni yaa ɻjani kina kan, nima le ga nyuj Tidindaan Yesu Kristo, le u mu ga nyuj nimi, u ni Uwumbor aabulchinn pu.

### Mbiindaan na

**2** Tinaabitiiib, ti ban ke ti len ni chee ki joo cha bundaln Tidindaan Yesu Kristo ga gir ni ki nan kuun timi u chee na aabor la. <sup>2</sup>Bi yaa len ke Tidindaan aawiindaal fuu ni kan, ti ɻgaj nimi ke ni taa cha nipobil yuk, ki taa cha ni li muk nimi. Nibaakan, bi ga bui ke Uwumbor Aafuur Nyaan mɔk bi kina la, nibaakan, bi ga bui ke ti ɻmee kigbaŋ ki len kina la. <sup>3</sup>Ni taa cha ubaa ɻmann nimi kina; buyoonn binib pam ga yii Uwumbor na le ga puen fuu ni, le Tidindaan aawiindaal nin fuu ni. Uja u yii Uwumbor aakaal mɔmɔk na, u mu ga puen nya mpaan pu. Uwumbor siin u ntafadaan la. <sup>4</sup>U ga yii Uwumbor, ni ɻjiwaai, ni tiwan nimɔk binib dii ni na. U ga nyuj ubaa ki jer ni mɔmɔk, ki ga kal Uwumbor Aadichal ni, ki len ke uma le ye Uwumbor.

<sup>5</sup>Naa teer aa? Maah nan laa bi ni chee na, m nan tuk nimi tibɔr tee. <sup>6</sup>Le ni nyi tiwan ni kiir titunwanbirdaan ngbaan dandana wee na. Waayoonn yaa nan fuu ni kan, u ga nya mpaan pu. <sup>7</sup>Titunwanbir ti bɔɔ na, binib ɻjani ti dandana wee la. Le unii u kiir titunwanbir ngbaan dandana wee na ga kiir ti, ki nan saa buyoonn Uwumbor ga nyan u nima na. <sup>8</sup>N-yoonn ngbaan le titunwanbirdaan ngbaan ga kpiir. N-yoonn ngbaan le Tidindaan Yesu ga gir ni, ni mpɔɔn, ki pii libuln lii u pu, ki ku u, ki ɻja waapɔɔn mɔmɔk yɔli. <sup>9</sup>Titunwan-

birdaan ngbaan yaa nan fuu ni kan, u ga li kpa kinimbɔŋ aapcɔn, ki tun kaat-uln, ki li kpa mpɔɔn ki ɣmann ke u tun lijinjiir aatun la,<sup>10</sup> ki li kpa nlan mu kaa ɣan na ke u ɣmann binib bi Uwumbɔr ga daa bitafal na. Bi yii Uwumbɔr aabɔr ti ga cha bi ɣmar na, kaa gee ti. Nima le Uwumbɔr ga daa bitafal.<sup>11</sup> Baah yii Uwumbɔr aabɔr na, nima le u cha nnyamɔn aapak bi bisui ni, bi li pak nnyamɔn.<sup>12</sup> Nima pu na Uwumbɔr ga len ke binib bi gee titunwanbir kaa pak mbamɔn na aabɔr bii a.

### **Uwumbɔr aah lee nimi pu na**

<sup>13</sup>Tɔ, tinaabitiib bi Tidindaan gee bi na, ni ɣan ke ti li dooni Uwumbɔr ni pu n-yoonn mɔmɔk; ba pu? tiwan mɔmɔk aah nan piin buyoonn na, u nan lee nimi ke ni ɣmar. Waafuur Nyaan ɣa nimi binib bi bi chain ki pak mbamɔn, aan ki ɣmar na.<sup>14</sup> Taah tuk nimi Uwumbɔr aabɔnyaan ti na pu, le u yin nimi ke ni ɣmar ki ji Tidindaan Yesu Kristo aamɔɔn.<sup>15</sup> Nnaabitiib, nima pu na, ni li dii u mbamɔm, ki taa di cha. Taah tuk nimi Uwumbɔr aabɔr ti, timɔb ni, ni kigbaŋ ni pu na, ni li joo tibɔr ngbaan mbamɔm.

<sup>16</sup>Tɔ, Tite Uwumbɔr gee timi sakpen. Waabulchinn pu, le u tii timi lipobisoon li kaan doo na, ni limakl nyaan.<sup>17</sup> Uma ni Tidindaan Yesu Kristo ubaa pɔɔn nitaakpab, ki tii nimi mpɔɔn ke ni tun litunyaan mɔmɔk, ki len iliinyaan mɔmɔk.

### **Mee Uwumbɔr tii timi man**

**3** Tinaabitiib, tibɔr ti gur na le ye ke ni li mee Uwumbɔr ki tii timi, ke u cha waabɔr moon ɣipepel mɔmɔk mala, ki kan mpakm ke naah pak ti pu na,<sup>2</sup> ki li mee u ke u nyan timi titunwanbirdam bi kaa ɣan na aaŋaal ni; ba pu? naa ye binib mɔmɔk le gaa Yesu ki kii.

<sup>3</sup>Tidindaan le ɣani waah len pu na, ki ga tii nimi mpɔɔn, ki biin ni pu, kinimbiŋ ki kaa ɣan na taa ja nimi nibaa.<sup>4</sup> Tidindaan pu le ti bee ke ni ɣani taah tuk nimi pu na, ki ga li beenin ɣani kina.

<sup>5</sup>Tidindaan ter nimi ke ni bee nisui ni Uwumbɔr aah gee nimi pu na, ki li kpa limɔr Kristo aah tii nimi pu na.

### **Ni ɣan ke unii mɔmɔk li tun**

<sup>6</sup>Tinaabitiib, ti tuk nimi Tidindaan Yesu Kristo aayimbil pu la, ninaabitiib bimɔk kaa ban ke bi tun lituln, kaa dii taah tuk nimi pu na, ni nya bi chee.<sup>7</sup> Ni bee ke ni ɣan ni li dii ke taah dii pu na. Taah nan bi ni chee buyoonn na, taa nan san ligbanyakl.<sup>8</sup> Ti nan pa taah jin ti-jikaar ti na mɔmɔk pu la, ki tun lituln linimaln nwiin pu ni kinyeek mɔk; ba pu? taa nan ban ni ji ti pu falaa.<sup>9</sup> Naa ye ke taa nan kpa nsan ti ji niŋaal ni la. Ti nan ban ti mɔk nimi limɔkl, ni li dii ke taah dii pu na.<sup>10</sup> Taah nan bi ni chee buyoonn na, ti nan tuk nimi ke unii umɔk kaa ban u tun lituln na kan, u taa ji.

<sup>11</sup>Ti ɣun ke ni ponn ni bibaa san ligbanyakl, kaa tun lituln libaa, ki chuuñ koo biken aabɔr ni.<sup>12</sup> Binib bi bi kina na, ti tuk bi, ki sur bi Tidindaan Yesu Kristo aayimbil pu, ke bi li bi suuna, ki tun lituln ki kan ki ji.<sup>13</sup> Tinaabitiib, nima kan, ni yaa tun litunyaan kan, ni taa cha ni-taakpab li yol li ponn ni.

<sup>14</sup>Unii ubaa yaa kaa dii taah tuk nimi kigbaŋ kee ponn ni pu na kan, ni daan udaan ngbaan, ki taa kpaan u chee. Nima le ga cha inimɔɔn chuu u.<sup>15</sup> Ni taa ɣani u ke nimi aadin na, ni li sur u ke nina aabo na.

### **Kookoo aabɔr**

<sup>16</sup>Tidindaan u tii timi nsuudoon na tii nimi nsuudoon n-yoonn mɔmɔk, tiwan mɔmɔk ponn ni. Tidindaan li bi ni mɔmɔk chee.

<sup>17</sup> Min Pooł le di ŋjaal ŋmee idoon imina. Nimina ye kidaan la, le ki mɔk maagbann mɔmɔk ponn ni. Kina le m ŋmee.

<sup>18</sup> Tidindaan Yesu Kristo ŋa tinyoor ŋa ni mɔmɔk pu.

*Njan aagbanj ki Pɔɔl ŋmee ki tii*

## TIMOTI

*na*

**1** Min Pɔɔl ye Yesu Kristo aakpambal la; ba pu? Uwumbor u gaal timi lir na, ni Tidindaan Yesu Kristo u tii timi limakl na, bima le len ke m li ye waakpambal. <sup>2</sup>M ŋmee kigbanj kee m tii si Timoti, u ye maabo bamɔnn Uwumbor aasan ni na la. Tite Uwumbor ni Tidindaan Yesu Kristo ḥa tinyoor ḥa aa pu, ki san si kinimbaak, ki tii si nsuudoon.

### Tinyamɔnbor aasurm

<sup>3</sup>Maah nan cha Masedonia aatin ni na, m nan bui si ke aa li beenin bi Eesus aatin ni; ba pu? binib bibaa bi nima ki mɔk binib mmɔkm mu kaa ye Yesu aamɔkm na. Aa sur bi ke bi taa ki mɔk kina, <sup>4</sup>ki taa ki joo ḥiyimbil ḥi bi Uwumbor Aagbanj ni na tiini ittiin baah nan ḥani pu na. Nimina le cha binib baa mbaan. Naa ter bi ke bi gaa Yesu ki kii aan ki dii waasan mbamɔm. <sup>5</sup>M tuk si ke aa sur bi kina; ba pu? m ban ke Yesu aanib aasui li bi chain, ki ban ke bi bee bisui ni ke titunwanbir aa bi bi chee, ki gaa Yesu ki kii mbamɔm, ki li gee tɔb. <sup>6</sup>Binib bibaa bi, kaa ki dii kina. Bi yenn la, ki gbaa tɔb chee tibɔr ti ye fam na. <sup>7</sup>Bi ban bi li ye bimɔmɔkb bi mɔk binib Uwumbor aakaal na, ki mu aa bee baah len pu na aatataa, ki len tibɔr ke binib bi nyi taatataa na, ki mu aa nyi.

<sup>8</sup>Tɔ, ti nyi ke unii yaa joo Uwumbor aakaal, uma Uwumbor aah ban pu na kan, nkaal ngbaan ḥan la. <sup>9</sup>Ti yaa nyi ke nkaal aa bi bininyaam pu kan, nkaal ngbaan ḥan la. Mu bi tiniwanbir le pu, ni binib bi kaa gee bi ḥun tibɔr na, ni binib bi kaa dii Uwumbor aasan na, ni titunwanbirdam, ni binib bi yii Uwumbor kaa pak u na, ni binib bi ku bitetiib

ni binatiib na, ni binib bi ku biken na, <sup>10</sup>ni binib bi gor kidagook na, ni bijab bi yii bipiib ki ban bijab na, ni binib bi chur biken tinaagbiir na, ni binib bi chuun mɔni inyamɔn na, ni binib bi puur Uwumbor yɔl yɔl na, ni binib bi ḥani tiwan ni kaa dii mmɔkm mu ḥan na. Nkaal ngbaan bi titunwanbir timina mɔmɔk pu la. <sup>11</sup>Uwumbor aabonyaan len kina la, ki tuk timi Uwumbor u ti pak u na aah ḥan sakpen pu na. Uma le di tibɔnyaan tee ḥa ḥjaal ni, ke m di tuk binib.

### Uwumbor aah san Pɔɔl kinimbaak pu na

<sup>12</sup>M dooni Tidindaan Yesu Kristo u tii mi mpɔɔn ke m tun lituln ngbaan na la. U len ke m ye mbamɔndaan, ki lee mi ke m tun waatuln. <sup>13</sup>N-yoonn mu jer na, m nan len tibɔbir u pu, ki seei u, ki ḥa waanib falaa. Maah kaa nan gaa u ki kii n-yoonn ngbaan na, le maa nan nyi ke m ḥani ni kaa ḥan na. Maah kaa nan nyi na, le Uwumbor san mi kinimbaak, <sup>14</sup>le Tidindaan Yesu Kristo mu gee mi sakpen, ki cha m gaa u ki kii, ki kpaan u ni, ki gee u ni waanib mɔmɔk. <sup>15</sup>Yesu Kristo nan dan dulnyaa wee ni ke u nan nyan titunwanbirdam baatunwanbir ni la. Tibɔr timina gbii la. Ni ḥan ke binib mɔmɔk gaa ti ki kii. Min le ye titunwanbirdaan ki jer binib mɔmɔk. <sup>16</sup>Le Uwumbor san mi kinimbaak. Yesu Kristo ḥa suklaa, min u ye titunwanbirdaan ki jer binib mɔmɔk na pu sakpen la. Waah ḥa mi suklaa pu na, nima le mɔk binib bi ga gaa u ki kii ki kan limofal li kaa kpa ndoon na, waah kpa suklaa pu na. <sup>17</sup>Cha ti pak Uwumbor, ki nyuŋ u. Uma le ye Uwumbor baan; tinimbil aa waa u; u ye Ubɔrkpaan u ga li bi n-yoonn mu kaa kpa ndoon na, kaan kpo. Amii.

<sup>18</sup>Maabo Timoti, Uwumbor Aafuur Nyaan nan cha m len tibɔr aa pu, nima le cha m tuk si saah ga tun Uwumbor aatuln pu na. Cha Nfuur Nyaan aabor ng-

baan tii si mpcoon ke aa yii kinimbɔŋ, <sup>19</sup> ki tii Yesu naadii mbamɔm, ki taa di cha, ki li ɔjani tiwan ni aa bee ke ni tok na. Binib bibaa bi, ki nyi ni ɔjan na, ki mu aa ɔjani kina. Nima le baa ki dii Yesu aasan. <sup>20</sup> Bi ponn ni binib bilee ye Haimeneus ni Aleksanda. Le m di bi ɔja kinimbɔŋ aajaal ni ke ki daa bitafal, aan bi bee ke naa ɔjan bi ki sii Uwumbɔr.

### Naah ga li dooni Uwumbɔr pu na

**2** Tɔ, tibɔr ti ye tibɔkpaan na le ye ke m ban ke ni li mee Uwumbɔr kii tii binib mɔmɔk, ki li gajni u ke u san bi kinimbaak, ki li dooni u bi pu. <sup>2</sup> Ni li mee Uwumbɔr kina ki tii bibɔrb, ni kitij aayidam mɔmɔk, aan ti li bi tibaa pu, ki li kpa nsuudoon, ki li dii Uwumbɔr aasan, ki li ɔjani tiwan mɔmɔk mbamɔm.

<sup>3</sup> Ni yaa mee Uwumbɔr kina kan, ni ɔjan, ki piir Uwumbɔr u gaal timi lir na aasui. <sup>4</sup> U ban ke binib mɔmɔk ɔjmar, aan ki bee waabor ti ye mbamɔn na. <sup>5</sup> Ba pu? Uwumbɔr ye Uwumbɔr baan la. Uchandatuln ubaa baanja le bi Uwumbɔr ni binib aakaasisik ni. Uma le ye Yesu Kristo u nan kpalm unibɔn, <sup>6</sup> ki sil binib mɔmɔk aasisiyyaan ki kpo, ke u gaa bi lii na. Naah nan neer buyoonn na le Uwumbɔr mɔk timi tibɔnyaan ngbaan. <sup>7</sup> Nima pu le Uwumbɔr lee mi ke m li ye Yesu aakpambal, ke m tuk binib bi kaa ye Juu yaab na Yesu aabor ngbaan, ke bi gaa u ki kii, ki bee waabor ti ye mbamɔn na. Maa mɔn nnyamɔn, maah len pu na gbii la.

<sup>8</sup> M ban ke bijab bi bi ɔjipepel mɔmɔk na mee Uwumbɔr, ki yoor ijaal paacham. Bi li ye binib bi bi chain na, ki taa li kpa lijuul, ki taa li kpa kinikpapkak.

<sup>9</sup> M ban ke bipiib li pee tiwanpeenkaan ni neer bipiib bi dii Uwumbɔr na, ki li bi suuna, ki taa li kpa kalmbaani, ki taa fiini tiyikpir sakpen siini, ki taa tuun

ɔjitafojɔŋ ɔji kpa kidaak na, ki taa gbin nleen mu kpa kidaak na, ki taa li peeni tiwanpeenkaan ni kpa kidaak na. <sup>10</sup> Bi li tun litunyaan. Nima le ɔjan tii bipiib bi len ke bi dii Uwumbɔr aasan na. <sup>11</sup> Bi li ɔjmin ki li bae Uwumbɔr aabor ki li ɔjun tibɔr. <sup>12</sup> Maa kii ke bipiib tuk bijab Uwumbɔr aabor, kaa kii ke bi li ye bijab aayidam. Bi li ɔjmin. <sup>13</sup> Ba pu? Uwumbɔr nan puen naan tiyaaja Adam, le ki nin naan upuu If. <sup>14</sup> Kinimbɔŋ aa nan ɔjmann Adam, ki nan ɔjmann upii ngbaan la, le u tun titunwanbir. <sup>15</sup> Tɔ, bipiib mu yaa gaa Yesu ki kii, ki gee binib, ki bi chain, ki bi suuna kan, bi ga ɔjmar imalween ni.

### Bisalolm aabor

**3** Tibɔr tee gbii la, ke unii yaa ban u li ye Yesu aanib aaninkpel kan, ni ɔjan; ba pu? li ye lituln li ɔjan na la. <sup>2</sup> Ni ɔjan ke Yesu aanib aaninkpel taa li kpa taani ubaa. Ni ɔjan u li joo upiibaab, ki li chur ubaa tiwan mɔmɔk ni, ki li kpa laasaab, ki li bi mbamɔm, ki li channi bicham tichann, ki li ye unii u ga ɔjmaa tuk binib Uwumbɔr aabor mbamɔm na. <sup>3</sup> U taa li ye udagbiir, ki taa gbaa binib [ki taa li kpa iniman]. U li bi suuna ki taa li kpa kinikpapkak. Unimbil taa li man ɔjimobil pu. <sup>4</sup> Ni ɔjan ke u li joo waachiln ni aanib mbamɔm, ki li joo waabim mbamɔm, aan bi li pak u ki kii waamɔb. <sup>5</sup> Ba pu? unii yaa kaa ɔjmaa joo waachiln ni aanib mbamɔm kan, u ga ɔja kinye ki li joo Yesu aanib? <sup>6</sup> U taa li ye unii u kaa yunn Uwumbɔr aasan ni na. U yaa ye unii u kaa yunn Uwumbɔr aasan ni na kan, nibaakan, u ga li kpa kigaak, ki kan ntafadaan ke kinimbɔŋ na. <sup>7</sup> Ni ɔjan ke Yesu aanib aaninkpel li ye unii u kpa kipak binib bi kaa dii Yesu aasan na chee, aan binib taa galn u ki cha u lir kinimbɔŋ aagaawɔb ni.

### Biteterb aabør

<sup>8</sup>Tɔ, ki joo cha Yesu aanib aateterb wɔb na, ni ɔjan ke bi mu li kpa laasaab. Bi taa len fam fam. Bi li ɔjani baah len pu na. Bi taa li ye bidagbiib. Binimbil taa li man ɔjimobil pu. <sup>9</sup>Ni ɔjan ke bi li joo tibɔrkaan ti kpiir, ki ye Yesu aabør na, ki li nyi mbimbin mu ɔjan na, ki li ɔjani kina. <sup>10</sup>Binib yaa ban bi li ye biteterb kan, cha Yesu aanib aaninkpiib puen lik baabimbin aah bi pu na waahr, bi yaa kaa kpa taani kan, cha bi li tun biteterb aatuln. <sup>11</sup>Ni ɔjan ke bipuutiib mu li kpa laasaab, ki li chur bibaa, ki li ɔjani tiwan mɔmɔk mbamɔm, ki taa li ye binibiniib. <sup>12</sup>Ni ɔjan ke Yesu aanib aateterb li joo upii ubaabaa, ki li joo baabim ni baachiln ni aanib mbamɔm. <sup>13</sup>Binib bi tun biteterb aatuln ngbaan mbamɔm na ga kan liyimbil, ki li kpa lipobil sakpen ki tuk binib baah ga gaa Yesu Kristo ki kii pu na.

### Tibɔrkaan kpaan

<sup>14</sup>Tɔ, m kpa limakl ke naan yunn, m ga dan aa chee. Le maah ɔmee kigbaj kee tii ni si na, <sup>15</sup>m yaa yunn kan, aa ga bee mbimbin mu ɔjan tii Uwumbɔr Aadichal ni aanib, bi ye Uwumbɔr u ye limɔfadaan na aanib na. Waabor ti ye mbamɔn na bi biŋaal ni la, le bi joo ti. <sup>16</sup>Uwumbɔr aah kpiir waasan aabør ti tuk timi na, ti ye tibɔrkaan la:

U nan yoor unibɔn aawon, ki nyan ubaa mpaan pu.

Uwumbɔr Aafuur Nyaan le mɔk ke u ɔjan. Uwumbɔr aatuuntiib waa u.

Binib moon waabor ki tuk ɔitimbor aanib,  
le binib gaa u ki kii dulnyaa wee mɔmɔk ni.

Uwumbɔr nan yoor u ki di buen paacham, ki nyuŋ u.

### Bimɔmɔkb bi ye binyamɔndam na

**4** Tɔ, Uwumbɔr Aafuur Nyaan len mpaan pu, ke n-yoonn mu choo na binib bibaa ga yii Yesu aabør, ki kii inyamɔn, ki dii bipɔnib bi ɔmanni bi na. <sup>2</sup>Bipɔnib ngbaan ga cha binib bibaa ɔmann ke bi mɔk binib Uwumbɔr aasan. Bi ye binyamɔndam la. Baalandak aa ki muk bi baatunwanbir pu. <sup>3</sup>Bi ga len ke bijab taa din bipiib, bipiib mu taa mɔn bijab. Bi ga li kɔ tijikaar tibaa. Uwumbɔr le naan tijikaar ngbaan. U ban ke binib bi gaa u ki kii ki nyi mbamɔn na le ji ti, ki doon u ti pu. <sup>4</sup>Tiwan nimɔk Uwumbɔr naan ni na, ni ɔjan la. Ti taa li kɔ tijikaar tibaa. Ti li ji ti, ki li dooni u ti pu. <sup>5</sup>Ba pu? taah ji tijikaar ti ki dooni Uwumbɔr ti pu na, nibaa aa bi ti ni; ba pu? Uwumbɔr len ke ti ɔjan.

### Yesu Kristo aatutunn bamɔnn

<sup>6</sup>Aa yaa teer Yesu aanib tibɔr timina kan, aa ye Yesu Kristo aatutunn bamɔnn la. Saah bae Yesu aabør ki dii nsanyaan pu na, nima le cha saabimbin bi mbamɔm. <sup>7</sup>Aa taa gar binyamɔndam ngbaan aatiin; ba pu? itiin ngbaan aa kpa tinyoor ki tii si, kaa mɔk si Uwumbɔr aasan. Chuu aabaa ki bae Uwumbɔr aabør. <sup>8</sup>Unii yaa san ke uwon yabr kan, ni kpa tinyoor siib la. Unii yaa chuu ubaa ki bae Uwumbɔr aasan kan, nima le ye tinyoor sakpen ki tii u. Ba pu? Uwumbɔr puu tipuur ke nima le ga tii binib limɔfanyaan dandana wee, ni n-yoonn mu choo na. <sup>9</sup>Tibɔr tee gbi la. Ni ɔjan ke binib mɔmɔk gaa ti. <sup>10</sup>Nima le ti tun Uwumbɔr aatuln linimaln; ba pu? ti gaa Uwumbɔr u ye limɔfadaan ki gaal binib mɔmɔk lir na ki kii la. Uma le gaal binib bimɔk gaa u ki kii na lir.

<sup>11</sup>Mɔk binib tibɔr tee, ki tuk bi ke bi li ɔjani kina. <sup>12</sup>Taa cha bi lik si fam ke aa ye unachipɔɔn la. Li len iliinyaan, ki li bi mbamɔm, ki li gee binib, ki li tun

Uwumbor aatuln mbamom, ki li bi chain, aan ki li ye limokl ki mok binib bi gaa Yesu ki kii na baah ga li dii mbamom pu na.<sup>13</sup> Li karni Uwumbor aabor tii binib, ki mok bi taatataa, ki tuk bi baah ga li qjani pu na. Li qjani kina linimaln, ki nan saa buyoonn m ga fuu ni na.<sup>14</sup> Taa suln Uwumbor Aafuur Nyaan aapiin i bi aa ni na, i Uwumbor nan tii si buyoonn waabonabtiib nan len, aan Yesu aanib aaninkpiib di bijaal paan aa pu na.<sup>15</sup> Maah tuk si pu na, li qjani kina mbamom ki cha aanimbil li man ni pu, aan binib momok bee saah dii Yesu aasan mbamom pu na.<sup>16</sup> Li nyi saabimbin aah bi pu na, ki li nyi saah mok binib Yesu aabor pu na. Li beenin qjani maah tuk si pu na. Aa yaa beenin qjani kina kan, sin aabaa ga qjmar, le binib bi mu qjun Yesu aabor aa chee na mu ga qjmar.

### Usaloln aah ga li joo Yesu aanib pu na

**5** Tɔ, taa kae uja u por na. Li sur u ke aate na. Li qjani bijab bi kaa por na ke aanaabitib na.<sup>2</sup> Li qjani bipiib bi por na ke aana na. Li qjani bipiib bi kaa por na ke aaninkpatiib na, ki li bi chain bi chee.

<sup>3</sup> Li ter bikpopiib bi sil ye bikpopiib na. <sup>4</sup> Ukpoppii mu yaa kpa mbim, bee u ti ki kpa yaabitiib le kan, ni qjan ke bi bae Uwumbor aah ban ke bi ter baachiln ni aanib pu na, ki teen binatiib, ni biyatiib, baah nan kpiin bi pu na; ba pu? nima le piir Uwumbor aasui.

<sup>5</sup> Ukpoppii u sil ye ukpoppii ki gur ubaa na kpa limakl Uwumbor pu la. Le u ga li mee Uwumbor ki gajni u nwiin pu ni kinyeek. <sup>6</sup> Ukpoppii u kaa bi mbamom na ma kan, u lann limofal Uwumbor chee ki laa chuun fu. <sup>7</sup> Tuk Yesu aanib ke bi li qjani maah len pu na, aan bikpopiib bi bi bikaasisik ni na taa li kpa ngalm.

<sup>8</sup> Unii u kaa ter udo yaab, kaa ter uma

ubaa aachiln ni aanib ki jer biken na, u yii Yesu aasan le na, ki ye kiniwanbiik ki jer binib bi kaa gaa Yesu ki kii na.

<sup>9</sup> Ukpoppii yaa kaa fuu qjibin imonko itaa kan, aa taa qjmee waayimbil bikpopiib aagban ponn ni. Uchal yaa nan ye ujabaan kan,<sup>10</sup> binib yaa len ke upii nqbaan tun litunyaan: u yaa nan kpiini mbim mbamom, ki yaa nan qjani bicham tichann, ki yaa sunn ubaa taab ki tun lituln tii Yesu aanib, ki yaa nan ter binib bi bi limukl ni na, aan unimbil yaa man litunyaan momok pu kan, aa qjmee waayimbil bikpopiib aagban ponn ni.

<sup>11</sup> Taa qjmee bikpopiib bi kaa por na aayimbil; ba pu? bijab aakpeek yaa chuu bi kan, bi ga di Kristo aatuln lii, ki ban ke bi mon tichal,<sup>12</sup> kaan gbiin baah puu tipuur ti na. Nima le bi ga li kpa ngalm.

<sup>13</sup> Ki ki kpee na, bi ga li san ligbanyakl, ki ga li chaa qjidical qjidical ni. Naa ye ke bi ga li san ligbanyakl baanja la, bi ga li ye bibotukb la, ki ga li koo binib aabor ni, ki ga len naah kaa ba qjan bi len pu na.<sup>14</sup> M ban ke bikpopiib bi kaa por na mon tichal, ki maa mbim, ki li lik baachiln ni aabor, ki taa tii timi aadim nsan ke bi galn timi.<sup>15</sup> Ba pu? bikpopiib bibaa yenn, ki dii kinimbɔŋ aasan.<sup>16</sup> Tɔ, bikpopiib yaa bi upii u gaa Yesu ki kii na do kan, ni qjan ke u li ter bi, aan ki taa muk Yesu aanib ke bi ter bikpopiib ngbaan. Nima le bi ga qjmaa ter bikpopiib bi kaa kpa do yaab na.

<sup>17</sup> Tɔ, ni qjan ke Yesu aanib pa baaninkpiib bi joo bi mbamom na lipal li wiir na. Yesu aanib aaninkpiib bi tun lituln linimaln, ki mooni tibɔnyaan tee, ki mok binib taatataa na, ni qjan ke bima le aapar li wiir jer biken yaan.<sup>18</sup> Ba pu? Uwumbor Aagban len ke, “Aa yaa joo unaaja poi idi kan, aa taa buu umɔb,”<sup>‡</sup> ki ki

len ke, "Ututunn aapar neer u la."<sup>19</sup> Tɔ, bi yaa galn Yesu aanib aaninkpel kan, taa gar baah len pu na, see biseeraadam bilee bee bitaa len kina. <sup>20</sup>Kae binib bi tun titunwanbir na Yesu aanib mɔmɔk aanimbil ni, aan bi gur na san ijawaan.

<sup>21</sup>M sur si Uwumbɔr ni Tidindaan Yesu Kristo ni waatuuntiib bi u nyan bi na aanimbiin ni la, aa li ɔjani maah len pu na, ki li joo Yesu aanib mbamɔm, ki taa li kpa imaagann. <sup>22</sup>Unii yaa kaa yunn Uwumbɔr aasan ni kan, taa nyan u ke u tun Uwumbɔr aatuln. Taa cha biken aatunwanbir li ye saataani. Cha saabimbin li bi chain.

<sup>23</sup>Saah kaa kpa laafee kpala kpala na, taa ki nyu nnyun baanja, aa nyu ɔjisubil aadaan siib, aan ni ter aaponn ni.

<sup>24</sup>Binib bibaa aatunwanbir bi mpaan pu, ki tii bi ntafadaan mala. Bibaa mu aatunwanbir aa kpiir mala. <sup>25</sup>Kina le litunyaan mu bi lipaal. Li yaa bɔɔ kan, laan li bɔɔ n-yoonn mɔmɔk.

**6** Tɔ, Yesu aanib ponn ni bi ye binaag-  
biib na, bi mɔmɔk li pak bidindatiib  
mbamɔm, aan binib taa bii Uwumbɔr  
aayimbil, ni waabɔr. <sup>2</sup>Binaagbiib bi kpa  
dindatiib bi gaa Yesu ki kii na taa lik  
bidindatiib fam, ke bi ye binaabitiib. Bi  
li moo tun lituln tii bidindatiib ngbaan  
ki jer baah ba ga tun pu na; ba pu? din-  
datiib bi kan tinyoor baatuln ponn ni na  
ye binib bi gaa Yesu ki kii na la, le bi gee  
bi.

### Yesu Kristo aanib aasurm

Tuk bi ki sur bi ke bi li ɔjani kina.  
<sup>3</sup>Tidindaan Yesu Kristo aabɔr le ye  
tibɔnyaan, ki mɔk timi taah ga dii  
Uwumbɔr aasan mbamɔm pu na. Unii  
ubaa yaa mɔk bi mmɔkm yayan kaa kii  
tibɔr ngbaan kan, <sup>4</sup>u ye kalmbaanidaan  
la, kaa nyi nibaa. U gee ke u kpak  
kinikpakpak ibɔliin aatataa pu. Nima le

cha lipiipoln, ni tibɔr, ni ɔjisibil bi, ki  
cha binib dak ilandak i kaa ɔjan na tɔb  
pu. <sup>5</sup>Le binib bi dak ilandakbir na kpak  
tɔb kinikpakpak. Baa ki nyi mbamɔn.  
Bi dak ke Uwumbɔr aasan ye liwankpal  
aasan la. [Nya binib ngbaan chee.]

<sup>6</sup>Tɔ, unii aanimbil yaa gbiin waah kpa  
ni na pu ki yaa dii Uwumbɔr aasan kan,  
nima le ye tinyoor sakpen ki tii u. <sup>7</sup>Taah  
nan dan dulnyaa wee ni buyoonn na, taa  
nan joo ni nibaa. Taah ga ki nya dulnyaa  
wee ni buyoonn na, taan ki ɔjmaa joo ni-  
baba ki di nya. <sup>8</sup>Nima pu na, taah kpa ti-  
jikaar ni tiwanpeenkaan ni na, cha tin-  
imbiil gbiin ni. <sup>9</sup>Binib bi aanimbil man  
liwankpal pu na ga kan ntɔŋ, ki lir. Bin-  
imbiil ga li man kijɔrk aawan sakpenn le  
pu. Ni ye fam la, ki ga bii bi. Tiwan ng-  
baan aaboln le cha binib bee fam ki kan  
ntafadaan mu kaa kpa ndoon na. <sup>10</sup>Binib  
yaa gee ɔjimobil sakpen kan, nima le  
cha bi tun titunwanbir mɔk aabɔŋ. Binib  
bibaa aanimbil aah man ɔjimobil pu pu  
na le cha bi yenn, kaa ki dii Yesu aasan,  
ki kan mpombiin ki ti chaar jer.

### Nsurm ki tii Timoti

<sup>11</sup>Saah ye Uwumbɔr aanii na, yii titun-  
wanbir timina mɔmɔk, ki li dii mbim-  
binyaan, ki li bi Uwumbɔr aah ban pu  
na, ki li tun waatuln mbamɔm, ki li  
kpa ngeehm, ni suklaa, ki li bi suuna.

<sup>12</sup>Saah tii Yesu naadii pu na, ni ɔjan ke  
aa pɔɔn aabaa ki yii lituln limɔk kaa  
ɔjan na, ki li nyub limɔfal li kaa kpa  
ndoon na mbamɔm. Uwumbɔr yin si ke  
aa nan kan limɔfal ngbaan, buyoonn aa  
nan tii seeraa nyaan binib pam aanim-  
bil ni, ki tuk bi saah gaa Uwumbɔr ki  
kii pu na. <sup>13</sup>Yesu Kristo nan tii seeraa  
nyaan Pontius Pailat aanimbiin ni. Le m  
sur si, uma Yesu ni Uwumbɔr u tii ti-  
wan mɔmɔk limɔfal na aanimbiin ni <sup>14</sup>ke  
aa tun Uwumbɔr aah tii si lituln li na

<sup>4</sup>: Lik Matiu 10.10; Luk 10.7.

mbamɔm, ki li bi chain, ki taa li kpa taani ubaa, ki nan saa Tidindaan Yesu Kristo aah ga gir ni buyoonn na.<sup>15</sup> Ni yaa nan neer kan, Uwumbɔr ga cha u gir ni. Uwumbɔr u ti pak u na, uma baanja le ye tiwan mɔmɔk Aayidaan. U ye bibɔrb mɔmɔk Aabɔr, ki ye dindatiib mɔmɔk Aadindaan.<sup>16</sup> Uma baanja le ye limɔfal li kaa kpa ndoon na Aadindaan. U bi nwi-ihni ni la. Ubaa aan ɔjmaa duun mu ni. Ubaa aanimbil aa kee kan u. Ubaa mu aan ɔjmaa kan u. Cha binib mɔmɔk nyuŋ u, ki kii waamɔb n-yoonn mu kaa kpa ndoon na. Amii.

<sup>17</sup> Aa sur binib bi kpa liwankpal dul-nyaa wee ni na ke bi taa li kpa kalm-baani, ki taa li kpa limakl liwankpal ng-baan pu. Ba pu? li ye libuln la. Bi li kpa

limakl Uwumbɔr pu. U tii timi sakpen, le taa ti ki nyi ni mɔmɔk; u ban ke ti gaa, ki li kpa mpopiin.<sup>18</sup> Tuk biwankpadam ng-baan ke bi li ter biken, ki li tun litunyaan sakpen, ki li kpa tibulchinn, ki li ban ke bi yakr baawankpal tii biken.<sup>19</sup> Bi yaa ɔja kina kan, bi ga di liwankpal bil paacham. Ni ga li ye nterm nyaan le ki tii bi n-yoonn mu choo na, le bi ga kan limɔfal li ye libamɔln na.

<sup>20</sup> Timoti, li joo tibɔr ti Uwumbɔr di ɔja aarjaal ni na. Binib bibaa len tibɔr yɔl yɔl, ki yii Uwumbɔr aabɔr, ki dak ke bi nyi la, kaa nyi. Yii baah len pu na.<sup>21</sup> Ba pu? binib bibaa bi, ki len ke bi nyi nnyim, ki mu yenn, kaa ki dii Yesu aasan.

Tɔ, Uwumbɔr ɔja tinyoor ɔja ni pu.

*Lelee aagbaŋ ki Pɔɔl ŋmee ki tii*

## TIMOTI

*na*

**1** Min Pɔɔl ye Yesu Kristo aakpambal Uwumbor aageehn pu, ke m ti tuk binib ke Uwumbor puu tipuur ke binib bi kpaan Yesu Kristo ni na ga kan limɔfal.

**2** M ŋmee kigbaŋ kee m tii maabo Timoti u m gee u na la. Tite Uwumbor ni Tidindaan Yesu Kristo ŋa tinyoor ŋa aa pu, ki san si kinimbaak, ki tii si nsuudoon.

### **Idoon ni ntaakpab pɔɔn aabɔr**

**3** M yaa mee Uwumbor u m tun lituln tii u mbamɔm ke n-yaajatiib aah nan ŋjani pu na kan, m teer aabor n-yoonn mɔmok maameel ni, kinyeek ni nwini pu, ki dooni u aa pu la. **4** M teer maah buen cha si aan aa wii pu na. Le nnimbil man ke m ki kan si, aan ki li kpa mpopiin. **5** M teer saah gaa Yesu ki kii mbamɔm pu na. Aayaa Lois ni aana Yunes le nan puen gaa u ki kii. Le m bee ke aa mu sil gaa u ki kii. **6** Le Uwumbor nan tii si Waafuur Nyaan aapiin buyoonn m nan di ŋŋjaal paan aa pu na; le m ban m teer si ke aa fikr ipiin ngbaan. **7** Nfuu Nyaan mu Uwumbor tii timi na aan ŋa timi bijawaandam. Mu tii timi mpoɔn, ki cha ti gee binib, ki chur tibaa.

**8** Nima pu na, tuk binib Tidindaan aabor, ki taa san inimɔɔn. Maah bi kiyondiik ni Tidindaan pu na, taa cha inimɔɔn li joo si kina pu. Aa mu li ji falaa Yesu aabɔnyaan tee pu, Uwumbor aah tii si mpoɔn pu na. **9** U gaa timi lii, ki yin timi ke ti li bi chain. Naa ye timi aatunyaan pu le u yin timi. Waah kpa tibulchinn pu na, nima le u yin timi waageehn pu. Waah kaa nan kee naan dulnyaa buyoonn na, le u nan ŋa timi tibulchinn ngbaan Yesu Kristo pu.

**10** Dandana wee, ti kan waah ŋa timi tibulchinn pu na; ba pu? Yesu Kristo, u gaal timi lir na, dan dulnyaa wee ni ki nan kuln nkun, ki tii timi limɔfal li kaa kpa ndoon na. Waabɔnyaan tee le kpiir kina.

**11** Uwumbor nan nyan mi ke m li ye Yesu aakpambal, ke m li chuun mooni binib waabɔnyaan tee, ki tuk bi taatataa.

**12** Nima pu le m ji falaa kiyondiik ni. Ni mu aa kpa mi inimɔɔn. Ba pu? m nyi Yesu u m gaa u ki kii na. Maah di mbaa tii u na, m sil nyi ke u ga ŋmaa li joo mi, ki nan saa waagirndaal. **13** Aa nan gaa Yesu Kristo ki kii le ki gee u; nima pu na, aa li joo maah tuk si tibɔnyaan ti na mbamɔm. **14** Uwumbor di tibɔnyaan tee ŋa aarjaal ni la; aa li joo ti mbamɔm, Uwumbor Aafuur Nyaan mu bi ti ni na aapɔɔn pu.

**15** Aa nyi ke Asia aatiŋ aanib ponn ni pam nan san cha mi. Bi ponn ni binib bilee le ye Fijelus ni Hemojenes. **16** Onesiforus pɔɔni ntaakpab kpala kpala. Maah nan bi kiyondiik ni na, inimɔɔn aa nan joo u kina pu. Cha Uwumbor san u ni waachiln ni aanib kinimbaak. **17** Waah fuu ni Rom aatiŋ ni na, u nan chuun ban mi linimaln le ki ti kan mi. **18** Aa sil nyi waah nan ter mi pu Efesus aatiŋ ni na. Tidindaan san u kinimbaak uma Tidindaan aagirndaal.

### **Yesu Kristo aajabamɔɔn**

**2** Maabo, pɔɔk aataakpab Yesu Kristo aah ter si pu na. **2** Aa nan ŋjun Uwumbor aabor m chee kinipaak aanimbil ni. Di tibor ngbaan ŋa bijab bi bi mbamɔm ki ga ŋmaa tuk biken na aarjaal ni.

**3** Ji falaa Yesu Kristo pu ke waa-janyaan na. **4** Uja u to butob na aatafal aa bi dulnyaa wee ni aabor ni; ba pu? u ban u piir waaninkpel aasui la. **5** Unii u san litaasaln na yaa kaa dii litaasaln ngbaan aakaal kan, waan ji litaasaln aanyoor. **6** Ukpaal u tun lituln linimaln na,

ni ḷan ke uma le puen ji kisaak ngbaan aajikaar. <sup>7</sup>Aa dakl lik maah len pu na aatataa, le Tidindaan ga ter si aa bee ni mɔmɔk aatataa.

<sup>8</sup>Teer Yesu Kristo bɔr. U fikr nkun ni, ki ye Ubɔr David aayaabil la. Maah tuk binib tibɔnyaan ti na le na. <sup>9</sup>Tibɔnyaan tee pu, le m ji falaa. Le bi buu mi idɔribi kiyondiik ni, ke bakadaan na. Uwumbɔr aabor ma aa buu. <sup>10</sup>Nima pu le m kpa limɔr falaa mɔmɔk ni, binib bi Uwumbɔr nyan bi na pu, aan bi mu kpaan Yesu Kristo ni, ki ȳmar, ki li kpa mpopiin mu kaa kpa ndoon na. <sup>11</sup>Tibɔr tee gbii, “Timi aabimbikpok yaa kpo Yesu chee kan,

ti ga li kpa limɔfal u chee.

<sup>12</sup>Ti yaa dii u ki kpa limɔr kan, ti ga ji nnaan u chee.

Ti yaa len ke taa nyi u kan, u mu ga len ke waa nyi timi.

<sup>13</sup>Ti yaa kaa ye mbamɔndam kan, uma beenin ye mbamɔndaan la, waan ȳmaa yii uma ubaa aabimbin.”

### Ututunn bamɔnn

<sup>14</sup>Aa li teer binib tibɔr timina, ki sur bi Tidindaan aanimbiin ni ke bi taa li kpak kinikpakpak ibɔliin aatataa pu; ba pu? naa kpa tinyoor, kaa ter binib ke bi dii mbamɔm. <sup>15</sup>Cha aanimbil li man ke aa piir Uwumbɔr aasui, ki li ye waatutunn bamɔnn u kaan ji inimɔon waatuln pu na, ki li tuk binib Uwumbɔr aabor ti ye mbamɔn na, ki mɔk bi taatataa mbamɔm. <sup>16</sup>Yii tibɔr ti ye fam na; ba pu? binib bi len kina na ga moo tun titunwanbir. <sup>17</sup>Baabɔr aa ḷan, ki ga pɔr ke mbuun aah pɔr pu na la. Bi ponn ni binib bilee le ye Haimeneus ni Filetus. <sup>18</sup>Bi yenn kaa ki dii mbamɔn aasan. Bi len ke ti fikr nkun ni a. Baah len kina na, nima le binib bibaa aa ki tii Yesu naadii mbamɔm. <sup>19</sup>Tɔ, Uwumbɔr aanib

ye waadinyikl li pɔɔ, ki kpa kidaan, ki si na la. Kidaan ngbaan le ye ke, “Uwumbɔr nyi binib bi ye waanib na,”<sup>8</sup> ki ki ye ke, “Binib bi pur Uwumbɔr aayimbil na mɔmɔk di cha titunwanbir.”

<sup>20</sup>Tɔ, ȳisambil aabɔŋ bi lidichasakpeln ni. Ȫibaa ye salmaa, Ȫibaa ye tikur, Ȫibaa mu ye busub yaan, Ȫibaa mu ye tiyakr. Bi joo Ȫibaa tun litukpaan, ki joo Ȫibaa tun lituwaatiir. <sup>21</sup>Unii yaa di cha titunwanbir mɔmɔk kan, Tidindaan ga cha u tun litukpaan, ba pu? u ga li bi chain ki ȳneer lituln ngbaan, ki gor ke u tun litunyaan mɔmɔk tii Tidindaan. <sup>22</sup>Chuu aabaa ki taa dii tiwan ni kaa ḷan na aakpeek ke binachipɔm aah dii pu na. Tun lituln li ḷan na, ki tii Tidindaan naadii mbamɔm, ki li kpa ngeehm, ni nsuudoon. Kpaan binib bi mu bi kina ki joo bisui mɔmɔk mee Tidindaan na chee. <sup>23</sup>Yii mbaan mu ye kijɔrk aabaan, kaa kpa ȳitaa na. Aa nyi ke nima le cha binib kpak kinikpakpak. <sup>24</sup>Tidindaan aatutunn taa li kpak kinikpakpak. Ni ḷan ke u li ḷani binib mɔmɔk tibulchinn, ki tuk bi Yesu aabor mbamɔm, ki li kpa limɔr, <sup>25</sup>ki li bi suuna ki sur binib bi kpak u kinikpakpak na. Nibaakan, Uwumbɔr ga cha bi kpeln baabimbin ki bee waabɔr ti ye mbamɔn na, <sup>26</sup>ki ki kpalm binib, ki nyan ni kinimbɔŋ ki nan chuu bi ke bi li ḷani kaageehn na aanjaal ni.

### Kookoo aayoonn aabor

**3** Tɔ, aa li nyi ke n-yoonn mu choo na ga li ye falaa aayoonn la. <sup>2</sup>Ba pu? binib ga li ye bikumɔndam. Binimibil ga li man ȳimombil pu. Bi ga li kpa kipupuk, ki li kpa kigaak, ki li seei binib. Baan li pak bite ni bina, kaan li nyi idoon, kaan li pak Uwumbɔr, <sup>3</sup>kaan li gee baamaal aanib, kaan di cha pinn binib. Bi ga li ye binibiinib. Baan ȳmaa

chuu bibaa. Bi ga li kpa mbiin, ki ga li nan nsanyaan.<sup>4</sup> Bi ga kooh binib. Baan li kpa ilandak. Bi ga yoor bibaa paacham, ki ga li gee dulnyaa wee ni aawanyaan, kaan li gee Uwumbor. <sup>5</sup> Bi ga li ɣmanni ke bi dii Uwumbor aasan, ki ga lann Uwumbor aapɔɔn. Aa taa dii binib ngbaan. <sup>6</sup> Bi ponn ni bibaa looni ki koo njidchal ponn ni, ki ɣmanni bipijɔrb bi gbii titunwanbir ki dii bisui aah gee pu na aabɔŋ na. <sup>7</sup> Bipiib ngbaan bae mbaem n-yoonn mɔmɔk, kaa ɣmaa bee Uwumbor aabɔr. <sup>8</sup> Janes ni Jamberes aah nan kpak Moses kinikpakpak na, bijab ngbaan mu kpak Uwumbor aabɔr kina la. Bi dak ilandak i kaa ḥjan na, kaa tii Yesu naadii. <sup>9</sup> Bi mu aan ki li ɣmanni binib ki yunn; ba pu? binib mɔmɔk ga bee ke bi ye bijɔrb, ke binib aah nan bee Janes ni Jamberes pu na.

### Kookoo aasurm

<sup>10</sup> Sin ma kan, aa dii maah mɔk si pu na, ki dii maabimbin aah bi pu na. Maah ban ke m li ḥjanu pu na, aa mu ban kina la. Aa nyi maah tii Yesu naadii pu na, ki nyi maah kpa limɔr, ni ngeehm, ni suklaa pu na. <sup>11</sup> Aa nyi binib aah muk mi pu na, ki nyi maah ji falaa pu na. Aa nyi tibɔr ti lir m pu Antiok aatiŋ ni, ni Ikonium aatiŋ ni, ni Listra aatiŋ ni na. Bi ḥja mi falaa sakpen la. Le Tidindaan nan nyan mi falaa ngbaan mɔmɔk ni. <sup>12</sup> Ni ye mbamɔn la, binib bimok ye Yesu Kristo yaab ki ban ke bi li bi mbamɔm Uwumbor aanimbiin ni na, binib ga ḥja bi falaa la. <sup>13</sup> Le mbiindam ni biŋmajman-nim ga moo tun titunwanbir ki li ɣmanni binib, le binib mu gir ki li ɣmanni bi. <sup>14</sup> Sin ma kan, aa bae Uwumbor aabɔr, ki sil bee ke ti gbii la. Aa li beenin dii kina; ba pu? aa bee ke binib bi mɔk si na ye mbamɔndam la. <sup>15</sup> Aa bae Uwumbor Aagbaŋ aaliin tibir ni la. Iliin ngbaan ga ɣmaa tii si nlan mu ga mɔk si saah ga gaa Yesu Kristo ki kii ki ɣmar pu na. <sup>16</sup> Iliin

mɔk bi Uwumbor Aagbaŋ ni na nyan ni Uwumbor chee la. Le i mɔmɔk kpa tinyoor, ki mɔk timi waasan, ki sur timi, ki toor timi aabimbin, ki mɔk timi taah ga li dii mbamɔm pu na. <sup>17</sup> Unii u tun Uwumbor aatuln na yaa kii iliin ngbaan kan, u ga li bi mbamɔm, ki gor ke u tun litunyaan mɔmɔk.

**4** Yesu Kristo ga gir ni ki nan ji nnaan, ki ji binifuub ni bitekpiib tibɔr; m sur si uma ni Uwumbor aanimbiin ni la, <sup>2</sup> li chuun mooni waabɔr. Ni yaa neer, bee naa kee neer kan, aa li mooni waabɔr, ki kae binib, ki li kpaa bi, ki li sur bi, ki li kpa limɔr ki tuk bi Uwumbor aabɔr, ki taa di cha. <sup>3</sup> Ba pu? n-yoonn choo, le binib aan ki pel mmɔkm mu ḥjan na. Bitafal aan li bi mu ni. Bi ga li ban bimɔmɔkb bi ga tuk bi bisui aah gee tibɔr ti na la. <sup>4</sup> Bi ga yii mbamɔn, ki li ban ke bi ḥjun itiin. <sup>5</sup> Sin ma kan, chuu aabaa n-yoonn mɔmɔk, ki ji suklaa falaa ponn ni, ki tuk binib tibɔnyaan tee, ki tun lituln li Uwumbor di siin si na mɔmɔk.

<sup>6</sup> Mma kan, m bi ke kitork na la; bi ban ke bi ku mi Yesu aabɔr pu la. Ni gur siib, maan ki li bi dulnyaa wee ni. <sup>7</sup> M pɔɔn mbaa Uwumbor aasanyaan ni, ki tun maatuln doo, ki joo Yesu aabɔnyaan mbamɔm, <sup>8</sup> le Uwumbor len ke maabɔr ḥjan, ki di tinyoor bil kiir mi paacham. Tidindaan u ji binib tibɔr mbamɔm na, le ga ti di tinyoor ngbaan tii mi bundaln u ga gir ni na. Naa ye mi baanja le u ga tii. U ga tii binib bimok gee u ki ban ke u ki gir ni na.

### Pɔɔl ubaa aamɔboln

<sup>9</sup> Tɔ, pɔɔn aabaa ki dan m chee mala; <sup>10</sup> ba pu? Kreskens buen Galasia aatiŋ ni, Taitus mu buen Dalmasia aatiŋ ni. Demas gee dulnyaa wee ni aawan, ki di mi lii, ki buen Tesalonika aatiŋ ni. <sup>11</sup> Luk baanja le bi m chee. Li joo ni Mak ki dan. U ga ɣmaa ter mi, Uwumbor aatuln ni. <sup>12</sup> M cha Tikikus buen Efesus aatiŋ ni.

<sup>13</sup>Aa yaa choo kan, aa li joo ni maabɔkul li m nan di bil Troas aatiŋ ni, Kapus do na, ki li joo ni maagbann, ki taa suln tigbann waatiir ngbaan bɔr.

<sup>14</sup>Uchaa u bi yin u ke Aleksanda na nan ja mi bakaa sakpen. Tidindaan ga teen u waah tun bakaa pu na. <sup>15</sup>U kpak taah mooni tibɔnyaan ti na kinikpakpak ki ti chaar jer, nima pu na, aa mu li nyi u.

<sup>16</sup>Maah nan puen ban m len tibɔr bibɔjirb aanimbiin ni ki nyan maabamɔn na, ubaa aa nan sil mpuwɔb, bi mɔmɔk nan san cha mi la. Uwumbɔr taa chuu bi taani ni pu. <sup>17</sup>Tidindaan le nan sil mpuwɔb, ki tii mi mpɔɔn m len waabɔr mɔmɔk, aan bi mɔmɔk ɲun. Waa cha ubɔjir len ke bi ku mi. <sup>18</sup>Tidindaan ga

nyan mi binib aah ban bi ja mi bakaa u na mɔmɔk ponni. U ga biin m pu ki li joo ni mi waanaan ni paacham. Uma le yeh nnyuj n-yoonn mu kaa kpa ndoon na. Amii.

### Kookoo aadoon

<sup>19</sup>Aa doon Prisila, ni Akuila, ni Onesiforus aachiln ni aanib tii mi. <sup>20</sup>Erastus beenin bi Korint aatiŋ ni. Trofimus bun la, nima le m cha u bee Miletus aatiŋ ni. <sup>21</sup>Pɔɔn aabaa ki dan m chee aan kakab yoonn nin fuu ni.

Yubulus, ni Pudens, ni Linus, ni Klɔdia ni tinaabitiib mɔmɔk dooni si.

<sup>22</sup>Tidindaan li bi saawiin chee.  
Uwumbɔr ja tinyoor ja ni pu.

*Kigbarj ki Pɔɔl ŋmee ki tii*

## TAITUS

*na*

**1** Min Pɔɔl, m ye Uwumbɔr aatutunn, ki ye Yesu Kristo aakpambal, ke m ter Uwumbɔr aah nyan binib bi na ke bi gaa u ki kii, ki bee waabor ti gbii na. Waabor ngbaan ter bi, ke bi li bi waah ban pu na. <sup>2</sup> Waabor pu le bi kpa limakl ke bi ga li kpa limofal li kaa kpa ndoon na. Uwumbɔr u kaa mɔnɔ inyamɔn na, uma le nan puu tipuur n-yaayoonn na, ke u ga tii timi limofal ngbaan. <sup>3</sup> Naah nan neer na, le uma Uwumbɔr u gaa timi lii na kpiir limofal ngbaan aabor, ki tuk mi ke m li chuun mooni ti.

<sup>4</sup> M bi ŋmee kigbarj kee m tii si Taitus u ye maabo bamɔnn Yesu Kristo aasan ni na. Tite Uwumbɔr ni Yesu Kristo u gaal timi lir na ŋa tinyoor ŋa aa pu, [ki san si kinimbaak,] ki tii si nsuudoon.

### Taitus aah tun lituln li Krete aatiin ni na

<sup>5</sup> Tɔ, m cha aa bee Krete aatiin ni ke aa tun lituln li kaa kee tun na, ki lee binib bi ga li ye Yesu aanib aaninkpiib ntim mɔmɔk ponn ni na. <sup>6</sup> Aa lee bijab bi kaa kpa taani ubaa, ki kpa upii ubaabaa, ki kpa mbim bi gaa Yesu ki kii, kaa ŋani bakaa, kaa ye tafalaajundam na. <sup>7</sup> Uwumbɔr aanib bi baaninkpel aanjaal ni la, nima pu le ni ŋan ke u taa li kpa taani ubaa, ki taa li tun uma ubaa aageehn, ki taa li ye lijuuldaan, ki taa li ye udagbiir, ki taa gbaa binib; unimbil taa li man ŋimobil pu. <sup>8</sup> Ni ŋan ke u li ye unii u channi bicham tichann na, ki li gee lituln li ŋan na, ki li kpa laasaab, ni mbimbinyaan, ki li bi chain, ki li chur ubaa, <sup>9</sup> ki li joo taah nan tuk u tibɔnyaan ti ye Uwumbɔr aabor bamɔnn na, aan ki mɔk binib mmɔkm mu ŋan na, ki pɔɔk

bitaakpab, ki len tibɔr ki ŋyan binib bi kpak u kinikpakpak na.

<sup>10</sup> Ba pu? binib pam le bi ki ye tafalaajundam, ki len tibɔr yɔl yɔl, ki ŋmanni binib. Juu yaab ponn ni bibaa le ŋani kina ki jer biken na. <sup>11</sup> Ni ŋan ke aa cha bi ŋmin; ba pu? bi mɔk binib mmɔkm mu kaa ba ye bi mɔk bi na, ki cha ŋidical ŋibaa ponn ni aanib mɔmɔk yenn. ŋimobil pu, le bi ŋani kina. Naa ŋan. <sup>12</sup> Krete aatiin aanib ponn ni ubaa, u nan ye ulankpal na, nan bui ke, “Krete aatiin aanib ye binyamɔndam n-yoonn mɔmɔk la. Bi naahn ipeel i kaa ŋan na la. Bi ye bigbanyakdam, ki ye bipuuksakpendam.” <sup>13</sup> Ulankpal ngbaan aah len pu na ye mbamɔm la. Nima pu na, kae bi mbamɔm, aan bi li dii Yesu aasan chob, <sup>14</sup> ki taa gar Juu yaab aatiin, ki taa gar binib bi yii Yesu aabɔnyaan na aamɔkm. <sup>15</sup> Tiwan mɔmɔk bi chain binib bi bi chain na chee la. Binib bi kaa bi chain, kaa gaa Yesu ki kii na, tiwan nibaa aa bi chain ki tii bi. Baalandak mu aa ŋan. Baa ki nyi lituln li ŋan na, ni li kaa ŋan na. <sup>16</sup> Bi len ke bi nyi Uwumbɔr, le baah tun pu na mɔk ke baa nyi u. Uwumbɔr aa gee baah ŋani pu na. Baa kii waamɔb, kaa ŋmaa tun litunyaan libaa.

### Mmɔkm bamɔnn

**2** Sin ma kan, mɔk binib mmɔkm mu ŋan na. <sup>2</sup> Tuk bininkpiib ke bi li chur bibaa tiwan mɔmɔk ni, ki ŋeer kipak, ki li kpa laasaab, ki li dii Yesu aasan chob, ki li gee binib, ki li kpa limor. <sup>3</sup> Tuk bipininkpiib mu ke bi li san Uwumbɔr tiwan mɔmɔk ni, ki taa li ye binibiinib, ki taa li ye bidagbiib. Ni ŋan ke bi mɔk mmɔkm mu ŋan na, <sup>4</sup> ki mɔk bipininkpisapɔm ke bi li gee bichatiib ni baabim, <sup>5</sup> ki li kpa laasaab, ki taa gɔr kidagook, ki li lik lichiln ni aatuln mbamɔm, ki li kpa tibulchinn, ki li keei bichatiib aamɔi, aan ubaa taa bii Uwumbɔr aabor.

<sup>6</sup>Sur binachipōm mu ke bi li chur bibaa. <sup>7</sup>Sin aabaa mu li ḷjani tiwan mōmōk chob, aan ki li ye limōkl tii biken. Tuk binib Uwumbōr aabōr mbamōm, ki li kpa laasaab. <sup>8</sup>Li len iliin i bi chob kaa kpa ngalm na, aan udin ubaa taa ḷjmaa bii timi. Nima kan, inimōon ga chuu u.

<sup>9</sup>Tuk binaagbiib ke bi li keei bidindatiib aamōj, ki piir bisui tiwan mōmōk ni, ki taa kpak bi kinikpakpak, <sup>10</sup>ki taa su baawan, ki li bi mbamōm tiwan mōmōk ni. Bi yaa bi kina kan, baabimbinyaan ga mōk binib ke Uwumbōr u gaal timi lir na aasan le ḷjan.

<sup>11</sup>Ba pu? ti kan Uwumbōr aah kpa tibulchinn pu na. Waabulchinn pu le binib mōmōk ga ḷjmaa ḷmar. <sup>12</sup>Waabulchinn mōk timi ke ti yii lituln limōk kaa ḷjan na, ki taa ki dīi tiwan ni kaa ḷjan na aakpeek, ki li chur tibaa mbamōm, ki li dīi mbamōm, ki li bi Uwumbōr aah ban pu na dulnyaa wee ni. <sup>13</sup>Ti kpa limakl li tii timi mpopiin na. Ti kii bundaln ti ga nan kan li na. Taah kpa limakl li na le ye ke timi Aawumbōr sakpiin, Yesu Kristo u gaal timi lir na, ga gir ni ki nan nyan waah nyuu pu na mpaan pu. <sup>14</sup>U nan kpo ti pu ke u gaa timi lii ki nyan timi titunwanbir mōmōk ni, aan ti li bi chain, ki li ye waanib, ki li ye binib bi aanimbil man ke bi tun litunyaan na.

<sup>15</sup>Uwumbōr aah tii si tininkpir pu na, tuk binib tibōr timina, ki pōok bitaakpab, ki sur bi, ki taa cha ubaa lik si fam.

### Yesu Kristo aadidiir aabimbin aah ye pu na

**3**Teer bi ke bi li pak kitij aayidam, ni binib bi kpa tininkpir na, ki kii baamōj, ki gor ke bi tun litunyaan mōmōk, <sup>2</sup>ki taa bii unii ubaa, ki taa kpak binib kinikpakpak. Bi li kpa kijōtiik binib biken chee, ki li bi suuna binib mōmōk chee. <sup>3</sup>N-yoonn mbaa timi tibaa nan ye bijōrb, kaa kii Yesu aamōb. Kinimbōj

nan ḷmann timi la. Tinimbil nan man tiwan ni kaa ḷjan na aabōj pu. Tisui aah gee tiwan ni na le ti nan ban. Ti nan gee baka baka aatuln, ki nan kpa lipiipoln, ki nan ye binib bi ubaa aa gee bi na, ki mu nan nan tōb. <sup>4</sup>Le Uwumbōr u gaal timi lir na mōk timi waah kpa tibulchinn ki gee timi pu na, <sup>5</sup>ki gaa timi lii. Naa ye timi aatunyaan pu le u gaa timi lii, waan-imbaasaln pu le u gaa timi lii. Le Waafuur Nyaan gir ma timi, ki tii timi limōfapoln, ki finn tipobil ni. <sup>6</sup>Taah kpaan Yesu Kristo u gaal timi lir na ni na, le Uwumbōr ḷja timi tibulchinn ki tii timi Waafuur Nyaan. <sup>7</sup>Waabulchinn pu le u len ke timi aabōr ḷjan, ki tii timi limakl ke ti ga kan limōfal li kaa kpa ndoon na. <sup>8</sup>Tibōr ngbaan gbii la.

M ban ke aa li tuk binib tibōr ngbaan n-yoonn mōmōk, aan binib bi gaa Uwumbōr ki kii na aatafal li bi litunyaan ponn ni. Nimina le ḷjan ki kpa tinyoor ki tii binib. <sup>9</sup>Yii mbaan mu ye kijōrk aabaan na, ki taa kpak kinikpakpak niyaajatiib aayimbil pu. Aa taa jaa kijaak, ki taa kpak kinikpakpak Uwumbōr aakaal aataata pu. Nimina mōmōk ye fam la, kaa kpa tinyoor tibaa. <sup>10</sup>Unii yaa bi ki cha Yesu aanib yakr tōb chee kan, aa sur u nfum mulee. U yaa kaa di cha kan, yii u. <sup>11</sup>Aa bee ke unii u bi kina na yenn a, ki tun titunwanbir. Uma ubaa aatunwanbir le mōk ke waabōr bii.

### Kookoo aasurm

<sup>12</sup>M yaa cha Atemas, bee Tikikus dan aa chee kan, pōon aabaa ki dan m chee Nikopolis aatinj ni; m ḷja nlandak nsui ni ke m ga li bi nima chee kakab yoonn.

<sup>13</sup>Pōon aabaa ki ter Senas, u ye ubōjir na, ni Apolos, ke bi piin baasachuln, ki taa cha bi lann baasachuln aawan nibaa.

<sup>14</sup>Ni ḷjan ke Yesu aanib bae ke ni ḷjan ke bitafal li bi litunyaan ponn ni, ki li ter binib bi ban nterm na, aan ki taa li bi fam.

<sup>15</sup> Binib bimok bi m chee na dooni si. Uwumbor ja tinoor ja ni momok pu.  
Aa ti doon binib bi gaa Yesu ki kii ki gee [Amii.]  
timi na.

*Kigbaŋ ki Pɔɔl ŋmee ki tii*

## FILEMONN

*na*

**1** Min Pɔɔl u bi kiyondiik ni Yesu Kristo pu na, ni tina aabo Timoti le ŋmee kigbaŋ kee ti tii si Filemonn, u ye timi aatutujeer u ti gee u na, <sup>2</sup>ni Yesu aanib bi kuuni aado na, ni Afia u ye tininkpan na, ni Akipus u ye timi aatutujeer Yesu aasan ni na.

<sup>3</sup>Tite Uwumbor ni Tidindaan Yesu Kristo ŋa tinyoor ŋa ni pu, ki tii nimi nsuudoon.

### Filemonn aageehm ni waagaakii

<sup>4</sup>N-yoonn mumɔk m mee Maawumbor na, m mee u tii si, ki dooni u aa pu; <sup>5</sup>ba pu? m ŋun saah tii Tidindaan Yesu naadii, ki gee u ni Uwumbor aanib mɔmɔk pu na. <sup>6</sup>Saah tii Kristo naadii pu na, le aa nyi tiwanyaan nimɔk ti kpa u pu na, le m mee Uwumbor ke nima le ga cha aa yakr tiwanyaan ngbaan tii biken. <sup>7</sup>Nna aabo, saah gee binib pu na, nima le tii mi mpopiin sakpen, ki sɔŋ nsui; ba pu? saah ŋani pu na, aa pɔɔk Uwumbor aanib aataakpab la.

### Pɔɔl aah gaj Onesimus pu pu na

<sup>8</sup>Nima pu na, maah ye Kristo aatutunn na, m ba ga li kpa lipobil ki cha aa ŋa tiwan ni ŋan na, <sup>9</sup>tɔ, maah gee si na, nima le m gaŋni si kaakaan. Min Pɔɔl u si Yesu Kristo aasisiyyaan, ki bi kiyondiik ni dandana wee u pu na, <sup>10</sup>m gaŋni si ki tii maabo Onesimus; \*\* maah bi kiyondiik ni na le m kpalm ute Uwumbor aasan ni. <sup>11</sup>N-yoonn mubaa waa nan kpa tinyoor aa chee; le dandana ma u kpa tinyoor aa chee, ni m mu chee.

<sup>12</sup>M ki giini u aa chee. Waah kaa ki bi m chee na, waabor bi nsui ni sakpen a. <sup>13</sup>M ba gee ke u li bi m chee ki li si saasisiyyaan ki ter mi buyoonn m bi kiyondiik ni tibonyaan tee pu na. <sup>14</sup>Aa mu yaa kaa kii kan, maan ŋa nibaa see aa kii. Maa ban ke m muk si ke aa ter mi. M ban ke aa ter mi saageehn pu la.

<sup>15</sup>Nibaakan, u yakr aa chee ni yunn siib, aan u ki gir ni aa chee ki li bi n-yoonn mɔmɔk mu kaa kpa ndoon na. <sup>16</sup>Dandana wee, waa ki bi ke unaagbiija na. U jer unaagbiija. U ye tina aabo u ti gee u na la. M yaa gee u kan, aa ga li gee u ki jer kina; ba pu? u ye saanaagbiija, ki mu ye aana aabo Tidindaan pu.

<sup>17</sup>Nima pu na, aa yaa len ke m ye saatutujeer Uwumbor aatuln ponn ni kan, gaa u ke saah ba ga gaa mi pu na. <sup>18</sup>U yaa nan koo saataani ni, bee u yaa joo saapɔln kan, cha ni li ye maapɔln. <sup>19</sup>Min Pɔɔl le di ŋŋaal ki ŋmee kina, m ga pa tii si. Maan len ke saapɔln li bi m chee na le ye saamofal. <sup>20</sup>Nna aabo, taah kpaan Tidindaan ni na, piir nsui, ki pɔɔk ntaakpab uma Kristo pu.

<sup>21</sup>M nyi ke aa ga kii maamɔb. Nima le cha m ŋmee kigbaŋ kee m tii si. M nyi ke aa ga ŋa maah len pu na ki jer kina. <sup>22</sup>Ni gur na le ye ke m ban ke aa toor nkookoo yaan ki siin mi. Naah bi mee Uwumbor ki tii mi na, m kpa limakl ke u ga cha m gir ni ni chee.

### Kookoo aadoon

<sup>23</sup>Epafras u mu bi m chee kiyondiik ni, Yesu Kristo pu na, dooni si. <sup>24</sup>Mak, ni Aristakus, ni Demas, ni Luk, bi ye maatutujeerb Uwumbor aatuln ponn ni na, bi mu dooni si.

<sup>25</sup>Tidindaan Yesu Kristo aajann li bi nisui ni. [Amii.]

\*\*1:10 : Onesimus aataaa le ye ke “U kpa tinyoor”.

*Kigbaŋ ki bi ŋmee ki tii*

## HIIIBRU YAAB

*na*

**Yesu aah ye Uwumbør  
aamɔboln pu na**

**1** N-yaayoonn na Uwumbør nan cha waabɔnabtiib tuk tiyaajatiib waabor ki di tiwan aabɔŋ aabɔŋ ŋjan waasan.  
**2** Kookoo aayoonn mue le u cha Ujapɔɔn tuk timi waabor. Uma le u nan cha u naan dulnyaa wee, ki len ke uma le ga li yeh tiwan mɔmɔk. **3** U wiin chain ke Uwumbør aah wiin chain pu na, ki ye Uwumbør aanaŋ bamɔnn, ki di waabor ti kpa mpɔɔn na le joo tiwan mɔmɔk. U di ubaa toor kitork ki finn timi ki nyan timi aatunwanbir, le ki nin kal Uwumbør u yeh mpɔɔn mɔmɔk na aaŋangii wɔb paacham.

### **Uwumbør Aajapɔɔn aapɔɔn jer waatuuntiib aapɔɔn**

**4** Uwumbør tii u liyimbil li jer waatuuntiib aayimbil na. Waayimbil aah jer baayimbil pu na, kina le u jer bi.  
**5** Uwumbør nan bui Ujapɔɔn ke, “Sin le ye Maabo, din wee le m ma si,”<sup>††</sup> ki ki bui ke,  
 “Min le ga li ye Ute,  
 le u li ye Maabo.”<sup>‡‡</sup>  
 Uwumbør aa nan bui waatuun ubaa kina.

**6** U nan tun ni Ujapɔɔn u kaa kpa ŋneen aatɔ na dulnyaa wee ni, le ki bui waatu-

untiib mɔmɔk ke bi gbaan unimbiin ni ki doon u.

**7** Uwumbør len waatuuntiib aabɔr, ke u cha waatuuntiib tun waatuln la, ke libuln ni mmiigaal aah tun waatuln pu na.<sup>¶¶</sup> **8** Le u len Ujapɔɔn aabɔr ke, “Uwumbør, saanaan ga li bi ki ti saa n-yoonn mu kaa kpa ndoon na. Aa joo saanaan ni aanib mbamɔm la.

**9** Aa gee lituln li ŋjan na, le kaa gee titunwanbir.  
 Nima pu le Uwumbør u ye Saawumbør na lee si,  
 ki tii si mpopiin ki jer aanjeen aatɔtiib mɔmɔk.”<sup>§§</sup>  
**10** Uwumbør Aagbaŋ ki len ke, “Naah nan piin na, sin Uwumbør le nan naan kitij, ni paacham mu.

**11** Kitij ni paacham ga doo, le aa ma ga li beenin bi.  
 Kitij ni paacham ga kpoi ke libɔkul na.  
**12** Aa ga kpab kitij ni paacham ke likekeln na,  
 ki kpeln ni nipɔɔn,  
 le sin ma beenin bi, kaan kpeln; saayoonn aan doo.”<sup>\*</sup>  
**13** Uwumbør nan bui Ujapɔɔn ke, “Kal ŋɔŋangii wɔb,  
 ki ti saa buyoonn m ga nyaj saadim mɔmɔk na.”<sup>†</sup>

Tɔ, Uwumbør aa nan bui waatuun ubaa kina.

**14** Kina kan, waatuuntiib ye ba? Bi mɔmɔk ye iwiin i tun lituln tii Uwumbør na la. U tun ni bi ke bi nan ter timi waanib bi ŋmar na.

<sup>††1:5</sup> : Lik Ilahn 2.7.

<sup>‡‡1:5</sup> : Lik 2 Samuel 7.14; 1 Bibɔrb Aabor 17.13.

<sup>¶¶1:7</sup> : Lik Ilahn 104.4.

<sup>§§1:9</sup> : Lik Ilahn 45.6-7.

<sup>\*1:12</sup> : Lik Ilahn 102.25-27.

<sup>†1:13</sup> : Lik Ilahn 110.1.

## Ƞj̄marm kpaan

**2** Nima pu na, ni ȣjan ke titafal li bi tibonyaan ti ti ȣjun ti na ponn ni, ti taa di ti lii. <sup>2</sup>Tibor ti Uwumbor nan cha waatuuntiib tuk waanib na sil mbamom la. Unii umok nan yii tibor ngbaan ki ȣja taah ko pu na nan kan ntafadaan mu ȣneer u na. <sup>3</sup>Nima pu na, ti yaa yii Ƞj̄markpaan ngbaan aaboln kan, taan nyan ntafadaan ni. Tidindaan ubaa le nan pue tuk binib Ƞj̄marm ngbaan aabor. Le binib bi ȣjun na mu tuk timi, ki mok timi ke ti gbii la. <sup>4</sup>Uwumbor mu cha bi tun lijinjiir aatun aabɔŋ aabɔŋ, waapɔɔn pu, ki tii bi Waafuur Nyaaan aapiin waah gee pu na. Nima le mok ke bi len mbamɔn.

### Yesu u gaal timi lir na

<sup>5</sup>Ti len dulnyaa u choo na aabor la. Uwumbor aa nan di dulnyaa ngbaan ȣwaatuuntiib aajaal ni. <sup>6</sup>Ni ȣmee Uwumbor Aagbaŋ ni ke,  
“Unibon ye ba aan aa teer ubor?  
Unibon ye ba aan aatafal bi u ni?  
<sup>7</sup>Aa sunn u taab ki cha saatuuntiib jer u,  
ni yunn siib.  
Aa di kipak ni liyimbil le di tii u,  
ki di u ȣja saawanaankaan mɔmɔk  
aayidaan,  
<sup>8</sup>ki cha tiwan mɔmɔk kii umɔb.”<sup>‡</sup>  
Tɔ, saah cha tiwan mɔmɔk kii umɔb na, tiwan ni kaa kii umɔb na aa ki gur. Ti mu aa kee kan tiwan mɔmɔk kii umɔb; <sup>9</sup>ti kan Yesu la. Uwumbor nan sunn u taab ki cha waatuuntiib jer u, ni yunn siib, aan u ti kpo binib mɔmɔk pu, uma Uwumbor aanimbaasaln pu. Dandanee wee ti kan ke waah jin nkun aafalaa na, Uwumbor di kipak ni liyimbil le di tii u. <sup>10</sup>Uwumbor u nan naan tiwan mɔmɔk

ki joo ni mɔmɔk na, ni ȣneer u ke u cha Yesu ji falaa, ki li joo ni Uwumbor aabim bi wiir na waanaan ni. Uma le gaa bi lii. Waah ji falaa pu na, nima le cha u ye timi aajmaŋmardaan bamɔn.

<sup>11</sup> U ȣjani binib chain la. U ni binib bi u ȣjani bi chain na, bi mɔmɔk kpaan te ubaa la. Nima le inimɔɔn aa joo u ke u yin bi unaabitiib. <sup>12</sup>Le u bui Uwumbor ke,

“M ga tuk nnaabitiib saah tun pu na.  
M ga pak si baah kuun nin chee na,”<sup>\*</sup>

<sup>13</sup>ki ki len ke,

“M ga tii Uwumbor naadii la,”<sup>§</sup>

ki ki len ke,

“Lik, m ni mbim bi Uwumbor tii mi na so.”\*\*

<sup>14</sup>Tɔ, timi waabim aah ye binibɔm pu na, nima le uma Yesu mu kpalm unibon, ke u nan kpo ki ȣja kinimboŋ ki nan kpa nkun aapɔɔn na fam, <sup>15</sup>le ki gaa binib bimɔk san nkun ijawaan na lii; baayoɔonn mɔmɔk nkun aajawaan nan joo bi. <sup>16</sup>Ni ye mbamɔn, naa ye Uwumbor aatuuntiib le u ter. Abraham aayaabil le u ter. <sup>17</sup>Ni ȣjan ke u li naahn unaabitiib tiwan mɔmɔk ponn ni, aan ki li ye utotoorninkpel u san timi kinimbaak, ki tun Uwumbor aatuln mbamɔn, ki di ubaa toor kitork aan Uwumbor di cha pinn waanib baatunwanbir na. <sup>18</sup>Uma ubaa le kan ntɔŋ ki jin falaa, nima le u ga ȣmaa ter binib bi kan ntɔŋ na.

### Yesu jer Moses pel pel

**3** Nnaabitiib bi bi chain, aan Uwumbor yin bi na, ni li dakl lik Yesu aabor. Ti dii u ki len binib aanimbil ni ke ti dii u la. Uwumbor nan tun ni u, ke u nan li ye utotoorninkpel. <sup>2</sup>U tun lituln mbamɔn tii Uwumbor u tii

\*2:8 : Lik Ilahn 8.4-6.

‡2:12 : Lik Ilahn 22.22.

§2:13 : Lik Aisaya 8.17.

\*\*2:13 : Lik Aisaya 8.18.

u lituln ngbaan na. Moses mu nan tun Uwumbor aatuln mbamom Uwumbor aamaal aanib aakaasisik ni. <sup>3</sup> Unii u ye mmaal aayaaja na le kani nnyuj ki jer mmaal aanii ubaa. Kina le Uwumbor len ke Yesu neer nnyuj ki jer Moses. <sup>4</sup> Mmaal momok kpa yaaja la. Uwumbor le nan naan binib momok. <sup>5</sup> Ni ye mbamom, Moses nan tun Uwumbor aatuln mbamom, Uwumbor aamaal aanib aakaasisik ni. U nan ye Uwumbor aattunn, ki tuk binib Uwumbor aah nan ban ke u tuk bi pu na. <sup>6</sup> Kristo ma kan, u ye Uwumbor Aajapcon, le ki joo Uwumbor aamaal mbamom. Timi le ye waamaal ni aanib. Ti yaa kpa lipobil ni mpopiin ki ti saa ndoon kan, ki yaa kaa joo beeni kan, ti ye waamaal yaab la.

### Uwumbor aanib aafuur

<sup>7</sup> Uwumbor Aafuur Nyaan nan bui Israel yaab ke,  
“Ni yaa jun Uwumbor aaneel din wee kan,  
<sup>8</sup> ni taa cha nitafal li pco  
ke niyaajatiib aatafal aah nan pco pu buyoonn bi nan yii waamob nteersakpiin ni na.

<sup>9</sup> Bi nan tco u ki lik, nteersakpiin ni.  
Hali bi nan kan waah tun  
lijinjiir aatun pu na qibin imonko ilee,  
le ki tco u nima chee.  
<sup>10</sup> Nima pu le u nan gee lijuul bi pu,  
le ki bui ke baalandak yenni n-yoonn momok la,  
baa bee waasan.

<sup>11</sup> Nima pu na, u nan gee lijuul, ki puu tipuukpaan  
ke baan koo kitij ki ponn ni u ba ga tii bi lifuur na.”<sup>††</sup>  
<sup>12</sup> Nnaabitib, ni li nyi man, ni ponn ni ubaa aasui taa li bir aan u li joo beeni ki

yii Uwumbor u ye limofadaan na. <sup>13</sup> Ni li pcook tcb aataakpab iwiin momok, nsan aah laa bi pu buyoonn na, titunwanbir taa qmann unii ubaa aan utafal li pco. <sup>14</sup> Ti yaa beenin tii u naadii ke taah nan tii u naadii njan pu na ki ti saa ndoon kan, ti ga ji waamcon.

<sup>15</sup> Uwumbor Aagbaq len ke,  
“Ni yaa jun Uwumbor aaneel din wee kan,  
ni taa cha nitafal li pco  
ke niyaajatiib aatafal aah nan pco pu buyoonn bi nan yii waamob nteersakpiin ni na.”<sup>‡‡</sup>

<sup>16</sup> Jma jun Uwumbor aaneel ki yii waamob? Naa ye binib bimok Moses nan nyan bi Ijipt aatij ni na aa? <sup>17</sup> Uwumbor nan gee lijuul jma pu qibin imonko ilee? Naa ye binib bi nan tun titunwanbir ki kpo kipcook ni na aa? <sup>18</sup> U nan puu tipuukpaan ke jma aan koo kitij ki ponn ni u ba ga tii bi lifuur na? Naa ye binib bi nan yii waamob na aa? <sup>19</sup> Nima le ti bee ke baah kaa nan gaa u ki kii na, nima le baa nan jmaa kan lifuur ngbaan u chee.

**4** To, Uwumbor aah puu tipuur ke u ga tii timi lifuur na, nsan laa beenin bi ke ti kan li. Nima na, ni li nyi man, ubaa taa lann lifuur ngbaan. <sup>2</sup> Ti mu jun tibonyaan tee ke binib ngbaan aah nan jun ti pu na. Bi nan jun ti, kaa gaa ti ki kii, nima le tibonyaan ngbaan aa ja bi tinyoor. <sup>3</sup> Timi bi gaa Yesu ki kii na le kan lifuur ngbaan. Uwumbor nan len ke, “M nan gee lijuul binib bi kaa gaa mi ki kii na pu,  
ki puu tipuukpaan ke baan koo kitij ki ponn ni m ba ga tii bi lifuur na.”<sup>¶¶</sup>  
Waah nan naan dulnyaee wee doo na, waatuln doo le na. <sup>4</sup> Iwiin ilole daal aabor bi Uwumbor Aagbaq ni ke, “Uwumbor nan fuer winlolle daal ki di

<sup>††</sup>3:11 : Lik Ilahn 95.7-11.

<sup>‡‡</sup>3:15 : Lik Ilahn 95.7-8.

<sup>¶¶</sup>4:3 : Lik Ilahn 95.11.

cha waatuln mɔmɔk.”<sup>88</sup> <sup>5</sup>Ni ki ŋmee ke, “Baan koo kitip ki ponn ni m ba ga tii bi lifuur na.” <sup>6</sup>Binib bi puen ŋun tibɔnyaan tee na, baa nan gaa ti ki kii, nima le baa kan lifuur ngbaan. Binib biken mu ga kan lifuur ngbaan. <sup>7</sup>Nima pu le Uwumbɔr ki siin nwiin mu bi ga kan lifuur ngbaan na, ki yin nwiin ngbaan ke “Din.” Binib ngbaan aa kan lifuur ngbaan; le njibin pam jer, le David nan ŋmee Uwumbɔr Aagbar ni, naah nan puen ŋmee pu na ke,

“Ni yaa ŋun Uwumbɔr aaneel din wee kan,

ni taa cha nitafal li pɔɔ.”\*

<sup>8</sup>Tɔ, Josua yaa ba nan tii Israel yaab lifuur ngbaan kan, Uwumbɔr aa ba ga ki siin nwiin muken. <sup>9</sup>Naah bi pu na, lifuur beenin bi ki tii Uwumbɔr aanib. <sup>10</sup>Unii u kan lifuur li Uwumbɔr tii u na, u di cha ubaa aatuln ke Uwumbɔr aah nan di cha waatuln pu na la. <sup>11</sup>Nima pu na, cha tinimbil li man ke ti kan lifuur ngbaan, ubaa taa yii Uwumbɔr aamɔb ki lir, ke Israel yaab aah nan lir pu na.

<sup>12</sup>Uwumbɔr aabɔr fu, ki kpa mpɔɔn, ki ka jer kijuk ki ka ŋipepel mɔmɔk ŋilee na, ki koo unii aasui ni, ni waawiin ni, ki lik usui ni aabɔbɔrkaan aah bi pu na, ki mɔk waalandak aah bi pu na, ki lik usui aah ban pu na, ke ni ŋjan aan naa ŋjan. <sup>13</sup>Tiwan nibaa aa bi ki bor Uwumbɔr. Tibɔr mɔmɔk nyan ki dɔ mpaan pu, ki dɔ tijmeen unimbil ni. Uma le ti ga len timi aabɔr ki tuk u.

### Yesu le ye utotoorninkpekpaan

<sup>14</sup>Tɔ, ti kpa utotoorninkpekpaan u bi Uwumbɔr do na. U ye Uwumbɔr Aajapɔɔn Yesu la. Nima pu na, cha ti li beenin dii u ki taa di waasan lii. <sup>15</sup>Uto-

toorninkpel ngbaan ga ŋmaa san timi kinimbaak timi aafalaan ponn ni. U kan ntɔŋ aabɔŋ aabɔŋ ke taah kan ntɔŋ mɔmɔk pu na. Uma le aa tun titunwanbir tibaa. <sup>16</sup>Timi aatotoorninkpel aah bi kina na, cha ti li kpa lipobil ki dan Uwumbɔr u kpa tibulchinn na aabɔrjal chee, aan u san timi kinimbaak, ki ter timi buyoonn ti ban nterm na.

**5** Utotoorninkpel umɔk bi na, Uwumbɔr le lee u ki nyan u binib ponn ni siin, ke u ti sil baasisiyyaan Uwumbɔr aanimbiin ni, aan ki tii u ipiin, ki toor kitork tii u binib aatunwanbir pu. <sup>2</sup>Utotoorninkpel ubaa mu kpa titunwanbir la. Nima le u ga ŋmaa san binib bi tun titunwanbir kaa nyi na kinimbaak. <sup>3</sup>Uma ubaa aah kpa titunwanbir pu na, ni ŋjan ke u toor kitork uma ubaa aatunwanbir, ni bi mu aatunwanbir pu. <sup>4</sup>Unii ubaa aan ŋmaa nyuŋ ubaa ki ja ubaa utotoorninkpel, see Uwumbɔr le lee u, ki ja u utotoorninkpel, ke waah nan lee utotoorninkpel Aaronn pu na.

<sup>5</sup>Kina le Kristo aa nyuŋ ubaa ki ja ubaa utotoorninkpel. Uwumbɔr le bui u ke,

“Sin le ye Maabo, din wee le m ma si,”†

<sup>6</sup>le ki ki bui u ke,

“Aa ye utotoor ke Melkisedek aah nan ye pu na,  
ki ga li bi n-yoonn mu kaa kpa ndoon na.”‡

<sup>7</sup>Buyoonn Yesu nan ye unibɔn na, u nan wii tinyunyunn mpɔɔn pu, ki gan Uwumbɔr u ga ŋmaa nyan u nkun ni na. Waah san Uwumbɔr na, le u ŋun waameel. <sup>8</sup>U ye Uwumbɔr Aajapɔɔn la, le ki kii waamɔb, ki jin falaa, le ki bae naah pɔɔ pu aan u kii Uwumbɔr aamɔb ki jin falaa na. <sup>9</sup>Nima le cha u ye timi

§§4:4 : Lik Mpiin 2.2.

\*4:7 : Lik Ilahn 95.7-8.

†5:5 : Lik Ilahn 2.7.

‡5:6 : Lik Ilahn 110.4.

aanjaajmardaan bamɔnn, ki gaa binib bimɔk kii waamɔb na lii n-yoonn mu kaa kpa ndoon na.<sup>10</sup> Uwumbɔr len ke u ye utotoorninkpel ke Melkisedek aah nan ye pu na.

### Taa yii Uwumbɔr aasan man

<sup>11</sup> Ti ga ki ɔjmaa len waabɔr ti wiir na, le nimi aalan par, nima le taatataa ga li pɔɔ ni chee. <sup>12</sup> Naah dii Uwumbɔr ni yunn pu na, ni ba ga mɔk binib biken waasan. Le ni ban ke unii ki mɔk nimi Uwumbɔr aamɔkm mu diin na. Ni naahn binib bi ban nnaabiin kaa ban tijikaar bamɔnn na la. <sup>13</sup> Unii umɔk nyu nnaabiin na ye ubopoɔn la, kaa ɔjmaa len nsanyaan aabɔr. <sup>14</sup> Tijikaar bamɔnn le ye binib bi chikr na yaan. Bi bae Uwumbɔr aabɔr ki dii taah mɔk bi pu na. Nima le bi kpa nlan ki nyi nsan mu ɔjan na, ni mu kaa ɔjan na.

**6** Nima na, ti taa li beenin len Kristo aamɔkm mu diin na baanja aabɔr n-yoonn mɔmɔk. Cha ti bae waamɔkm mu gur na mɔmɔk, aan ki chikr waasan ni. Naa ki ban ke ti li beenin tuk nimi n-yoonn mɔmɔk ke, “Kpeln nimi aabimbin man, ki di cha njitukpok, ki tii Uwumbɔr naadii man.” <sup>2</sup> Naa ki ban ke ti li beenin tuk nimi n-yoonn mɔmɔk baah muini binib nnyun ni pu na, ni baah joo biŋaal paani binib pu pu na aabɔr, ni binib aah ga fikr nkun ni pu na aabɔr, ni ntafadaan mu kaa kpa ndoon na aabɔr. Timina mɔmɔk ye ɔjan aabɔr le waasan ni. <sup>3</sup> Uwumbɔr yaa kii kan, ti ga bae waabɔr ti gur na, ki di kpee ɔjan aabɔr ngbaan pu.

<sup>4</sup> Tɔ, binib bi Uwumbɔr woln binimbil na yaa di cha waasan kan, baan ki ɔjmaa kpeln baabimbin ki ki dii u. Bi kan waapiin, ki gaa Waafuur Nyaan,<sup>5</sup> ki bee waabɔr aah ɔjan pu na, ki kan dulnyaaa u choo na aapɔɔn, le ki di cha waasan.

<sup>6</sup> Baah di cha waasan na, ni mɔk ke bi ki bi kpaa Uwumbɔr Aajapɔɔn ndɔpuinkoo pu, ki jinn u inimɔɔn binib aanimbil ni la, le saan ɔjmaa cha bi ki kpeln baabimbin ki ki dii u.

<sup>7</sup> Kitij ki gaa utaal aanyun mu lir ni ki pu, ki ɔjani tijikaar ti ɔjan na ki tii binib bi ko ti na, Uwumbɔr ɔjani tinyoor ɔjani kitij ngbaan pu. <sup>8</sup> Tɔ, kitij ki po ɔjani ikokon ni ichakpeejagar baanja na bee yɔli la. Naan yunn, le bi ga see ki mmii ki bii ki. Kitij ngbaan aadoon le na.

<sup>9</sup> Timi aanigeekaab, ti len kina la; ti mu aa dak ke ni bi ke kitij ki bi ga see ki mmii na. Ti bee ke ni ɔjmar ki ga kan tinyoor. <sup>10</sup> Uwumbɔr ɔjan la. Waan suln naah tun lituln pu ki ter waanib, ki beenin ter bi na, ki mɔk u naah gee u pu na bɔr. <sup>11</sup> Ti ban ke ni mɔmɔk pɔɔk nibaa ki li kpa limakl ki nan saa ndoon. <sup>12</sup> Ni taa li san ligbanyakl man. N-yaayoonn na aanib bi nan gaa Uwumbɔr ki kii ki jin suklaa na, bi bi paacham ki kan waah puu tipuur ti ke u ga tii bi na. Ni mu li dii baah dii pu na.

### Uwumbɔr ga ɔja waah puu tipuur ti na

<sup>13</sup> Uwumbɔr aah puu tipuur ki tii Abraham na, u nan puu uma ubaa aayimbil pu la. Ubaa aa bi ki jer u, ke u puu waayimbil, nima le cha u puu uma ubaa aayimbil. <sup>14</sup> U nan puu tipuur le ki bui Abraham, “M ga ɔja tinyoor ɔja aa pu pam, ki cha aa por sakpen.”<sup>15</sup> Abraham nan kpa limɔr, le ki nan kan Uwumbɔr aah nan puu tipuur ti na. <sup>16</sup> Binib yaa puu tipuur kan, bi puur unii u jer bi na aayimbil pu la. Binib yaa kpak kinikpakpak ki ti puu tipuur kan, ni doo le na. <sup>17</sup> Uwumbɔr nan ban ke u mɔk binib bi ga kan waah puu tipuur ti na, ke waan kpeln. Nima le u nan puu uma ubaa aayimbil pu. <sup>18</sup> Waah nan puu tipuur ti na, waan kpeln. Waah puu uma ubaa aayimbil pu

na, nima le sil mōk ke waan kpeln. Waan ḥjmaa mōn nnyamōn. Nima le timi bi san cha u chee ke ti ḥjmar na aataakpab pōo mbamōm, le ti kpa limakl ke ti ga kan waah puu tipuur ti na.<sup>19</sup> Taah kpa limakl ngbaan na, nima le joo timi aasui ke ti taa di cha waasan. Yesu pu, le ti kpa limakl ngbaan. Limakl ngbaan pu, le Yesu u bi paacham na aalandak bi tisui ni.<sup>20</sup> Yesu le ye utotoorninkpel n-yoonn mu kaa kpa ndoon na, ke Melkisedek aah nan ye pu na, ki loln ti pu nsan ki buen Uwumbōr do, ke u ti sil timi aasisiiyaan nima chee, Uwumbōr aanimbiin ni.

### Melkisedek u nan ye utotoor na

**7** Melkisedek ngbaan nan ye Salem aatiq aabor, ki nan ye Uwumbōr u kaa kpa ḥjneen aatɔ̄ na aatotoor la. Abraham aah nan ku bibɔ̄rb bi ye waadim na ki gir ni na, le Melkisedek tooh u nsan pu ki ti ḥja Uwumbōr aanyoor ḥja u pu.<sup>2</sup> Le Abraham nan nyan tiwan nimōk u nan gaa na nibaabaa kipiik mōk ponn ni, ki di tii Melkisedek. Melkisedek aatataa le ye ke “ubɔ̄r u kpa mbimbinyaan na.” U nan ye Salem aatiq aabor la. Salem aatataa le ye ke “nsuudoon.”<sup>3</sup> Baa ḥjmee ute ni una ni uyaajatiib aabor, kaa ḥjmee buyoonn bi nan ma u na, ki mu aa ḥjmee buyoonn u doo waatuln na. Waamɔ̄fal aayoonn mōmōk u nan ye Uwumbōr aatotoor la. Nima le u naahn Uwumbōr Aajapɔ̄on u ye utotoor n-yoonn mu kaa kpa ndoon na.

<sup>4</sup>Dakl lik man uja ngbaan aah nan nyuun pu na; tiyaajaninkpel Abraham nan yakr waadim aawan tiwan nfum kipiik, ki nyan nibaa, ki di tii u, ki gur niwae.<sup>5</sup> Uwumbōr aakaal len ke Israel yaab yakr baawan mōmōk nfum kipiik, ki nyan nibaa tii Liifai aayaabitiib, bi ye Uwumbōr aatotoorb na. Bi ni Israel yaab nan ye binibaan la. Bi mōmōk nan ye Abraham aayaabitiib la.<sup>6</sup> Melkisedek aah nan ye Liifai aayaabil, le Abraham yakr

waawan mōmōk nfum kipiik, ki nyan nibaa tii u. Le u ḥja tinyoor ḥja Abraham pu. Abraham le Uwumbōr nan puu tipuur tii u.<sup>7</sup> Unii yaa kpa mpɔ̄on ke u ḥja Uwumbōr aanyoor ḥja uken pu kan, ni mōk ke u jer u la. Ubaa aan kpak kina.<sup>8</sup> Israel yaab yakr baawan mōmōk nfum kipiik, ki nyan nibaa ki di tii Uwumbōr aatotoorb, bi nan ye binib bi ga kpo na. Melkisedek u Abraham nan yakr waawan nfum kipiik ki nyan nibaa tii u na ma kan, baa ḥjmee waakun aabor. Bi ḥjmee waabimbin aabor la.<sup>9</sup> Abraham aah nan yakr waawan ki di tii u na, ti ga ḥjmaa len ke uyaabitiib Liifai yaab bi gaal biken chee na, mu nan tii u la.<sup>10</sup> Buyoonn Melkisedek nan tooh Abraham nsan ni na, Abraham aa nan kee ma uyaabil Liifai. Ti ga ḥjmaa len ke Abraham nan sil uyaabil Liifai aasisiiyaan la.

<sup>11</sup> Uwumbōr tii Israel yaab nkaal mu mōk bi waatotoorb Liifai yaab aah ga li joo bi pu na. Bitotoorb ngbaan aatuln yaa ba gaa binib lii kan, Uwumbōr aa ba ga li ban u tun ni Yesu u ye utotoor ke Melkisedek aah nan ye pu na. U ba ga ki tun ni utotoor u bi ke Aaron aayaabitiib Liifai yaab aah nan bi pu na la.<sup>12</sup> Waah tun ni utotoor uken aaboln na, see u kpeln nkaal ngbaan mu.<sup>13</sup> Tidindaan u ti len waabor na, aa nan ye Liifai aanibol ponn ni aanii. U nan ye linibol liken ponn ni aanii la. Waanibol ponn ni aanii ubaa aa nan kee ye Uwumbōr aatotoor.<sup>14</sup> Binib mōmōk nyi ke Tidindaan nan ye Juda aanibol ponn ni aanii la. Moses aa nan len ke linibol ngbaan aanib ga li ye bitotoorb.

### Utotoor yayan u bi ke Melkisedek na

<sup>15</sup> Nima le mōk timi chob ke utotoor yayan, u bi ke Melkisedek aah nan bi pu na, fuu ni.<sup>16</sup> Naa ye binib le nyan u ki ḥja u utotoor baakaal aah dii pu na. Uma le kpa limɔ̄fal li kaa kpa ndoon na aapɔ̄on. Nima le cha u ye utotoor.<sup>17</sup> Uwumbōr

nan bui u, "Aa ga li ye utotoor n-yoonn mu kaa kpa ndoon na ke Melkisedek aah nan bi pu na."<sup>§ 18-19</sup> Moses aakaal aa nan kpa tinyoor, kaa nan kpa mpoōn, kaa ȳmaa ȳa bi binib bi ȳan ti doo na. Nima le Uwumbor di nkaal ngbaan lii, le ki tii timi limakl li ȳan ki jer nkaal ngbaan na. Limakl ngbaan pu le ti ga ȳmaa duun Uwumbor.

<sup>20</sup> Uwumbor aah nan puu tipuur ti na mu bi. Uwumbor aah nan nyan Israel yaab aatotoorb buyoonn na, waa nan puu tipuur. <sup>21</sup> Waah ȳa Yesu utotoor buyoonn na, u nan puu tipuur tii u, le ki bui u ke,

"Min Uwumbor le puu tipuukpaan, kaan kpeln,  
ke aa ga li ye utotoor n-yoonn mu kaa kpa ndoon na."<sup>\*\*</sup>

<sup>22</sup> Uwumbor aah puu tipuupōln ti tii Yesu na, nima le mōk ke tipuupōln ngbaan le ȳan ki jer tipuukpokl na.

<sup>23</sup> Israel yaab aatotoorb nan ye binib bi ga kpo na, le biken lejne baalelen. Nima le bi nan wiir. <sup>24</sup> Yesu ma kan, u ye utotoor u ga li bi n-yoonn mu kaa kpa ndoon na. Ubaa aan ki nab waataln pu ki toor kitork. <sup>25</sup> U bi n-yoonn mu kaa kpa ndoon na, u li mee Uwumbor tii binib bi dan Uwumbor chee u pu na. Nima le u ga ȳmaa gaa bi lii n-yoonn mu kaa kpa ndoon na.

<sup>26</sup> Yesu le ye utotoorninkpel taah ban pu na. U bi chain, kaa kpa ngalm, kaa kpa titunwanbir tibaa. U ni titunwanbirdam aa kpaani. Uwumbor yoor u paacham ki jer bimōk bi paacham na. <sup>27</sup> Bitotoorninkpiib biken aah bi pu na, waa bi kina. Waa toor kitork uma ubaa aatunwanbir pu, u toor kitork binib aatunwanbir pu la. Waa toor kitork iwiin mōmōk. U nan di ubaa toor kitork nfum

mubaa, kookoo aatork mu le na. <sup>28</sup> Bi nan leer bitotoorninkpiib Moses aakaal aah dii pu na. Bitotoorninkpiib ngbaan aa nan ȳan ti doo. Nkaal ngbaan aapuwōb le Uwumbor puu tipuur, ki ȳa Ujapōon utotoorninkpel. Uma le ye utotoorninkpel bamōnn, ki ga li bi n-yoonn mu kaa kpa ndoon na.

### Yesu le ye timi aatotoorninkpel

**8** Maah len pu na aayil le ye ke ti kpa utotoorninkpel wee aaboln. Uma le ye Yesu Kristo u ka Uwumbor u yeh mpoōn mōmōk na aabōrjal aajangii wōb paacham na. <sup>2</sup> U tun utotoorninkpel aatuln paacham aadiik ki ye kidibamōj ki bi chain na ponn ni. Uwumbor le maa ki, naa ye binib.

<sup>3</sup> Baah leer bitotoorninkpiib bimōk na, bi lee bi ke bi tii Uwumbor ipiin, ki toor kitork tii u. Nima pu na, ni ȳan ke utotoorninkpel ngbaan mu li kpa tiwan ki tii Uwumbor. <sup>4</sup> Bitotoorninkpiib bi dulnyaa wee ni ki toor kitork tii Uwumbor, Juu yaab aakaal aah dii pu na la. Yesu yaa ba laa bi dulnyaa wee ni kan, waa ba ga li ye utotoor. <sup>5</sup> Bitotoorninkpiib ngbaan aatuln ye paacham aatuln aanaŋ la. Moses yaan mu nan bi kina la. Waah nan ban ke u ȳa libool tii Uwumbor na, Uwumbor nan bui u ke u li nyi ki ȳa tiwan mōmōk ke waah mōk u laanaŋ, li-jool paab pu na.<sup>††</sup> <sup>6</sup> Tō, Uwumbor nan tii Yesu lituln li jer bitotoorninkpiib ngbaan aatuln na. Kina le tipuupōln ti Uwumbor puu tii waanib Yesu pu na jer tipuukpokl na, ki mōk ke u ga tii timi tiwan ni ȳan jer tipuukpokl ngbaan aawan na.

<sup>7</sup> Uwumbor aah puu tipuur ti ȳan na yaa kaa ba lann nibaa kan, waa ba ga li ban ke u ki puu tipuur lelee. <sup>8</sup> Uwumbor

<sup>§7:17</sup> : Lik Ilahn 110.4.

<sup>\*\*7:21</sup> : Lik Ilahn 110.4.

<sup>††8:5</sup> : Lik Nnyam 25.40.

nan kan ke waanib kpa taani, le ki bui ke,

<sup>“</sup>Lik, n-yoonn choo, le m ga nan puu tipuupɔln

tii Israel yaab ni Juda yaab.

<sup>9</sup> Tipuur ngbaan aan li bi ke tipuur ti m nan puu tii biyaaajiib,

buyoonn m nan chuu binaal ki daaar nyan bi,

ki cheen bi nyan Ijipt aatij ni na.

Baa nan joo tipuur ngbaan, nima le maa nan ki gar bi.

Min Uwumbor le len kina.

<sup>10</sup> Maah ga puu tipuur ti tii Israel yaab n-yoonn mu choo na na le ye ke:

M ga di maakaal ḥa baalandak ni, ki ḥmee mu bisui ponn ni.

M ga li ye Baawumbor, le bi li ye maanib.

<sup>11</sup> Bi ponn ni ubaa aan ki bui ujeen aato ke, ‘Bee Uwumbor.’

Ubaa mu aan ki bui una aabo ke, ‘Bee Uwumbor.’

Ba pu? bi mɔmɔk ga bee mi, biwaatiib ki ti saa bikpaam mɔmɔk ga bee mi.

<sup>12</sup> M ga di cha pinn baatunwanbir, kaan ki teer baataani.”<sup>\*\*</sup>

<sup>13</sup> Tɔ, Uwumbor aah len ke u ga puu tipuupɔln na, u ḥa njan yaan tipuukpokl la. Tiwan yaa ye tiwankpok kan, naan yunn, naan ki li bi.

### Tipuukpokl ni tipuupɔln na

**9** Uwumbor aah nan puu njan aapuur tii bi na, u nan mɔb bi baah ga doon u pu na. Bi nan kpa libool li bi ga li dooni u li ponn ni, aan binib gaa li na. <sup>2</sup> Bi nan ḥa libool lipepel libaa wɔb, ki yin li ke chain aapepel. Karyaa ni teebul ni

boroboro u bi di tii Uwumbor na, nan bi li ponn ni.<sup>¶¶</sup> <sup>3</sup> Bi nan di likekeln gii libool ngbaan ponn ni lipepel libaa wɔb, ki yin li ke chain chain.<sup>§§</sup> <sup>4</sup> Salmaa aatorkaabimbiln nan bi ni ponn ni. Libimbiln ngbaan paab le bi seer tulalee aayon tii Uwumbor. Uwumbor aakaal aah nan bi dakaa u ponn ni na, mu nan bi ni ni. Bi nan di salmaa aakur le biin dakaa ngbaan pu. Tijikaar ti bi yin ti ke mana\* na, nan bi salmaa aasambil ponn ni, dakaa ngbaan ponn ni. Aaronn Aadabil li nan ḥjeen nsupuun na mu nan bi u ponn ni. Uwumbor aakaal aah nan ḥmee ḥitak-papapan ḥilee ḥi pu na, mu nan bi u ponn ni.<sup>†</sup> <sup>5</sup> Tiwan ni kpa ifeen na‡ nilee mu nan bi dakaa ngbaan paab. Nima chee le Uwumbor nan mɔk Israel yaab waah wiin chain pu na. Tiwan ngbaan aafeen nan biin dakaa ngbaan aabiil pu, Uwumbor aah san bi kinimbaak nin chee na. Taan ḥmaa len tiwan nimina mɔmɔk aatataa nibaabaa dandana wee.

<sup>6</sup> Baah di tiwan nimina mɔmɔk siin kina na, le bitotoorb koo mɔb aadiik ni iwiin mɔmɔk, bi ti tun lituln tii Uwumbor. <sup>7</sup> Utotoorninkpel baanja le koo ni chain chain aapepel li bi libool ngbaan ponn ni na. U koo ni nima chee libiln mɔmɔk nfum mbaa baanja la. U yaa koo ni kan, see u joo ni nsin nan tii Uwumbor, uma ubaa aatunwanbir ni binib aatunwanbir pu. <sup>8</sup> Uwumbor Aafuur Nyaan mɔk timi ke mɔb aadiik ngbaan aah nan laa bi na, binib aa nan kpa nsan ke bi koo ni chain chain aapepel ponn ni. <sup>9</sup> Libool ngbaan le nan ye Yesu aabor aamɔkl ki tii bi. Libool ngbaan ponn ni, le bi joo ipiin, ni tiwakor

<sup>\*\*8:12</sup> : Lik Jeremia 31.31-34.

<sup>¶¶9:2</sup> : Lik Nnyam 26.1-30; 25.31-40, 23-30.

<sup>§§9:3</sup> : Nnyam 26.31-33.

<sup>\*9:4</sup> : Lik Nnyam 16.33.

<sup>†9:4</sup> : Nnyam 30.1-6; 25.10-16.

<sup>‡9:5</sup> : Baaliin ni, bi yin ni ke “kerubim” la. Ni naan tiwakor, ki mu kpa ifeen.

toor kitork tii Uwumbør. Kitork ngbaan aa nan cha bisui doon titunwanbir pu.<sup>10</sup> Nkaalkpok ngbaan mɔk bi tijikaar ni tiwanyukaan ni kɔ na, ni ni kaa kɔ na, ki mɔk bi baah ga finn bibaa ki ḥa chain pu na. Ni nan mɔk ke see bi dii kina le ki nan saa buyoonn Yesu ga joo ni nsanpoɔn mu ḥan na.

<sup>11</sup> Dandana wee Kristo fuu ni a, ki ye utotoorninkpel, ki joo ni nsanyaan mu bi nan len ke mu ga fuu ni na. Waa koo ni libool li binib ḥa li dulnyaa wee ni na. U dii lipepel li jer dulnyaa weeaabool ngbaan na,<sup>12</sup> le ki koo lipepel li ye chain na paacham, nfum mbaa kookoo. Uma ubaa aasin pu le u nan gaa timi lii n-yoonn mu kaa kpa ndoon na, naa ye tiwakor aasin pu.<sup>13</sup> Bi nan joo ijoob ni inaaja aasin yɔkr binib bi kaa ye chain na pu, ki di unaasabo aafatan gbaa gbaa bi, le ni ḥa tiwon chain.<sup>14</sup> Nimina yaa nan ḥa tiwon chain kan, Kristo aasin ga ter timi, ki jer kina. Uwumbør Aafuur Nyaan mu bi n-yoonn mu kaa kpa ndoon na aapɔɔn pu, u nan di ubaa toor kitork ki kaa kpa ngalm na tii Uwumbør. Waasin ga nyan titunwanbir ti ga ku timi na tisui ni, aan ti dii Uwumbør u ye limɔfadaan na.

<sup>15</sup> Yesu aah ḥa kina na, le Uwumbør puu tipuupɔln tii timi. Nima pu, le binib bi Uwumbør yin bi na ga kan lifaal li kaa kpa ndoon na, waah puu tipuur ti ke u ga tii bi na pu. Binib bi Uwumbør nan puu njan aapuuur tii bi na nan tun titunwanbir la. Yesu aah kpo na, nima le Uwumbør di cha pinn bi, ki gaa bi lii.

<sup>16</sup> Unii yaa yakr waafaal ki laa ka kan, ubaa aan ḥmaa ji lifaal ngbaan, see ni puen mɔk ke u kpo.<sup>17</sup> Buyoonn u laa beenin bi na, ubaa aan ḥmaa ji lifaal ngbaan, see u kpo.<sup>18</sup> Nima pu na, Uwumbør aah nan puu tipuur ti njan na, bi nan joo nsin le ki mɔk ke tipuur bi, bi ni Uwumbør aakaasisik ni.<sup>19</sup> Njan, Moses

nan tuk binib mɔmɔk baah ga dii Uwumbør aakaal mɔmɔk pu na, le ki nin di tikumaman ni tifar ḥa inaabii ni ijoob aasin, ni nnyun ni, ki di yok yok Uwumbør aakaal aagban pu, ni binib mɔmɔk pu,<sup>20</sup> le ki bui bi ke, “Nsin mue le mɔk nimi Uwumbør aah nan puu tipuur ti tii nimi ki tuk nimi ke ni li joo ti na,”<sup>21</sup> le ki di nsin ngbaan yok yok libool, ni baah joo tiwan nimɔk tun lituln tii Uwumbør na pu.<sup>22</sup> Nkaal ngbaan aah dii pu na, bi yaa nan ban ke bi ḥa tiwan chain kan, see bi di nsin yok yok ni pu le ki ḥa ni chain. Nsin yaa kaa nyan kan, Uwumbør aan di cha pinn titunwanbir.

### Yesu Kristo aatork nyani titunwanbir

<sup>23</sup> Uwumbør Aabool, ni tiwan nimɔk nan bi li ponn ni na ye paacham aawan aanaŋ la. Le bi nan di tiwakor aasin ḥa ni mɔmɔk chain. Paacham aawan bamɔnn le ban nsin mu jer tiwakor aasin na, aan ni ḥa chain.<sup>24</sup> Kristo aa koo ni chain aapepel li ye paacham yaan aanaŋ li binib maa li na ponn ni. Paacham le u koo ni, ki si timi aasiisiyaan, Uwumbør aanimbiin ni.<sup>25</sup> Juu yaab aatotoorninkpel nan di nsin mu kaa ye uma ubaa aasin na le koo ni chain aapepel ni, libiln mɔmɔk. Yesu Kristo di ubaa toor kitork nfum mbaa baanja la.<sup>26</sup> U yaa ba nan joo ubaa toor kitork libiln mɔmɔk kan, u ba ga ji falaa n-yoonn mɔmɔk, buyoonn dulnyaa wee piin ki joo cha na. Naah ye pu na, u fuu ni buyoonn ni yeer na, ki di ubaa toor kitork nfum mubaa, ke u kuln titunwanbir.<sup>27</sup> Uwumbør siin ke binib ga kpo nfum mubaa la, nee aapuwɔb le u ga ji bi tibør.<sup>28</sup> Kristo mu di ubaa toor kitork nfum mubaa, binib pam aatunwanbir pu. U ga ki fuu ni lelee. Naa ye titunwanbir pu le u ga ki fuu ni. U ga fuu ni ke u nan gaa binib bi kii waagirndaal na lii.

**10** Moses aakaal nan ye nsanyaan mu choo na aamɔkl la, naa nan ye nsanyaan ngbaan mbamɔm. Binib dii Moses aakaal na toor titorbaan ŋjibin ŋjibin, nima le aa ŋmaa ja bi binib bi ŋjan ti doo na.<sup>2</sup> Nkaal ngbaan yaa ba nan nyan bi titunwanbir ni kan, baalandak aa ba ga ki li muk bi titunwanbir pu. Bi mu aa ba ga ki toor kitork ngbaan.<sup>3</sup> Naah ye pu na, kitork ngbaan teer bi baatunwanbir pu, libiln mɔmɔk la.<sup>4</sup> In-aaja aasin, ni injooib aasin aa ŋmaa nyan titunwanbir binib aasui ni.

<sup>5</sup> Nima pu na, Yesu Kristo aah nan ban ke u dan dulnyaa wee ni na, u nan bui Uwumbɔr ke,

“Saa ban tiwakor ni tijikaar aatork.

Aa naan tiwon tii mi la.

<sup>6</sup> Saa ban ke m di tiwakor aatork, ki di see mmii ni tii si,

kaa ban ke m toor kitork ngbaan titunwanbir pu.

<sup>7</sup> Le m bui ke, ‘Uwumbɔr, m fuu ni ke m nan ja saageehn, ke baah ŋmee maabɔr pu saagban ni na.’<sup>8</sup>

<sup>8</sup> Njan, le u bui Uwumbɔr ke, “Saa ban tiwakor ni tijikaar aatork, kaa ban ke m di tiwakor aatork ki di see mmii ni tii si, kaa ban ke m toor kitork ngbaan titunwanbir pu.” (Moses aakaal aah dii pu na, bi toor kitork kina la.) <sup>9</sup> Le u ki bui Uwumbɔr, “M fuu ni ke m nan ja saageehn.” Uma Yesu Kristo aah di ubaa toor kitork na, Uwumbɔr gaa waa-tork, le ki kuln kitorkpok ngbaan. <sup>10</sup> U ja Uwumbɔr aageehn, le ki di ubaa aawon toor kookoo aatork nfum mbaa, le ki ja timi waanib bi ye chain na.

<sup>11</sup> Juu yaab aatotoorb mɔmɔk tun lit-uln iwiin mɔmɔk tii Uwumbɔr. N-yoonn mɔmɔk, bi toor kitork kichachaan le tii

u. Kitork ngbaan aan ŋmaa nyan titunwanbir binib aasui ni.<sup>12</sup> Yesu Kristo toor kookoo aatork titunwanbir pu nfum mbaa, le ki kal Uwumbɔr aajangii wɔb.<sup>13</sup> U bi nima ki kii bundaln Uwumbɔr ga nyaj waadim ki di bi ja utoaptan ni na.<sup>14</sup> Kitork baan ngbaan pu, le u nyan titunwanbir binib aasui ni, ki ja bi binib bi ŋjan ti doo ki cha n-yoonn mu kaa kpa ndoon na.

<sup>15</sup> Uwumbɔr Aafuur Nyaan mu tuk timi kina la. Mu nan bui <sup>16</sup> ke Uwumbɔr len ke,

“Maah ga puu tipuur ti tii bi n-yoonn mu choo na le ye ke

m ga di maakaal ja bisui ni, ki ŋmee mu baalandak ni,”<sup>\*\*</sup>

<sup>17</sup> ki ki len ke,

“Maan teer baatunwanbir bɔr,

kaan ki teer baah bii maakaal pu na.”<sup>††</sup>

<sup>18</sup> Kina pu na, Uwumbɔr yaa di cha pinn titunwanbir kan, baan ki toor kitork ti pu.

### Cha ti foor duun Uwumbɔr man

<sup>19</sup> Nnaabitiib, Yesu aasin pu le ti kpa lipobil ke ti koo ni chain aapepel ponn ni, Uwumbɔr aah bi nin chee na.<sup>20</sup> Yesu aah di ubaa toor kitork tii Uwumbɔr na, u nyan tiwan nimɔk nan bi ti ni Uwumbɔr aakaasisik ni na, ki tii timi nsanpoɔn mu ye nsanbamɔnn na, ke ti koo ni Uwumbɔr aah bi nin chee na.<sup>21</sup> Ti kpa utotoorninkpel u joo timi bi ye Uwumbɔr aanib na.<sup>22</sup> Nima pu na, cha tisui li bi mbamɔm, aan ti duun Uwumbɔr chee, ki gaa u ki kii mbamɔm ki taa joo beeni; ba pu? Yesu Kristo aasin finn tisui ni aatunwanbir, timi aalandak taa ki li muk timi titunwanbir pu. Le bi finn timi aawon nnyun mu bi chain na ni.<sup>23</sup> Taah bui ke ti kpa limakl na, cha ti li joo li

<sup>§10:7</sup> : Lik Ilahn 40.6-8.

<sup>\*\*10:16</sup> : Lik Jeremia 31.33.

<sup>††10:17</sup> : Lik Jeremia 31.34.

makl ngbaan injaal ilee ki taa joo beeni. Ba pu? Uwumbor u puu tipuur tii timi na ga sil tii timi waah puu tipuur ti na.<sup>24</sup> Cha titafal li bi tob pu man, aan ki fiin tob aasui, aan ki li gee tob, ki tun lituln li ḥjan na.<sup>25</sup> Cha ti li beenin kuuni tob chee ki ti dooni Uwumbor man, ki taa di cha, ke binib bibaa aah di cha pu na. Ni li pɔɔni tob aataakpab man. Ni kan ke bundaln Yesu Kristo ga gir ni na peen ni. Nima na, ni li moo pɔɔni tob aataakpab man.

<sup>26</sup>Tɔ, unii yaa gaa Uwumbor aabɔr ki nyi waah ban pu na, ki yaa ki yii ki tun titunwanbir kigaak pu kan, kitork kibaa aa ki bi ki ga cha Uwumbor di cha pinn u.<sup>27</sup> U ga kan ntafadaan mu kpa ijawaan na; ba pu? Uwumbor ga gee lijuul pam, ki di waadim ḥja mmii mu ton sakpen na ponn ni.<sup>28</sup> Unii ubaa yaa nan yii Moses aakaal kan, biseeraadam bilee, bee bitaa, yaa len ke ti gbii kan, le bi ku u, kaa san u kinimbaak.<sup>29</sup> Unii yaa lik Uwumbor Aajapɔɔn fam, ki yaa dak ke Yesu aasin mu ḥja u chain na ye fam, ki yaa sii Uwumbor Aafuur Nyaan mu san timi kinimbaak na kan, udaan ngbaan neer ntafadaan sakpen ki jer unii u bii Moses aakaal na aah kan pu na.<sup>30</sup> Ti nyi ke Uwumbor len ke uma le ga daa bitafal, uma le ga teen bi. U ki len ke u ga ji waanib tibɔr.<sup>31</sup> Aa yaa lir Uwumbor u ye limɔfadaan na aanjaal ni kan, ni kpa ijawaan sakpen a.

<sup>32</sup>Ni teer man n-yoonn mu jer na. Buyoonn ninimbil nan woln ḥjan na, ni nan jin falaa sakpen, ki nan kpa limɔr.<sup>33</sup> N-yoonn mbaa bi nan ḥja nimi bakaa, ki sii nimi binib aanimbil ni. N-yoonn mbaa mu, ni yakr binib bi jin falaa kina na aafalaa la,<sup>34</sup> ki san binib bi bi kiyondiik ni na kinimbaak. Binib aah gaa nimi aawan mpɔɔn pu na, le ni nan kpa

mpopiin; ba pu? ni nyi ke ni kpa tiwan paacham ni jer baah gaa ni na, ke tiwan ngbaan ga li bi n-yoonn mu kaa kpa ndoon na.<sup>35</sup> Ni taa di nimi aapobil lii man; ba pu? nima le ga cha ni kan tinyoor sakpen.<sup>36</sup> Ni ban ni li kpa limɔr, aan ki ḥja Uwumbor aageehn, aan ki kan waah puu tipuur ti na.<sup>37</sup> Uwumbor Aagbanj len ke,

“Naan yunn, u choo na ga fuu ni, kaan taan.

<sup>38</sup>Uwumbor aaninyaam bi gaa u ki kii na ga li kpa limɔfal.

Unii ubaa mu yaa gir puwɔb kan, waan piir Uwumbor aasui.”<sup>39</sup>

<sup>39</sup>Tima kan, taa ye binib bi gir puwɔb aan ki beer yɔli na. Ti ye binib bi tii Uwumbor naadii aan ki ḥjmar na la.

## Gaakii

**11** Ti yaa gaa Uwumbor ki kii kan, naatataa le ye ke ti bee ke ti ga sil kan tiwan ni ti kpa limakl ke ti ga kan ni na. Tinimbil aa kan ni, le ti nyi ke ni sil bi.<sup>2</sup> N-yaayoonn na aanib aah nan gaa Uwumbor ki kii na, nima le u len ke baabimbin ḥjan.

<sup>3</sup>Ti gaa Uwumbor ki kii, nima le cha ti bee ke u nan len ki naan kitij ni paacham. U nan di tiwan ni tinimbil aa ḥjmaa kani ni na naan tinimbil aah kani nimɔk na.

<sup>4</sup>Abel nan gaa Uwumbor ki kii, nima le cha u nan toor kitork ki ḥjan ki jer ukpel Keenn aah toor pu tii Uwumbor na. Waah gaa Uwumbor ki kii pu na, le Uwumbor len ke waabimbin ḥjan, le ki gaa waah toor kitork ki tii u na. U kpo, le waah gaa Uwumbor ki kii pu na pu, u beenin len.

<sup>5</sup>Enok nan gaa Uwumbor ki kii, nima le nan cha waa nan kpo. Uwumbor nan yoor u buen paacham la. Ubaa aa ki kan

<sup>##10:30</sup> : Lik Ikaal 32.35-36; Ilahn 135.14.

<sup>¶10:38</sup> : Lik Habakuk 2.3-4.

u; ba pu? Uwumbor nan yoor u buen paacham. Uwumbor Aagban len ke buyoonn waa nan kee yoor u buen paacham na, u nan piir Uwumbor aasui.<sup>6</sup> Unii yaa kaa gaa Uwumbor ki kii kan, waan ηmaa piir Uwumbor aasui. Unii u dan Uwumbor chee na, see u pak ke u bi, ki pak ke u ηjani binib bi ban u na tinyoor.

<sup>7</sup> Uwumbor nan bui Nowa linimaln li nan choo na pu, le laa kee fuu ni. Nowa aah nan tii Uwumbor naadii pu na, le u nan pak waah len pu na, le ki kii waamob, le ki kpii bujobj bu, u ni waamaal koo ki ηmar na. Nowa aah nan ηja kina na, le ni mok ke dulnyaa ni yaab biken aabor bii Uwumbor chee. Nowa nan tii Uwumbor naadii, nima le nan cha Uwumbor len ke waabor ηjan u chee.

<sup>8</sup> Uwumbor nan yin Abraham, ki bui u ke u buen kitij ki u puu tipuur ke u ga di tii u na. Abraham aah nan gaa Uwumbor ki kii pu na le u kii waamob, le ki ηyan waatij ni, ki buen, kaa nyi waah cha nin chee na.<sup>9</sup> U nan ti fuu kitij ki Uwumbor puu tipuur ke u ga di tii u na ni. Le u pak Uwumbor aah len pu na, nima le u nan kal nima, ki nan ye uwɔwɔnja. U ni waabo Aisak, ni uyaabil Jakob nan bi nima, ηiboo ponn ni. Bi mu nan yeh tipuur tichachaan ngbaan la.<sup>10</sup> U nan ban kitij ki ga li bi n-yoonn mu kaa kpa ndoon aan Uwumbor maa ki na la.

<sup>11</sup> Abraham aapuu Sara mu nan tii Uwumbor naadii, nima le nan cha u kan mpɔɔn ke u dek lipuul, buyoonn u jer timar na. Ba pu? u nan pak ke Uwumbor ga ηja waah puu tipuur ti na.<sup>12</sup> Nima pu na, ujabaan u nan bi ke waah kpo le na, nan ma binib bi wiir ke ijmabi aah wiir pu na. Bi wiir ke litambol li dɔnnyusakpem aagbaan na. Ubaa aa ηmaa kahn bi.

<sup>13</sup> Binib ngbaan mɔmɔk nan tii Uwumbor naadii le ki ti saa baakundaal, kaa

kan Uwumbor aah puu tipuur ti na. Bi nan bee ke n-yoonn mu choo na, u ga nan ηja waah puu tipuur ti na. Bi nan len ke bi ye bicham le dulnyaa wee ni.<sup>14</sup> Binib bi len kina na mɔk chain ke bi ban bite do la.<sup>15</sup> Binimbil yaa ba man kitij ki bi ηyan ni ki ponn ni na pu kan, bi ba ga li kpa nsan ke bi gir buen nima.<sup>16</sup> Bi nan ban kitij ki ηjan jer kitij ngbaan na la. Bi nan ban paacham aatiq la. Nima pu na, inimɔɔn aa nan joo Uwumbor ke bi yin u ke Baawumbor. U nan toor kitij tii bi.

<sup>17-18</sup> Uwumbor nan puu tipuur tii Abraham ke u ga kan yaabitiib waabo Aisak pu,<sup>88</sup> le Abraham nan gaa tipuur ngbaan. Le Uwumbor tɔŋ u, ki bui u ke u di waabo toor kitork tii u. Waanaadii pu le u nan kii, ki di waabo u nan ye libibaal na, u ti kɔr u ki toor kitork tii Uwumbor.<sup>19</sup> Ba pu? u nan pak ke Uwumbor ga ki ηmaa fikr u nkun ni. Ni ye mbamɔɔn, waah nan gaa Uwumbor ki kii pu na, le Uwumbor ηyan u nkun ngbaan ni. Ni naahn ke Abraham nan ki gaa u ηyan ni nkun ni la.

<sup>20</sup> Aisak nan gaa Uwumbor ki kii, nima le nan cha u nan bui waabim Jakob ni Eso ke Uwumbor ga ηja tinyoor ηja bi pu n-yoonn mu choo na.

<sup>21</sup> Jakob nan gaa Uwumbor ki kii, nima le nan cha u ηja Uwumbor aanyoor ηja waabo Josef aabim bilee pu buyoonn u nan ban u kpo na, le ki nyii waajaang-beedabil pu, ki doon Uwumbor.

<sup>22</sup> Josef nan gaa Uwumbor ki kii, nima le waah nan ban u kpo na, u len ke Israel yaab ga nya Ijipt aatiq ponn ni, ki tuk bi ke bi yaa nan ηyan kan, bi yoor waawon di buen.

<sup>23</sup> Moses aate ni una aah nan gaa Uwumbor ki kii pu na, le bi nan di u bɔr ijmal itaa. Bi nan kan ke u ye ubo u ηjan sakpen na, kina pu na, baa nan san Ubɔr

Faro aah nan siin ke bi ku bima Israel yaab aabijabim pu na aakaal.

<sup>24</sup>Moses nan gaa Uwumbor ki kii, nima le waah nan chikr na, waa nan kii ke bi yin u ke Ubør Faro aabisal aabo.

<sup>25</sup>U nan kii ke u ni Uwumbor aanib kpaan ji falaa, ke ni soor ni u ji titunwanbir aamcoen mu kaa yunn na. <sup>26</sup>U nan bee ke u yaa kan njsiibil Kristo\* pu kan, u ga nan kan tinyoor ti jer Ijipt aatiq aawankpal mɔmɔk na. Ba pu? utafal nan bi tinyoor ti Uwumbor ga tii u na ni la.

<sup>27</sup>Waah nan gaa Uwumbor ki kii pu na le u nan nyan Ijipt aatiq ni, kaa san ubør na aah gee lijuul pu na. Ni naahn ke u waa Uwumbor u unibon aanimbil aan njmaa kan u na la. Nima le u nan kpa limor le ki sil mbamɔm. <sup>28</sup>Waah nan gaa Uwumbor ki kii pu na le u nan bui Israael yaab ke bi kɔr ipihbi, ki di nsin gbaa gbaa ibisamji, aan Uwumbor aatuun u ga ku mbipolb na taa nan ja bi nibaa.

<sup>29</sup>Israel yaab aah nan ban ke bi puur Limɔɔkal Aanyusakpem,<sup>†</sup> baah nan gaa Uwumbor ki kii pu na, le nnyun nan yakr ki cha nsan tii bi, le bi puur. Ijipt aatiq aanib aah nan ban bi mu puur na, bi nan bee nnyun ni la.

<sup>30</sup>Israel yaab nan gaa Uwumbor ki kii, nima le baah nan chuun manni Jeriko aatiq aagon iwiin ilole na, ji nan lir. <sup>31</sup>Rahab, u nan ye upiidagoor na, nan gaa Uwumbor ki kii, ki chann bipepekb tichann. Waah nan gaa Uwumbor ki kii pu na, le baa nan ku u buyoonn bi kuln waatij aanib bi kaa kii Uwumbor aamɔb na.

<sup>32</sup>Tɔ, m ga ki len ke ba? Maa kpa n-yoonn ke m len Gideonn, ni Barak, ni Samson, ni Jefta, ni David, ni Samuel, ni Uwumbor aabɔnabiib aabɔr. <sup>33</sup>Baah

nan gaa Uwumbor ki kii pu na, le bibaa nan nyaŋ njtimbol aajab, bibaa mu tun lituln li ḥjan na, bibaa mu kan Uwumbor aah puu tipuur ti na, bibaa mu muib ichinn aamɔi, i taa ḥja bi nibaa.<sup>‡</sup> <sup>34</sup>Bibaa mu aah nan gaa Uwumbor ki kii pu na, mmii sakpiin aa nan njmaa ḥja bi nibaa. Bibaa mu aah nan gaa Uwumbor ki kii pu na, le bi nan nyan kijuk aakun ni. Bibaa mu nan ye bidaburb, le baah gaa Uwumbor ki kii pu na, bi nan kan mpɔɔn. Bibaa mu aah nan gaa Uwumbor ki kii pu na, le bi kan mpɔɔn bi ti to butɔb ki nyaŋ baadim. <sup>35</sup>Bipiib bibaa aah nan gaa Uwumbor ki kii pu na, le biyaab bi kpo na nan fikr nkun ni.

Bibaa mu aah nan gaa Uwumbor ki kii pu na, le binib gbaa ku bi. Baa yii Uwumbor ke bi nyan bibaa nkun ni. Bi nan pak ke bi ga kan limɔfal li ḥjan ki jer dulnyaa wee aamɔfal na paacham. <sup>36</sup>Bibaa mu aah nan gaa Uwumbor ki kii pu na, le binib nan ḥja bi mbɔnyun, ki lue bi njinaalab, ki buu bi tikululn, ki laj bi kiyondiik ni. <sup>37</sup>Bibaa mu aah nan gaa Uwumbor ki kii pu na, le binib mae bi njitakpal ku bi. Bibaa mu aah nan gaa Uwumbor ki kii pu na, le bi chuu gii por bi ki ku bi. Bibaa mu aah nan gaa Uwumbor ki kii pu na, le bi nan [tɔŋ bi, ki] di kijaak aajuk ku bi. Bibaa mu aah nan gaa Uwumbor ki kii pu na, le bi nan ye bigiim, ki chuun pee ipihi, ni injoo aagban, ki jin falaa. Binib mu ḥja bi bakaa. <sup>38</sup>Bi nan ye biwɔwɔm, ki nan bi kipɔɔk ni, ni njijoo paab, ki koo titakpalunn ni, ni ibuu i bi kitin ni na. Bi mu nan ye bininyaam ki jer dulnyaa wee aanib.

<sup>39</sup>Binib ngbaan mɔmɔk nan gaa Uwumbor ki kii, nima le nan cha u len ke baabɔr ḥjan. Bi mu aa kan tiwan ni u

\*11:26 : Hiibru aaliin ni, bi yin Kristo ke Masiya. Naatataa le ye ke Uwumbor nyan u ke gaa waanib lii.

†11:29 : Limɔɔkaal Aanyusakpem—bi ki yin mu ke Nnyusakpem Mamam la.

‡11:33 : Lik Daniel 6.1-27.

nan puu tipuur ke u ga tii bi na,<sup>40</sup> Ba pu? u nan ban ke u ḥa ti mu tijann sakpen la. U nan ban ke u di timi, ni bi mu, kpaan ḥa binib bi ḥan ti doo na la.

### Tite Uwumbor

**12** Tɔ, n-yaayoonn na aaniib bi nan gaa Uwumbor ki kii na wiir pam, ki gonn timi, ki lik taah dii Uwumbor aasan pu na. Nima pu na, cha ti di tiwan nimok lej timi na lii, ki di cha titunwanbir ti dii timi na, ki li kpa limor, ki li dii Uwumbor aasan.<sup>2</sup> Cha ti li lik Yesu chee man. Waapcon pu le ti nan piin ki gaa u ki kii. Waapcon mu pu, le ti ga tii u naadii, ki ti saa ndoon. Mpopiin mu u ga nan kan mu na pu, le u jin falaa ni inimcoon ndɔpuinkoo pu, ki lik inimcoon ngbaan fam. Dandana wee le u ka Uwumbor aaborjal aajangii wɔb.

<sup>3</sup> Titunwanbirdam nan nan u, ki yii u. Le u nan kpa limor. Ni teer kina man, aan ki taa cha nitaakpab yɔl aan ni di waasan di lii.<sup>4</sup> Ni yii titunwanbir, le ki pɔɔni nibaa ke ni taa lir; ni mu aa kee kpo nsanyaan ngbaan pu.<sup>5</sup> Ni suls Uwumbor aah sur nimi pu na aa? U yin nimi waabim ki bui ke,

“Maabo, Uwumbor yaa sak si kan, ḥun mbamɔm.

U yaa cha falaa pii si ke u chiin si kan, taa cha aataakpab yɔl.

<sup>6</sup> Ba pu? Uwumbor sak binib bimok u gee bi na,

ki dar binib bi u ḥa bi waabim na mɔmɔk aatafal.”

<sup>7</sup> Tɔ, naah ji falaa pu na, Uwumbor mɔk nimi nlan le na. U ḥa nimi ke binib aah ḥani baabim pu na la. Ubo ubaa aa bi, kaa kan ntafadaan ute chee.<sup>8</sup> Uwumbor yaa kaa daa nitafal, ke waah dar waabim mɔmɔk aatafal pu na kan, naa ye waabim, ni ye mbɔmbim le u chee.

<sup>9</sup> Titetiib bi ma timi na nan dar titafal

la, le ti pak bi. Nima le ni ḥan ke ti kii Tite Uwumbor u bi paacham na aamɔb ki jer kina, aan ki kan limofal.<sup>10</sup> Taah nan ye mbim buyoonn na, titetiib nan dar titafal, baah gee pu na. Uwumbor ma kan, u dar titafal ke u ḥa timi tinyoor, aan ti yakr waabimbin mu bi chain na la.<sup>11</sup> Buyoonn ti kan ntafadaan na, ni wu la, naa ye mpopiin aawan. Binib mu yaa kan ntafadaan kan, nee aapuwɔb le bi kani nsuudoon ni mbimbinyaan.

### Mmɔkm ni nsurm kpaam

<sup>12</sup> Nima pu na, ni li yoor ijaal i bak na man, ki li pɔɔni nitaakpab,<sup>13</sup> ki li beenin dii nsan mu tok na, aan binib bi joo beeni na taa yenn; bi mu li dii mbamɔm.

<sup>14</sup> Ni mɔmɔk pɔɔ nibaa ki li kpa kimɔbaan man, ki li bi chain. Unii umɔk kaa ye chain na aan kan Tidindaan.

<sup>15</sup> Ni li nyi man, ubaa taa lann Uwumbor aanyoor. Ni li nyi man, ubaa taa cha usui li to, ki li muk nimi ki cha binib pam yenn.<sup>16</sup> Ni li nyi man, ubaa mu taa gor kidagook. Ubaa mu taa lik Uwumbor fam ke Esɔ aah nan ḥa pu na. Tijikaar pu, le u nan di ubopol afaal kooh.<sup>17</sup> Nee aapuwɔb na, u nan ki ban lifaal li ye Uwumbor aanyoor ngbaan na, kaa kan. Waa nan ḥymaa kpeln waah nan ḥa pu na. U nan wii ki gaŋni ute ke u ḥa Uwumbor aanyoor ḥa u pu. Le ute yii.

<sup>18</sup> Tɔ, naa fuu ni dulnyaa wee ni aajool chee. Israel yaab nan fuu ni Sainai aajool chee, ki kan lijool ngbaan gaal mmii ki kpa ijmanyuu i bɔɔn ki bɔln nima chee na. Bi nan ḥun kibunj ki daar na,<sup>19</sup> ki ḥun kakaan wii mpopon pu, ki ḥun nneel mu len mpopon pu. Baah ḥun nneel ngbaan pu na, le bi gaŋ Uwumbor ke u taa ki len bi chee tibɔr.<sup>20</sup> U nan bui bi ke ki-wakork kibaa yaa po meeh lijool ngbaan kan, bi mae ki ḥitakpal ki ti kpo. Nima le ijawaan nan joo bi sakpen.<sup>21</sup> Baah kan

tiwan ni na nan kpa ijawaan pam. Moses mu nan len ke ijawaan joo u sakpen, le uwon gbaa.<sup>§</sup>

<sup>22</sup>Naa fuu ni lijool ngbaan chee. Ni fuu ni Sionn ajool chee la. Nima chee le Uwumbor u ye limofadaan na aatiŋ bi. Kitij ngbaan ye Jerusalem la, ki bi paacham. Uwumbor aatuuntiib churbaka bi ki ponn ni. <sup>23</sup>Ni fuu ni Uwumbor aabipolb bi aayimbil njmee paacham na aakuun chee la. Ni fuu ni Uwumbor u ye binib mɔmɔk aabojir na chee. Ni fuu ni bininyaam aawiin mu Uwumbor ja mu, mu ḥjan ti doo na chee. <sup>24</sup>Ni fuu ni Yesu chee la. U pu, le Uwumbor puu tipuupɔln tii timi. Uma Yesu aasin mu yaa ti pu na le ja timi chain. Mu pu, le Uwumbor di cha pinn timi. Waasin ngbaan len tibor ti ḥjan jer Abel aasin aah nan len pu na.\*\*

<sup>25</sup>Ni li nyi man, ki taa yii Uwumbor u len ni chee na. Buyoonn u nan sur Israael yaab dulnyaa wee ni na, le bi yii, le u daa bitafal. Ti yaa yii Yesu u nyan ni paacham ki nan sur timi na kan, u ga sil daa titafal. <sup>26</sup>N-yaayoonn na waaneel nan cha kitij deej. Dandana wee u puu tipuur ke u ga ki cha kitij ni paacham mɔk deej.<sup>††</sup> <sup>27</sup>Waah len kina na, ni mɔk timi ke u ga deej waah nan naan tiwan nimɔk na, ki nyan ni, ki cha tiwan ni kaan deej na. <sup>28</sup>Ti ga ji nnaan mu ga li bi n-yoonn mu kaa kpa ndoon na. Nima pu na, cha ti doon Uwumbor, ki tun lit-uln li ga piir usui na tii u, ki li pak u, ki li san u ijawaan. <sup>29</sup>Ba pu? timi Aawumbor bi ke mmigaal mu ji tiwan ni kaa ḥjan na mɔmɔk na la.<sup>‡‡</sup>

**Naah ga ḥja pu ki piir  
Uwumbor aasui na**

**13** Tɔ, ni li beenin gee tab man ke naabitiib na. <sup>2</sup>Ni li teer ki chann bicham tichann. Binib bibaa nan chann Uwumbor aatuuntiib tichann, kaa nyi ke Uwumbor aatuuntiib ye. <sup>3</sup>Ni teer man binib bi bi kiyondiik ni na, ke nimi le aah bi ki ni na, ki teer man binib bi ji falaa na. Ba pu? ni mu bi tiwon tee ni la.

<sup>4</sup>Tɔ, chatiib ni puutiib, ni li nyi ke Uwumbor le di nimi kpaan, ki li pak kina, ki taa gor kidagook man. Binib bi chuun bɔɔni na, ni binib bi chuun gor kidagook na, Uwumbor ga ji bi tibor.

<sup>5</sup>Ni taa cha ninimbil li man njimobil pu. Cha ninimbil gbiin naah kpa ni na pu. Ba pu? Uwumbor ubaa le bui ke waan di cha si. Waan di si lii.<sup>¶¶</sup> <sup>6</sup>Nima pu le ti ga li kpa lipobil ki bui ke, “Uwumbor ye maateter la. Maan san ijawaan.

Ubaa aan ḥjmaa ḥja mi nibaa.” <sup>§§</sup>

<sup>7</sup>Ni teer man nimi aayidam bi tuk nimi Uwumbor aabor na, ki li teer baamfjal aah doo pu na, ki li beenin dii Yesu aasan ke baah nan dii pu na. <sup>8</sup>Yesu Kristo aa kpelni. Waah fe bi fen na pu na, u beenin bi kina le din, ki joo cha n-yoonn mu kaa kpa ndoon na. <sup>9</sup>Ni taa dii mmɔkm yayan aabɔj aabɔj ki yenn. Ni ḥjan ke nisui doon Uwumbor aaterm pu, naa ye tijikaar pu. Binib bi kɔ tijikaar tibaa ki ji tiken na, naa ḥja bi tinyoor.

<sup>10</sup>Timi aatork aabimbil le ye Yesu aadɔpuinkoo. Juu yaab aatotoorb aan ḥjmaa ji timi aatork. <sup>11</sup>Bi yaa toor kitork kan, le baatotoorninkpel di nsin koo ni

<sup>§12:21</sup> : Lik Ikaal 9.19.

<sup>\*\*12:24</sup> : Lik Mpiin 4.10.

<sup>††12:26</sup> : Lik Hagai 2.6.

<sup>‡‡12:29</sup> : Lik Ikaal 4.24.

<sup>¶¶13:5</sup> : Lik Ikaal 31.6.

<sup>§§13:6</sup> : Lik Ilahn 118.6-7.

chain aapepel ponn ni, titunwanbir pu. Le bi nyan tinann ngbaan kitij ponn ni ki di buen n-gbaan, bi ti di see mmii. <sup>12</sup>Nima pu le Yesu mu nan kpo kitij aagbaan, ke waasin finn tisui, ki ḥa timi chain. <sup>13</sup>Nima pu na, ti li cha u chee n-gbaan nima, ki dii waasan, ki yakr u chee waanimoɔn. <sup>14</sup>Tido u bi dulnyaa wee ni na aan li bi n-yoonn mu kaa kpa ndoon na. Ti ban tido u bi dulnyaa u choo na ni la. <sup>15</sup>Yesu pu, cha ti pak Uwumbor n-yoonn mɔmɔk, ki li dooni u waabulchinn pu. Nima le ye kitork ki tii u. <sup>16</sup>Ni teer man aan ki li tun lituln li ḥjan na, ki yakr naah kpa ni na tii tɔb man. Nima le ye kitork ki ga piir Uwumbor aasui mbamɔm na.

<sup>17</sup>Ni li keei nimi aayidam aamɔi man, ki taa kpak bi. Bitafal bi ni ponn ni, ke ni dii Uwumbor aasan mbamɔm. Bi nyi ke see bi mɔk Uwumbor baah nan joo nimi pu na. Ni yaa keei baamɔi kan, bi ga li kpa mpopiin, le ki joo nimi. Ni yaa kaa keei baamɔi kan, bi ga li kpa mpom-biin, le ki joo nimi. Nima le aan ḥa nimi tinyoor.

<sup>18</sup>Ni li beenin mee Uwumbor ki tii timi. Ti nyi ke timi aalandak aa galn timi tiwan nibaa pu. Ti ban ke ti li bi

mbamɔm n-yoonn mɔmɔk la. <sup>19</sup>M gan nimi ke ni li moo mee Uwumbor ki tii mi, ke u ter mi, aan m gir ni ni chee mala.

### Kookoo aameel

<sup>20</sup>Uwumbor nan fikr Tidindaan Yesu u ye waanib mɔmɔk aayidaan na nkun ni. Waasin pu, le Uwumbor puu tipuupɔln tii timi. Tipuur ngbaan ga li bi n-yoonn mu kaa kpa ndoon na. <sup>21</sup>Uwumbor, u tii timi nsuudoon na, toor nimi aabim-bin mbamɔm, aan ni li ḥjani waah gee pu na. Cha u ḥa nimi binib bi ga piir usui na Yesu Kristo pu. Uma le yeh mpakm n-yoonn mu kaa kpa ndoon na. Amii.

### Kookoo aabɔr

<sup>22</sup>Nnaabitiib, m gaŋ nimi, ni li ji limɔr ki pel maah sur nimi kigbaj kee ponn ni pu na. Maah ḥj mee pu na, ni ye siib la. <sup>23</sup>M ban ke ni bee ke bi nan di tina aabo Timoti di lii. U yaa fuu ni mala kan, m ni uma ga kan nimi.

<sup>24</sup>Ni doon nimi aayidam mɔmɔk, ni Uwumbor aanib biken mɔmɔk tii timi. Binib bi ye Itali aatiŋ aanib na dooni nimi.

<sup>25</sup>Uwumbor ḥa tinyoor ḥa ni mɔmɔk pu. Amii.

*Kigbaŋ ki*

**JEMS**

*ŋmee ki na*

**1** Min Jems, u ye Uwumbor ni Tidin-daan Yesu Kristo aatutunn na, mdooni Uwumbor aanib bi yaa ki bi iting-baan mɔmɔk ni na.

### Gaakii ni nlan

<sup>2</sup>Nnaabitiib, ni yaa kan ntɔŋ mɔmɔk aabɔŋ kan, ni cha ni mɔmɔk li ye mpopiin ni chee. <sup>3</sup>Ba pu? ni bee ke ni yaa kan ntɔŋ, kaa koo mu ni kan, nima le tii nimi limɔr. <sup>4</sup>Ni mu li nyi man ki li kpa limɔr ki ti saa naadoon, ki taa di cha, aan ki li ye binib bi ɔjan doo na, ki taa li kpa taani ubaa, ki taa lir. <sup>5</sup>Ni ponn ni ubaa yaa lann nlan kan, cha u mee Uwumbor, le u ga tii u; ba pu? Uwumbor tii binib mɔmɔk sakpen, kaa jinni ubaa inimɔɔn. <sup>6</sup>U mu yaa mee Uwumbor kan, u li pak ke u ga kan, ki taa joo beeni; ba pu? unii u joo beeni na naahn ke libuln aah daar kan, nnyusakpem aanyunkpuŋ feei pu na. <sup>7</sup>Udaan taa dak ke u ga kan nibaa Uwumbor chee. <sup>8</sup>Ulandak aa si tiwanbaan pu, u saa labr, ki nya do, ki ti saa do la.

### Igiin ni liwangol

<sup>9</sup>Tɔ, Uwumbor aah nyuŋ tinaabitiib bi ye bigiim na, bi li kpa mpopiin. <sup>10</sup>Waah sunn tinaabitiib bi ye biwankpadam na taab na, bi mu li kpa mpopiin; ba pu? bi ga jer ke mmopuun aah gbaar mala pu na. <sup>11</sup>Nwiin yaa puu ki toŋ kan, le timoor ga yɔl, le mmopuun gbaar, kaa ki kpa kinyaan. Kina le biwankpadam mu ga kpo, ki cha baawan mɔmɔk.\*

### Ntɔŋ aabɔr

<sup>12</sup>Tɔ, unii u kan ntɔŋ ki kpa limɔr na, Uwumbor aanyoor bi u pu. Ba pu? u yaa kan ntɔŋ ki si mbamɔɔn kan, u ga kan ipiin i ye limɔfal li Uwumbor nan puu tipuur ke u ga tii binib bi gee u na. <sup>13</sup>Unii yaa kan ntɔŋ kan, u taa len ke Uwumbor le tɔŋ u; ba pu? Uwumbor aa gee titunwanbir, ki mu aa tɔŋni unii ubaa. <sup>14</sup>Unii aakpeek yaa cha u ban ke u nya Uwumbor aasan ponn ni ki tun usui aah gee pu na kan, nima le cha u kani ntɔŋ. <sup>15</sup>Kikpeek yaa dek lipuul kan, ki maa titunwanbir la; titunwanbir yaa chikr kan, ti maa nkun la.

<sup>16</sup>Nnaabitiib bi m gee bi na, ni taa ɔjmann nibaa. <sup>17</sup>Ipiin imɔk ɔjan ki ye mbamɔɔn na nyan ni paacham la. I nyan ni Tite Uwumbor u nan naan iwiihn imɔk bi paacham na chee la. Uma le aa kpelni ke nwiin ni ɔjmal aah kpelni pu na, kaa kpa mbɔmbɔɔn. <sup>18</sup>U tii timi waabɔr ti ye mbamɔɔn na, ki ɔja timi waabim. Waageehn le na. U ban ke ti jer waah naan tiwan ni mɔmɔk na.

### Pel ki ɔja

<sup>19</sup>Nnaabitiib bi m gee bi na, ni bee nimina la. Ni ɔjan ke unii mɔmɔk li gee ke u pel, ki taa len mala, ki taa gee lijuul mala; <sup>20</sup>ba pu? binib aajuuul aa tun Uwumbor aatunyaan. <sup>21</sup>Nima pu na, ni di cha titunwanbir ni tiwan nimɔk kaa ɔjan na, ki li bi suuna, ki gaa tibɔr ti Uwumbor di ɔja nisui ni na; tibɔr ngbaan ga gaa nimi lii.

<sup>22</sup>Ni li ɔjani waamɔboln aah len pu na. Ni yaa pel, ki yaa kaa ɔjani kan, ni ɔjmanni nibaa la. <sup>23</sup>Unii yaa pel tibɔr ngbaan ki yaa kaa ɔjani taah len pu na kan, u bi le ke unii u lik kinimbilikr ni, ki waa unimbil wɔb aah bi pu na. <sup>24</sup>Ba pu? u kan unimbil wɔb aah bi pu na, le ki

\*1:11 : Lik Aisaya 40.6-7.

siir. Libuul ngbaan ni le u suln waah bi pu na.<sup>25</sup> Tɔ, unii yaa dakl lik nkaal mu ye mbamɔm ki gaal timi lir na, ki yaa beenin dii mu, ki yaa kaa ye unii u pel ki sulni na kan, ki ye unii u ɔjani mu aah len pu na kan, Uwumbɔr ga ɔja tinyoor ɔja udaan ngbaan aatuln pu.

<sup>26</sup> Unii yaa len ke u dii Uwumbɔr aasan, u yaa kaa chuu ulambil kan, u ɔjmanni ubaa la. Waa dii le na. Ni ye fam la.<sup>27</sup> Unii yaa ter nkobim ni bikpopiib baabɔr ni, ki yaa joo ubaa chain, ki di cha titunwanbir mɔmɔk kan, uma le dii Tite Uwumbɔr mbamɔm, ki bi chain Uwumbɔr aanimbil ni.

### Taa pak ubaa ki jer uken

**2** Nnaabitiiib, ni tii Tidindaan Yesu Kristo u yeh mpakm na naadii la. Naah tii u naadii pu na, ni taa pak ubaa ki jer uken.<sup>2</sup> Unii u ɔjmaa salmaa aabɔmbik ki pee tiwanyaan na yaa koo naah dooni Uwumbɔr kidiik ki ponn ni na, aan ugiin u pee tiwanchar na mu yaa koo ni kan,<sup>3</sup> ni yaa pak unii u pee tiwanyaan na, ki bui u ke, “Kal do lijal li ɔjan na pu,” ki bui ugiin ngbaan ke, “Sil nima,” bee aa bui u ke, “Kal kitij ntaa chee,” kan,<sup>4</sup> nima le mɔk ke ni kpa imaagann, ki dak ilandak i kaa ɔjan na ki ɔjanji binib la.

<sup>5</sup> Nnaabitiiib bi m gee bi na, ni li pel man. Uwumbɔr nyan binib bi ye bigiim dulnyaa wee ni na ke bi gaa u ki kii ki li ye biwankpadam u chee, ki ji nnaan mu Uwumbɔr nan puu tipuur ke u ga tii binib bi gee u na.<sup>6</sup> Nimi le lik bigiim fam. Bilabi muk nimi ki joo nimi tii bibɔjirb? Naa ye biwankpadam aa?<sup>7</sup> Bima le seei Kristo u tii nimi waayimbinyaan na.

<sup>8</sup> Uwumbɔr aanaan aakaal mu bi waagbaŋ ni na le ye ke, “Aa li gee aana

aabo ke saah gee aabaa pu na.” Ni yaa sil ɔjani kina kan, nima le ɔjan.<sup>9</sup> Ni mu yaa pak ubaa ki jer uken kan, ni tun titunwanbir la. Uwumbɔr aakaal galn nimi ke ni bii mu la.<sup>10</sup> Unii yaa bii nkaal mubaa baanja kan, u bii ikaal mɔmɔk le na.<sup>11</sup> Uwumbɔr u len ke “Taa gɔr kidagook” na, uma le len ke, “Taa ku unii.” Aa yaa kaa gɔr kidagook, ki yaa ku unii kan, aa bii ikaal mɔmɔk le na.<sup>12</sup> Ni li nyi naah len pu na, ni naah tun lituln pu na; ba pu? Uwumbɔr ga ji nimi tibɔr, nkaal mu gaal binib lir na aah dii pu na.<sup>13</sup> Unii u kaa san binib kinimbaak na, Uwumbɔr ga ji u tibɔr, kaan san u mu kinimbaak. Unii u san biken kinimbaak na, Uwumbɔr ga san u mu kinimbaak.

### Li tun saagaakii aah mɔk pu na

<sup>14</sup> Nnaabitiiib, unii yaa len ke u gaa Yesu ki kii, u yaa kaa tun litunyaan kan, ni kpa tinyoor aa? U yaa gaa Yesu ki kii kina kan, nima le ga cha u ɔjmar aa?<sup>15</sup> Tina aabo ubaa yaa kaa kpa tiwanpeenkaan, kaa kpa tijikaar kan,<sup>16</sup> ni ponn ni ubaa yaa bui u ke, “Uwumbɔr ter si, ki tii si tiwanpeenkaan, ki kpiin si,” kaa tii u waah lann pu na kan, ni kpa tinyoor aa?<sup>17</sup> Aa yaa len ke aa gaa Yesu ki kii ki yaa kaa tun litunyaan kan, ni ye yɔli le na.

<sup>18</sup> Unii yaa len ke, “Ubbaa gaa Yesu ki kii la, ubaa mu tun litunyaan la,” m mu ga bui u, “Aa yaa kaa tun lituln nyaan kan, saan ɔjmaa len ke aa gaa Yesu ki kii. Maatunyaan mu le ga mɔk si ke m gaa Yesu ki kii.”<sup>19</sup> Aa pak ke Uwumbɔr baan le bi. Nima le ɔjan. Kinimbɔŋ mu pak kina, le ki san ijawaan pam.<sup>20</sup> Si ujɔr, cha m tuk si, aa yaa len ke aa gaa Uwumbɔr ki kii, kaa tun litunyaan kan, ni ye yɔli la.<sup>21</sup> Tiyaaja Abraham nan tun litunyaan. Nima le nan mɔk ke waabɔr

<sup>†2:8</sup> : Lik Liifai Yaab 19.18.

<sup>‡2:11</sup> : Lik Nnyam 20.13-14; Ikaal 5.17-18.

ŋjan Uwumbor chee; ba pu? u nan di ujapcoen Aisak ki di paan kitork aabim-bilin paab, u di toor kitork tii Uwumbor. <sup>22</sup>Ni kan ke waah gaa Uwumbor ki kii pu na, le u tun litunyaan. Waatunyaan ngbaan mok ke u gaa Uwumbor ki kii mbamɔm. <sup>23</sup>Le ni gbiin Uwumbor Aag-baj aah len pu na ke, "Abraham nan gaa Uwumbor aamɔboln ki kii, kina pu na le Uwumbor gaa u ke u ye uninyaan u chee." <sup>24</sup>Le Uwumbor yin u ke ujo. <sup>24</sup>Ni kan ke Uwumbor ga len ke unii aabɔr ŋjan litunyaan pu, naa ye naadii baanja pu.

<sup>25</sup>Kina le Rahab u nan ye upiidagoor na nan chann Josua aatutum tichann, ki tuk bi ke bi dii nsan yayan aan baadim taa kan bi. Nima pu le waabɔr nan ŋjan Uwumbor chee.

<sup>26</sup>Tiwon ti kaa kpa nwiin na, ti kpo le na, kina le naadii u kaa kpa litunyaan na mu kpo.

### Lilambil aabɔr

**3** Nnaabitiib, bimɔmɔkb taa li wiir; ba pu? ni nyi ke timi bi ye bimɔmɔkb na, Uwumbor ga ji timi tibɔr ki jer biken. <sup>2</sup>Ba pu? ti mɔmɔk yenni sakpen. Unii yaa kaa yenni waabɔlen ponn ni kan, uma le ye unibamɔnn, ki ga ŋmaa chuu tiwon mɔmɔk ti taa ŋja bakaa. <sup>3</sup>Ti joo itangar ŋjani itaan aamɔi ni, ke i kii tii timi. Le ti ga ŋmaa cha i dii taah ban pu na. <sup>4</sup>Lik iŋɔsakpiin aah bi pu na. I ye isakpiin la. Le libuln li pɔɔ na daar i joo cha laah cha ni wɔb na. Bi mu ki joo tiiŋɔpann waatiir ŋjaal i, ki cha i dii buŋɔŋɔaab aah ban ni wɔb na. <sup>5</sup>Kina le lilambil mu ye tiwan waatiir tiwon ponn ni, ki puk tipupuk sakpen.

Lik, mmii waatiir aah ga ŋmaa wu ki-choosakpeŋ pu na. <sup>6</sup>Le lilambil ye mmii ki ye tiwan ni kaa ŋjan na timi aawon ni,

ki ga ŋmaa bii tiwon mɔmɔk, ki wu binib aabimbin. Lilambil aamii nyan ni kinimbɔŋ chee la. <sup>7</sup>Binib ga ŋmaa tij ipeel aabɔŋ mɔmɔk, ni inyoon aabɔŋ mɔmɔk, ni tiwan ni baar na aabɔŋ mɔmɔk, ni ijan aabɔŋ mɔmɔk. Bi ga ŋmaa tij ni mɔmɔk aabɔŋ. <sup>8</sup>Ubaa mu aan ŋmaa tij lilambil. Li ye tiwan ni kaa ŋjan, kaa fuur na, le ki gbii liliul. <sup>9</sup>Ti joo lilambil pak Tite Uwumbor, le ki ki joo li seei binib bi Uwumbor naan bi aan bi naahn u na. <sup>10</sup>Bumɔb buchachaan ngbaan le pak Uwumbor, le ki ki len tibɔbir. Nnaabitiib, naa ŋjan ke ni li ŋjani kina. <sup>11</sup>Nnyun mu mɔ na, ni mu kaa mɔ na, ga ŋmaa nya nnyunbun baan ni ii? <sup>12</sup>Likakaln ga ŋmaa lu tikpasɔnn aa? Lichachar ga ŋmaa lu ŋjikakanbil aa? Kina le nnyun mu diin na ni mu mɔ na mɔmɔk aa ŋmaa li bi nnyunbubaan ni.

### Nlan mu nyan ni paacham na

<sup>13</sup>Tɔ, unii ubaa bi ni ponn ni ki kpa nlan ni ŋjuntii ii? Ni ŋjan ke waabim-binyaan le mɔk ke u kpa. U li bi suuna, ki li kpa nlan, ki tun litunyaan. <sup>14</sup>Tɔ, lipiipoln ni kinikpakpak yaa bi nisui ni kan, ni taa li kpa kipupuk ke ni kpa nlan, ki taa mɔn nnyamɔn ki paan mbamɔn pu. <sup>15</sup>Nlan mumina aaboln aa nyan ni Uwumbor chee. Mu ye dulnyaa wee ni aalan la. Naa ye Uwumbor Aafuur Nyaan aalan. Mu ye kinimbɔŋ aalan la. <sup>16</sup>Ba pu? lipiipoln ni kinikpakpak aah bi nin chee na, tijar ni lituln li kaa ŋjan na mɔmɔk bi nima chee la. <sup>17</sup>Le unii u kpa nlan mu nyan ni Uwumbor chee na, u bi chain, ki kpa nsuudoon, ni mbimbisu-na, ki ŋjun tii binib, ki kpa linimbaasaln sakpen, ki tun litunyaan sakpen, kaa kpa imaagann, ki ye mbamɔndaan. <sup>18</sup>Binib bi par kijaak na le joo ni nsuudoon, ki ga kan tinyoor ti ye mbimbinyaan na.

## Dulnyaa aajøtiik

**4** Tɔ, butɔb ni kijaak ki bi nikaasisik ni na, ni nyan ni la chee? Naa ye nimi aakpeek le jaa kijaak nisui ni ii? <sup>2</sup>Ninimbil man tiwan pu la, le naa kpa. Nima le ni ku binib. Tiwan aakpeek bi nisui ni la, le naa ɻmaa kan ni, nima le ni jaa kijaak, le ki to butɔb. Naah kaa mee Uwumbɔr ke u tii nimi na, nima le naa kpa. <sup>3</sup>Ni mee Uwumbɔr ke u tii nimi tiwan ni kaa ɻan u chee na, nima pu le naa kan. Ni mee u ki ban tiwan ni ga ku nimi aakpeek na la. <sup>4</sup>Ni di Uwumbɔr lii a, ke upiidagoor aah di uchal di lii pu na. Naa nyi ke dulnyaa aajøtiik le ye Uwumbɔr aadij aa? Nima pu na, unii u ban dulnyaa aajøtiik na, u ye Uwumbɔr aadin la. <sup>5</sup>Uwumbɔr Aagbaŋ len ke, “Unii yaa joo waawiin dooni tiwan ki cha Uwumbɔr kan, Uwumbɔr kpa lipiipoln sakpen a.” Ni dak ke ni len kina fam la aa? <sup>6</sup>Tɔ, Uwumbɔr tii timi nterm ki jer kina, le waagbaŋ len ke, “Uwumbɔr yiil kalmabaanidam, le ki lik faar binib bi sunni bibaa taab na.”<sup>8</sup>

<sup>7</sup>Nima pu na, ni kii Uwumbɔr aamɔb man. Ni yiil kinimbiŋ man, le ki ga san nya ni chee. <sup>8</sup>Ni foor malni Uwumbɔr man, le u mu ga foor mal nimi. Nimi titunwanbirdam, di nimi aatunwanbir lii man. Nimi bi ban ni dii dulnyaa aasan, ni Uwumbɔr aasan mu na, toor nisui man. <sup>9</sup>Ni li kpa mpombiin nimi aatunwanbir pu, ki li wii. Cha nimi aalaar kpalm iwiil. Cha nimi aapopiin kpalm mpombiin. <sup>10</sup>Ni sunn nibaa taab man Tidindaan aanimbiin ni, le u ga nyuj nimi.

## Ni taa galni tɔb man

<sup>11</sup>Nnaabitiiib, ni taa bii tɔb. Unii yaa bii una aabo ki yaa galn u kan, u bii Uwumbɔr aakaal ki galn mu la. Aa yaa galn nkaal ngbaan kan, saa ye unii u ɻani

nkaal aah len pu na, aa ye unii u galni mu la. <sup>12</sup>Uwumbɔr baanja le ye u tii timi nkaal na, ki ye nkaal Aadindaan, ki ye u ji binib tibɔr na. Uma baanja le ga ɻmaa gaa timi lii, ki ga ɻmaa bii timi. Aa ye ɻmaa ki galn aarjeen aato?

## Kipupuk aabɔr

<sup>13</sup>Li pel man, nimi bi len ke, “Din, ke nibaakan fen, ti ga fe buen kitij kibaa ni, ki ti ɻa nima libiln libaa, ki daa tiwan, ki ɻa kitiirk ki kan tinyoor,” <sup>14</sup>naa nyi tiwan ni ga fe ɻa fen na. Nimi aamɔfal bi kinye? Li naahn likpakpal li ɻub siib ki ki kpaan woln na la. <sup>15</sup>Nimi aamɔfal aah bi kina na, nima le ni ɻan ke ni len ke, “Tidindaan yaa kii kan, ti ga li bi, ki ɻa kina, ki ki ɻa kina.” <sup>16</sup>Le ni tee kpa kalmbaani ki puk kipupuk. Ni yaa puk kipupuk kina kan, naa ɻan.

<sup>17</sup>Nima pu na, unii yaa nyi lituln li ɻan na, kaa ɻani li kan, u tun titunwanbir le na.

## Biwankpadam aasurm

**5** Nimi biwankpadam, ni li pel man. Ni li wii ki li kaani falaa u ga pii nimi na pu. <sup>2</sup>Nimi aawankpal bii a. Ijikpaambil moo nimi aakeken a. <sup>3</sup>Ni di ɻimobil bil, le ɻi dan a. ɻaah dan pu na, nima le mɔk ke nimi aabɔr bii a, ki ga ji nimi aawon ke mmii na. Naah kuun liwankpal li wiir na bil na, ni kuun ntafadaan mu wiir ki ga pii nimi kookoo aataadaal na la. <sup>4</sup>Ni ji bitutum bi chee tijikaar tii nimi na pem pem, kaa pa bi. Le bi ki wii baapal pu. Le Uwumbɔr Mpɔɔnsakpiindaan ɻun baah wii pu na. <sup>5</sup>Ni bi dulnyaa wee ni, ki piir nisui, ki ɻani naah gee pu na mɔmɔk, ki kpiini nibaa ki filk sakpen a; ni bi ke inaa i filk aan bi kɔr i na la. <sup>6</sup>Nimi le bii bininyaam ki ku bi, le baa kpa mpɔɔn bi nyan bibaa nimi aanjaal ni.

<sup>8</sup>4:6 : Lik ɻiyataŋak 3.34.

### **Limør ni limeel**

<sup>7</sup> Nnaabitiib, nima pu na, ni li kpa limør ki ti saa bundaln Tidindaan ga gir ni na. Lik man, ukpaal aah kpa limør pu ki kii buyoonn waasaak ga nan ḥa tijikaar nyaan na. U kpa limør ki kii unaalantaal ni utakuutaal aah ga nan nu pu na. <sup>8</sup> Ni mu li kpa limør man, ki pɔɔk nitaakpab; ba pu? buyoonn Tidindaan ga gir ni na peeni.

<sup>9</sup> Nnaabitiib, ni taa ɲulni tɔb pu man aan Uwumbør taa ji nimi tibor. Ni gur siib, u ga ji binib tibor. <sup>10</sup> Nnaabitiib, bibɔ̃nabr bi nan len Uwumbør aayimbil ni na, ni lik baah nan jin falaa ki kpa limør pu na, ni ye limɔkl le ki tii nimi. <sup>11</sup> Binib bi kpa limør falaa ponn ni ki ti saa naadoon na, bima le ti len ke bi kan Uwumbør aanyoor. Ni ɲun Job aah nan kpa limør falaa ponn ni pu na, ki kan Uwumbør aah nan ter u pu falaa ngbaan aapuwɔb na. Ni kan ke Uwumbør kpa linimbaasaln sakpen, ki san binib kinimbaak.

<sup>12</sup> Nnaabitiib, ni jer ni mɔmɔk na le ye ke ni taa puu nibaa pu. Ni taa puu paacham pu, ki taa puu kitij pu, ki taa puu tiwan nibaa pu. Ni po len ke “Een,” bee “Aayii,” ki len mbamɔn. Ni yaa po len kina kan, Uwumbør aan daa nitafal.

<sup>13</sup> Ni ponn ni ubaa yaa kpa falaa kan, u li mee Uwumbør. Ni ponn ni ubaa yaa kpa mpopiin kan, u li gaa ilahn ki pak Uwumbør. <sup>14</sup> Ni ponn ni ubaa yaa bun kan, cha u yin Yesu aanib aaninkpiib, ke bi dan ki nan mee Uwumbør tii u, ki di nkpan meen u, Tidindaan aayimbil pu. <sup>15</sup> Bi yaa mee Uwumbør ki pak ke u ga tii u laafee kan, mmeen ngbaan le ga cha ubun ngbaan pɔɔk, le Tidindaan ga fiin u. U yaa tun titunwanbir kan, u ga di cha pinn u. <sup>16</sup> Nima pu na, ni kpiir nimi aatunwanbir ki tuk tɔb, ki mee Uwumbør tii tɔb, aan u tii nimi laafee. Unii u dii Uwumbør aasan mbamɔn na yaa mee Uwumbør linimaln kan, waameel kpa mpɔɔn sakpen. <sup>17</sup> Elaija nan ye unibɔn ke ti mu aah ye pu na la. Le u mee Uwumbør linimaln ke uteaal taa nu. Le ɲibin ɲitaa ni ijmal iloob uteaal aa nan nun kitij ngbaan ni. <sup>18</sup> Le u ki mee Uwumbør, le uteaal nun, le tijikaar ḥa.

<sup>19</sup> Nnaabitiib, ni ponn ni ubaa yaa yenn mbamɔn aasan chee kan, unii yaa giin u mbamɔn chee kan, <sup>20</sup> u bee ke unii u giin titunwanbirdaan waah yenn pu na, u nyan waamɔfal nkun ni la, ki cha Uwumbør di cha pinn titunwanbir pam.\*\*

---

\*\*5:20 : “ki cha Uwumbør di cha pinn titunwanbir pam” bee “ki biin titunwanbir pam pu”.

*Njan aagbar ki*

## PIITA

*ŋmee ki na*

**1** Min Piita u ye Yesu Kristo aakpam-bal na le ŋmee kigbaŋ kee m tii Uwumbor aanib bi ye biwɔwɔm dulnyaa wee ni, ki yaa ki bi Pontus aatiŋ ni, ni Galasia aatiŋ ni, ni Kapadosia aatiŋ ni, ni Asia aatiŋ ni, ni Bitinia aatiŋ ni na.<sup>2</sup> Tite Uwumbor nan nyan nimi waageehn pu, ki cha Waafuur Nyaan ŋa nimi chain, ni li keei Yesu Kristo aamɔb, aan Uwumbor di cha pinn nimi Yesu aasin pu. Uwumbor ŋa tinyoor ŋa ni pu, ki tii nimi nsuudoon pam.

### Limakl li bi n-yoonn mɔmɔk na

<sup>3</sup> Cha ti pak Uwumbor u ye Tidindaan Yesu Kristo Aate na; ba pu? u san timi kinimbaak sakpen a, ki gir ma timi lelee, ki di timi ŋa waabim. U nan fikr Yesu Kristo nkun ni. Nima le ti kpa limakl li bi n-yoonn mɔmɔk na.<sup>4</sup> Ti mak ke ti ga sil kan tinyoor ti Uwumbor di siin paacham kiir timi na. Tinyoor ngbaan aan ŋmaa bii, kaan ŋmaa wɔŋ, kaan doo.<sup>5</sup> Naah gaa Yesu ki kii na, nima le Uwumbor aapɔɔn biin ni pu, ki ti saa buyoonn ni ga kan waah ga gaa nimi lii mbamɔm pu na, kookoo aataadaal.

<sup>6</sup> Nima le ni kpa mpopiin. Ni yaa po kpa mpombiin ni yunn siib dandana wee, falaa aabɔŋ ponn ni kan, ni li kpa mpopiin;<sup>7</sup> ba pu? falaa ngbaan ga mɔk ke ni gaa Yesu ki kii mbamɔm aan naa gaa. Naah gaa u ki kii pu na jer salmaa u ga bii na. Bi joo salmaa pu mmii ponn ni ke bi lik ke u ŋan aan waa ŋan. Kina le Uwumbor cha ni ji falaa ke u lik ke ni gaa u ki kii mbamɔm aan naa gaa. Ni yaa gaa u ki kii mbamɔm kan, le ni ga kan

mpakm ni nnyuŋ bundaln Yesu Kristo ga nyan ubaa mpaan pu na.<sup>8</sup> Naa kee kan u, le ni gee u. Ninimbil aa waa u dandana wee, le ni gaa u ki kii. Nima le ni kpa mpopiin sakpen, ki pak Uwumbor, kaa ŋmaa len naah kpa mpopiin ki ti saa pu na.<sup>9</sup> Naah gaa Yesu ki kii na, le u gaa nimi lii.

<sup>10</sup> To, n-yaayoonn na aabɔnabtiib bi nan tuk binib Uwumbor aah ga ter nimi pu na, nan dakl lik mbamɔm, ki ban ke bi bee Uwumbor aah ga ŋa pu ki gaa binib lii na.<sup>11</sup> Le Kristo Aafuur Nyaan mu nan bi bibɔnbr ngbaan ponn ni na mɔk bi ke uma Kristo ga ji falaa, le ki nin kan nnyuŋ falaa ngbaan aapuwɔb. Le bi nan ban bi bee ke ulau ga ji falaa ngbaan, ki ban bi bee buyoonn u ga ji falaa ngbaan na.<sup>12</sup> Le Uwumbor nan mɔk bi ke baah len tibɔr ti na, baa len ke bi ter bima bibaa, bi len ke bi ter nimi la. Le ni ŋun tibɔr ngbaan dandana wee. Uwumbor cha Waafuur Nyaan nyan ni paacham ki tii binib mɔɔɔn bi tuk nimi tibɔnyaan tee. Tibɔnyaan timina le Uwumbor aatuuntiib ban ke bi bee taatataa.

### Ni li bi chain man

<sup>13</sup> Nima pu na, ni li dak ilandak i ŋan na, ki li chur nibaa, ki li kpa limakl n-yoonn mɔmɔk; ba pu? Yesu Kristo yaa nyan ubaa mpaan pu kan, u ga ŋa tinyoor ŋa ni pu la.<sup>14</sup> Ni li keei Uwumbor aamɔb. Buyoonn naa nan kee nyi nsan mu ŋan na, le ni nan dii nisui aah gee pu na. Ni taa ki dii kina.<sup>15</sup> Cha nimi aabimbin mɔmɔk li bi chain, ke Uwumbor u yin nimi na aabimbin aah bi chain pu na.<sup>16</sup> Ni ŋmee Uwumbor Aagbar ni ke Uwumbor bui nimi, “Min Uwumbor bi chain la; nima pu na, ni mu li bi chain man.”<sup>††</sup>

<sup>17</sup> Ni yaa mee Uwumbor kan, ni yin u ke Nite la. Nima pu na, ni li san u buy-

<sup>††</sup>1:16 : Lik Liifai Yaab 11.44-45; 19.2.

oonn ni bi na; ba pu? waa pak ubaa ki jer uken. U ga ji binib mɔmɔk aabɔr baah tun pu na.<sup>18</sup> Niyaejatiib nan bi mbimbin yɔl yɔl ponn ni. Ni nyi ke u gaa nimi lii ki nyan nimi mbimbin ngbaan ponn ni. Naa ye tiwan ni ga bii ke ɔjimombil na, le u di pan ki gaa nimi lii.<sup>19</sup> U nan di Kristo aasin mu jer ɔjimombil na le gaa nimi lii; uma Yesu nan di ubaa toor kitork ki tii Uwumbɔr, ki bi ke upihbo nyaan u kaa kpa iween ibaa na.<sup>20</sup> Uwumbɔr aa nan kee naan dulnyaa le ki nyan Kristo ke u li ye kitork ngbaan. Naah nan ɔneer na, le u dan dulnyaa wee ni, nimi pu.<sup>21</sup> U pu, le ni gaa Uwumbɔr ki kii. U nan fikr u nkun ni ki nyuŋ u. Nima pu le ni gaa Uwumbɔr ki kii ki kpa limakl.

<sup>22</sup> Ni kii Uwumbɔr aabɔr ti gbii na la. Nima le cha nimi aabimbin bi chain. Le ni sil gee ninaabitib. Nima pu na, ni li beenin gee tɔb mbamɔm. <sup>23</sup> Bi ma nimi lelee la. Naa ye unibɔn u ga kpo na le ma nimi lelee. U ma nimi na aan kpo. Uwumbɔr di waamɔboln li kpa limɔfal ki ga li bi n-yoonn mu kaa kpa ndoon na le gir ma nimi lelee. <sup>24</sup> Ni ɔmee Uwumbɔr Aagbaŋ ni ke, “Binib mɔmɔk bi ke timoor na la. Baanyaan bi ke mmopuun na la. Timoor yɔl mala, le mmopuun mu gbaar,<sup>25</sup> Uwumbɔr aamɔboln ma ga li bi ki ti saa n-yoonn mu kaa kpa ndoon na.”<sup>\*\*</sup>

Limɔboln ngbaan le ye tibɔnyaan ti bi tuk nimi na.

### Ni taa ki tun titunwanbir man

**2** Nima pu na, ni taa ki li kpa kinanaj, ki taa ki ɔmanni tɔb, ki taa li ye binib bi ɔmanni ke bi ɔjan na, ki taa li kpa lipiipoln, ki taa li bii binib. <sup>2-3</sup> Nimi ni-

baa lik ki kan Tidindaan aah kpa tijnann pu na. Nima pu na, ni li ban Uwumbɔr aamɔbon ke ubopɔɔn aah ban mbiin pu na. Uwumbɔr aabɔr gbii, ki ga ter nimi ke ni moo dii waasan mbamɔm, ki ɔmar.

<sup>4</sup> Dan Tidindaan u ye limɔfadaan na chee man. U naahn litakpal li bidimaab yii li na la. Le Uwumbɔr lee u ke u ɔjan sakpen. <sup>5</sup> Ni mu bi ke ɔtitakpal ɔji kpa limɔfal na. Uwumbɔr di nimi maa lidichal ke Waafuur Nyaan li bi li ni. U ban ke ni li ye uma ubaa aatotoorb, ki li tun waatuln, Waafuur Nyaan aapɔɔn pu. Yesu Kristo pu, le u ga gaa nimi aatuln ngbaan. <sup>6</sup> Uwumbɔr Aagbaŋ len ke, “Lik, m lee litakpal li ɔjan na ki di bil Sionn aatij ni.

M di litakpal ngbaan ki di siin kaalɔlɔŋ ni, le unii umɔk gaa u ki kii na aan ji inimɔɔn.”<sup>¶¶</sup>

<sup>7</sup> Nimi bi gaa u ki kii na, u ɔjan ni chee sakpen la. Le binib bi kaa gaa u ki kii na, bi li nyi ke Uwumbɔr Aagbaŋ len ke, “Litakpal li bidimaab yii li na, lima le ye litakpajal,”<sup>§§</sup>

<sup>8</sup> ki ki len ke, “Binib bibaa ga gbeer litakpal ngbaan ki lir.

Litakpal ngbaan pu le bi ga lir.”\*

Baa kii Uwumbɔr aabɔr; nima le cha bi lir, waah siin bi pu na.

<sup>9</sup> To, nimi bi gaa Uwumbɔr ki kii na le ye waanileekaam. Ni ye Uwumbɔr u ye Ubɔrkpaan na aatotoorb, ki ye litim-bol li bi chain na, ki sil ye Uwumbɔr aanib. U lee nimi ke ni li tuk binib waah ɔjan sakpen pu na; ba pu? u nyan nimi mbɔmbɔɔn ni, ki di koon waawiihn mu ɔjan sakpen na ni. <sup>10</sup> N-yoonn mbaa naa nan ye Uwumbɔr aanib. Dandana wee

\*\*1:25 : Lik Aisaya 40.6-8.

¶¶2:6 : Lik Aisaya 28.16.

§§2:7 : Lik Ilahn 118.22.

\*2:8 : Lik Aisaya 8.14-15.

ni ye Uwumbor aanib la. N-yoonn mbaa Uwumbor aa nan san nimi kinimbaak. Dandana wee u san nimi kinimbaak.

### **Uwumbor aatutum**

<sup>11</sup> Maanigeekaab, ni ye biwɔwɔm ni bisachum dulnyaa wee ni la. Nima pu na, m gaj nimi, ni taa kii nisui aah gee pu na; ba pu? nisui aah gee pu na kii nimi Uwumbor aasan ni. <sup>12</sup> Ni bi binib bi kaa dii Uwumbor aasan na akaasisik ni la. Ni li tun lituln li ḥjan na bi chee. Le bi yaa bii nimi ke ni ye bakadam kan, nimi aatunyaan chee bi ga kan ke ni ḥjan. Nima le ga cha bi nyurj Uwumbor bundaln u ga ji binib tibor na.

<sup>13</sup> Tɔ, ni li keei nimi aaninkpiib mɔmɔk aamɔi Tidindaan pu. Ni li keei nimi aabɔrkpaan u joo binib mɔmɔk na aamɔb. <sup>14</sup> Waah kaan bininkpiib ntim ni na, ni li keei bi mu aamɔi. Ba pu? u kaan bi ke bi daa binib bi tun lituln li kaa ḥjan na aatafal, ki ban ke bi pak binib bi tun lituln li ḥjan na. <sup>15</sup> Uwumbor ban ke ni tun litulnyaan aan ki cha bijɔrb bi kaa nyi nibaa ki bii nimi na ḥmin la. <sup>16</sup> Ni bi nibaa pu la. Nima le aa tii nimi nsan ke ni li chuun ḥjani bakaa. Ni li bi ke Uwumbor aatutum aah ba ga li bi pu na. <sup>17</sup> Ni li pak binib mɔmɔk, ki li gee binib bimɔk dii Yesu aasan na, ki li san Uwumbor, ki li pak ubɔrkpaan na.

### **Yesu Kristo aafalaa aamɔkl**

<sup>18</sup> Binib bi ye binaagbiib ni ponn ni na, ni li pak nidindatiib mbamɔm, ki li keei baamɔi. Bi yaa ye binibamɔm, bee bi ti ki ye bakadam kan, ni li pak bi. <sup>19</sup> Unii u kaa ḥja nibaa na, bi yaa ḥja u falaa aan u yaa ji limɔr Uwumbor pu kan, nima le ḥjan Uwumbor chee. <sup>20</sup> Bi yaa gbaa nimi, nimi aatunwanbir pu aan ni yaa ji limɔr kan, nima le aan cha ubaa pak nimi. Ni mu yaa kan falaa nimi aatunyaan pu, ki

yaa ji limɔr kan, nima le ga piir Uwumbor aasui. <sup>21</sup> Ba pu? Uwumbor yin nimi bi dii u na ke ni li ji falaa; ba pu? Kristo mu nan jin falaa ni pu. Nima le ye limɔkl ki tii nimi, ke ni li dii waataabuu. <sup>22</sup> Waa nan ḥja titunwanbir aatuln libaa, ki mu aa nan mɔn nnyamɔn mubaa. <sup>23</sup> Baah seei u na, waa giin sii bi. Waah jin falaa na, waa len ke u ga teen bi. U di ubaa ḥja Uwumbor u ji tibor mɔmɔk mbamɔm na aanjaal ni la. <sup>24</sup> U nan kpo ndɔpuinkoo pu timi aatunwanbir pu, ki sil timi aasisiyyaan ki gaa timi aatafadaan. Nima pu na, ni di titunwanbir mɔmɔk lii, ki li dii mbimbin mu ḥjan na. Waah gaa tigbar ti na pu, le Uwumbor tii nimi laafee. <sup>25</sup> Ni nan bi ke ipiih i yenn na, le dandana wee, ni gir ni Kristo chee. U kpaa nimi ke upihkpaal aah kpaa ipiih pu na, ki kii nimi aamɔfal.

### **Puutiib ni chatiib aabɔr**

**3** Bipiib, ni li keei nichatiib aamɔi. Ni yaa keei baamɔi, aan chatiib yaa bi, kaa kii Uwumbor aabɔr kan, nibaakan bi ga gaa u ki kii nimi aabimbinyaan pu. Hali ni yaa kaa len tibaa kan, <sup>2</sup> bi ga kan ke ni san Uwumbor ki kpa mbimbin mu bi chain na. <sup>3</sup> Bipiib, tiwan ni ga cha ni li ḥjan na aa ye tiyikpir ti buu na, kaa ye nleen mu kpa kidaak na, kaa ye tiwanpeenkaan nyaan. <sup>4</sup> Tiwan ni ga cha ni li ḥjan na le ye mbimbin mu ḥjan na. Ni yaa kpa mbimbin suna kan, nima le ye kinyaan ki kaan fir, ki ḥjan sakpen Uwumbor chee na. <sup>5</sup> N-yaayoonn na aapiib bi nan bi chain ki kpa limakl Uwumbor pu na, nan keei bichatiib aamɔi, nima le nan cha bi kpa kinyaan ki nan ḥjan binib chee. <sup>6</sup> Sara nan ḥjani kina la. U nan keei uchal Abraham aamɔb, ki yin u ke udindaan. Ni yaa tun lituln li ḥjan na, ki yaa kaa san

<sup>†</sup>2:22 : Lik Aisaya 53.9.

ijawaan ibaa Uwumbor aasan ni kan, ni kpahn Sara aabisatiib la.

<sup>7</sup> Bijab, ni mu li nyi naah joo nippuutiib pu na. Bipiib aa kpa mpoon ke bijab aah kpa pu na, nima na, ni li pak bi; ba pu? nimi ni bima le ga kpaan kan Uwumbor aapiin i ye limofal li kaa kpa ndoon na. Ni li joo bi mbamom, nimi aameel taa jan yoli.

### Ji mbimbinyaan aafalaa

<sup>8</sup> Kookoo aabor le ye ke ni momok li kpaan kimbaan, ki cha nitafal li bi tob ni, ki li gee tob ke naabitiib na, ki li san tob kinimbaak, ki sunn nibaa taab. <sup>9</sup> Binib yaa jan nimi bakaa kan, ni taa teen bi. Bi yaa sii nimi kan, ni taa sii bi ki teen. Ni bui bi ke, "Uwumbor jan tinyoor jan ni pu;" ba pu? Uwumbor yin nimi ke u jan tinyoor jan ni pu la. <sup>10</sup> Ni ymee Uwumbor Aagbañ ni ke,

"Unii yaa ban ke u li kpa mpopiin, ni mbimbin mu mo na kan,  
u taa ki len tibobir, ki taa ki moni inyamom,

<sup>11</sup> ki taa ki tun lituln li kaa jan na;

u tun lituln li jan na,

ki li ban nsuudoon linimaln;

<sup>12</sup> ba pu? Tidindaan Uwumbor aatafal bi bininyaam ni,

ki jan baameel n-yoonn momok,

le ki yiil binib bi tun titunwanbir na."<sup>‡</sup>

<sup>13</sup> To, ninimbil yaa man lituln li jan na pu kan, ubaa ga jan nimi bakaa aa?

<sup>14</sup> Ni mu yaa kan falaa lituln li jan na pu kan, Uwumbor aanyoor bi ni pu la. Ni taa san unii ubaa ijawaan, ki taa cha islandak li joo nimi.<sup>¶</sup> <sup>15</sup> Ni li pak Kristo nisui ni, ki di u jan Nidindaan. Ni li gor n-yoonn momok, unii yaa nan baa nimi kan, ni ga ymaa tuk u naah kpa limakl pu na. Ni tuk u suuna, ki pak Uwumbor. <sup>16</sup> Ni li jan ni jan na n-yoonn momok, le naah dii

Kristo mbamom ki kpa mbimbin mu jan na na, nima le ga cha inimcoon chuu binib bi sii nimi ki len nimi tibobir na. <sup>17</sup> Ni yaa ye Uwumbor aageehn ke aa ji falaa litunyaan pu kan, ni soor ni aa ji falaa titunwanbir pu. <sup>18</sup> Ba pu? Kristo ubaa nan kpo nfum mbaa timi aatunwanbir pu. Kristo u ye uninyaan na nan kpo timi bi ye tiniwanbir na pu, ke u di ti ni Uwumbor kpaan. Bi nan ku waawon, le Uwumbor Aafuur Nyaan tii u limofal, <sup>19</sup> le u nan buen ki ti len tibonyaan binib aawiin i bi kiyondiik ni, kitekpiitiq ni na chee. <sup>20</sup> Bi nan bi Nowa aayoonn, kaa nan kii Uwumbor aamob, le u nan jin limor bi pu, ki kii n-yoonn mu Nowa nan ti kpii bujobj doo na. Binib biniin baanja le nan koo bujobj ngbaan ni, le ki ymar nnyun pu. <sup>21</sup> Nnyun ngbaan le ye baah muini binib nnyun ni na aamokl. Dandana wee, bi yaa muin nimi nnyun ni kan, ni ymar a; ba pu? Yesu Kristo nan fikr nkun ni. Nima le cha ni ymar. Bi yaa muin nimi nnyun ni kan, naa ye ke bi fu nimi awon nnyun tiwon aajoy pu la. Ni ye ke ni di titunwanbir di lii, ki puu tipuur ke ni ga dii Uwumbor. <sup>22</sup> Yesu Kristo nan buen paacham ki ti bi Uwumbor aajangii wob. Le Uwumbor di waatuuntiib, ni paacham yaab, ni kinimbobj ni kaapcon momok jan Yesu Kristo aajjaal ni.

**4** To, Kristo aah nan joo unibon awon na, u nan jin falaa. Nima pu na, ni mu kii ke ni ga ji falaa man, ke waah nan kii pu na. Waah nan jin falaa tiwon ponni pu na le u nan kuln titunwanbir. <sup>2</sup> Nima pu na, naah laa bi dulnyaee wee ni na, ni taa ki kii nisui aah gee pu na, ni li keei Uwumbor aah gee pu na. <sup>3</sup> Ni nan tun titunwanbir n-yoonn mu jer na; ni yeer kina. Ni nan janji ke binib bi kaa nyi Uwumbor na aah janji pu na, ki dii bipiib, ki dii tiwan ni kaa jan na

<sup>‡</sup>3:12 : Lik Ilahn 34.12-16.

<sup>¶</sup>3:14 : Lik Aisaya 8.12.

aakpeek, ki nan kuuni tɔb ki nyun ndaan gbii, ki tun lituln li kaa ḷjan na, ki dii ḷj-waa ḷji sukr ponn ni na. <sup>4</sup>Naah kaa ki kpaani titunwanbirdam ngbaan chee ki ḷjani kina na, ni gar bi la, le bi seei nimi. <sup>5</sup>Bi ga sil Uwumbor aanimbiin ni ki len baah tun pu na. U gor ke u ji binib bi fu na, ni binib bi kpo na tibor. <sup>6</sup>Nima le cha bi nan tuk binib bi kpo na Uwumbor aabonyaan tee. Bi nan kpo ke unibon mɔk aah kpo pu na. Le bi nan tuk bi Uwumbor aabonyaan tee, ke bi kan nsan ki gaa u ki kii aan baawiin kan Uwumbor aamɔfal ki li bi u chee.

### **Ni li ye Uwumbor aatutunyaam**

<sup>7</sup>Tɔ, ni gur siib le tiwan mɔmɔk ga doo. Nima pu na, ni li kpa laasaab, ki chur nibaa, ki mee Uwumbor. <sup>8</sup>Tiwan ni jer tiwan mɔmɔk na le ye ke ni li gee tɔb mbamɔm; ba pu? aa yaa gee unii kan, aa ga di cha pinn u titunwanbir pam. <sup>9</sup>Ni li channi tɔb tichann ki taa ḷjulni. <sup>10</sup>Uwumbor tii ni mɔmɔk Waafuur Nyaan aapiin la. Waah tii nimi ipiin aabɔj aabɔj na, ni di ipiin ngbaan ter biken. <sup>11</sup>Uwumbor yaa tii unii ipiin ke u len Uwumbor aabɔr kan, u teer ke ni ye Uwumbor aabɔr le u len. Uwumbor yaa tii unii ipiin ke u ter biken kan, u li ter bi Uwumbor aah tii u mpɔɔn pu na. Ni li nyuŋni Uwumbor tiwan mɔmɔk ni, Yesu Kristo pu. Uma le yeh mpakm ni mpɔɔn n-yoonn mu kaa kpa ndoon na. Amii.

### **Yesu Kristo aadidiliib ah ji falaa pu na**

<sup>12</sup>Njɔtiib bi m gee bi na, ni ji falaa u wu sakpen na la. Ni taa dak ke ni ye ti-wachann la. Uwumbor cha ni ji falaa ke u lik nimi aabimbin aah bi pu na la. Ni taa cha ni gar nimi. <sup>13</sup>Ni li kpa mpopiin; ba pu? ni yaa ji falaa u Kristo nan jin na kan, ni ga li kpa mpopiin sakpen bundaln u

ga gir ni ki nan mɔk waah nyuun pu na. <sup>14</sup>Bi yaa sii nimi Kristo aayimbil pu kan, Uwumbor aanyoor bi ni pu la; ba pu? Uwumbor Aafuur Nyaan mu ḷjan sakpen na bi ni ni. [Bima le seei Kristo, le nima pak u.] <sup>15</sup>Le ni ponn ni ubaa yaa jin falaa linikul pu, bee kinaayuk pu, bee baka baka pu, bee libobaln pu kan, nima aa ḷjan. <sup>16</sup>Tɔ, unii yaa jin falaa Yesu Kristo aasan pu kan, u taa cha inimɔɔn li joo u. U li pak Uwumbor waah ye Yesu Kristo yoo na pu.

<sup>17</sup>Ni ḷjeer Uwumbor piin ki ji binib tibor. U ga puen ji waanib le tibor, le ki nin ji biken tibor. U yaa puen ji timi waanib tibor kan, binib bi kaa kii waabonyaan na aabɔr ga doo kinye?

<sup>18</sup>Ni ḷmee Uwumbor Aagbaŋ ni ke, “Ni yaa pɔɔ bininyaam ḷmar kan, titunwanbirdam bi kaa pak Uwumbor na ga tee ḷja kinye ki ḷmar?”<sup>8</sup>

<sup>19</sup>Nima pu na, unii yaa ji falaa Uwumbor aageehn pu kan, u li tun lituln li ḷjan na, ki di ubaa ḷja Uwumbor u nan naan u ki ye mbamɔndaan na aŋjaal ni.

### **Uwumbor aanib aabimbin**

**5** Tɔ, m ye Yesu aanib aaninkpel, ki nan kan Kristo aah jin falaa pu na, ki tuk binib kina. M mu ga ji waamɔɔn mu ga nya mpaan pu na. Nima pu na, m gaŋ nimi bi ye Yesu aanib aaninkpiib na, <sup>2</sup>ni li ter Uwumbor aanib bi bi nido na, ke upihkpaa ahlik waapiih pu na. Ni taa ter bi limukl aaterm. Ni li ter bi nimi aageehn, Uwumbor aah ban pu na. Ni taa ter bi ḷjimombil pu, ni li ter bi ni mpopiin. <sup>3</sup>Uwumbor di bi ḷja niŋjaal ni la. Ni taa ḷjani ke naah ye bidindatiib le na. Cha nimi aabimbyaan mɔk bi baah ga dii pu na. <sup>4</sup>Ni yaa ḷjani kina kan, buyoonn upihkpaainkpel ga gir ni na, ni ga kan lipal li mɔ sakpen ki ga li bi n-yoonn mu kaa kpa ndoon na.

<sup>5</sup> Nimi bi kaa por na, ni li keei binib bi kpeln nimi na aaməb. Ni məmək li sunni nibaa taab, ki li ter təb. Ba pu? Uwumbər Aagbaŋ len ke, "Uwumbər yiil kalm-baanidam, le ki lik faar binib bi sunni bibaa taab na."\*\* <sup>6</sup> Nima pu na, ni li sunni nibaa taab, Uwumbər u yeh mpɔɔn məmək na aanjaal ni. Le ni yaa nan ɻeer kan, u ga nyurj nimi. <sup>7</sup> Limukl limək muk nimi na kan, ni di li məmək ḥa Uwumbər aanjaal ni; ba pu? utafal bi ni ni.

<sup>8</sup> Ni li kpa laasaab ki li nyi; ba pu? kin-imboŋ ki ye nimi aadin na chuun gonnī, ki ban ke ni di Uwumbər aasan lii. Ki bi ke uchinn u chuun tar, ki ban unii u ki ga chuu ki ɻmo na la. <sup>9</sup> Ni yii u man. Ni gaa Uwumbər ki kii mbamɔ̄n man, ki taa di cha. Ni nyi ke ninaabitib bi bi dulnyaa wee ni na mu bi ji falaa ke naah ji pu na la. <sup>10</sup> Ni yaa ji falaa ni yunn siib kan, Uwumbər ga ter nimi, ki tii nimi mpɔɔn

ni li dii u mbamɔ̄n, ki taa gir puwəb. Ba pu? nterm məmək nyan ni uma le chee. U nan yin nimi Kristo pu, ke ni nan ji waamɔ̄n n-yoonn mu kaa kpa ndoon na. <sup>11</sup> Uma le yeh mpɔɔn məmək n-yoonn mu kaa kpa ndoon na. Amii.

### Kookoo aadoon

<sup>12</sup> Tɔ̄, m nyi ke Silfanus, u ye tina aabo na, bi mbamɔ̄n la. Uma le ter mi le m ɻmee kigbaŋ waatiir kimina tii nimi ki pɔ̄ok nitaakpab, ki tuk nimi mbamɔ̄n ke maah ɻmee pu na le ye Uwumbər aabɔ̄r, ki ye mbamɔ̄n. Ni taa di ti lii.

<sup>13</sup> Yesu aanib bi bi Babiloŋ aatiŋ ni na dooni nimi. Bi ye binib bi Uwumbər nyan bi na. Maabo Mak mu dooni nimi.

<sup>14</sup> Ni li dooni təb ke binib bi gee təb na. Uwumbər tii nimi bimək ye Kristo yaab na nsuudoon.

---

\*\*5:5 : Lik ɻiyataŋak 3.34.

*Lelee aagbar ki*

**PIITA**

*ŋmee ki na*

**1** Min Simonn Piita u ye Yesu Kristo aakpambal ni waatutunn na le ŋmee kigbaŋ kee m di tii nimi bi gaa timi Aawumbor Yesu Kristo u gaal timi lir na ki kii na. Waah ŋjan sakpen pu na le u cha ni gaa u ki kii ke ti mu aah nan gaa u ki kii pu na. **2** Naah nyi Uwumbor ni Tidindaan Yesu pu na, bi ŋa tinyoor ŋa ni pu ki tii nimi nsuudoon pam.

### **Uwumbor aah nyan timi ki yin timi pu na**

**3** Waapɔɔnsakpiin pu, le u tii timi tiwan nimok ga ter timi ke ti kan limɔfal ki dii u mbamɔn na. Taah nyi u pu na, nima le cha u tii timi. U nan mok timi ke u ŋjan sakpen, ki kpa mbimbinyaan, ki yin timi ke ti dii u, **4** ki puu tipuur ti ŋjan sakpen na tii timi. Binib kpa iniman la. Nima le titunwanbir bi dulnyaa wee ni. Ni yaa gaa Uwumbor aah puu tipuur ti na kan, ni ga nya titunwanbir ngbaan ni, ki gaa Uwumbor aabimbin. **5** Nima pu na, naah gaa Yesu ki kii pu na, ni li pɔɔni nibaa ki li kpa mbimbinyaan, ki di kpee ni pu; ki li kpa nlan ki di kpee mbimbinyaan pu; **6** ki chuu nibaa ki di kpee nlan pu; ki li kpa limɔr ki di kpee chuumbaa pu; ki li san Uwumbor ki di kpee limɔr pu; **7** ki li ŋjani ninaabitib tibulchinn ki di kpee Uwumbor aasam pu; ki li gee tob, ki di kpee tibulchinn pu. **8** Nimi aabimbin yaa moo bi kina mbamɔn kan, nima le ga cha ni bee Tidindaan Yesu Kristo mbamɔn, ki tun waatuln sakpen, ki ŋa tinyoor tii u. **9** Unii u lann mbimbin ngbaan aaboln na kan, u jɔb la. U suln ke

Uwumbor nan finn u ki nyan titunwanbir ti nan bi usui ni na.

**10** Nnaabitib, Uwumbor aah nyan nimi ki yin nimi pu na, ni li pɔɔni nibaa ki cha nimi aabimbinyaan li mɔk ke ni sil ye waanib. Ni yaa ŋa kina kan, naan lir.

**11** Uwumbor ga tii nimi nsan ke ni koo Tidindaan Yesu Kristo u gaal timi lir na aanaan mu ga li bi n-yoonn mu kaa kpa ndoon na ni.

**12** Nima pu le m ga li teer nimi tibor timina n-yoonn mɔmɔk. Ni ŋjun ti, ki nyi ti, ki joo ti mbamɔn. **13** M mu dak ke ni ŋjan ke m li teer nimi, ki fiin nimi aalandak, maah laa bi tiwon tee ni buyoonn na. **14** M nyi ke naan yunn, le m ga di tiwon tee lii, Tidindaan Yesu Kristo aah nan tuk mi pu na. **15** Le m ga pɔɔk mbaa ki tii nimi kigbaŋ ki ga li teer nimi tibor tee n-yoonn mɔmɔk, ki joo cha maakundaal aapuwɔb na.

### **Binib bi aanimbil kan Yesu Kristo aah wiin chain pu na**

**16** Ti nan tuk nimi ke Tidindaan Yesu Kristo kpa mpɔɔn sakpen ki ga ki gir ni. Taah tuk nimi pu na aa ye itiin. Ti gbii la. Tinimbil kan waah kpa mpɔɔn sakpen pu na. **17** Ti nan bi u chee buyoonn Tite Uwumbor nan pak u ki nyuj u na. Uwumbor aaneel nan nyan ni paacham nin chee wiin chain na, ki bui ke, “Njapoɔn u m gee u na sɔ. Nnimbil gbiin uma la.”<sup>††</sup> **18** Timi tibaa nan ŋjun nneel ngbaan nyan ni paacham, buyoonn ti nan bi u chee Uwumbor aajool paab na.

**19** Nima le mok timi ke Uwumbor aabɔɔntib aah nan len Yesu aabɔr pu na, bi len mbamɔn la. Ni ŋjan ke ni kii baah len pu na. Baaliin bi ke karyaa u wiin mbɔɔmbɔɔn ni na aah bi pu na. I ga woln ninimbil ki ti saa buyoonn Yesu Kristo ga gir ni ki nan woln nin-

<sup>††</sup>1:17 : Lik Matiu 17.1-5; Mak 9.2-7; Luk 9.28-35.

imbil mbamɔm na.<sup>20</sup> Tibɔkpaan le ye ke ni li nyi ke Uwumbɔr aabɔnabr aaliin ibaa aa ye bima bibaa aalandak le bi joo ijmee.<sup>21</sup> Naa ye bima bibaa aageehn pu le cha bi len. Bi nan len Uwumbɔr Aafuur Nyaan aah cha bi len pu na.

### **Bijmaŋmannim aabor**

**2** Bijmaŋmannim mu nan bi Israel yaab ponn ni n-yoonn ngbaan, ki ŋmanni ke bi ye Uwumbɔr aabɔnabr la. Le bijmaŋmannim ga li bi ni mu ponn ni, ki ga li looni ki mɔk nimi nnyamɔn aamɔkm mu ga bii nimi na. Hali bi ga yii Tidindaan u nan gaa bi lii na. Nima pu le Uwumbɔr ga daa bitafal mbamɔm mala.<sup>2</sup> Binib pam ga dii baasanwanbir ngbaan. Bi pu le binib ga sii mbamɔn aasan na.<sup>3</sup> Bi ga li kpa iniman ki ga ŋmann nimi, ke bi ji nimi. Ni yunn le Uwumbɔr nan puun len ke baabor bii. Naan yunn le u ga daa bitafal.

<sup>4</sup> Hali Uwumbɔr aatuuntiib bi nan tun titunwanbir na, Uwumbɔr aa nan di cha bi, u daa bitafal la. U buu bi idɔribi, ki di bi lii mmii mu kaan junn na ni, mbɔmbɔɔn ni, bi li bi nima ki ti saa bundaln u ga ji bi tibɔr na.<sup>5</sup> Waa nan di cha dulnyaakpok aanib mu. U nan cha nnyun jin dulnyaakpok, ki kuln binib bi kaa san u na; ki gaa Nowa u nan mooni waabɔnyaan na lii; ki gaa binib bilole lii ki kpee Nowa pu.<sup>6</sup> To, Uwumbɔr nan bii Sodom ni Gomora aatim ki cha mu kpalm nfatan, ki kuln ntim ngbaan aanib. Ni ye limɔkl la, le ki mɔk titunwanbirdam Uwumbɔr aah ga daa bitafal pu na.<sup>7</sup> U nan gaa Lot lii; ba pu? u nan ye uninyaan; le titunwanbirdam na aah tun tijɔŋ aatuln pu na, ni muk u sakpen a.<sup>8</sup> Uninyaan ngbaan nan bi baatiŋ ni, ki kan baah tun yɔl yɔl pu na, ki ŋun baah len iliinbir pu na. Waah nan ye uninyaan na, le baatunwanbir bii usui iwiin mɔmɔk.<sup>9</sup> To, nimina mɔmɔk le mɔk timi ke Tidindaan ga ŋmaa nyan binib bi

san u na ntɔŋ ni, ki ga ŋmaa li dar titunwanbirdam aatafal ki ti saa bundaln u ga ji bi tibɔr na.<sup>10</sup> Binib bi dii tiwon aah ban pu na, ki gɔr kidagook, kaa kii unii ubaa aamɔb na, Uwumbɔr ga daa bitafal ki jer waah ga daa biken aatafal pu na.

Bijmaŋmannim bi bi ni ponn ni na aatafal pɔɔ la. Baa san unii ubaa. Bi seei Uwumbɔr aatuuntiib, kaa san ijawaan.<sup>11</sup> Uwumbɔr aatuuntiib kpa mpɔɔn ki jer bi, ki mu aa galn bi, kaa seei bi Tidindaan aanimbiin ni.<sup>12</sup> Binib ngbaan ŋani baah gee pu na, ki bi ke ipeel i binib chur i ki ku i na la. Bi sii Uwumbɔr aatuuntiib, kaa nyi baah bi pu na. Bima bibaa aatunwanbir le ga kuln bi.<sup>13</sup> Baah ŋa binib falaa pu na, bi mu ga kan falaa. Baageehn le ye ke bi gɔr kidagook nwiiin pu. Baah bi nikaasisik ni pu na, bi bi ke tijɔŋ aah likr likekeln pu pu na la. Baah ji ni chee tijikaar na, baalandak bi baatuln li kaa ŋan na ponn ni la.<sup>14</sup> Binimbil yaa kan upii kan, bi ban u la, kaan ŋmaa di cha titunwanbir. Bi ŋmanni binib bi kaa nyi Uwumbɔr aasan mbamɔm na ke bi yenn. Bisui bae iniman la. Uwumbɔr aamɔpuur bi bi pu la.<sup>15</sup> Bi yii nsanyaan le ki yenn, ki dii Beor ajapɔɔn Balaam aah nan dii pu na. U nan gee titunwanbir aanyoor la.<sup>16</sup> Le Uwumbɔr sur u waatunwanbir pu, ki cha ubon u ye ubir na di unibɔn aaneel ki sur u, u taa tun uwaar aatuln.

<sup>17</sup> Bijmaŋmannim ngbaan naahn inyunbun i kaa kpa nnyun na, ki naahn utoaal u yun ki bɔln ki joo libuln kaa nu na la. Uwumbɔr ga di bi ŋa mbɔmbɔɔn sakpiin ni, n-yoonn mu kaa kpa ndoon na.<sup>18</sup> Bi len kalmabaani aaliin i ye fam na, ki ŋmanni binib bi kaa dii Uwumbɔr aasan ni yunn na, ki tɔŋni bi ke bi ŋa tiwon aah gee pu na ki gɔr kidagook,<sup>19</sup> ki bui bi ke bi ga gaa bibaa la. Bima bibaa ye titunwanbir aanaagbiib la; tiwan ni nyaŋ unii na joo u tinaagbiir la.<sup>20</sup> Binib yaa nyi Tidindaan Yesu Kristo u

gaal timi lir na, ki nyan ni titunwanbir ti bi dulnyaa wee ni na aan titunwanbir ngbaan ki nyap bi kan, baadoon ga li bir ki jer baapiin aah nan bi pu na.<sup>21</sup> Bi yaa kaa ba nyi nsanyaan ngbaan kan, ni ba ga li soor ni baah nyi mu aan ki yii Yesu aabonyaan ti bi qun na.<sup>22</sup> Bi gbiin qiyataanjak aah len pu na ke, “Uboja gir ki ti jin waawuln la. Ugbeer u fu nnyun na gir ti koo tikpakpar ni, ki weei la.”<sup>23</sup>

### Tidindaan ga sil gir ni

**3** Maanigeekaab, kigbañ kimina ye kigbañ leler le m ki qmee tii nimi. Tigbann tilee ngbaan momok ponn ni, le m teer nimi tibor ngbaan pu, ke m fiin ilandaknyaan nisui ni.<sup>2</sup> M ban ke ni li teer tibor ti Uwumbor aabonabnyaam nan len n-yaayoonn na, ki li teer Tidindaan u gaa timi lii na aabor ti timi waak-pambalb tuk nimi na.<sup>3</sup> Njan, m ban ke ni li nyi ke binib bi dii bisui aah ban pu na ga li bi kookoo aayoonn, ki ga ña nimi mbonyun,<sup>4</sup> ki ga bui ke, “Yesu Kristo aah puu tipuur ti ke u ga gir ni na, u bi la chee? Buyoonn titetiib nan kpo ki nan saa dandana wee na, tiwan momok beenin bi ke naah nan bi pu buyoonn Uwumbor naan dulnyaa wee na la.”<sup>5</sup> Baageehn pu, le bi suln ke n-yaayoonn na, Uwumbor nan di umob len, le ki naan paacham, ni kitij ki nyan ni nnyun ni, ki bi nnyun akaasisik ni na.<sup>6</sup> Nnyun le nan jin dulnyaapkok, ki bii u.<sup>7</sup> Bi suln ke Uwumbor aaliin ichachaan ngbaan le joo paacham ni kitij ki bi dandana wee na, ki nan saa buyoonn u ga see paacham ni taab mmii, ki kuln titunwanbirdam na; liyadaal ngbaan le u ga ji bi tibor ki bii bi.

<sup>8</sup> Maanigeekaab, ni taa suln ke liwinbaal naahn qibin lichur le Tidindaan chee. Qibin lichur mu naahn liwinbaal le u chee.<sup>9</sup> Tidindaan aan taan ke u ña

waah puu tipuur ti na, ke binib bibaa aah dak pu na. U ji limor ni pu la, kaa ban ke unii ubaa bii. U ban ke binib momok kpeln baabimbin ki qmar la.

<sup>10</sup> Tidindaan aawiindaal ga fuu ni ke unaayuk aah fuur ni pu na la. Liyadaal ngbaan le paacham ga faa kifuuk sakpen ki jer. Mmii mu ton sakpen na ga donn paacham aawan momok. Kitij, ni tiwan nimok bi kitij pu na mu ga gaa mmii.

<sup>11</sup> Tiwan nimina momok aah ga bii kina na, ni jan ke ni li ye ba aanibol? Ni jan ke ni li bi chain, ki li san Uwumbor,<sup>12</sup> ki li lik Uwumbor aawiindaal aah ga fuu ni buyoonn na, ki cha ninimbil li man nwiin ngbaan pu. Liyadaal ngbaan, le paacham ga gaa mmii ki donn. Mmii mu ton sakpen na ga donn paacham aawan momok.<sup>13</sup> Uwumbor mu aah nan puu tipuur ti na, ti kpa limakl ke paacham poon ni kitipon ga li bi. Nima chee le tiwan momok ga li bi mbamom.

<sup>14</sup> Maanigeekaab, naah kpa limakl kina na, ni li pooni nibaa ki li bi suuna, ki li bi chain, ki taa li kpa taani ubaa Uwumbor chee bundaln u ga lik nimi aabimbin aah bi pu na.<sup>15</sup> Tidindaan aah jin limor, kaa gir ni mala na, ni bee ke u tii binib nsan ke bi qmar le waahr, le u nin gir ni. Tinaabogekoo Poöl mu nan qmee kigbañ tii ni nimi, ki tuk nimi kina, Uwumbor aah tii u nlan pu na.<sup>16</sup> Waagbann momok ponn ni u qmee Uwumbor aawiindaal aabor, ki momok nimi tibor timina. Tibor ti poon unii bee taatataa na tibaa mu bi waagbann ponn ni. Le binib bi kaa kpa nlan ki ga qmaa yenn mala na kpeln taatataa, ke baah kpeln Uwumbor Aagbañ aabor tiken pu na. Nima pu na, Uwumbor ga daa bitafal.

<sup>17</sup> Maanigeekaab, ni puen bee baah qjani pu na. Naah dii mbamom pu na, ni li nyi man, ki taa dii titunwanbirdam aanyamom aan ki yenn.<sup>18</sup> Ni moo

---

<sup>22:22</sup> : Lik Ñiyataanjak 26.11.

gaa Tidindaan Yesu Kristo u gaal timi lir le yeh mpakm dandana wee ki ti saa  
na aaterm, ki li moo bae waaliin. Uma n-yoonn mu kaa kpa ndoon na. Amii.

*Njan aagbar ki*

**JCNN**

*ŋmee ki na*

### **Limɔfal aamɔboln**

**1** Timi Yesu aakpambalb le ban ke ti tuk nimi limɔfal aabor. Tibor ngbaan ye Yesu aabor la. U nan bi n-yaayoonn na, ki beenin bi. Ti nan ŋjun waah len pu na. Tinimbil nan kan u, ki lik mbamɔm waah bi pu na. Tijaal nan meeh u. <sup>2</sup>Yesu, u ye limɔfal ngbaan na, nan di ubaa mɔk timi. Le ti kan u. Nima pu le ti ji seeraa, le ki tuk nimi limɔfal ngbaan aabor. Yesu le ye limɔfal li kaa kpa ndoon na daan. N-yoonn mɔmɔk u nan bi Tite Uwumbor chee, le ki di ubaa nan mɔk timi. <sup>3</sup>Ti tuk nimi taah kan pu na, ni taah ŋjun pu na, aan ti ni nimi li kpaan kijɔtiik. Ni ye mbamɔn la, taah kpaan kijɔtiik na, ti ni Tite Uwumbor ni Ujapɔɔn Yesu Kristo le kpaan kijɔtiik ngbaan. <sup>4</sup>Ti ban ke ti li kpa mpopiin mbamɔm, nima pu le ti ŋmee tibor timina tii nimi.

### **Uwumbor ye nwiihn la**

<sup>5</sup>Ti nan ŋjun tibor timina Yesu chee la, le ki tuk nimi. Tibor ngbaan le ye ke Uwumbor ye nwiihn la. Mbɔmbɔɔn mubaa aa bi u chee. <sup>6</sup>Ti yaa len ke ti ni Uwumbor kpaan kijɔtiik ki yaa beenin dii mbɔmbɔɔn aasan kan, ti mɔn nnyamɔn la, kaa dii mbamɔn aasan. <sup>7</sup>Ti yaa dii nwiihn aasan ke Uwumbor aah bi nwiihn ni pu na kan, ti kpaan kijɔtiik tɔb chee la. Le Uwumbor Aajapɔɔn Yesu Kristo aasin finni tipobil ki nyani titunwanbir mɔmɔk.

<sup>8</sup>Ti yaa len ke taa ye titunwanbirdam kan, ti ŋmanni tibaa la; mbamɔn aa bi tisui ni. <sup>9</sup>Uwumbor ŋjani waah len pu na ki ye mbamɔndaan la. Ti yaa kpiir timi aatunwanbir tuk u kan, u ga di cha pinn

timi aatunwanbir, ki finn tipobil, ki nyan tiwan ni kaa ŋjan na mɔmɔk. <sup>10</sup>Ti yaa len ke taa tun titunwanbir kan, ti yin Uwumbor unyamɔndaan la. Waabor aa bi tisui ni.

### **Yesu Kristo le ye timi aateter**

**2** Maabim, maa ban ke ni tun titunwanbir. Nima le cha m ŋmee tibor tee tii nimi. Unii mu yaa tun titunwanbir kan, ti kpa uchandatuln Tite Uwumbor chee. Uchandatuln ngbaan ye Yesu Kristo la, uma le ye mbamɔndaan. <sup>2</sup>U nan si timi aasisiyyaan ki di ubaa toor kitork tii Uwumbor, timi aatunwanbir pu; naa ye timi baanja aatunwanbir pu, binib bimɔk bi dulnyaa ni na aatunwanbir pu. Uma Yesu pu, le Uwumbor ga di cha pinn timi.

<sup>3</sup>Ti yaa kii Uwumbor aamɔb kan, nima le cha ti bee ke ti nyi u. <sup>4</sup>Unii yaa len ke u nyi Uwumbor, ki yaa kaa kii waamɔb kan, u ye unyamɔndaan la; mbamɔn aa bi usui ni. <sup>5-6</sup>Unii umɔk kii Uwumbor aamɔb na, uma le gee Uwumbor mbamɔm. Unii umɔk len ke u kpaan Uwumbor chee na, u li bi ke Yesu aah bi pu na. Nima le cha ti bee ke ti kpaan Uwumbor chee.

### **Nkaal pɔɔn**

<sup>7</sup>Maanigeekaab, naa ye nkaal pɔɔn le m ŋmee tii nimi. Ni ye nkaal kpok la. Naah nan piin ki dii Yesu aasan na, ni ŋjun nkaal ngbaan, le ki di nan saa din. Nkaal kpok ngbaan le ye tibor ti ni ŋjun na. <sup>8</sup>Tɔ, maah bi ŋmee nkaal mu na ye nkaal pɔɔn la. Yesu nan ŋja nkaal ngbaan aah len pu na. Ni mu ŋjani mu aah len pu na la. Nimina mɔk ke mu ye mbamɔn. Mbɔmbɔɔn bi jer la. Nwiihn bamɔnn bi wolni la.

<sup>9</sup>Unii yaa len ke u bi nwiihn ni ki yaa nan una aabo kan, u beenin bi mbɔmbɔɔn ni la, le ki di nan saa din. <sup>10</sup>Unii umɔk gee una aabo na bi nwiihn ni la.

Tiwan ni ga cha unii lir na aa bi nwi-ihni. <sup>11</sup> Unii umok nan una aabo na bi mbombcoon ni la, le ki dii mbombcoon aasan. Mbombcoon ngbaan job unimbi la, nima le waa nyi waah cha nin chee na.

<sup>12</sup> Maabim, Uwumbor di cha pinn nimi aatunwanbir Yesu aayimbil pu. Nima pu le m qmee tibor tee tii nimi. <sup>13</sup> Ntetiib, ni nyi Yesu u nan bi n-yoonn momok na. Nima pu le m qmee tibor tee tii nimi. Binachipom, ni nyaq kinimbqj ki kaa qjan na. Nima pu le m qmee tibor tee tii nimi.

<sup>14</sup> Maabim, ni nyi Tite Uwumbor. Nima pu le m qmee tibor tee tii nimi. Ntetiib, ni nyi Yesu u nan bi n-yoonn momok na. Nima pu le m qmee tibor tee tii nimi. Binachipom, ni kpa mpcoen, le Uwumbor aabor bi nisui ni, le ni nyaq kinimbqj ki kaa qjan na. Nima pu le m qmee tibor tee tii nimi.

<sup>15</sup> T, ni taa li gee dulnyaa wee aasan. Ni taa li gee dulnyaa wee ponni aawan. Unii yaa gee dulnyaa wee aasan kan, waa gee Tite Uwumbor. <sup>16</sup> Binib aanimbil man tiwan ni kaa qjan na pu. Binimbil man baah kan tiwan ni na pu. Bi kpa kalmbaani baawan pu. Tiwan nimina momok ye dulnyaa wee aasan la, naa ye Tite Uwumbor aasan. <sup>17</sup> Dulnyaa wee ga doo. Tiwan ni binib aanimbil man ni pu na, ni mu ga doo. Unii umok qjani Uwumbor aageehn na ga li bi n-yoonn mu kaa kpa ndoon na.

### Yesu Kristo aadin

<sup>18</sup> Maabim, ni yaa kpee siib kan, kookoo aayoonn ga fuu ni. Ni nan qjun ke Yesu aadin ga dan. Dandana wee Yesu aadim fuu ni ki wiir. Nima pu le ti nyi ke ni yaa kpee siib kan, kookoo aayoonn ga fuu ni. <sup>19</sup> Binib bi ye Kristo aadim na nyan ti chee. Bi mu aa nan ye timi aanib. Bi yaa ba ye timi aanib kan, bi ba ga li beenin bi ti chee. Bi nyan ti chee ke ti bee ke bi ponni ubaa aa ye timi aanii.

<sup>20</sup> Nimi kan, Yesu u ye chain na tii nimi Waafuur Nyaan. Waafuur Nyaan aah bi nisui ni na, nima le ni momok nyi tibor ti ye mbamoen na. <sup>21</sup> Naa ye ke naa nyi mbamoen ngbaan le cha m qmee tibor tee tii nimi. Ni nyi mbamoen, ki mu nyi ke nnyamoen mubaa aa ye mbamoen. Nima pu le m qmee tibor tee tii nimi.

<sup>22</sup> Njma ye unyamondaan? Unyamondaan ye unii u len ke Yesu aa ye Kristo u gaa timi lii na. Udaan le ye Kristo aadin. U yii Tite Uwumbor ni Ujapcoen mok. <sup>23</sup> Unii umok yii Uwumbor Aajapcoen na yii Uwumbor mu la. Unii umok gaa Uwumbor Aajapcoen na gaa Uwumbor mu la.

<sup>24</sup> Naah nan piin ki dii Yesu aasan ki di nan saa din na, ni qjun waabor la. Ni li nyi ki cha tibor ngbaan li beenin bi nisui ni. Tibor ngbaan yaa beenin bi nisui ni kan, ni ga kpaan Tite Uwumbor ni Ujapcoen chee la. <sup>25</sup> Waah puu tipuur ke u ga tii timi tiwan ni na, nima le ye limofal li kaa kpa ndoon na.

<sup>26</sup> M qmee tibor tee tii nimi, ke m tuk nimi binib bi ban bi qmann nimi na pu. <sup>27</sup> Nimi le Yesu nan tii Waafuur Nyaan. Waafuur Nyaan ngbaan beenin bi ni ni. Nima pu na, naa ki ban ke unii ubaa mok nimi waabor. Waafuur Nyaan le mok nimi Uwumbor aabor momok. Waafuur Nyaan aah mok nimi pu na, ni ye mbamoen la, naa ye nnyamoen. Nima pu na, kii man Waafuur Nyaan aah mok nimi pu na, ki li kpaan Yesu chee n-yoonn momok.

<sup>28</sup> Maabim, ni li kpaan Yesu chee n-yoonn momok, aan ti li kpa lipobil ki taa san inimcoen u chee bundaln u ga gir ni na. <sup>29</sup> Ni nyi ke Yesu ye mbamondaan la. Nima pu le ni bee ke unii umok qjani ni qjan na ye Uwumbor aabo.

### Uwumbor aabim

**3** Lik Tite Uwumbor aah gee timi sakpen pu na. U yin timi ke waabim.

Le ti mu sil ye waabim. Dulnyaa aanib aa nyi Uwumbor. Baah kaa nyi Uwumbor na, nima pu le baa nyi ti mu.<sup>2</sup> Maanigeekaab, dandana wee ti ye Uwumbor aabim la. Taa kee nyi taah ga nan li bi pu na. Ti po nyi ke Yesu yaa nan gir ni kan, ti ga kan waah bi pu na. Nima pu le ti mu ga li naahn u.<sup>3</sup> Unii umok kpa Yesu pu limakl ngbaan na, u *ŋjani* ubaa chain la, ke Yesu aah ye chain pu na.

<sup>4</sup> Unii umok tun titunwanbir na, u *ŋjani* Uwumbor aakaal aah kɔ pu na la; ba pu? unii yaa ḥja Uwumbor aakaal aah kɔ pu na kan, nima le ye titunwanbir.<sup>5</sup> Ni nyi ke Yesu aah nan dan dulnyaa wee ni na, u dan u nan nyan titunwanbir la. Ni nyi ke uma Yesu aa tun titunwanbir tibaa.<sup>6</sup> Unii umok bi Yesu ni na aan ki li beenin tun titunwanbir. Unii umok beenin tun titunwanbir na aa kan u, ki mu aa nyi u.

<sup>7</sup> Maabim, taa cha unii ubaa *ŋmanni* nimi. Unii umok *ŋjani* ni *ŋjan* na, udaan ye unibamɔnn ke Yesu aah ye unibamɔnn pu na la.<sup>8</sup> Unii umok tun titunwanbir n-yoonn mɔmɔk na, u ye kinimbɔŋ aanii la. Ba pu? kinimbɔŋ aah nan piin buyoonn na, ki po tun titunwanbir la. Uwumbor Aajapɔɔn aah nan dan dulnyaa wee ni na, u nan dan ke u nan *ŋjani* kinimbɔŋ aatuln yɔli la.

<sup>9</sup> Unii umok ye Uwumbor aabo na, Uwumbor aabimbin bi u ni. Nima pu, waan ki li beenin tun titunwanbir. Ute le ye Uwumbor. Nima pu, waan *ŋmaa* dii titunwanbir aasan.<sup>10</sup> Unii umok kaa *ŋjani* ni *ŋjan* na aa ye Uwumbor aabo. Unii umok kaa gee una aabo na, u mu aa ye Uwumbor aabo. Nima le cha ni beer binib bi ye Uwumbor aabim na, ni binib bi ye kinimbɔŋ aabim na.

### Ni li gee tɔb

<sup>11</sup> Naah nan piin ki dii Yesu aasan ki di nan saa din na, naah *ŋjun* tibɔr ti na le ye ke, "Cha ti li gee tɔb."<sup>12</sup> Taa cha ti

li bi ke Keenn na. U nan ye kinimbɔŋ ki kaa *ŋjan* na aanii la, le ki ku unaal. Ba pu u ku unaal? Uma Keenn aatuln aa nan *ŋjan*. Unaal ma aatuln nan *ŋjan*. Nima le nan cha u ku u.

<sup>13</sup> Nnaabitiib, dulnyaa aanib yaa nan nimi kan, taa cha ni gar nimi man.

<sup>14</sup> Taah gee tinaabitiib na, nima le cha ti bee ke ti *ŋyan* nkun ni, ki kpa limɔfal li kaa kpa ndoon na. Unii umok kaa gee una aabo na, u beenin bi nkun ni la.<sup>15</sup> Unii umok nan una aabo na, u ye unikur la. Ni nyi ke unikur ubaa aa kpa limɔfal li kaa kpa ndoon na.<sup>16</sup> Yesu nan sil timi aasisiyyaan ki kpo ti pu. Nima le cha ti bee ngeehm aah ye pu na. Ni *ŋjan* ke ti mu ga *ŋmaa* kpo tinaabitiib pu.<sup>17</sup> Unii yaa kpa liwankpal ki yaa kan una aabo bi igiin ni ki yaa kaa san u kinimbaak kan, Uwumbor aageehm aa bi usui ni.<sup>18</sup> Maabim, taa cha ti li gee binib timɔb ni baanja. Nima ye fam la. Cha ti li gee bi mbamɔm, ki li ter bi.

<sup>19</sup> Nima le ga cha ti bee ke ti dii mbamɔn aasan. Nima le ga cha ti li kpa nsuudoon Uwumbor chee.<sup>20</sup> Ti yaa dak tisui ni ke timi aabor bii kan, cha ti li teer ke Uwumbor jer tisui, ki nyi tiwan mɔmɔk.

<sup>21</sup> Maanigeekaab, ti yaa bee tisui ni ke timi aabor aa bii kan, ti kpa lipobil Uwumbor chee.<sup>22</sup> Ti kii waamɔb la, ki *ŋjani* tiwan ni piir usui na. Nima pu, taah mee u tiwan ni na, u tii timi.<sup>23</sup> Waah tuk timi ke ti li *ŋjani* pu na le ye ke: ti gaa Ujapɔɔn Yesu Kristo ki kii, ki li gee tɔb, uma Yesu aah tuk timi pu na.<sup>24</sup> Unii umok kii Uwumbor aamɔb na, u bi Uwumbor ni. Uwumbor mu bi u ni. U tii timi Waafuur Nyaan, nima le cha ti bee ke u bi ti ni.

### Binib bi *ŋmanni* nimi na aabor

**4** Maanigeekaab, binib yaa len ke bi kpa Uwumbor Aafuur Nyaan kan, ni taa pak bi mɔmɔk. Ni lik baah len pu na, aan ki bee ke ni ye Uwumbor Aa-

fuur Nyaan le cha bi len aan naa ye. Bijmañmannim chuun dulnyaa wee ni ki wiir, ki len ke bi ye Uwumbor aabon-abtiib, kaa ye. <sup>2</sup> Ubɔnabr umɔk len ke Yesu Kristo nan kpalm unii ki dan dulnyaa wee ni na, uma le kpa Uwumbor Aafuur Nyaan. Nima le ga cha ni bee binib bi kpa Uwumbor Aafuur Nyaan na, ni binib bi kaa kpa na. <sup>3</sup> Ubɔnabr umɔk len ke Yesu aa kpalm unii na kan, udaan ngbaan aa kpa Uwumbor Aafuur Nyaan. U ye Kristo aadin aabonabr la. Ni nan njun ke Kristo aadin aabonabtiib ga dan. Dandana wee, bi fuu ni dulnyaa ni a.

<sup>4</sup> Maabim, ni ye Uwumbor yaab la. Uwumbor Aafuur Nyaan mu bi nisui ni na jer kinimbɔŋ ki bi dulnyaa wee ni na. Nima pu le ni nyaj Yesu aadin aabon-abtiib ngbaan. <sup>5</sup> Bi ye dulnyaa yaab la. Nima pu le bi len dulnyaa aabor, le dulnyaa aanib pel baah len pu na. <sup>6</sup> Tima kan, ti ye Uwumbor yaab la. Unii umɔk nyi Uwumbor na pel taah len pu na. Unii umɔk kaa ye Uwumbor yoo na aa pel taah len pu na. Nimina le ga cha ti bee binib bi kpa Uwumbor Aafuur Nyaan mu ye mbamɔn na, ni binib bi ye Yesu aadin aabonabtiib na.

### Uwumbor ye ngeehm la

<sup>7</sup> Maanigeekaab, cha ti li gee tɔb. Ba pu? u cha binib gee tɔb na le ye Uwumbor. Unii umɔk gee unaabitib na, u ye Uwumbor aabo la, ki nyi Uwumbor. <sup>8</sup> Uwumbor ye ngeehm la. Nima pu na, unii u kaa gee unaabitib na, waa nyi Uwumbor. <sup>9</sup> Uwumbor nan tun ni Ujapɔnal dulnyaa wee ni ke ti nan kan limɔfal li kaa kpa ndoon na u pu. Nimina le mɔk timi ke u gee timi. <sup>10</sup> Ngeehm aa ye ke timi le gee Uwumbor. Ngeehm ye ke Uwumbor le gee timi, ki tun ni Ujapɔn dulnyaa ni, u nan sil timi aasisi-iyaan ki di ubaa toor kitork tii Uwumbor, timi aatunwanbir pu. Uma pu, le Uwumbor ga di cha pinn timi.

<sup>11</sup> Maanigeekaab, Uwumbor aah gee timi sakpen kina na, ni ḥjan ke ti mu li gee tɔb. <sup>12</sup> Unii ubaa aa kee kan Uwumbor. Ti yaa gee tɔb kan, Uwumbor bi ti ni la, nima le ti gee tɔb mbamɔm, waah ban pu na.

<sup>13</sup> Tɔ, u tii timi Waafuur Nyaan. Nima le cha ti bee ke ti bi u ni, u mu bi ti ni. <sup>14</sup> Tinimbil nan kan Uwumbor Aajapɔɔn, le ti jin seeraa ke Ute tun ni u dulnyaa wee ni, ke u nan gaa dulnyaa ni aanib lii. <sup>15</sup> Unii umɔk len binib aanimbil ni ke Yesu le ye Uwumbor Aajapɔɔn na kan, Uwumbor bi u ni la, u mu bi Uwumbor ni. <sup>16</sup> Ti nyi Uwumbor aah gee timi pu na, ki pak ke u gee timi la.

Uwumbor ye ngeehm la. Unii umɔk gee binib n-yoonn mɔmɔk na, u bi Uwumbor ni la, Uwumbor mu bi u ni. <sup>17</sup> Ti gee binib mbamɔm ke ti li kpa lipobil bundaln Uwumbor ga ji binib tibor na. Ba pu? Yesu aah bi pu na, ti mu bi kina le dulnyaa wee ni. <sup>18</sup> Unii u gee Uwumbor na aa san ijawaan. Unii yaa kpa ngeehm mbamɔm kan, ngeehm ngbaan nyan ijawaan u ni. Unii u san ijawaan na aa gee Uwumbor mbamɔm; ijawaan ye falaa la.

<sup>19</sup> Uwumbor le nan puen gee timi. Nima pu le ti mu gee u. <sup>20</sup> Unii yaa len ke u gee Uwumbor ki yaa nan una aabo kan, u ye unyamɔndaan la. U yaa kaa gee una aabo u unimbiil waa u na kan, u ga ḥja kinye ki li gee Uwumbor u unimbiil aa waa u na? <sup>21</sup> Yesu aah nan tuk timi pu na le ye ke: unii u gee Uwumbor na, u li gee una aabo mu.

### Taah nyaj dulnyaa aabimbin pu na

**5** Unii umɔk pak ke Yesu ye Kristo u gaa timi lii na, udaan ngbaan ye Uwumbor aabo la. Unii umɔk gee ubo aate na, u ga li gee waabo mu. <sup>2</sup> Ti yaa gee Uwumbor ki kii waamɔb kan, nima le cha ti nyi ke ti gee waabim. <sup>3</sup> Ti yaa gee Uwumbor kan, naatataa le ye ke

ti kii waamob. Le waamob aa pco. <sup>4</sup> Ba pu? binib bimok ye Uwumbor aabim na nyajni dulnyaa aatɔŋ. Taah gaa Yesu ki kii na, nima le cha ti nyajni dulnyaa aatɔŋ. <sup>5</sup> Ulau nyajni dulnyaa aatɔŋ? Unii umok pak ke Yesu ye Uwumbor Aajapcoon na, uma le nyajni dulnyaa aatɔŋ.

### **Yesu Kristo aaseeraadam**

<sup>6</sup> Yesu Kristo le ye u nan dan dulnyaa wee ni na, le Jɔnn muin u nnyun ni. Baah nan ku u na, le waasin nyan. Naa ye ke Jɔnn muin u nnyun ni baanja la, bi nan ku u ki kpee, le waasin nyan. Uwumbor Aafuur Nyaan mɔk timi ke nimina ye mbamɔn la; ba pu? Nfuur Nyaan ye mbamɔndaan la. <sup>7-8</sup> Jɔnn nan muin Yesu nnyun ni. U nan kpo, le waasin nyan. Nimina le mɔk ke u ye Uwumbor Aajapcoon. Nfuur Nyaan ngbaan mu mɔk ke u ye Uwumbor Aajapcoon. <sup>9</sup> Kina le Uwumbor ji seeraa ki mɔk ke Yesu sil ye Ujapcoon. Ti pak binib aaseeraa la. Uwumbor aaseeraa jer binib yoo. <sup>10</sup> Unii umok gaa Uwumbor Aajapcoon ki kii na, u pak Uwumbor aah len pu na. Unii umok kaa pak Uwumbor aah len pu na, u yin Uwumbor unyamondaan la; kinye pu? waa pak Uwumbor aah len Ujapcoon aabor pu na. <sup>11</sup> Uwumbor aah len pu na le ye ke u tii timi limɔfal li kaa kpa ndoon na, ke limɔfal ngbaan bi Ujapcoon ni. <sup>12</sup> Unii umok kpa Uwumbor Aajapcoon na le kpa limɔfal ngbaan. Unii umok kaa kpa Uwumbor Aajapcoon na aa kpa limɔfal ngbaan.

### **Limɔfal li kaa kpa ndoon na**

<sup>13</sup> M ɔmee tibor tee tii nimi bi gaa Uwumbor Aajapcoon ki kii na, ke ni bee

ke ni kpa limɔfal li kaa kpa ndoon na. <sup>14</sup> Ti kpa lipobil ki mee Uwumbor ki bee ke ti yaa mee u tiwan ni ye waageehn na kan, u ɔnun timi aameel la. <sup>15</sup> Ti yaa bee ke u ɔnun timi aameel kan, ti bee ke ti kan taah mee u tiwan ni na la.

<sup>16</sup> Unii yaa kan una aabo tun titunwanbir ti kaan cha u kpo na kan, u ga mee Uwumbor tii u. Le Uwumbor ga tii u limɔfal. Binib bi tun titunwanbir ti kaan cha bi kpo na, Uwumbor ga tii bi limɔfal. Le titunwanbir ti cha binib kpo na mu bi. Maa len ke ni li mee Uwumbor tii binib bi tun titunwanbir ngbaan na. <sup>17</sup> Lituln limɔk kaa ɔjan na po ye titunwanbir la. Titunwanbir ti kaan cha binib kpo na mu bi.

<sup>18</sup> Ti nyi ke unii umok ye Uwumbor aabo na aa ki tun titunwanbir; ba pu? Uwumbor Aajapcoon kii u, le kinimbɔŋ aan ɔmaa ɔja u nibaa.

<sup>19</sup> Ti nyi ke ti ye Uwumbor aabim la, ki nyi ke dulnyaa aanib mɔmɔk bi kinimbɔŋ aajaal ni la.

<sup>20</sup> Ti nyi ke Uwumbor Aajapcoon nan dan ki nan tii timi nlancé ke ti bee Uwumbor, u ye Uwumbor bamɔnn na la. Ti bi Ujapcoon Yesu Kristo ni, nima le ti bi Uwumbor bamɔnn mu ni. Uma le ye Uwumbor bamɔnn, ni limɔfal li kaa kpa ndoon na daan.

<sup>21</sup> Maabim, ni nyan nibaa ɔiwaa ni man.

*Lelee aagbar ki*

**JCN**

*ŋmee ki na*

**1** Min Jcnn u ye uninkpel na le ŋmee tibor tee tii nimi Yesu aanib, nimi bi Uwumbor nyan bi na. M gee nimi mbamɔn la. Naa ye min baanja le gee nimi. Binib bimɔk nyi mbamɔn na mu gee nimi. <sup>2</sup>Mbamɔn pu, le ti gee nimi. Mbamɔn ngbaan bi tisui ni, ki ga li bi ti chee n-yoonn mu kaa kpa ndoon na.

<sup>3</sup>Tite Uwumbor, ni Yesu Kristo u ye Tite Uwumbor Ajapɔɔn na, ga ter timi, ki san timi kinimbaak, ki tii timi nsuudoon, ki cha ti li dii mbamɔn aasan, ki li gee tɔb.

### **Mbamɔn ni ngeehm**

<sup>4</sup>M kan ke ni ponn ni bibaa dii mbamɔn aasan, Tite Uwumbor aah tuk timi pu na. Le ni ŋa mi mpopiin sakpen. <sup>5</sup>Yesu aanib, m gaj nimi, cha ti mɔmɔk li gee tɔb man. Maa ŋmee nkaal pɔɔn tii nimi. Taah nan piin ki dii Yesu aasan na, ti nan ŋun nkaal ngbaan la, le ki di nan saa din. <sup>6</sup>Ti yaa gee Uwumbor kan,

naatataa le ye ke ti li keei waamɔb. Naah nan piin ki dii Yesu aasan na, ni nan ŋun nkaal ngbaan la, le ki di nan saa din. Nkaal ngbaan le ye ke ti li gee tɔb n-yoonn mɔmɔk.

<sup>7</sup> Biŋmaŋmannim chuun dulnyaa wee ni ki wiir. Bi len ke Yesu Kristo aa nan kpalm unii ki dan dulnyaa wee ni. Bima le ye biŋmaŋmannim ki ye Kristo aadim.

<sup>8</sup> Li nyi man, taa cha nimi aatuln bee yoli. M ban ke ni kan naah tun lituln li na aapiin mɔmɔk la.

<sup>9</sup> Unii umɔk kaa beenin dii Kristo aabɔr, ki di tibɔyayan kpee ti pu na kan, waa gaa Uwumbor. Unii umɔk beenin dii Yesu aabɔr na kan, u gaa Tite Uwumbor ni Ujapɔɔn mɔmɔk la. <sup>10</sup> Unii yaa dan ni chee ki joo ni tibɔr ti kaa ye Kristo aabɔr na kan, ni taa cha u koo ni nido. Hali ni taa doon u. <sup>11</sup> Unii u doon u na kpalm ubakaats le na.

### **Kookoo aabɔr**

<sup>12</sup> M kpa tibɔr sakpen ki ban m tuk nimi; m mu aa ban m ŋmee ti kigbaŋ kee ponn ni. M dak ke m ga mann nimi, ki len ni chee, aan ti li kpa mpopiin mbamɔn.

<sup>13</sup> Ninaabitib bi Uwumbor lee bi na dooni nimi la.

*Taataa aagbaŋ ki*

## JCNN

*ŋmee ki na*

**1** Min Jɔnn u ye uninkpel na dooni si, njɔgeehn Gayus. M gee si mbamɔm la.

<sup>2</sup> Njɔgeehn, m mee Uwumbɔr tii si, ke aa li kpa laafee, ki kani tinyoor, ke saawiin aah kpa tinyoor Uwumbɔr chee pu na. <sup>3</sup> Tinaabitib bibaa dan do, ki nan tuk mi saah dii mbamɔm pu na. Le ni ŋja mi mpopiin sakpen a. Aa sil dii mbamɔm la. <sup>4</sup> M yaa ŋun ke maabim dii mbamɔm kan, ni ŋani mi mpopiin la. Nibaa aa bi ki ŋani mi mpopiin ki jer kina.

<sup>5</sup> Njɔgeehn, m nyi ke aa ter Yesu aanib bi ye bicham na n-yoonn mɔmɔk; saah kaa nyi bi na mu, aa ter bi la. Saah ŋani kina na, aa ŋani mbamɔm la. <sup>6</sup> Bi tuk m ni Yesu aanib bi bi do na saah gee bi pu na. Aa pɔɔk aabaa, ki li beenin ter bi baasachuln ponn ni. Ter bi Uwumbɔr aah ban pu na. <sup>7</sup> Yesu pu, le bi chuun tuk binib waabor, kaa gaal tiwan nibaa binib bi kaa dii Yesu aasan na chee. <sup>8</sup> Nima pu, ni ŋan ke timi bi dii Yesu aasan na li ter bi. Ti yaa ter bi kan, ti ter bi ke bi tuk binib Yesu aabor ti ye mbamɔm na la.

<sup>9</sup> M nan ŋmee tibɔr tibaa tii Yesu aanib. Le Diotrefes aa gar ti. U ban ke u li ye Yesu aanib aayidaan. <sup>10</sup> U len tibɔbir ki geei inyamɔn paani timi. Waah ŋa kina na, waa faar. Tinaabitib yaa dan kan, waa channi bi tichann. Binib bi ban ke bi chann bi tichann na, u kiir bi, kaa kii, ki ban ke u jenn nyan bi Yesu aanib ponn ni. M yaa fuu ni kan, m ga baa u waah ŋani pu na, aan ti nyan mpaan pu.

<sup>11</sup> Njɔgeehn, taa dii unii u kaa ŋan na aataabuu. Li dii unii u ŋan na aataabuu. Unii umɔk ŋani ni ŋan na kan, u ye Uwumbɔr yoo la. Unii umɔk ŋani ni kaa ŋan na kan, waa nyi Uwumbɔr.

<sup>12</sup> Binib mɔmɔk pak Demetrius. Waah dii mbamɔm aasan pu na le mɔk ke u ye unii. Ti mu pak u. Aa bee ke taah len pu na, ti gbii la.

## Kookoo aabor

<sup>13</sup> M kpa tibɔr sakpen, ki ban m tuk si. Maa ban m ŋmee ti kigbaŋ kee ponn ni.

<sup>14</sup> M dak ke ni yaa kpee siib kan, m ga kan si, ki len aa chee.

<sup>15</sup> Uwumbɔr tii si nsuudoon.

Yesu aanib bi bi do na dooni si. Aa doon Yesu aanib bi bi aa chee na mɔmɔk ubaabaa tii timi.

*Kigbañ ki*

**JUUD**

*ŋmee ki na*

**1** Min Juud, u ye Yesu Kristo aatutunn, ni Jems aanaal na le ŋmee tibor tee tii nimi bi Uwumbor lee nimi na. U gee nimi, ki joo nimi Yesu Kristo pu la.

**2** M mee Uwumbor ke u moo san nimi kinimbaak, ki tii nimi nsuudoon, ki cha ni li gee tɔb mbamɔ̄k.

### Bibiindam aah ɣani pu na

**3** Maanigeekaab, nnimbil nan man ke m ŋmee kigbañ ki tuk nimi Uwumbor aah gaal timi lir pu na aabor tii nimi. M mu aa ŋmee kina; ba pu? ni muk mi ke m ŋmee kigbañ ki gaj nimi ke ni li pɔ̄oni nibaa ki li joo Uwumbor aabor, ki yii binib bi bii ti na. Uwumbor le nan di tibor ngbaan tii waaninyaam. Ubaa taa kpeln ti. **4** Budabu cha m gajni nimi kina na le ye ke binib bibaa nan koo ni nikaasisik ni, ki ŋmanni nimi. Baa san Uwumbor. Bi len ke Uwumbor aah di cha pinn timi pu na, ti yaa gor kidagook kan, waan daa titafal. Bi yii Tidindaan Yesu Kristo. Uma baanja le ye Tidindaan. N-yaayoonn na, Uwumbor aabɔ̄n-abtiib nan ŋmee ke Uwumbor ga daa bibiindam ngbaan aatafal.

**5** Ni nyi maah ga tuk nimi pu na mɔ̄mɔ̄k. Le m ban m teer nimi. Uwumbor nan nyan Israel yaab Ijipt aatiŋ ni ki gaa bi lii. Le u mu nan ku bi ponni binib bi kaa gaa u ki kii na.

**6** Teer man, Uwumbor aatuuntiib bi nan di cha Uwumbor aah tii bi lituln li na, ki nyan ni bido paacham na aabor. Uwumbor nan buu bi tikululn ti baan ŋmaa buur ti na, ki di bi ɣa mbɔ̄mbɔ̄on mu bi kitij aataab na ni, ki nan saa nwiin mundaln u ga ji bi tibor ki siin bi ntafadaan na. **7** Teer man, Sodom ni

Gomora aatim, ni itingbaan na aanib bi nan gor kidagook, ki mu yii bipiib ki ban bijab na aabor. Uwumbor nan daa bitafal, ki di bi ɣa mmii mu kaan junn na ni, ni le ye nsurm ki tii titunwanbir-dam mɔ̄mɔ̄k.

**8** Le bibiindam bi bi nikaasisik ni na aa gar nsurm ngbaan. Bi mu ɣani ke binib ngbaan aah nan ɣani pu na la. Bi len ke bi daq tidaq ti mɔ̄k bi ke bi gor kidagook, ki seei Uwumbor aatuuntiib, ki taa kii unii ubaa aamɔ̄b na. **9** Maikel u ye Uwumbor aatuuntiib aaninkpel na aa nan gee ke u sii kinimbɔ̄j. U ni kinimbɔ̄j nan kpak kinikpakpak Moses aawon pu, ke ulau ga yoor u. Maikel mu aa gee ke u sii kinimbɔ̄j ki bii ki. U nan po bui ki ke, "Uwumbor li kae si." **10** Bibiindam ngbaan ma seei Uwumbor aatuuntiib la, kaa nyi baah bi pu na. Bi ɣani bisui aah gee pu na, ke ipeel i kaa dak ilandak na aah ɣani pu na. Nima le Uwumbor ga daa bitafal. **11** Tibɔ̄bir bi bi pu la. Bi yii Uwumbor aamɔ̄b ke Keenn aah nan yii pu na. Bi mɔ̄k binib mmɔ̄km mu kaa ɣan na ŋimobil pu, ke Balaam aah nan ɣa pu na. Bi yii baalinkpiib aamɔ̄i ke Kora aah nan yii pu na. Uwumbor ga bii bi mu. **12** Ni yaa kpaan ni ji tijikaar Uwumbor aadiik ni kan, bi sak nikaasisik ni ke tijɔ̄j aah likr libɔ̄kul pu pu na; ba pu? bi kpaan ji ni chee, kaa san Uwumbor. Bi ban ke bi kpiin bibaa baanja la. Baa kpa tinyoor. Bi naahn utaal u yun ki bɔ̄ln ki joo ni libuln kaa nu na la; ki naahn isui i kaa lu ŋisubil ki kpo ki kpukr lir na la. **13** Bi tun inimɔ̄on aatuln la, ki naahn nnyusakpem aanyunkpenn ti ɣani tipupukr ni tijɔ̄j nnyun aagbaan na la, ki ki naahn ŋiŋmabil ɣi kaa chuun ɣaasan ni na. Uwumbor ga di bi ɣa mbɔ̄mbɔ̄on ni, n-yoonn mu kaa kpa ndoon na.

**14** To, Enok, u nan ye Adam aayaabisɔ̄sɔ̄k lolooib na, nan puun len Uwumbor aah ga ɣa bibiindam ngbaan pu na ke, "Li pel man, Uwumbor ni

waatuuntiib ɳichur kipiik ga dan<sup>15</sup> ki  
nan ji binib mɔmɔk tibɔr, ki ga bii  
titunwanbirdam mɔmɔk; ba pu? bi yii  
Uwumbɔr, ki tun titunwanbir waah kaa  
gee pu na, ki len tibɔbir u pu.”

<sup>16</sup> Bibiindam ngbaan ɳulni n-yoonn  
mɔmɔk; tiwan nibaa aa mɔ bi chee. Bi  
dii tiwan ni kaa ɳan na aakpeek, ki len  
mpɔɔn pu ki kpa kipupuk, ki pak bi-  
wankpadam, ɳimombil pu.

### Nsurm ni nsakm aabor

<sup>17</sup> Maanigeekaab, teer man Tidindaan  
Yesu Kristo aakpambalb aah nan tuk  
nimi pu na, <sup>18</sup> ke kookoo aayoonn  
ni, binib ga li bi ki ɳani bininyaam  
mbɔnyun, ki dii tiwan ni kaa ɳan na  
aakpeek, Uwumbɔr aah kaa gee pu na.  
<sup>19</sup> Binib ngbaan yakr Yesu aanib la, ki dii  
bisui aah gee pu na, kaa kpa Uwumbɔr  
Aafuur Nyaan. <sup>20</sup> Maanigeekaab, naah  
gaa Uwumbɔr aabor ti ye chain na pu  
na, ni li moo dii waasan mbamɔm, ki li  
mee u Waafuur Nyaan aapɔɔn pu,<sup>21</sup> ki li

ye binib bi Uwumbɔr ga li gee bi na, ki  
kii buyoonn Tidindaan Yesu Kristo ga tii  
timi limfal li kaa kpa ndoon na, waan-  
imbaasaln pu na.

<sup>22</sup> Binib bibaa joo beeni la. San bidam  
kinimbaak man,<sup>23</sup> ki ter bibaa mu ke bi  
ŋjmar ki nya ntafadaan ni. San bibaa mu  
kinimbaak man, ki li nan baatunwanbir  
ti ɳa bi tijɔŋ na, ki li san ijawaan baatun-  
wanbir taa doo nimi.

### Kipak aameel

<sup>24</sup> Uwumbɔr u wiin chain na ga li  
ŋjmaa joo nimi, ni taa lir, ki ga ɳjmaa  
di nimi siin unimbiin ni, le ni ga li  
kpa mpopiin sakpen, kaan li kpa taani  
ubaa. <sup>25</sup> Uwumbɔr baan baanja le bi.  
Tidindaan Yesu Kristo pu le u nyan timi  
ntafadaan ni, ki gaa timi lii. Uwumbɔr le  
yeh nnyuj, ni mpakm, ni mpɔɔn mɔmɔk,  
ni tiwan mɔmɔk, n-yoonn mu jer na, ni  
dandana wee, ni n-yoonn mu kaa kpa  
ndoon na. Amii.

## TIBOKPIIRKAAN (REFELEESIONN)

**1** Tibor tee le Uwumbor nan tuk Yesu Kristo ke u nan kpiir tuk waatutum. Ti ye tibor ti ga ja woween na la. Le Yesu nan tun waatuun ke u buen waatuun Jønn chee ki ti tuk u tibor ngbaan.<sup>2</sup> Uwumbor ni Yesu Kristo aah tuk Jønn tibor ti, ki mok u tiwan ni na, le u ïmee ni momok kigbañ ponn ni.<sup>3</sup> Unii u karn Uwumbor aabør timina binib aanimbil ni na, Uwumbor aanyoor bi u pu. Binib bi ïjun ki ja taah len pu na, Uwumbor aanyoor bi bi mu pu. Ba pu? buyoonn tibor tee ga nan ja na aa ki daa.

### U doon Yesu aanib bi bi ntim mulole ni na

<sup>4-5</sup> Min Jønn le ïmee kigbañ kee ke m tii Yesu aanib bi bi Asia aatim mulole ni na. Uwumbor u nan bi, ki beenin bi, ki ga li bi n-yoonn mu kaa kpa ndoon na, ni Waafuur mulole mu bi waaborjal chee na, ni Yesu Kristo, ja tinyoor ja ni pu, ki tii nimi nsuudoon. Yesu Kristo len mbamøn, ki puen fikr nkun ni, ki ye dulnyaa wee ni aabør aayidaan.

U gee timi la, ki di waasin finn timi, ki nyan timi titunwanbir ni, ki gaa timi lii,<sup>6</sup> ki ja timi waanaan ni aanib bi ye bitotoorb na, ke ti li tun lituln tii Ute Uwumbor. Uma Yesu le ye uyimbidaan, ki kpa mpcoen momok n-yoonn mu kaa kpa ndoon na. Amii.

<sup>7</sup> Lik, u ga dii ntaalangbam ni ki dan. Binib momok aanimbil ga kan u. Binib bi nan saa u na mu ga kan u. U pu, le jinibol ïjimok bi dulnyaa wee ni na ga wii. Ni ye mbamøn la. Amii.

<sup>8</sup> Tidindaan Uwumbor, u yeh mpcoen momok, ki nan bi, ki beenin bi, ki ga li bi n-yoonn mu kaa kpa ndoon na le len ke uma le ye Alfa ni Omega,<sup>11</sup> mpiin ngbaan ni ndoon ngbaan.

### Yesu aah kpiir ubaa mok Jønn pu na

<sup>9</sup> Min Jønn u ye nina aabo na, m ni nimi kpaan ki ji falaa ni suklaa Yesu pu, ki ye waanaan ni aanib. Uwumbor aabør ni Yesu aabonyaan tee pu, le bi nan di mi kaan lidikl li bi yin li ke Patmos na pu.<sup>10</sup> Tidindaan aakpaakool daal le Uwumbor Aafuur Nyaan nan fir m pu. Le m ïjun nneel sakpii len mpuwøb ke kakaan na,<sup>11</sup> ki bui mi ke, “Ij mee saah ga kan pu na kigbañ ni, ki di kigbañ ngbaan tun Yesu aanib bi bi Asia aatim mulole ni na chee, bi bi Efesus aatiñ ni, ni Simina aatiñ ni, ni Pegamum aatiñ ni, ni Tiataira aatiñ ni, ni Sadis aatiñ ni, ni Filadelfia aatiñ ni, ni Laodisea aatiñ ni na.”

<sup>12</sup> Le m fenn lik ke m bee udaan u len m chee kina na. Maah fenn na, le m kan salmaa aawan ni pu karyaa tiib tøjni na tiwan nilole,<sup>13</sup> ni unii u naahn Unibøn Aabo na, bi bikaasisik ni, ki pee libøkul li pii utaafar na, ki buu salmaa aagbapapaln ubij chee.<sup>§§</sup> <sup>14</sup> Uyil ni waayikpir piin chain, ke tikokonn na. Unimbil wiin ke mmii na.<sup>15</sup> Utaafar mu wiin ke baah pur tikur ti mmii ni na aah wiin pu na. Uneel mu fuuk ke bunyøb sakpem aanyun na.<sup>16</sup> Le u joo ijmabi ilole upjangii ni. Kijaak aajuk ki ka njipelpel momok ïjilee na mu bi umøb ni. Unimbil wøb wiin chain, ke nwiin aah wiin chain pu nwiin pu na.<sup>17</sup> Maah kan u na, le m lir gbaan unimbiin ni ke maah kpo le na. Le u di unjangii paan m pu, ki bui mi ke, “Taa san ijawaan. Min le ye mpiin ngbaan ni ndoon ngbaan.<sup>18</sup> Min le ye umøfadaan. M nan kpo, le ki fikr,

<sup>¶¶1:8</sup> : Alfa ni Omega aatataa le ye mpiin ni ndoon.

<sup>§§1:13</sup> : Lik Daniel 7.13; 10.5.

ki ga li bi n-yoonn mu kaa kpa ndoon na, ki joo nkun ni kitekpiitiŋ aasaafii tiib.<sup>19</sup> Nima pu na, ŋmee saah kan pu na, ki ŋmee naah bi pu dandana wee na, ki ŋmee naah ga nan ŋa pu n-yoonn mu choo na na.<sup>20</sup> Saah kan ijmabi ilole i ŋjangii ni, ki kan salmaa aawan ni pu karyaa tiib tɔŋni na tiwan nilole na, naatataa le ye ke ijmabi ilole ngbaan si maanib bi bi ntim mulole ngbaan ni na aatuuntiib aasisiyyaan. Karyaa tiib aah tɔŋni tiwan ni pu, aan ni ye nilole ngbaan mu si maanib bi bi ntim mulole ngbaan ni na aasisiyyaan.

### Efesus aatiŋ aanib aabor

**2** “ŋmee kigbaŋ tii maanib bi bi Efesus aatiŋ ni na aatuun ke min Yesu u joo ijmabi ilole ngbaan ŋjangii ni, ki chuuŋ salmaa aawan ni pu karyaa tiib tɔŋni na tiwan nilole na aakaasisik ni na le len tibor timina:<sup>2</sup> M nyi naah tun lituln lini-maln pu na, ki nyi naah kpa limor pu na, ki nyi ke ni yii bibiindam, ke ni lik binib bi ŋmanni ke bi ye maakpambalb kaa ye na aabimbin aah bi pu na, ki bee ke bi ye biŋmajmannim la.<sup>3</sup> Ni kpa limor la. M pu, le ni ji falaa, kaa bakr.<sup>4</sup> Tɔ, m mu galn nimi; ba pu? naa ki gee mi ke naah nan gee mi njan pu na.<sup>5</sup> Teer man naah nan bi pu, kaa ki bi kina dandana wee na, ki kpeln nimi aabimbin man, ki ki li ŋjani ke naah nan ŋjani njan pu na. Ni yaa kaa kpeln nimi aabimbin kan, m ga dan ni chee ki nan chuu nyan nimi aakaryaa ngbaan, le naan ki li ye maanib.<sup>6</sup> Tɔ, ni mu nan Nikolas aanib aah tun pu na. Naah nan baatuln na, nima le ŋjan; m mu nan baah tun pu na.

7 “U kpa litafal na kan, u ŋjun Uwumbor Aafuur Nyaan aah tuk maanib pu na.

“Unii umok nyaj na, m ga cha u moo limofal aasubil ŋji bi Uwumbor do, aan bi yin nima chee ke Paradais<sup>\*</sup> na.

### Simina aatiŋ aanib aabor

8 “ŋmee kigbaŋ tii maanib bi bi Simina aatiŋ ni na aatuun ke min Yesu u ye mpiin ngbaan ni ndoon ngbaan, ki nan kpo ki ki fikr na le len tibor timina:<sup>9</sup> M nyi naah ji falaa sakpen pu na, ki ye bigiim pu na; ni mu tee ye biwankpadam le Uwumbor chee. M nyi binib bibaa aah sii nimi pu na. Bi len ke bi ye Juu yaab, le kaa ye; bi ye kinimbɔŋ aanib la.<sup>10</sup> Ni ga ji falaa dandana wee; ni mu taa san ijawaan man. Kinimbɔŋ ga di ni ponn ni bibaa ŋa kiyondiik ni, aan ni kan ntɔŋ, le ni ga ji falaa iwiin kipiik. Ni li dii maasan mbamɔm ki nan saa nkundaal man. Le m ga nan tii nimi lipal li ye limofal li kaa kpa ndoon na.

11 “U kpa litafal na kan, u ŋjun Uwumbor Aafuur Nyaan aah tuk maanib pu na.

“Unii umok nyaj na aan kan lelee aakun.

### Pegamum aatiŋ aanib aabor

12 “ŋmee kigbaŋ tii maanib bi bi Pegamum aatiŋ ni na aatuun ke min Yesu u kpa kijaak aajuk ki ka ŋipepel mɔmɔk ŋjilee na le len tibor timina:<sup>13</sup> M nyi naah bi nin chee na, ke ni bi kitij ki ye kinimbɔŋ aatiŋ na ponn ni la. Ni mu beenin si nchaŋ ni la, kaa yii mi. Buyoonn bi nan ku maaseeraadaan bamɔnn Antipas nikaasisik ni, kinimbɔŋ aah bi nin chee na, naa nan yii mi.<sup>14</sup> Tɔ, m mu galn nimi tibor tibaa pu. Ba pu? Ni ponn ni bibaa joo Balaam aamɔkm; uma le nan mok Ubɔr Balak waah ga ŋa pu ki tɔŋ Israel yaab bi ti ŋmɔ libaawol aanann, ki gɔr kidagook, aan Uwumbor daa bitafal na.<sup>15</sup> Binib bibaa mu bi ni ponn ni, ki ŋjani kina, ki dii Nikolas aanib aamɔkm kina.<sup>16</sup> Nima pu na, kpeln nimi aabimbin man. Ni yaa kaa kpeln nimi aabimbin man.

\*2:7 : Paradais aatataa le ye ke “isui i lu ŋjisubil ŋji mɔ sakpen na aasaak.”

bin kan, m ga fuu ni mala, ki di kijaak aajuk ki bi mmɔb ni na jan binib ngbaan.

<sup>17</sup> “U kpa litafal na kan, u ɣun Uwumbor Aafuur Nyaan aah tuk maanib pu na.

“Unii umɔk nyaq na kan, m ga tii u ti-jikaar ti bɔr aan bi yin ti ke mana<sup>†</sup> na, ki ga tii u litakpapiln li liyimbipɔln ɻmee li pu na. Ubaa aan li nyi liyimbipɔln ngbaan; unii u gaa li na baanja le ga li nyi.

### Tiataira aatij aanib aabɔr

<sup>18</sup> “ɻmee kigbaŋ tii maanib bi bi Tiataira aatij ni na aatuun ke min Uwumbor Aajapɔɔn u kpa ɻjinimbił ɻj wiin ke mmii na, ni titaafer ti wiin ke baah pur tikur ti mmii ni na aah wiin pu na le len tibɔr timina: <sup>19</sup> M nyi naah tun pu na, ki gee binib pu na, ki gaa mi ki kii pu na, ki kpa limɔr pu na, ki tun lituln dandana wee ki jer naah nan tun njan pu na. <sup>20</sup> Tɔ, m mu galn nimi; ba pu? ni ɻmin ki lik Jesebel, upii u len ke u ye Uwumbor aabɔnabpii kaa ye na. U ɻmanni maatutum, ki tuk bi ke bi yaa gɔr kidagook ki ɻman libaaawol aanann kan, naa bir. <sup>21</sup> M tii u nsan ke u kpeln waabimbin, u mu aa ban u di cha kidagook aatuln. <sup>22</sup> U ni binib bi dii ki gɔr kidagook na yaa kaa kpeln baabimbin ki di cha waatuln kan, m ga cha bi ji falaa sakpen, <sup>23</sup> ki ga ku waabim mu. Le maanib bi bi ɻipepel mɔmɔk na ga bee ke min le nyi bisui ni aah bi pu na. M ga tii ni ponn ni unii mɔmɔk waatuln aah neer pu na.

<sup>24-25</sup> “Tɔ, nimi bibaa mu bi Tiataira aatij ni, kaa dii Jesebel ngbaan aamɔkm, kaa bae kinimboŋ aatuln li bi yin li ke tibɔr ti nyoo na.’ Nimi le m len ke ni li joo naah kpa tibɔr ti na, ki nan saa bунdaln m ga fuu ni na. Maan bui nimi ke ni ja tiwan nibaa ki kppee. <sup>26</sup> Binib bimɔk

nyaq ki tun maatuln n-yoonn mɔmɔk na, m ga tii bi tininkpir bi li joo ɻinibol na, ke maah gaa Nte Uwumbor chee tininkpir pu na. <sup>27</sup> Le bi ga li joo ɻi mpɔɔn pu, ki gbaa wii ɻi yak yak ke tiyakr aabuul na.<sup>‡</sup> <sup>28</sup> M ga tii bi lijmpabil naanyuun mu.

<sup>29</sup> “U kpa litafal na kan, u ɣun Uwumbor Aafuur Nyaan aah tuk maanib pu na.

### Sadis aatij aanib aabɔr

**3** “ɻmee kigbaŋ tii maanib bi bi Sadis aatij ni na aatuun ke min u kpa Uwumbor Aafuur mulole ki joo ijmbabi ilole ɻjaal ni na le len tibɔr timina: M nyi naah tun pu na, ki nyi ke ni naahn ke ni kpa limɔfal le na, ki mu tee kpo. <sup>2</sup> Fiin man, ki toor nimi aabimbin, ki dii Uwumbor mbamɔm ki jer naah dii u pu dandana wee na; nimi aatuln aa gbiin Uwumbor aanimbil. <sup>3</sup> Nima pu na, teer man naah nan ɣun Uwumbor aabɔr ki gaa ti pu na. Ni li keei ti man, ki kpeln nimi aabimbin. Ni yaa kaa finn ngeen pu kan, m ga dan ni chee ke unaayuk aah ga dan pu na. Naan li nyi buyoonn m ga dan ni chee na. <sup>4</sup> Tɔ, ni ponn ni bibaa bi Sadis aatij ponn ni, kaa tun titunwanbir. Bima le ga chuun m chee paacham, ki pee ɻibɔkupiin; ba pu? bi ɻneer kina. <sup>5</sup> Unii umɔk nyaq na, m ga peen u libɔkupiln. Maan chuu ber waayimbił limɔfal aagbaŋ ni. M ga len ke u ye maanii, Nte Uwumbor ni waatuuntiib aanimbiin ni.

<sup>6</sup> “U kpa litafal na kan, u ɣun Uwumbor Aafuur Nyaan aah tuk maanib pu na.

### Filadelfia aatij aanib aabɔr

<sup>7</sup> “ɻmee kigbaŋ tii maanib bi bi Filadelfia aatij ni na aatuun, ke min Yesu u ye chain, ki ye mbamɔn, ki

<sup>†</sup>2:17 : Mana ye tijikaar ti Uwumbor nan tii Israel yaab buyoonn bi nan bi nteersakpiin ni kaa kpa nibaa bi ji na. Lik Nnyam 16.33.

<sup>‡</sup>2:27 : Lik Ilahn 2.8-9.

kpa Ubør David aasaafii na, yaa piir mbisaməb kan, ubaa aan ɣmaa piin mu; m yaa piin mu mu kan, ubaa aan ɣmaa piir mu,<sup>8</sup> min le len tibør timina: M nyi naah tun pu na. M bee ke ni kpa mpcoen siib. Ni joo maabor, kaa yii maayimbil. M piir mbisaməb tii nimi, le ubaa aan ɣmaa piin mu.<sup>9</sup> M ga cha kinimboŋ aanib bi mɔn nnyamɔn ke bi ye maanib, kaa ye na, dan ni chee ki nan gbaan kitij nin-imbiin ni, ki bee ke m gee nimi la.<sup>10</sup> Ni kii maabor, ki kpa limɔr. Nima pu na, m mu ga li lik nimi, ki nyan nimi falaa u ga pii dulnyaa aanib mɔmɔk ki tɔŋ bi na ni.<sup>11</sup> M ga gir ni mala. Ni li beenin dii maasan mbamɔm ke naah dii pu dandana wee na, ubaa taa leg nimi aapiin nsan ni.<sup>12</sup> Unii umɔk nyaŋ na, m ga ɣa u jatɔlk Maawumbør Aadichal ni, le u ga li bi nima n-yoonn mu kaa kpa ndoon na. M ga ɣmee Maawumbør aayimbil, ni waatiŋ ki ye Jerusalem pɔɔn ki ga nyan ni u chee paacham na aayimbil u pu. M ga ki ɣmee maayimbɔl̩ mu u pu.

<sup>13</sup> “U kpa litafal na kan, u ɣun Uwumbør Aafuur Nyaan aah tuk maanib pu na.

### Laodisea aatiŋ aanib aabør

<sup>14</sup> “Ʉjme kigbar tii maanib bi bi Laodisea aatiŋ ni na aatuun ke min Yesu u ye mbamɔn, ki len ibamɔn, ki ye Uwumbør aah nan naan tiwan ni mɔmɔk na aayidaan na, le len tibør timina:<sup>15</sup> M nyi naah tun pu na; naa soon kaa ton mu; m ba ga li gee ke ni li soon, bee ni li ton.<sup>16</sup> Ni bi ke kinyubɔɔk ki kaa ton kaa soon mu na la; nima pu le m ga tii nimi mmɔb ni lii.<sup>17</sup> Ni len ke ni ye bi-wankpadam ki kan liwangol kaa lann nibaa, kaa tee nyi ke ni kpa kinimbaak, ki ye bigiim, ki ye bijoom, ki si niŋmeen la.<sup>18</sup> Nima pu na, m sur nimi ke ni daa m chee salmaa u bi di pu mmii ni aan u ɣa chain na, aan ki sil li ye biwankpadam; ki daa m chee tiwanpeenkaan ni piin na ki di peen, aan binib taa ki kan naah si

niŋmeen pu na; ki daa m chee linimbil aanyɔk ki di mee ninimbil aan ki likr.<sup>19</sup> Maah gee binib bimɔk na, m sur bi ki dar bitafal. Nima pu na, cha ninimbil li man aan ni kpeln nimi aabimbin man.<sup>20</sup> Li pel man, m si mbisaməb chee ki kpaar jaaleŋ. Unii umɔk ɣun maaneel ki piir tii mi na, m ga koo ni u chee, ki nan ji u chee tijikaar, u mu ga ji m chee.<sup>21</sup> Unii umɔk nyaŋ na, m ga cha u kal m chee maaborjal pu, ke m mu aah nan nyaŋ pu ki kal Nte Uwumbør chee waaborjal pu pu na.

<sup>22</sup> “U kpa litafal na kan, u ɣun Uwumbør Aafuur Nyaan aah tuk maanib pu na.”

### Paacham yaab aah dooni Uwumbør pu na

**4** Waah len ti doo na, le m kan Uwumbør do aabisaməb piir. Le nneel mu naahn kakaan ki len m chee njan na le len ke, “Dan paacham do, le m ga mɔk si budabu ga sil ɣa n-yoonn mue aapuwɔb na.”<sup>2</sup> Libuul ngbaan ni le Uwumbør Aafuur Nyaan yoor mi buen paacham. Le m ti kan libɔrjal si Uwumbør do; ubaa mu ka li pu.<sup>3</sup> U ka li pu na wiin chain ki piin, ki man. Waakpimanja u ye likal na mu lur goln libɔrjal ngbaan.<sup>4</sup> Le ɣiŋjal moninko ni ɣinnaa mu si gob libɔrjal ngbaan. Bininkpiib moninko ni binaa mu ka ɣijal ngbaan pu, ki pee tiwanpiln, ki chik salmaa aayikpupur.<sup>5</sup> Libɔrjal ngbaan chee moor lak lak ke uteaal aah moor pu na, kifuuk mu faa ke uteaal aah tar pu na. Karyaa bilole mu wiin libɔrjal ngbaan aanimbiin ni, ki ye Uwumbør Aafuur mulole la.<sup>6</sup> Libɔrjal aanimbiin ni wɔb naahn nnyusakpem, ki wiin chain ke kinimbilik aah wiin pu na.

Le tiwanfurkaan ninaa mu si gob libɔrjal ngbaan. Tiwanfurkaan ngbaan aanimbiin ni, ni nipyuwɔb mu nan ye ɣinimbiil ɣmee la.<sup>7</sup> Le nibaa naahn uchinn, nibaa mu naahn unaajabo, nibaa mu

aanimbil wəb naahn unii la, nibaa mu naahn libɔrwiin li laani na.<sup>8</sup> Ni mɔmɔk nan kpa ifeen iloloob, ki mu nan kpa ḥjinimbil tiwon mɔmɔk pu. Nwiin pu ni kinyeek mɔmɔk, naa fuur; n-yoonn mɔmɔk ni len ke,

“Chain, chain, Tidindaan Uwumbor u  
yeh mpɔɔn mɔmɔk na ye chain la.

U nan bi, ki beenin bi,  
ki ga li bi n-yoonn mu kaa kpa ndoon na.”

<sup>9</sup> Tiwanfuurkaan ninaa ngbaan le len kina, ki di mpakm, ni lisil, ni idoon tii Uwumbor u ka libɔrjal pu, ki ga li bi n-yoonn mu kaa kpa ndoon na.<sup>10</sup> Tiwanfuurkaan ngbaan aah len kina na, le bininkpiib moninko ni binaa ngbaan gbaan Uwumbor u ka libɔrjal pu ki ga li bi n-yoonn mu kaa kpa ndoon na aaniimbiin ni, ki doon u, ki di baasalmaa aayikpupur bil waaborjal taab, ki len ke,

<sup>11</sup> “Tidindaan Uwumbor, si le neer ke ti pak si, ki nyuŋ si,

ki neer aa li kpa mpɔɔn;  
ba pu? si le naan tiwan mɔmɔk.

Saageehn pu le aa nan naan tiwan mɔmɔk.

Saageehn pu le ni mɔmɔk bi.”

### Kigbaŋ ni Upihbo na

**5** Le m kan Uwumbor u ka libɔrjal pu na ḥjub kigbaŋ uŋjangii ni. Kigbaŋ ngbaan nan kpa ḥjymeeen ḥjipepel mɔmɔk, ki dab ḥjimɔgbın nfum mulole.<sup>2</sup> Le m ḥjun Uwumbor aatuun mpɔɔndaan len mpɔɔn pu ke, “Ḥjma neer u dabr kigbaŋ ngbaan ki kpar ki?”<sup>3</sup> Le baa kan unii ubaa paacham, bee kitij, bee kitij aataab, u ga ḥjmaa kpar kigbaŋ ngbaan ki lik ki ponn ni na.<sup>4</sup> Baah kaa kan unii u neer u kpar kigbaŋ ngbaan ki lik ki ponn ni na, nima pu le m wii pam.<sup>5</sup> Le bininkpiib na ponn ni ubaa bui mi ke, “Taa ki wii. Lik, Yesu u pɔɔ ke uchinn, ki ye Juda aaniabol ni aanii ubaa, ki ye Ubɔr David aayaabil

na le nyan, ki ga ḥjmaa dabr kigbaŋ ki bi dab ki nfum mulole na, ki kpar ki.”

<sup>6</sup> Le m kan Upihbo si libɔrjal, ni tiwanfuurkaan ninaa, ni bininkpiib na aakaasisik ni. Upihbo ngbaan kpa libuel uneen ni ke baah kɔr u le na, ki kpa iyin ilole ni ḥjinimbil ḥjilole ḥji ye Uwumbor Aafuur mulole mu Uwumbor tun ni mu ḥjipepel mɔmɔk dulnyaa wee ni na.<sup>7</sup> Le Upihbo ngbaan buen Uwumbor u ka libɔrjal pu na chee, ki ti gaa kigbaŋ ngbaan uŋjangii ni.<sup>8</sup> Waah gaa kigbaŋ na, le tiwanfuurkaan ninaa ngbaan, ni bininkpiib moninko ni binaa ngbaan, nan gbaan unimbiin ni. Bi mɔmɔk gbaatibar, ki joo salmaa aasambil ḥji gbii tulalee aayon na. Tulalee aayon ngbaan si Uwumbor aanib aameel aasisiyyaan.<sup>9</sup> Le bi gaa ilahnpɔɔn ki tii Upihbo ngbaan ke, “Si le neer aa gaa kigbaŋ ngbaan ki dabr ki;

ba pu? aa nan kpo ki di saasin daa binib tii Uwumbor;

binib ngbaan nyan ḥjitimbol mɔmɔk aanib bi bi dulnyaa wee ni, ki len iliin imɔk bi dulnyaa wee ni na,<sup>10</sup> Aa ḥja bi saanaan ni aanib bi ye bitoorb na,

bi ti tun lituln tii timi Aawumbor, le bi ga li joo dulnyaa mɔmɔk.”

<sup>11</sup> Le m lik ki kan Uwumbor aatuuntiib ḥjichur ḥjichur, kaa ti nyi baakahm. Bi si gob Uwumbor aabɔrjal, ni tiwanfuurkaan, ni bininkpiib ngbaan.<sup>12</sup> Le m ḥjun bi mɔmɔk len mpɔɔn pu ke, “Upihbo u bi nan kɔr u na le neer u kan yiko, ni liwankpal, ni nlan, ni mpɔɔn, ni nnyuŋ, ni mpakm, ni idoon.”

<sup>13</sup> Le m ḥjun binib bi bi paacham na, ni binib bi bi kitij na, ni binib bi bi kitij aataab na, ni tiwan nimɔk bi nnyusakpem ni na, ni Uwumbor aah naan tiwan nimɔk na mɔmɔk len ke, “Uwumbor u ka libɔrjal pu na, ni Upihbo ngbaan

le yeh mpakm, ni lisil, ni nnyuŋ, ni  
mpɔɔn,

n-yoonn mu kaa kpa ndoon na.”

<sup>14</sup>Le tiwanfurkaan ninaa ngbaan kii  
ke “Amii.” Bininkpiib ngbaan mu nan  
gbaan Uwumbor ni Upihbo ngbaan aan-  
imbiin ni ki doon bi.

### ¶idab na

**6** M kan Upihbo ngbaan chuu dabr  
kigbaŋ ki bi nan dab ki nfum mulole  
pu na nibaa. Le m ḷun tiwanfurkaan ni-  
naa ngbaan ponn ni nibaa len ke utaal  
aah tar pu na ke, “Dan.” <sup>2</sup>Le m lik ki kan  
utapiin. Unii u dik u pu na joo butɔm. Le  
bi tii u linyaq aayikpupuk u di chiq. Le  
u buen u ti nyaq binib, ki sil ti nyaq bi.

<sup>3</sup>Le Upihbo ngbaan nan ki chuu dabr  
kigbaŋ ngbaan aadam leler. Le m ḷun  
tiwanfurkaan leler len ke, “Dan.” <sup>4</sup>Le  
utaman mu fuu ni. Bi nan tii unii u  
dik utaman ngbaan pu na kijaak aajuk  
sakpen, le Uwumbor tii u mpɔɔn ke u cha  
dulnyaa aanib to butɔb ki ku tɔb.

<sup>5</sup>Le Upihbo ngbaan ki chuu dabr  
ndam tatar. Le m ḷun tiwanfurkaan  
tatar len ke, “Dan.” Le m lik ki kan utan-  
bɔn. Unii u dik utanbɔn ngbaan pu na  
nan joo tiwan ni bi joo ḷajni tijikaar na  
uŋjaal ni. <sup>6</sup>Le m ḷun nneel len tiwanfu-  
urkaan ninaa ngbaan aakaasisik ni ke,  
“Tijikaar taa li wiir, taadaak li pɔɔ. Tɔ,  
taa bii nkpan ni ḷisubil aawanyukaan.”

<sup>7</sup>Le Upihbo ngbaan ki chuu dabr  
ndam nanar. Le m ḷun tiwanfurkaan  
nanar aaneel len ke, “Dan.” <sup>8</sup>Le m lik ki  
kan utanyonyɔn. Unii u dik u pu na aay-  
imbil ye Nkun. U bi yin u ke Kitekpiitiŋ  
na mu dii u. Le Uwumbor tii bi mpɔɔn  
ke bi di kijaak aajum, ni nkɔn, ni iween,  
ni ipeel ku dulnyaa aanib lipepel nanar  
wɔb.

<sup>9</sup>Le Upihbo ngbaan ki chuu dabr  
ndam ḷmuŋmur. Le m kan binib aawiin  
kitork aabimbiln taab, Uwumbor do. Bi  
ye binib bi bi nan ku bi na. Bi nan

moon Uwumbor aabɔr ki tuk binib Yesu  
aabɔnyaan. Nima le cha bi ku bi. <sup>10</sup>Le  
binib ngbaan aawiin teen mpɔɔn pu ke,  
“Tidindaan u ye chain ki ye mbamɔn na,  
ni ga yunn ki ti saa kinye pu aan aa ga ji  
dulnyaa aanib bi ku timi na aabɔr ki daa  
bitafal?” <sup>11</sup>Le Uwumbor peen bi mɔmɔk  
tikparpipiin, ki bui bi ke u siin ke binib  
ku bitutujeen aatɔtiib bi mɔmɔk dii Yesu  
na, ke baah nan ku bi pu na. Bi laa fuur  
siib ki nan saa n-yoonn ngbaan.

<sup>12</sup>Le m kan Upihbo ngbaan ki chuu  
dabr ndam loloob. Le kitij deŋ sakpen.  
Le nwiin bɔln ke likekebɔln na. Le uŋ-  
mal mann ke nsin na. <sup>13</sup>Iŋmabi nyan ni  
paacham ki lir kitij ke kibuj aah ker  
ṇisubil ḷi kaa puir na lir pu na. <sup>14</sup>Kitaap-  
paak kpab ki buen ke baah kpai kikapeek  
pu na. Le ḷijoo ni ḷidik mɔmɔk fii foor.  
<sup>15</sup>Le dulnyaa aayidam, ni bibɔrb, ni  
butɔb aajab aayidam, ni biwankpadam,  
ni bipɔɔndam, ni binaagbiib mɔmɔk, ni  
bimalb mɔmɔk bɔr titakpalunn ni, ni ḷi-  
takpasakpiin taab ḷijoo paab, <sup>16</sup>ki bui  
ṇijoo ni ḷitakpal ke, “Lir ti pu, ki biin ti  
pu, aan Uwumbor u ka libɔrjal pu na taa  
li waa timi, Upihbo ngbaan mu aajuuł  
taa pii timi; <sup>17</sup>ba pu? baajuł aawiin  
sakpiin daal fuu ni a. ḷma ga ḷmaa sil?”

### Israel aanib ḷichur nkub ni imonko ilee ni ḷjinaa na

**7** Nimina aapuwɔb le m kan Uwumbor  
aatuuntiib binaa si dulnyaa aapepel  
mɔmɔk ḷjinaa, ki kiir libuln ke li taa ki  
daa kitij ni, ki taa daa nnyusakpem ni,  
ki taa daa isui ni. <sup>2</sup>Le m kan Uwumbor  
aatuun uken nyan ni liwipuul wɔb  
ki dan paacham, ki joo ni Uwumbor u  
ye limɔfal daan na aadaan, ki nan teen  
mpɔɔn pu, ki tuk Uwumbor aatuuntiib  
binaa bi Uwumbor tii bi mpɔɔn ke bi bii  
kitij ni nnyusakpem na ke, <sup>3</sup>“Ni taa bii  
kitij, bee nnyusakpem, bee isui ki li kii  
buyoonn ti ga nan daan timi Aawumbor  
aatatum aayigbeer pu na.” <sup>4</sup>Le m ḷun

baah daan binib bi na aakahm. Bi nan ye binib ɻichur nkub ni imonko ilee ni njinaa, ki nyan ni Israel aanibol mɔmɔk ni.<sup>5-8</sup> Bi nan daan bi kina la:  
 Juda aanibol aanib ɻichur kipiik ni ɻilee,  
 Rubenn aanibol aanib ɻichur kipiik ni ɻilee,  
 Gad aanibol aanib ɻichur kipiik ni ɻilee,  
 Aser aanibol aanib ɻichur kipiik ni ɻilee,  
 Naftali aanibol aanib ɻichur kipiik ni ɻilee,  
 Manase aanibol aanib ɻichur kipiik ni ɻilee,  
 Simeonn aanibol aanib ɻichur kipiik ni ɻilee,  
 Liifai aanibol aanib ɻichur kipiik ni ɻilee,  
 Isakar aanibol aanib ɻichur kipiik ni ɻilee,  
 Sebulunn aanibol aanib ɻichur kipiik ni ɻilee,  
 Josef aanibol aanib ɻichur kipiik ni ɻilee,  
 Benjaminn aanibol aanib ɻichur kipiik ni ɻilee.

### Kinipaak sakpej

<sup>9</sup> Nimina aapuwɔb le m kan kinipaak sakpej. Ubaa aa ti ki nyi baakahm. Bi nyan ɻitimbol mɔmɔk aanib bi bi dulnyaa wee ni ki len illiin imɔk bi dulnyaa wee ni na, ki si Uwumbɔr aabɔrjal ni Upihbo ngbaan aanimbiin ni, ki pee tikparpiin, ki ɻub tibɔkpafar bijaal ni,<sup>10</sup> ki teen mpɔɔn pu ke, “Timi Aawumbɔr u ka libɔrjal pu na, ni Upihbo ngbaan le nan gaa timi lii.”<sup>11</sup> Le Uwumbɔr aatuuntiib mɔmɔk si gob Uwumbɔr aabɔrjal, ni bininkpiib, ni tiwanfurkaan ninaa ngbaan. Le Uwumbɔr aatuuntiib doon ɻichichik ki di binimbil kpaa kitij Uwumbɔr aabɔrjal taab ki dooni u,<sup>12</sup> ki len ke, “Ni ye mbamɔn, timi Aawumbɔr le yeh mpakm, ni nnyuŋ, ni nlan, ni

idoon, ni lisil, ni yiko, ni mpɔɔn n-yoonn mu kaa kpa ndoon na. Amii.”

<sup>13</sup> Le bininkpiib na ponn ni ubaa baa mi ke, “Binib bi pee tikparpiin na, bi ye ba aanib? Bi nyan ni la chee?”

<sup>14</sup> Le m bui u ke, “Maaninkpel, si le nyi.”

Le u bui mi ke, “Bi ye binib bi nyan falaa sakpiin ni, ki finn baakpar Upihbo ngbaan aasin ni aan ti ɻa ti tipipinn na.

<sup>15</sup> Nima le cha bi si Uwumbɔr aabɔrjal taab. Bi bi waadichal ni, nwiin pu ni kinyeek, ki tun lituln tii u. Uwumbɔr u ka libɔrjal ngbaan pu na ga li bi bi chee, ki biin bi pu.<sup>16</sup> Nkon aan ki chuu bi, nnyunyuu mu aan ki chuu bi, nwiin mu aan ki see bi, ntoton mu aan ki gun bi;<sup>17</sup> ba pu? Upihbo u bi Uwumbɔr aabɔrjal aakaasisik ni na le ga kpiin bi, ki ga mɔk bi uyayak aanyun mu ga tii bi limɔfal na chee. Uwumbɔr ga per binimbil tinyun-yunn mɔmɔk.”

### ɻidab ɻilole na

**8** Le Upihbo ngbaan chuu dabr ndam lolole. Le Uwumbɔr do ɻymin chii chii ki yunn siib.<sup>2</sup> Le m kan Uwumbɔr aatuuntiib bilole bi si Uwumbɔr aanimbiin ni na. Le tii bi kakaan tiib bilole.

<sup>3</sup> Le Uwumbɔr aatuun ukən dan nan sil kitork aabimbiln chee, ki ɻub salmaa aasambil li bi joo tulalee aayon ɻani li ponn ni na. Le bi tii u tulalee aayon sakpen u di kpee Uwumbɔr aanib mɔmɔk aameel pu, ki di ɻa salmaa aabimbiln li bi Uwumbɔr aabɔrjal aanimbiin ni na paab, ki di tii Uwumbɔr.<sup>4</sup> Le tulalee aayon ngbaan aabaan, ni Uwumbɔr aanib aameel nyan Uwumbɔr aatuun ngbaan aajaal ni, ki fii paacham Uwumbɔr aanimbiin ni.<sup>5</sup> Le Uwumbɔr aatuun ngbaan moo mmii mu bi kitork aabimbiln paab na gbiin tulalee aayon aasambil ngbaan, le ki di mee yaa dulnyaa wee ponn ni. Le kifuuk faa, le uteal tar ki moor, le kitij deŋ.

### Kakaan tiib

<sup>6</sup> Le Uwumbor aatuuntiib bilole bi ḥub kakaan tiib bilole na gor ke bi pii.

<sup>7</sup> Le Uwumbor aatuun nyan yoo pii waakakaan. Waah pii waakakaan na, le ḥitaatakabili, ni mmii, ni nyan ijmal tōb ponn ni, ki nyan paacham ki lir ni kitij. Le mmii gaa kitij ligetatar, ni isui mu ligetatar, ni timoson mɔmɔk.

<sup>8</sup> Le Uwumbor aatuun leler mu pii waakakaan. Le bi di tiwan ni naahn li-jool li gaal mmii na mee lii nnyusakpem ponn ni. Le nnyun ngbaan ligetatar kpalm nsin. <sup>9</sup> Le tiwan nimok bi nnyun ligetatar ngbaan ponn ni na kpo. ḥej ligetatar mu bii a.

<sup>10</sup> Le Uwumbor aatuun tatar mu pii waakakaan. Le lijmabisakpeln li gaal mmii ke limɔfifil na nyan ni paacham ki lir ijmoɔ ligetatar ponn ni, ni inyun bun ligetatar ponn ni. <sup>11</sup> Lijmabil ngbaan aayimbil le ye ke “Ni To.” Le laah lir nnyun ni na mu aagetatar kpalm nnyun mu to na. Le binib pam kpo nnyun ngbaan pu; ba pu? mu to la.

<sup>12</sup> Le Uwumbor aatuun nanar mu pii waakakaan. Le nwiin ligetatar chuu gii ki bɔln. Ujmal ligetatar, ni ijmabi ligetatar mu chuu gii ki bɔln. Le nwiin ligetatar aa wiin. Kinyeek ligetatar mu aa wiin.

<sup>13</sup> Le m kan libɔrwiin laani paacham, ki ḥun li teen mpɔɔn pu ke, “Uwumbor aatuuntiib bitaa bi gur kaa kee pii baakakaan na yaa pii kan, tibɔbir sakpenn ga lir dulnyaa aanib pu.”

**9** Le Uwumbor aatuun ijmuymur mu pii waakakaan. Le m kan lijmabil li nyan ni paacham ki lir ni kitij na. Le bi tii li libuul li nyoo kaa kpa limɔk na aasaafii. <sup>2</sup> Le li chuu lakr libuul ngbaan aajaalej. Le ijmanyuu nyan li ponn ni ki fii paacham, ki naahn mmii mu gaal

sakpen na aajmanyuu, ki bɔln nwiin timm. <sup>3</sup> Le itoon nyan ni ijmanyuu ngbaan ponn ni, ki yaa gaa dulnyaa ni. Le Uwumbor tii i mpɔɔn ke i li junni binib ke inyoohn aah junni binib pu na, <sup>4</sup> le ki tuk i ke i taa ijmo timoor, ki taa ijmo tijilaar, ki taa ijmo isui, i li junni binib bi kaa kpa Uwumbor aadaan biyigbeer pu na; <sup>5</sup> i taa ku binib ngbaan, i mɔk bi falaa ki ti saa ijmal ijmu. Falaa ngbaan wu ke unyoohn aah juu unii kan, ni wu pu na. <sup>6</sup> N-yoonn ngbaan, binib ga li ban nkun ke mu ku bi, kaan kan mu. Nkun ga san cha bi.

<sup>7</sup> Itoon ngbaan naahn itaan i gor ke i to butɔb na. Tiwan ni naahn salmaa aayikpupur na nan bi iyil pu. Inimbiil wɔb naahn binib aanimbil wɔb la. <sup>8</sup> Yaayikpir mu ti ki naahn bipiib aayikpir la. Yaanyin mu naahn ichinn aanyin la. <sup>9</sup> Tiwan nibaa bii ibiŋ pu ki naahn tikur la. Yaafeen kpa kifuuk ke itaan ni tɔroku i san cha i ti to butɔb na aah kpa kifuuk pu na. <sup>10</sup> Yaajuu mu naahn inyoohn aajuu la. Inyoohn-piin bi yaajuu pu, ki kpa mpɔɔn ke i mɔk binib falaa ki ti saa ijmal ijmu. <sup>11</sup> Libuul li kaa kpa limɔk na aatuun le ye yaabɔr. Hiibru<sup>1</sup> aaliin ponn ni, bi yin u ke Abadonn. Griik aaliin ponn ni, bi yin u ke Apolionn. Naataata le ye ke “U kulni binib na.”

<sup>12</sup> Njan aabɔbir ma jer a. Tibɔbir tilee mu choo.

<sup>13</sup> Le Uwumbor aatuun loloob mu pii waakakaan. Le m ḥun nneel nyan ni salmaa aabimbiln li bi Uwumbor aanimbiin ni na aamɔju ijnaa chee. <sup>14</sup> Le nneel ngbaan tuk Uwumbor aatuun loloob u joo kakaan na ke, “Chuu gbiln Uwumbor aatuuntiib binaa bi bi limɔɔsakpeln li bi yin li ke Yufrates na chee lii.” <sup>15</sup> Le u chuu gbiln Uwumbor aatuuntiib binaa ngbaan lii. Uwumbor le gor bi, ki siin bi

<sup>1</sup>9:11 : Hiibru aaliin ye Juu yaab aaliin la.

libiln, ni uŋmal, ni nwiin, ni kikurk ki bi ga di ku binib ligetatar na.<sup>16</sup> Bi nan kpa butəb aajab bi dik itaan pu na. Le m ŋun baakahm aah ye pu na. Bi nan ye butəb aajab ŋichur ŋichur ikui ilee.<sup>17</sup> Tidaŋ ponn ni le m nan kan itaan ngbaan ni binib bi dik i pu na. Tikur aawan nibaa bii bibiŋ pu ki man ke mmii na, ki bɔn ke nsiin na, ki man ke chirbil na. Itaan ngbaan aayil naahn ichinn aayil la. Mmii, ni ijmanyuu, ni chirbil nyan ni imoŋ ni.<sup>18</sup> Tiwan nitaa ngbaan, mmii, ni ijmanyuu, ni chirbil ni nan nyan ni itaan ngbaan aamɔi ni na le ku linigetekr tatar;<sup>19</sup> ba pu? itaan ngbaan aapɔɔn le bi yaamɔi ni, ni yaajuu ni. Yaajuu ngbaan naahn iwaa le ki kpa ŋiyil ki mɔk binib falaa.

<sup>20</sup> Binib bi gur kaa kpo iween ngbaan pu na aa kpeln baabimbin, kaa di cha baah ŋjani ŋjwaa ŋi na. Bi beenin dooni tininkpiwanbir, ni ŋjwaa ŋi bi nan di salmaa, ni tikunabr, ni tikur, ni ŋitakpal, ni idɔ naan ŋi na, ŋjwaa ŋi kaa waa, ki mu aa ŋun tibɔr, ki mu aa ŋmaa chuun na.<sup>21</sup> Binib ngbaan beenin ku binib, ki ji inyɔk, ki gɔr kidagook, ki su kinaayuk, kaa kpeln baabimbin.

### Uwumbor aatuun ni kigbaŋ waatiir na

**10** Le m kan Uwumbor aatuun mpoɔndaan uken nyan ni paacham. U pee kitaalangbaŋ, le waakpimanja mu lur goln uyil. Unimbil wɔb naahn nwiin la. Uttaa mu naahn kimiigaak.<sup>2</sup> U joo kigbaŋ waatiir ki kpar na ujaal ni. Le u di utaagiil taa nnyusakpem pu, le ki di utaagal mu taa kitij pu,<sup>3</sup> le ki teen mpoɔn pu ke uchinn aah tar pu na. Waah teen kina na, le utaal mu teen nfum mulole.<sup>4</sup> Utaal aah teen nfum mulole na, le m ban m ŋmee waah len pu na kigbaŋ ni. Le m ŋun nneel len Uwumbor do ke, “Taa ŋmee utaal aah len tibɔr ti na, ki taa kpiir ti.”

<sup>5</sup> Uwumbor aatuun u m kan u si nnyusakpem, ni kitij pu na le yoor uŋjangii paacham<sup>6</sup> ki puu Uwumbor u bi n-yoonn mu kaa kpa ndoon na, ki nan naan paacham ni tiwan nimɔk bi ni ponn ni na, ni kitij ni tiwan nimɔk bi kitij pu na, ni nnyusakpem, ni tiwan nimɔk bi mu ponn ni na, ke Uwumbor aan ki taan.<sup>7</sup> Buyoonn Uwumbor aatuun lolole ga pii waakakaan na, n-yoonn ngbaan le Uwumbor ga tun waatunyaan li bɔr na ki doo, waah nan tuk waabɔnabr bi ye waatutum na ke u ga tun pu na.

<sup>8</sup> Nneel mu m ŋun paacham na ki len m chee ki bui mi ke m li cha ti gaa kigbaŋ ki kpar ki bi Uwumbor aatuun u si nnyusakpem, ni kitij pu na aajaal ni na.

<sup>9</sup> Le m buen Uwumbor aatuun ngbaan chee, le ki ti bui u ke u tii mi kigbaŋ waatiir ngbaan. Le u bui mi ke, “Gaa ki ŋmɔ. Ni ga li mɔ aamɔb ni ke tisiir na la, ki tee ga li to aaponn ni.”

<sup>10</sup> Le m gaa kigbaŋ waatiir ngbaan ujaal ni, ki ŋman ki. Maah ŋman ki na, le ni mɔ mmɔb ni ke tisiir na. Le maah di nab na, ni to mpenn ni.<sup>11</sup> Le bi bui mi, “See aa ki tuk ŋitimbol mɔmɔk aanib bi bi dulnyaa wee ni ki len iliiŋ imɔk bi dulnyaa wee ni na, ni baabɔrb, tibɔr ti ga ŋa bi n-yoonn mu choo na.”

### Seeraadam bilee na

**11** Le bi tii mi tiwaŋjaŋkaan ni naahn lidabil na, le nneel bui ke, “Li cha ti ŋaŋ Uwumbor Aadiik, ni kitork aabimbin, ki lik naafɔɔk, ki kahn binib bi dooni Uwumbor nima chee na.<sup>2</sup> Taa ŋaŋ kikaakpaak ki bi lipaal na aafɔɔk; ba pu? Uwumbor di kikaakpaak ngbaan tii binib bi kaa ye Juu yaab na la. Le bi ga bii Uwumbor aatinyaan ki ti saa inyɔl imonko ilee ni ilee.<sup>3</sup> Le m ga tun ni maaseeraadam bilee bi nan moon Uwumbor aabɔr ki ti saa iwiin lichur ni ikui ilee ni imonko itaa, ki ga li pee tiwanpeenkaan ni saak kuub na.”

<sup>4</sup> Biseeraadam bilee ngbaan ye nkpan aasui ilee ni karyaa tiib aah tɔ̄nji tiwan ni pu na bilee bi si dulnyaa Aadindaan aanimbiin ni na. <sup>5</sup> Unii ubaa yaa ban u ḥa bi nibaa kan, mmii ga nyan bimɔ̄i ni ki ku baadim. Unii ubaa yaa ban u ḥa bi nibaa kan, see bi ku u kina. <sup>6</sup> Biseeraadam bilee ngbaan nan kpa mpɔ̄ɔn bi kiir uteaal u taa nu buyoonn bi bi mooni Uwumbɔ̄r aabɔ̄r na, ki kpa mpɔ̄ɔn ki cha nnyun kpalm nsin, ki kpa mpɔ̄ɔn ki cha falaa aabɔ̄j mɔ̄mɔ̄k lir dulnyaa wee ni, n-yoonn mumɔ̄k bi gee na.

<sup>7</sup> Bi yaa moon Uwumbɔ̄r aabɔ̄r doo kan, le upfeel u nyan ni kinimbɔ̄j chee, libuul li kaa kpa limɔ̄k na ni na, ga to bi butɔ̄b ki nyaj bi, ki ku bi. <sup>8</sup> Le ḥjinikpol ngbaan ga li dɔ̄ kitisakpen na aasan ni. Uwumbɔ̄r yin kitij ngbaan ke Sodom, ki ki yin ki ke Ijipt. Bi nan kpaan Tidindaan ndɔ̄puinkoo pu nima la. <sup>9</sup> Le ḥjitimbol mɔ̄mɔ̄k aanib bi bi dulnyaa wee ni ki len iliin imɔ̄k bi dulnyaa wee ni na, bi ponn ni bibaa ga lik ḥjinikpol ngbaan ki ti saa iwiin itaa ni ligeln, kaan kii ke unii ubaa ti sub bi. <sup>10</sup> Baakun pu le dulnyaa aanib ga li kpa mpopiin sakpen, ki waa liwaal, ki tii tɔ̄b ipiin; ba pu? Uwumbɔ̄r aabɔ̄nabr bilee bi ḥa bi falaa na kpo a. <sup>11</sup> Iwiin itaa ni ligeln ngbaan aah jer na, le Uwumbɔ̄r ki tii bi limɔ̄fal. Le bi fii sil. Le binib bimɔ̄k kan bi na san ijawaan sakpen. <sup>12</sup> Le ḥjinikpol ḥi fikr na ḥun nneel sakpiin nyan ni paacham ki bui bi, “Dan paacham do man.” Le bi koo ntaalangbam ni ki buen paacham. Baadim mu kan baah buen pu na. <sup>13</sup> N-yoonn ngbaan le kitij deŋ pam. Le kitisakpen ngbaan aadir ligeln kipiik lir kitij. Kitij aah deŋ pu na le ni ku binib ḥichur ḥilole. Binib bi gur kaa kpo na, ijawaan chuu bi sakpen, le bi nyuŋ Uwumbɔ̄r u bi paacham na.

<sup>14</sup> Tibɔ̄bir leler jer a. Tibɔ̄bir tatar mu choo mala.

### Kakaan tiib bilole na

<sup>15</sup> Le Uwumbɔ̄r aatuun lolole mu pii waakakaan. Le ineel sakpiin len Uwumbɔ̄r do ke, “Dulnyaa wee ni aanaan mɔ̄mɔ̄k kpalm Tidindaan Uwumbɔ̄r ni Waabo Kristo<sup>§</sup> aanaan la. U ga li joo mu n-yoonn mu kaa kpa ndoon na.”

<sup>16</sup> Le bininkpiib moninko ni binaa bi ka baabɔ̄rjal pu, Uwumbɔ̄r aanimbiin ni na, doon ḥichichik ki di binimbil kpaan kitij ki dooni Uwumbɔ̄r, <sup>17</sup> ki len ke, “Tidindaan Uwumbɔ̄r, u yeh mpɔ̄ɔn mɔ̄mɔ̄k,

ki nan bi, ki beenin bi na, ti dooni si; ba pu? aa di saapɔ̄ɔn sakpiin ki joo dulnyaa wee.

<sup>18</sup> ḥjinibol aanib nan gee lijuul, le saajuul mu fii, le ni ḥjeer aa ji bitekpiib tibɔ̄r, ki ḥjeer aa di ipiin tii saabɔ̄nabiib bi ye saatutum na, ni saanib bi mɔ̄mɔ̄k pak si na, bi ye biwaatiib na, ni bi ye bisakpem na, ki ḥjeer aa kuln binib bi ku dulnyaa aanib na.”

<sup>19</sup> To, le bi chuu piir Uwumbɔ̄r aadiik ki bi paacham na. Le m kan Uwumbɔ̄r aakaal aadakaa si waadiik ponn ni. Le uteaal moor, le kifuuk faa, le uteaal tar, le kitij deŋ, le uteaal nu ḥitaatakpabil sakpiin.

### Upii na, ni kipeewaniib na

**12** To, le m kan lijniir aawan paacham. Upii ubaa nan bi ki pee nwiin. Le ujmal mu nan bi utaa aataab. Ijmbabi kipiik ni ilee mu nan bi uyil pu. U nan kpa lipuul, <sup>2</sup> le imalween chuu u, le u wii ki ban u maa ubo.

<sup>§11:15</sup> : Hiibru aaliin ni, bi yin Kristo ke Masiya. Naatataa le ye ke Uwumbɔ̄r nyan u ke u gaa binib lii.

<sup>3</sup> Le m ki kan lijinjiir aawan niken paacham. M nan kan kipeewanbiik sakpen mamaaj ki kpa ɻiyil ɻilole ni iyin kipiik, ki chik ubɔr aayikpupur tilole na. <sup>4</sup> Le kipeewanbiik ngbaan di kijuul kuun foor ni ijmabi ligetatar, ki di lii ni kitij, ki dan nan sil upii u ban u maa ubo na aanimbiin ni ke ki ɻymo waabo.

<sup>5</sup> Le upii ngbaan ma ubijabo u ga li joo ɻinibol momɔk mpɔɔn pu na. Le Uwumbɔr yoor ubo ngbaan di buen ubaa chee paacham, waabɔrjal chee. <sup>6</sup> Le upii ngbaan san buen nteersakpiin ni, Uwumbɔr aah toor mpaan nin chee tii u na, ki ti kpiini u nima chee iwiin lichur ni ikui ilee ni imonko itaa.

<sup>7</sup> Tɔ, le bi to butɔb paacham. Uwumbɔr aatuuntiib aaninkpel Maikel ni waatuuntiib to kipeewanbiik ngbaan ni waatuuntiib butɔb, <sup>8-9</sup> le ki nyaj bi, ki nyan bi paacham. Baa ki kan mpaan paacham. Kipeewanbiik ngbaan ye kinimbɔŋ la. Bi yin ki ke Uwaa u Yunn na, ki ki yin ki ke Defil, <sup>\*\*</sup> ki ki yin ki ke Sintana. Kima le ɻymanni dulnyaa aanib mɔmɔk. Bi nyan ki ni kaatuuntiib paacham, ki di lii ni kitij.

<sup>10</sup> Le m jun nneel sakpii len mpɔɔn pu paacham ke, “Dandana wee ti kan timi Aawumbɔr aah kpa mpɔɔn pu ki gaa waanib lii ki joo waanaan ni aanib na. Dandana ti kan Kristo u gaa timi lii na aah kpa yiko pu na. Ba pu? u nyan kinimbɔŋ paacham. Kinimbɔŋ ye unibiniu u nan si Uwumbɔr aanimbiin ni ki bii Uwumbɔr aanib nwiin pu ni kinyeek na la. <sup>11</sup> Upihbo Yesu aasin aapɔɔn pu ni waabɔr aapɔɔn pu le bi nyaj kinimbɔŋ. Bi gee Yesu ki jer baamɔfal, ki kii ke bi kpo u pu. <sup>12</sup> Nimi bi bi Uwumbɔr do na, li kpa mpopiin man; ba pu? kinimbɔŋ aa ki kpa mpɔɔn. Tɔ, tibɔbir mu ga lir kitij aanib pu, ni nnyusakpem ni aanib pu; ba pu? kinimbɔŋ sunn ni bi chee, ki gee

linjuusakpeln; ba pu? ki bee ke kaayoonn aa ki wiir.”

<sup>13</sup> Kipeewanbiik ngbaan aah kan ke bi nyan u paacham ki di lii ni kitij na, le u san dii upii u ma ubijabo na, ke u chuu u. <sup>14</sup> Le Uwumbɔr tii upii ngbaan libɔrwiin aafeen ilee ke u fii buen nteersakpiin ni, waapaan ni, kipeewanbiik ngbaan taa ki pii u nima chee. Le bi ti kpiini u nima chee ki ti saa ɻibin jitaa ni ligeln. <sup>15</sup> Le kipeewanbiik ngbaan tii nnyun sakpem umɔb ni ke limɔɔl na ki lii, ke mu di upii ngbaan puu buen. <sup>16</sup> Le kitij ter upii ngbaan, ki waar kimɔb ki di nnyun mu nyan kipeewanbiik ngbaan aamɔb ni na nab, le mu aa ki pii upii ngbaan. <sup>17</sup> Le kipeewanbiik ngbaan gee lijuul sakpen upii ngbaan pu, ki buen ti to waabim biken butɔb. Waabim le ye binib bi kii Uwumbɔr aamɔb ki tuk binib Yesu aabonyaan na. <sup>18</sup> Le kipeewanbiik ngbaan sil nnyusakpem aagbaan.

### Ipeel ilee na

**13** Le m kan upeel nyan ni nnyusakpem ponn ni. U nan kpa ɻiyil ɻilole ni iyin kipiik, le ki chik ubɔr aayikpupur waayiin kipiik mɔmɔk pu. Le liyimbil li ye lisiibil ki tii Uwumbɔr na nan bi ɻiyil mɔmɔk pu. <sup>2</sup> Upeel ngbaan nan naahn unaamuun la. Utaafar pɔɔ sakpen. Umɔb mu naahn uchinn aamɔb. Kipeewanbiik ngbaan le di waapɔɔn, ni waanaan, ni waapɔɔn sakpiin tii u. <sup>3</sup> Libuel nan bi uyil libaa pu ki naahn ke laah kpo ki sɔŋ le na. Laah sɔŋ na, le ni gar dulnyaa aanib mɔmɔk pam. Le bi dii u, <sup>4</sup> ki gbaan kitij ki doon kipeewanbiik ngbaan; ba pu? u nan di waapɔɔn tii upeel ngbaan. Bi nan gbaan kitij ki doon upeel ngbaan mu, le ki baa ke, “ɻjma bi ke upeel wee na? ɻjma ga ɻymaa to u butɔb?”

<sup>\*\*</sup>12:8-9 : Defil ni Sintana ye kinimbɔŋ aayimbil ɻijken la.

<sup>5</sup> U nan kpa nsan ke u li kpa kipupuk ki sii Uwumbor, ki kpa nsan ke u li bi injmal imonko ilee ni ilee. <sup>6</sup> Le u waarr uməb ki sii Uwumbor, ni Uwumbor aayimbil, ni Uwumbor do, ni bimək bi Uwumbor do na, <sup>7</sup> ki kpa nsan ke u to Uwumbor aanib butjəb ki nyaŋ bi. Le Uwumbor tii u tininkpir u li joo ɿitimbol məmək aanib bi bi dulnyaa wee ni ki len ilin imək bi dulnyaa wee ni na. <sup>8</sup> Le dulnyaa ni aanib bimək aayimbil aa ɻmee Uwumbor Aapihbo u bi nan ku u na aamɔfal aagbas ni buyoonn Uwumbor aa nan kee naan dulnyaa wee na ga dii upeel ngbaan.

<sup>9</sup> “U kpa litafal na kan, u ɻjun. <sup>10</sup> Binib bi Uwumbor len ke bi ga chuu bi tinaagbiir na, bima le bi ga chuu bi tinaagbiir. Unii umək joo kijaak aajuk ku binib na, kijaak aajuk le ga ku u mu. Nima le cha ni ɻjan ke Uwumbor aanib li ban limɔr ke bi dii Uwumbor mbamɔm.”

<sup>11</sup> Le m kan upeel leler nyan ni kitij ni. U nan kpa iyiin ilee i naahn upihbo aayiin na, le ki len ke kipeewaniibk aah len pu na. <sup>12</sup> U nan bi ɻjan aapeel chee, ki kpa waapoɔn, ki muk dulnyaa, ni binib bimək bi dulnyaa ni na, ke bi li dii ɻjan aapeel u nan kpa nkun aabuel li sɔŋ na. <sup>13</sup> Upeel leler ngbaan nan tun lijinjiir aatun pam, ki cha mmii nyan ni paacham ki sunn ni kitij, binib aanimbni, <sup>14</sup> ki ɻmann binib bimək bi dulnyaa ni na; ba pu? u nan kpa nsan ke u tun lijinjiir aatun ɻjan aapeel aanimbni ni, ki tuk dulnyaa ni aanib ke bi ja liwaal li naahn upeel u nan kpa kijuk aabuel li sɔŋ na. <sup>15</sup> Upeel leler ngbaan nan kpa nsan ke u cha liwaal ngbaan fuur libuln ki len tibɔr, le ki cha bi ku binib bimək kaa dii liwaal ngbaan na, <sup>16</sup> ki cha bi daan binib məmək bijangii pu, bee biyigbeer pu. U nan cha bi daan biwaatiib, ni bisakpem, ni biwankpadam, ni bigiim, ni binaagiib, ni bimalb. <sup>17</sup> Kidaan ngbaan le ye upeel ngbaan aayimbil, bee waayimbil aanamba. Unii u kaa kpa kidaan ngbaan

na, baa nan cha u daa tiwan nibaa, kaa cha u kooh tiwan nibaa mu.

<sup>18</sup> Tibor timina ban nlan la. Unii u kpa nlan na ga ɻjmaa bee upeel ngbaan aanamba aatataa. Ni ye unibon aanamba la. Waanamba ye ikui iloob ni imonko itaa ni niloob.

### Upihbo na, ni waanib

**14** Tɔ, le m kan Upihbo na si Sionn aajool paab. Binib ɻichur nkub ni imonko ilee ni ɻjinaa nan bi u chee, le waayimbil ni Ute Uwumbor aayimbil nan ɻmee paa biyigbeer pu. <sup>2</sup> Le m ɻjun binib gaa ilahn paacham. Ni nan fuuk ke bunyɔb aanyun aah fuuk pu na, ki fuuk ke uteal aah teen mpɔɔn pu pu na, ki naahn binib aah gbaa tibar aan ti wii pu na. <sup>3</sup> Binib ngbaan bi Uwumbor aabɔrjal, ni tiwanfuurkaan ninaa, ni bininkpiib na aanimbiin ni, ki gaa ilahnrɔɔn. Ubaa aan ɻmaa bae nlahn ngbaan see binib ɻichur nkub ni imonko ilee ni ɻjinaa bi Uwumbor daa bi ki ɻjan bi dulnyaa wee ni na. <sup>4</sup> Bima le ye binib bi kaa doon bipiib chee kaa ja bibaa tijɔŋ. Baa nyi bipiib. Bima le dii Upihbo ngbaan waah cha nin chee na mɔmɔk. Uwumbor ɻyan bi binib ponn ni ki daa bi, bi li ye u ni Upihbo ngbaan aanib. <sup>5</sup> Nnyamɔn mubaa aa bi bimɔi ni. Baa kpa taani ubaa.

### Uwumbor aatuun tiib bitaa na

<sup>6</sup> Le m kan Uwumbor aatuun uken laani paacham, ki joo ni tibɔnyaan ti bi n-yoonn mu kaa kpa ndoon na, ki ti di ti tuk ɿitimbol məmək aanib bi bi dulnyaa wee ni ki len ilin imək bi dulnyaa wee ni na. <sup>7</sup> Le Uwumbor aatuun ngbaan len mpɔɔn pu ke, “Ni li san Uwumbor, ki nyaŋ u man; ba pu? ni ɻneer u ji binib tibɔr. Ni li pak Uwumbor u nan naan paacham, ni kitij, ni nnyusakpem, ni nnyun mɔmɔk na.”

<sup>8</sup> Uwumbor aatuun leler nan paan ni ɻjan yoo na aapuwɔb ki len ke, “Kiti-

sakpeŋ Babiloŋ lir a. Kitij ngbaan le nan cha ɻinibol mɔmɔk aanib nyu ndapɔm gbii. Ndaan ngbaan le ye waadagook aakpeek. Nima le ki lir a.”

<sup>9</sup> Uwumbor aatuun tatar nan paan ni uleler na aapuwɔb ki len mpɔɔn pu ke, “Binib bimɔk dii upeel ngbaan, ni liwaal li naahn u na, ki gaa waadaan biyigbeer pu, bee bijaal pu na, <sup>10</sup> ga nyu ndaan mu ye Uwumbor aajuul, le u kpir ɻa kiyikuuk ni, kaa di nnyun kpee mu pu. Nima le mɔk waanjuul sakpen, le bi ga li bi waatuuntiib bi bi chain na, ni Upihbo ngbaan aanimbiin ni, ki ga ji falaa sakpen mmii ni chirbil ponn ni. <sup>11</sup> Ijmanyuu nyan ni mmii ngbaan ni ki fii paacham n-yoonn mu kaa kpa ndoon na. Binib bi dii upeel ngbaan, ni liwaal li naahn u na, ki gaa waadaan ki ye waayimbil na, ga ji falaa mmii ngbaan ponn ni, kaan fuur nwiin pu, kaan fuur kinyeek mu.”

<sup>12</sup> Nima le cha ni ɻjan ke Uwumbor aanib bi kii waamɔb ki dii Yesu mbamɔm na li kpa limɔr.

<sup>13</sup> Le m ɻjun nneel len paacham ke, “ɻjmee ke: Bitekpiib bi nan dii Tidindaan na, waanyoor bi bi pu dandana wee ki joo cha.”

Le Uwumbor Aafuur Nyaan kii ke, “Ni ye mbamɔm; ba pu? bi nan tun litunyaan linimaln. Baah kpo na, le bi fuur. Baah tun pu na mu dii bi.”

### Dulnyaa aajikaacheel

<sup>14</sup> Le m kan ntaalangbapim. Ubaa ka mu pu ki naahn unii, ki chik salmaa aayikpupuk, ki joo gɔrk u ka na uŋaal ni.<sup>††</sup> <sup>15</sup> Le Uwumbor aatuun uken nyan ni Uwumbor Aadichal ni, ki len mpɔɔn pu ki tuk u ka ntaalangbam pu na ke, “Di saagɔrk chee tijikaar; ba pu? ni neer lijikaacheel. Dulnyaa aajikaar biir a.”

<sup>16</sup> Le u ka ntaalangbam pu na di waagɔrk chee dulnyaa aajikaar.

<sup>17</sup> Le Uwumbor aatuun uken nyan ni Uwumbor Aadichal li bi paacham na ni. U mu nan joo gɔrk u ka na.

<sup>18</sup> Le Uwumbor aatuun uken nyan ni kitorkaabimbiiln chee. Uma le ye mmii aayidaan. Le u teen mpɔɔn pu ki tuk Uwumbor aatuun u joo gɔrk u ka na ke, “Di saagɔrk u ka na ker ndaan aasubil ɻji bi dulnyaa ni na; ba pu? ɻjisubil ngbaan puir a.” <sup>19</sup> Le Uwumbor aatuun ngbaan di waagɔrk ker dulnyaa aasubil ngbaan, ki di ɻja libuusakpelni ponni bi ɻjmaani ɻjisubil ki nyani ɻaanyun na. Nima le mɔk Uwumbor aah ga bii binib bi kaa dii u na pu na. <sup>20</sup> Le bi taa ɻjisubil ngbaan pu libuusakpelni ngbaan ponni, kitij aagbaan, ki nyani ɻaanyun. Le nsin nyan libuul ngbaan ni, ki wiir aan utaan yaa sil mu ponni kan, u ga ɻjmaa liin na, ki puu ti saa mal ikui ilee aafɔfɔk aah bi pu na.

### Gbelngbeln aafalaa na

**15** M nan ki kan lijinjiir aawan nikeng paacham. Ni nan ye tiwankpaan, le ki gar mi pam. M nan kan Uwumbor aatuuntiib bilole bi joo ni falaa bilole na. Falaa ngbaan ga li ye gbelngbeln aafalaa la; ba pu? falaa ngbaan aapuwɔb Uwumbor aajuul ga sɔŋ.

<sup>2</sup> Le m kan tiwan ni naahn nnyusakpem mu mmii ɻjmal mu ponni na, le mu wiin chain ke kinimbilik na. Le m kan binib bi nyaj, kaa dii upeel ngbaan, ni liwaal li naahn u na, kaa gaa waadaan ki ye waayimbil aanamba na; bi ka nnyusakpem mu wiin chain ke kinimbilik na chee, ki joo tibar ti Uwumbor tii bi na, <sup>3</sup> ki gaa ilahn i ye Upihbo ngbaan ni Uwumbor aatutunn Moses aalahna ke,

<sup>††</sup>14:14 : Lik Daniel 7.13.

"Tidindaan Uwumbor u yeh mpcoen mɔmɔk na, saatuln ye litukpaan ki gar binib pam. Saasan ye nsanyaan, ki mu ye nsan bamɔn.

Si le ye Ubɔr n-yoonn mu kaa kpa ndoon na.

<sup>4</sup> Tidindaan, ɔma bi, kaan san si ki nyuŋ si?

Si baanja le ye chain.

ɔjinibol mɔmɔk ga dan ki nan gbaan aanimbiin ni ki doon si; ba pu? binib mɔmɔk kan saatunyaan."

<sup>5</sup> Nimina aapuwɔb le m kan ke bi nan chuu piir Uwumbor Aapepel li bi chain chain na aan li bi waabool ponn ni paacham na, <sup>6</sup>le Uwumbor aatuuntiib bilole bi joo ni falaa bilole na nyan ni li ponn ni, ki pee ɔikekepiin ɔj bi chain na, ki buu salmaa aagbapapann bibiŋ pu. <sup>7</sup> Le tiwanfurkaan ninaa ponn ni nibaa di salmaa aasambil ɔjilole tii Uwumbor aatuuntiib bilole ngbaan. Uwumbor u bi n-yoonn mu kaa kpa ndoon na aaruul aah fii pu na le gbii ɔjisambil ngbaan. <sup>8</sup> Le Uwumbor aanyuŋ ni waapɔen cha injmanyuu gbiin waadichal. Ubaa aa ɔmaa koo lidichal ngbaan ni ki nan saa buyoonn falaa bilole bi Uwumbor aatuuntiib bilole joo ni bi na ga pii dulnyaa ni aanib ki doo na.

### Uwumbor aaruul aasambil

**16** Le m ɔjun nneel sakpii nyan ni Uwumbor Aadichal ni, ki tuk Uwumbor aatuuntiib bilole ngbaan ke, "Li cha ti di falaa u bi ɔjisambil ɔjilole ni na kpir dulnyaa ni; ba pu? Uwumbor gee lijuul bi pu."

<sup>2</sup> Le Uwumbor aatuun ubaa buen ki ti di falaa u bi waasambil ni na kpir dulnyaa ni. Le ni ɔja ibuun i wu sakpen na ki baan binib bi kpa upfeel ngbaan aadaan ki dii waawaal na pu.

<sup>3</sup> Le Uwumbor aatuun leler mu di falaa u bi waasambil ni na kpir nnyusakpem

ponn ni. Le nnyusakpem ngbaan aanyun kpalm nsin ke linikpol aasin na. Le tiwan nimɔk bi nnyusakpem ponn ni na kpo.

<sup>4</sup> Le Uwumbor aatuun tatar mu di falaa u bi waasambil ni na kpir ɔjimɔc ni, ni inyunbun ni. Le nnyun ngbaan kpalm nsin. <sup>5</sup> Le m ɔjun Uwumbor aatuun u ye nnyun aayidaan na len ke, "Uwumbor u ye chain daan, ki nan bi, ki beenin bi na, saah daa binib ngbaan aatafal kina na, aa ɔja ni ɔjan; <sup>6</sup> ba pu? bi ku saanib ni saabɔnabiib ki cha baasin nyan, le aa mu cha baanyun kpalm nsin bi nyu. Bi ɔneer kina la." <sup>7</sup> Le m ɔjun nneel nyan ni kitork aabimbiln ni ki len ke, "Tidindaan Uwumbor, u yeh mpcoen mɔmɔk na, ni ye mbamɔn, aa jin binib tibɔr mbamɔm ki ɔja bi naah ɔneer bi pu na."

<sup>8</sup> Le Uwumbor aatuun nanar mu di falaa u bi waasambil ni na kpir nwiin pu. Le Uwumbor cha mu seer binib ke mmii aah seer pu na. <sup>9</sup> Le ntoton sakpen seer binib. Le bi sii Uwumbor u kpa mpcoen ki cha bi ji falaa kina na. Baa kpeln baabimbin, kaa nyuŋ u.

<sup>10</sup> Le Uwumbor aatuun ɔmuŋmur mu di falaa u bi waasambil ni na kpir upfeel ngbaan aabɔrjal pu. Le waanaan bɔln. Le binib junni bilambil iween pu. <sup>11</sup> Iween ngbaan pu, ni ibuun ngbaan pu, le bi seei Uwumbor u bi paacham na, kaa kpeln baabimbin, kaa di cha baatunwanbir.

<sup>12</sup> Le Uwumbor aatuun loloob mu di falaa u bi waasambil ni na kpir limɔcsakpeln li bi yin li ke Yufrates na ni. Le laanyun foor, ki ɔja nsan ki tii bibɔrb bi nyan ni liwipuul wɔb na. <sup>13</sup> Le m kan tiyayaar ti naahn titateeraakpann na titaa nyan ni kipeewaniik, ni upfeel ngbaan, ni waabɔnabr u ɔmanni binib na aamɔi ni la. <sup>14</sup> Tiyayaar ngbaan ye kinimbɔŋ yaan la, le ki tun lijinjiir aatun, ki buen dulnyaa wee ni aabɔrb mɔmɔk chee, ki ti kuun bi, ke bi to butɔb, Uwumbor u yeh mpcoen mɔmɔk na aawiinsakpii daal.

15-16 Tiyayaar ngbaan nan kuun bi lipepel libaa wob. Hiibru<sup>\*\*</sup> aaliin ponn ni bi yin nima chee ke Amagedonn. Le Yesu bui ke, “Li pel man, m ga dan ke unaayuk aah choo pu na la. Uwumbor aanyoor bi binib bi si kii bundaln m ga nan fuu ni na, ki lik baawanpeenkaan ke bi taa chuun bijmeen, ki taa ji inimoon.”

17 Le Uwumbor aatuun lolole mu di falaa u bi waasambil ni na kpir libuln pu. Le nneel sakpiin nyan ni Uwumbor aaborjal li bi waadichal ni na, ki len ke, “Ni ja doo a.” 18 Le uteal moor, kifuuq mu faa, le uteal teen, le kitij dej sakpen ki ti nyaq. Uwumbor aah nan naan binib buyoonn na, kitij aa nan dej sakpen ke kaah dej n-yoonn ngbaan sakpen pu na. 19 Le kitisakpej ngbaan aadir momok yakr nfum mutaa ki lir kitij. Ijinibol momok aatim mu lir kitij a; ba pu? Uwumbor aa suln kitisakpej Babilon ngbaan aanib aatunwanbir bor, ki tii bi kiyikuuk ki gbii ndaan mu ye waajuuq sakpen na, ki cha bi nyu. 20 Le ejidik momok muin nnyun ni kaa ki bi, ejijoo momok mu lir. 21 Le uteal nun ejataatakpbil sakpiin, ki lir binib pu. Iji momok nan nyuun ke njikaabim bota aah nyuun pu na. Le binib sii Uwumbor ejataatakpbil ngbaan aaborir pu; ni nan ja bi falaa pam.

### Upiidagookpaan na aabor

**17** Le Uwumbor aatuuntiib bilole bi joo ejisambil ejilole ngbaan na ubaa dan ki nan len m chee ki bui mi ke, “Dan do, aan m nan mok si Uwumbor aah ga daa upiidagookpaan u bi nnyunkpaan chee na aatafal pu na. 2 Dulnyaa aaborb gor chaa upiidagoor ngbaan chee. Dulnyaa aanib mu gor chaa u chee ki nyu waadagoor aadaan ki gbii.”

3 Le Uwumbor Aafuur Nyaan fir m pu, le waatuun ngbaan yoor mi ki di buen

nteersakpiin ni. Le m ti kan upii ubaa dik upeel u man na pu. Ejyimbil ji seei Uwumbor na nan bi upeel ngbaan aawon momok pu. U nan kpa ejiyil ejilole ni iyiin kipiik. 4 Upii ngbaan nan pee tiwanpeenkaan nyaan, nibaa chee man, nikken chee mu bon ke nsiin na, ki pee nleen mu jan ki kpa kidaak na uneen ni. Waawanpeenkaan pu nan ye salmaa ni ejitakpabinyaan ji kpa kidaak na. U nan joo salmaa aasambil ujaal ni. Tiwan ni kaa jan, ki ye waadagook aawan, ki kpa tijon na nan gbii waasambil ngbaan ni. 5 Liyimbil li aatataa bco na nan ejmee paa uyigbeer pu. Liyimbil ngbaan le ye ke, “Kitisakpej Babilon ki ye bipiidagoob ni bininsum momok aana na.” 6 Le m kan upii ngbaan gbii ndaan ki d; ba pu? u nyun Uwumbor aanib aasin, ni binib bi kpo Yesu pu na aasin ki gbii.

Maah kan u na, le ni gar mi pam. 7 Le Uwumbor aatuun ngbaan baa mi ke, “Ba pu ni gar si? M ga kpiir upii ngbaan aabor, ni waah dik upeel u pu na aabor aatataa, ki tuk si. 8 Upeel u kpa ejiyil ejilole ni iyiin kipiik aan aa kan u na, u nan bi, kaa ki bi. Ni yaa kpee siib kan, u ga nyan ni libuul li nyoo kaa kpa limok na ni, ki cha nin chee bi ga kuln u. Le dulnyaa ni aanib bi aayimbil aa ejmee limofal aagbaj ni buyoonn Uwumbor aa nan kee naan dulnyaa wee na, yaa kan upeel ngbaan kan, ni ga gar bi pam; ba pu? u nan bi, kaa ki bi, ki ga ki gir ni.

9 “Unii umok kpa nlan na, u dakl lik ki bee nimina aatataa. Upeel ngbaan aayil ejilole na jan ejijoo ejilole ji upii ngbaan ka ji pu na, ki mu jan biborb bilole. 10 Biborb bilole ngbaan ponn ni bijmu lir a, ubaa laa bi dandana wee, uken akeee fuu ni. U yaa nan fuu ni kan, waan ki yunn. 11 Upeel u nan bi, kaa ki bi na le jan ubor niniin, ki ye biborb bilole ng-

\*\*16:15-16 : Hiibru aaliin ye Juu yaab aaliin la.

baan ponn ni ubaa, ki cha nin chee bi ga kuln u na.

<sup>12</sup>“Saah kan iyiin kipiik i na, i ḥaj bibɔrb kipiik bi kaa kee ji nnaan na la. Bi ni upeel ngbaan ga kan bibɔrb aapcoo, ni yunn siib. <sup>13</sup>Bibɔrb kipiik ngbaan kpa kimɔbaan, ki di baapcoo ni baayiko tii upeel ngbaan. <sup>14</sup>Bi ga faa Uwumbɔr Aapihbo butɔb. Le Upihbo ngbaan ga nyaj bi; ba pu? u ye dindatiib mɔmɔk Aadindaan, ki ye bibɔrb mɔmɔk Aabɔrkpaan la. Binib bi dii u na le ye waah nyaj bi ki yin bi na, le bi si uchaŋ ni.”

<sup>15</sup>Le Uwumbɔr aatuun ngbaan ki bui mi ke, “Aa kan nnyunkpaan mu upiidagoor ngbaan ka mu chee na. Nnyunkpaan ngbaan ḥaj binib la. Bi ye ḥitimbol mɔmɔk aanib bi bi dulnyaa wee ni, ki len iliin imɔk bi dulnyaa wee ni na. <sup>16</sup>Saah kan iyiin kipiik i na ni upeel ngbaan ga li nan upiidagoor, ki ga yoor waawan mɔmɔk ki cha u chuun ujmeen, ki ga ji waawon ki see u mmii; <sup>17</sup>ba pu? Uwumbɔr le cha bi ban bi ḥaj waageehn, ki cha bi kpa kimɔbaan ki di baanaan tii upeel ngbaan u ji ki nan saa buyoonn Uwumbɔr aah len pu na nan ḥaj.

<sup>18</sup>“Saah kan upii u na, u ye kitisakpej ki ye dulnyaa ni aabɔrb aayidaan na la.”

### Babilɔŋ aalirn

**18** Nimina aapuwɔb, le m ki kan Uwumbɔr aatuun uken nyaj ni paacham ki sunn ni, ki kpa mpɔɔn sakpen, ki wiin chain ki woln dulnyaa wee ni, <sup>2</sup>le ki len mpɔɔn pu ke, “Kitisakpej Babilɔŋ lir a. Ki lir kookoo a. Bipɔníb, ni tiyayaar, ni tiwanbir, ni inyoon i bir ki kɔ na baanja le koo nima chee; <sup>3</sup>ba pu? ḥinibol mɔmɔk nyun ndaan mu ye kitij ngbaan aadagook aakpeek na, le dulnyaa ni aabɔrb gor chaa ki chee. Binib bi chuun tiir na nan kan tinoor sakpen ki pu; ba pu? kaanib nan ban tiwanyaan ki ti nyaj.”

<sup>4</sup>Le m ki ḥjun nneel nyan ni paacham ki len ke,

“Maanib, nyan ni kitij ngbaan aanib chee,

ki taa kpaan tun titunwanbir bi chee, ki taa ji falaa u bi ga ji u na;

<sup>5</sup>Kitij ngbaan aatunwanbir muun ki wiir ki ti fuu paacham, le Uwumbɔr aa suln kaatunwanbir.”

<sup>6</sup>U bui ke, “Teen kitij ngbaan kaah nan tii pu na. Teen ki kaah nan tun pu na mfum mulee. Gbiin kaayikuuk ndaan mu pɔɔk jer kaah tii biken na mfum mulee.

<sup>7</sup>Kitij ngbaan nan nyuŋ kibaa ki gaa tiwanyaan ki ti nyaj.

Cha ki ji falaa ki li kpa mpombiin ki ti ki saa kina;

ba pu? ki len kisui ni ke ki ye ubɔrpii, kaa ye ukpopii, kaan kan mpombiin kpala.

<sup>8</sup>Nima pu le falaa ga pii kitij ngbaan liwinbaal.

Iweenbir, ni mpombiin, ni nkɔn ga lir ki pu.

Le mmii ga gaa kitij ngbaan mɔmɔk; ba pu?

Tidindaan Uwumbɔr u dar kitafal na kpa mpɔɔn sakpen.”

<sup>9</sup>Tɔ, dulnyaa aabɔrb bi nan gor kitij ngbaan chee ki jin kaawanyaan na yaa kan mmii gaal kitij ngbaan, ki kan injmanyuu fii paacham kan, bi ga li wii ki kaani. <sup>10</sup>Kitiŋ ngbaan aafala pu bi ga li san ijawaan, ki ga li si dandar, ki len ke, “Kitisakpej Babilɔŋ ki nan kpa mpɔɔn na, tibɔbir bi ki pu. Ntafadaan pii ki liwinbaal.”

<sup>11</sup>Le binib bi chuun tiir dulnyaa ni na mu ga wii ki li kpa mpombiin kitij ngbaan pu; ba pu? ubaa aan ki daa baawan. <sup>12</sup>Ubaa aan ki daa baasalmaa, ni tikunabr, ni ḥitakpabil ḥi ḥan ki kpa kidaak na, ni ileen i kpa kidaak na, ni ḥikekenyaan, ni ḥikeken ḥi bɔn ke nsiin na, ni ḥi man na, ni ḥikpanyaan, ni iluub

aanyin aasambil, ni ido aasambil ji kpa kidaak na, ni tikur aawan, ni ɣitakpanyaan aawan,<sup>13</sup> ni tikpin aawan, ni kinimboɔ̄panj, ni tulalee, ni nkpaŋmirkoo, ni tulalee aayon mu bi joo toor kitork na, ni ndaan, ni nkpan, ni boroboro aayon, ni tijikaar, ni inaa, ni ipiih, ni itaan, ni t̄oroku tiib, ni binaagbiib, ni binib aamɔ̄fal.<sup>14</sup> Tijikaar nyaan ti kitij ngbaan aanib aanimbil nan man ti pu na, taa ki bi bi chee. Tiwanpeenkaan ni ɣjan na ni tiwanyaan mɔ̄mɔ̄k waŋ a. Baan ki kan ni.<sup>15</sup> Binib bi chuun tiir tiwan nimina kitij ngbaan ponn ni ki kan tinyoor na ga san ijawaan kitij ngbaan aafalaa pu, ki ga li si dandar ki wii, ki kpa mpombiin,<sup>16</sup> ki len ke, “Tibɔ̄bir bi kitisakpej ngbaan pu la. Kaanib nan pee ɣikekenyaan, ni ɣikeken ji bȫn ke nsiin na, ni ɣikeken ji man na, ki nan kpa salmaa ni ɣitakpabil ji ɣjan ki kpa kidaak na, ni ileen i ɣjan ki kpa kidaak na.<sup>17</sup> Liwinbaal le liwankpasakpeln ngbaan mɔ̄mɔ̄k bee yɔ̄li.”

Le biŋɔ̄dam mɔ̄mɔ̄k, ni binib bimɔ̄k koo iŋɔ̄i ni ki chuun na, ni biŋɔ̄jaab mɔ̄mɔ̄k, ni binib bimɔ̄k ji nnyusakpem aatuln ponn ni na, bi mɔ̄mɔ̄k si dandar<sup>18</sup> ki lik mmii aah gaal kitij ngbaan pu na, le ki tar ke, “Kilatiŋ ki bi ke kitisakpej ngbaan na?”<sup>19</sup> le ki faa kitangbaak ja biyil pu, ki wii ki li kpa mpombiin ki len ke, “Tibɔ̄bir bi kitisakpej ngbaan pu la. Biŋɔ̄dam bimɔ̄k chuun nnyusakpem pu na nan kan tinyoor pam; ba pu? kitij ngbaan aanib nan daa bi chee tiwan ni kpa kidaak na. Liwinbaal le kitij ngbaan mɔ̄mɔ̄k kuln a.”

<sup>20</sup>Tɔ̄, nimi bi bi paacham na, ni Uwumbɔ̄r aanib, ni Yesu aakpambalb, ni Uwumbɔ̄r aabɔ̄nabtiib, ni li kpa mpopiin kitisakpej ngbaan aah kuln pu na pu; ba pu? Uwumbɔ̄r teen ki kaah ja nimi bakaa u na, ki daa kitafal.

<sup>21</sup>Tɔ̄, le Uwumbɔ̄r aatuun mpɔ̄ondaan yoor litakpal li naahn kinaak sakpej na,

ki di mee lii nnyusakpem ponn ni, le ki bui ke, “Kina le bi ga yoor kitisakpej Babilonj ki di lii. Kaan ki li bi.<sup>22</sup> Ubbaa aan ki li ɣjun binib bi gbaa tibar na, ni binib bi gaa ilahn na, ni binib bi pii ɣiwul ni kakaan tiib na pu, kitij ngbaan ponn ni. Ututunn ubaa mu aan ki li bi ki ponn ni. Upii ubaa mu aan ki nan tijikaar ki ponn ni.<sup>23</sup> Karyaa ubaa mu aan ki li wiin ki ponn ni. Uja ubaa mu aan ki yoor upii ki ponn ni. Upii ubaa mu aan ki mɔ̄n uja ki ponn ni. Binib bi chuun tiir tiwan ki ponn ni na nan ye mpɔ̄ondam la. Kaanib nan ɣjani inyɔ̄k ki ɣmanni ɣjinibol mɔ̄mɔ̄k.”

<sup>24</sup>Uwumbɔ̄r daa kitij ngbaan aanib aatafal; ba pu? bi ku waanib, ni waabɔ̄nabtiib, ni binib bimɔ̄k kpo u pu na. Baasin bi kitij ngbaan ponn ni.

**19** Nimina aapuwɔ̄b le m ɣjun nneel mu naahn kinipaak sakpej na aaneel paacham. Bi len ke, “Haleluya, Tidindaan Uwumbɔ̄r le gaa timi lii. Uma le yeh nnyuŋ, ni mpakm, ni mpɔ̄ɔ̄n.<sup>2</sup> U jin binib tibɔ̄ mbamɔ̄m ki ja bi naah ɣeer bi pu na. U jin upiidagookpaan u nan cha dulnyaa ni aanib gɔ̄r kidagook na aabɔ̄r, ki daa utafal; ba pu? u nan ku uma Uwumbɔ̄r aatutum.”<sup>3</sup> Le kinipaak ki bi paacham na ki len ke, “Haleluya. Iŋmanyuu nyan kitij ngbaan ni ki ga fii paacham n-yoonn mu kaa kpa ndoon na.”<sup>4</sup> Le bininkpiib moninko ni binaa ngbaan, ni tiwanfuurkaan ninaa ngbaan gbaan kitij ki pak Uwumbɔ̄r u ka libɔ̄rjal pu na, ki len ke, “Amii. Haleluya.”

### Upihbo ngbaan aajim

<sup>5</sup> Le nneel nyan ni libɔ̄rjal chee ki len ke, “Nimi bimɔ̄k ye timi Aawumbɔ̄r aatutum ki san u na, biwaatiib ni bipɔ̄ɔ̄ndam, ni mɔ̄mɔ̄k pak u man.”<sup>6</sup> Le m ɣjun nneel mu naahn kinipaak sakpej aaneel, ki naahn bunyɔ̄b sakpem aanyun aah fuuk pu na, ki fuuk ke uteal aah tar mpɔ̄ɔ̄n pu na, len ke, “Haleluya. Dan-

dana wee Tidindaan Uwumbor u kpa mpcoen momok na le joo tiwan momok.<sup>7</sup> Cha ti li moomi ki li kpa mpopiin sakpen ki nyuj u; ba pu? ni neer Upihbo ngbaan yoor upuu.<sup>8</sup> Le upuu gor ubaa.<sup>9</sup> Uwumbor tii u njikekenyaan nji bi chain ki wiin na, u di gbab.” Njikekenyaan ngbaan le ye Yesu aanib aatunyaan.

<sup>9</sup> Le Uwumbor aatuun ngbaan bui mi ke, “Nj mee ke: Binib bi Uwumbor yin bi ke bi dan ki nan ji Upihbo ngbaan aabondinn aajikaar na, Uwumbor aanyoor bi bi pu.” Le Uwumbor aatuun ngbaan ki len ke, “Uwumbor aabor ti ye tibamonn na le na.”

<sup>10</sup> Le m gbaan kitig utaafar chee, le ki ban ke m pak u. Le u bui ke m taa nya kina; ba pu? u mu po ye m ni nnaabitib bi joo tibor ti Yesu kpiir na aatuturjeer la, ke m pak Uwumbor baanja.

Ts, tibor ti Yesu kpiir na le tii waabon-abtiib mpcoen ke bi len.

### Unii u dik utapiin pu na

<sup>11</sup> Le m kan kitaapaak chuu piir, ki kan utapiin. U dik u pu na aayimbil le ye ke, “Mbamondaanyaan.” U yaa ji binib tibor kan, u tii bi baabamom, ki mu dii nsanyaan ki ti to butob.<sup>12</sup> Unimbil wob wiin ke mmiigaal na. Ubor aayikpupur ti wiir na bi uyil pu. Waayimbil nj mee u pu. Ubaa aa nyi liyimbil ngbaan see uma baanja.<sup>13</sup> U pee kikpalk ki bi di ki mocoen nsin ni na. Bi yin u ke “Uwumbor Aamjboln.”<sup>14</sup> Le Uwumbor aatuuntiib bi bi paacham na paa upuwob, ki dik itapiin pu, ki pee njikekepiin nji njan ki bi chain na.<sup>15</sup> Le kijaak aajuk ki ka na bi umob ni, ke u ti nyaj njinibol momok. U ga di tikur aadabil ki li joo bi mpcoen pu, ki ga ja bi ke binib aah taar njisubil pu libuusakpeln ponn

ni ki nyani njaanyun pu na, le ki mok bi Uwumbor Mpcoonsakpiindaan aah gee lijuul pu na.<sup>16</sup> Liyimbil nan njmee waakpalk pu, utaapaln chee ke, “Biborb momok Aaborkpaan ni dindatiib momok Aadindaan.”

<sup>17</sup> Le m kan Uwumbor aatuun ubaa si nwiin ni. Le u teen mpcoen pu ki yin inyoon imok laani paacham na, ke i dan ki nan ji tijikaar sakpenn ti Uwumbor ga tii i na,<sup>18</sup> ti ye biborb aawon, ni butob aajab aaninkpiib aawon, ni bipcoondam aawon, ni itaan aawon, ni binib bi dik i pu na aawon, ni binib momok aawon, bi ye binaagbiib ni bi kaa ye binaagbiib na, ni bi ye biwaatiib, ni bi ye bipcoondam na aawon la.

<sup>19</sup> Le m kan upeel ngbaan, ni dulnyaa aaborb ni baajab momok kuun tob chee, bi ti to unii u dik utean pu na, ni waatuuntiib butob.<sup>20</sup> Le u chuu upeel ngbaan, ni waabonabr u nan tun lijinjiir aatun unimbiin ni ki njmanni binib bi nan gaa upeel ngbaan aadaan ki dii waawaal na. Bi nan chuu upeel ngbaan ni waabonabr ngbaan ki di njaa chirbil aamii sakpiin ni, bifub.<sup>21</sup> Le unii u dik utean ngbaan pu na di kijaak aajuk ki bi umob ni na ku baajab ngbaan momok. Le inyoon momok jin baawon ki ti bab.

### Njibin lichur na

**20** Le m kan Uwumbor aatuun nyan ni paacham ki njub libuul li nyoo kaa kpa limok na aajaaleen aasaafii, ni tikululn sakpenn, unjaal ni.<sup>2</sup> U nan chuu kipeewanbiik ki ye kinimboj aan bi yin ki ke Uwaa u Yunn na, ki ki yin ki ke Defil,\* ki ki yin ki ke Sintana na, le ki di tikululn ngbaan buu ki,<sup>3</sup> ki di ki njaa libuul ngbaan ni, ki di libiil biin, ki laj, ke ki li bi ni ponn ni njibin lichur, ki taa

<sup>7</sup> 19:7 : Upihbo le ye Yesu. Upuu le ye waanib.

<sup>8</sup> 19:15 : Lik Ilahn 2.9.

<sup>\*</sup> 20:2 : Defil ni Sintana ye kinimboj aayimbil njiken la.

ki ḥmanni binib ki ti saa buyoonn ḥibin lichur ngbaan ga jer na. N-yoonn ngbaan aapuwob, see bi chuu buur ki, ki di ki lii, ni yunn siib.

<sup>4</sup> Le m kan ḥiborjal, ni binib bi ka ḥi pu na. Le Uwumbor tii bi nsan ke bi ji binib tibor. Bi nan ye binib bi nan kpo Yesu pu na aawiin. Binib nan chuu gii biyil lii; ba pu? bi nan moon tibəbamənn ti Yesu nan kpiir na ni Uwumbor aabor. Baa dii upeel ngbaan, bee waawaal, kaa gaa waadaan biyigbeer pu, bee bijaal pu. Bi nan kpa liməfal ki jin nnaan Kristo chee ḥibin lichur. <sup>5</sup> Bima le ye binib bi puen fikr nkun ni na. Bitekpiib bi gur na aan ki kan liməfal ki nan saa buyoonn ḥibin lichur ngbaan ga jer na. <sup>6</sup> Binib bi puen fikr nkun ni na kpa mpopiin; bi ye Uwumbor aanib la. Baan ki kpo lelee. Bi ga li ye bitotoorb ki tun lituln tii Uwumbor ni Kristo, ki ga ji nnaan u chee ḥibin lichur.

### Kinimbəj aalirn

<sup>7</sup> ḥibin lichur ngbaan yaa jer kan, Uwumbor ga cha bi nyan kinimbəj kiyondiik ni, ki di ki lii. <sup>8</sup> Le ki ga buen ki ti ḥmanni jinibol ḥi bi dulnyaa wee məmək ni na, ki ti kuun bi, bi ti to butəb. Jinibol ngbaan aayimbil le ye Gog, ni Magog. Bi wiir ke nnyusakpem aatambol aah wiir pu na, <sup>9</sup> ki chuun gbii dulnyaa aapepel məmək ni, ki si gob kitij ki Uwumbor gee ki, aan waanib bi nima chee na. Le mmii nyan ni Uwumbor do ki nan wun bi məmək. <sup>10</sup> Le Uwumbor chuu kinimbəj ki ḥmanni bi na, ki di ki ja chirbil aamii ni, upeel ngbaan ni waabənabr u nan ḥmanni binib na aah bi nin chee na. Le bi ga ji falaa, nwiin pu ni kinyeek ki ti saa n-yoonn mu kaa kpa ndoon na.

### Kookoo aabəjil

<sup>11</sup> Le m kan liborjal pipiln sakpeln, ni u ka li pu na. Le kitij ni paacham san nyan u chee, kaa ki bi. <sup>12</sup> Le m kan bitekpiib,

bi ye bipɔndam ni bi ye biwaatiib na, si liborjal ngbaan aanimbiin ni. Le u kpar tigbann, ki ki kpar kigbaŋ kiken, ki ye liməfal aagbaŋ na, ki jin bitekpiib tibor, baabor aah ḥmee tigbann ngbaan ponn ni pu na, baah nan tun pu na. <sup>13</sup> Le bitekpiib məmək nyan ni kitekpiitiŋ ni, ki si nima; binib bi nan bee nnyusakpem ponn ni na, bi mu nyan ni ki si nima. Le u jin bi məmək tibor baatuln aah ye pu na. <sup>14</sup> Le u di nkun ni kitekpiitiŋ ḥa mmii sakpiin ponn ni. Mmii ngbaan le ye lelee aakun. <sup>15</sup> Le bi di binib bimək aayimbil aa ḥmee liməfal aagbaŋ ni na ḥa mmii ngbaan ponn ni.

### Paacham pɔɔn ni kitipɔŋ

**21** Le m kan paacham pɔɔn, ni ki- tipɔŋ; njan aapaacham, ni njan aatiŋ na jer a. Nnyusakpem mu aa ki bi. <sup>2</sup> Le m kan kitij ki bi chain, ki ye Jerusalem pɔɔn na, nyan ni Uwumbor chee paacham, ki gor ke ubəndinn u ban u mən tichal na aah gor ubaa pu pu na. <sup>3</sup> Le m yun nneel sakpiin liborjal ngbaan chee len ke, “Lik, Uwumbor do bi binib chee, le u ga li bi bi chee. Bi ga li ye waanib. Uma ubaa ga li bi bi chee ki ga li ye Baawumbor, <sup>4</sup> ki ga per bi tinyunyunn məmək. Nkun aan ki li bi; mpombiin mu aan ki li bi; iwiil mu aan ki li bi; iween mu aan ki li bi; ba pu? tiwankpok məmək jer a.”

<sup>5</sup> Le Uwumbor u ka liborjal ngbaan pu na len ke, “Lik, m ḥa tiwan məmək nipɔnn.” Le u mu bui mi ke, “Ḥmee kina; ba pu? tibor timina ye mbamən, ki ga sil ḥa kina.” <sup>6</sup> Le u ki bui mi ke, “M ḥa tiwan ngbaan məmək doo. Min le ye Alfa ni Omega, mpiin ni ndoon ngbaan. Unii umək nnyunyuu chuu u na, m ga tii u liməfal aanyun, le waan pa ni-baa. <sup>7</sup> Unii umək nyaj na ga li yeh tiwan məmək. M ga li ye Waawumbor; u mu ga li ye maabo. <sup>8</sup> Le bijawaandam, ni binib bi yii mi na, ni bininsom, ni binikurb,

ni bidagoob, ni biboob, ni biwaadam, ni binyamondam mɔmɔk ga li bi chirbil aamii ni. Nima le ye lelee aakun na.”

### Jerusalem pɔɔn na

<sup>9</sup> Le Uwumbor aatuuntiib bilole bi joo kookoo aafalaa bilole ɔjisambil ɔjilole ponn ni na, bi ponn ni ubaa dan m chee ki nan bui mi ke, “Dan, aan m nan mɔk si Ubɔndinn u ye Upihbo ngbaan aapuu na.” <sup>10</sup> Le Uwumbor Aafuur Nyaan fir m pu, le Uwumbor aatuun ngbaan yoor mi ki di buen lijoosakpeln li fɔk na paab, le ki ti mɔk mi Jerusalem aatiŋ ki ye chain na nyan ni Uwumbor chee paacham, <sup>11</sup> ki wiin chain Uwumbor aanyuŋ pu, ki wiin chain ke lichachatakpal li kpa kidaak aan bi yin li ke Jaspa na aah wiin pu na. <sup>12</sup> Ligoln sakpeln li fɔk na mann gonn kitij ngbaan, ki kpa ibisamɔi kipiik ni ilee. Uwumbor aatuuntiib ponn ni kipiik ni bilee mu si ibisamɔi ngbaan mɔmɔk chee. Israel yaab aanibol kipiik ni ɔjilee aayimbil ɔjmee ibisamɔi kipiik ni ilee ngbaan mɔk pu. <sup>13</sup> Ibisamɔi itaa bi liwipuul wɔb, itaa mu bi ɔnjangan, itaa mu bi ɔnjangii, itaa mu bi li-wilir wɔb. <sup>14</sup> Ligoln ngbaan kpa ɔjidinyik kipiik ni ɔjilee. Upihbo na aakpambalb kipiik ni bilee aayimbil ɔjmee ɔjidinyik ngbaan mɔmɔk pu.

<sup>15</sup> Uwumbor aatuun u len m chee na joo salmaa aadabil u ti ɔŋaj kitij ngbaan ki lik kaah wiir pu na, ki ɔŋaj ki lik ligoln aabisamɔi aah waa pu na, ki ɔŋaj ki lik ligoln mu aah fɔk pu na. <sup>16</sup> Kitij ngbaan nan ye likpakpaln la. ɔjipepel mɔmɔk ɔjinnaa aah waa pu na ɔjak la. Le u di lidabil ngbaan ɔŋaj ki lik kitij ngbaan aah wiir pu na. Le ɔjipepel ɔjinnaa mɔmɔk ye mal lichur libaa ni ikui iŋmu, ki mu fɔk kina la. <sup>17</sup> Le u ɔŋaj ki lik ligoln aapepeen. Ni ye ɔjtaa ikui ilee ni kipiik ni ɔjiloob, binib aah ɔŋajni ɔjtaa pu na; le Uwumbor aatuun ngbaan ɔŋaj kina. <sup>18</sup> Bi nan di litakpanyaan li kpa kidaak aan bi yin li

ke jaspa na le maa ligoln ngbaan. Kitij ngbaan ye salmaa u bi chain na, ki wiin ke kinimbilik ki bi chain na. <sup>19-20</sup> Ligoln ngbaan aadinyik nan ye ɔjtakpanyaan ni kpa kidaak na mɔmɔk aabɔŋ la.

Njan aatakpal ngbaan nan ye litakpanyaan li bi yin li ke jaspa na, lileler nan ye litakpanyaan li bi yin li ke safir na, litatar nan ye litakpanyaan li bi yin li ke agate na, linanar nan ye litakpanyaan li bi yin li ke emeral na, lijmumjmur nan ye litakpanyaan li bi yin li ke sadoniks na, liloloob nan ye litakpanyaan li bi yin li ke kaneliann na, lilolole nan ye litakpanyaan li bi yin li ke krisolate na, lininiin nan ye litakpanyaan li bi yin li ke beril na, liwawaer nan ye litakpanyaan li bi yin li ke topas na, kipiik nan ye litakpanyaan li bi yin li ke kalsedoni na, kipiik ni libaa nan ye litakpanyaan li bi yin li ke jasinte na, kipiik ni nilee nan ye litakpanyaan li bi yin li ke ametis na.

<sup>21</sup> Le ibisamɔi kipiik ni ilee ngbaan nan ye ɔjtakpanyaan kipiik ni ɔjilee li bi yin li ke peral na; i mɔmɔk nan ye litakpanyaan libaabaa. Kitij ngbaan ponn ni aasan nan ye salmaa u bi chain ki naahn kinimbilik ki bi chain na la.

<sup>22</sup> Maa nan kan Uwumbor Aadichal kitij ngbaan ponn ni; ba pu? Tidindaan Uwumbor u yeh mpɔɔn mɔmɔk na, ni Upihbo ngbaan bi kitij ngbaan ponn ni, le binib dooni bi. <sup>23</sup> Kitij ngbaan aa ban nwiin ni uŋmal li wiin ki ponn ni; ba pu? Uwumbor aah wiin pu na woln ki ponn ni. Kaakaryaa ye Upihbo ngbaan la. <sup>24</sup> Kaawiin ga woln ɔjinibol aanib pu, ke bi chuun. Dulnyaa aaborb ga li joo ni baawanyaan ki ponn ni. <sup>25</sup> Kitij ng-

baan aagoln aabisamoi kipiik ni ilee aan piin nwiin pu. Kinyeek aan li bi nima. <sup>26</sup> Ijinibol aanib ga li joo ni baawanyaan ki ponn ni. <sup>27</sup> Tiwan ni kpa tijon na nibaa aan koo ni ki ponn ni. Binib bi dii njawaa na ponn ni ubaa aan koo ni. Binib bi molen inyamom na ponn ni ubaa mu aan koo ni. Binib bi aayimbiil ymee Upihbo ngbaan aamofal aagbaaj ni na baanja le ga koo ni.

**22** Uwumbor aatuun ngbaan nan mok mi limooll li ye limofal aanyun ki wiin chain na. Mu nyan ni Uwumbor ni Upihbo ngbaan aaborjal chee, ki puu dii kitij ngbaan aasan aakaasisik ni. <sup>2</sup> Le limofal aasui si limooll ngbaan aapepel momok yilee pu, le ki lu yisubil libiln ponn ni nfum kipiik ni mulee, uymal uymal ponn ni. Isui ngbaan aafar le tii yinibol mok laafee. <sup>3</sup> Tiwan ni Uwumbor ko na nibaa aan li bi kitij ngbaan ni.

Uwumbor ni Upihbo ngbaan aaborjal ga li bi ki ponn ni; le waatutum ga tun lituln tii u, <sup>4</sup> ki ga kan unimbiil wob. Waayimbil ga li bi biyigbeer pu. <sup>5</sup> Kinyeek aan ki li bi. Baan li ban karyaa, kaan li ban nwiin; ba pu? Tidindaan Uwumbor le ga li wiin bi pu. Bi ga li ye biborb ki cha n-yoonn mu kaa kpa ndoon na.

### Yesu aah ga nan gir ni pu na

<sup>6</sup> Le Uwumbor aatuun ngbaan bui mi ke, “Tibor ngbaan ye mbamom ki ga sil ja. Tidindaan Uwumbor u di Waafuur Nyaan tii waabonabiib na tun ni waatuun u nan mok waatutum tiwan ni ga ja mala na.”

<sup>7</sup> T, Yesu len ke, “Li pel man, m ga gir ni mala. Binib bi kii kigbaaj kee aabor ti tuk timi tiwan ni ga ja na, Uwumbor aanyoor bi bi pu.”

<sup>8</sup> Min Jonn le yun ki kan tiwan nimina. Maah yun ki kan ni momok doo na, le m gbaan kitij, Uwumbor aatuun u mok mi tiwan ngbaan na aanimbiin ni, ki ban

ke m pak u. <sup>9</sup> Le u bui mi ke, “Taa ja kina. Pak Uwumbor baanja. M mu ye saatutujeer ubaa la, ni Uwumbor aabonabiib bi ye aanaabitiib na aatutujeer la, ni binib bi kii kigbaaj kee aabor na aatutujeer la.” <sup>10</sup> Le u ki bui mi ke, “Kigbaaj kee aabor ti tuk timi tibor ti ga ja na, taa joo ti aabaa; ba pu? naan yunn, ti ga ja. <sup>11</sup> Unii umok tun lituln li kaa jan na, u li beenin tun kina. Unii umok tun tijon aatuln na, u li beenin tun kina. Unii umok tun lituln li jan na, u li beenin tun kina. Unii umok bi chain na, u li beenin bi chain.”

<sup>12</sup> Yesu len ke, “Li pel man, m ga gir ni mala, ki ga li joo ni ipiin ki nan tii unii momok ipiin waatuln aah jeer pu na. <sup>13</sup> Min le ye Alfa ni Omega, jan yoo ni gbelngbeln yoo, mpiin ngbaan ni ndoon ngbaan.”

<sup>14</sup> T, binib bi finn baawanpeenkaan ki ja ni chain na, Uwumbor aanyoor bi bi pu. Bi ga li kpa nsan ke bi moo limofal aasubil, ki dii kitij ngbaan aabisamoi ni ki koo ni. <sup>15</sup> Le tiniwanbir, ni biboob, ni bidagoob, ni binikurb, ni biwaadam, ni binyamondam, ni bijmanjmannim ma kan, baan koo ni kitij ngbaan ni.

<sup>16</sup> “Min Yesu tun ni maatuun u nan tuk nimi tibor tee, ni ti tuk maanib. M ye Ubor David aayaabil, ki ye lijmabil naanyuin li wiin chain na.”

<sup>17</sup> Uwumbor Aafuur Nyaan ni Yesu aaniib bui ke, “Dan.”

Unii umok jan na, u mu bui ke, “Dan.” Unii umok nnyunyuu chuu u na, u mu dan. Unii umok ban na, u mu dan ki nan nyu limofal aanyun, ki taa pa nibaa.

### Kookoo aabor

<sup>18</sup> M sur unii umok jan kigbaaj kee aabor ti tuk timi tiwan ni ga ja na, unii ubaa yaa di tibor tiken kpee tibor ngbaan pu kan, Uwumbor ga di falaa u ymee kigbaaj kee ponn ni na kpee u. <sup>19</sup> Unii ubaa yaa bar kigbaaj kee aabor ti tuk timi ti-

wan ni ga ŋa na kan, Uwumbor aan cha  
u moo limɔfal aasubil, kaan cha u koo ni  
kitij ki bi chain na ponn ni, tiwanyaan  
ni bi ŋmee kigbaŋ kee ponn ni na.

<sup>20</sup>Yesu u tuk timi tibor tee na bui ke,  
“Een, m ga gir ni mala.”

Mbamɔn, Ndindaan Yesu, dan.

<sup>21</sup>Tidindaan Yesu ŋa tinyoor ŋa  
waanib mɔmɔk pu. Amii.